


GINITAĀO VARIĀUNA



The New Testament in the Sinaugoro Language of Papua New
Guinea

GINITAĀO VARIĀUNA
The New Testament in the Sinaugoro Language of Papua New Guinea
Nupela Testamen long tokples Sinaugoro long Niugini

Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 18 Apr 2025 from source files dated 31 Aug 2023
a998e4ce-f2f7-5577-968e-5d2feef358f1

Contents

MATAIO	1
MAREKO	68
LUKA	108
IOANE	176
APOSTOLO	229
ROMA	293
1 KORINTO	325
2 KORINTO	356
GALATIA	379
EFESO	391
FILIPPI	402
KOLOSE	409
1 TESALONIKA	417
2 TESALONIKA	423
1 TIMOTEO	427
2 TIMOTEO	436
TITO	442
FILEMONA	446
HEBERU	448
IAKOBO	470
1 PETERO	478
2 PETERO	487
1 IOANE	492
2 IOANE	499
3 IOANE	501
IUDAS	503
APOKALUPO	506

VARI NAMONA MATAIO NA ETOREATO

Mataio vaġa-foforina guruġari

Mataio arana ta tu Levi. Ġia tovotovonai tu takesi gogo tarimana, senaġi Iesu na ekeaiato, benamo ġena mero ai eiaġoto.

Ġia tu Iuda tarimana, ma mai Vari Namona tu Iuda tarimari ġeri etoreato.

Ġia na Iuda tarimari ekirarito, Iesu tu moġoni Barau na ekiraġi-toreato Kerisona o vevaġa-maġuri verena. Ginitaġo Guinena o Old Testament ai Keriso beiaġomani guruġana ġetoreato tu varau bema moġoni. Barau ġena guruġa tauri mabarari tu beġe vetoreni veġata (Mataio 5:17). Mataio na ġena Vari Namona nuġanai Keriso varina Old Testament ai ġekiraġi-toreato guruġari ġutuma ma ema torerito anina tu moġea.

Mataio na mai buka tu laġani 58 ema 70 fakari ai etoreato, mo tu Iesu emaseto murinai.

Mataio ġena toretore tu maiġesina eboioġaiato:

1. Iesu aiġesina eiaġomato besena ema ġena maġuri varina - karoa 1-2
2. Gena vetuġunaġi ġauveina bene sinaia ġana tauġena everovinato varina - karoa 3-4:11
3. Gena ġauvei esinaiato, evevaġa-ribato, eġobatato, e keve evaġa-namorito variri - karoa 4:12-25:46
4. Gena miduġumidigu varina - karoa 26-27
5. Mase na evariġisi-ġenoġoito ema ġena mero etuġurito variri - karoa 28

Iesu eiaġomato besena

¹ Iesu Keriso emaġurito, tubuna ġatana ġerina eiaġomato varina tu maiġa: Iesu tu Davida garakana, Davida tu Aberahamo garakana.

² Aberahamo tu Isako tamana; Isako tu Iakobo tamana; Iakobo tu Iuda ma kakana ema tarina merori ġesi tamari;

³ Iuda tu Perese e Sera tamari, sinari tu Tamar; Perese tu Hesron tamana; Hesron tu Ram tamana;

⁴ Ram tu Aminadab tamana; Aminadab tu Nasona tamana; Nasona tu Salmon tamana;

⁵ Salmon tu Boas tamana, Boas sinana tu Rahaba; Boas tu Obed tamana, Obed sinana tu Ruta; Obed tu Iese tamana;

⁶ Iese tu Kini Davida tamana.

Davida tu Solomona tamana. Solomona tu Uria ġaraġona ġenana emaġurito, (Uria ġaraġona etava-verariato murinai);

⁷ Solomona tu Rehoboam tamana; Rehoboam tu Abia tamana; Abia tu Asa tamana;

⁸ Asa tu Iehosafat tamana; Iehosafat tu Ioram tamana; Ioram tu Usia tamana;

⁹ Usia tu Iotam tamana; Iotam tu Ahasa tamana; Ahasa tu Hesekia tamana;

¹⁰ Hesekia tu Manase tamana; Manase tu Amon tamana; Amon tu Iosia tamana;

¹¹ Iosia tu Iekonia ma tarina merori ġesi tamari. Mo ġaro ai Babulona tarimari na Isaraela tarimari ġeġabi-iaġorito Babulona ġana.

¹² Babulona ġana ġeġabi-iaġorito murinai, Iesu eiaġomato besena ema ġemaġurito varina tu maiġa: Iekonia tu Sealtiele tamana; Sealtiele tu Serubabele tamana;

¹³ Serubabele tu Abiud tamana; Abiud tu Eliakim tamana; Eliakim tu Asoro tamana;

¹⁴ Asoro tu Sadok tamana; Sadok tu Akim tamana; Akim tu Eliud tamana;

¹⁵ Eliud tu Eleasara tamana; Eleasara tu Matan tamana; Matan tu Iakobo tamana;

¹⁶ Iakobo tu Iosefa tamana, Iosefa ġaraġona tu Maria. Maria ġenana Iesu emaġurito; Iesu arana ġekiraġiani Keriso ġetoni. (Keriso anina tu Barau na ekiraġi-toreato vevaġa-maġuri tauna).

¹⁷ Ġuru mabarari Aberahamo ġenana eiaġomato mo Kini Davida tu ġuru gabanana vasivasi (14), e Davida ġenana eiaġomato mo Babulona ġana ġeġabi-iaġorito tu ġuru gabanana vasivasi (14), ema Babulona ġana ġeġabi-iaġorito negana na eiaġomato mo Keriso tu ġuru gabanana vasivasi (14).

Iesu eġorato

Luka 2:1-7

¹⁸ Iesu Keriso tu maiġesi eġorato: Ġia sinana Maria tu Iosefa kirakauna, senaġi ġia tauri ruarua tu roġosi roġo beġene veġaraġo nuġanai, Iauka Veaġa na mero evaġa-ġoraiato Maria diana nuġanai.

¹⁹ Iosefa, Maria ġaraġona, tu vei iobukaiobuka tarimana, ema asi eurato, tarimarima ġoirari ai Maria bene vaġa-maiakaia. Moġesina naima ġena ura tu, vekure-toġai vau Maria bene dobi-kwanea etato.

²⁰ Ġia moġesi etuġamaġito-ġoi nuġanai, Vereġauka ġena aneru ta nuvi ai efoforito, benamo ekiraiato, ekirato, “Iosefa, Davida natuna, kirakaumu Maria ġabiraġena garina asi bono vei, korana ġia tu Iauka Veaġa na mero bevaġa-ġorai ġia diana nuġanai.

²¹ Ġia na mero ta beġabiani, arana bono vatoa Iesu, (Iesu anina tu vevaġa-maġuri tauna); korana ġia na ġena tarimarima ġeri rakava ġerina bevaġa-maġuririni.”

²² Maġeri dagara mabarari ġeġorato tu, Vereġauka na peroveta tarimana muruna na ekiraġirito guruġari bene vaġa-moġoniri ġana, ekirato,

²³ “Ġoġitaia, ġuiato ta bekuġani, mero ta beġabiani, mo mero keina arana beġe vatoani Emanuela.”

Emanuela anina tu ‘Barau tu ġita sevisevirai.’

²⁴ Iosefa gena na etataġato nai tu, Vereġauka ġena aneru na ekiraiato veigari eveirito. Maria eġabi-raġeato, benamo eġaraġoato.

²⁵ Senaġi ġia ġesi asi ġegenasebonato mo, natuna eġabiato. Benamo mero arana evatoato, Iesu.

2

Iaunega tarimari ġaro-raġeraġena rekena na ġeiaġomato

¹ Iesu tu Iudea tanonai vanuġa ta arana Betelehema ai emaġurito. Mo tu Kini Heroda na Iudea tanona eġitaġauato-ġoi neganai. Iesu emaġurito murinai, iaunega tarimari tu ġaro eraġeni rekena na ġeiaġomato, Ierusalem-mai ġema-raġasito.

² Benamo ġevedanaġito, ġekirato, “Iuda tarimari ġeri kini ta bemaġuri ġetoni tu ainai? Ġia ġena visiġu baġa ġitaia ġaro eraġeni rekenai. Ġai tu ġia toma-rakarigo vinina baġa iaġoma.”

³ Kini Heroda na mo guruġa eseġaġiato nai, nuġana eketo-bokoto, ema Ierusema tarimari mabarari maki.

4 Benamo ġia na Rubu Veāġa vereri baregori e taravatu vaġa-riba-iaġina tarimari mabarari evaġa-vegogorito, benamo edanaġirito, ekirato, “Peroveta tarimari tu kara ġetato, Keriso, (Barau na ekiraġi-toreato vevaġa-maġuri tauna), tu ainai bemaġurini?”

5 Ġia na ġevaġa-veseato, ġekirato, “Betelehema vanuġana, mo tu Iudea tanonai, korana peroveta tarimana Mika na maġesi etoreato,

6 ‘Betelehema o, Iudea tanonai otanuni vanuġana, Iuda vanuġari vekar-avari ai ġoi tu dia vanuġa misina, asi arana vanuġana ta, korana tu veġorikau tauna ta ġoi ġemuna beiaġomani, ġia na au ġegu Isaraela tarimari beguine-iaġirini.’”

7 Benamo Heroda na iaunega tarimari vekuretoġai ekearito, benamo edanaġi-ginikau ginikaurito, ekirato, kamara ġaro korikori ai visiġu eforito.

8 Benamo etuġurito Betelehema ġana, ekirato, “Ġoiāġo, mero misina boġonoa vetau-ginikaua, boġo doġariani neganai, boġonoma vaġa-ribaġu, be au maki bana iaġo, bana toma-rakarigo vinia.”

9 Heroda ġena guruġa ġeseġaġiato murinai, ma ġerakato dabara na. Dabara na ġeiaġoto-ġoi nuġanai, mo visiġu, ġaro eraġeni rekenai ġeġitaiato visiġuna, na eguine-iaġirito mo, mero misina ġena gena gabuna iatanai eruġa-tarito.

10 Ġia na mo visiġu ġeġitaiato nai, ġeiaku-rakavato.

11 Mo numai ġeraka-toġato nai, mero misina ma sinana Maria ġesi ġeġitarito, benamo ġevetui-tarito, ġetoma-rakarigoato. Moġa murinai ġeri farefare ġeġurarito dagarari ġekeorito, bena ġevarevare-viniato. Ġevarevare-viniato dagarari tu golo, e muramura arana frenkinsens, mai tu goġuna ma bonana namona muramurana, ema vedau muramurana arana muro.

12 Benamo Barau na nuvi ai evaġa-ribarito, ekirato, “Heroda ġenai asi boġono ġenoġoi.” Moġa lorinai dabara boruna na ġeri tanobara e vanuġa ġana ġeġenoġoito.

Iesu Aigupito ġana ġeġwa-iaġoato

13 Ġia ġerakato murinai, Vereġauka ġena aneru nuvi ai Iosefa ġenai eforito, ekirato, “Novaisiraġe, mero misina ma sinana ġesi Aigupito ġana noraga-ġori iaġori. Monai boġono tanu mo, au na ma bavaġa-guruġamuni, korana Heroda na mero misina evetauani, bene vaġi-masea etoni.”

14 Benamo Iosefa evariġisito, mero misina ma sinana ġesi eġabirito, boġi nuġanai Aigupito ġana ġeiaġoto.

15 Monai ġetanuto mo, Heroda emaseto. Moġesina Vereġauka na peroveta tarimana muruna na ekiraġiato guruġana ema moġonito, ekirato, “Aigupito na natuġu akea-rosiato.”

Heroda ġena guruġa lorinai mero misiri ġutuma ġevaġi-maserito

16 Heroda eriba-maoroto, mo iaunega tarimari na ġia tu ġeġofaiato nai, ebaru-rakava rakavato. Benamo vetari tarimari o soldia etuġurito, Betelehema e rikina tanori ai mero misiri ġeri maġuri laġaniri ruarua e gabivau ma ġemaġurito mabarari ġevaġi-maserito. Mo mero misiri ġeri maġuri laġanina ruarua ma murinai ġevaġi-maserito anina tu, iaunega tarimari na visiġu ġeġitaiato ġarona na, eiaġoto mo, Heroda eribato ġarona tu laġani ruarua kavana.

17 Mo ġaro ai Barau na peroveta tarimana Ieremia muruna na kara ekiraġiato guruġana tu ema moġonito, ekirato,

18 “Garo ta Rama vanuḡanai ḡeseḡaḡiatio, taḡi-koḡokoḡo e taḡi-vanorovanoro tu barego, Rahela natuna taḡiri eveini, e asi eurani beḡene vaḡa-magoa, korana natuna tu beḡe mase.”

Nasareta ḡana ḡeḡenoḡoito

19 Heroda emaseto murinai, Vereḡauka ḡena aneru Iosefa ḡenai nuvi ai ma efororito Aigupito ai.

20 Benamo mo aneru Iosefa ekiraiatio, ekiratio, “Novaisiraḡe, mero misina ma sinana ḡesi noḡabiri, Isaraela tanona ḡana ḡoiago. Korana tu mero misina beḡene vaḡi-masea ḡetato-ḡoi tarimari tu varau beḡe mase.”

21 Iosefa evarigisito, benamo mero misina ma sinana ḡesi eḡoririto, Isaraela tanona ḡana ḡeiaḡoto.

22 Senaḡi Iosefa eseḡaḡito, Akelao na Iudea eḡitaḡauato-ḡoi tamana Heroda gabunai, benamo mo ḡana iaḡo tu egarito. A Barau na nuvi ai evaḡa-ribaiatio ilailanai eraka-vanaḡito, eiaḡoto Galilea tanona rekena ḡana.

23 Galilea tanonai vanuḡa ta arana Nasaretai etanuto. Monana Barau na peroveta tarimari ḡerina Iesu ekiraḡiatio guruḡana emoḡonito, ekiratio, “ḡia tu Nasareta tarimanai beḡe kiragaiani.”

3

Ioane Babatiso eḡobatato

Ioane 1:19-28

1 Moḡeri ḡarori ai Ioane Babatiso eiaḡomato, tano fakanai Iudea nuḡanai eḡobatato-ḡoi, ekiratio,

2 “ḡemi rakava ḡerina ḡovetuḡamaḡi-kure, ema ḡoraka-kure Barau ḡenai, korana Guba Basileiana tu bevotu, (Barau ḡena veḡitaḡau seḡukana evaḡa-ruḡaiani maḡa).”

3 Mai Ioane maḡa tu Isaia peroveta tarimana na ekiraḡiatio-ḡoi, maḡesi ekiratio,

“Tarima ta tano fakanai ekeani, ekirani, ‘Vereḡauka ḡena dabara ḡoiarevaia, ḡena iaḡoma dabarana ḡovaḡa-maoromaoro.’”

4 Ioane ḡena dabuḡa tu kamela ḡuiri na ḡeveiatio, ḡena gabaḡau tu nanigosi kefina. ḡana ḡaniḡani dagarari tu madudu e gode nanuri moḡo.

5 Tarimarima Ierusalem na e Iudea mabarana na ema Ioridana douka vanuḡari mabarari na maki ḡeiaḡoto-ḡoi Ioane ḡenai.

6 ḡeri rakava ḡekiraḡi-foforirito-ḡoi vau, ebabatorito-ḡoi Ioridana ḡarukanai.

7 Farisea e Sadukea tarimari ḡutuma maki ḡia ḡenai ḡeiaḡoto bene babatorito ḡana. Ioane na eḡitarito nai, ekirarito, ekiratio, “ḡomi mota natu, dei na bekirami, Barau ḡena Kota baregona ḡarona ḡenana boḡo raga-maḡurini?”

8 ḡemi rakava ḡerina boḡono vetuḡamaḡi-kure, benamo ḡemi maḡuri ai ḡwaḡwa namori boḡono vaḡa-ḡwari.

9 Ema nuḡami ai asi boḡono kira, ‘Aberahamo tu ḡai tamama, (be Barau na beḡabi-raḡemani).’ Korana akiramini, Barau tu ma seḡukana, Aberahamo natuna tu mai fore ḡerina bevaḡa-ḡorarini!”

10 Toma koko tu ḡau korari ai varau beḡe toreri; moḡa lorinai ḡwaḡwa namori asi ḡevaḡa-ḡorarini ḡauri mabarari tu beḡe basirini, karavai beḡe fiu-raḡerini.

11 Deikara ġena rakava ġerina evetuġamaġi-kureni tarimana, au na tu nanu na ababatisoani. Senaġi au murigu na beiaġomani tarimana ġena seġuka tu lelevaġi, au ġegu seġuka maki evanaġiani, ema ġia ġena tamaka maki au na asi baġwa-rakaorakaoani riba. Ġia na tu Iauka Veaġa e karava na bebabatisomini.

12 Ġia ġimanai tu iareva-iareva dagarana, widi momona tu widi tauri ġenana bene iareva-ġitakauri ġana. Benamo widi tu ġena vaġa-vegogo numanai bevaġa-vegogorini, senaġi widi momona begabuani asi ebuseri karavanai.”

Ioane na Iesu ebabatisoato

Mareko 1:9-11; Luka 3:21-22

13 Moġa neganai Iesu tu Galilea vanuġana na Ioridana ġarukana ġana eiaġoto, Ioane na bene babatisoa ġana.

14 Senaġi Ioane na ekiraġoiato, ekirato, “Bere namo ġoi na au boro babatisogu. Karase nai au ġegu ai boiaġoma?”

15 A Iesu na evaġa-veseato, ekirato, “Veiġana noveia, korana veiġa iobukaibuka o Barau ġena ura veiġari mabarari bitana korana-iaġiri tu namo.” Benamo Ioane na Iesu ġena ura veiġana eveiato.

16 Iesu ebabatisoato, nanu na eraka-raġasito nuġanai, guba evekeo-fakato, benamo ġia na Barau Iaukana eġitaiato, pune kavana emariġoto ġia iatanai.

17 Ema garo ta guba na ekea-riġoto, ekirato, “Mai tu au Natugu, aura-viniani; ema ġia ġenai aiaku-rakavani maki.”

4

Diabolo o Satani na Iesu eriba-ġaniato

1 Moġa murinai Iauka Veaġa na Iesu tano fakana ġana eġori-iaġoato, Diabolo na bene riba-ġania ġana.

2 Ġaro e boġi gabana vasivasi (40) nuġari ai asi eġaniġanito, eġani-veaġato; moġa lorinai vito na eġabi-rakavaiato.

3 Benamo Veribaġani Tarimana Diabolo ġia ġenai eiaġoto, ekiraiato, ekirato, “Bema ġoi Barau Natuna nai, mai fore nokirari, be ġaniġani ai ġeiaġo.”

4 A Iesu na evaġa-veseato, ekirato, “Buka Veaġa nuġanai maġesi ekirani, ‘Tarimarima tu dia ġaniġani na moġo bemaġurini. Senaġi Barau ġena guruġa beġabi-raġerini e bekorana-iaġirini tarimana tu maġuri begabiani.’”

5 Benamo Diabolo na Ierusalem, siti veaġana, ġana eġori-iaġoato, Rubu Veaġa tuġuna vanigerenai evaġa-ruġakauato.

6 Benamo ekirato, “Bema ġoi Barau Natuna, mainana noburi-firiġo, korana Buka Veaġa nuġanai maġesi ekirani, ‘Barau na ġena aneru bevaġa-naġirini, benamo ġimari na beġe ġobemuni, beġe ġabi-vaismuni, kwakumu fore ai asi boraraiani.’”

7 Iesu na ma evaġa-veseato, ekirato, “Buka Veaġa nuġanai maki ekirani, ‘Vereġauka ġoi ġemu Barau asi bono riba-ġania.’”

8 Benamo Diabolo na Iesu eġori-raġeato ġoro baregona e maukana ta tuġunai, tanobara basileiari mabarari ma marevari namori e ma seġukari ġesi evaġa-ġitaiato,

9 ekirato, “Bema ġoiragu ai bovetui-tarini e au botoma-rakarioġo viniguni nai tu, maġeri mabarari au na bavanimuni.”

10 Benamo Iesu na ekiraiato, ekirato, “Satani, au ġeguna noraka-veġita. Korana Buka Veaġa nuġanai ekirani, ‘Vereġauka ġoi ġemu Barau bono tomarkariġo vinia, ġia moġo ġereġana vetuġunaġina bono iaġo-vini!’ ”

11 Benamo Diabolo na eraga-kwaneato. Aneru kotari Iesu ġenai ġeiaġoto, ġenariato.

Iesu ġena ġauvei esinaiato Galileai

Mareko 1:14-15; Luka 4:14-15

12 Iesu eseġaġito, Ioane ġe-diburaiato, benamo Galilea tanona ġana ma eġenoġoi-iaġoto.

13 Senaġi Nasareta vanuġana ma eragakwaneato, asi etanuto, eiaġoto, Kaperanaumai ea tanuto. Kaperanaumai tu Genesareta kouna sevina vanuġana ta, Sebulun e Naftali tanori nuġanai.

14 Moġa ġenana Isaia, peroveta tarimana, ġena guruġa emoġonito, ekirato,

15 “Sebulun e Naftali tanori ai ġotanuni tarimami o, Galilea kouna rikinai ema Ioridana ġarukana mo rekenai, irau bese tarimami, Barau asi ribami tarimami, ġemi Galilea tu moġa, ġoseġaġi.

16 Mukunai ġetanuto-ġoi tarimari tu mama barana varau ġeġitaiani. E mo dei mukuna furufuru tanonai ġetanuto-ġoi tarimari iatari ai mama varau bema fofori.”

17 Mo negai vau Iesu na ġena vari eġobata-iaġi-foforiato, ekirato, “Ġemi rakava ġerina ġovetuġamaġi-kure, ema ġoraka-kure Barau ġenai, korana Guba Basileiana tu bevotu, (Barau ġena veġitaġau seġukana evaġa-ruġaiani maiġa).”

Iesu na tarima vasivasi (4) ekearito, ġia murinai beġene raka

Mareko 1:16-20; Luka 5:1-11

18 Iesu Galilea kouna kone rikina na eraka-iaġoto-ġoi nuġanai, tarikaka ruarua, Simona, arana ta tu Petero, ma tarina Anduru ġesi eġitarito, ġeri reke kou ai ġefuato, korana ġia tauri ruarua tu maina tarimari.

19 Benamo Iesu na evaġa-guruġarito, ekirato, “Ġoiaġoma, murigu ai ġoma raka, be au na tu tarimarima maina viniri bana vaġa-ribami.”

20 Benamo maoromaoro ġeri reke ġeraga-kwanerito, Iesu murinai ġerakato.

21 Monana ġeraka-iaġoto-ġoi nai, Iesu na tarikaka ruarua ma eġitarito, Iakobo (o Iames) Sebedaio ma tarina Ioane ġesi; ġeri ġasi ai tamari Sebedaio ġesi ġeri reke ġwadareri ġeturirito. Iesu na ekearito,

22 benamo maoromaoro ġeri ġasi e tamari ġeraga-kwanerito, Iesu murinai ġerakato.

Iesu evevaġa-ribato ema keve tarimari evaġa-namorito

Luka 6:17-19

23 Iesu Galilea tanona mabarana erakaoto-ġoi, Iuda tarimari ġeri rubu nuġari ai evevaġa-ribato-ġoi, e Barau ġena Basileia, (ġena veġitaġau seġukana evaġa-ruġaiani), varina namona eġobata-iaġiato-ġoi. Ema tarimarima ġeri keve e midigu irauirau mabarari evaġa-namorito.

24 Ġia varina ġefuato, Siria tanona mabarana eġabiato, benamo tarimarima na ġeri keve tarimari mabarari ġia ġenai ġeġwa-iaġorito e ġeġori-iaġorito; Midigu irauirau, iauka rakavari na ġeboroġirito tarimari, ġue na evaġiani kevena, tauġani ġeġoġoġoġoni, e tauġaniri tavi tari ġemaseto tarimari, Iesu na mabarari evaġa-namorito.

25 Tarimarima ġutuma-bara ġia murinai ġerakato, Galilea na, Vanuġa Gabanana (10) na, Ierusalemna na, Iudea na, ema Ioridana ġarukana mo rekena na maki ġia ġekavaiaato.

5

Iesu ġoro tuġunai eġobatato

1 Iesu na tarima ġutuma-bara eġitarito, benamo ġoro tai eraġeto, iatanai etanu-tarito. Ġena mero ġia ġenai ġeiaġoto.

2 Benamo ġia na evaġa-riba matamarito, maiġesina ekirato:

Iaku e verere korikorina

Luka 6:20-23

3 “Manau tarimari, Barau ġenai moġo ġevetabekauni tarimari, tu beġene iaku, korana Barau ġena Basileia tu ġia ġeri.

4 Deidei toma ġenuġa-midigu midiguni tarimari tu beġene iaku, korana Barau na ġeri nuġa-midigumidigu bevaġa-magorini.

5 Manau tarimari tu beġene iaku, korana Barau na tanobara mabarana ġia bevinirini.

6 Veiġa iobukaibuka vitona ġevito-iaġiani e nanumasena ġenanumase-iaġiani tarimari tu beġene iaku, korana vau beġe ġani-maseni.

7 Vevetuġaġwa tarimari tu beġene iaku, korana Barau na ġia maki bevetuġa-ġwarini.

8 Deidei nuġari namo vedaurea tarimari tu beġene iaku, korana ġia na Barau beġe ġitaiani.

9 Deidei na toma vevaġa-maino veiġari ġevirini tarimari tu beġene iaku, korana Barau na ġia natunai bekiragirini.

10 Deidei na toma veiġa iobukaibukari ġevirini ġaramanai ġevaġa-midigu midigurini e ġevaġa-rakavarini tarimari tu beġene iaku, korana Guba Basileia tu ġia ġeri.

11 Bema au murigu ai ġorakani ġaramanai ġomi beġe mugumugu-iaġimini, beġe vaġa-midigu midigumini, e veiġa rakavari irauirau ġemi ai beġe kiragirini beġe ġofaġofa-iaġimini nai, boġono iaku.

12 Boġono iaku, boġono verere, korana Barau na voimi baregona bevinimini gubai. Maiġesina veiġa ilailana, ġomi murimi tarimari, peroveta tarimari guineri, na maki moġesi ġevaġa-rakavarito.”

Damena e mama

Mareko 9:50; Luka 14:34-35

13 “Ġomi tu tanobara damenana. Bema damena mamina korikorina bekorini nai, kamara dabarai mamina ma beġenoġoini? Mai tu varau berakava, asi ġena namo ta. Moġa lorinai beġe fitoġaiani, benamo tarimarima kwakuri na ma beġe fanafana-tariani.

14 Ġomi tu tanobara mamana. Ġoro tuġunai ġevaġa-ruġaiato vanuġana tu asi bevekuretoġani riba.

15 Lamefa beġe gabuani maki, ġuro gaburenai asi beġe toreani, senaġina lamefa toretorena fatana korikorinai beġe tore-kauani. Benamo ġia mana na numa tarimari mabarari bevinirini.

16 Ilailana, ġomi ġemi mama tarimarima ġoirari ai moġesi boġono vaġa-foforiri, be ġemi veiġa namori beġene ġitari, benamo Tamami gubai etanuni tu beġene vaġa-raġea.”

Iesu ema taravatu

17 “Maiġesina asi boġono tuġa-maġi, au aiaġomato tu, Mose ġena taravatu e peroveta tarimari ġeri guruġa asi aniri ai bana vaġa-iaġori ġana. Asiġina. Au tu asi aiaġomato moġeri guruġa asi tauri ai bana vaġa-iaġori ġana, senaġi bana vaġa-moġoniri e bana vaġa-kori ginikauri uranai aiaġomato.

18 Moġoni akira-mini, guba e tanbara roġo ġetanuni nuġanai, taravatu ġena leta misina korokorona ta o ġena koma ta asiġina ġinavaġi berekwa-rekwani, beiaġoni mo, taravatu mabarari tauri korikori beġea ġorani.

19 Moġa lorinai, tarima ta na taravatu misina korokorona ta bekira-sirivaġi viniani, ema ġena ura veġanai tarima kotari mai veġa ilailana ma bea vaġa-ribarini, ġia tu Guba Basileiai gabi tarimanai beġe kiraġiani. Senaġina tarima ta na taravatu bekorana-iaġirini ema tarima kotari ma bea vaġa-riba iaġirini, ġia tu guine tarimanai beġe kiraġiani Guba Basileia nugaġi.

20 Akira-korikorimini, bema ġomi ġemi vei-iobukaiobuka na Farisea e taravatu ġevevaġa-riba iaġiani tarimari ġeri vei-iobukaiobuka asi bevanaġiani nai, ġomi tu Guba Basileia nugaġi asi boġo raka-toġani, asiġina ġinavaġi.”

Vaġivaġi

Luka 12:57-59

21 “Ġomi ma ribami, tarima guineri na taravatu guruġari ġeġabirito, ġekirato, ‘Asi bono vaġivaġi! A deikara na tarima ta bevaġiani nai, ġia tu Kota gabuna ġana beiaġoni.’

22 Senaġi toma au na akiramini: Tarima ta tarikakana bebaru-viniani nai, ġia tu Kota gabunai beġe danaġiani. E dei na tarikakana beguruġa-rakava viniani nai, ġia tu Kota baranai beġe vaġa-ruġaiani. Ema dei na tarikakana bekiraiani, ‘Ġoi tu babo korikori’ betoni nai, ġia tu asi ebuseni karavana ġana beiaġoni.

23 Moġa lorinai, bema ġemu varevare dagnarana fata veaġana iatanai bono torekaua, Barau bono vinia otoni nuġanai, ġoi tarikamu otuġamaġiani, ġia ma ġena meto ġoi ġemu ai,

24 benamo ġemu varevare dagnarana fata veaġana ġoiranai noragakwanea, noiaġo, tarikakamu ġesi maino boġono ġabia roġo, gabivau bono ġenoġoi-iaġo, ġemu varevare dagnarana fata veaġanai bono torea Barau ġena.

25 Ġoi ebaru-vinimuni tarimana ġesi maino boġono raga-ġabia, Kota gabuna ġana roġo mani ġoraka-vegogoni nuġanai. Korana ebaru-vinimuni tarimana na Kota eseġaġini tarimana ġimanai bea tore-kaumuni ġesi, ema Kota eseġaġini tarimana na dibura numana ġitaġauna tarimana ġimanai betoremuni, benamo ġia na dibura numana nuġanai bebiri-ġaumuni garina.

26 Au na akira-korikorimini: Monana asi roġo boraka-rosini, beiaġoni mo, ġemu meto voina bodava-ġosiani.”

Veġura-vanaġi

27 “Ġomi ma ribami, tarima guineri na taravatu guruġari ġeġabirito, ġekirato, ‘Asi bono veġura-vanaġi!’

28 Senaġi au na akiramini: Deikara na tarima ta ġaraġona beġita-karakaraiani ma eurani bene ġabia ġia ġena, ġia tu nuġana tuġamaġina ġenana varau beveġura-vanaġi mo vavine ġenai.

29 Bema ġoi matamu aroribana na evaġa-rakavamuni nai, bono ġibovagaia, bono fitoġaia! Korana tauġanimu rakavana rekena berekwa-rekwani tu namo, a asi namo tauġanimu mabarana karava asi ebuseni gabunai beġe fiu-kauani.

³⁰ Ma bema ǵoi ǵimamu aroribana na evaǵa-rakavamuni nai, bono basi-ǵutua, bono fitoǵaia. Veiǵa namona tu, tauǵanimu rakavana rekena bono fitoǵa-guinea, be tauǵanimu mabarana karava eǵara-vanaǵi vanaǵini gabuna ǵana asi bene iaǵo.”

Vavine tuǵuraka

Mataio 19:9; Mareko 10:11-12; Luka 16:18

³¹ “Tarima guineri na taravatu guruǵari ǵeǵabirito, ǵekirato, ‘Tau ta ǵaraǵona betuǵu-rakaiani nai, ǵia na veǵaraǵo ruǵaruǵana fefana bene torevinia.’

³² Senaǵina au na akiramini: Bema tarima ta ǵaraǵona betuǵu-dobiani, senaǵi vavine tu veǵura-vanaǵi veiǵari asi eveini, mo tau na ǵaraǵona tu veǵuravanaǵi vavinena i evaǵa-iaǵoani. Ema deikara na etuǵu-rakaiato vavinena beǵaraǵoani tarimana tu, beveǵura-vanaǵini.”

Guruǵatore

³³ “Ǵita senera ǵevaǵa-ribarito guruǵari ǵomi tu ma ribami: ‘Ǵemi guruǵatore asi boǵono vaǵa-rakavaia, senaǵi Vereǵauka ǵoiranai ǵokiraǵi-toreto dagarari boǵono veiri.’

³⁴ Senaǵi au na akiramini: Asi boǵono guruǵatore veǵata! Ǵemi guruǵa vaǵa-gwaǵiǵiri ǵana guba asi boǵono kiraǵia, guba aranai asi boǵono guruǵatore, korana ǵia tu Barau ǵena terona;

³⁵ o tanobara aranai maki asiǵina, korana ǵia tu Barau kwakuna ǵena fanakau dagarana; o Ieruselema aranai, korana ǵia tu Kini baregona ǵena siti.

³⁶ Ǵoi debamu, ǵemu maǵuri, maki asi bono kiraǵia ǵemu guruǵatore vaǵa-gwaǵiǵina ǵana, korana ǵoi na ǵuimu sebona ta asi bovaǵa-kurokuroani e asi bovaǵa-dubadubaiani riba.

³⁷ Namona tu maǵa: Ǵemu guruǵa bono kiraǵia, ‘Oi’ bene oi e ‘Asiǵina’ bene asiǵina. Moǵa moǵo, a guruǵa tari ma okiraǵirini tu Tarima Rakavana, Satani, ǵenana eiaǵomani.”

Evaǵa-rakavamuni tarimana voina asi bono veia

Luka 6:29-30

³⁸ “Tarima guineri ǵevaǵa-ribarito guruǵari ǵomi tu ma ribami, maǵesi ǵekirato: ‘Mata voina mata e doǵa voina doǵa.’

³⁹ Senaǵina au na akiramini, veiǵa rakavana evei-vinimuni tarimana asi bono veiǵa rakava-vinia. Bema tarima ta na taǵomu aroribana beforoani nai, taǵomu kaurina ma bono vinia maki.

⁴⁰ E bema tarima ta na Kotai betoremuni ǵemu sedi bene ǵabia ǵana nai, ǵemu koudi maki bono vinia.

⁴¹ Ema tarima ta na belau-naǵimuni, kilomita sebonai bono kavaia betoni nai, kilomita ruarua ai ma bono raka ǵia ǵesi.

⁴² Ema enoǵinoǵini tarimana bono vinia, e ǵemu ai bene ǵabitore etoni tarimana maki asi bono kira-sirivaǵi vinia.”

Ǵevaǵa-rakavamuni tarimari bono ura-viniri

Luka 6:27-28; 6:32-36

⁴³ “Tarima guineri ǵevaǵa-ribarito taravaturi ma ribami, ǵekirato: ‘Ǵoi sevimu tarimana bono ura-vinia, a evaǵa-rakavamuni tarimana bono vaǵa-rakavaia.’

44 Senaġina au na akiramini: Ġebaru-vinimini tarimari boġono ura-viniri, e dei na ġevaġa-rakavamini tarimari maki iatari ai boġono ġauġau.

45 Maġa ġenana boġo vaġa-foforiani, ġomi tu Tamami gubai etanuni na natunai evaġa-iaġomito. Korana ġia na ġaro tu veġa rakava tarimari e veġa namo tarimari iatari ai evaġa-raġekauani, ema ġura maki veġa iobukaiobuka e veġa ġeġeva-ġeġeva tarimari ġeri etuġu-rigoani.

46 Bema ġoura-vinirini tarimari tu ġomi ġeura-vinimini tarimari moġo nai, kamara varevare namona boġo ġabiani? Takesi ġegogoni tarimari o ġofaġofa tarimari na maġesina maki ġeveiani.

47 Ema tarikakami moġo boġo vaġa-namorini, ġemi namo tu kara? Barau asi ribari tarimari na maki mai veġa ġeveiani.

48 Moġa lorinaġi ġomi tu asi vetoukaumi boġono tanu, ġomi Tamami gubai etanuni asi vetou-kauna kavana.”

6

Vini korikorina rabu tarimari ġeri ai

1 “Rorimi boġono vetore, ġemi veġa namori tarimarima ġoirari ai asi boġono vaġa-foforiri, ġia na beġene vaġa-raġemi ġana. Maġeri boġo veirini nai, Tamami gubai etanuni ġenana voimi asi boġo ġabini.

2 Moġesi nai, ġemu varevare rabu tarimari bovinirini nai, asi bono ġobata-iaġia ma kibimu ġesi, ġofaġofa tarimari rubu ai e vanuġa ġatamanai ġeveini kavana, tarimarima na beġene vevato-iaġiri ġana. Akira-korikorimini, ġia tu tarimarima na ġevaġa-raġerini, be voiri tu varau ġeġabirito.

3 Sena-ġina ġoi ġemu varevare asi ġena-ġana tarimana novinia botoni nai, ġimamu kaurina asi bene riba, ġoi ġimamu aroribana na kara eveiani.

4 Be ġemu varevare vekuretoġai bono vini. Ema Tamamu na, kara eġorani vekure-toġai eġitarini, ġia na vau voimu bevinimuni.”

Vereġauka ġena ġauġau

Luka 11:2-4

5 “Bema boġo ġauġauni nai, ġofaġofa tarimari kavana asi boġono iaġo! Ġia ruġaruġari ai ma iakuri ġesi ġeġuriġurini, rubu nuġari ai e vanuġa ġatamanai ema dabarai maki, tarimarima na beġene ġitari ġana. Au na akira-korikorimini, ġia voiri varau ġeġabito.

6 A ġoi ourani bono ġauġau otoni nai, ġemu numa daiġutuna nuġanai bono rakatoġa, ġatama-boka bono biri-ġaua, monai vau Tamamu bono noġi-vinia, ġia tu vekuretoġai etanuni. Ema Tamamu na, kara eġorani vekuretoġai eġitarini, ġia na vau voimu bevinimuni.

7 Ġomi boġo ġauġauni nai, asi boġono kiraġi ġenoġoi-ġenoġoi guruġa asi aniri ġeri ai, Barau asi ribari tarimari ġeveini kavana. Ġia ġetuġamaġini, ġeri guruġa vovoka ġekiraġirini naima, Barau na besegaġirini.

8 Ġia kavari asi boġono iaġo. Korana ġomi na kara ġoura-vinirini, Tamami na eriba-guineani, gabivau ġomi na ġonoġi-viniani.

9 Maġesina boġono ġuriġuri:

‘Ġai Tamama o, gubai otanuni; ġoi aramu baġana vaġa-veaġaia;

10 ġemu Basileia bene iaġoma; ġemu ura tanobarai baġana veia, gubai ġeveiani kavana.

11 Ġema-ġama toma bono vinima.

12 Ġema rakava notuġamaġi-fitoġari, ġai ġevaġa-rakavamani tarimari ġeri rakava ġatuġamaġi-fitoġarini vaġa-ilailana.

13 Veribaġani ai asi bono ġori-kauma, a Rakava Tarimana, Satani, ġimana na bono vaġa-maġurima. [Korana Basileia tu ġoi ġemu, seġuka ġoi ġemu, mareva baregona ġoi ġemu, toma bene iaġo mo vanaġivanagi, Amen.]

14 Bema ġomi na ġevaġa-rakavamani tarimari ġeri rakava boġo tuġamaġi-fitoġarini nai, Tamami gubai etanuni na ġemi rakava maki betuġamaġi-fitoġarini.

15 Senaġina, bema ġomi na ġevaġa-rakavamani tarimari ġeri rakava asi boġo tuġamaġi-fitoġarini nai, Tamami na ġemi rakava maki asi betuġamaġi-fitoġarini.”

Ġaniveaġa

16 “Boġo ġani-veaġani nai, asi boġono boġe-vetuġa, ġofaġofa tarimari ġeveini kavari. Goirari ai ġevevaġa-fofori ġofakauni, tarimarima na mataboru beġene kira, ‘Geġani-veaġani kika’ beġene si. Akira-korikorimini, ġia voiri tu varau ġeġabirito.

17 A ġoi, bema bono ġani-veaġa botoni nai, debamu ai deoro bono tore e goiramu bono ġuriġia,

18 be tarimarima na asi beġene ribamu, ġoi tu oġani-veaġani, senaġina Tamamu veġuni ai moġo bene riba. Ema Tamamu na, kara eġorani vekuretoġai eġitarini, ġia na vau voimu bevinimuni.”

Ġemi farefare gubai boġono vaġa-vegogo

Luka 12:33-34

19 “Ġemi farefare tu mai tanobarai asi boġono vaġa-vegogo! Korana faro ema lalalala o rasta na beġe vaġa-rakavarini ġesi, ema lema tarimari na numa beġe dareani ema beġe lemarini.

20 Ġemi farefare gubai boġono vaġa-vegogo, faro e lalalala na asi beġe vaġa-rakavarini, ema lema tarimari na maki numa asi beġe dareani ema asi beġe lemarini riba.

21 Ġoi ġemu farefare ainai etanuni, ġoi nuġamu maki monai etanuni.”

Mata tu tauġani ġena mama

Luka 11:34-36

22 “Mata tu tauġani ġena lamefa kavana. Bema ġoi matamu namo nai, tauġanimu mabarana maki bemamani.

23 Senaġina bema ġoi matamu tu rakava nai, tauġanimu mabarana maki bemukunani. A bema mama ġoi nuġamu ai tu mukuna nai, mai mukuna tu bebarego-vedaureani!”

Tarima ta vere ruarua vetuġuri asi beiaġo-vinini riba

Luka 16:13

24 “Tarima ta na vere ruarua vetuġunaġiri asi beiaġo-vinirini riba. Korana ġia na ta tu asi beura-viniani, a ta tu beura-viniani; ta bevaġa-moġoniani, a ta tu beġofaġofa-iaġiani. Barau ema moni nega sebonai vetuġunaġiri asi boġo iaġo-vinirini riba.”

Asi boġono nuġa-vekwaragi

Luka 12:22-31

25 “Moġesi naima akiramini, ġemi maġuri asi boġono tuġamaġiri, kara boġo ġanini o boġo niuni; o tauġanimi kara na boġo dabuġarini. Aiġa tu

dagara barana, maḡuri ba ḡaniḡani? E aiḡa tu dagara barana, tauḡani ba dabuḡa?

²⁶ Gubai ḡerovoni manuri ḡoḡitari! Ġia tu asi ḡevarovaroni e asi ḡekwakwani, ema vamoka numari ai maki ḡaniḡani asi ḡevaḡa-vegogoni. Senaḡi Tamami gubai etanuni na eḡuburini. Ġomi tu dagara baregomi, a manu tu kei!

²⁷ Ġomi deikara onuḡa-vekwarāḡini nai, ḡemu maḡuri kota ma bovaḡa-maukaiani riba ba?

²⁸ Karase dabuḡa urari ai ḡove-tuḡamaḡi-vekwarāḡini? Boḡa veraverari ḡoḡitari, aiḡesi ḡegarani. Asi ḡeḡauveini e dabuḡa asi ḡeturini.

²⁹ Senaḡina akiramini, Kini Solomona ḡena vedabuḡa marevana maki ḡevanaḡiani.

³⁰ Mai tu Barau na tano ḡauḡari evaḡa-dabuḡarini, ḡia tu toma ḡegarani, a boinani tu karavai beḡe fiu-raḡerini, Barau tu moḡesina evaḡa-dabuḡarini. Ġia na ḡomi asi veḡatana bevaḡa-dabuḡamini, ei? Ġomi veḡabidadama misimisi tarimami!

³¹ Moḡesi nai, asi boḡono nuḡa-vekwarāḡi, asi boḡono kira, ‘Kara toma taḡanini?’ O ‘Kara toma taniuni?’ O ‘Kara toma tariḡoni?’

³² Barau asi ribari tarimari na maiḡeri dagara mabarari ḡeraga-vetaurini, a Tamami gubai etanuni tu ribana, ḡomi na maiḡeri ḡoura-vinirini.

³³ Senaḡina giniguine ḡia ḡena Basileia ema ḡena vei-iobukaiobuka boḡono vetau-ḡuineri, benamo manigeri dagara mabarari ḡomi bevinimini.

³⁴ Moḡesina naima boinani ḡaro tuḡamaḡi-vekwarāḡina asi boḡono vei; boinani ḡaro ḡena vekwarāḡi tu Barau ḡimanai. Toma ḡaro ḡena vekwarāḡi iatanai meto ma boḡo torekauani nai, kamasi boḡo ḡwaiiani?”

7

Tarimarima asi boḡono vetau-viniri

¹ “Tarimarima asi boḡono vetau-viniri, be Barau na maki asi bene vetau vinimi.

² Korana tu ḡomi ḡemi vetauvini ilailanai, ḡomi maki moḡesina moḡo Barau na bevetau-vinimini; ema aiḡesi ḡovevaḡa-vetovo vinirini, Barau na maki moḡesi bevevaḡa-vetovo vinimini.

³ Karase nai tarikakamu matanai libika oḡitaiani, senaḡi ḡau tubina ḡoi matamu nuḡanai maniḡa tu asi otuḡamaḡiani?

⁴ Kamara dabarai ḡoi tarikakamu okiraiani, ‘Ġata, au na roḡo matamu ai libika nakokia,’ senaḡina ḡoi tauḡemu matamu ai ḡau tubina ta etanuni?

⁵ Ġoi ḡofaḡofa taumu, guine tu ḡoi matamu ai ḡau tubina nokoki-vaḡia roḡo, benamo boboḡeboḡe-ginikauni vau, tarikakamu matanai libika bono ḡabi-vaḡia.

⁶ Dagara veaḡari kwaiva (o kira-sirivaḡi tarimari) asi boḡono viniri, ema ḡemi aḡeva maki asi boḡono fiu-rosiri bai ḡoirari ai! Kwakuri na beḡe fanataririni, benamo beḡe doḡe-kureni, ma beḡe dare-misi misimini garina.”

Noḡinoḡi, vetauvetau, seke-seke o fidifidi

Luka 11:9-13

⁷ “Noḡinoḡi ai Barau na bevini-mini, vetauvetau ai boḡo doḡarini, seke-seke ai ḡemi ḡatama boka bekeoani.

⁸ Korana benoḡi-noḡini tarimana tu beḡabini, bevetauni tarimana bedoḡarini, ema beseke-sekeni tarimana Barau na ḡena ḡatama-boka bekeoani.

9 Ğomi dei bema natumu merona ġaniġani benoġini nai, ġoi na fore boviniani?

10 O maġani-kone benoġini nai, mota boviniani?

11 Boġono tuġamaġi, ġomi tu rakava tarimami, senaġi dagara namori natumi viniviniri ma ribami, moġa lorinai ġomi Tamami gubai etanuni, ġia na dagara namori ġenoġi-viniani tarimari bevinirini veġatana!

12 Ğomi kara ġourani tarimarima na ġemi ai beġene veiri veiġari, ġia ġeri ai maki moġeri veiġa boġono veiri. Mose ġena taravatu e peroveta ġeri vevaġa-riba gurutari tauna korikorina tu moġa.”

Barau ġena Basileia rakatoġana

Luka 13:24

13 “Ğatama-boka kibobonai boġono rakatoġa. A mase gabuna ġana eiago ni dabarana tu baġaka, e ġena ġatama-boka tu barego rakava, ema ġutuma maki monai ġeraka-toġani.

14 Senaġi maġuri vanaġivanaġi ġana eiago ni ġatama bokana tu kibobo e dabara maki kei rakava, ema tarimarima viravira na moġo ġedoġariani.”

Peroveta tarimari ġofaġofari

Luka 6:43-44

15 “Rorimi boġono vetore peroveta tarimari ġofaġofari ġerina. Ğia ġomi ġemi ai ġeiaġomani tu ma mamoe dabuġari ġesi, senaġina nuġari ai ġeri tuġamaġi tu boġa kwaivari rakavari kavari.

16 Ğia ġwaġwari ai vau boġo ribarini. Vine ġwari (o grapes) tu ġau ma giniri ġerina asi ġebokoni, ema figi ġwari maki ġauġa ġiniġiniri ġeri ai asi ġeġabini.

17 Ğau namona ġenana ġwaġwana namona bevaġa-ġoraiani, a ġau rakavana ġenana maki ġwaġwana rakavana bevaġa-ġoraiani.

18 Ğau namona na ġwaġwa rakavana asi beġwani riba, ilailana ġau rakavana na ġwaġwa namona asi beġwani riba.

19 Ğwaġwa namori asi ġeġwani ġauri tu beġe basirini, ma karavai beġe fiu-raġerini.

20 Moġesina ilailanai peroveta tarimari ġofaġofari tu ġwaġwari ai boġo ribarini.

21 Dia ‘Vereġauka, Vereġauka,’ ġetoguni tarimari mabarari tu Guba Basileiai beġe raka-toġani. Asiġina. Deikara Tamagu gubai etanuni ekorana-iaġiani e ġena ura veiġari eveirini tarimana ġereġana moġo.

22 Kota baregona ġarona beaġasini nai, tarima ġutuma na beġe kiraguni, beġe kirani, ‘Vereġauka, Vereġauka, ġoi aramu ai ġaperovetato, e ġoi aramu ai iauka rakavari ġalai-vaġirito, ma ġoi aramu ai nuġa-farevaġi veiġa boruri ġutuma maki ġaveirito.’

23 Benamo au na bakirarini, bakirani, ‘Au asi ribagu ġomi. Ğeguna ġoraka-veġita, ġomi veiġa rakava tarimami!’ ”

Numa ruarua ragaragari tauri

Luka 6:47-49

24 “Moġa lorinai, tarima ta na ġegu guruġa maiġeri eseġaġirini, ma veiġari eveirini tu, tarima iaunegana na ġena numa fore iatari ai evaġa-ruġaiato kavana.

25 Ğura baregona eraguto, ġaruka mabarari ġeġabatarito, iavara asikeikeina eragato nai, mo numa edoriato; senaġina asi eġwa-lauato, korana ġia tu fore iatanai evaġa-ruaġaiato nai.

²⁶ A deikara na ġegu guruġa maiġeri eseġaġirini, senaġi veiġari tu asi eveirini, ġia tu tarima babona noġa, numa eragato nai, miri iatanai moġo evaġa-ruġaiato.

²⁷ Ġura baregona eraguto, ġaruka mabarari ġeġabatarito, iavara asikei eraġasito, mo numa edoriato nai, eġwa-lauato, benamo eġwa-rovorovoto.”

²⁸ Iesu na ġena ġobata guruġari maiġeri ekiraġi-ġosirito nai, mai vegogo tarimari ġutuma-bara na ġena vevaġa-riba guruġari ġeġaba-iaġirito.

²⁹ Korana ġena guruġa ma seġukana, dia ġeri taravatu ġevevaġa-riba iaġiato-ġoi tarimari ġeri guruġa kavana.

8

Iesu na lepera tarimana evaġa-namoato

Mareko 1:40-44; Luka 5:12-14

¹ Iesu ġoro tuġuna na ma emariġoto nai, tarima ġutuma-bara ġia murina na ġerakato.

² Benamo tarima ta ma leperana Iesu ġenai eiaġoto, ġoiranai evetui-tarito, ekirato, “Vereġauka, bema ġoi ourani nai, moġoni boiarevaguni, bovaġa-namoguni riba!”

³ Iesu na ġimana eduġi-roroġotoato, keve tarimana eġabi-karaiato, ekirato, “Aurani, be nonamo!” Benamo vaġa-sebo lepera na enamoto.

⁴ Iesu na evaġa-guruġaiato, ekirato, “Tarima ta asi bono kira-varaia. Noiaġo, Rubu Veaġa verena na bene ġitamu, ema veiareva varevare dagarari Mose na ekiraġiato ilailanai bono vinya; be tarimarima beġene riba, ġoi tu bonamo.”

Roma vetari verena ġena vetuġunaġi merona

Luka 7:1-10

⁵ Iesu Kaperanauma ai eraġasito nai, Roma vetari verena ta ġia ġenai eiaġoto, Iesu enoġiato,

⁶ ekirato, “Vereġauka, ġegu vetuġunaġi merona tauġanina asi eġarevani, be numai egena-taġoni, ema midigu maki barego eġanini.”

⁷ Iesu na ekiraiato, ekirato, “Au aiaġosini, be asi-vaġa-namoani.”

⁸ Vetari verena na evaġa-veseato, ekirato, “Vereġauka, au tu asi ilaila ġoi ġegu numai boraġe-kauni; senaġi ġoi noguruġa moġo, benamo au ġegu vetuġunaġi merona benamoni.

⁹ Au maki tarima kota ġeri veġitaġau gabureri ai, ema vetari tarimari o soldia tu au gaburegu ai. Au na ta bakiraiani, ‘Noraka!’, benamo berakani, ma ta bakiraiani, ‘Noiaġoma!’, benamo beiaġomani. Ema au ġegu vetuġunaġi merona bakiraiani, ‘Maiġa noveia!’, benamo beveiani.”

¹⁰ Iesu na ġena guruġa eseġaġiato nai, eġaba-rakavato. Benamo ġia murinai ġerakato tarimari evaġa-guruġarito, ekirato, “Au na akira-korikorimini, Isaraela nuġanai mai-ġesina veġabidadama ta roġosi bana doġaria.

¹¹ Au na akiramini maki, tarimarima ġutuma ġaro-raġe e ġaro-riġo rekeri na beġe iaġomani, Aberahamo, Isako, e Iakobo ġesi vereko baregonai beġe ġani-vegogoni Guba Basileiana nuġanai.

¹² Senaġina tovtovonai Barau na eġabi-virigirito tarimari, Basileia nuġanai beġene tanu etato tarimari tu, Barau na befiu-rosirini murikai, mukuna furufuru nuġanai. Monai beġe taġini, e gadikari maki beġe veġaratarini.”

13 Benamo Iesu na vetari verena ekiraiato, ekirato, “Noiaĝo, ĝemu numa ĝana! Boveĝabidadama lorinai, veigana beĝorani.” Ĝena vetuĝunaĝi merona mo horai varau enamoto.

Iesu na Simona ĝena taĝama evaĝa-namoato
Mareko 1:29-31; Luka 4:38-39

14 Iesu Petero ĝena numai eraka-toĝato. Monai Petero ĝena taĝama vavinenena ekeveto, tauĝanina eseĝukato, be egena-taĝoto-ĝoi, Iesu na eĝitaiato; 15 ĝimanai egabito, benamo ĝena keve ekorito, evaisi-raĝeto, benamo ĝia eĝubato.

Iesu na tarimarima ĝutuma evaĝa-namorito
Mareko 1:32-34; Luka 4:40-41

16 Lavilavi ai iauka rakavari na ĝeboroĝirito tarimari ĝutuma Iesu ĝenai ĝeĝori-iaĝorito. Iesu na moĝeri iauka rakavari ĝena guruĝa seĝukana ĝenana moĝo elai-vaĝirito, e keve tarimari mabarari maki evaĝa-namorito.

17 Maiĝeri veigā vaĝa-moĝoniri tu Isaia, peroveta tarimana, na ekiraĝiato kavana, ekirato, “Ĝia na ĝera midigumidigu eĝabi-veĝitarito, ema ĝera keve irauirau eĝwarito, evaĝa-namorito.”

Iesu murinai beĝene raka ĝetato tarimari
Luka 9:57-60

18 Iesu na tarimarima ĝutuma na ĝevegogo-ĝeĝeraĝiato eĝitarito, benamo ĝena mero ekirarito, ekirato, “Siveĝasi-vanaĝi, kou mo rekena ĝana.”

19 Nuĝanai taravatu evevaĝa-riba iaĝiato-ĝoi tarimana ta Iesu ĝenai eiaĝoto, ekirato, “Vevaĝa-riba tarimamu, ĝoi aigana boiaĝoni nai, au ĝoi murimu ai moĝo bana raka atoni.”

20 Iesu na ekiraiato, ekirato, “Boĝa kwaivari ma ĝeri kouĝa, ema manu ma ĝeri nuĝi, senaĝi Tarimarima Natuna tu asi ĝena gena gabuna.”

21 Iesu ĝena mero ta na maki evaĝa-guruĝaiato, ekirato, “Vereĝauka, mani ĝemu veigā, naĝenoĝoi, be tamagu roĝo naguria.”

22 Iesu na evaĝa-veseato, ekirato, “Murigu ai noma raka, mani tu noiaĝuiri; mase tarimari (o Barau asi ĝekorana-iaĝiani tarimari) na ĝeri mase tauĝeri na beĝene guriri.”

Iesu na iavara e geta o ureure ekira-ĝoirito
Mareko 4:36-41; Luka 8:22-25

23 Iesu ĝasi ai eraĝeto nai, ĝena mero maki ĝia ĝesi ĝeraĝe-sebonato.

24 Ĝeiaĝoto-ĝoi nai, asikauna iavara asikei kou ai eraĝasito, benamo ureure tu ĝasi nuĝanai ĝevebubu-ĝurato. A Iesu tu egenato-ĝoi.

25 Benamo ĝena mero ĝeiaĝoto ma ĝevaĝoato, ĝekirato, “Vereĝauka, novaĝa-maĝurima, ĝita tu mai taburunĝi, dori famaseni.

26 Iesu na evaĝa-veserito, ekirato, “Karase nai ĝogarini? Vegabidadama kei rakava tarimami!” Benamo Iesu evariĝisito, iavara ma ureurena ĝesi ekira-ĝoirito, benamo ĝedokoto, ĝemeĝomeĝo-tarito.

27 Tarimarima mabarari ĝeĝaba-rakavato, ĝekirato, “Mai tu kamara tarima se? Iavara e ureure na maki garona ĝeseĝaĝiani!”

Iesu na tarima ruarua iauka rakavari na ĝeboroĝirito evaĝa-namorito
Mareko 5:1-17; Luka 8:26-37

28 Galilea kouna tavina rekenaĝi, Gadara (o Gerasa) tarimari ĝeri tano ai, Iesu eraĝasito, benamo iauka rakavari na ĝeboroĝirito tarimari ruarua gara

kouğari na ġeiağomato-ğoi Iesu ġenai. Mai tarima ruarua tu ma gariri, moğa lorinai tarima ta mo dabara na asi eraka-vanağito-ğoi.

²⁹ Benamo tauri ruarua Iesu ġeğaba-viniato, ġekirato, “Barau Natuna o, kara ġai ġemai noveia otoni? Ġoi boiağoma maıa tu, noma vağa-midiguma ġana, ġaro korikorina roğosi roğo bene rağasi nuğanai, ei?”

³⁰ Monai, asi manağa lelevaği, bai serina ġedokadokato-ğoi.

³¹ Moğesina nai iauka rakavari na Iesu ġenoğiato, ġekirato, “Bema ġoi na ġai bolai-vağimani nai, notuğuma bai ġeri ai, ġia nuğari ai ġaraka-toğa.”

³² Iesu na ekirarito, ekirato, “Be ġoiago!” Benamo iauka rakavari mo tarima ruarua ġerina ġeraka-vağito, ġeiağoto, bai ġeri ai ġeraka-toğato. Benamo bai serina mabarana eğwa-bubu-lausiato, lalağa na ġekokosi-friğoto, kou ai ġeveğugutu-maseto.

³³ Bai ġitağauri tarimari ġeraga-kwareğato, vanuğa ġana ġeiağoto, vari mabarana ġekirağiato, ema iauka rakavari na ġeboroğirito tarimari ġeri ai kara ġeğorato mabarari maki ġevağa-foforirito.

³⁴ Benamo vanuğa tarimari mabarari ġeğoto-iağoto, Iesu beğene ġitaia ġana. Iesu ġenai ġerağasito nai, ġenoğiato, ġeri tano na bene raka-veğita.

9

Iesu na rakava etuğamaği-fitoğarito

¹ Iesu ġasi tai erağekauto, ma eğenoğito, kou na evanağito, ġena vanuğa korikori ġana eiağoto.

² Monai tarima kotari na tauğanina tavi ta emaseto tarimana ta gedai genagenanai Iesu ġenai ġeğwa-iağoto. Iesu na ġeri veğabidadama vetoğana aiğa barana eğitaıato, benamo keve rakava tarimana ekiraiato, ekirato, “Natugu, bono kokore, ġemu rakava batuğamaği-fitoğari.”

³ Benamo taravatu ġevevağa-riba iağiato-ğoi tarimari tauğeri maiğesina ġekirato, “Mai tarima na Barau ekira-fitoğaiani.”

⁴ Iesu na ribana ġia kara ġetuğa-mağirito-ğoi nai evağa-guruğarito, ekirato, “Karase nai maniğesina tuğamaği rakavari ġoğabini?”

⁵ Aiğesina baguruğani tu merağa, ‘Ġemu rakava batuğamaği-fitoğari’ banasi, ba bara kira, ‘Noruğa-vaısi, noraka’ barasi?

⁶ Au na navağa-ğitami, Tarimarima Natuna tu ma ġena maoro, rakava betuğamaği-fitoğarini tanobarai.” Benamo Iesu na keve rakava tarimana evağa-guruğaiato, ekirato, “Novariğisi, ġemu geda noğabia, be numa ġana noiağo!”

⁷ Benamo mo tarima evaisirağeto, ġena numa ġana eiağoto.

⁸ Tarimarima na mo veıa ġeğitaıato nai, ġegarito e Barau ġevağa-rağeato, korana seğuka moğesina tarimarima evinirito nai.

Iesu na Mataio ekeaiato

Mareko 2:13-17; Luka 5:27-32

⁹ Iesu monana eraka-vanağito nai, ġia na tarima ta arana Mataio eğitaıato, takesi moniri ġeğabito-ğoi numanai etanu-tağoto-ğoi nai eğitaıato. Benamo Iesu na ekiraiato, ekirato, “Murigu ai noma raka.” Benamo Mataio evaisirağeto, Iesu murina na eiağoto.

¹⁰ Iesu Mataio ġena numai eğaniğanito-ğoi nai, takesi gogo tarimari vovoka e vei-rakava tarimari ġutuma maki ġeiağomato, Iesu ma ġena mero ġesi ġeğaniğani-vegogoto.

11 Farisea tarimari kotari na ġeġitaiato nai, Iesu ġena mero ġedanaġirito, ġekirato, “Karase nai ġomi ġemi vevaġa-riba tarimana tu takesi gogo e vei-rakava tarimari ġesi ġeġaniġani-vegogoni?”

12 Iesu na mo guruga eseġaġiatio, benamo evaġa-veserito, ekirato, “Namo tarimari na doketa asi beġe vetaurini, senaġina keve tarimari na moġo.

13 Goiago, tauġemi na Buka Veġa na ekiraġiani guruġana ġoa vetaua, maġesina ekirani, ‘Au na dia ġomi ġemi ġinitago o boubou varevareri aura-vinirini. Au aurani ġomi na vevetuġaġwa e veiau-namo boġono vaġa-foforiri.’ Au tu vei-iobukaiobuka tarimari keakeari asi aiago-mato, senaġi vei-rakava tarimari moġo.”

Ġaniveaġa

Mareko 2:18-22; Luka 5:33-39

14 Moġa murinai Ioane Babatiso ġena mero Iesu ġenai ġeiaġoto, benamo ġedanaġiatio, ġekirato, “Karase nai ġai e Farisea tarimari tu ġaġani-veaġani, a ġoi ġemu mero tu asi ġeġani-veaġani?”

15 Iesu na evaġa-veserito, ekirato, “Ġomi ġotuġamaġini, veġaraġo varigu tarimana ġatana seviri ai etanuni nuġanai beġe taġini ba? Asiġina! Ġarona eiaġomani, veġaraġo variġu tarimana ġatana ġerina beġe ġabi-veġitaiani, monai vau beġe ġani-veaġani.

16 Tarima ta na dabuġa variġuna veseana dabuġa guinena ġesi asi bebani-vegogoani. Bema moġesina beveini nai, dabuġa variġuna na guinena bedareani, ema vedarena maki bebaregoni.

17 Tarima ta na maki vine nanuna variġuna nanigosi kefina guinenai asi besisiani. Bema moġesina beveini nai, nanigosi kefina guinena bevedareni, vine nanuna bebebubuni, ema kefi maki berakavani. Senaġina vine nanuna variġuna nanigosi kefina variġunai bebubu-ġuriaiani tu namo. Benamo ruarua, vine nanuna e kefi, beġe tanuni, asi beġe rakavani.”

Iesu na kekeni ta ema vavine ta evaġa-namorito

Mareko 5:22-43; Luka 8:41-56

18 Iesu na roġo ġena mero evaġa-ribarito-ġoi nuġanai, vere ta eraġasito, Iesu kwakuna koranai evetui-tarito, ekirato, “Au natugu kekenina inivau moġo bemase. Si-iaġo, ġimamu iatanai bono tore-kaua, benamo natugu bemaġurini.”

19 Iesu evaisi-raġeto, ġia ġesi ġeiaġoto. Ġena mero maki ġia ġesi ġeiaġo-sebonato.

20 Ġeiaġoto-ġoi nuġanai, vavine ta, ġena keve tu rara kevena, laġani gabanana ruarua (12) ekeve-iaġiatio, eiaġomato Iesu murina rekena na, ma ġena dabuġa dudunai eveġabikauto.

21 Korana tu ġia evetuġamaġito, “Ġena dabuġai moġo haveġabikauni nai, banamoni.”

22 Iesu eruġa-kureto, eġitaiatio, ekirato, “Natugu, bono kokore! Ġemu veġabidadama na bevaġa-namomu.” Benamo vaġa-sebo ġena keve enamogoso.

23 Iesu tu mo vere ġena numai eraka-toġato. Ivirikou furufuru tarimari e taġitaġi tarimari ma gururi baregori ġesi eġitarito,

24 benamo Iesu na evaġa-guruġarito, ekirato, “Goraka-rosi. Kekeni tu asi bemase, ġia tu egenani moġo.” Senaġi tarimarima na ġerikiriki-iaġiatio.

25 Iesu na mo tarimarima ġutuma etuġu-rosirito murinai, ġia eraka-toġato numa nuġanai, kekeni ġimanai eġabito; benamo mo kekeni evaisi-raġeto.

²⁶ Mai veigā varina tu mo tano mabaranaī ġevarifiu-iaġiato.

Iesu na mata-bubu tarimari ruarua evaġa-namorito

²⁷ Iesu na mo gabu ma eraga-kwaneato. Erakato-ġoi nai, mata-bubu tarimari ruarua murina na ġeiaġoto, ġekea-viniato, ġekirato, “Davida Natuna o, ġai novetuġama!”

²⁸ Iesu numai eraka-toġato nai, mo mata-bubu tauri ruarua maki ġeraġe-kauto. Benamo Iesu na edanaġirito, ekirato, “Ġomi na ġovaġa-moġoniguni, au na bavaġa-namomini riba?” Ġia ġevaġa-veseto, ġekirato, “Vereġauka, oi, ġavaġa-moġonimuni.”

²⁹ Benamo Iesu na matari eġabi-kararito, ekirato, “Ġemi veġabidadama lorinaī, veigāna tu bana veia ġemi.”

³⁰ Benamo matari ġefafato. Iesu na ma nuġana mabarana ġesi evaġa-guruġa gwaġiġi-rito, ekirato, “Mai veigā beġora maiġa varina tarima ta asi bogono kira-varaia!”

³¹ Senaġina tauri ruarua ġeraka-rosito, ġeiaġoto, Iesu varina mo tano mabaranaī ġea varifiu-rovorovoato.

Iesu na muru-bubu tarimana ta evaġa-namoato

³² Tauri ruarua numa na ġeraka-rosito-ġoi nuġanaī, tarima ta, iauka rakavana na eboroġiato nai asi eguruġato-ġoi, Iesu ġenaī ġeġabi-iaġoato.

³³ Iesu na iauka rakavana elai-vaġiato murinaī, mo muru-bubu tarimana varau eguruġato. Tarimarima mabarari na mai eġorato veigāna ġeġaba-iaġiato, ġekirato, “Maiġesina veigāna ta Isaraela nuġanaī roġosi bene ġora!”

³⁴ A Farisea tarimari ġekirato, “Mai tu iauka rakavari ġeri vere ġena seġukana na iauka rakavari ġia na elai-vaġirini.”

Iesu na ġena mero Isaraela tarimari ġeri ai etuġurito

³⁵ Iesu na vanuġa baregori ema keiri mabarari eiāġo-vinirito: Ġeri rubu ai evevaġa-ribato-ġoi, Barau ġena Basileia varina namona eġobata-iaġiato-ġoi, ema keve e midigu-midigu tarimari mabarari evaġa-namorito.

³⁶ Iesu na mo tarimarima ġutuma-bara eġitarito nai evetuġarito, korana ġenuġa-vekwarāġito e asi ġeri veduru ġabi tarimari, vaġa-ilailana mamoe asi ġitaġauri tarimana ta kavana.

³⁷ Benamo Iesu na ġena mero ekirarito, ekirato, “Makora ġitaġitana tu barego, senaġina ġauvei-iaġina tarimari tu asi ġutuma.

³⁸ Vamoka ġaniġanina vinivinina Vereġaukana boġono noġia, be ġauvei tarimari bene tuġuri, ġena ġaniġani gogo vamokari ġana.”

10

Iesu na ġena apostolo merori gabanana ruarua (12) ekearito

¹ Iesu na ġena mero gabanana ruarua (12) ekearito, benamo seġuka evinirito, iauka rakavari beġene lai-vaġiri, e keve ema midigu-midigu mabarari beġene vaġa-namori ġana.

² Mai apostolo tarimari gabanana ruarua (12) arari tu maiġeri: Ginigu-inena tu Simona, arana ta tu Petero, e ġia tarina Anduru; Iakobo (o James), Sebedaio natuna, ma tarina Ioane ġesi;

³ Filipo e Batolomeo; Tomasi e takesi gogo tarimana Mataio; Iakobo (o James), Alfeo natuna, e Tadeo;

⁴ Simona, Selote tarimana, ema Iudas Isakariota, Iesu berevaiani tarimana.

*Iesu na apostolo tarimari ġeri ġauvei evinirito
Mareko 6:7-13; Luka 9:1-5*

⁵ Mai tarima gabanana ruarua (12) Iesu na etuġu-rosirito ema velaunaġi sisibari maġesina evinirito, ekirato, “Irau bese tarimari ġeri ai asi boġono iaġo, e Samaria vanuġari tai maki asi boġono raka-toġa;

⁶ senaġina Isaraela besena ġeri ai boġono iaġo, ġia tu ġerekwa-rekwato mamoeiri kavana.

⁷ Ġoiġo, ma maġesi boġono ġobata, boġono kira, ‘Guba Basileiana tu bevotu, (Barau ġena veġitaġau seġukana evaġa-ruġaiiani maġa)!’

⁸ Keve tarimari boġono vaġa-namori, mase tarimari boġono vaġa-maġuriri, lepera tarimari boġono iarevari boġono vaġa-namori, e iauka rakavari boġono lai-vaġiri! Gomi na ġoġabiato asi voina, boġono vini maki asi voina.

⁹ Ġemi iaġoiaġo ai moni asi boġono ġabikau, golo o silva moniri o kopa moniri maki asi boġono ġwakau.

¹⁰ Dura asi boġono ġabikau, sedi ruarua, tamaka, ema toġoi maki asi boġono ġabi. Korana ġauvei tarimana ġena-ġana tu beġene vinia veġata.

¹¹ Vanuġa baregona tai o vanuġa keina tai boġo raka-toġani nai, deikara euranai ġena numai bene ġabi-raġemi etoni tarimana boġono vetaua. Mo numai moġo boġono tanu, bene iaġo mo, vanuġa ma boġono raga-kwanea.

¹² Numai ġoraka-toġani nai, numa tarimari boġono vaġa-namori, boġono kira, ‘Maino ġomi ġemi ai bene tanu!’

¹³ Bema mo numa tarimari na beġe ġabi-raġemini nai, Barau ġena maino ġeri ai betanuni. Senaġina bema ġia na asi beġe ġabi-raġemini nai, Barau ġena maino ġeri ai asi betanuni, ġemi ai ma beġenoġoini.

¹⁴ Kamara numai o vanuġai tarimarima na asi beġe ġabi-raġemini e ġemi guruġa asi beġe seġaġirini nai, mo numa o vanuġa boġono iaġuia, kwakumi kauri boġono kwari-ketoketori, (ġia ġeri kira-sirivaġi vaġa-moġoniri ġana).

¹⁵ Au na akira-korikorimini, Barau ġena Kota ġaronai mo numa o vanuġa ġeri rakava voina metona tu barego lelevaġi beġabiani, Sodoma e Gomora ġeri rakava voina maki bevanaġiani.”

*Vanevane e midigumidigu ġoirai
Mareko 13:9-13; Luka 21:12-17*

¹⁶ “Ġoseġaġi, au na mai atuġumini mamoe kavana boġa kwaivari rakavari vefakari ai. Moġa lorinai, mota kavana boġono iaunega ema boġono manau pune kavana.

¹⁷ Lorimi boġono vetore tarimarima ġeri ai! Korana ġia na beġe ġabimini ma beġe tuġu-iaġomini Iuda ġeri kanisoro tarimari ġeri ai, ema ġeri rubu nuġari ai beġe kwarimini.

¹⁸ Au ġoġabi-raġeguni dainai, gavana e vere barari o kini ġeri ai roġo beġe ġabi-iaġomini, ġia ġoirari ai au vaġa-moġonigu ai boġono iaġo, korana irau bese tarimari maki Vari Namona beġene ribaia.

¹⁹ Bema Kota tarimari ġoirari ġana beġe ġabi-iaġomini nai, kara toma boġoa kiraġirini o kaması boġo kiraġirini guruġari asi boġono nuġa-vekwaraġi-iaġiri. Korana mo ġaro ai kara boġo kiraġirini guruġari tu, Barau na vau bevinimini.

²⁰ Dia ġomi boġo guruġani, senaġina Barau Iaukana ġomi ġemina begu-ruġani.

²¹ Kakana na tarina berevaiani bene mase ġana, tamana na natuna maki moġesina beveiani. Naturi na tamari sinari beġe seġafore-vinirini ema mase ai maki beġe torerini.

²² Tarimarima mabarari na beġe iau-rakavamini, korana au ġoġabi-raġeguni nai. Senaġina deikara bevevaġa-gwaġiġini mo dokona tu bemaġurini.

²³ Vanuġa tai beġe vaġa-rakavamini e beġe laimini nai, vanuġa ta ġana ma boġono raga-iaġo. Boġono riba-maoro, ġegu ġauvei asi roġo boġo vaġa-koriani Isaraela vanuġari mabarari nuġari ai, beiaġoni mo, Tarimarima Natuna bema-raġasini.

²⁴ Riba evetauani merona na ġena vevaġa-riba tarimana asi bevanaġiani; vetuġunaġi tarimana na guine-iaġina tarimana maki asi bevanaġiani riba.

²⁵ Riba evetauani merona bevevaġa-iaġoni ġena vevaġa-riba tarimana ġesi beġe ilailani, ema vetuġunaġi tarimana guine-iaġina tarimana ġesi maki beġe ilailani tu namo. Boġono tuġamaġia, tarimarima kotari na au tu doġoro debana, Belsebul o Satani ġetoni, be ġomi, ġegu doġoro tarimami, maki moġesi beġe kiramini, ema beġe vaġa-metomini maki.”

Barau boġono gari-vinia

Luka 12:2-7

²⁶ “Moġa lorinai, tarimarima gariri asi boġono vei. Vekuġau dagarari mabarari beġea foforini, vekuretoġa guruġari mabarari beġea ribani.

²⁷ Au na kara dagara akira-varamini mukunai tu, ma boġono kiraġi-ġenoġoiri laġani matabarai, kara dagara ġereġami na boġo seġaġia tu, numa tuġuri na ma boġono kiraġi-foforia, (tarimarima mabarari na beġene seġaġia ġana).

²⁸ Tauġanina beġe vaġiani tarimari asi boġono gari-viniri, korana ġia na iauka asi beġe vaġiani. A Barau garina neġi boġono gari, korana ġia na ruarua bevagiirini riba, tauġanina e iauka, karava asi ebuseni gabunai.

²⁹ Bisini ruarua maki fene sebona na moġo ġevoirini, ene? Senaġina moġeri ta maki asi beketo-riġo kavani tano ai, bema Tamami asi beurani nai.

³⁰ A ġomi tu debami ġuiri maki mabarari Barau na eiavi-ginikaurito.

³¹ Be asi boġono gari; ġomi voimi tu varaġe lelevaġi, bisini ġutuma voiri maki ġovanaġirito.”

Iesu asi boġono kira-ġuniġaua

Luka 12:8-9

³² “Deikara na au tarimarima ġoirari ai bekiraġi-foforiguni, ġia maki au na bakiraġi-foforiani Tamagu gubai etanuni ġoiranai.

³³ Senaġina au deikara na tarimarima ġoirari ai beruġaġuni e bekira-ġuniġaġuni, ġia maki au na baruġaiani e bakira-ġuniġaġuni Tamagu gubai etanuni ġoiranai.”

Dia maino, senaġi vetari

Luka 12:51-53; 14:26-27

³⁴ “Asi boġono tuġamaġi, au tu maino tanobara ġana aġwa-iaġomaiato. Asiġina, au tu dia maino aġwa-iaġomaiato, senaġi vetari urana na aiagomato.

³⁵ Au aiagomato tu, maiġeri nama vaġa-ruġari ġana: Natu tauri na tamari beġe vevaġi-vinirini, natu vavineri na sinari beġe vevaġi-vinirini, taġama vavine keiri na ġeri taġama vavine barari beġe vevaġi-vinirini.

³⁶ Numa biaguna tu tauḡena ḡena numa tarimari na moḡo beḡe iau-rakava viniani.

³⁷ Deikara tamana o sinana beuravini-baregoani, a au tu betuḡamaḡi-keiguni nai, ḡia tu asi ilaila au ḡegu tarimai beḡe kiraḡiani. Ema deikara na natuna merona o kekenina beuravini-baregoani, a au beuravini-keiguni nai, ḡia tu asi ilaila au ḡegu tarimai beḡe kiraḡiani.

³⁸ E deikara tauḡena ḡena satauro asi beḡwaiiani, ema murigu na asi berakani, ḡia tu asi ilaila au ḡegu tarimai beḡe kiraḡiani.

³⁹ Deikara ḡena maḡuri moḡo lorina etoreani tarimana, ḡena maḡuri befitoḡaiiani. A deikara au daigu ai ḡena maḡuri befitoḡaiiani tarimana, ḡena maḡuri asi bevei-rekwarekwaiani.”

Iesu ḡena mero beḡe ḡabi-raḡerini tarimari na voiri namori beḡe ḡabirini Mareko 9:41; Luka 10:16

⁴⁰ “Dei na ḡomi eḡabi-raḡemini, au maki eḡabi-raḡeguni, ema au eḡabi-raḡeguni tarimana na au etuḡuguto Barauna maki eḡabi-raḡeani.

⁴¹ Dei na peroveta tarimana ta eḡabi-raḡeani, korana ḡia tu Barau ḡena guruḡa vaḡa-foforina tauna ta, ḡia na peroveta tauna davana tu beḡabiani. Ema dei na veḡa iobukaiobuka tarimana eḡabi-raḡeani, korana ḡia tu Barau ḡena ura ekorana-iaḡiani tauna, ḡia na vei-iobukaiobuka tarimana davana beḡabiani.

⁴² E tarima ta na mai ḡegu mero ta nanu faraka kapusi sebona ta beviniani, korana ḡia tu au ḡegu vetuḡunaḡi tarimana, akira-korikori-mini, ḡia voina tu beḡabiani veḡata.”

11

Ioane na ḡena mero Iesu ḡenai etuḡu-iaḡorito

¹ Iesu na moḡeri sisiba guruḡari ḡena mero gabanana ruarua (12) ḡeri ekiraḡi-ḡosirito murinai, ḡia monana Galilea vanuḡari ḡana eiḡoto, monai Barau ḡena guruḡa bene vevaḡa-riba iaḡia e bene ḡobata-iaḡia ḡana.

² Ioane Babatiso dibura numanai etanuto-ḡoi nai, Keriso ḡena ḡauvei veḡari varina eseḡaḡiato, benamo ḡia na ḡena mero Iesu ḡenai etuḡu-iaḡorito.

³ Iesu ḡedanaḡiato, ḡekirato, “Barau na ekiraḡi-toreato beiaḡomani tarimana tu ḡoi, ba tarima boruna ta baḡana vaḡa-nogaia?”

⁴ Benamo Iesu na evaḡa-veserito, ekirato, “Ḡoḡenoḡoi, ḡomi na boḡo seḡaḡiri e boḡo gitari veḡari Ioane boḡono kira-varaia:

⁵ Mata-bubu tarimari ḡeboḡebogeni, kwaku rakava tarimari ḡerakani, lepera tarimari ḡenamoni, seḡa-bubu tarimari ḡeseḡaḡini, mase tarimari ḡevarigiḡi-ḡenoḡoini, ema Vari Namona gara veḡubu e asi ḡeri-ḡari tarimari ḡeri eḡobata-iaḡiani.

⁶ Au ḡegu ai asi ḡena daradara tarimana tu eiakuni.”

⁷ Ioane ḡena mero ḡerakato vau, Iesu na ḡeveogoto tarimari evaḡa-guruḡarito, Ioane varina ḡeri ekiraḡi-ato, ekirato, “Ioane ḡenai ḡoiḡoto nai, mo tano fakanai tu kara boḡono ḡitaia ḡana? Gobu iavara na ekwari-ḡareva ḡarevaiani ḡitaḡitana ḡoiḡoto?”

⁸ Bema asiḡina nai, kara boḡono ḡitaia ḡana ḡoiḡoto? Dabuḡa namona eveiani tarimana ḡitaḡitana ḡoiḡoto? Asiḡina. Dabuḡa namori ḡeveirini tarimari tu kini ḡeri numai ḡetanuni.

⁹ Be, kara boḡono ḡitaia ḡana ḡoiḡoto? Peroveta tarimana dainai? Aba! Akiramini, ḡoḡitaḡiato tarimana tu peroveta tarimari mabarari evanaḡirini.

¹⁰ Ioane varina Buka Veāgai maiġesi etoreato, Barau ekirato, 'Au na ġegu vetuġunaġi tarimana tu batuġu-guineani, ġemu dabara ġoiramu ai vaġa-maġatana.'

¹¹ Moġoni akiramini, mai tanobarai beġe maġuri tarimari mabarari fakari ai Ioane Babatiso tu barego vedaurea, ta na asi bevanaġiani. Senaġina Guba Basileiana nuġanai gabi tarimana na Ioane tu evanaġiani.

¹² Ioane Babatiso ġena ġobata evari-fiurito-ġoi ġenana beiaġoma mo initoma, Barau na ġena Basileia o veġitaġau seġukana evaġa-ruġaiani, senaġina tarima tari na ġevevaġi-viniani, ġeri ura tu tauġeri beġene veġitaġau, a deikara Barau ġena Basileiai neraka-toġa etoni tarimana, ġia na ġekouani. (Mataio23:13).

¹³ Peroveta tarimari mabarari e Mose ġena taravatu maki na Barau ġena Basileia o veġitaġau ġeġobata-iaġiato-ġoi, eiaġomato mo, Ioane ġena negai.

¹⁴ Ema ġomi na ġeri guruġa boġo ġabi-raġeani ba asiġina, senaġina Ioane tu moġoni peroveta tarimana Elia, ġena iaġoma tu ġekiraġiato-ġoi.

¹⁵ Ma seġana tarimana bene seġaġi.

¹⁶ Toma ġuru tarimari tu deikara ġesi bavaġa-ilailarini? Ġia tu noġa mero keiri kavana, vanuġa ġatamanai ġetanu-taġoni, ġeġereni, tavi ta merori na tavi tai ġekea-vinirini, ġekirani,

¹⁷ 'Ġai tu veġaraġo vererenai gita ġalauto-ġoi ġomi ġemi, senaġi ġomi tu asi ġobarato-ġoi! Ġai tu mase mariri ġaġabito-ġoi, senaġi ġomi tu asi ġotaġito-ġoi!'

¹⁸ Ioane eiaġomato, eġani-veaġato ema vine nanuna asi eniuato. Benamo ġekirani, 'Ġia tu iauka rakavana na eboroġiato,' ġetoni.

¹⁹ A Tarimarima Natuna eiaġomato, ġia tu ġaniġani ta asi eruġaiani. Benamo ġekirani, 'Ġia tu boġeka tarimana ema vine nanuna eniu-ġutumani tarimana, takesi gogo tarimari e vei-rakava tarimari ġatari!' ġetoni. Senaġi Barau ġena iaunega vaġa-foforina e vaġa-moġonina tu ġena vetoġa namori ġerina."

Asi veġabidadama vanuġari

Luka 10:13-15

²⁰ Iesu na ġena seġuka ġauveiri vanuġa baregori tari nuġari ai eveirito, senaġi ġeri rakava ġerina asi ġevetuġamaġi-kureto-ġoi, naima Iesu na moġeri vanuġa tarimari evanerito.

²¹ Ekirato, "Korasini o, ġoi ema Betesaida, vetuġami kika! Korana nuġa-farevaġi veġa boruri ġemi ai ġeġoforito-ġoi tu, Taia e Sidono nuġari ai beġere fori, benamo ġia tu irau laġani ai ġere vetuġamaġi-kure, fuse rakavari ai e tauġaniri ma gurumari ai ġeri vetuġamaġi-kure ġere vaġa-foforia.

²² Senaġina akiramini, Barau na tarimarima bekota-vinirini ġaronai, ġomi na boġo doġariani metona tu Taia e Sidono ġeri meto bevanaġiani.

²³ Ġoi maki, Kapera-nauma o, ġoi ourani guba ġana bono varaġe otoni? Asiġina, ġoi tu mase gabuna ġana boiaġoni! Bema nuġa-farevaġi veġa boruri ġemi ai ġeġoforito-ġoi tu Sodoma nuġanai beġere fori nai, ġia tu roġo bere tanu mo initoma.

²⁴ Senaġina akira-mini, Barau na tarimarima bekota-vinirini ġaronai, ġomi na boġo doġariani metona tu Sodoma ġeri meto bevanaġiani."

Au ġegu ai ġoiaġoma, be ġoiaġaraġi

Luka 10:21-22

²⁵ Mo negai Iesu ekirato, “Tamagu o, guba ema tanobara Verena, avaḡa-namomuni, korana ḡoi na ma iaunegari e riba tarimari ḡeri ai okure-toḡarini dagarari tu, asi ḡeri riba tarimari ḡeri ai ovaḡa-foforirini.

²⁶ Aba, Tamagu, ḡemu ura tu maiḡesina bene vetore veḡata.

²⁷ Dagara mabarari Tamagu na eviniguto. Natuna tarima ta asi ribana, senaḡina Tamana ḡereḡana moḡo ribana, ema Tamana tarima ta asi ribana, senaḡi Natuna ḡereḡana moḡo ribana, ema Natuna na bene vaḡa-fofori vinia etoni tarimana.

²⁸ Au ḡegu ai ḡoiḡoma, ḡomi deikara maruna metori ḡoḡwani e boḡo gau tarimami mabarami, au na iaḡaraḡi banama vinimi.

²⁹ Au ḡegu maruna, mai tu ḡegu veḡitaḡau namona, ḡoma ḡabi-raḡea, ma au ḡegu ai riba maki ḡoma ḡabia! Korana au na asi badori-naḡinaḡimini e asi baḡita-fitoḡamini. Au ḡegu ai iaḡaraḡi korikorina boḡo doḡariani.

³⁰ Auna maruna tu meraḡa e ḡegu ḡwaḡwa iatami ai batore-kauani maki asi metona.”

12

Iesu tu Sabadi Verena

¹ Mo negai Iesu tu Sabadi ai widi vamokari na eraka-vanaḡito. Ḣena mero ḡevitorito nai, widi ḡwaḡwari ḡebukito-ḡoi e ḡeḡanirito-ḡoi.

² Farisea tarimari na ḡeḡitarito, benamo Iesu ḡekiraiato, ḡekirato, “Noḡिताia, ḡemu mero na ḡita ḡera taravatu asi ḡekorana-iaḡiani, Sabadi ai widi ḡebukini.”

³ Iesu na evaḡa-veserito, ekirato, “Davida na veiḡa ta eveiato, ḡia ma karona ḡesi ḡevitorito nai, ḡomi na mai veiḡa eḡorato tu roḡosi roḡo boḡono iavia?

⁴ Barau ḡena numai eraka-toḡato, Barau ḡoiranai ḡetorerito-ḡoi beredi ḡia ma karona ḡesi ḡeḡanito. Mo beredi tu veaḡa, Rubu Veaḡa vereri moḡo ḡari, taravatu.

⁵ Ema ḡomi na Mose ḡena taravatu nuḡanai mai guruḡa maki roḡosi roḡo boḡono iavia, ekirani, Sabadi ai Rubu Veaḡa vereri tu Rubu Veaḡai ḡeḡauveini. Moḡesina nai Sabadi taravatuna ḡevaḡa-rakavaiani, senaḡi ḡia tu asi ḡeri kerere?

⁶ Au na akiramini, mainai tarima ta, ḡia na Rubu Veaḡa evanaḡiani.

⁷ Buka Veaḡa ekirani, ‘Vevetuḡaḡwa neḡi aurani, a varevare dagarana tu asiḡi.’ Bema mai guruḡa anina ḡoro riba nai, asi ḡeri kerere tarimari ḡomi na asi ḡoro vaḡa-bade-iaḡiri.

⁸ Korana Tarimarima Natuna tu Sabadi Verena.”

Iesu na ḡima boso tarimana evaḡa-namoato *Mareko 3:1-6; Luka 6:6-11*

⁹ Iesu na mo gabu eiaḡuiato, ma eiaḡoto, Iuda tarimari ḡeri rubu ai eraka-toḡato,

¹⁰ ḡimana ebosoto tarimana ta maki monai. Benamo Farisea tarimari na Iesu beḡene ḡofaḡofa-iaḡia ḡana ḡedanḡiato, ḡekirato, “Sabadi ai keve bita vaḡa-namorini tu ma taravatuna ba?”

¹¹ Benamo Iesu na evaḡa-veserito, ekirato, “Ḣomi ta ḡena mamoe sebona kwariḡutu moḡo, Sabadi ai guri tai beketo-riḡoni nai, vaḡa-maḡurina ḡana ḡomi na asi boḡo inu-raḡeani?”

¹² Boĝono tuĝamaĝi: Tarimarima tuĝamaĝi-iaĝina tu barego vedaurea, a mamoe ĝenai tu kei! Moĝa lorinai Sabadi ai veiĝa namona veiveina tu maoro vedaurea.”

¹³ Benamo Iesu na mo ĝima boso tarimana ekiraiato, ekirato, “Ĝimamu noduĝi-roroĝotoa.” Ĝia ĝimana eduĝi-roroĝotoato, benamo mabarana enamo-ĝosito, ĝimana reke ta kavana.

¹⁴ Senaĝi Farisea tarimari ĝeraka-rosito, benamo ĝea boioĝa-vegogoto, kamasi Iesu beĝene vaĝi-masea dabarana ĝea vetauato.

Iesu tu Barau na eviriĝiato tarimana

¹⁵ Farisea ĝeri boioĝa Iesu na varau eriba-guineato nai, ĝia mo gabu na eraka-veĝitato. Tarimarima ĝutuma ĝia murina na ma ĝeiaĝoto, ema keve tarimari mabarari evaĝa-namorito.

¹⁶ Senaĝi eguruĝa gwaĝiĝi-vinirito, ĝia varina tarima ta maki asi beĝene vaĝa-ribaia.

¹⁷ Maĝesi eguruĝato, korana Isaia peroveta tarimana muruna na erakosito gurugana bene moĝoni ĝana, ekirato,

¹⁸ “Mai tu au ĝegu vetuĝunaĝi tarimana, aviriĝiato. Au na ĝia aura-viniani, e ĝia ĝenai maki aiakuni; Au Iaukagu ĝia ĝenai batoreani, e ĝia na au ĝegu guruĝa e veiĝa iobuka-iobukari beĝobata-iaĝirini bese mabarari ĝeri ai.

¹⁹ Ĝia asi bevanevaneni, ma asi befararani; ema ĝatamai garona maki ta na asi besegaĝiani.

²⁰ Ĝia na gobulefa moirana asi betau-koruani, ema irau mo emoreni lamefana maki asi bevei-buseani, beiaĝoni mo, ĝia na guruĝa e veiĝa iobuka-iobukari bea vaĝa-ruĝarini, benamo beĝe kokoreni.

²¹ Ĝia ĝenai tarimarima mabarari ĝeri vetuĝamaĝikau beĝe toreani.”

Iesu e Belsebul

Mareko 3:20-30; Luka 11:14-23; 12:10

²² Benamo kotari na iauka rakavana na eboroĝiato tarimana Iesu ĝenai ĝeĝabi-iaĝoato. Mo tarima tu matana bubu e muruna bubu. Iesu na evaĝa-namoato, benamo ma eguruĝato e eboĝeboĝeto.

²³ Tarimarima mabarari na mai veiĝa eĝorato ĝeĝaba-iaĝiato, ĝekirato, “Mai tu betaĝu Davida Natuna banaĝu, (Barau na ekiraĝi-toreato vevaĝa-maĝuri tauna)?”

²⁴ Senaĝi Farisea tarimari na maĝa ĝeseĝaĝiato nai, ĝekirato, “Mai tu Belsebul, iauka rakavari ĝeri vere, na seĝuka eviniani nai, mai tarima na iauka rakavari elai-vaĝirini.”

²⁵ Iesu na ĝeri tuĝamaĝi varau eribarito nai, ekirarito, ekirato, “Gavamani bevetavini, tauĝena bevevaĝi-vinini nai, ĝia tu berakavani; e vanuĝa ta o doĝoro ta bevetavini, tauĝena bevevaĝi-vinini nai, asi beruĝani riba.

²⁶ E diablo ta na diablo ta belai-vaĝiani nai, Satani tu tauĝena bevevaĝi, moĝa anina tu, doĝoro tatai varau bevetavi nai, asi beruĝani riba?

²⁷ Gomi ĝokirani, au tu Belsebul ĝena seĝuka na iauka rakavari alai-vaĝirini, a ĝomi murimi ai ĝerakani tarimari na iauka rakavari aiĝesi ĝelai-vaĝirini? Ĝia na ĝevaĝa-moĝoniani, ĝomi ĝemi guruĝa tu kerere.

²⁸ Asigina, dia Belsebul, senaĝina Barau Iaukana ĝena seĝukai alai-vaĝirini, naima boĝono riba, Barau ĝena Basilea tu ĝomi ĝemi ai varau beragaŝi.

²⁹ Tarima ta gwada tarimana ġena numa asi bedareani riba, ma ġena farefare beġwa-rakarini, senaġi ġia na gwada tarimana varo na bebarubaruani, monai vau ġia na ġena numa farefareri beġabi-rakarini.

³⁰ Deikara na au asi evaġa-kavaguni, ġia na tu au eruġaguni, e deikara au ġesi asi etore-vegogoni, tarimana tu eveiari-lausilausini.

³¹ Moġa lorinai akiramini, tarimarima rakava beġe veini ema Barau beġe kira-rakava viniani tarimari, ġeri rakava mabarari Barau na betuġamaġi-fitoġarini riba, senaġi tarima ta na Iauka Veaġa bekira-rakava viniani tarimana, ġena rakava asi betuġamaġi-fitoġaiani.

³² Tarima ta na Tarimarima Natuna bekira-rakava viniani nai, ġena rakava tu betuġamaġi-fitoġaiani, senaġi tarima ta na Iauka Veaġa bekira-rakava viniani tarimana, ġena rakava asi betuġamaġi-fitoġaiani, toma mai maġuri ai ema maġuri gabinai maki asi betuġamaġi-fitoġaiani.”

*Ġau e ġia ġwaġwana
Luka 6:43-45*

³³ “Bema ġau namo nai tu, ġwaġwana maki namo, a bema ġau rakava nai, ġwaġwana maki rakava. Ġau tu ġwaġwana ġenana boribaiani.

³⁴ Gomi mota naturi, ma rakavami ġesi ġotanuni, be guruġa namona ta tu kamasi boġo kiraġiani? Korana tarima tu nuġana na kara eiaġomani, murunai ekiraġirini.

³⁵ Tarima namona na dagara namori nuġanai evaġa-vegogorini dagarari bevaġa-raka-rosirini. Tarima rakavana na dagara asi namori nuġanai evaġa-vegogorini dagarari bevaġa-raka-rosirini.

³⁶ Senaġi au na akiramini, guruġa taġuitaġui mabarari, tarimarima na beġe kiraġirini tu, Barau ġena Kota baregona ġaronai voiri beġe ġabirini.

³⁷ Ġemu guruġa ġenana Barau na vei-iobukaiobuka tarimamu bekiraġimuni, o vei-rakava tarimamu bekiraġimuni.”

*Farisea tarimari na vetoġa ġevetauani Iesu ġenai
Mareko 8:11-12; Luka 11:29-32*

³⁸ Taravatu vaġa-riba-iaġina tarimari e Farisea tarimari kotari na Iesu ġevaġa-guruġaiato, ġekirato, “Vevaġa-riba tarimamu, ġai ġaurani vetoġa boruna ta ġoi ġemuna baġana ġitaia.”

³⁹ Iesu na evaġa-veserito, ekirato, “Toma ġuru rakavana ma veġura-vaġina ġesi, (Barau ġenana ġeveġitato ġuruna), seġuka vetoġana ta ġeġita-veatauani, senaġi vetoġa ta asi beġe doġariani, Iona, peroveta tarimana, vetoġana moġo.

⁴⁰ Iona tu ġaro toitoi ema boġi toitoi maġani-kone barana, rakana donodono diana nuġanai etanuto, moġesina kavana Tarimarima Natuna maki ġaro toitoi ema boġi toitoi tano nuġanai betanuni.

⁴¹ Kota baregona ġaronai Nineva tarimari beġe ruġa-vaisini, toma ġuru tarimari beġe samanirini, korana Iona ġena ġobata ġeseġaġiato neganai, ġia ġeri rakava ġerina ġevetuġamaġi-kureto, ema ġeraka-kureto Barau ġenai. Senaġi ġoġitaia, tarima ta na Iona evanaġiani tu maġa.

⁴² Kota baregona ġaronai maki, Seba vavine baregona o Kwin beruġa-vaisini, mai ġuru tarimari besamanirini, korana ġia tu ġena tanobara manaġana na eiaġomato, Solomona ġena iaunega guruġari bene seġaġiri ġana. Senaġi ġoġitaia, tarima ta na Solomona evanaġiani tu maġa.”

*Iauka rakavana ma eġenoġoito
Luka 11:24-26*

⁴³ “Iauka rakavana ta tarima ta ġenana eraka-vaġito, benamo gabu kaukauri na eraka-vanaġito, iaġana bene ġania etato, senaġi iaġaraġi gabuna ta asi edoġariato.

⁴⁴ Benamo ġia tauġena ekirato, ‘Naġenoġoi, araga-kwaneato numana ġana.’ Eġenoġoi-iaġoto, numa edoġariato. Numana tu korina, veiareva ema ġitaġitana namo vedaurea.

⁴⁵ Benamo ġia na iauka rakava kwaikwairi imaima ruarua (7) ma eġori-iaġorito, mabarari ġeraka-toġato, monai ġetanuto. Moġa lorinai mo tarima tu guinenai ġena rakava tu kota misina, senaġi dokonai ġena rakava tu barego vedaurea. Maiġesina toma ġuru rakavana ġenai beġorani.”

Iesu sinana e tarina doġoro

Mareko 3:31-35; Luka 8:19-21

⁴⁶ Iesu tu tarimarima roġo evaġa-guruġarito-ġoi nai, ġia sinana e tarina doġoro ġeraġasito. Numa murikanai ġeruġa-tarito, ġeri ura tu Iesu beġene vaġa-guruġaia.

⁴⁷ Benamo tarima ta na ekiraiato, ekirato, “Ġoi sinamu e tarimu merori tu numa murikanai ġeruġa-taġoni, ġevaġa-guruġamu ġetoni.”

⁴⁸ Iesu na evaġa-veserito, ekirato, “Au sinagu tu dei, e au tarigu merori tu deikarari?”

⁴⁹ Benamo ġia ġimana na ġena mero eduġi-vinirito, ekirato, “Au sinagu e au tarigu merori tu maiġeri!”

⁵⁰ Deikara na au Tamagu gubai etanuni ġena ura veiġari eveirini tarimana tu, au tarigu tauna, e au tarigu vavinena, ema au sinagu.”

13

Barabore - Iaraġa tarimana na widi ġueri efluirito

¹ Mo ġaro sebonai moġo Iesu na numa eraga-kwaneato, eiaġoto, Galilea kouna rikinai etanu-tarito.

² Tarimarima ġutuma-bara na ġevegogo-ġeġeraġiatio nai, ġia tu ġasi tai eraġekauto, benamo etanu-tarito, a tarima mabarari tu fenu ai ġeruġato.

³ Iesu na dagara ġutuma barabore ai evaġa-ribarito.

Ekirato, “Iaraġa tauna ta ġena widi ġueri varovarori eiaġoto.

⁴ Ġia na widi ġueri eflu-lauserito-ġoi nai, gabu irauirau ai ġeketoto. Kotari dabarai ġeketoto, benamo manu ġeiaġomato, ġeġani-ġosirito.

⁵ Kotari forefore gaburi ai ġeketokauto tano maġġiri ai. Asikauna ġegarato, korana tano iatanai moġo.

⁶ Senaġi ġaro eraġekauto nai, etunurito, ema lamuri asi ġevariġo-ginikauto nai, asikauna ġemaraito.

⁷ Kotari tu ġauġa ġiniġiniri vefakari ai ġeketoto. Mai ġauġa ġiniġiniri ġetubu-baregotto nai, varovaro dagarari ġetubu-ġaurito.

⁸ A kotari tu tano namonai ġeketoto, ġwaġwari ġetaunato nai, kotari sinau ta (100), ma kotari gabana imaima ma gabanana (60), ema kotari tu gabana toitoi (30).”

⁹ Iesu ġena guruġa dokonai ekirato, “Ma seġana tarimana bene seġaġi!”

Kara dainai Iesu na barabore ekiraġirito

Mareko 4:10-12; Luka 8:9-10

¹⁰ Iesu ġena mero ġia ġenai ġe-iaġoto, benamo ġedanaġiatio, ġekirato, “Kara dainai barabore ai tarimarima ovaġa-guruġarini?”

11 Iesu na evaġa-veserito, ekirato, “Guba Basileia ġena riba vekuretoġari ġomi ġemi ai tu fofori, senaġi ġia ġeri ai tu asiġina.

12 Ma ġena seġaġi tarimana Barau na tuġamaġi-faka beviniani, barego vedaurea bene doġari ġana. Asi ġena seġaġi tarimana, ġena tuġamaġi-faka misina maki beġabi-vaġiani.

13 Moġesi naima au na barabore ai avaġa-guruġarini. Korana matari na ġeboġe-boġeni, senaġi asi ġeġita-maġatani, seġari na ġeseġaġini, senaġi asi ġetuġamaġi-maoroni.

14 Ġia ġeri ai Isaia ġena peroveta guruġana bema moġoni, maiġesi ekirato, ‘Ġomi tu boġo seġaġini, ma boġo seġaġini, senaġi asi boġo riba-maoroni. Ġomi tu boġo ġitani, ma boġo ġitani, senaġi debami asi beġe vekeoni.

15 Korana mai bese tarimari nuġari tu gwaġiġi foroforo, seġari maki bubu, matari maki ġevekouto. Matari na beġe ġitani ġarina, seġari na beġe seġaġini, e nuġari na beġe riba-maoroni ġarina, ma au ġegu ai beġe vetuġamaġi-kureni ġeri Barau, benamo bavaġa-maġuririni ġarina.’

16 A ġomi tu boġono iaku, korana matami tu ġeġitani e seġami tu ġeseġaġini.

17 Au na akira-korikorimini: Peroveta tarimari vovoka ma Barau ġena vei-iobukaiobuka tarimari ġutuma kaiveġata na ġeri ura baregona tu, ġomi na inította kara ġoġitaiani beġene ġitaia, senaġi asi ġeġitaiato, e ġomi na kara ini ġoseġaġiani beġene seġaġia, senaġi asi ġeseġaġiato.”

*Widi ġueri baraborena anina
Mareko 4:13-20; Luka 8:11-15*

18 “Ġoseġaġi, widi fiu-rovorovona tarimana baraborena anina tu maiġa:

19 Tarima kotari na Barau ġena Basileia varina ġeseġaġiani, senaġi asi ġetuġamaġi-fakaiani. Benamo Satani eiaġomani, ma mo kara ġia nuġari ai beġe varo dagarari tu, ġia na eġabi-vaġirini. Moġeri tarima tu widi ġuturi dabarai ġeketoni kavana.

20 Widi ġueri kotari forefore ai ġeketoto, mai tu tarima kotari na Barau ġena Vari Namona ma iakuri ġesi ġeseġaġiani e ġeġabi-raġeani.

21 Senaġina ġia nuġari ai asi erakatoġa-ginikauni nai, asi etanu-maukani. Barau ġena guruġa dainai nega rakavari ġeġoitaġoni e ġevaġa-midigu midigurini ġarori ai, ġia ġenana ġeraka-veġitani.

22 Widi ġueri kotari tu ġauġa ġiniġiniri vekaravari ai ġeketoto, mainana ekiraġiani tu, tarima kotari na Barau ġena guruġa ġeseġaġiani, senaġi tauġeri ġeri maġuri e farefare ġutumari ġetuġamaġi-baregorini ġerina, Barau ġena guruġa ġevekouni, e ġwaġwana maki asi evetoreni.

23 A widi ġueri kotari tu tano namonai ġeketoto, mainana ekirarani tu, tarima kotari na Barau ġena guruġa ġeseġaġiani, ma ġeġabi-raġeani nuġari mabarari ġesi, ġia ġwaġwari ġevetoreni maki, kotari sinau ta (100), ma tari gabana imaima ma gabanana (60), ma kotari gabana toitoi (30).”

Barabore - Widi e ɣauɣa

²⁴ Iesu na barabore ta ɣeri ma ekiraɣiato, ekirato: Guba Basileia tu tarima ta kavana, ɣue ɣuturi namori ɣena vamokai evarorito.

²⁵ Benamo boɣi tai, tarimarima mabarari roɣo ɣegenato-ɣoi nai, ebaru-viniato-ɣoi tarimana eiaɣomato, ɣauɣa ɣuturi widi vekaravari ai efiurito, benamo erakato.

²⁶ Widi ɣetubu-foforito, ɣegara-baregote e ɣwaɣwari ɣeburito nai, ɣauɣa rakavari maki ɣia vefakari na ɣefoforito.

²⁷ Benamo vamoka biaguna ɣena vetuɣunaɣi merori ɣia ɣenai ɣeiaɣomato, ɣekirato, ‘Vereɣauka, ɣoi ɣemu vamokai ɣue ɣuturi namori ovarorito, nene? Senaɣi mai ɣauɣa rakavari tu ainana beɣe iaɣoma?’

²⁸ ɣia na evaɣa-veserito, ekirato, ‘Ebaru-vinirani tarimana na mai veiɣa bema veia.’ Vetuɣunaɣi merori na ɣedanaɣiato, ɣekirato, ‘Bema ourani nai, ɣiaiɣo, be baɣana lauri ba?’

²⁹ ɣia evaɣa-veseto, ekirato, ‘Asiɣina, korana ɣomi na ɣauɣa boɣo laurini nai, widi maki lamuri ɣesi boɣo lau-sebonarini garina.

³⁰ ɣia ruarua beɣene gara-sebona, ma beɣene tanu mo, widi ɣwaɣwana basibasina ɣarona bene raɣasi. Mo ɣaro ai au na basi-basina tarimari maiɣesina bakirarini, bakirani: Giniguine tu, ɣauɣa mabarari ɣovaɣa-vegogori, ɣobaru-sebonari, be karava na bene ɣarari, a widi ma boɣono vaɣa-vegogoa, be ɣegu ɣaniɣani vaɣa-vegogo gabunai boɣono toreri.’ ”

Barabore - Mastadi ɣauna ɣutuna

Mareko 4:30-32; Luka 13:18-19

³¹ Iesu na barabore ta ma ekira-vararito, ekirato, “Guba Basileia tu mastadi ɣauna ɣutuna kavana, tarima ta na eɣabiato, ɣena vamokai evaroato.

³² Tanobarai varovaro dagarari ɣueri mabarari fakari ai ɣia ɣereɣana misina korokoro, senaɣi etubuni nai, varovaro dagarari mabarari fakari ai ɣia moɣo barego vedaurea. ɣia tu ɣau ai eiaɣoni naima, rovo manuri ɣeiaɣomani, ma ɣeri nuɣi ɣeveini ɣia leganai.”

Barabore - Farao vaɣa-tubuna muramurana

Luka 13:20-21

³³ Iesu na barabore ta ɣeri ma ekiraɣiato, ekirato, “Guba Basileia tu faraovavaɣa-tubuna muramurana kavana, vavine ta na kotuna ta moɣo eɣabiato, benamo faraovavine fuseri toitoi ɣesi egiroato, eiaɣoto mo, muramura na mabarana evaɣa-tubu baregoato.”

Barabore aniri

Mareko 4:33-34

³⁴ Iesu na mai dagara mabarari barabore ai tarimarima evaɣa-riba iaɣirito-ɣoi. ɣena ɣobatai barabore asi eraga-kwanerito-ɣoi.

³⁵ Mai veiɣa eveiato ɣenana, peroveta tarimana ɣena guruɣa ema vaɣa-moɣoniato, ekirato,

“Au na barabore ɣerina ɣia bavaɣa-guruɣarini; tanobara evesinato ɣarona na beiaɣoma mo initoma veɣuni ɣetanuni dagarari, au na ɣia ɣeri bakiraɣi-foforirini.”

Iesu na widi e ɣauɣa baraborena anina ekiraɣi-foforiato

³⁶ Iesu na mo tarimarima ġutuma eraga-kwanerito, benamo numai erakatoġato. Ġena mero ġia ġenai ġeiaġomato, bena ġekiraiato, ġekirato, “Ġauġa rakavari vamoka nuġanai baraborena ġai ġemai nokiraġi-maġataia.”

³⁷ Iesu na evaġa-veserito, ekirato, “Widi ġueri namori evarorini tarimana tu Tarimarima Natuna.

³⁸ Vamoka tu tanobara, ġue ġuturi namori tu Barau ġena Basileia o veġitaġau seġukana gaburenai ġetanuni tarimari; ġauġa rakavari tu Satani ġena tarimarima doġoro.

³⁹ E ġauġa varovarona tarimana tu Diabolo, ġita ebaru-vinirani tarimana; kwakwa tu tanobara magona beraġasini kavana. Ġwaġwana kwakwana e basibasina tu aneru na beġe korana-iaġiani.

⁴⁰ Vaġa-ilailana ġauġa ġevaġa-vegogorini, ma karavai ġegaburini, ġeġara-ġosirini, tanobara bea korini nai, moġesina kavana bevetoreni:

⁴¹ Tarimarima Natuna na ġena aneru tu betuġurini, benamo tarimarima ġeġori-kerererini tarimari, ema veġa rakavari ġeveirini tarimari mabarari, Barau ġena Basileia ġenana beġe ġabi-veġitarini,

⁴² e karava seġukana ma moremorena nuġanai beġe fiu-toġarini, ema monai roġo beġe taġini, gadikari maki beġe veġara-tarini.

⁴³ Moġa ġaronai maki Barau ġena vei-iobukaiobuka tarimari tu, ġaro kavana ma mamari ġesi Tamari ġena Basileia nuġanai beġe tanuni. Deikara ma seġana tarimana, bene seġaġi.”

Barabore - Tarima ta na farefare namona ta ekure-toġaiato

⁴⁴ “Guba Basileia tu farefare vekuretoġana tanobarai kavana. Tarima ta na edoġariato, benamo ma eguriguri-ġauato. E ma iakuna ġesi eiaġoto, ġena dagara mabarari ea voivoi-iaġirito, benamo mo tano evoiato.”

Barabore - Galasi forena davana barego forena

⁴⁵ “Guba Basileia tu bisinesi tarimana kavana, galasi foreri davari barego dagarari evetaurini.

⁴⁶ Ġia na voina barego lelevaġina forena ta edoġariato, benamo ġena farefare mabarari evoivoi-iaġi fitoġarito roġo, monai vau mo davana forena evoiato.”

Barabore - Reke

⁴⁷ “Guba Basileia tu reke kavana, davarai ġefiu-riġoani nai, maġani-kone iraurau nuġanai ġetoġani.

⁴⁸ Reke evonuni nai, ġeinu-raġeani tanobara ġana, benamo reke tarimari ġetanu-tarini vau, maġani-kone reke nuġanai moġeri mabarari ġevirigirini, namori mabarari tu baketi ai ġeġurarini, a rakavari tu ġefitoġarini.

⁴⁹ Moġesi vetoġa bevetoreni, tanobara magona beraġasini nai. Aneru beġe iaġomani nai, veġa rakava tarimari tu beġe tore-veġitarini veġa iobukaiobuka tarimari ġerina;

⁵⁰ e karava more-morena nuġanai beġe fiu-toġarini. Monai beġe taġini, gadikari maki beġe veġara-tarini.”

Guruġa moġoniri variġuri e ġuineri

⁵¹ Iesu na ġena mero edanaġirito, ekirato, “Mai guruġa mabarari nuġami ai boġo riba-ġitakauri ba?” Ġia na ġekiraiato, “Oi, Vereġauka.”

⁵² Iesu na ma ekirarito, ekirato, “Moġesina nai, bema taravatu vaġa-ribana tarimana ta Guba Basileia ġena vevaġa-riba tarimanai beiaġoni

neganai, ġia tu numa biaguna ta kavana, ġena farefare variġuri ema guineri eġabi-rosirini ġena farefare vaġa-vegogo numana na.”

Nasareta tarimari na Iesu asi ġeġabi-raġeato
Mareko 6:1-6; Luka 4:16-30

⁵³ Iesu na maiġeri barabore ekiraġi-ġosirito vau, mo gabu eraga-kwaneato.

⁵⁴ Monana vau ebaregato vanuġanai eraġasito. Iuda tarimari ġeri rubu ai evevaġa-ribato-ġoi nai, ġia ġeseġaġiato-ġoi tarimari na ġena ġobata guruġari ġeġaba-iaġirito, ema maiġesi ġevedanaġito, ġekirato, “Mai tarima ġena riba tu ainana eġabito, e mai nuġa-farevaġi veġari maki kamasi eveirini?”

⁵⁵ Ġia tu kamuda tarimana natuna, ene? Ġia sinana arana Maria ġetoni, ene? E ġia tarina merori arari tu Iakobo (o Iames) e Iosefa, Simona e Iudas, ene?

⁵⁶ Ema ġia tarina vavineri mabarari maki ġita ġesi maiġeri. Senaġi mai riba ema seġuka mabarari ne ainana eġabito?”

⁵⁷ Moġesi ġetuġamaġi-ġutuma viniato nai, ġia na asi ġeġabi-raġeato. Iesu na maiġesi ekirarito, ekirato, “Peroveta tarimana tu gabu mabarari ai beġe gubakauani, senaġi ġena vanuġa korikori ema ġena numa tarimari na moġo asi beġe gubakauani.”

⁵⁸ Monai nuġa-farevaġi veġa boruri viravira moġo eveirito, korana asi ġeri veġabidadama nai.

14

Ioane Babatiso ġena mase

¹ Mo negai Heroda, Galilea verena, Iesu varina eseġaġiato.

² Benamo ġia na ġena vetuġunaġi tarimari evaġa-guruġarito, ekirato, “Mai tu Ioane Babatiso mase na bevaisiraġe-ġenoġoi nai, seġuka veġari boruri eveirini.”

³ Heroda na Ioane eġabi-tariato ma ebarubaruato, dibura numai ekou-ġauato. Ġia na maiġesina evei-viniato, korana ġia kakana Filippo ġaraġona, Herodia, ġaramanai.

⁴ Ioane Babatiso na Heroda evaġa-guruġaiato-ġoi, ekirato, “Ġoi na Herodia boġaraġo-veraria tu asi maoro.”

⁵ Heroda eura-rakavato, Ioane bene vaġia, senaġi tarimarima gariri eveito, korana ġia na Ioane ġetuġamaġiato-ġoi tu peroveta tarimana ta.

⁶ Senaġi Heroda ġena ġora ġaronai o betdei, Herodia natuna ġuiatona tu varivari tarimari ġoirari ai ebarato. Heroda maki mai bara na evaġa-iaukuato.

⁷ Moġesina nai ġia ma nuġana mabarana ġesi guruġa gwaġiġinai maiġesina bara-ġuiatona ekiraġitore-viniato, ekirato, “Ġoi kara oura-viniani dagarana nokiraġia, benamo bavinimuni.”

⁸ Ġuiato tu sinana na varau evaġa-guruġa guineato ema elaunaġiato nai, ġia maiġesina ekirato, “Ioane Babatiso debana diġu ai mainai noma vinigu.”

⁹ Heroda nuġana emetoto, senaġi ġena guruġatore ġuiato ġenai varau eveiato e ġena varivari tarimari dairi ai ekirato, beġene vinia.

¹⁰ Benamo tarima debari ebasi-ġuturito-ġoi tarimana ta etuġuato dibura numai, Ioane debana ebasi-ġutuato.

11 Ioane debana tu diġu ai ġeġuraiato vau, ġuiato ġeviniato, benamo sinana ġenai eġwa-iaġoato.

12 Benamo Ioane ġena mero ġeiaġomato, tauġanina ġeġabiato, ġeguriato. Moġa murinai ġeiaġoto Iesu ġekira-varaiato.

Iesu na tarimarima daġara imaima (5,000) eġuburito

Mareko 6:31-44; Luka 9:10-17; Ioane 6:1-13

13 Iesu na Ioane ġena mase varina eseġaġiato nai, ġia monana eraka-ġerevaġito ġasi na, asi tarimarima gabuna ġana eiaġoto. Senaġi tarimarima na ġeseġaġiato nai, ġeri vanuġa ġeiaġuirito, tano na kwakuri na ġerakato, Iesu murina na ġeiaġoto.

14 Iesu fenu ai edarokauto nai, ġia na tarimarima ġutuma-bara eġitarito, benamo evetuġa-rakavarito, ema ġeri keve tarimari evaġa-namorito.

15 Lavilavi rekenai Iesu ġena mero ġia ġenai ġeiaġoto, bena ġekirato, “Mai tu gabu fakana, asi tarima-rimana, ġaro varau bevarigo naima, mai tarimarima ġutuma-bara notuġuri, be vanuġai ġari ġaniġani beġenea voi.”

16 A Iesu ekirato, “Ġia asi beġene raka-veġita, ġomi na ġari boġono viniri, be beġene ġaniri.”

17 Ġia na ġekiraiato, ġekirato, “Ġai ġemai tu beredi imaima (5) e maġani-kone ruarua (2) moġo maġeri.”

18 Iesu na ekirarito, ekirato, “Maġana ġoġabi-iaġomari au ġegu ai.”

19 Benamo ġia na mai ġutuma-bara elaunaġirito, ġauġa iatari ai beġene tanutanu-tari etato, monai vau ġia na beredi imaima e maġani-kone ruarua eġabirito, gubai eboġe-raġeto, Barau evaġa-namoato vau, etavik-irakaririto, ġena mero evinirito, benamo ġia na vau mai tarimarima ġutuma-bara ġevinirito.

20 Mabarari ġeġani-maseto; ġaniġani kwari ġevaġa-vegogorito, boseġa gabanana ruarua (12) ġevaġa-vonorito.

21 Ġeġaniġanito, tau moġo, mabarari tu 5,000 kavana, senaġi vavine ma naturi keikeiri ġesi tu asi ġeiaivirito.

Iesu nanu iatanai erakato

Mareko 6:45-52; Ioane 6:16-21

22 Moġa murinai Iesu na ġena mero evaġa-guruġarito, ġasi ai beġene raġekau, beġene guine, kou reke ta ġana beġene iaġo etato. A ġia tu mo tarimarima ġutuma-bara roġo etuġu-rovorovorito.

23 Mai tarimarima vovoka etuġu-rakarito vau, ġia ġereġana ġoro ġana evaraġeto, bene ġauġau ġana.

Varau eboġito nai, ġia tu roġo moġa, ġereġana.

24 Ġasi tu kotuna ma fakana tanobara ġenana kou nuġanai, e ureure na edori-ġareva ġarevaiato, korana iavara na ġasi ġena raga ġoirana rekena na etogato-ġoi nai.

25 Horaġauna 3 ema 6 koloko vekaravari ai boġiboġi rekenai, Iesu ġia ġeri ai eiaġoto.

26 Senaġi ġena mero na nanu iatana na erakato-ġoi ġeġitaato, benamo nuġari maki ġefare-vaġito, ema ġegari-rakavato, ġekirato, “Mo tu murava ta!” Ġegarito nai ġeġabato maki.

27 Iesu na asikauna evaġa-guruġarito, ekirato, “Ġonuġa-gwaġiġi, mai tu au; asi ġogari.”

28 Petero na evaġa-veseato, ekirato, “Vereġauka, bema moġoni ġoi neganai, bono launaġigu, be nanu iatanai bana raka, ġemu ai bana iaġosi.”

²⁹ Iesu ekirato, “Noiaġoma!” Benamo Petero ġasi na eraka-riġoto, nanu iatanai erakato, Iesu ġenai eiaġoto.

³⁰ Senaġi Petero na iavara (e ureure) eġitaiao, benamo egarito, erei-riġoto nai eġaba-fouto, ekirato, “Vereġauka o, noma vaġa-maġurigu.”

³¹ Iesu asikauna ġimana etuġu-iaġoato, ġenai eveġabikauto, ekirato, “Veġabidadama kei tarimana, karase nai odaradarani?”

³² Tauri ruarua ġasi ai ġeraġekauto vau iavara edokoto.

³³ Ġasi tarimari tu ġia ġoiranai vau ġetoma-rakariġoto, ġekirato, “Moġoni veġata, ġoi tu Barau Natuna.”

Iesu na keve tarimari Genesareta ai evaġa-namorito

Mareko 6:53-56

³⁴ Ġia ġasi na ġevanaġito, Genesareta tanonai ġeraġasito.

³⁵ Mo gabu tarimari na Iesu ġea ġita-doġariato, benamo ġia varina mo gabu vanuġari mabarari ġevaġa-ribarito. Benamo keve tarimari ġia ġenai ġeġwa-iaġorito,

³⁶ e ġenoġiato, ġena dabuġa dudunai moġo maki beġene veġabikau. Gabivau, ġeveġabi-kauto tarimari mabarari varau ġenamoto.

15

Namo e rakava

¹ Farisea tarimari e taravatu ġevevaġa-riba iaġiato-ġoi tarimari kotari Ieruselema na Iesu ġenai ġeiaġoto, ġekirato,

² “Karase nai ġoi ġemu mero na ġita senera vereri ġeri vevaġa-riba asi ġeseġaġirini? Ġia ġimari maki dabara korikoriri ai asi ġeġurigiirini vau ġeġaniġanini!”

³ Iesu na evaġa-veserito, ekirato, “Be karase senemi vereri ġeri vevaġa-naġi boġono korana-iaġiri urari ai, Barau ġena taravatu guruġari ġoruġarini?”

⁴ Barau ekirato, ‘Tamamu e sinamu bono gubakauri,’ ema ‘Deikara ta na tamana o sinana beguruġa-rakava viniani tarimana tu boġono vaġi-mase!’

⁵ Senaġi ġomi ġokirani, tarima ta na tamana o sinana bevaġa-guruġaiani, bekirani, ‘Au na ġomi asi bavaġa-kavamini, korana bara vinimi dagarana tu Barau ġena dagara, naima ġia aviniani.’

⁶ Moġesi veġai ġomi na tarima ġokouani, tamana e sinana asi bene vaġa-kavari e asi bene gubakauri ġana. Gemi sene maġuriri maiġesiri ġerina Barau ġena taravatu guruġari asi aniri ai ġovaġa-iaġorini.

⁷ Gofaġofa tarimami, Isaia na eperoveta-iaġimito tu moġoni, ekirato,

⁸ ‘Mai besena tu mururi koriri ai moġo au ġegubakauguni ġeri Barau, senaġina ġia nugari tu manaġa rakava au ġegu ai.

⁹ Ġetoma-rakariġo vini-kavaguni, ġeri vevaġa-riba tu tarimarima ġeri vevaġa-naġi taravaturi, a dia au ġegu!’ ”

Dagara kotari na tarima ġevaġa-rakavarini

Mareko 7:14-23

¹⁰ Iesu na tarimarima ġutuma ġia ġenai ekea-iaġomarito, benamo ekirar-ito, ekirato, “Goseġaġi, ema boġono riba-maoro:

11 Murika na eraka-toĝani tarima murunai dagarana na ĝia asi evaĝa-rakavaiani, senaĝina kara ĝia nuĝana o loruna ĝutuna na ma muruna na eraka-rosini dagarana na ĝia evaĝa-rakavaiani.”

12 Ĝena mero ĝia ĝenai ĝeiaĝomato, benamo ĝekiraiato, ĝekirato, “Ĝoi ribamu, Farisea tarimari tu ĝoi ĝemu guruĝa beĝe seĝaĝia nai, nuĝari beĝe midigu?”

13 Iesu evaĝa-veseto, ekirato, “Tamagu gubai etanuni na ĝau asi evarorito mabarari tu beĝe raĝa-vaĝirini.

14 Gotuĝamaĝi-fitoĝari! Ĝia matari bubu, senaĝi ĝeurani mata-bubu tarimari beĝene ĝori-kauri. Bema mata-bubu tarimana na mata-bubu tarimana ta beĝori-kauani nai, tauri ruarua koufai beĝe keto-riĝoni.”

15 Petero na ekiraiato, ekirato, “Mai guruĝa veabanagina tauna korikori novaĝa-ribama.”

16 Iesu na ekirarito, ekirato, “Ĝomi maki asi ĝotuĝamaĝi-fakani tarima kotari kavana?

17 Asi ĝoribani maki? Dagara ta tarima muruna na eraka-toĝani, eiaĝoni sinaĝenai, monana eiaĝoni tauĝanina ĝenana ea raka-rosini.

18 Senaĝina muruna na ĝeraka-rosini dagarari tu nuĝana o loruna na ĝeiaĝomani naima, maĝeri dagara na tarima ĝevaĝa-rakavaiani.

19 Tarima nuĝana o loruna ĝenana tuĝamaĝi rakavari ĝeraĝeni nai, evaĝivaĝini, eveĝura-vanaĝini, emata-boraĝani, elemani, Kota gabunai ĝofaĝofa guruĝari ekiraĝirini, ema tarima namori arari ĝofaĝofa veĝari ai evari-fiurini.

20 Maĝeri dagara na tarima evaĝa-rakavaiani; senaĝina ĝimamu asi oĝuriĝiani vau oĝaniĝanini, monana tarima asi evaĝa-rakavaiani.”

*Irau bese vavinena ta ĝena veĝabidadama
Mareko 7:24-30*

21 Iesu na mo gabu eraga-kwaneato, eraka-iaĝoto Taia e Sidono rekeri tanori ai eraĝasito.

22 Benamo monai etanuto-ĝoi vau, Kanana vavinena ta Iesu ĝenai eiaĝomato, eĝaba-fouto, ekirato, “Vereĝauka, Davida Natuna o, au nove-tuĝagu! Au natugu ĝuiatona tu iauka rakavana na beboroĝia nai, ĝena midigu initoma tu barego rakava moĝo.”

23 Senaĝina Iesu na ĝia asi evaĝa-veseato. Benamo ĝena mero ĝia ĝenai ĝeiaĝomato, ĝenogiato, ĝekirato, “Notuĝu-rakaia! Ĝita murira na eiaĝomani ema guru baregona eveiani.”

24 Iesu evaĝa-veseto, ekirato, “Barau na au etuĝuguto tu, rekwarekwa mamoeiri, Israela tarimari, ĝeri moĝo.”

25 Benamo mo vavine Iesu kwakuna koranai evetuitarito, ekirato, “Vereĝauka, novaĝa-kavagu!”

26 Iesu evaĝa-veseto, ekirato, “Mero misiri ĝari ĝaniĝani bita ĝabirini, ma kwaiva bita fiu-vinirini tu asi maoro.”

27 Vavine na evaĝa-veseato, ekirato, “Vereĝauka, mani tu moĝoni, senaĝina kwaiva na ĝaniĝani kwari ĝeketo-firiĝoni, biaguri ĝeri ĝaniĝani fatari na, maki ĝeĝanirini.”

28 Benamo Iesu na evaĝa-veseato, ekirato, “Veĝabidadama barego vavinemu! Kara oura-viniani veĝana beĝorani.” Mo horai moĝo ĝia natuna ĝuiatona enamoto.

Iesu na keve tarimari vovoka evaĝa-namorito

²⁹ Iesu na mo gabu eiaġuiato, Galilea kouna sevina na eraka-vanaġito. Benamo ġoro tai eraġeto, tuġunai etanu-tarito.

³⁰ Tarimarima ġutuma-bara ġia ġenai ġeiaġomato, keve irairau tarimari ġeġabi-iaġomarito, kotari kwaku rakava, mata-bubu, kobari na ġedarato-ġoi tarimari, muru-bubu, ema keve irairau ġutuma maki. Iesu kwakuna koranai ġema tore-taririto, benamo ġia na evaġa-namorito.

³¹ Tarimarima mabarari na mai vetoġa ġeġitaiato nai, ġeġaba-rakavato, korana mururi bubu tarimari ġeguruġato, ġedarato-ġoi tarimari tauġaniri vinuba gaburi ai ġevetoreto, kwaku rakava tarimari ġerakato, mata-bubu tarimari ġeboġe-boġeto. Benamo ġia na Isaraela ġeri Barau ġevaġa-raġeato.

Iesu na tarimarima daġara vasivasi (4,000) eġuburito

Marko 8:1-10

³² Iesu ġena mero ġia ġenai ekeke-iaġomarito, ekirato, “Au na mai tarimarima avetuġarini, korana ġaro toitoi veġatana au ġesi mainai beġe tanu, ma kara ta maki roġosi roġo beġene ġania. Ġaniġani ta roġosi roġo beġene ġani nuġanai, au na asi batuġu-rakarini, korana dabarai beġea borimarini garina.”

³³ Ġena mero na ġedanagiato, ġekirato, “Mai tano fakanai ġaniġani vovoka tu kamasi bita doġarini vau, mai ġutuma-bara bita ġuburini?”

³⁴ Iesu na evaġa-veserito, ekirato, “Ġomi ġemi ai beredi tu vira maniġa?” Ġia ġekirato, “Beredi imaima ruarua (7) ġai ġemai maiġa, ema maġani-kone misiri kotari maki.”

³⁵ Benamo Iesu na mai tarimarima asisebo ekirarito, tano ai ġetanutanu-tari.

³⁶ Benamo beredi imaima ruarua (7) e maġani-kone eġabirito, Barau evaġa-namoato, ebuki-ġuturito, ġena mero evinirito, ġia na vegogo tarimari ma ġevinirito.

³⁷ Mabarari ġeġani-maseto murinai, Iesu ġena mero na ġaniġani kwari ġegogorito, boseġa imaima ruarua (7) ġevaġa-vonurito.

³⁸ Mo ġaniġani ġeġaniato ġenana tau moġo mabarana tu 4,000, senaġina vavine ma naturi ġesi tu asi ġeivirito.

³⁹ Benamo Iesu na mai ġutuma-bara etuġu-rovo rovorito, a ġia ġasi ai eraġeto, Magadan tanona ġana eiaġoto.

16

Farisea e Sadukea tarimari ġeri ura vetoġa ta guba na bene mariġo

¹ Farisea e Sadukea tarimari kotari Iesu ġenai ġeiaġoto, benamo ġedanagi-ribaġaniato. Ġeri ura vetoġa ta guba na bene mariġo, beġene ġitaia, ġia tu moġoni Barau na etuġuato tarimana.

² Senaġi Iesu na evaġa-veserito, ekirato, “Lavilavi ai ġaro evariġoni nai, ġokirani, ‘Guba bekakakaka, be ġura asi beraguni, ġitaġitana tu nega namo.’

³ A boġi-boġi rekenai ġokirani, ‘Toma tu ġura ma iavarana ġesi eiaġomani, korana guba bekakakaka, ema ġitaġitana maki ma garina.’ Guba ġoġitaiani nai, kara boġo kiraġiani, nega namo o nega rakava ġeri ai tu lorinai, senaġina maitoma ġaro vetoġari tu asi ribami!

⁴ Maitoma ġuru rakavana ma veġura-vanaġina ġesi, (Barau ġenana ġeveġitato ġuruna), vetoġa ma evetauani, senaġina vetoġa ta asi baviniġini, a Iona, peroveta tauna, ġenai eġorato vetoġana moġo.” Benamo Iesu na eraga-kwanerito, ġerina eraka-veġitato.

*Iesu ġena mero ġedaradarato
Mareko 8:14-21*

⁵ Kou na ġeġasi-vanaġito reke ta kefo ai vau, Iesu ġena mero ġeribato, ġaniġani asi ġeġabikauto.

⁶ Benamo Iesu na ekirarito, ekirato, “Lorimi boġono vetore, boġono boġeboġe, korana Farisea tarimari e Sadukea tarimari ġeri farao vaġa-tubuna mura-murana lorina boġono torea.”

⁷ Ġia tauġeri ġeguruġa-guruġa iaġi-vegogo-ato, ġekirato, “Ġia maiġesi eguruġani, korana beredi asi bita ġabikau nai.”

⁸ Iesu ribana ġia na kara ġekiraġiato naima, edanaġirito, ekirato, “Karase nai ġereġami na beredi asi boġo ġabikau ġoguruġa-guruġa iaġiani? Vegabidadama kei tarimami!

⁹ Gomi roġosi rogo boġono riba-maoro? E asi ġotuġamaġiani beredi imaima (5) ġenana tarimarima 5,000 ġeġaniġanito, e beredi kwari ġogogorito tu boseġa vira ġovaġa-vonurito?

¹⁰ Ema ta maki, farao imaima ruarua (7) ġenana tarimarima 4,000 ġeġaniġanito, e beredi kwari ġogogorito tu boseġa vira ġovaġa-vonurito?

¹¹ Kamasi se nuġami asi ġevekeoni, ma asi ġoribani, au na tu dia beredi aguruġa-iaġiani? Ma nakira: Farisea tarimari e Sadukea tarimari ġeri farao vaġa-tubuna dagarana lorina boġono torea!”

¹² Benamo ġia nuġari ġevekeoto, ema ġeribato maki, Iesu na dia farao vaġa-tubuna muramurana eguruġa-iaġiato, senaġina Farisea e Sadukea tarimari ġeri vevaġa-riba guruġari ġofaġofari rekeri ai eguruġato.

*Petero na Iesu ekiraġi-foforiato, Keriso
Mareko 8:27-30; Luka 9:18-21*

¹³ Iesu eiaġoto, Kaisarea Filipi vanuġana tanona rekenai eraġasito. Monai vau ġia na ġena mero edanaġirito, ekirato, “Tarimarima tu kara ġetoni, Tarimarima Natuna tu deikara?”

¹⁴ Ġia ġekirato, “Kotari ġekirani, ġoi tu Ioane Babatiso, kotari ġekirani, Elia, ma tari ġekirani tu, Ieremia o peroveta tarimana ta.”

¹⁵ Iesu na ġia edanaġirito, ekirato, “A ġomi tu kara ġotoni au tu deikara?”

¹⁶ Simona Petero na evaġa-veseato, ekirato, “Ġoi tu Keriso, maġuri Barauna Natuna.”

¹⁷ Iesu na evaġa-veše viniato, ekirato, “Simona, Ioane natuna, bono iaku ema vevaġa-namo iatamu ai bene tanu, korana mai vevaġa-veše moġonina bovinia, maġa tu dia tarima ta ġenana beiaġoma, senaġina mai tu au Tamagu gubai etanuni na ġoi bevinimu.

¹⁸ Moġa lorinai akiramuni: Ġoi tu Petero, (anina tu fore), ema mai fore iatanai au ġegu ekalesia bavaġa-ruġaiani. Mase ġena seġuka na maki asi bevaġa-darereani.

¹⁹ Au na Guba Basileia kiri maki ġoi bavinimuni; tanobarai bobarurini dagarari mabarari gubai maki Barau na bebarurini; e tanobarai boruġarini dagarari mabarari gubai maki Barau na beruġarini.”

²⁰ Benamo Iesu na ġena mero ekirarito, tarima ta asi beġene vaġa-ribaia ġia tu Keriso, (Barau na ekiraġi-toreato vevaġa-maġuri tauna).

*Iesu na ġena mase e variġisi-ġenoġoi eguruġa-iaġirito
Mareko 8:31-9:1; Luka 9:22-27*

²¹ Mo nega na veġata Iesu na ġena mero evaġa-riba guinerito, ekirato, “Au tu Ierusalem ġana aiāġoni, be Iuda vereri, e Rubu Vevaġa vereri baregori,

ema taravatu vaġa-riba-iaġina tarimari ġerina roġo amidigu-lelevaġini; ema beġe vaġi-maseguni maki, senaġina ġaro vaġa-toitoinai vau, mase na ma bavaisiraġe-ġenogoini.”

²² Petero na eġori-veġitaiao, benamo esisiba-viniato, ekirato, “Vereġauka, dia maniġesina; maniġesina asi beġe vei-vinimuni, ma asi beġorani maki.”

²³ Benamo Iesu eboġe-kureto, Petero ekiraiato, ekirato, “Ġoi Satani, ġeguna noraka-ġerevaġi! Au ġegu iaġoiāġo ġoi na odiu-ġauani, korana mai ġemu tuġamaġi gurugana tu dia Barau ġenana eiāġomani, senaġina tarimarima ġerina.”

²⁴ Iesu na ġena mero evaġa-guruġarito, ekirato, “Bema tarima ta au murigu ai bene raka etoni nai, tauġena bene veruġa, ġena satauro bene ġwaia, ma murigu ai bene raka.”

²⁵ Moġa lorinai deikara tauġena moġo ġena maġuri lorina etoreani tarimana, ġena maġuri befitoġaiani. A deikara au daigu ai ġena maġuri befitoġaiani tarimana, ġena maġuri asi bevei-rekwarekwaiani, senaġi beġogariani.

²⁶ Tarima ta na tanobara mabarana uranai ġena maġuri befitoġaiani, ġena namo tu kara ġia ġenai? Korana tarima ta ġena maġuri efitoġaiato nai, kara na vau ma bevoi-ġenoġoiani?

²⁷ Korana Tarimarima Natuna tu Tamana mamana marevana e seġuka baregona e ma ġena aneru mabarari ġesi beġe iaġomani, benamo tarimarima tata ġeri veġa ilailanai voiri tu bevinirini.

²⁸ Moġoni akiramini, mai kotari ini ġeruġa-taġoni maġeri tu asi roġo beġe maseni, beiaġoni mo, Tarimarima Natuna ġena Basileia nuġanai beiaġomani beġe ġitaiani.

17

Iesu vetoġana eirauto

¹ Ġaro imaima sebona (6) ġekorito murinai, Iesu na Petero, e Iakobo (o Iames), ema tarina Ioane eġabirito, ġoro baregona ta tuġuna ġana ġevaraġeto, monai ġia ġereġari moġo.

² Ġia ġeboġe-taġoto-ġoi nuġanai, Iesu ġitaġitana varau eirauto: Ġia ġoirana ekimore-kimoreato ġaro noġa, ma ġena dabuġa ekuro-ġaroġaroto.

³ Benamo mai mero toitoi na Mose e Elia ġeġitarito, Iesu ġesi ġeguruġa guruġato-ġoi.

⁴ Monai Petero eguruġa-fouto, Iesu ekiraiato, ekirato, “Vereġauka, namo vedaurea ġita mainai maġera! Be, ourani nai, fouta toitoi naragari, ta ġoi ġemu, ta Mose ġena, ema ta Elia ġena.”

⁵ Ġia roġo eguruġato-ġoi, magube kuro-ġaroġarona na ema ġabi-ġaurito vau, ġaro ta mai magube nuġana na ekea-rosito, ekirato, “Mai tu au Natugu, auravini-baregoani; ġia ġenai aiaku-rakavani. Ġia boġono seġaġi-vinia!”

⁶ Iesu ġena mero toitoi na mai ġaro ġeseġaġiato nai, tano ai ġeketo-tarito ġoirari maki tano ai, korana ġegari-rakavato nai.

⁷ Benamo Iesu tu ġia ġeri ai eiāġoto, tauġaniri eġabi-kararito, ekirato, “Ġovaisivaisi-raġe, asi ġogari.”

⁸ Ġia ġeboġe-vaisito nai, ġia na tarima ta asi ġeġitaiao ġia ġesi, Iesu moġo ġereġana.

⁹ Mabarari ġoro na ġemariġoto-ġoi nai, Iesu na evaġa-guruġarito, ekirato, “Boġo ġita dagarari tarima ta asi boġono vaġa-riġaia, bene iaġo mo, Tarimarima Natuna mase na bene varigisi-ġenoġoi.”

¹⁰ Benamo Iesu ġena mero na ġedanagiato, ġekirato, “Kara dainai taravatu vaġa-riġa-iaġina tarimari ġekirani, Elia tu beiaġoma-guineni?”

¹¹ Iesu evaġa-veseto, ekirato, “Moġoni veġata, Elia tu beiaġoma-guineni, dagara mabarari bevaġa-variġu ġenoġoirini.

¹² A au na akiramini, Elia tu varau eiaġomato, senaġi tarimarima tu asi ribari ġia tu deikara. Ġeri ura veiġari ai moġo ġevei-viniato-ġoi. Moġa ilailanai Tarimarima Natuna maki beġe vaġa-midigu midiguani.”

¹³ Mai guruġa ġerina Iesu ġena mero ġeribato, ġia na tu Ioane Babatiso ekiragi-kara-viniato.

*Iesu na iauka rakavana na eborogiato merona evaġa-namoato
Mareko 9:14-29; Luka 9:37-42*

¹⁴ Ġia ma ġegenogiato tarimarima ġutuma ġeri ai nai, tarima ta Iesu ġenai eiaġomato, ġoiranai ema vetui-tarito,

¹⁵ ekirato, “Vereġauka, au natugu merona novetuġaia! Ġia tu ġue na evaġiani, ema tauġanina evaġa-ġoġo-ġogo rakavaiani. Nega ġutuma karavai eburi-raġeni e nanu ai eburi-reini.

¹⁶ Ġemu mero ġeri ai aġabi-iaġoato, senaġina vaġa-namona ġia tu asi ilaila.”

¹⁷ Iesu evaġa-veseto, ekirato, “Asi veġabidadamami e kira-sirivaġi ġuruna! Ġaro vira au tu sevimi ai bana tanu? Ġaro vira bana vevaġa-gwaġiġi vinimi? Mero ġegu ai ġoġori-iaġomaia!”

¹⁸ Iesu na mero tauġanina ġenai etanuto iauka rakavana ekira-ġoiato, benamo iauka rakavana eraka-vaġito, ma asikauna mero enamoto.

¹⁹ Gabivau Iesu ġena mero ġenai ġeiaġoto, vekuretoġai ġedanagiato, ġekirato, “Karase nai ġai na iauka rakavana asi ilaila baġa lai-vaġia?”

²⁰ Iesu na evaġa-veserito, ekirato, “Korana ġemi veġabidadama asi ilaila naima. Akira-korikorimini, bema ġemi veġabidadama mastadi ġutuna misina korokorona kavana nai, mai ġoro boġo kiraiani, boġo kirani, ‘Mainana noveġabi-vaishi, ma iomonai noa vetore!’, benamo beveġabi-vaishini ma beiaġoni. Veġa mabarari maki boġo veirini riba. [²¹ Iauka rakavari maġesina lailairi tu dabara irauna tai asiġina, senaġina ġauġau e ġaniveaġai ġereġana moġo.]”

*Iesu ġena mase ma ekiragi-ġenoġoiato
Mareko 9:30-32; Luka 9:43-45*

²² Ġaro ta, Iesu ma ġena mero ġesi Galileai ġetanuto-ġoi nai, Iesu na ekirarito, ekirato, “Tarimarima Natuna tu beġe revaiani vau tarimarima ġimari ai beġe toreani.

²³ Benamo beġe vaġi-maseani, senaġi ġaro vaġa-toitoinai ma bevaisiraġe-ġenoġoini.” Ġena mero ġeseġagiato nai, nuġari ġemeto-rakavato.

Rubu Veaġa takesi moniri vinina

²⁴ Iesu na ġena mero ġesi Kaperanauma vanuġanai ġeraġasito, benamo Rubu Veaġa monina ġegogoato-ġoi tarimari ġeiaġomato, Petero ġedanagiato, ġekirato, “Ġomi ġemi vevaġa-riġa tauna Rubu Veaġa ġena takesi moniri tu evinini ba asiġina?”

²⁵ Petero na evaḡa-veseato, ekirato, “Oi, evinini.” Petero numa ḡana eḡenoḡoito nai, Iesu na edanaḡiato, ekirato, “Simona, ḡoi ḡemu tuḡamaḡi tu kamasi? Tanobara vereri o kini ḡeri takesi moniri tu deikara na beḡene viniri? Ḡia naturi na ba tarima boruri na beḡene viniri?”

²⁶ Petero evaḡa-veseto, ekirato, “Tarima boruri na.” Iesu na ekiraiato, ekirato, “Moḡa anina, ḡia naturi tu asi beḡe vinini.

²⁷ Senaḡina asi bitana vaḡa-baruri ḡana, naima noiḡo kou ḡana. Kimai bono fiu-riḡoa, maḡani-kone giniguinena boinu-raḡeani nai, bokana bono keo-baḡakaia, silva monina ta bodoḡariani nuḡanai. Bono ḡabia, benamo bono viniri ḡita taura ruarua ḡera Rubu Veaḡa takesi monina.”

18

Deikara tu barego vedaurea Guba Basileia nuḡanai?

¹ Mo negai Iesu ḡena mero ḡenai ḡeiaḡoto, ḡekirato, “Deikara tu barego vedaurea Guba Basileia nuḡanai?”

² A Iesu na mero misina ta ekea-iaḡomaiato, benamo vekaravari ai evaḡa-ruḡa-tariato,

³ ekirato, “Moḡoni veḡata, akiramini, ḡomi asi boḡo vetuḡamaḡi-kureni e mai mero misina kavana asi boḡo iaḡoni nai, ḡomi tu Guba Basileia nuḡanai asi boḡo raka-toḡani.

⁴ Tarima ta tauḡena evevaḡa-manauni mai mero misina kavana, ḡia tu barego lelevaḡi Guba Basileia nuḡanai.

⁵ Ema deikara mero misina maiḡesina kavana au aragu ai beḡabi-raḡeani tarimana na au maki eḡabi-raḡeguni.”

Tarima ta na mero misina ḡena veḡabidadama asi bene vaḡa-rakavaia Mareko 9:42-48; Luka 17:1-2

⁶ Senaḡina bema tarima ta na au eḡabidadama-viniguni mero misina ta ḡena veḡabidadama evaḡa-rakavaiani, ḡia tu bere namo fore barana ḡaiḡonai ḡere baru-kaua, ma davara dodokunai bere vebora-mase.

⁷ Tanobara vetuḡana kekei, korana veribaḡani ḡenana tarima ḡeri veḡabidadama evaḡa-rakavaiani. Dagara moḡesina vanaḡivanaḡi beḡe ḡorani veḡata, senaḡina veribaḡani evaḡa-ḡoraiani tarimana neḡi, vetuḡana kekei.

⁸ Bema ḡoi ḡimamu o kwakumu na rakavai etoremuni nai, bono basiḡutua, bena bono fitoḡaia! Ḡimamu sebonai o kwakumu sebonai maḡuri vanaḡivanaḡi bono doḡaria tu namo, a asi namo ḡimamu ruarua ma kwakumu ruarua karava eḡara-vanaḡi vanaḡini gabunai beḡe fiu-kaumuni.

⁹ Bema ḡoi matamu na rakavai etoremuni nai, bono ḡibo-vaḡia, bena bono fitoḡa-kwareḡaia. Matamu sebonai maḡuri vanaḡivanaḡi bono doḡaria tu namo, a asi namo matamu ruarua karava eḡara-vanaḡi vanaḡini gabunai beḡe fiu-kaumuni.”

Barabore - Rekwerekwa mamoenā Luka 15:3-7

¹⁰ “Lorimi boḡono vetore, mai mero misiri ta boḡo ruḡaiani ḡesi. Korana akiramini: Ḡia aneruri na au Tamagu gubai etanuni ḡoirana nega vanaḡivanaḡi ḡeḡitaiani. [¹¹ Tarimarima Natuna tu rekwerekwa tarimari vaḡa-maḡuriri ḡana eiaḡomato.]

¹² Kamasi ḡotuḡamaḡiani? Bema tarima ta ma ḡena mamoe sinau ta (100), senaḡina sebona berekwa-rekwani nai, ḡia kara beveini? Ḡia na tu 99 ḡoro

gabakanai beraga-kwane-rini, benamo beiaġoni, rekwa-rekwa mamoea bea vetauani.

¹³ Bedoġariani nai, moġoni akiramini, beiaġoni rakavani moġo. A ġena mamoe 99, asi ġedobito dagarari, maki bevanaġirini.

¹⁴ Moġa ilailanai Tamami gubai etanuni asi ġena ura, mai mero misiri ta bene rekwarekwa.”

Tarikakamu ta na bevei-rakava vinimuni

¹⁵ “Bema goi tarikakamu ta na bevei-rakava vinimuni nai, bono iaġo, ġena veiġa rakavana bono vaġa-fofori vinia. Senaġina, vekuretoġai mai veiġa bono veia, ġia ma goi ġesi moġo. Bema ġia na goi beveġaġimuni ema beġabi-ragemuni nai, tarikakamu goi ġemu ai beġenoġo.

¹⁶ Senaġina bema asi beġabi-ragemuni nai, tarima sebona o ruarua bono ġabiri, goi ġesi boġono iaġo ġenai, benamo ‘guruġa mabarari beġene vaġa-moġoniri, seġaġiseġaġi tarimari ruarua o toitoi ġerina,’ Buka Veġa ekirani kavana.

¹⁷ Bema ġia asi beveġaġirini nai, beġe ġora dagarari mabarari tu rubu o ekalesia vegogona bono kira-varaia. Bema ekalesia vegogona garona asi beveġaġiani, goi na ġia tu Barau asi ribana tarimanai ema takesi gogo o veirakava tarimanai bono vaġa-iaġoa.

¹⁸ Moġoni akiramini: Tanobarai boġo barurini dagarari mabarari gubai maki Barau na bebarurini; e tanobarai boġo ruġarini dagarari mabarari gubai maki Barau na beruġarini.

¹⁹ Au na akira-ġenoġoimuni: Tano-barai ġomi tarima ruarua dagara tai nuġami boġo tore-sebonaiani ema boġo ġauġau-iaġiani tu, Tamagu gubai etanuni na bevinimuni.

²⁰ Korana au aragu ai tarima ruarua o toitoi beġe tanu-vegogoni gaburi ai, au maki ġia ġesi monai.”

Barabore - Rakava asi etuġamaġi-fitoġaiani tarimana

²¹ Benamo Petero tu Iesu ġenai eiaġoto, ekirato, “Vereġauka, au tarikakagu bevaġa-rakava iaġoguni nai, ġena rakava tu nega vira kavana bana tuġamaġi-fitoġaia? Imaima ruarua (7) ba?”

²² Iesu evaġa-veseto, ekirato, “Asiġina, dia 7 moġo, senaġina 70 ma vaġa-baregona 7, o 70 taims 7, (moġa anina tu vanaġivanagi).

²³ Goseġaġi, Guba Basileia tu vere ta kavana, ġia eurato, ġena vetuġu-naġi tarimari ġeri ġabitore bene vetauri ema bene vaġa-maorori.

²⁴ Ġia na ġabitore dori evetaurito-ġoi nuġanai, vetuġunaġi tarimana ta ġema-ġabi-toġaiato, ġia ġena ġabitore ġenai vira milion kina, moni barego vedaurea, eveiato.

²⁵ Mai vetuġunaġi tauna ġena moni asi ilaila ġena ġabitore voina vinivinina ġenai. Moġesina naima vere na ġena vetuġu-naġi merori ekirarito, mai tarima beġene voivoi-iaġia, vere ta ġena vetuġunaġi meronai bene iaġo, ma ġaraġona e ma natuna ema ġena farefare mabarari ġesi maki, mo ġena ġabitore bene davaia ġana.

²⁶ Vetuġu-naġi tauna vere kwakuna koranai evetui-tarito, enoġiato, ekirato, ‘Au ġegu ai bono vevaġa-gwaġiġi. A au na ġemu dagara mabarari voiri bavanimuni.’

²⁷ Vere na evetuġaiato nai, vetuġunaġi tauna ġena ġabitore etuġamaġi-fitoġaiato, benamo etuġu-rakaiato.

²⁸ Mai vetuḡunaḡi tauna eraka-rosito, ḡia ḡatana vetuḡunaḡi tarimana ta edoḡariato. Mai ḡatana moni kotuna eḡabi-toreato ḡia ḡenai. Eḡabi-tariato, ma ḡaiḡona egigiato, ekirato, ‘Au ḡegu ai oḡabi-toreato monina voina novinigu!’

²⁹ Ḡatana vetuḡunaḡi tarimana ḡia kwakuna koranai evetui-tarito, enoḡiato, ekirato, ‘Nega kota novinigu roḡo, be voina mabarana bana vinimu!’

³⁰ Senaḡina ḡia asi eurato, benamo dibura numai edori-toḡaiato. Monai bene tanu, bene iaḡo mo, ḡena ḡabitore voina bene dava-iaḡia etato.

³¹ Benamo ḡia ḡesi vetuḡunaḡi ḡeiaḡo-vini vegogoato-ḡoi tarimari na mo veiḡa ḡeḡitaiato nai, ḡia nuḡari ḡemetoto, benamo ḡeiaḡoto vere ḡenai, mo kara ḡeḡorato dagarari mabarari ḡevaḡa-ri baiato.

³² Moḡesi nai ḡia na vetuḡunaḡi tauna numai ekea-toḡaiato, ekiraiato, ekirato, ‘Ḡoi vetuḡunaḡi tauna rakavana! Au na ḡoi moni vira milion au ḡegu ai oḡabi-toreato dagarari mabarari atuḡamaḡi-fitoḡarito, voina asi oviniguto, korana onogiguto nai.

³³ Ilailana ḡoi na maki karomu vetuḡunaḡi tauna boro vetuḡa-ḡwaia, au na ḡoi avetuḡa-ḡwamuto kavana.’

³⁴ Mai vere ebaru-rakavato, benamo vetuḡunaḡi tauna dibura numai etoreato, monai metona bene ḡwaia mo, ḡena ḡabitore voina mabarana ma bene vini-ḡenoḡoia.

³⁵ Iesu ḡena guruḡa magona rekenai maḡesina ekirato: Tamagu gubai etanuni na ḡomi mabarami mai veiḡa sebonai moḡo bevei-vinimini, bema ḡoi tarikakamu ḡena rakava nuḡamu mabarana ḡesi asi botuḡamaḡi-fitoḡaiani nai.”

19

Veḡaraḡo ruḡaruḡana

¹ Iesu na maḡeri dagara mabarari eguruḡa-iaḡi ḡosirito murinai, Galilea eiaḡuiato, Iudea tanona ḡana eiaḡoto, Ioridana ḡarukana reke ta kefonai.

² Tarimarima ḡutuma-bara ḡia murinai ḡeiaḡomato, e monai ḡeri keve evaḡa-namorito.

³ Farisea tarimari kotari ḡia ḡenai ḡeiaḡoto, ḡevedanaḡi-veribaḡaniato, ḡekirato, “Tau ta ḡena ura ḡaraḡona bene fitoḡaia etoni nai, taravatu na begabiani?”

⁴ Iesu na evaḡa-veserito, ekirato, “Ḡomi na Buka Veaḡa asi ḡoiaviani? Maḡesi ekirani, “Tovotovona na veḡata, Barau na dagara mabarari eveirito nai, ḡia na tarimarima maki eveirito tau e vavine.’

⁵ Benamo Barau ekirato, ‘Moḡesina nai tau ta na tamana e sinana beraga-kwanerini, ḡaraḡona ḡesi beḡe tanuni, benamo ḡia tauri ruarua beḡe sebonani.’

⁶ Moḡa lorinai ḡia tu dia ruarua, senaḡi sebona moḡo. Moḡesi nai Barau na etore-sebonarito tarimari tu, tarima ta na asi ma bene tore-kirari.”

⁷ Farisea tarimari na ḡekiraiato, ḡekirato, “Karase nai Mose na taravatu eveiato nai, ekirani, tau na veḡaraḡo ruḡaruḡana fefana betoreani vau, ḡaraḡona betuḡu-rakaiani?”

⁸ Iesu evaḡa-veseto, ekirato, “Mose na maoro evinimito, ḡaraḡomi boḡono tuḡu-rakari ḡana, korana ḡomi vaḡa-ribami tu gwaḡiḡi rakava nai. Senaḡina Barau na dagara mabarari eveirito nai, maḡesina tu asiḡina.

⁹ Akiramini: Deikara na ġaraġona, enabe asi eveġura-vanaġini, senaġi efitoġaiani moġo, vavine ta ma beġaraġoani, ġia tu beveġura-vanaġini.”

¹⁰ Iesu ġena mero na ġekiraiato, ġekirato, “Veġaraġo dabarana mo-ġesina nai, tarimarima asi beġene veġaraġo tu namo banaġu.”

¹¹ Iesu evaġa-veseto, ekirato, “Mai vevaġa-riba maiġa tarimarima mabarari na asi beġe tuġamaġi-fakaiani, senaġi Barau na deikara tuġamaġi-faka evinirito tarimari moġo.

¹² Tarimarima kotari asi ġeveġaraġoni, korana moġesi veġatana ġemaġurito sinari ġerina, be asi ilaila beġe veġaraġoni; ma kotari tu eunuko tauri kavari, (tarimarima na seuri ġefararini); ema kotari tu Guba Basileia o Barau vetuġunaġina beġene iaġo-vinia uranai asi ġeveġaraġoni.”

Iesu na mero misiri evaġa-namorito

Mareko 10:13-16; Luka 18:15-17

¹³ Tarima kotari na naturi Iesu ġenai ġeġwa-iaġorito, ġimana ġia iatari ai bene tore-kauri, ema bene ġauġau ġana. Senaġina ġena mero na ġekira-ġoirito.

¹⁴ Iesu na ekirarito, ekirato, “Mani mero misiri ġeiaġoma au ġegu ai, asi ġokira-ġoiri, korana Guba Basileia tu maniġesina kavana tarimari ġeri.”

¹⁵ Benamo Iesu ġimana iatari ai etore-kaurito, evaġa-namorito vau eiaġuirito.

Tarima variġuna ma ġena farefare vovoka

Mareko 10:17-31; Luka 18:18-30

¹⁶ Ġaro tai tau ta Iesu ġenai eiaġoto, ekirato, “Vevaġa-riba tauna, kara dagara namona baveiani vau, maġuri vanaġivanaġi baġabiani?”

¹⁷ Iesu na evaġa-veseato, ekirato, “Karase nai au odanaġiguni, aiġa tu dagara namona? Sebona moġo namo, Barau. Bema ourani maġuri vanaġivanaġi bono ġabia nai, Barau ġena taravatu bono korana-iaġiri.”

¹⁸ Ġia na Iesu edanaġiato, ekirato, “Kamara taravatu okiraġirini?” Iesu ekirato, “Asi bono vaġivaġi, asi bono veġura-vanaġi, asi bono lema, asi bono vevaġa-bade ġofaġofa,

¹⁹ tamamu e sinamu bono gubakauri, e sevimu tarimana maki bono ura-vinia, ġoi tauġemu oveura-vinini kavana.”

²⁰ Mai maraġa variġuna ekirato, “Au na mani taravatu mabarari akorana-iaġirini. Kamara dagara tu au na ma bana veia?”

²¹ Iesu na ġia evaġa-veseato, ekirato, “Bema ġoi ourani bono iobukaiobuka nai, giniguine tu noiaġo, ġemu farefare mabarari bono voivoi-iaġiri, be moniri tu asi ġeri-ġari tarimari bono viniri, benamo gubai tu ma ġemu farefare. Gabivau murigu ai bonoma raka.”

²² Maraġa variġuna na maiġa eseġaġiato nai, nuġana ma metona ġesi eiaġuiato, korana ġia tu ma ġena farefare ġutuma tarimana.

²³ Iesu na ġena mero ekirarito, ekirato, “Au na akira-korikorimini: Farefare vovoka tarimari ġeri rakatoġa Guba Basileia nuġanai tu gwaġiġi rakava.

²⁴ Ma akiramini: Kamela tu nila kadarena na bevanaġini kotuna gwaġiġi, senaġi ġena farefare vovoka tarimana Barau ġena Basileiai ġena rakatoġa tu gwaġiġi rakava.”

²⁵ Ġena mero mai guruġa ġeseġaġiato nai, ġeġaba-rakavato moġo. Benamo ġevedanaġito, ġekirato, “Be deikara na maġuri vanaġivanaġi bedoġariani?”

26 A Iesu na eġita-karakararito, benamo evaġa-veserito, ekirato, “Tari-marima ġeri ai tu asi ilaila, senaġi Barau ġenai dagara mabarari tu ilaila.”

27 Benamo Petero eguruġa-fouto, ekirato, “Ġoi ribamu, ġai ġema dagara mabarari tu ġaraga-kwanerito, benamo ġoi murimu ai ġarakani! Be ġai kara baġa ġabini?”

28 Iesu na ekirarito, ekirato, “Moġoni akiramini, tanobara variguna beforini nai, Tarimarima Natuna ġena terona o vere seana kimorekimorenai betanu-kauni, ma ġomi gabanana ruarua (12) au murigu ai ġorakani tarimami maki vere seari gabanana ruarua (12) ai boġo tanukauni, Isaraela ġena doġoro gabanana ruarua (12) boġo ġita-ġaurini, ema boġo ġori-kaurini.

29 Tarima ta na ġena numa, kakana, tarina, tobana, tamana ma sinana e natuna, ema ġena tano, au uragu ai beiaġuirini nai, ġia tu sinau-sinau ai dagara bedoġarini, ema maġuri vanaġivananġi maki beġabiani.

30 Senaġina tarimarima ġutuma toma ġequineni tu beġe gabini, ema ġutuma maki initoma ġegabini tu beġe guineni.”

20

Barabore - Ġauvei tarimari vine tavoġanai

1 “Guba Basilea tu maġesi kavana: Vine tavoġana tarimana ta boġiboġi iamoiamo ai numa na eraka-rosito, ġena vine tavoġanai beġene ġauvei tarimari evetaurito.

2 Benamo ġauvei tarimari ġesi ġeguruġa-vegogoto ma ġevaġa-moġoniatto, mo ġauvei tarimari ġaro sebna ta beġe ġauveini voiri silva monina sebna bevinirini ġetato. Benamo ġena vine tavoġana nuġanai etuġu-iaġorito.

3 Boġiboġi 9 koloko kavana ġia ma eraka-rosito, maketi gabuna ġana eiaġoto, monai tarima kotari ġeruġa-reko rekoto-ġoi eġita-rito.

4 Benamo ekirarito, ekirato, ‘Ġomi maki ġegu vine tavoġana ġana ġoiāġo, ġoa ġauvei, be voimi maorona bana vinimi.’

5 Ġia maki ġeiāġoto. Ġaroġota 12 koloko ma 3 koloko kavana ġia numa na ma eraka-rosito, kotari ma edoġaririto, etuġurito.

6 Lavilavi rekenai 5 koloko kavana ma erakarosi-ġenoġoito, kotari roġo mo ġeruġa-taġoto-ġoi nai edoġaririto. Benamo edanaġirito, ekirato, ‘Karase nai mainai ġoruġa-kava ruġa-kavani mo, ġaro mo evariġoni?’

7 Ġia na ġevaġa-veseato, ġekirato, ‘Korana tarima ta na ġauvei asi evinimani nai.’ Benamo ekirarito, ‘Ġomi maki ġegu vine tavoġana ġana ġoiāġo, ġoa ġauvei.’

8 Ġaro eboraiato-ġoi nai, tavoġa biaguna na ġauvei tarimari eġita-ġaurito-ġoi tauna ekiraiato, ekirato, ‘Ġauvei tarimari nokeari, be voiri noviniri, vau beġe ġauvei tarimari bono vini-guine, bene iaġo mo, bakea-guineri tarimari bono vini-raġasi.

9 Benamo mo lavilavi 5 koloko etuġurito tarimari ġeiāġoma-guineto, benamo silva moniri sebori-sebori ġegabitto.

10 Ġeiāġo-guineto tarimari ġeiāġomato nai, ġia mataboru ġekirato tu, voiri kotari ma betore-kaurini, senaġi ġia maki silva moniri sebori-sebori moġo ġegabitto.

11 Ġeri moni ġegabitto nai, ġemuġu-muġuto tavoġa biaguna ġenai,

12 ġekirato, ‘Mai tarimarima gabivau ġeiāġomato maġeri tu, hora sebonai moġo beġe ġauvei ma voiri, a ġai tu ġaro vinubana ġavekwarāġini, ma

ġaro ġena seġuka na etunu-rakavamani, nuġanai voima ġia ġeri ġesi bovini-sebonama.'

¹³ Tavogħa biaguna na ġia ta ekiraiato, ekirato, 'Ġatagu, noseġaġi, au na ġoi asi baġofamu. Taguruġa-vegogoto nai, ġaro sebona voina tu silva monina sebona tatato, nene?

¹⁴ Mai moġo voimu noġabia, be noraka! Au aurani mai gabi tarimana bana vinia, ġoi bavinimu lailanai.

¹⁵ Be, au ma ġegu maoro, mai ġegu moni tu ġegu ura lailani bana vini. Ba ġoi obaruni, korana au tu nuġagu ma iakuna ġesi avinini nai?

¹⁶ Iesu ġena guruġa evaġa-magoato nai ekirato, "Guine tarimari tu beġe gabini, ma gabi tarimari tu beġe guineni."

Iesu ġena mase ma ekiraġi-foforiato
Mareko 10:32-34; Luka 18:31-33

¹⁷ Iesu Ierusalemata dabarana na evaraġeto-ġoi nai, ġia na ġena mero gabanana ruarua (12) eġabi-ġere-vaġirito, veġuni ai evaġa-guruġarito, ekirato,

¹⁸ "Ġoseġaġi, ġita tu Ierusalemata ġana tavarageeni. Monai Tarimarima Natuna tu Rubu Veagħa vereri baregori ema taravatu vaġa-riba-iaġina tarimari ġimari ai beġe toreani. Ġia na ġena mase guruġana beġe vaġa-moġoniani,

¹⁹ benamo irau bese (o Roma) tarimari beġe vinirini, ġia na beġe vaseva-vaseva iaġiani, beġe kwariani e beġe vaġa-satauroani; senaġi ġaro vaġa-toitoinai vau ma bevaisiraġe-ġenoġoini."

Sina ta ġena noġinoġi
Mareko 10:35-45

²⁰ Benamo Sebedaio ġaraġona ma natuna ruarua Iakobo (o Iames) ema Ioane ġesi Iesu ġenai ġeiaġoto, ġoiranai ea vetui-tarito, dagara ta nenogħia ġana.

²¹ Benamo Iesu na vavine edanaġiato, ekirato, "Ġoi kara ourani?" Ġia evaġa-veseto, ekirato, "Nokira-varagu, au natugu tauri ruarua iniġeri, ġoi ġesi beġeneasi tanu, ta aroribamu ai, ma ta kaurimu ai ġemu Basileia nuġanai."

²² A Iesu na evaġa-veserito, ekirato, "Ġomi tu asi ribami kara ġonoġiani. Au na midigu bedina banuani ġomi maki boġo niuni riba?" Ġia ġevaġa-veseto, ġekirato, "Oi, baġa niuani."

²³ Iesu na ma ekirarito, ekirato, "Moġoni, au ġegu bedi na ġomi maki boġo niuni, senaġi au aroribagu rekenai o kaurigu ai boġono tanu ġotoni tu, dia au na bavaga-moġoniani; a mai tu au Tamagu na eġabi-torerito tarimari ġeri."

²⁴ Mero gabanana (10) na maigħa ġeseġaġiato nai, tarikaka ruarua Iakobo (o Iames) ema Ioane ġebaru-vinirito.

²⁵ Benamo Iesu na mabarari ekea-vegogorito, benamo evaġa-guruġarito, ekirato, "Ġomi ribami, irau bese tarimari ġeri vere na tarimarima ġedori-naġinaġirini, ema ġeri veġuine-iaġi tarimari baregori na tu ġeri maoro seġukari na ġelaunaġi-naġirini.

²⁶ Senaġi ġomi fakami ai moġesina tu asi boġono vei. Bema ta ġomi fakami ai bene barego etoni nai, ġia tu ġomi mabarami vetuġunaġimi bene iaġovini,

²⁷ ema dei bene guine etoni tarimana, ġia tu ġemi vetuġunaġi tarimanai bene iaġo.

²⁸ Tarimarima Natuna kavana, ġia eiaġomato tu, dia tarimarima na ġia vetuġunaġina beġene iaġovini ġana, senaġina ġia eiaġomato tu, tarimarima vetuġunaġiri bene iaġovini, ema ġena maġuri bene tore-taria, tarimarima ġutuma bene voi-ġenoġoiri e bene vaġa-maġuriri ġana.”

Iesu na mata-bubu tarimari ruarua evaġa-namorito

Mareko 10:46-52; Luka 18:35-43

²⁹ Iesu ma ġena mero ġesi Ieriko ġeraga-kwaneato, tarimarima ġutuma-bara ġia murina na ġeiaġoto.

³⁰ Mata-bubu tarimari ruarua dabara rikinai ġetanu-taġoto-ġoi, ġeseġaġito Iesu eraka-vanaġito, benamo ġekea-fouto, ġekirato, “Vereġauka o, Davida natuna, ġai novetuġama!”

³¹ Tarimarima na ġekira-ġoirito, asi beġene guruġa ġetato, senaġi ġia ġekea-ġiġiraġe ġiġiraġeto-ġoi, “Vereġauka, Davida Natuna o, ġai novetuġama!”

³² Iesu eruġa-tarito, benamo ekea-iaġomarito, ekirato, “Kara ġemi naveia ġotoni?”

³³ Ġia na ġekiraiato, ġekirato, “Vereġauka, ġai ġaurani tu, matama noma keo-fakari!”

³⁴ Benamo Iesu na evetuġa-ġwarito, matari eġabi-kararito, ma asikauna matari ġenamoto e ġeboġeboġe-ġinikauto, benamo Iesu murina na ġeiaġoto.

21

Iesu ġena rakatoġa Ierusalemaj ġevonevone-raġe viniato

Ioane 12:12-19

¹ Iesu ma ġena mero ġesi ġeraka-iaġoto-ġoi, Ierusema ġekavinaġiato-ġoi, ma Betefage ai ġeraġasito Olive Ġorona rekenai, benamo Iesu na ġena mero ruarua etuġu-ġuinerito,

² ekirarito, ekirato, “Ġoiġo, ġoira vanuġana ġana. Monai doniki ta barutari ma natuna ġesi boġo doġaririni, boġono ruġari, benamo au ġegu ai boġono ġori-iaġomari.

³ Bema tarima ta na bedanaġimini nai, boġono kiraia, ‘Vereġauka na eura-vinirini, vau ma betuġu-iaġomarini, asi bekwaiboni.’”

⁴ Maiġa eġorato ġenana, peroveta tauna ġena guruġatore guruġana evaġa-moġoniani, ekirani,

⁵ “Siona natuna, (Ierusema tarimari), nokirari, ‘Nogitaia, ġemu Vere mani eiaġomani,

manau tarimana, doniki tuġunai eraġeni, mai tu doniki natuna doġenai betanukau.’”

⁶ Mai mero ruarua ġeiaġoto, Iesu na ekirarito veiġana ilailanai ġeveiato.

⁷ Ġia na doniki ma natuna ġesi Iesu ġenai ġeġori-iaġorito, ġeri dabuġa barari doniki doġeri ai ġeiava-kaurito, benamo Iesu etanu-kauto.

⁸ Tarimarima ġutuma-bara ġeri dabuġa barari dabarai ġeiavarito, kotari tu ġau legari ma lauri ġesi ġebasito, benamo dabarai ġeiavato.

⁹ Tarimarima ġutuma-bara ġia ġoiranai ġerakato e murinai ġerakato, maiġesina ġevone-raġeto-ġoi, ġekirato, “Hosana, Davida natuna ġena!

Vereġauka aranai eiaġomani tarimana sivaġa-namoa!

Hosana guba tuġuna vanigerenai!”

10 Iesu Ierusalem mai eraka-toġato nai, vanuġa tarimarimari mabarari ġeveraga veragato-ġoi ema ġevedanaġi-vedanaġito-ġoi, ġekirato, “Mai tu deikara?”

11 Iesu ġesi ġeraka-sebonato tarimari ġevaġa-veseto, ġekirato, “Mai tu Iesu, peroveta tauna, Galilea vanuġana Nasareta na eiaġomani.”

Iesu na Rubu Veaġa eiarevaiato

Mareko 11:15-19; Luka 19:45-48; Ioane 2:13-22

12 Iesu Rubu Veaġa nuġanai eraka-toġato, benamo voivoi tarimari mabarari elai-rosirito. Moni ġesenisito-ġoi tarimari ġeri fata e pune ġevoivoi iaġirito-ġoi tarimari ġeri diġoka eġuke-vebuburito,

13 ema ekirarito, ekirato, “Buka Veaġa nuġanai tu maiġesi etoreato, Barau ekirato, ‘Au ġegu numa tu bese irauirau ġeri ġurigiuri numanai beġe kiraġiani,’ senaġi ġomi na tu lema tarimari ġeri gumu gabunai boġo vaġa-iaġoa.”

14 Mata-bubu e kwaku rakava tarimari Iesu ġenai ġeiaġomato Rubu Veaġa nuġanai, benamo ġia na evaġa-namorito.

15 Rubu Veaġa vereri baregori e taravatu ġevevaġa-riba iaġiato-ġoi tarimari na ġena nuġa-farevaġi veigari ġeġitarito, ema mero misiri garori ġeseġaġirito, Rubu Veaġa nuġanai ġevone-raġeto-ġoi, ġekirato, “Hosana, Davida natuna ġena,” benamo ġia tu ġebaru-rakavato,

16 benamo Iesu ġedanaġiato, ġekirato, “Ġia na ini kara ġekiraġirini ne oseġaġirini ba?” Iesu na evaġa-veserito, ekirato, “Oi aseġaġini, senaġi ġomi na Buka Veaġa nuġanai asi ġoiaviani, ‘Mero misiri ema sinari ratari roġo ġeniurini merori na maki ġoi ġevaġa-raġemuni!’?”

17 Benamo Iesu na eraga-kwanerito, vanuġa barana na eraka-rosito, Betania ġana eiaġoto, monai ea ġenato.

Iesu na figi ġauna etovoġaiato

Mareko 11:12-14; 11:20-24

18 Boġiboġi, Iesu vanuġa barana ġana ma eġenoġoito, eraka-iaġoto-ġoi nuġanai, ġia evitoato.

19 Ġia na figi ġauna ta dabara rikinai eġitaiato, benamo eiaġo-viniato, senaġi asi ġwaġwana, a launa korina moġo. Benamo Iesu na figi ġauna ekiraiato, ekirato, “Ġoi ġemuna ġwaġwamu asi ma befofori-ġenoġoini!” Asikauna moġo figi ġauna emarai-ġosito.

20 Ġena mero na figi ġauna emarai-ġosito ġeġitaiato nai, ġeġaba-rakavato, ġekirato, “Figi ġauna tu kamasi se beraga-mase moġo?”

21 Iesu evaġa-veseto, ekirato, “Moġoni akiramini, bema ġomi boġo veġabidadamani, ma asi boġo daradarani nai, ġomi na maki mai figi ġauna ġenai baveia kavana boġo veiani riba; a dia moġa moġo, senaġi mai ġoro boġo kiraiani, ‘Noveġabivaisi, be davarai noa vefiu-rei,’ benamo mo veigā tu beġorani.

22 Dagara mabarari ġauġau ai boġo kiraġirini ma veġabidadamami ġesi nai tu, boġo doġaririni.”

Iesu ġena seġuka korana ġevedanaġi-iaġiato

Mareko 11:27-33; Luka 20:1-8

23 Iesu Rubu Veaġa nuġanai eraka-toġato, evevaġa-ribato-ġoi nai, Rubu Veaġa vereri baregori ema Iuda vereri ġia ġenai ġeiaġomato, benamo

gedanaġiato, ġekirato, “Kamara seġukai ġoi na mai veiġa oveirini? Dei na maoro evinimuto?”

²⁴ Iesu na evaġa-veserito, ekirato, “Au na maki vedanaġi sebona avinimini; bema boġo vaġa-veseani nai, au na kamara maoro ai mai veiġa aveirini bakira-varamini.

²⁵ Ioane ġena babatiso veiġana tu ainana eiaġomato? Guba na eiaġomato, ba tarimarima ġerina?” Ġia fakari ai ġeverorito, ġekirato, “Bema ġita bita kirani, ‘Barau ġenana’ bita toni nai, ġia bekirani ‘Karase nai Ioane asi ġovaġa-moġoniato?’ betoni.

²⁶ Senaġi bema ġita bita kirani, ‘Tarimarima ġerina’ bita toni nai, tarimarima ġariri bitana vei, korana ġia ribari, Ioane tu peroveta tarimana korikori.”

²⁷ Moġa lorinai ġia na Iesu ġevaġa-veseato, ġekirato, “Ġai asi ribama.” Benamo Iesu na ġia ekirarito, “Au na maki kamara maoro ai mai veiġa aveirini tu, asi bakira-varamini.”

Barabore - Mero ruarua

²⁸ “Mai barabore tu kamasi ġotuġa-maġiani? Tarima ta ma natuna ruarua. Tau-guinena ġenai eiaġoto, ekiraiato, ekirato, ‘Natugu, toma noiaġo, vine tavoġanai noa ġauvei!’

²⁹ Natuna na evaġa-veseato, ekirato, ‘Asi aurani,’ senaġina gabivau evetuġa-maġi-kureto, benamo eiaġoto.

³⁰ Ġia ma eiaġoto natuna vaġa-ruaruana ġenai, tau-guinena evaġa-guruġaiato ilailanai ekiraiato. Mero evaġa-veseto, ekirato, ‘Aiaġoni,’ senaġi asi eiaġoto.

³¹ Ġia tauri ruarua vekaravari ai dei na tu tamari ġena ura eveiato?” Ġia ġevaġa-veseto, ġekirato, “Tau-guinena.” Iesu na ekirarito, “Moġoni veġata akiramini, takesi gogo tarimari e mata-boraġa vavineri na ġeguine-iaġimini Barau ġena Basileia rakatoġanai.

³² Ioane Babatiso ġomi ġemi ai eiaġomato tu, vei-iobukaiobuka dabarana ġemi ai evaġa-foforiato, senaġi asi ġoseġaġi-viniato. A takesi gogo tarimari e mata-boraġa vavineri na ġevaġa-moġoniato. Ġomi na maki ġoġitarito, senaġi asi ġovetuġamaġi-kureto, asi ġovaġa-moġoniato.”

Barabore - Tavoġa narinarina tarimari rakavari

Mareko 12:1-12; Luka 20:9-19

³³ Iesu ekirato, “Barabore ta ma ġoseġaġia: Tano biaguna ta na vine tavoġana evaroato, maġuna eġabiato, tano ai vine gigi-gigina gurina ekwaiato, tavoġa narinarina numana maki evaġa-ruġaiato. Moġa murinai tavoġa ġitaġauna tarimari ġeri ai ġena tavoġa eraga-kwaneato, benamo erakato gabu ta ġana.

³⁴ Vine ġwari (o grapes) ġemaġeto, benamo ġia na ġena vetuġunaġi tauri etuġurito tavoġa narinarina tarimari ġeri ai, ġena vine ġwaġwari kota beġenea ġabi ġana.

³⁵ Senaġi tavoġa ġitaġauna tarimari na vetuġunaġi tauri ġeġabi-taririto, benamo ta ġekwariato, ma ta ġevaġiato, ema ta fore na ġetakiato.

³⁶ Tavoġa biaguna na ġena vetuġunaġi tauri vovoka kotari ma etuġurito, senaġi moġesina ma ġevei-vinirito.

³⁷ Dokonai ġia na natuna korikori ġeri ai etuġu-iaġoato, ekirato, ‘Natugu na-tuġua, ġia na beġene gubakaua.’

38 Senaġi tavoġa ġitaġauna tarimari natuna ġeġitaiato nai, tauġeri ġeveguruġa-vevinito, ġekirato, ‘Mani tu tavoġa beġaunaiani merona, be siġgabia, sivaġi-masea, be ġena tavoġa bitana ġaunaia!’

39 Benamo ġeġgabi-tariato, vine tavoġana murikanai ġeinu-iaġoato, ġevaġi-maseato.”

40 Iesu evedanaġito, ekirato, “Tavoġa biaguna beiaġomani nai, mo tavoġa ġitaġauna tarimari kamasi beveirini?”

41 Ġia ġevaġa-veseto, ġekirato, “Mo veġa rakava tarimari ġia na bevaġirini veġata, ma vine tavoġana tu narinarina tarima boruri tari ma bevinirini, benamo ġeri ġwaġwa negari ai, ġwaġwari ġia ġenai beġene ġwaiaġori.”

42 Iesu na ma ekirarito, ekirato, “Ġomi na mai toretore Buka Veaġi asi ġoiaviani, iniġesi ekirani, ‘Fore numari ġeragarini tarimari na asi ġeura-viniato ma ġefitoġaiato forena tu duġu forenai eiaġoto. Mai veġa maġa tu Vereġauka na eveiato, matara na taġitaiani, ġitaġitana irau veġata.’

43 Moġesi naima akiramini, Barau ġena Basileia tu ġemina beġgabi-vaġiani, ema ġwaġwa evaġa-ġorani besena beviniani. [44 Deikara mo fore iatanai beketokauni tarimana tu, beġwa-kirakiraiani; ema mai fore tarima ta iatanai beketokauni nai, bevere-fatafataiani.]”

45 Rubu Veaġa vereri baregори e Farisea tarimari na Iesu ġena barabore ġeseġaġirito nai, ġeribato, Iesu na tu ġia ekiraġirini,

46 naima ġia ġeri ura tu beġene ġabi-taria. Senaġi tarimarima ġutuma ġevegogo taġoto-ġoi gariri ġeveito, korana ġia na ġetuġamaġiato-ġoi, Iesu tu peroveta tauna ta.

22

Barabore - Veġaraġo verekona

1 Iesu na Iuda vereri ġeri barabore ta ma ekiraġiato:

2 “Guba Basileia tu noġa moġo vere ta, natuna ġena veġaraġo verekona evei-toreato kavana.

3 Benamo ġena vetuġunaġi tarimari etuġurito, ekea-kaurito tarimari keakeari, senaġi asi ġeurato nai, asi ġeiaġomato.

4 Moġa lorinai ġia na vetuġunaġi tarimari tari ma etuġurito, ekirarito, ‘Akea-kaurito tarimari ġoa kirari, “Au ġegu vereko tu badabara-ġosia, ġegu boromakau tauri ema boromakau naturi mona mase tu bavaġiri, dagara mabarari bavei-toreri, be ġoiaġoma vereko ġana.” ’

5 Senaġi ġia tu ġeġoiaġito, ġeri ura ġauveiri moġo ġeveito. Ta vamoka ġana eiaġoto, ma ta tu ġena sitoa ġana eiaġoto.

6 O tari tu vetuġunaġi tarimari ġeġgabi-taririto, ġekwaririto, ema ġevaġi-maserito.

7 Vere tu ebaru-rakavato, ġena vetari doġorori etuġurito, mo vaġivaġi tarimari ġevaġi-maserito, ma ġeri vanuġa barana ġegabu-kauato.

⁸ Benamo ġia na ġena vetuġunaġi tarimari evaġa-guruġarito, ekirato, ‘Au ġegu veġaraġo verekona tu bavei-forea, senaġi au na akea-kaurito tarimari tu asi ilaila beġe iaġomani.

⁹ Moġa lorinai mai moġo ġoi-aġo, ġatama baregori rakaġutu dabarari ai boġo doġaririni tarimari mabarari boġono kirari, beġene iaġoma vereko ġana.’

¹⁰ Benamo vetuġunaġi tarimari ġeiaġoto, ġatamai ema dabarai ġedoġaririto tarimari mabarari, namori, rakavari, ġegogo-iaġorito, veġaraġo numana maki ġevaġa-vonuato.

¹¹ Benamo vere eraka-toġato, ġeiaġomato tarimari ġitaġitari nuġanai, ġia na tarima ta monai eġitaio, asi ġena veġaraġo dabuġana.

¹² Benamo edanaġiato, ekirato, ‘Ġata, ġoi tu ainana boraka-toġa, asi ġemu veġaraġo dabuġana?’ Senaġi mo tarima asi eguruġato.

¹³ Benamo vere na ġena vetuġunaġi tarimari evaġa-guruġarito, ekirato, ‘Ġimana ema kwakuna ġobarubaruri, benamo ġofu-rosia murika mukunanai. Monai bene taġi, gadikana maki bene vaġa-ġaratariri.’

¹⁴ Korana tarima ġutuma Barau na ekearito, senaġi viravira moġo eġabitorerito maġuri beġe ġabiani.”

Kaisara, Roma ġeri vere, ġena takesi moniri

Mareko 12:13-17; Luka 20:20-26

¹⁵ Farisea tarimari ġeraka-veġitato, ġeboioġa-vevogoto, Iesu beġene vaġa-vedaġa-raġea vedanaġiri ġea veito.

¹⁶ Benamo ġia na ġeri mero tari ema Heroda murinai ġerakato-ġoi tarimari tari ġetuġu-iaġorito, ġekirato, “Vevaġa-riba tarimamu, ġai ribama ġoi tu moġoni vei-iobukaiobuka tarimamu. Ġoi na moġoni ai Barau ġena dabara ovevaġa-riba iaġi-ġitakauani. Tarimarima gariri asi oveini, tarima ġeri dagi maki asi otuġamaġirini.

¹⁷ Moġa lorinai nokira-varama, kamasi otuġa-maġini: Kaisara, Roma ġeri vere, ġenai takesi baġana vini ba asiġi?”

¹⁸ Senaġi Iesu na ribana ġeri boioġa rakavari nai, ekirarito, “Ġomi ġofaġofa tarimami! Karase nai au ġoribaġaniguni?”

¹⁹ Takesi monina ta ġovinigu, nama ġitaia!” Benamo silva monina ta ġeviniato.

²⁰ Benamo ġia na edanaġirito, ekirato, “Mai tu dei laulauna ema dei arana?”

²¹ Ġia ġevaġa-veseto, “Kaisara ġena.” Iesu na evaġa-guruġarito, ekirato, “Be, Kaisara ġena dagara Kaisara boġono vinia, Barau ġena dagara Barau boġono vinia.”

²² Mo guruġa ġeseġaġiato nai, ġeġaba-rakavato, benamo ġeraga-kwaneato, ġerakato.

Variġisi-ġenoġoi guruġari

Mareko 12:18-27; Luka 20:27-40

²³ Mo ġaro sebonai Sadukea tarimari kota Iesu ġenai ġeiaġoto. Ġia ġeri tuġamaġi tu mase tarimari asi ma beġe variġisi-ġenoġoini. Benamo Iesu ġedanaġiato, ġekirato,

²⁴ “Vevaġa-riba tarimamu, Mose maiġesi ekirato, ‘Bema tau ta asi natuna bemaseni nai, ivana vabuna kakana o tarina ta na bene ġaraġoa, naturi beġene maġuri mase tauna ġena.’

²⁵ Mero mabarari tu imaima ruarua (7) mainai ġetanuto-ġoi. Mero guinena na eġaraġoato, ma emaseto asi natuna, benamo tarina na ma eġaraġoato.

²⁶ Mo veġa sebona tarina vaġa-ruaruana ġenai eġorato, mero vaġa-toitoina maki moġesina moġo mo vaġa-imaima ruaruana (7).

²⁷ Dokonai mo vavine maki emaseto.

²⁸ Variġisi-ġenoġoi ġaronai mo vavine tu dei ġaraġona? Korana ġia tu tauri 7 na ġeġaraġoato.”

²⁹ Iesu na evaġa-veserito, ekirato, “Ġomi tu ġokerereni, korana Buka Veaġa anina ema Barau ġena seġuka asi ribami.

³⁰ Mase na ma beġe variġisi-ġenoġoini tarimari tu asi ma beġe veġaraġoni. Ġia tu aneru kavana gubai.

³¹ A mase na ma beġe variġisi-ġenoġoini guruġari Barau ġena bukai asi ġoiaviani? Ġia ekirato,

³² ‘Au tu Aberahamo ġena Barau, Isako ġena Barau, ema Iakobo ġena Barau.’ Ġia tu maġuri tarimari ġeri Barau, dia mase tarimari ġeri Barau!”

³³ Tarimarima ġutuma na mo guruġa ġeseġaġiato nai, nuġari ġefarevaġito ġena vevaġa-riba guruġari na.

Veuravini tu taravatu mabarari evanaġirito

Mareko 12:28-31; Luka 10:25-28

³⁴ Farisea tarimari ġeseġaġito, Iesu na Sadukea tarimari ġeri guruġa ekou-ġaurito, benamo ġeraka-vegogoto.

³⁵ Ġia fakari ai ta tu taravatu vaġa-riba-iaġina tarimana. Ġia na Iesu edanaġi-veribaġaniato, ekirato,

³⁶ “Vevaġa-riba tarimamu, taravatu nuġanai kamara taravatu tu barego vedaurea?”

³⁷ Iesu na evaġa-veŋeato, ekirato, “‘Vereġauka ġoi ġemu Barau bono ura-vinia ma nuġamu mabarana, ma iaukamu mabarana, ma ġemu tuġamaġi mabarana ġesi.’

³⁸ Maġa tu taravatu giniguinena ema barego vedaureana.

³⁹ Taravatu barego vedaureari vaġa-ruaruana ġia ilailana tu maġa: ‘Sevimu tarimana bono ura-vinia, ġoi tauġemu oveura-vinini kavana!’

⁴⁰ Maġeri taravatu ruarua na taravatu mabarari ema peroveta tarimari ġeri guruġa mabarari eġabi-vegogorini.”

Keriso tu Davida natuna ba Barau Natuna?

Mareko 12:35-37; Luka 20:41-44

⁴¹ Farisea tarimari ġevegogoto-ġoi nai, Iesu na edanaġirito, ekirato,

⁴² “Ġomi na Keriso tu aiġesi ġotuġa-maġiani? Ġia tu deikara natuna ġotoni?” Ġia ġevaġa-veseto, ġekirato, “Ġia tu Davida natuna.”

⁴³ Iesu na ma edanaġirito, ekirato, “Davida tu kamasi nai Keriso tu ‘Vereġauka’ etoni? Korana Davida Iauka Veaġa na tuġamaġi-faka e riba eviniato, benamo ekirato,

⁴⁴ ‘Barau na au ġegu Vereġauka ekiraiato:

Au ġimaġu aroribana rekenai

noma tanu,

bene iaġo mo, ġoi ġebaru-vinimuni tarimari ġoi kwakumu gaburenai ba-torerini.’

⁴⁵ Bema Davida na Keriso tu ‘Vereġaukana’ ekiraġito, kamasi nai Keriso tu Davida natuna?”

46 Ĝia mabarari ta na maki asi evaĝa-veseato, ema mo nega na eiaĝoto mo, tarima ta na maki asi ma edanaĝiato, korana ĝegarito nai.

23

Iesu na taravatu vaĝa-riba-iaĝina tarimari ema Farisea tarimari evaner-ito

Mareko 12:38-39; Luka 11:43; 11:46; 20:45-46

¹ Iesu na tarimarima ĝutuma-bara e ĝena mero evaĝa-guruĝarito, ekirato,

² “Taravatu vaĝa-riba-iaĝina tarimari e Farisea tarimari na Mose ĝena taravatu ĝevevaĝa-riba iaĝirini.

³ Moĝa lorinai ĝomi ĝevaĝa-ribamini guruĝari mabarari boĝono korana-iaĝiri e boĝono veiri. A ĝeri veiĝa asi boĝono tovtovori, korana kara ĝegobata-iaĝirini, tarimarima na beĝene veiri veiĝari tu, tauĝeri na asi ĝekorana-iaĝirini.

⁴ Ĝia na maruna metori tarimarima ĝevaĝa-faĝarini, senaĝina ĝimari didiri na ta maki ĝeri marunai asi ĝeveĝabikauni, asi ĝevaĝa-kavarini, maruna beĝene ĝwari ĝana.

⁵ Ĝeri veiĝa mabarari ĝeveirini tu, tarimarima na beĝene ĝitari ĝana. Ĝia bakuri e ĝimari ai tu dagara veaĝari ĝebarubarurini, nuĝari ai Buka Veaĝa siriri ĝegurarini, moĝeri dagara ĝevaĝa-baregorini, ema ĝeri dabuĝa geveri maki ĝevaĝa-maukarini.

⁶ Ĝanivegogo gaburi ai e rubu nuĝari ai ĝeri ura tanutanu namori ai beĝene tanu.

⁷ Ĝia ĝeurani maketi gaburi ai beĝene rakaorakao, tarimarima na beĝene vaĝa-namori urari ai, ema tarimarima na ‘Vevaĝa-riba Tarimari’ beĝene kiraĝiri.

⁸ A ĝomi tu ‘Vevaĝa-riba Tarimami’ ai asi beĝene kiraĝimi, korana Barau ĝereĝana moĝo ĝemi Vevaĝa-riba Tauna, ema ĝomi mabarami tu tarikaka.

⁹ Ema tanobarai tarima ta ‘Tama’ asi boĝono kiraĝia, korana ĝomi Tamami tu sebona moĝo, ĝia tu gubai etanuni.

¹⁰ Ĝomi maki ‘Veĝori-kau Tarimami’ asi beĝene kiraĝimi, korana ĝemi Veĝorikau Tauna tu sebona moĝo, Keriso, (Barau na ekiraĝi-toreato vevaĝa-maĝuri tauna).

¹¹ Deikara barego vedaurea ĝomi fakami ai, ĝia tu ĝomi vetuĝunaĝimi beiĝo-vinini.

¹² Tauĝena eveĝabi-vaisini tarimana tu Barau na bevaĝa-manauani, a tauĝena evevaĝa-manauani tarimana tu beĝabi-vaisiani.”

Iesu na Farisea tarimari e taravatu vaĝa-riba-iaĝina tarimari ĝeri ĝofaĝofa ekiraĝirito

Mareko 12:40; Luka 11:39-52; 20:47

¹³ “Taravatu vaĝa-riba-iaĝina tarimami e Farisea tarimami, ĝofaĝofa tarimami, vetuĝami kika! Korana Guba Basileia ĝatama bokana tu tarimarima ĝoirari ai ĝokou-ĝauani. Ĝomi tauĝemi asi boĝo raka-toĝani, ema ĝeraka-toĝa ĝetoni tarimari ĝeri dabara maki ĝomi na ĝokourini. [¹⁴ Taravatu ĝovevaĝa-riba iaĝiani tarimami e Farisea tarimami, ĝofaĝofa tarimami, vetuĝami kika! Ĝomi na vabu ĝeri numa e ĝeri farefare ĝovaĝa-koririni. Ĝemi ĝauĝau tu mauka kenene, ĝoĝofaĝofani. Moĝesi nai ĝomi tu meto barego vedaurea boĝo ĝabiani.]

15 Taravatu vaġa-riba-iaġina tarimami e Farisea tarimami, ġofa-ġofa tarimami! Ġomi gabu mabarari ġana ġoiġoni, davarai e tanobarai, tarima sebona kwarigutu ġemi doġoro ai bene raka-toġa uranai. Ġoġabiani, benamo karava eġara-vanaġi vanaġini gabuna natunai ġovaġa-iaġoani, ġemi kira-sirivaġi e seġafore maki bevanaġi-lelevaġirini.

16 Veġorikau taumi, matami bubuġau, vetuġami kika! Ġemi vevaġa-ribai ġokirani, Rubu Veaġa aranai bekiraġi-toreni tarimana ġena kiraġitore tu asi anina gotoni, a Rubu Veaġa golona (o gold-na) aranai bekiraġi-toreni tauna tu, ġena kiraġitore roġo bekorana-iaġiani.

17 Babo e mata-bubu tarimami! Aiġa tu barego, golo ba golo evaġa-veaġiani Rubu Veaġana?

18 Ma ġokirani, fata veaġana aranai bekiraġi-toreni tarimana ġena kiraġitore tu asi anina, a varevare dagarana fata veaġana iatanai ġetoreato dagarana aranai bekiraġi-toreni tarimana tu ġena kiraġitore roġo bekorana-iaġiani.

19 Mata-bubu taumi. Aiġa tu barego, varevare dagarana ba varevare dagarana evaġa-veaġiani fata veaġana?

20 Moġa lorinai fata veaġa aranai ekiraġi-toreni tarimana na fata veaġa e fata veaġa iatanai ġetorerito dagarari mabarari arari ai ekiraġi-toreni.

21 Ema Rubu Veaġa aranai ekiraġi-toreni tarimana na Rubu Veaġa ema nuġanai etanuni Barauna arari ai ekiraġi-toreni.

22 Ema guba aranai ekiraġi-toreni tarimana na Barau ġena terona e iatanai etanuni Barauna arari ai ekiraġi-toreni.

23 Taravatu vaġa-riba-iaġina tarimami e Farisea tarimami, ġofaġofa tarimami, vetuġami kika! Korana ġomi na Barau ġovarevare-viniani dagarari, ġemi ġaniġani ġailauri misimisiri maki, karava gabanana (10) ġoveirini, karava sebona boubou dagarana ġovaġa-iaġoani, senaġina taravatu ġena dagara baregori, vei-iobukaiobuka, vevetuġaġwa ema vetuġamaġikau tu ġolearini. Ġomi na tu maiġeri veiġa baregori ġoro veiri ema mo veiġa keiri maki asi boġoro iaġuiri.

24 Veġorikau tarimami, matami bubu! Ġami nanu na nagama ġoveivaġiani, senaġina kamela tu ġolauboġerini.

25 Taravatu vaġa-riba-iaġina tarimami e Farisea tarimami, ġofaġofa tarimami, vetuġamai kika! Ġomi ġemi kapusi e mereki muriri moġo ġoġurigiirini, senaġi nuġari tu lema e mata-ġaniġani ġoveini dagarari na beġe vonuvonuraġe.

26 Farisea tarimami, matami bubu! Kapusi e mereki nuġari ai ġotorerini dagarari boġono iareva-ġuineri, benamo murina rekena maki bene veiareva.

27 Taravatu vaġa-riba-iaġina tarimami e Farisea tarimami, ġofaġofa tarimami, vetuġami kika! Ġomi tu gara gaburi ġefeni-kuro-kurorito kavana, murikari ġitaġitari tu namo vedaurea, senaġina nuġari tu mase tarimari turiġari ema miro mabarari na ġevonuto.

28 Ġomi maki moġesina, tarimarima na ġeġitamini veiġa iobukaiobuka tarimari noġa, senaġina nuġami tu ġofaġofa e vei-rakava na ġevonuvonuraġeto.”

Iesu na taravatu vaġa-riba-iaġina tarimari e Farisea tarimari ġeri kerere voiri ekiraġirito

29 “Taravatu vaġa-riba-iaġina tarimami e Farisea tarimami, ġoġaġoġa tarimami, vetuġami kika! Ġomi na peroveta tarimari ġeri gara gaburi ġoveiginikaurini, tuġamaġi-iaġina foreri ġovaġa-ruġarini, ema vei-iobukaiobuka tarimari ġeri gara gaburi ġovaġa-vera verarini.

30 Ġokirani, “Tubuma ġatama ġeri negai ġara maġuri nai, peroveta tarimari vaġivaġiri ai asi ġara vaġa-kavari.’

31 Moġesi ġokirani nai, tauġemi ġovekiraġini, ġomi tu peroveta ġevaġirito tarimari naturi.

32 Oba, ġomi maki tubumi ġatami ġeveito-ġoi kavana ma ġovei-iaġoni, ġeri rakava ġomi na ġovaġa-ġuġururini.

33 Ġomi mota! Mota naturi! Barau ġena Kota baregona ġarona beraġasini nai, karava eġara-vanaġi vanaġini gabuna na kamaso bogo raga-maġurini?

34 Moġa lorinai akiramini, au na peroveta tarimari e iaunega tarimari ema vevaġa-riba tarimari batuġu-iaġorini. Benamo kota tu boġo vaġi-maserini, aba, bogo vaġa-sataurorini; ma kotari tu rubu nuġari ai bogo kwaririni, rarari maki beġe riġoni, ema vanuġa ta na boġo lairini ma vanuġa ta.

35 Moġesina nai vei-iobukaiobuka tarimari ġevaġirito metori tu ġomi iatami ai, Abela ġevaġi-maseato, monana eiaġomato mo Sakaria, Barakia natuna, ġia tu fata veaġana ema numa veaġana fakari ai ġovaġi-maseato.

36 Akira-korikorimini, mabarari metori tu toma ġuru tarimami iatami ai beġe ketokauni.”

Iesu Ierusalemata ġaġina eveito

Luka 13:34-35; 19:41-44

37 “Ierusalemata, Ierusalemata o, ġoi na peroveta tarimari ovaġirini ema Barau na etuġu-iaġosirini tarimari fore na otaki-maserini. Nega ġutuma aurato, natumi bana gana-ġeġeraġiri, kokoroku vavinena na natuna egoru-taririni kavana, senaġi ġomi tu asi ġourato!

38 Moġa lorinai ġemi vanuġa ema Rubu Veaġa tu korina betanuni.

39 Korana au na akiramini, ġomi roġo au asi boġo ġitaġuni, beiaġoni mo, ġaro ta beraġasini, monai vau boġo kirani, ‘Barau aranai eiaġomani tauna sivaġa-namoa.’”

24

Iesu na vau beġea ġorani dagarari ekiraġirito

1 Iesu Rubu Veaġa na eraka-rosito, eraka-veġitato nuġanai, ġena mero ġia ġenai ġeiaġoto, ġeri ura Rubu Veaġa numari baregori beġene vava-ġitaia.

2 Senaġi Iesu na evaġa-guruġarito, ekirato, “Mai dagara mabarari ġoġitarini? Au na moġoni akiramini: Mai fore ta fore ta iatanai asi beġe tanuni, mabarari beġe vare-bubu riġorini.”

3 Iesu Olive Ġoronai etanu-taġoto-ġoi, benamo ġena mero ġia ġenai ġeiaġoto, ġedanagi-ġairiato, ġekirato, “Nokira-varama, mai dagara tu aitoma beġe ġorani? E ġoi boġenoġoi-iaġomani ema tanobara dokona beġabiani maki kamara vetoġa na bevaġa-foforiani?”

4 Iesu evaġa-veseto, ekirato, “Ġomi lorimi boġono vetore, tarima ta na asi bene ġofami.

5 Korana tarima ġutuma au aragu ai beġe iaġomani, beġe kirani, ‘Keriso tu au maiġegu!’ Tarima vovoka beġe ġofarini.

⁶ Ğomi na vetari gururi e tuari variri boĝo seĝaĝirini nai, nuĝami asi beĝene raĝe. Maniĝeri dagara tu beĝe ĝorani, senaĝi dokona tu asi roĝo.

⁷ Tanobara ta tanobara ta ĝesi beĝe vevaĝini, gavamani ta gavamani ta ĝesi beĝe vetarini. Gabu ĝutuma nuĝari ai doĝe beĝe ĝorani, tano maki beĝe iagani.

⁸ Mai tu midigu moĝo besinaiani, noĝa moĝo mero keina emagurini midiguna kavana.

⁹ Mo negai beĝe ĝabi-tarimini, beĝe vaĝa-midigu midigumini, beĝe vaĝi-masemini. Bese mabarari na beĝe baru-vinimini, korana au ĝovaĝa-moĝoniguni dainai.

¹⁰ Benamo tarima ĝutuma ĝeri veĝabidadama beĝe raga-kwanerini, tata beĝe verevani e beĝe vebaru-vevinini.

¹¹ Peroveta ĝofaĝofa tarimari beĝe variĝisini, tarima ĝutuma beĝe ĝofarini.

¹² Vei-rakava maki beĝora-rovorovoni, benamo ĝutuma ĝeri veuravini maki beĝe farakani.

¹³ Senaĝina deikara bevevaĝa-gwaĝiĝini mo magona tu bemaĝurini.

¹⁴ Barau ĝena Basileia Varina Namona tu tanobara mabaranoi beĝe ĝobata-iaĝiani, bese mabarari na beĝene seĝaĝia ĝana, moĝa murinai vau magona beraĝasini.”

Vevaĝa-gari dagarana beforini

Mareko 13:14-23; Luka 21:20-24

¹⁵ “Ĝomi na dagara rakava vedaureana, vevaĝa-gari dagarana, peroveta tarimana Daniela na ekiraĝiato dagarana, boĝo ĝitaiani gabu veaĝanai beruĝani.” Mai guruĝa beiaviani tarimana bene riba maoro anina tu kara.

¹⁶ “Benamo deidei Iudeai ĝetanuni tarimari ĝoro ĝana beĝene raga-iaĝo.

¹⁷ Deikara numa tuĝunai etanu-taĝoni tu, asi ma bene raka-toĝa numa nuĝana ĝana ĝena farefare ĝabigabiri.

¹⁸ Deikara vamoka nuĝanai maki asi ma bene ĝenoĝoi ĝena koudi ĝabigabina.

¹⁹ Mo negai vavine ma baniri e ĝabi-variĝu vavineri kika ma vetuĝari!

²⁰ Boĝono ĝauĝau Barau ĝenai, be ĝura e nagure negari ai o Sabadi ai asi boĝono raga-kwareĝa!

²¹ Korana mo negai midigumidigu tu asi keikeiri beĝe ĝorani, Barau na tanobara eveiato beiaĝoma maitoma, midigu moĝesina asi ĝeĝorani. Ma maĝa murinai moĝesina kavana ta asi ma beĝora-ĝenoĝoini.

²² Bema Barau na mo ĝaro rakavari asi bere vaĝa-kubiri, tarimarima ta asi bere maĝuri riba, senaĝi eĝabi-hidirito tarimari dairi ai, ĝia na ĝarori bevaĝa-kubirini.

²³ Mo negai, bema tarima ta na bekiramini, ‘Ĝoĝitaia, Keriso tu maĝa!’ o ‘Ĝia tu iomoĝa!’ betoni nai, asi boĝono vaĝa-moĝonia.

²⁴ Korana tu Keriso ĝofaĝofari e peroveta tarimari ĝofaĝofari beĝe forini, vetoĝa boruri e nuĝa-farevaĝi veĝari baregori beĝe veirini, Barau na eĝabi-viriĝirito tarimari beĝene ĝofa-veĝonuri ĝana.

²⁵ Boĝono tuĝamaĝi-taĝoa, maĝeri dagara tu akiravara-guinemini, hora roĝosi bene raĝasi nai.

²⁶ Bema tarima ta na bekiramini, ‘Ĝoĝitaia, ĝia tu tano fakanai moĝa,’ moĝana asi boĝono iaĝo; o bekirani, ‘Ĝoĝitaia, ĝia tu mo numa nuĝanai etanuni,’ asi boĝono vaĝa-moĝonia.

²⁷ Korana Tarimarima Natuna beiaġomani tu fofori-taġo, noġa moġo kiriku ekimoreani gubai ġaro raġeraġena na mo ġaro riġoriġona kavana;

²⁸ ma mase tauganina etanuni gabunai gaio maki monai beġe vegogoni, (be ġia na beġe vaġa-foforiani)."

Tarimarima Natuna ġena iaġoma

Mareko 13:24-27; Luka 21:25-28

²⁹ "Mo rakava beġe ġorani murinai, ġaro bemukunani e ġue maki asi bemamani, visiġu guba na beġe ketoni e guba seġukari beġe iagaiagani.

³⁰ Benamo Tarimarima Natuna vetoġana gubai befororini. Mo ġaro ai tanobara beseri mabarari beġe taġi-vanoro vanoroni, korana Tarimarima Natuna beġe ġitaiani, magube iatana na beiaġomani ma seġuka barana e ma marevana ġesi.

³¹ Benamo ġia na ġena aneru betuġurini ma kibi gururi baregori ġesi, eġabi-virigirito tarimari beġe vaġa-vegogorini tanobara mabarari na."

Barabore - Vevaġa-riba figi ġauna ġenana

Mareko 13:28-31; Luka 21:29-33

³² "Figi ġauna ġenana mai barabore boġono ribaia: Kabona ġefori-raġeni e launa ġefafani nai, ġoribani, ġaro ġena tora taimina tu bekavinaġi ġotoni.

³³ Moġa ilailanai, ġomi maki bema mai dagara mabarari beġe ġorani boġo ġitarini nai, boġono riba, Tarimarima Natuna tu bekavinaġi ġatama bokai.

³⁴ Moġoni akiramini, mai ġuru asi bekorini, beiaġoni mo, mai dagara mabarari beġe ġorani.

³⁵ Guba e tanobara beġe rekwa-rekwani, senaġi au ġegu guruġa tu asi beġe rekwa-rekwani, beġe tanu-vanaġi vanaġini."

Ġaro e hora tarima ta asi ribana

Mareko 13:32-37; Luka 17:26-30; 17:34-36

³⁶ "Senaġi mo ġaro e hora tu tarima ta asi ribana, aneru gubai asi ribari e Natuna maki asi ribana, senaġi Tamana ġereġana moġo ma ribana.

³⁷ Tarimarima Natuna ġena iaġoma tu noġa moġo Noa ġena negai kara ġeġorato kavana.

³⁸ Ġutuġutu roġosi bere raga nai, tarimarima tu ġeveini kavana ġeganiganito-ġoi, ġeniuniuto-ġoi, ema tau e vavine ġeveġaraġoto-ġoi, eiagomato mo, Noa ġena lagatoi ai eraka-toġato ġaronai.

³⁹ Senaġi matari asi ġekanito, asi ġeribato kara beġorani mo, ġutuġutu eraġasito, benamo mabarari eġutu-masemaserito. Tarimarima Natuna beiaġomani maki moġesina beġorani.

⁴⁰ Mo ġaro ai tau ruarua vamokai beġe ġauveini, ta tu Barau na beġabi-vaġiani, a ta tu betanuni.

⁴¹ Vavine ruarua widi giro dagarana beġe giro-vegogoani, ta tu beġabi-vaġiani, a ta tu betanuni.

⁴² Moġesi nai tataġa-taġo boġono tanu, korana ġomi asi ribami ġemi Vereġauka tu aitoma beiaġomani.

⁴³ Boġono riba-maoro: Bema numa tarimana ma ribana kamara aoanai lema tarimana beiaġomani nai, ġia tu tataġa-taġo betanuni, benamo lema tauna na numa asi bedareani.

⁴⁴ Moġa lorinai ġomi maki boġono verovina-tore, korana Tarimarima Natuna aitoma beraġasini aoanai ġomi asi boġo ribani."

Vetuġunaġi tarimana namona

Luka 12:42-46

45 “Deikara tu mo farefare nari tarimari na guruḡa eseḡaḡini ema veḡa roroḡotori eveini, ḡena vere na eḡabi-hidiato numa ema vetuḡunaḡi tarimari bene ḡita-ḡauri, ema ḡani-ḡani maki nega korikori ai bene viniri?”

46 Mo vetuḡunaḡi tarimana, ḡena vere na ekiraiato ilailani eḡauveini, bema-ḡoitaḡoani tu namo.

47 Moḡoni akiramini, ḡia tu ḡena vere ḡena farefare mabarari ḡitaḡauri tarimani betoreani.

48 Senaḡina bema ḡia vetuḡunaḡi tarimana rakavana, tauḡena nuḡana bekirani, ‘Au ḡegu vere ḡena ḡenoḡoi tu bekwaibo-rakava,’

49 benamo ḡia na karonā bekwaririni, ma ḡia tu niuniu tarimari ḡesi beḡe ḡaniḡani-vegogoni e beḡe niuniu-vegogoni.

50 Vetuḡu-naḡi tarimana ḡena vere ḡena ḡenoḡoi ḡaronā tu asi etuḡamaḡiani ḡaronai, ma asi eribaiani aoanai beraḡasini.

51 Benamo ḡena vere na bea basi-ḡutuḡutuani, ma ḡofaḡofa tarimari ḡesi bea toreani. Monai beḡe taḡini, gadikari maki beḡe veḡara-tarini.”

25

Barabore - ḡuiato gabanana (10)

1 “Mo ḡaro ai Guba Basileia tu noḡa moḡo ḡuiato gabanana (10) kavana, ḡeri lamefa ḡeḡabirito, ḡeraka-rosito, veḡaraḡo variḡu tauna ḡesi beḡene vedoḡari ḡetato.

2 ḡuiato imaima (5) tu ma iaunegari, a imaima (5) tu babori.

3 Korana ḡuiato babori ḡeri lamefa moḡo ḡeḡabito, senaḡi keresini kota ma asi ḡeḡabikauto.

4 A iaunega ḡuiatori ḡeri lamefa ḡeḡabito nai, keresini maki kavabu ai ḡeḡabikauto.

5 Veḡaraḡo variḡu tauna ekwaiboto dainai, gena na matari eḡararito, benamo mabarari ḡegenato.

6 Boḡi nuḡanai ta ekoḡoto, ekirato, ‘Veḡaraḡo variḡu tauna mani eiaḡomani, be ḡoiaḡo, ḡia ḡesi boḡono vedoḡari!’

7 Benamo ḡuiato 10 ḡetataḡato, ḡeri lamefa ḡeiarevarito.

8 ḡuiato babori na iaunega ḡuiatori ḡevaḡa-guruḡarito, ḡekirato, ‘ḡemi keresini kota ḡovinima, korana ḡai ḡema lamefa mai ḡebuseni.’

9 Senaḡi iaunega ḡuiatori ḡevaḡa-veseto, ḡekirato, ‘Asiḡina, ḡomi ema ḡai tu asi beilailani. Namona tu sitoa ḡana ḡoiaḡo, tauḡemi ḡemi ḡoa voi.’

10 Keresini voi ḡeiaḡoto-ḡoi nai, veḡaraḡo variḡu tauna eraḡasito. Benamo ḡerovina-toreto ḡuiatori tu ḡia ḡesi veḡaraḡo verekonai ḡeraka-toḡato. Benamo ḡatama-boka ḡekou-ḡauato.

11 Gabivau ḡuiato tari maki ma ḡevotuto, ḡekirato, ‘Vereḡauka, Vereḡauka o, ḡema ḡatama-boka noma keoa!’

12 Senaḡi veḡaraḡo variḡu tauna evaḡa-veseto, ekirato, ‘Moḡoni akiramini, au tu asi ribaḡu ḡomi.’

13 Moḡa lorinai, boḡono venari-taḡo, korana ḡemi Vereḡauka beiaḡomani ḡaronā e horana asi ribami.”

Barabore - Vetuḡunaḡi tarimari moni ḡenarito

Luka 19:11-27

14 “Guba Basileia tu noḡa moḡo tarimana ta, gabu manaḡana ḡana bene iaḡo etato. Roḡosi bere raka nai, ḡena vetuḡunaḡi tarimari ekea-iaḡomarito, ḡena farefare evinirito, beḡene ḡauvei-iaḡiri ḡana.

15 Ġia na golo moniri ġia tata sebori sebori ġeri riba e kokore ilailari ai evinirito. (Golo monina ta tu tarima ta davana laġani toitoi nuġanai beġabini kavana). Ta tu golo moniri imaima (5) eviniato, ma ta tu golo moniri ruarua (2), ma ta tu golo monina sebona eviniato. Benamo eraga-kwanerito, ġena iaġoiaġo eiaġoto.

16 Golo moniri imaima eġabirito tarimana maoromaoro eiaġoto, ġena moni eġauvei-iaġirito, golo moniri boruri imaima ma edoġaririto.

17 Moġesina kavana golo moniri ruarua eġabirito tarimana na maki moni boruri ruarua ma edoġaririto.

18 Senaġi golo monina sebona eġabiato tarimana eiaġoto, tano ai guri ekwaiato, biaguna ġena moni ekure-toġaiato.

19 Nega varau emanaġato nuġanai, mo vetuġunaġi tarimari ġeri vere ma eġenoġoi-iaġomato, ġena moni kamasi ġeġauvei-iaġirito beġene vevarifiu-iaġiri etato.

20 Benamo golo moniri imaima eġabirito tarimana ema raka-toġato, moni boruri imaima eġabi-kaurito, ekirato, 'Verebara, ġoi na golo moniri imaima oviniguto nuġanai, au na tu moni boruri imaima ma badoġariri maġeri.'

21 Ġia na evaġa-namoato, ekirato, 'Namo baregona! Goi tu vetuġunaġi taumu namona, ma vetuġamaġikaumu! Dagara misiri oġau-vei-iaġi ginikaurini nai, au na dagara ġutumma avinimuni, ġoi na boġita-ġaurini. Noma raka-toġa, au ġesi sima iaku-vegogo!'

22 Benamo golo moniri ruarua eviniato tarimana ma ema raka-toġato, ekirato, 'Verebara, ġoi na golo moniri ruarua oviniguto nuġanai, au na tu moni boruri ruarua ma badoġariri, maġeri.'

23 Ġena vere na evaġa-namoato, ekirato, 'Namo vedaurea! Goi tu vetuġunaġi taumu namomu, ma vetuġamaġikaumu! Dagara misiri oġau-vei-iaġi ginikaurini nai, au na dagara ġutumma avinimuni, ġoi na boġita-ġaurini. Noma raka-toġa, au ġesi sima iaku-vegogo!'

24 Benamo golo monina sebona eġabiato tarimana ema raka-toġato, ekirato, 'Verebara, au ribagu ġoi tu asi vegubakau taumu, dia ġoi na ovarorito dagarari okwarini, ema dia ġoi na ġue-ġuturi ofu-rovorovorito dagarari ovaġa-vegogorini.

25 Moġesi naima agarito, iaġoto, ġemu moni tano nuġanai akure-toġaiato. Noġitaia, dagarana inġa, ġemu noġabia.'

26 Ġena vere na ekiraiato, ekirato, 'Goi vetuġunaġi taumu rakavamu ma ġubulefimu. Goi ribamu, dia au na avarorito dagarari akwarini, ema dia au na afu-rovorovorito dagarari avaġa-vegogorini.

27 Kamuto, bere namo ġegu moni tu banikai boro torea, benamo au bara ġenoġoi-iaġoma nai tu, ma torekauna ġesi bara doġaria.

28 Bevaitovo, ġia na vetuġunaġi tarimari tari ekirarito, ekirato, 'Mani moni sebona ġenai maniġa ġoġabia, moni gabanana (10) tarimana ġovinia.

29 Korana ma ġena-ġana tarimana tu ġutumari ma baviniani, be barego lelevaġi beġabini, a asi ġena-ġana tarimana tu ġenai misina maki baġabi-vaġiani.

30 Ma mai vetuġunaġi tarimana rakavana ġofu-rosia murika mukunana ġana. Monai bene taġi, gadikana maki bene vaġa-ġaratariri.' "

31 “Tarimarima Natuna tu ma mamana marevana e seġuka baregona, ema ma ġena aneru mabarari ġesi beġe iaġomani, ġena teronai betanukauni.

32 Bese mabarari ġia ġoiranai beġe vaġa-vegogorini, benamo ġia na bevaġa-farararini, noġa moġo mamoe narinariri tarimana na mamoe nanigosi ġerina etore-ġerevaġirini kavana.

33 Mamoe tu aroribana rekenai, ma nanigosi tu kaurina rekenai be-torerini.

34 Benamo Vere na aroribana tarimari bevaġa-guruġarini, bekirani, ‘Ġoiaġoma! Tamagu na evaġa-namomini tarimami, ġoiaġoma! Barau ġena Basileia ġoma ġabia, guba tanobara eveirito neganai varau erovina-toreato ġomi ġemi.

35 Korana au evitoguto nai, ġoġubuguto; bokagu ekoketo nai, nanu ġoviniguto; au vanuġa boru tarimagu ġomi fakami ai atanuto, senaġi ġoġabi-raġeguto;

36 au asi ġegu dabuġa, ġovaġa-dabuġaguto; akeveto nai, ġonariguto; dibura numai atanuto nai, ġoraka-ġitaguto.’

37 Benamo vei-iobukaibuka tarimari na beġe vaġa-veseani, beġe kirani, ‘Vereġauka, aitoma ġaġitamuto ovitoto, ġaġubumuto? O onanu-maseto, nanu ġavinimuto?’

38 Aitoma ġoi vanuġa boru tarimamu ai ġaġitamuto, ġaġabi-raġemuto ġai ġema numai, o asi ġemu dabuġa, ġavaġa-dabuġamuto?

39 Kamara ġaro ai ġaġitamuto ġoi okeveto, o diburai otanuto, ġaraka-ġitamuto?’

40 Benamo Vere na bevaġa-veserini, bekirani, ‘Moġoni akiramini, tarikakagu asi ġeivirini tarimari maiġeri ta ġovei-viniato ilailanai, au maki moġesi ġovei-viniguto.’

41 Benamo kaurina rekena tarimari bevaġa-guruġarini, bekirani, ‘Au ġegu na ġoraka-veġita, meto barego lele-vagina iatami ai etanuni tarimami, ġoiaġo, eġara-vanaġi vanaġini karavana ġana, Satani ma ġena aneru ġeri Barau na varau evei-toreato.

42 Korana evitoguto, senaġi asi ġoġubuguto; nanu na emaseguto, senaġi nanu asi ġoviniguto;

43 au tu vanuġa boru tarimagu ġomi fakami ai atanuto, senaġi asi ġoġabi-raġeguto ġemi numai; asi ġegu dabuġa, senaġi asi ġovaġa-dabuġaguto; akeveto ema dibura numai atanuto, senaġi asi ġoraka-ġitaguto.’

44 Benamo ġia maki beġe vaġa-veseani, beġe kirani, ‘Vereġauka, kamara ġaro ai ġaġitamuto, ovitoto o onanu-maseto, o vanuġa boru tarimamu, o asi ġemu dabuġa, o okeveto, o diburai otanuto, ġai na asi ġavaġa-kavamuto?’

45 Benamo Vere na bevaġa-veserini, bekirani, ‘Moġoni akiramini, ġomi na mai tarikaka asi ġeivirini tarimari maiġeri, ta asi ġovaġa-kavaiato nai, au maki moġesi ġovei-viniguto, asi ġovaġa-kavaguto.’

46 Tauna moġa, ġia tu midigu vanaġivanaġi gabuna ġana beġe iaġoni, a vei-iobukaibuka tarimari tu maġuri vanaġivanaġi gabuna ġana beġe iaġoni.”

26

*Iesu beġene vaġi-masea dabarana ġevetauto
Ioane 11:45-53*

1 Iesu na maiġeri dagara mabarari evevaġa-riba iaġi-ġosirito nai, ġena mero evaġa-guruġarito, ekirato,

² “Ĝomi ma ribami, ĝaro ruarua moĝo, benamo Pasova beĝe vejani. (Moĝa tu Iuda tarimari mase aneruna na evanaĝirito moĝo, asi evaĝirito verekona). Mo ĝaro ai Tarimarima Natuna tarima tari ĝimari ai beĝe toreani, beĝene vaĝa-satauroa ĝana.”

³ Benamo Rubu Veaĝa vereri baregori ema Iuda ĝeri vere baregori ĝesi ĝevegogoto, Kaiafas, Rubu Veaĝa verena barana, ĝena numai.

⁴ Geboioĝato, Iesu beĝene ĝabi-lemaia, benamo beĝene vaĝi-masea.

⁵ Senaĝi ĝekirato, “Dia vereko nuĝanai bene ĝora, korana vereko beĝe iaĝomani tarimari ĝia iatana na beĝe burini garina.”

Vavine ta na Iesu ediĝaiato Betania ai

Mareko 14:3-9; Ioane 12:1-8

⁶ Iesu tu Betania ai, Simona, lepera tarimana, ĝena numai.

⁷ Ĝeĝaniĝanito-ĝoi nuĝanai, vavine ta ĝia ĝenai eiaĝoto; kavabu namona ta, alabasta forena na ĝeveiato kavabuna, eĝabi-kauato, nuĝanai tu muramura ma bonana namona, voina barego vedaurea; Iesu ĝaniĝani gabunai etanu-taĝoto-ĝoi nai, mo vavine na Iesu debanai ebubuato.

⁸ Ĝena mero na ĝeĝitaiato, benamo ĝebaruto, ĝekirato, “Karase nai mai muramura efitoĝa-kavaiani?”

⁹ Mai muramura bere voivoi-iaĝia, be moni baregona bere ĝabia, benamo asi ĝeri-ĝari tarimari bere viniri!

¹⁰ Iesu ribana ĝia tu kara ĝekiraĝiato, moĝesina nai evaĝa-guruĝa-rito, ekirato, “Karase nai mai vavine ĝomugumugu-iaĝiani? Mai vavine na veiĝa namona au ĝegu ai beveia.

¹¹ Asi ĝeri-ĝari tarimari tu ĝomi ĝesi boĝo tanu-vanaĝi vanaĝini. Senaĝi au tu dia ĝaro mabarari ĝomi ĝesi batanuni.

¹² Mai vavine na muramura au tauĝanigu ai bebubu-guinea, gurigurigu ĝana.

¹³ Moĝoni akiramini, Vari Namona beĝe ĝobata-iaĝiani tanobara mabarari nuĝari ai, mai vavine na veiĝa beveia veigana maki beĝea kiraĝiani, ĝia tuĝamaĝi-iaĝina.”

Iudas na Iesu erevaiato

Mareko 14:10-11; Luka 22:3-6

¹⁴ Benamo gabanana ruarua (12) tarimari ta, arana Iudas Isakariota, Rubu Veaĝa vereri baregori ĝeri ai eiaĝoto,

¹⁵ edanaĝirito, ekirato, “Kara boĝo viniguni, bema Iesu ĝimami ai batorekauani nai? Ĝia na silva moniri gabana toitoi (30) ĝeivirito, benamo ĝeviniato.

¹⁶ Mo nega monana Iudas na ĝimari ai betore-kauani dabarana evetauato-ĝoi.

Iesu ma ĝena mero ĝesi ginitaĝo mamoen a ĝeĝaniato

Mareko 14:12-21; Luka 22:7-14; 22:21-23; Ioane 13:21-30

¹⁷ Asi etubuni faraona verekona ĝarona giniguenai ĝena mero Iesu ĝenai ĝeiaĝoto, ĝedanaĝiato, ĝekirato, “Ĝai tu ainai Rubu Veaĝa verekona baĝana vei-torea, bono ĝania?”

¹⁸ Benamo Iesu na evaĝa-veserito, ekirato, “Ĝoiĝo vanuĝa barana nuĝanai, mo bakiraĝia tarimana ĝenai, boĝono vaĝa-guruĝaia, boĝono kira, ‘Vevaĝa-riba tauna ekirani: Ĝegu hora varau beraĝasi. Ĝegu mero ĝesi ĝoi ĝemu numai ginitaĝo mamoen a baĝa ĝaniani.’ ”

¹⁹ Benamo mero Iesu na ekirarito ilailanai vereko ĝevei-toreato.

²⁰ Lavilavi ai Iesu ma ġena mero gabanana ruarua (12) ġesi ġetanu-tarito, vereko ġeġania ġana.

²¹ Benamo ġeġaniġanito-ġoi nai, ekirarito, ekirato, “Moġoni akiramini, ġomi ta na au borevaguni.”

²² Ġia mabarari nuġari ma metori ġesi irau sebori irau sebori na ġedanaġiato, ġekirato, “Vereġauka, moġoni dia au, ene?”

²³ Iesu evaġa-veseto, ekirato, “Au ġesi diġu sebonai ġanaba-riġoni tari-mana na au berevaguni.

²⁴ Tarimarima Natuna bemaseni Buka Veaġai ġetoreato ilailanai. Senaġi Tarimarima Natuna berevaiani tarimana ġenai tu vetuġana kekei; asi bere maġuri tu namo.”

²⁵ Benamo ludas, reva tarimana, ekirato, “Vevaġa-riba taumu, moġoni dia au, ene?” Iesu evaġa-veseto, ekirato, “Dagarana maniġa, mani okiraġiani.”

Vereġauka ġena ġanivegogo veaġana

Mareko 14:22-26; Luka 22:15-20; 1Korinto 11:23-25

²⁶ Ġeġaniġanito-ġoi nuġanai, Iesu na beredi eġabiato, Barau evaġa-namoato, etaviato, evinirito, benamo ekirato, “Goġabia, ġoġania, mai tu au tauġanigu.”

²⁷ Ġia na kapusi ma eġabiato, evaġa-namoato murinai, evinirito, ekirato, “Ġoniua, ġomi mabarami.

²⁸ Korana mai tu au raragu, Ginitaġo Variġuna evaġa-moġoniani, beve-bubuni, tarimarima ġutuma ġeri rakava tuġamaġi-fitoġari ġana.

²⁹ Akiramini, mai vine nanuna asi ma banu-ġenoġoiani, beiaġoni mo, ġaro beraġasini vau, au ġomi ġesi ma bita niu-vegogoani au Tamagu ġena Basileia nuġanai.”

³⁰ Benamo mari ta ġemariato murinai, ġeraka-rosito, Olive Ġorona ġana ġeiaġoto.

Iesu na Petero ġena vekira-ġuniġau ekiraġi-toreato

Mareko 14:27-31; Luka 22:31-34; Ioane 13:36-38

³¹ Benamo Iesu na evaġa-guruġarito, ekirato, “Toma boġi ġomi mabarami ġemi veġabadadama au ġegu ai boġo raga-kwaneani, korana Buka Veaġai maiġesi ekirani,

‘Au na mamoe ġitaġauri
tarimana bavagiiani,
benamo mamoe mabarari
beġe raga-lausini.’

³² Senaġi au mase na ma bavariġisi-ġenoġoini murinai, baraka-guineni Galilea ġana. Monai vau bitana vedoġari.”

³³ Petero eguruġa-fouto, Iesu ekiraiato, ekirato, “Bema mabarari na ġeri veġabadadama ġoi ġemu ai beġe raga-kwaneani, senaġi au na tu asigina.”

³⁴ Iesu na Petero evaġa-guruġaiato, ekirato, “Moġoni akiramuni, toma boġi kokoroku roġosi bene goġi nuġanai, ġoi na au vaġa-toitoi bokira-ġuniġauguni.”

³⁵ Senaġi Petero eguruġa-ġiġiraġeto, ekirato, “Bema ġoi ġesi bita mase-vegogoni maki, au na ġoi tu asi veġata bakira-ġuniġaumuni.” Ġena mero mabarari maki moġesi ġekirato.

Iesu eġauġauto Getesemane ai

Mareko 14:32-42; Luka 22:39-46

³⁶ Iesu ma ġena mero ġesi ġeiaġoto gabu ta arana Getesemane, benamo ġia na evaġa-guruġarito, ekirato, “Mainai ġotanutaġo, au tu iomo ġana aiaġoni, naġauġau.”

³⁷ Benamo Petero ema Sebedaiio natuna ruarua moġo eġoririto, ġia ġesi ġeiaġoto. Moġa nuġanai Iesu tau-ġanina efarakaiato, egarito, nuġana maki evekwaraġito-ġoi.

³⁸ Benamo ekirarito, ekirato, “Au nuġagu na meto asikei eġwaiiani, dori evaġiguni. Mainai ġotanu, boġono vevaġa-gwaġiġi au ġesi.”

³⁹ Iesu kota ma eraka-naġito, ġoirana tano ai ekokofa-tarito, benamo eġuriġurito, ekirato, “Tamagu o, bema ma dabara ta, mai midigu bedina ġeguna noma ġabi-vaġia. Senaġi dia au ġegu ura, ġoi ġemu ura moġo.”

⁴⁰ Ġena mero toitoi ġeri ai eġenoġoito nuġanai, ġia tu gena-maseri ai eġoitaġorito, benamo Petero ekiraiato, ekirato, “Kamasi nai ġomi taumi toitoi au ġesi aoa sebona ta kavana maki asi boġo vevaġa-gwaġiġini?”

⁴¹ Boġono vevaġa-gwaġiġi, boġono ġauġau, be veribaġani beiaġomani nai tu, asi boġono moira. Iauka tu moġoni eurani, senaġi tau-ġani tu emoirani.”

⁴² Iesu nega vaġa-ruarua eraka-veġitato, ea ġuriġurito, ekirato, “Tamagu o, bema asi dabara ta mai midigu bedina ġeguna boġabi-vaġiani nai, ġoi ġemu ura bono veia moġo.”

⁴³ Ma eġenoġoi-iaġomato nuġanai tu, ġia asi ġeri vevaġa-gwaġiġi nai, genamaseri ai ma edoġaririto, korana matari tu gena na eġabi-rakavarito.

⁴⁴ Iesu na ma eiaġuirito, ma eiaġoto, vaġa-toitoi ma eġauġauto, ġena ġuriġuri guruġari ġuineri na ekiraġi-ġenoġoirito.

⁴⁵ Benamo ġena mero ġeri ai ma eġenoġoi-iaġomato, ekirarito, “Ġomi tu roġo ġogenani e ġoiaġaraġini? Ġoġitaia! Aoana varau beraġasi! Tarimarima Natuna tu beġe revaia, rakava tarimari ġimari ai beġe torea.

⁴⁶ Ġovariġisi, be si-iaġosi! Ġoġitaia, au revarevagu tarimana mai be-
raġasi!”

Iesu tuari tarimari na ġeġabiato

Mareko 14:43-50; Luka 22:47-53; Ioane 18:3-12

⁴⁷ Iesu roġo eguruġato-ġoi nuġanai, Iudas, mero ġabanana ruarua (12) tauna ta, eraġasito. Tarimarima gutuma maki ġia ġesi ma ġeri vetari baġari e vevaġi kwariri. Ġia tu Rubu Veaġa vereri baregori ema Iuda vereri na ġetuġurito.

⁴⁸ Reva tarimana na vetoġa ta ekiravara-torerito, ekirato, “Baverauani tarimana tu moġa, boġono ġabi-taria.”

⁴⁹ Iudas eraġasito nai, maoromaoro eiaġoto Iesu ġenai, benamo ekirato, “Vevaġa-riba tarimamu, boġi namona!” benamo everauato.

⁵⁰ Iesu na evaġa-veseato, ekirato, “Ġata, veiveina uranai boiaġoma veġana noraga-veia!” Benamo ġeiaġomato, ġimari na Iesu ġeġabi-tariato, ġedegodegoato.

⁵¹ A Iesu ġena mero ta ġena vetari baġana einu-vaġiato, edaveato, benamo Rubu Veaġa verena baregona ġena vetuġunaġi tarimana seġana ebasi-vaġiato.

⁵² Benamo Iesu na ekiraiato, ekirato, “Ġemu baġa tu ġuraġurana gabunai noġura-ġenoġoia. Korana vetari baġari ġeġabini tarimari mabarari tu vetari baġari na beġe maseni.

53 Ĝoi asi ribamu, Tamagu ĝena vevaĝa-kava banoĝiani, benamo ĝia na aneru vaĝa-sebo au ĝegu ai betuĝurini, aneru doĝorori gabanana ruarua (12) o 70,000 ema tari maki betuĝurini au vaĝa-kavaĝu?

54 Moĝesi bere vei, senaĝi Buka Veaĝai varau ĝetoreato guruĝana tu kamasi bemoĝonini? Be, maĝesi moĝo beĝene vetore!”

55 Iesu na monai mo tarima ĝutuma evaĝa-guruĝarito, ekirato, “Au tu seĝafore doĝorona ta aĝori-kauani, be ĝomi boĝo iaĝoma au ĝabigabigu tu ma ĝemi vetari baĝari e vevaĝi kwariri ĝesi? Ĝaro mabarari ai au tu ĝomi sevimi ai, Rubu Veaĝa nuĝanai avevaĝa-ribato-ĝoi, senaĝi asi ĝoĝabi-tariguto.

56 A mai dagara mabarari ĝeĝorani tu, peroveta tarimari na Buka Veaĝai ĝetore-guinerito guruĝari vaĝa-moĝoniri ĝana.” Benamo Iesu ĝena mero mabarari na ĝeraga-kwaneato, ĝeraga-rovorovoto.

Iesu kanisoro tarimari ĝoirari ai

Mareko 14:53-65; Luka 22:54-55; 22:63-71; Ioane 18:13-14; 18:19-24

57 Mo ĝeĝabi-tariato tarimari na Iesu ĝeĝori-iaĝoato, Kaiafas, Rubu Veaĝa verena baregona, ĝena numa ĝana. Monai taravatu ĝevevaĝa-riba iaĝiato-ĝoi tarimari ema Iuda vereri varau ĝeraka-vegogoto.

58 Petero na Iesu eraka-tuĝuato-ĝoi, ma fakana eiaĝoto mo, Rubu Veaĝa verena baregona ĝena numa ĝana. Eraka-toĝato maĝu nuĝanai, benamo veĝitaĝau tarimari fakari ai ea tanu-tarito, bene ĝita, mo veĝa magonai kara befoforini.

59 Rubu Veaĝa vereri baregori e Iuda ĝeri kanisoro tarimari mabarari na vevaĝa-bade ĝofaĝofa tarimari ĝevetaurito, Iesu beĝene ĝofaĝofa-iaĝia, be beĝene vaĝia ĝana.

60 Vevaĝa-bade ĝofaĝofa tarimari ĝutuma ĝevarigisito, ĝeĝofaĝofa-iaĝiato, senaĝi ĝeri guruĝa tu asi ĝesebonato-ĝoi. Magonai vau ĝofaĝofa tarimari ruarua ĝevaisi-raĝeto,

61 ĝekirato, “Mai tarima ekirato, ‘Au tu ma seĝukagu mai Barau ĝena Rubu Veaĝa barovoani, ema ĝaro toitoi nuĝanai ma bavaĝa-ruĝa ĝenoĝoiani.’”

62 Benamo Rubu Veaĝa verena baregona eruĝa-vaisito, Iesu edanaĝiato, ekirato, “Ĝoi tu asi bovaĝa-veseni? Maĝeri na ĝoi ĝevarifiu-iaĝimuni guruĝari tu kamasi?”

63 Senaĝi Iesu asi eguruĝato. Rubu Veaĝa verena baregona na ma edanaĝi-ĝenoĝoiato, ekirato, “Maĝuri Barauna aranai au na ĝoi akiramuni, nokira-varama: Ĝoi tu Keriso, Barau Natuna?”

64 Iesu na evaĝa-veseato, ekirato, “Dagarana okiraĝiani maniga! Ma au na ĝomi mabarami akiramini: Mai ĝaro maĝa, mo belaĝoni ĝoirai, ĝomi na Tarimarima Natuna roĝo boĝo ĝitaiani, seĝuka Barauna ĝimana aroribanai betanuni, e guba maguberi iatari na beiĝomani!”

65 Benamo Rubu Veaĝa verena baregona tauĝena ĝena dabuĝa edareato, ekirato, “Barau vaĝa-rakavana guruĝana tu ekiraĝi-ĝosiato! Karase vevaĝa-ĝita tarimari roĝo tavetaurini? Barau vaĝa-rakavana guruĝana bekiraĝia, varau boĝo seĝaĝia.

66 Kara mani ĝotoni?” Ĝia mabarari ĝekirato, “Bene mase moĝo.”

67 Benamo ĝoirana ĝekanunuato, ĝefaisiato. Kotari na ĝeforoato,

68 ĝekirato, “Keriso, ĝoi tu peroveta tarimana, be nokira-varama, deikara na bebotamu?”

Petero na Iesu ekira-ĝuniĝauato

69 Petero roĝo numa maĝuna nuĝanai etanu-taĝoto-ĝoi, benamo vetuĝunaĝi ĝuiatona ta ĝia ĝenai eiaĝomato, ekirato, “Ĝoi maki Iesu, Galilea tauna, ĝesi orakaoto-ĝoi, okavaiato-ĝoi.”

70 Senaĝi Petero evekira-ĝuniĝauto mabarari ĝoirari ai, ekirato, “Au asi ribagu ĝoi kara okiraĝiani.”

71 Benamo eraka-rosito, maĝu ĝatama bokana sevina ĝana eiaĝoto. Ma vetuĝunaĝi ĝuiatona ta na eĝitaiaato, benamo sevina tarimari evaĝa-guruĝarito, ekirato, “Ĝia maki Iesu, Nasareta tarimana, ekavaiato tarimana.”

72 Petero ma evekira-ĝuniĝauto, eguruĝa-gwaĝiĝito, ekirato, “Au asi ribagu mani tarima.”

73 Nega kotuna evanaĝito nuĝanai, monai ĝeruĝa-taĝoto-ĝoi tarimari Petero ĝenai ĝeiaĝomato, ĝevaĝa-guruĝaiaato, ĝekirato, “Moĝoni, ĝoi maki ĝia ĝesi tarimamu ta, korana garomu na evaĝa-foforimuni.”

74 Benamo Petero na ekirarito, “Asiĝina ĝinavaĝi, akira-korikorimini, mani tarima au asi ribagu!”

Asikauna kokoroku egoĝito.

75 Benamo Petero na Iesu ĝena guruĝa etuĝamaĝi-doĝariato, ekiraiato, “Kokoroku roĝosi bene goĝi nai, ĝoi na au vaĝa-toitoidi bokira-ĝuniĝauguni.” Benamo eraka-rosito murikai, etaĝi-rakava rakavato.

27

Iesu ĝeĝori-iaĝoato Pilato ĝenai

1 Boĝiboĝi ekini-mama mamaiaato-ĝoi, Rubu Veaĝa vereri baregori mabarari ema Iuda vereri ĝeboioĝa-vegogoto, Iesu beĝene vaĝia ĝana.

2 Seini na ĝebarbaruato, ĝeĝori-iaĝoato, Pilato, Roma gavana, ĝimanai ĝetore-kauato.

Iudas Isakariota emaseto Apostolo 1:18-19

3 Iudas, reva tauna, na Iesu eĝitaiaato, vaĝa-masena guruĝana varau ĝeveiato, benamo evetuĝamaĝi-kureto. Benamo silva moniri gabana toitoidi (30) eĝwa-ĝenoĝoirito Rubu Veaĝa vereri barari e Iuda vereri ĝeri ai.

4 Ekirato, “Au tu havei-rakava, korana asi ĝena rakava tarimana barevaia, bemaseni.” Gevaĝa-veseto, ĝekirato, “Mani tu dia ĝai ĝema nuĝa-vekwaraĝi, mani tu ĝoi tauĝemu ĝemu ĝauvei moĝo.”

5 Iudas na silva moniri Rubu Veaĝa nuĝanai efu-toĝarito, eraka-veĝitato. Benamo eiaĝoto, tauĝena ea veborato.

6 Benamo Rubu Veaĝa vereri baregori na mo silva moniri ĝeĝabirito, ĝekirato, “Mai tu rara voina monina, be boubou mauĝanai asi veĝata bita ĝuraiani, taravatu.”

7 Geguruĝa-iaĝiato, ĝevaĝa-moĝoniato murinai, mo moni ĝeĝabiato, ĝuro eveini tarimana ĝena tano ĝevoiato, tanobara boru tarimari ĝeri gara gabunai ĝevaĝa-iaĝoato.

8 Moĝesina nai mo tano arana ĝevatoani “Rara Tanona” beiaĝoma mo maitoma.

9 Monana Ieremia peroveta tarimana ĝena guruĝa ema moĝonito, ekirato, “Mo silva moniri gabanana toitoidi (30) ĝeĝabirito, mo tu Isaraela tarimari na ĝevaĝa-moĝoniato voina misina, mo tau beĝene voia ĝana.

10 Ma mo moni na ġuro eveini tarimana ġena tano ġevoiato, Vereġauka ekirato ilailanai.”

Iesu Pilato ġoiranai

Mareko 15:2-5; Luka 23:3-5; Ioane 18:33-38

11 Iesu Roma gavanana ġoiranai eruġato, ġia na edanaġiato, ekirato, “Ġoi tu Iuda tarimari ġeri kini ba?” Iesu evaġa-veseto, ekirato, “Oi, okiraġiani maniġa.”

12 Benamo Rubu Veaġa vereri baregori ema Iuda vereri na Iesu ġeġofaġofa-iaġiato, senaġi guruġa ta asi ekiraġiato.

13 Moġa lorinai Pilato na evaġa-guruġaiato, ekirato, “Ġoi asi oseġaġini, iatamu ai tu meto ġutuma ġekiraġirini?”

14 Senaġi Iesu asi eġoi-aġito, guruġa sebona tai maki asi evaġa-veserito. Monana gavana nuġana efarevaġi-rakavato.

Pilato na Iesu ġena mase ekiraġiato

Mareko 15:6-15; Luka 23:13-25; Ioane 18:38-19:16

15 Vanaġivan-aġi Pasova verekona ġaronai tu gavana na ġia ġeri dibura numai etanuni beġe kiraġiani tarimana ta etuġu-rosiato-ġoi.

16 Mo laġani ai tarima rakava kwaikwaina ta dibura numai etanuto, arana tu Barabas.

17 Moġa lorinai tarima ġutuma ġevegogoto nuġanai, Pilato na edanaġirito, ekirato, “Deikara ġoura-viniani natuġu-rosia: Barabas ba Iesu, ġekiraġiani Keriso?”

18 Korana Pilato ribana ġinikau, Iuda tarimari baregori ġeri mama dainai, Iesu ġia ġimanai ġetoreato.

19 Pilato na Kota egorikauato-ġoi nuġanai, Pilato ġaraġona na ġena keakau ta etuġu-raġasiato, ekirato, “Mani vei-iobukaiobuka tarimana ġenai dagara ta asi bono veia, korana au tu boġi ai banuvi, ġegu nuvi ai midigumidigu baregona na beġabigu ġia dainai.”

20 Senaġi Rubu Veaġa vereri baregori ema Iuda vereri na vegogo tarimari nuġari ġeġanirito, Pilato beġene kiraia, Barabas bene tuġu-rosia, a Iesu bene mase.

21 Senaġi gavana na vegogo tarimari ma edanaġirito, ekirato, “Ġia tauri ruarua dei tu ġomi ġemi natuġu-rosia?” Vegogo tarimari ġefararato, ġekirato, “Barabas!”

22 Benamo Pilato na edanaġirito, ekirato, “O mai Iesu, ġekiraġiani Keriso, tu kamasi bana veia?” Ġia mabarari ġevaġa-vese vegogoto, ġekirato, “Novaġa-satauroa!”

23 Senaġi Pilato na ma edanaġirito, ekirato, “Kara dainai? Kamara veġa rakavana eveiato nai?” Senaġi mabarari ġefarara-gigitarito, ġekirato, “Novaġa-satauroa!”

24 Pilato etuġamaġi-fakato, ġia ġena riba guruġari tu asi beġe ġabi-raġerini, ma tarimarima ġia iatana na beġe burini garina, benamo ġia tu nanu eġabito, ġimana eġurigiato mo tarimarima ġutuma ġoirari ai, ema maiġesi ekirato: “Au tu asi ġegu kerere mai vei-iobukaiobuka tarimana rarana ġenai; mai tu ġomi ġemi ġauvei moġo!”

25 Vegogo tarimari mabarari ġevaġa-veseto, ġekirato, “Mai tarima rarana o ġena mase metona tu ġai iatamai bene tanu ema ġai natuma iatari ai.”

26 Benamo Pilato na Barabas etuġu-rosiato ġia ġeri, a Iesu tu ġekwaria etato vau soldia evinirito, beġene vaġa-satauroa ġana.

Iesu ġevaseva-vaseva iaġiatio
Mareko 15:16-20; Ioane 19:2-3

²⁷ Benamo Pilato ġena vetari tarimari na Iesu ġeġori-iaġoato gavana ġena numa nuġanai, benamo karori mabarari ġekea-vegogorito, bena ġeruġa-ġeġeraġiatio.

²⁸ Ġena dabuġa ġeruġa-vaġirito, dabuġa kakakakana ġevaġa-veiatio,

²⁹ debana dagarana ġau ma giniginina na ġevatoato, korona noġa ġeveiatio, benamo Iesu debanai ġetore-kauato. Oro ta maki ġimana arorib-anai ġevaġa-ġabiatio, benamo goiranai ġevetui-tarito, ġevaseva-vaseva iaġiatio, ġekirato, "Iuda ġeri Kini o, ġaro namona!"

³⁰ Benamo ġekanunu-kanunuato, mo oro ġeġabi-rariato, debana ġekwari-ġenoġoiato-ġoi.

³¹ Ġevaseva-vaseva iaġi-ġosiatio murinai, dabuġa kakakakana ġeġabi-vaġiatio, ġena dabuġa korikorina ma ġevaġa-veiatio. Benamo ġeġori-rosiatio, beġenea vaġa-satauroa ġana.

Iesu ġevaġa-satauroato
Mareko 15:21-32; Luka 23:26-43; Ioane 19:17-27

³² Ġeraka-rosito-ġoi nai, Kurene tarimana ta ġeġoitaġoato arana Simona. Vetari tarimari o soldia na ġelaunaġi-naġiatio, Iesu ġena satauro neġwaia.

³³ Benamo vanuġa na ġeraka-rosito, gabu tai ġeraġasito arana tu Golgota, anina tu 'Deba Ġavana Ġabuna'.

³⁴ Monai vine nanuna midigu vaġa-keina muramurana arana gal ġesi ġebubu-vegogoato dagarana, Iesu ġeviniatio; eiamuse-tovoato, senaġi asi eniuato.

³⁵ Ġevaġa-satauroato murinai, ġena dabuġa ġia fakarai ai ġevarerito kasi ai.

³⁶ Moġa murinai ġetanutanu-tarito, benamo ġenariato.

³⁷ Ġia debana iatanai kara koranai ġevaġa-satauroato guruġana ġekafa-kauato, maiġesi ġetoreato, "MAI TU IESU, IUDA ĠERI VERE."

³⁸ Seġafore tarimari ruarua maki Iesu ġesi ġevaġa-sataurorito, ta arorib-ana rekenai, ma ta kaurina rekenai.

³⁹ Ġeraka-vanaġito-ġoi tarimari debari ġekorakorarito-ġoi, guruġa rakavari Iesu ġeviniatio-ġoi,

⁴⁰ ġekirato-ġoi, "O ġoi okirato, Rubu Veaġa borovoani, ġaro toitoi nuġanai ma bovaġa-ruġa ġenoġoiani otato, tauġemu novevaġa-maġuri! Bema ġoi Barau Natuna, satauro tuġuna na noraka-riġo."

⁴¹ Rubu Veaġa vereri baregori e taravatu ġevevaġa-riba iaġiatio-ġoi tarimari ema Iuda vereri na maki maiġesi ġevaseva-vaseva iaġiatio-ġoi, ġekirato,

⁴² "Ġia na tarima boruri evaġa-maġuririto-ġoi, kamuto ġia tauġena tu asi evevaġa-maġurini! Bema ġia moġoni Isaraela tarimari ġeri vere nai, satauro na inimoġo neraka-riġo, be baġana vaġa-moġonia.

⁴³ Ġia na Barau eġabidadama viniatio-ġoi, be siġitaia, Barau na maki betuġamaġi-kauani, bevaġa-maġuriani ba? Evekيراġito-ġoi, 'Au tu Barau Natuna,' nene?"

⁴⁴ Iesu ġesi ġevaġa-satauro vegogorito seġafore tarimari ruarua na maki moġesi ġeguruġa-rakava viniatio.

Iesu ġena mase
Mareko 15:33-41; Luka 23:44-49; Ioane 19:28-30

45 Horaĝauna 12 koloko ea ĝabiato nai, tanobara mabarana mukuna na eĝabi-ĝaŭato, mukuna etanuto eiaĝoto mo horaĝauna 3 koloko.

46 Horaĝauna 3 koloko rekenai Iesu eĝabato, ekirato, “Eloi, eloi, lama sabaktani?” anina tu, “Au ĝegu Barau, au ĝegu Barau, kara dainai au boraga-kwanegu?”

47 Tarimarima tari monai ĝeruĝa-taĝoto-ĝoi nai, ĝeseĝaĝiato, benamo ĝekirato, “Ĝia tu Elia ekeaiani.”

48 Benamo ĝeri tarima ta eraga-iaĝoto, nanu erimaiani dagarana ta eĝabiato, vine nanuna mamakina nuĝanai eduĝi-fereiato, gobu lefai egwanu-kauato, benamo eduĝi-raĝeato, Iesu na neniua ĝana.

49 Senaĝi kotari ĝekirato, “Sivaĝa-noga roĝo, siĝitaia, Elia beiaĝomani, bevaĝa-maĝuriani ba asiĝina.”

50 Iesu ma eĝaba-fouto murinai emaseto.

51 Benamo mo negai moĝo Rubu Veaĝa nuĝanai veaĝa lelevaĝi daiĝutunai, kouĝau dabuĝana o ketin evedare-kikimato, eruaruato, tuĝuna na mo gabigabina. Tano eiaĝaiaĝato, fore barari ĝeĝwa-kirarito.

52 Mase ĝuriri ĝevekeo-fakato, ma tarima ĝutuma, Barau ĝena ura ĝevairito-ĝoi tarimari, mase na ma ĝevaisiraĝe-ĝenoĝoito,

53 ĝeri guri gaburi ĝeiaĝurito. Iesu ĝena variĝisi-ĝenoĝoi murinai, Siti Veaĝana ĝana ĝeiaĝoto, monai tarimarima ĝutuma ĝoirari ai ĝefoforito.

54 Vetari verena ma ĝena vetari tarimari ĝesi, Iesu ĝenariĝaŭato-ĝoi tarimari, na tano-iaga ema ĝeĝorato dagarari mabarari ĝeĝitarito nai, ĝegari-rakavato, ĝekirato, “Mai tarima tu moĝoni Barau Natuna!”

55 Vavine ĝutuma maki monai, kotuna manaĝai ĝeruĝato, ĝemarereto-ĝoi. Moĝeri vavine Iesu murinai ĝerakato Galilea na eiaĝoto mo Ierusalemna ĝana, ema ĝia vetuĝu-naĝina ĝeiaĝo-vinito-ĝoi.

56 Ĝia fakari ai tu Maria, Magadala vavinena; Maria, Iakobo (o Iames) e Ioane sinari; ema Iakobo e Ioane Sebedaio sinari.

Iesu ĝeguriato

Mareko 15:42-47; Luka 23:50-55; Ioane 19:38-42

57 Mo lavilavi ai farefare ĝutuma tarimana Arimatea vanuĝa na eraĝasito, arana tu Iosefa; ĝia maki Iesu ĝena mero ta.

58 Ĝia tu Pilato ĝenai eiaĝoto, benamo enoĝiato, Iesu tauĝanina bene ĝabia etato. Benamo Pilato na ĝena vetari tarimari ekirarito, Iesu tauĝanina Iosefa beĝene vinia.

59 Moĝa lorinai Iesu tauĝanina eĝabiato, dabuĝa kurokurona namona na ekumuato,

60 gara gabuna fore kouĝanai ea tore-toĝaiato. Mo gara tu fore gwaĝiĝinai kouĝa ta ĝekoroato, ĝia tauĝena ĝena guri gabuna variĝuna ta. Fore baregona na ĝatama-boka ekure-ĝaŭato, benamo eraga-kwaneato.

61 Maria, Magadala vavinena, ema Maria ta tu monai ĝetanu-taĝoto-ĝoi, guri ĝetanu-ĝoiraiato.

Vetari tarimari na gara gabuna ĝenari-ĝaŭato

62 Vereko ĝevei-toreani ĝarona ekorito vau, Sabadi varau beĝabia, Rubu Veaĝa vereri baregona e Farisea tarimari Pilato ĝenai ĝeiaĝoto,

63 ĝekirato, “Verebara, ĝai ĝatuĝa-maĝini, mo ĝofaĝofa tarimana roĝo maĝuri nai, ekirato, ‘Ĝaro toitoi murinai au tu mase na ma bavariĝisi-ĝenoĝoini.’

⁶⁴ Moġa lorinai gadi tauri bono kirari, be guri gabuna beġene nari-ginikaua, bene iaġo mo, ġaro toitoi murinai. Irau ġena mero beġe iaġoni, ma tauġanina beġe lemaiiani, benamo tarimarima beġe ġofarini, beġe kirani, ‘Ġia tu mase na bevariġisi-ġenoġoi,’ beġe toni garina. Mai ġofaġofa maiġa na ġofaġofa ġuina bevanaġiani.”

⁶⁵ Pilato na ekirarito, ekirato, “Gadi tarimari ġoġabiri, ġeiaġo, be guri gabuna beġene ruġaġau-ginikaua.”

⁶⁶ Benamo gara ġana ġeiaġoto, guri kouġana ekou-ġauato forena ġekada-ġauato, tabu vetoġana ta ġeveiato, benamo gadi tarimari ġetorerito, beġene riviġaua.

28

Iesu evariġisi-ġenoġoito Ioane 20:1-18

¹ Sabadi ekorito murinai, fura ġarona giniguenenai, boġiboġi iamoiamo, Maria, Magadala vavinena, Maria ta ġesi ġeiaġoto, gara gabuna ġea ġitaiato.

² Asikauna tu tano-iaga baregona eġorato, korana Vereġauka ġena aneru ta guba na emariġoto, fore ekure-veġitaiato, benamo iatanai etanukauto.

³ Ġia vetoġana tu noġa moġo kiriku ekimoreani kavana, ema ġena dabuġa tu kuro-ġaroġaro kaufa o snou noġa.

⁴ Guri gabuna ġeġitaġauto tarimari tu ġegari-rakavato nai ġeġoġo-ġoġorito, benamo tano ai ġeketo-tarito mase tarimari kavana.

⁵ Aneru na mo vavine evaġa-guruġarito, ekirato, “Asi ġogari, au ribagu ġomi tu Iesu, ġevaġa-satauroato tauna, ġovetauani.

⁶ Ġia mainai tu asiġina; ġia tu bevariġisi-ġenoġoi, evaġa-guruġamito ilailanai. Ġetoreato gabuna ġoma ġitaiata.

⁷ Be ġoiaġo-ġariġari, ġena mero boġonoa kira-varari, boġono kira, ‘Iesu tu mase na bevariġisi-ġenoġoi, ema beġuineni Galilea ġana. Monai vau boġoa ġitaiani.’ Mai guruġa nakira-varami ġana baiaġoma.”

⁸ Benamo mo vavine na guri gabuna ġeraġakwane-ġariġariato, ma gariri e ma verereri ġesi ġeragato ġena mero ġeri ai, mo aneru ġena guruġa ġea vaġa-ribari ġana.

⁹ Ġeragato-ġoi nai, asikauna Iesu tu ġia ġoirari ai eruġato, ekirato, “Maino ġomi ġesi bene tanu!” Benamo ġoiranai ġevetui-tarito, kwakuna ġeregorito, ġetoma-rakarigi viniato.

¹⁰ Iesu na evaġa-guruġarito, ekirato, “Asi ġogari, ġoiaġo, au tarikakagu ġoa kirari, Galilea ġana beġene iaġo; monai vau au beġene ġitagu.”

Guri gabuna ġenari-ġauato vetari tarimari ġeri ġofaġofa guruġana

¹¹ Vavine ruarua dabara na ġeiaġoto-ġoi nuġanai, tuari tarimari tari, guri gabuna ġenari-ġauato tarimari, ġeġenoġoito vanuġa barana ġana, karakara ġeġorato dagarari mabarari Rubu Veaġa vereri baregori ġekira-vararito.

¹² Benamo mo Rubu Veaġa vereri barari tu Iuda vereri ġesi ġeboioġa-vegogoto, gadi tarimari moni baregona ġevinirito.

¹³ Maiġesi ġekirarito, ġekirato, “Ġomi tu boġono kira, ‘Ġena mero boġi nuġanai beġe iaġoma, ġai tu genamai beġe lemaia.’

¹⁴ Bema mai vari gavana na beseġaġiani nai tu, ġai na ġia nuġana baġa vei-magomagoani, be ġomi veiġa rakavana ta asi bevei-vinimini.”

¹⁵ Gadi tarimari na moni gēgabiato, gēvaḡa-guruḡarito ilailanai gēguruḡato. Mai vari tu Iuda tarimari fakari ai gēkiraḡi-rakaorakaoato, ma maitoma maki roḡo gēkiraḡiani.

Iesu ḡena mero ḡeri ai efoforito

Mareko 16:14-18; Luka 24:36-49; Ioane 20:19-23

¹⁶ Gena mero gabanana sebona (11) tu Galilea ḡana ḡeiaḡoto, Iesu na ekiraḡi-guineato ḡorona ḡana.

¹⁷ Monai gēḡitaiato nai, ḡetoma-rakariḡo viniato; senaḡi tari tu ḡedaradarato: ‘Mai tu moḡoni Iesu ba?’

¹⁸ Benamo Iesu eraka-kavito, evaḡa-guruḡarito, ekirato, “Barau na seḡuka mabarana gubai ema tanobarai au varau bevinigu.

¹⁹ Moḡa lorinai ḡoiḡo tanobara mabarari ḡana, bese mabarari ḡegu mero ai boḡono vaḡa-iaḡori. Ema Tamana, Natuna, Iauka Veḡa aranai boḡono babatisori.

²⁰ Boḡono vaḡa-ribari maki, avinimito vevaḡa-naḡiri mabarari beḡene korana-iaḡiri. Boḡono riba, au tu ḡaro mabarari ai ḡomi ḡesi bita tanuni, beiaḡoni mo, tanobara magona!”

VARI NAMONA MAREKO NA ETOREATO

Mareko vaġa-foforina gurugari

Mareko arana ta tu Ioane. Ġia tu dia mo Iesu ġena mero gabanana (12) vekaravari ai tarimana ta. Mai Vari Namona tu laġani 64 beiaġo 68 fakari ai ta etoreato, mo tu Iesu emaseto murinai. Mai fefa tu Roma siti ai Petero ġesi ġeġauvei-vegogoto nuġanai etoreato. Iesu ġekorana-iaġiato-ġoi tarimari Roma nuġanai ġetanuto-ġoi tarimari Iesu Varina Namona ekiravara-ginikaurito.

Mareko na ġia gurugana baregona ekira-vararito tu ekirarito, Iesu tu Barau ġena vetuġunaġi-iaġovinina tarimana namo vedaureana e ma ġena vetuġamaġikau (Mareko 10:45). Korana Iesu tu Barau ġena maoro baregona gaburenai eġauveito-ġoi ema ġena guruga mabarari ekorana-iaġirito-ġoi. Moġeri tu Iesu na ġauvei e nuġa-farevaġi veġgari eveirito-ġoi moġerina ġeri ai evaġa-foforirito ġeri.

Mareko ġena toretore tu maiġesina eboioġaiato:

1. Vetuġunaġi tarimana Iesu ġena iaġoma ema everovinato veġgana - karoa 1:1-13
2. Vetuġunaġi tarimana ġena ġauvei - karoa 1:14-13:37
3. Vetuġunaġi tarimana ġena mase - karoa 14-15
4. Vetuġunaġi tarimana ġena varigisi-ġenoġoi ema guba vanuġana ġana ma evaraġeto - karoa 16

Ioane Babatiso ġena ġobata

¹ Iesu Keriso Barau Natuna Varina Namona maiġesina evesinato.

² Peroveta tarimana arana Isaia na etoreato,

“Barau ekirato,

‘Au na ġegu vetuġunaġi tarimana tu batuġu-guineani, ġemu dabara vaġa-maġatana.’

³ Tarima ta tano fakanai ekeani, ekirani,

‘Vereġauka ġena dabara ġoiarevaia,

ġena iaġoma dabarana ġovaġa-maoromaoroa!’ ”

⁴ Moga lorinai Ioane eiāġomato, tano fakanai tarimarima ebatatorito-ġoi e eġobatato-ġoi, tarimarima ġeri rakava ġerina beġene vetuġamaġi-kure e beġene raka-kure, ema babatiso beġene ġabia, Barau na ġeri rakava bene tuġamaġi-fitoġari ġana.

⁵ Tarimarima mabarari Iudea vanuġari na e Ierusalem na ġeiaġoto-ġoi Ioane ġenai. Ġeri rakava ġekiraġi-foforirito-ġoi vau, ebatatorito-ġoi Ioridana ġarukanai.

⁶ Ioane ġena dabuġa tu kamela ġwiri na ġeveiato, ġena gabaġau tu nanigosi kefina, ġana ġaniġani dagarari tu madudu e gode nanuri moġo.

⁷ Eġobatato-ġoi, ekirato, “Tarima ta au murigu na beiaġomani, ġia ġena seġuka na au ġegu seġuka tu evanaġiani. Au maki asi ilaila ġia ġena tamaka varona baruġaiani.

⁸ Au na ġomi tu nanu na ababatisomini, a ġia na tu Iauka Veaġa na bebatatorisomini.”

Ioane na Iesu ebatatorisato

Mataio 3:13-17; Luka 3:21-22

⁹ Mo negai Iesu tu Nasareta, Galilea vanuḡana ta, na eiaḡomato, benamo Ioane na Ioridana ḡarukanai ebabatisoato.

¹⁰ Iesu nanu na eraka-raḡasito nuḡanai, guba eḡitaiato, evekeo-fakato, benamo Iauka Veaḡa pune kavana emariḡoto ḡia ḡenai.

¹¹ Benamo garo ta guba na ekea-riḡoto, ekirato, “Ḡoi tu au Natugu, aura-
vinimuni; ema ḡemu ai aiaku-rakavani maki.”

Satani na Iesu eribaḡaniato

Mataio 4:1-11; Luka 4:1-13

¹² Moḡa murinai Iauka Veaḡa na Iesu tano fakana ḡana etuḡu-iaḡoato.

¹³ Monai ḡaro e boḡi gabana vasivasi (40) etanuto, Satani na eriba ḡaniato-
ḡoi. Ḡia tu boḡa bairi ḡesi ḡetanuto-ḡoi, aneru na ḡenariato-ḡoi.

Iesu ḡena ḡauvei esinaiato Galileai

Mataio 4:12-17; Luka 4:14-15

¹⁴ Ioane ḡediburaiato murinai, Iesu Galilea ḡana eiaḡoto, Barau Varina Namona ea ḡobata iaḡiato-ḡoi.

¹⁵ Eḡobatato, ekirato, “Barau ḡena ḡaro tu varau beraḡasi, ḡena Basileia bevotu, (ḡena veḡitaḡau seḡukana evaḡa-ruḡaiani maiḡa)! Gemi rakava ḡerina ḡovetuḡamaḡi-kure, Vari Namona nuḡami na ḡovaḡa-moḡonia!”

Iesu na tarima vasivasi (4) ekearito, ḡia murinai beḡene raka

Mataio 4:18-22; Luka 5:1-11

¹⁶ Iesu Galilea kou rikina na eraka-iaḡoto-ḡoi nuḡanai, Simona ma tarina Anduru ḡesi eḡitarito, ḡeri reke kou ai ḡefuato, korana ḡia tu maina tarimari.

¹⁷ Benamo Iesu na evaḡa-guruḡarito, ekirato, “Ḡoiaḡoma, murigu ai ḡoma raka, be au na tu tarimarima maina viniri bana vaga-ribami.”

¹⁸ Benamo maoromaoro ḡeri reke ḡeraga-kwanerito, Iesu murinai ḡerakato.

¹⁹ Asi ḡeraka-manaḡato, benamo Iesu na Iakobo (o Iames) Sebedaio, tarina Ioane ḡesi eḡitarito, ḡasi ai ḡeri reke ḡwadareri ḡeturirito-ḡoi;

²⁰ ekearito, benamo ḡia na tamari Sebedaio ma ḡena ḡauvei tarimari ḡesi ḡasi ai ḡeraga-kwanerito, Iesu murinai ḡerakato.

Iauka rakavana na eboroḡiato tarimana

Luka 4:31-37

²¹ Ḡeraka-iaḡoto, Kaperanaumai ḡevotuto. Monai Sabadi ai Iesu Iuda tarimari ḡeri rubu ai eraka-toḡato, benamo evevaḡa-ribato.

²² Ḡia ḡena vevaḡa-riba guruḡari tarimarima na ḡeseḡaḡirito nai, ḡeḡaba-rakavato, korana tu ḡena guruḡa ma seḡukana, dia taravatu ḡevevaḡa-riba iaḡiato-ḡoi tarimari ḡeri guruḡa kavana.

²³ Mo rubu ai tarima ta tu iauka rakavana na eboroḡiato tarimana. Ḡia ekeato, ekirato,

²⁴ “Iesu, Nasareta tarimamu o, kara ḡemai noveia otoni? Ḡoi tu ḡai vaga-rakavama uranai boiaḡoma? Au ribagu ḡoi tu deikara, ḡoi tu Barau ḡena Veaḡa Tarimamu!”

²⁵ Iesu na ekira-ḡoiato, “Gurumu! Ḡia ḡenana noraka-vaḡi!”

²⁶ Benamo iauka rakavana na mo tarima evaḡa-ḡoḡo-ḡoḡoato, benamo ma ḡabana ḡesi eraka-vaḡito.

²⁷ Tarimarima mabarari ḡeḡaba-rakava rakavato, benamo tauḡeri ḡevedanaḡi-vedanaḡito, ḡekirato, “Mai tu kara? Vevaḡa-riba variḡuna? Ḡia

tu ma seġukana na iauka rakavari evaġa-guruġarini, ema garona maki ġeseġaġiani!”

²⁸ Benamo Iesu varina asikauna eraga-rovorovoto Galilea vanuġari mabarari ai.

Iesu na keve tarimari vovoka evaġa-namorito

Mataio 8:14-15; Luka 4:38-39

²⁹ Rubu na ġeraka-rosito murinai, Iakobo (o Iames) ema Ioane ġesi ġeiaġoto, Simona ema Anduru ġeri numai ġea raġekauto.

³⁰ Simona ġena taġama vavinena tu ekeveto, tauġanina eseġukato, be egena-taġoto-ġoi, benamo Iesu ġekira-varaiato.

³¹ Iesu eiaġoto ġenai, ġimanai eġabito, benamo evaġa-tanu vaisiato. Mo keve ekorito, benamo ġia eġuburito.

³² Lavilavi, ġaro eketoto murinai, tarimarima na keve tarimari e iauka rakavari na ġeboroġirito tarimari Iesu ġenai ġeġori-iaġorito.

³³ Vanuġa tarimari mabarari numa ġoiranai ġevegogoto.

³⁴ Iesu na keve irairau tarimari vovoka evaġa-namorito e iauka rakavari ġutumma elai-vaġirito. Iauka rakavari mururi ekourito asi beġene guruġa, korana ġia ribari Iesu.

Iesu Galilea vanuġari ai eġobatato

Luka 4:42-44

³⁵ Boġiboġi rekenai, roġosi bene laġani nai, Iesu evariġisito, tano fakana ġana eiaġoto, ea ġurigurito.

³⁶ Benamo Simona ma karonna ġesi Iesu ġea vetauato,

³⁷ ġea doġariato nai, ġekiraiato, ġekirato, “Tarimarima na tu ġoi ġevetaumuni!”

³⁸ Iesu evaġa-veseto, ekirato, “Vanuġa kavinaġiri ġana si-iaġo. Moġeri ai maki bana ġobata, au ġegu iaġoma korana tu moġa.”

³⁹ Benamo ġia eiaġoto Galilea vanuġari mabarari ġana. Rubu ai eġobatato-ġoi e iauka rakavari elai vaġirito-ġoi.

Lepera tarimana Iesu na evaġa-namoato

Mataio 8:1-4; Luka 5:12-16

⁴⁰ Lepera tarimana ta Iesu ġenai eiaġoto, evetui-tarito, benamo enoġiato, ekirato, “Bema ġoi ourani nai, moġoni boiarevaguni, bovaġa-namoguni riba.”

⁴¹ Iesu na evetuġaiato, ġimana etuġu-iaġoato, eġabi-karaiato, benamo ekirato, “Aurani, be nonamo!”

⁴² Benamo vaġa-sebo lepera na eraga-kwaneato, enamoto.

⁴³ Iesu na evaġa-guruġa gwaġiġiato, ekirato,

⁴⁴ “Mai veġa tarima ta asi bono kira-varaia. Noiaġo, Rubu Veġa verena na bene ġitamu, ema veiareva varevare dagarari Mose na ekiraġiato ilailanai bono vinia. Be tarimarima beġene riba, ġoi tu bonamo.”

⁴⁵ Senaġi ġia tu eiaġoto, mo veġa varina efiuato. Moġesi nai Iesu tu vanuġa tai asi ma eraka-toġato, a tano fakari ai moġo etanuto-ġoi. Senaġina tarimarima gabu irairauri na Iesu tu roġo ġeiaġo-viniato-ġoi.

2

Iesu na rakava etuġamaġi-fitoġarito

1 Ĝaro kotari ĝevanaĝito vau, Iesu Kaperanauma ĝana eĝenoĝoito. Tari-marima na varina ĝeseĝaĝiato Iesu tu numai.

2 Moĝa lorinai tarimarima ĝutuma ĝeĝaru-vegogoto, numa nuĝana ĝevaĝa-vonuato, eiaĝoto ĝatama-boka korana maki asi faka ta. Monai vau Iesu na Vari Namona eĝobata-vinirito,

3 nuĝanai tarima vasivasi (4) na tauĝanina tavi ta emaseto tarimana ta Iesu ĝenai ĝeĝwa-iaĝoato.

4 Tarimarima ĝutuma nai, asi ĝeri dabara Iesu sevina ĝana beĝe raka-kavi iaĝoni. Naima ĝia na Iesu eruĝato iatana ĝuduĝuna ĝeĝiu-vaĝiato vau, keve rakava tarimana ma gedana ĝesi ĝetuĝu-riĝoato Iesu ĝoirana ĝana.

5 Iesu na ĝeri veĝabidadama eĝitaiato nai, ĝia na keve rakava tarimana evaĝa-guruĝaiato, ekirato, "Natugu, ĝemu rakava batuĝamaĝi-fitoĝari."

6 Taravatu ĝevevaĝa-riba iaĝiato-ĝoi tarimari kotari monai tanutaĝori ai, nuĝari ai maĝesi ĝetuĝamaĝito,

7 "Karase nai mai tarima moĝesina ekirani? Ĝia na Barau ekira-fitoĝaiani. Dei na rakava betuĝamaĝi-fitoĝarini? Barau moĝo ĝereĝana!"

8 Iesu ma ribana ĝia kara ĝetuĝamaĝirito-ĝoi nai edanaĝirito, ekirato, "Karase nai maniĝesi ĝotuĝamaĝini?"

9 Aiĝesina baguruĝani tu meraĝa, keve rakava tarimana bavaĝa-guruĝaia, bakira, 'Ĝemu rakava batuĝamaĝi-fitoĝari' banasi, ba bara kiraia, 'Noruĝa-vaisi, ĝemu geda noĝabia, be noraka' barasi?"

10 Au na navaĝa-ĝitami, Tarimarima Natuna tu ma ĝena maoro, rakava betuĝa-maĝi-fitoĝarini mai tanobarai." Ĝia na keve rakava tarimana evaĝa-guruĝaiato, ekirato,

11 "Akiramuni, noruĝa-vaisi, ĝemu geda noĝabia, be numa ĝana noiaĝo!"

12 Maoromaoro eruĝa-vaisito, ĝena geda eĝabiato, tarimarima ĝoirari ai eraka-rosito. Moĝa lorinai mabarari ĝeĝaba-rakava rakavato, Barau ĝevaĝa-raĝeato, ĝekirato, "Maĝesina kavana ta roĝosi tara ĝitaia."

*Iesu takesi gogo tarimari ĝesi ĝeĝaniĝani-vegogoto
Mataio 9:9-13; Luka 5:27-32*

13 Iesu ma eiaĝoto kou rikinai. Tarimarima ĝutuma ĝia ĝenai ĝeiaĝoto, benamo ĝia na evaĝa-ribarito.

14 Iesu eraka-iaĝoto-ĝoi nuĝanai, ĝia na Alfeo natuna arana Levi takesi moniri ĝeĝabito-ĝoi numanai tanutaĝo eĝitaiato, benamo ekiraiato, ekirato, "Murigu ai noma raka." Benamo Levi evariĝisito, Iesu murinai erakato.

15 Iesu Levi ĝena numai eĝani-ĝanito-ĝoi nai, takesi gogo tarimari e vei-rakava tarimari ĝutuma maki Iesu ma ĝena mero ĝesi ĝeĝaniĝani-vegogoto, korana tarimarima vovoka ĝia murinai ĝerakato-ĝoi.

16 Taravatu ĝevevaĝa-riba iaĝiato-ĝoi tarimari, Farisea ĝeri doĝoro tarimari, na Iesu ĝeĝitaiato, takesi gogo tarimari e vei-rakava tarimari ĝesi ĝeĝaniĝani-vegogoto-ĝoi, benamo ĝia na Iesu ĝena mero ĝedanaĝirito, ĝekirato, "Ĝia tu karase nai takesi gogo e vei-rakava tarimari ĝesi ĝeĝaniĝani-vegogoni?"

17 Iesu eseĝaĝito, benamo evaĝa-guruĝarito, ekirato, "Namo tarimari na doketa asi beĝe vetaurini, senaĝina keve tarimari na moĝo. Au aiaĝomato maki dia vei-iobukaiobuka tarimari keakeari, senaĝi vei-rakava tarimari."

*Ĝaniveaĝa
Mataio 9:14-17; Luka 5:33-39*

18 Ĝaro ta Ioane Babatiso ĝena mero e Farisea tarimari ĝeĝani-veaĝato-ĝoi nai, tarima kotari Iesu ĝenai ĝeiaĝoto, benamo ĝedanaĝiato, ĝekirato, “Kara dainai Ioane Babatiso ĝena mero e Farisea tarimari ĝeri mero tu ĝeĝani-veaĝani, senaĝi ĝoi ĝemu mero tu asiĝi?”

19 Iesu na evaĝa-veserito, ekirato, “Ĝomi ĝotuĝamaĝini, veĝaraĝo variĝu tauna ĝatana seviri ai etanuni nuĝanai beĝe ĝani-veaĝani ba? Asiĝina! Veĝaraĝo variĝu tauna ĝatana seviri ai neganai, asi beĝe ĝani-veaĝani.

20 Ĝarona eiaĝomani veĝaraĝo tauna ĝatana ĝerina beĝe ĝabi-veĝitaiani, monai vau beĝe ĝani-veaĝani.

21 Tarima ta na dabuĝa variĝuna veseana dabuĝa guinena ĝesi asi bebani-vegogoani. Bema moĝesina beveiani nai, dabuĝa variĝuna na guinena bedareani, ema vedarena maki bebaregoni.

22 Tarima ta na vine nanuna variĝuna nanigosi kefina guinenai asi besisiani. Bema moĝesina beveiani nai, vine nanuna variĝuna na nanigosi kefina guinena bevei-fakaiani. Vine nanuna e kefi beĝe rakavani. Senaĝi vine nanuna variĝuna nanigosi kefina variĝunai besisiani tu namo.”

Iesu tu Sabadi Verena

Mataio 12:1-8; Luka 6:1-5

23 Sabadi tai Iesu ma ĝena mero ĝesi widi vamokari na ĝeraka-vanaĝito-ĝoi nai, ĝena mero tu rakarakari ai widi ĝebukito-ĝoi.

24 Farisea tarimari na Iesu ĝekiraiato, ĝekirato, “Noĝitari, ĝia kara ĝeveini! Maniĝesi asi beĝene vei Sabadi ai, taravatu.”

25 Iesu na evaĝa-veserito, ekirato, “Davida na kara eveiato guruĝari ĝoiaviato ba asiĝina, ĝia ma karona ĝesi ĝevitorito nai?”

26 Barau ĝena numai eraka-toĝato, Barau ĝoiranai ĝetorerito-ĝoi beredi eĝabito, eĝanito, karona maki evinirito. Mo beredi tu veaĝa veĝata, Rubu Veaĝa vereri ĝereĝari moĝo ĝari. Mo veiĝa tu Abiata Rubu Veaĝa verena baregona ĝena negai eĝorato.”

27 Benamo Iesu na ma ekirarito, ekirato, “Barau na Sabadi eveiato tu tarimarima ĝeri, dia tarimarima eveirito Sabadi ĝena.

28 Moĝesi nai Tarimarima Natuna tu Sabadi Verena.”

3

Ĝima boso tarimana

1 Ĝaro tai Iesu rubu ai ma eraka-toĝato. Ĝima boso tarimana ta tu monai.

2 Tarima kotari maki monai, Iesu ĝeĝita-taĝoato-ĝoi, Sabadi ai mo tarima bevaĝa-namoani ba, beĝene ĝita-kaua, be beĝene vaĝa-bade-iaĝia ĝetato-ĝoi nai.

3 Iesu na ĝima boso tarimana evaĝa-guruĝaiato, ekirato, “Noruĝa-vaisi, tarima mabarari ĝoirari ai noma ruĝa.”

4 Benamo Iesu na edanaĝirito, ekirato, “Aiĝa tu maoro, Sabadi ai veiĝa namori veiveiri namo ba veiĝa rakavari sini veiri? Tana vevaĝa-maĝuri ba tana vaĝivaĝi?”

Senagi ĝia asi ĝeguruĝato.

5 Iesu ma baruna e ma nuĝa-metona ĝesi eĝita-ĝeĝeraĝirito, korona tarimarima ĝenuĝa-bubuto nai. Benamo ĝima boso tarimana ekiraiato, ekirato, “Ĝimamu notuĝu-roroĝotoa.” Ĝimana etuĝu-roroĝotoato, benamo enamoto.

6 Moġa murinai Farisea tarimari rubu na ġeraka-rosito, Heroda murinai ġerakato-ġoi tarimari ġesi ġeboioġa-vegogoto, Iesu kamasi beġe vaġiani dabarana ġevetauato.

Tarimarima ġutuma Galilea kouna rikinai

Luka 6:17-19

7 Iesu ma ġena mero ġesi ġeraka-veġitato, Galilea kouna ġana ġeiaġoto. Tarimarima ġutuma lelevaġi Galilea na ġia murina na ġeiaġoto, ema vovoka lelevaġi maki Iudea na,

8 Ierusalem na, Idumea na, Ioridana ġaruka mo reke na, Taia e Sidono rekeri na ġeiaġoto, korana Iesu varina ġeseġaġiato nai.

9 Tarimarima ġutuma nai, Iesu na ġena mero ekirarito, ġasi misina ta beġene ġabi-torea, tarimarima ġutuma be beġe ruġaruġa-ġauani garina.

10 Iesu na keve tarimari ġutuma evaġa-namorito dainai, keve tarimari mabarari maki ġeġoto-iaġoto, Iesu ġenai beġene veġabi-kau ġana.

11 Iauka rakavari na ġeboroġirito tarimari na ġia ġeġitaiao tu, ġoiranai ġeketo-tarito, ġekoġoto, ġekirato, “Ġoi tu Barau Natuna!”

12 Iesu na evaġa-guruġa gwaġiġirito, asi beġene vaġa-foforia ġia tu deikara.

Iesu na tarima gabanana ruarua (12) eġabi-viriġirito

Mataio 10:1-4; Luka 6:12-16

13 Moġa murinai Iesu ġoro ġana evaraġeto, benamo eura-vinirito tauri ea kearito, benamo ġia ġenai ġeiaġoto.

14 Iesu na tarima gabanana ruarua (12) eġabi-viriġirito, arari apostolo evatorito, ġia beġene kavaia. Benamo ma bene tuġuri, beġene ġobata,

15 ema seġuka beġene ġabi, iauka rakavari beġene lai-vaġiri.

16 Eġabi-viriġirito tarimari tu maġeri: Simona, arana variġuna evatoato Petero;

17 Iakobo (o Iames), Sebedaio natuna, ma tarina Ioane ġesi, arari variġuna evatoato, Boanere, anina tu guba eguruani natuna;

18 Anduru; Filippo; Batolomeo; Mataio; Tomasi; Iakobo (o Iames), Alfeo natuna; Tadeo; Simona, Selote tarimana;

19 ema Iudas Isakariota, ġia tu Iesu berevaiani tarimana.

Iesu ema Belsebul

Mataio 12:24-32; Luka 11:14-23; 12:10

20 Iesu tu numai ma eraġekauto. Tarimarima ġutuma lelevaġi ma ġevegogo-ġenoġoito nai, ġia ma ġena mero ġesi asi ġeri ġaniġani dabarana.

21 Iesu garagarana na varina ġeseġaġiato, benamo ġabigoina ġeiaġoto, korana tarimarima ġekirato, “Ġia tu bebabo!” ġetato nai.

22 Taravatu ġevevaġa-riba iaġiato-ġoi tarimari Ierusalem na ġemariġoto, ġekirato, “Belsebul, (mai tu Satani), iauka rakavari ġeri vere, na ġia eborogiato nai, iauka rakavari elai-vaġirini.”

23 Benamo Iesu na ekea-iaġoma-rito, barabore ai evaġa-guruġarito, ekirato, “Satani na Satani kamasi belai-veġitaiani?”

24 Bema gavamani ta bevetavini, tauġena bevevaġi-vinini nai, mo gavamani asi beruġani riba.

25 Bema doġoro ta bevetavini, tauġena bevevaġi-vinini, mo doġoro maki asi beruġani riba.

26 Bema Satani bevetavini, tauġena bevevaġi-vinini, ġia asi beruġani, senaġi bekorini.

²⁷ Tarima ta na gwada tarimana ġena numai asi beraka-toġani riba, ġena farefare asi beberariani riba, senaġi mo gwada tarimana bebarubaru-guineani vau, ġena numa farefareri beberariani.

²⁸ Moġoni akiramini, tarimarima rakava beġe veini ema Barau beġe kira-fitoġaiani tarimari ġeri rakava mabarari Barau na betuġamaġi-fitoġarini riba.

²⁹ Senaġi tarima ta na Iauka Veaġa bekira-fitoġaiani tarimana, ġena rakava asi betuġamaġi-fitoġaiani, mo rakava tu betanu-vanaġi vanaġini.”

³⁰ Iesu moġesi ekirato, korana tarima kota ġekirato, “Ġia tu iauka rakavana ġia nuġanaġi” ġetato nai.

Iesu sinana ema tarina

Mataio 12:46-50; Luka 8:19-21

³¹ Benamo Iesu sinana ma tarina ġeraġasito. Numa murikanai ġeruġa-tarito, ġevetuġuto, Iesu ġea kiraia, ġema vaġa-guruġaia ġana.

³² Ġia tu tarimarima ġutuma na ġetanu-ġeġeraġiato, benamo ġekiraiato, ġekirato, “Ġoi sinamu e tarimu tu murikai, ġoi ġevetaumuni.”

³³ Iesu na evaġa-veserito, ekirato, “Au sinagu e au tarigu tu deiri?”

³⁴ Benamo ġetanu-ġeġeraġiato tarimari eġitarito, ekirato, “Au sinagu e au tarigu tu maiġeri!”

³⁵ Barau ġena ura ġevairini tarimari tu au tarigu, e au tobagu, ema au sinagu.”

4

Barabore - Iaraġa tarimana na widi ġueri efiurito

¹ Iesu ma ea vevaġa-riba ġenoġoito Galilea kouna rikinaġi. Tarimarima ġutuma lelevaġi na ma ġea vegogo-ġeġeraġiato nai, ġasi ai ma eraġekauto, benamo etanu-tarito. Ġasi kota ġelei-veġitato, a tarimarima tu kou rikina na moġo ġevegogo-iaġoto.

² Iesu na dagara vovoka evaġa-ribarito barabore ai. Ġia ġena vevaġa-riba nuġanaġi ekirato,

³ “Ġoseġaġi! Iaraġa tarimana ta eiaġoto, ġena widi ġueri benea fiuri ġana.

⁴ Efiurito-ġoi nai, kota tu dabarai ġeketoto. Benamo manu ġeiaġomato, ġeġanirito.

⁵ Kotari tu forefore gaburi ai ġeketokauto tano maġiġiri ai. Asikauna ġetubu-raġeto, korana tano iatanai moġo.

⁶ Benamo ġaro eraġekauto nai, ġia ġemaġuġuto, korana lamuri asi ġevariġo-ġitakauto lorinaġi, asikauna ġemaseto.

⁷ Kotari tu ġauġa ġiniġiniri nuġari ai ġeketoto. Benamo ġauġa ġiniġiniri ġetubu-baregato, varovaro dagarari ġetubu-ġaurito e ġetuturarito nai, asi ġeġwato.

⁸ Kotari tu tano namonai ġeketoto, benamo ġetubu-ġinikauto, ġegara-baregato, ġeġwato kotari ġwari tu gabana toitoi (30), kotari tu gabana imaima ma gabanana (60), kotari tu sinau sebona (100).”

⁹ Benamo Iesu ekirato, “Ma seġana tarimana bene seġaġi!”

Kara dainaġi Iesu na barabore ekiraġirito

Mataio 13:10-17; Luka 8:9-10

10 Iesu ġereġana moġo ġaronai, ġena mero gabanana ruarua (12) ma ġia murinai ġerakato-ġoi tarimari kotari tu ġia sevinai ruġa-ġeġeraġi, benamo mo barabore anina ġevedanaġi-iaġiato.

11 Iesu na evaġa-guruġarito, ekirato, “Barau ġena Basileia guruġari vekuretoġari ġomi ġemi ai tu fofori, senaġi murika tarimari tu barabore ai avaġa-guruġarini, korana tu,

12 ‘beġene ġitaia,
senaġi anina asi beġene ribaia,
beġene seġaġia,
senaġi asi beġene tuġamaġi-maoroo,
beġe vetuġamaġi-kureni Barau ġenai,
benamo ġeri rakava betuġamaġi-fitogarinini garina.’ ”

Widi ġueri baraborena anina

Mataio 13:18-23; Luka 8:11-15

13 Benamo Iesu na ma evaġa-guruġarito, ekirato, “Mai barabore anina asi ġoribaiani nai, barabore tari tu kamasi boġo ribarinini?

14 Iaraġa tarimana na Barau ġena guruġa efiuani.

15 Tarima kotari tu widi ġueri dabarai ġeketoni kavana. Guruġa ġeseġaġini nai, Satani na eġabivaġi-ġariġarinini.

16 Tarima kotari tu widi ġueri forefore ai ġeketoni kavana. Guruġa ġeseġaġini nai, ma iakuri ġesi ġeġabi-raġeani.

17 Senaġi guruġa tarima nuġari ai asi ġevetoreni nai, asi ġetanu-maukani. Barau ġena guruġa dainai, nega rakavari ġeġoitaġoni, e ġevanerini, o ġevaġa-midigu midigurini ġarori ai ġia ġenana ġeraka-veġitani.

18 Tarima kotari tu widi ġueri ġauġa ġinininiri nuġari ai ġefiurini kavana. Barau ġena guruġa ġeseġaġiani,

19 senaġi tanobara dagarari tuġamaġiri na, tanobara farefareri ġetuġamaġi-gogogogorini, ema ġeri ura dagarari kotari na Barau ġena guruġa ġelautariani, naima Barau ġena guruġa ġia ġeri ai asi ġwaġwari.

20 Tarima kotari tu widi ġueri tano namonai ġefiurini kavana. Guruġa ġeseġaġiani, ġeġabi-raġeani, tauri ġevetoreni kotari tu gabana toitoi (30), kotari tu gabana imaima ma gabanana (60), kotari tu sinau sebona (100).”

Lamefa betore-kauani

Luka 8:16-18

21 Iesu na ma evaġa-guruġarito, ekirato, “Tarima ta lamefa begabuani nai, ġuro na beġoġoi-tariani o fata gaburenai betoreani? Asigina, toretorena fatanai betore-kauani.

22 Vekuretoġa dagarari mabarari beġe foforini, ġeseġo-ġaurito dagarari mabarari beġe ġabi-fakarini.

23 Ma seġana tarimana bene seġaġi!”

24 Iesu na ma ekirarito, ekirato, “Boġo seġaġirinini guruġari boġono tuġamaġi-ġinikauri. Ġemi seġaġi ilailari ai Barau na riba e tuġamaġi-faka bevinimini. Tuġamaġi-faka kotari ma betore-kaurini.

25 Ma ġena seġaġi tarimana tu tuġamaġi-faka beviniani, asi ġena seġaġi tarimana, ġena tuġamaġi-faka misina maki beġabi-vaġiani.”

Barabore - Widi ġueri tauġeri ġetubuni

26 Iesu ma ekirato, “Barau ġena Basileia tu noġa moġo tarima ta, widi ġueri tano ai efiurini kavana.

²⁷ Ĝia tu boĝi ai egenani, laĝani ai evariĝisini nuĝanai, mo widi ĝueri ĝetubuni, ĝegarani, senaĝina ĝia tu asi ribana kamasi ĝegarani.

²⁸ Tano tauĝena na tauna evaĝa-ĝoraiani. Guine tu gwabena etoreani, gabivau fekana, moĝa murinai tauna etoreani feka nuĝanai.

²⁹ Tauna bekirini nai, bebasiani, korana basibasi ĝarona bevotu.”

Barabore - Mastadi ĝauna ĝutuna

Mataio 13:31-32; Luka 13:18-19

³⁰ Iesu evedanaĝito, ekirato, “Barau ĝena Basileia tu kara ĝesi bita vaĝa-ilailaiani? Kamara barabore na bevaĝa-foforiani?”

³¹ Ĝia tu mastadi ĝauna ĝutuna ta noĝa, tanobarai varovaro dagarari ĝueri mabarari fakari ai ĝia ĝereĝana misina korokoro, tano ai ĝevaroani.

³² Senaĝi tano ai ĝevaroani nai, egara-varaĝeni, varovaro dagarari mabarari fakari ai ĝia moĝo barego vedaurea. Ĝia legana maki baregori ĝetubuni. Monai rovo manuri ĝia legana iauĝanai ĝenuĝini.”

³³ Moĝesina kavana baraboreri asisebo ai Iesu na Barau ĝena guruĝa eĝobata-vinirito-ĝoi, ĝia ĝeri riba e tuĝamaĝi-faka ilailari ai.

³⁴ Ĝena ĝobatai barabore asi eraga-kwanerito-ĝoi, senaĝi ĝena mero moĝo ĝereĝari ai vau, guruĝa aniri mabarari evaĝa-foforirito-ĝoi.

Iesu na iavara e geta o ureure ekira-ĝoirito

Mataio 8:23-27; Luka 8:22-25

³⁵ Mo lavilavi ai Iesu na ĝena mero ekirarito, ekirato, “Siveĝasi-vanaĝi, kou mo rekena ĝana.”

³⁶ Benamo mo tarimarima ĝutuma ĝeraga-kwanerito, ĝena mero na ĝekavaiato Iesu etanu-taĝoto-ĝoi ĝasinai, benamo ĝeĝura-rakaiato. Ĝasi kotari maki ĝia ĝesi.

³⁷ Iavara asi keikeina ta eraĝasito e ureure barego maki ĝasi ai evebubu-ĝurato-ĝoi, ĝasi maki dori evonuto-ĝoi.

³⁸ Iesu tu ĝasi gabinai fila iatanai egenato-ĝoi. Ĝena mero na ĝevaĝoato, ĝekirato, “Vevaĝa-riba tarimamu o, ĝoi tu asi ogarini? Ĝita tu mai taburuni!”

³⁹ Benamo Iesu evariĝisito, iavara ekira-ĝoiato e ureure ekiraiato, “Nodoko, asi noĝareva.” Benamo iavara edokoto e emeĝomeĝo-tarito, asi eĝareva-ĝarevato.

⁴⁰ Iesu na ĝena mero ekirarito, ekirato, “Karase nai ĝogarini? Ĝomi tu roĝo asi ĝemi vegabidadama?”

⁴¹ Ĝia ĝegari-rakava rakavato, benamo tauĝeri ĝevedanaĝi-vedanaĝito, ĝekirato, “Mai tu kamara tarima? Iavara e ureure na maki garona ĝeseĝaĝiani!”

5

Iesu na iauka rakavari na ĝeboroĝiato tarimana evaĝa-namoato

¹ Kou tavi tai ĝea vanaĝito Gerasa (o Gadara) tarimari ĝeri gabu ai.

² Iesu ĝasi na eraka-rigoto-ĝoi nai, iauka rakavana na eboroĝiato tarimana ta gara gabuna na eiaĝomato-ĝoi Iesu ĝenai.

³ Ĝia tu gara kouĝari ai etanuto-ĝoi. Tarimarima ĝia barutarinai ĝeferauto, seini maki ĝia ĝenai asi gwaĝiĝi.

4 Nega ġutuma kwakuna e ġimana seini na ġebarurito-ġoi, senaġi seini edabu-ġuturito-ġoi, ema kwakunai auri dagarari maki elau-kirarito-ġoi. Ġia tu gwada rakava, tarima ta na maki asi bevaġa-maranaiani riba.

5 Boġi e laġani ai ġia tu garai e ġoro tuġuri ai ekoġoto-ġoi ema tauġena maki fore na everamato-ġoi.

6 Ġia na Iesu manaġai eġitaiato, eraga-iaġoto, ġoiranai eketo-tarito,

7 ekoġoto edueto, ekirato, “Iesu o, Iaru-korokoro Barauna Natuna, kara au ġegu ai noveia otoni? Barau aranaġi anoġimuni, asi bono vaġa-midigu midigugu.”

8 Ġia moġesi ekirato, korana Iesu na evaġa-guruġaiato, ekirato, “Iauka rakavamu, mani tarima ġenana noraka-vaġi!”

9 Benamo Iesu na edanaġiato, ekirato, “Ġoi aramu tu deikara?” Ġia evaġa-veseto, ekirato, “Au aragu tu ‘Vetari Tarimari Ġutuma,’ korana ġai tu vovoka.”

10 Ġia na Iesu enoġi-ġiġiraġeato, mo gabu na asi bene lai-rosiri.

11 Monai bai serina ġoro gabakanai ġedokadokato-ġoi.

12 Moġesina nai iauka rakavari na Iesu ġenoġiato, ġekirato, “Notuġuma bai ġeri ai, ġia nuġari ai ġaraka-toġa.”

13 Iesu na etuġu-iaġorito. Benamo iauka rakavari mo tarima ġenana ġeraka-vaġito, bai nuġari ai ġeraka-toġato. Benamo lalaġa na ġekokosi-friġoto, kou ai ġevebora-ġugututo. Mo bai serina nuġanai bai mabarari 2,000 kavana.

14 Bai ġitaġauri tarimari ġeragato, mo vari ġea fiuato vanuġa barana nuġanai e vanuġa keiri ai. Tarimarima ġeraka-rosito, ġeiaġoto mo kara eġorato dagarana ġitaġitana.

15 Iesu ġenai ġeraġasito nai, ġia na mo tarima iauka rakavari vovoka na ġeboroġiato tarimana ġeġitaiato, ma dabuġana e ġena tuġamaġi maki maoro etanu-taġoto-ġoi, benamo ġia mabarari ġegarito.

16 Mo veiġa ġeġorato, ġeġitarito tarimari na iauka rakavari na ġeboroġiato tarimana varina, ema bai variri, tarimarima ġekira-vararito.

17 Benamo ġia na Iesu ġenoġiato, ġeri tano na bene raka-veġita.

18 Iesu ġasi ai eraġekauto-ġoi nai, iauka rakavari ġenana ġeraka-vaġito tarimana na enoġiato, Iesu ġesi bene iaġo etato.

19 Senaġi Iesu na ekiraiato, ekirato, “Noġenoġoi numa ġana e ġemu numa tarimari ġeri ai. Benamo bono kira-varari, Barau na ġemu ai kara beveia ema ġena vevetuġaġwa ġemu ai beġora dagarana.”

20 Benamo ġia eiaġoto Vanuġa Gabanana (10) tanori ai, ea vevari-fiuto, kara Iesu na ġia ġenai eveiato. Benamo tarimarima mabarari ġeġabar-rakavato.

Iesu na kekeni ta ema vavine ta evaġa-namorito

Mataio 9:18-26; Luka 8:40-56

21 Iesu ġasi na ma eġenoġoito kou tavi ta ġana maia. Mo kou rikinai tarimarima ġutuma lelevaġi na ma ġea ġaru-ġeġeraġiato.

22 Rubu ġitaġauna tarimana ta arana Iairo eiaġoto, Iesu eġitaiato nai, kwakuna koranaġi evetui-tarito,

23 ma nuġana mabarana ġesi enoġiato, ekirato, “Au natugu kekenina bekeve-rakava, dori emaseni. Mani ġemu veiġa, noiaġoma, ġimamu iatanai bono tore-kaua, be natugu bene namo!”

24 Benamo Iesu ġia ġesi ġeiaġoto-ġoi nai, tarimarima ġutuma lelevaġi maki ġeġotokauto, ġia na ġeraka-vebibi vebibiato-ġoi.

25 Monai vavine ta, ġena keve tu rara kevena, laġani gabanana ruarua (12) ekeve-iaġiato.

26 Doketa vovoka na muramura ġeviniato-ġoi, senaġi asi enamoto-ġoi. Ġena moni mabarari evaġa-koririto, nenamo ġana, senaġi asi enamoto-ġoi, ġena keve moġo emeto-iaġoto-ġoi.

27 Ġia na Iesu varina eseġaġiato naima eiaġomato, tarimarima ġutuma nuġari na eraka-rokarokato mo Iesu murina! ea raġasito, benamo ġena dabuġai evegabikauto.

28 Korana tu ġia evetuġamaġito, “Ġena dabuġai moġo haveġabikauni nai banamoni.”

29 Benamo rara kevena edokoto, tauġaninai emami-raġiato ġena keve varau ekorito.

30 Mo negai Iesu eribato, ġia ġenana seġuka eraka-vaġito. Benamo tarimarima ġutuma nuġari na eruġa-kureto, evedanaġito, ekirato, “Deikara na au ġegu dabuġa beġabi-karaia?”

31 Ġena mero ġevaġa-veseto, ġekirato, “Noboġeboġe, mai tarimarima tu ġutuma na ġebebesi-karamuni, kamasi tu ma ovedanaġini, okirani, ‘Deikara na beġabi-karagu?’ ”

32 Senaġi Iesu tu roġo eboġeboġeto-ġoi, eġabi-karaiato tarimana eġita-vetauato-ġoi.

33 Mo vavine eriba-maoroto kara ġenai eġorato, benamo ma garina e ma ġoġo-ġoġona ġesi Iesu kwakuna koranai ea vetui-tarito, benamo kara eġorato mabarana ekiraġi-foforirito.

34 Iesu na mo vavine evaġa-guruġaiato, ekirato, “Natugu, ġemu veġabidadama na bevaġa-namomu. Be, ma iakumu ġesi noiaġo, ġemu keve bekori-moġovaġi.”

35 Iesu roġo eguruġato-ġoi nuġanai, rubu ġitaġauna tauna Iairo ġena numa na tarima kotari ġeiaġomato, Iairo ġekiraiato, ġekirato, “Natumu tu bemase. Vevaġa-riba tarimana asi novaġa-vekwaraġia.”

36 Iesu na mo guruġa tu eseġaġi-ġuiriaġiato moġo, benamo rubu ġitaġauna tarimana evaġa-guruġaiato, ekirato, “Asi bono gari, bono veġabidadama moġo.”

37 Benamo Iesu na mabarari ekira-ġoirito, murina na asi beġene iaġo, senaġi Petero, e Iakobo (o Iames), ema tarina Ioane moġo ġia ġesi beġene iaġo.

38 Iairo ġena numai ġeraġasito, benamo Iesu na tarimarima eġitarito, ġeguru-raġeto-ġoi e ġetaġi-guruġa guruġato-ġoi.

39 Benamo Iesu numai eraka-toġato, evaġa-guruġarito, ekirato, “Karase nai ġoguru-raġeni e ġotaġini? Kekeni tu asi bemase, ġia tu egenani moġo.”

40 Senaġina tarimarima na ġerikiriki-iaġiato. Benamo Iesu na etuġu-rosirito, bena kekeni tamana sinana e ġia ġekavaiato tarimari toitoi ġesi moġo kekeni ġevaġa-genaiaġo gabunai ġeraka-toġato.

41 Benamo Iesu na kekeni ġimanai eġabito, evaġa-guruġaiato, ekirato, “Talita kumi!” Mo guruġa anina tu “Kekeni, au na ġoi akiramuni, novariġisi!”

⁴² Benamo kekeni vaġa-sebo evarigisito, erakaorakaoto. Ġia ġena laġani tu gabanana ruarua (12). Mai veiġa eġorato nai, tarimarima ġeġaba-rakava rakavato.

⁴³ Iesu na evaġa-guruġarito, mai veiġa varina asiġina ġinavaġi beġene kiraġia etato, ema ekirarito, mo kekeni beġene ġubua.

6

Iesu Nasareta tarimari na asi ġeġubakauato

¹ Iesu na mo gabu eraga-kwaneato, benamo ġena vanuġa ġana eiaġoto; ġia ġena mero maki murina na ġeiaġoto.

² Sabadi ġaronai Iesu tu rubu ai ma ea vevaġa-ribato, tarimarima ġutuma na ġeseġaġiato tu, ġeġaba-rakavato, ġekirato, “Mai tarima mai riba tu ainana eġabito? Ġena iaunega maki dei na eviniato? Mai nuġa-farevaġi veiġa boruri tu kamasi eveirini ġimana na?”

³ Ġia tu kamuda tarimana, ene? Maria natuna; Iakobo (o Iames), e Iosefa, e Iudas, e Simona kakari, ema tobana maki sevirai iniġeri.” Benamo asi ma evaġa-moġoniato-ġoi.

⁴ Iesu na ekirarito, ekirato, “Peroveta tarimana tu gabu mabarari ai beġe gubakauani, senaġi ġena vanuġa korikori, garagarana, ema ġena numa tarimari, na moġo asi beġe gubakauani.”

⁵ Monai ġia na seġuka veiġari boruri asi eveito, a keve tarimari tu sebosebo moġo iatari ai ġimana etore-kauato, evaġa-namorito.

⁶ Iesu edaradara-rakavato, korana asi ġeri veġabidadama nai.

Iesu ġena mero gabanana ruarua (12) etuġurito

Mataio 10:5-15; Luka 9:1-6

Benamo Iesu ma erakato, eiaġoto vanuġa kotari ai ma ea vevaġa-ribato-ġoi.

⁷ Benamo Iesu na ġena mero gabanana ruarua (12) ekearito, benamo ruari ruari etuġurito, ema seġuka evinirito, iauka rakavari beġene lai-vaġiri ġana.

⁸ Iesu na evaġa-naġirito, ekirato, “Kara ta asi boġono ġabi-kaua ġemi iaġoiġo ai, toġoi moġo. Dura, ġaniġani dagarari e moni maki asi boġono ġwakau.

⁹ Tamaka boġono vei, senaġi sedi ruarua asi boġono vei.”

¹⁰ Ma evaġa-guruġarito, ekirato, “Numa tai boġo raġekauni nai, mo numai moġo boġono tanu, bene iaġo mo, vanuġa boġono raga-kwaneana.

¹¹ Bema vanuġa tai asi beġe ġabi-raġemini e garomi asi beġe seġaġirini nai, boġono raga-kwaneana, kwakumi kauri moġo boġono kwari-ketoketori ġia ġeri kira-sirivaġi vaġa-moġoniri ġana.”

¹² Benamo ġeiaġoto, ġea ġobatato, tarimarima ġeri rakava na beġene vetuġamaġi-kure e beġene raka-kure ġana.

¹³ Iauka rakavari vovoka tarimarima ġerina ġelai-vaġirito, keve tarimari ġutuma maki diġa na ġedaurito, ġevaġa-namorito.

Ioane Babatise ġena mase

Mataio 14:1-12; Luka 3:19-20; 9:7-9

¹⁴ Heroda, Galilea verena, na mai veiġa variri ea seġaġirito, korana Iesu arana gabu mabarana eraga-rovorovoto. Tarima kotari ġekirato, “Ioane Babatise mase na ma bevarigiġi-ġenoġoi. Moġa lorinai mai veiġa baregori mabarari evaġa-foforirini.”

15 Ma kota ġekirato, “Mai tu Elia,” ma kota ġekirato, “Mai tu Peroveta tarimana ta, peroveta tarimari guineri kavana.”

16 Senaġi Heroda eseġaġito nai, ekirato, “Mai tu Ioane Babatiso, au na debana abasi-ġutuato tarimana, mase na ma bevarigiġi-ġenoġoi!”

17 Korana Heroda tauġena evetuġuto, Ioane ġea ġabi-tariato, benamo dibura numai ġebarubaruato, ġebiri-ġauato. Mo veiġa eveiato, korana tu etava-rariato vavinena Herodia, ġia kakana Filipo ġaraġona, bene vaġa-
iakua ġana.

18 Ioane na Heroda evaġa-guruġaiato-ġoi, ekirato, “Ġoi na kakamu ġaraġona boġaraġo-veraria tu asi maoro!”

19 Moġesina nai Herodia na Ioane ebaru-viniato, ġena ura bene vaġia, senaġina asi ġena dabara,

20 korana Heroda na Ioane egari-viniato-ġoi e eġita-ġauato-ġoi. Heroda ribana Ioane tu vei-jobukaiojuka ema veaġa tarimana. Ioane garona eseġaġiato nai, edaradarato-ġoi, senaġi eurato bene seġaġi-vinia.

21 Herodia ġena ġaro namona ta eraġasito. Heroda ġena ġora ġarona vetuġamaġi-iaġina verekona o betdei pati eveiato, ġena veguine-iaġi tarimari baregori, e vetari ġorikauri tarimari, ema Galilea vanuġari ai veguine-iaġi tarimari ekearito.

22 Herodia natuna ġuiatona ema raka-toġato, benamo ebarato nai, Heroda ma ġena varivari tarimari mabarari ġesi evaġa-iakurito. Benamo Heroda na mo ġuiato ekiraiato, ekirato, “Ġoi kara oura-viniani dagarana nokiraġia, benamo bavanimuni.”

23 Benamo ekiraiato, ekirato, “Kara bonoġiguni dagarana bavanimuni, ġegu Basileia tavina bonoġiguni maki bavanimuni.”

24 Benamo eraka-rosito, sinana edanaġiato, ekirato, “Kara banasi?” Sinana na evaġa-veseato, ekirato, “Ioane Babatiso debana, bonosi!”

25 Benamo mo ġuiato ma eraga-ġenoġoito, benamo vere barana Heroda enoġiato, ekirato, “Au auranġi inimoġo Ioane Babatiso debana diġu ai novnigu.”

26 Vere barana ma evetuġamaġi-ġenoġoito, senaġi asi eurato bene kira-sirivaġi, korana ġena varivari tarimari ġoirari ai ekiraġi-toreato bene.

27 Maoromaoro vere barana Heroda na tarima debari ebasi-ġuturito-ġoi tarimana ta etuġato, Ioane debana bene ġwa-iaġomaia ġana. Benamo ġia eiaġoto, Ioane Babatiso dibura numanai debana ebasi-ġutuato.

28 Benamo diġu ai eġwa-ġenoġoiato, benamo mo ġuiato ema viniato. Ġia na sinana eviniato.

29 Ioane ġena mero na mo vari ġeseġaġiato, benamo ġeiaġoto, tauġanina ġea ġabiato, benamo gara gabunai ġea ġuriato.

Iesu na tarima daġara imaima (5,000) eġuburito

Mataio 14:13-21; Luka 9:10-17; Ioane 6:1-13

30 Apostolo tarimari ma ġeġenoġoito Iesu ġenai, benamo kara ġeveito e ġevevaġa-riba iaġirito dagarari mabarari ġekira-varaiato.

31 Iesu na evaġa-guruġarito, ekirato, “Gabu fakana ta ġana si-iaġosi, ġoa iaġaraġi kotuna.” Korana tarimarima vovoka ġeiaġomato-ġoi ema mainana ġeiaġoto-ġoi, be ġia maki asi ilaila beġene iaġaraġi o beġene ġaniġani.

32 Benamo mabarari ġasi tai ġeraġeto, gabu fakana ta ġana ġeiaġoto.

³³ Senaḡi tarimarima ḡutuma na ḡeḡitarito, ḡeribato aiḡana ḡeiaḡoni. Benamo vanuḡa tata tarimarimari mabarari kwakuri na ḡeraka-ragaraga-iaḡoto, mo gabu ai ḡea raḡasi-guineto.

³⁴ Iesu ḡasi na eraka-riḡoto nai, tarimarima vovoka lelevaḡi eḡitarito, benamo evetuḡarito, korana ḡia tu noḡa moḡo mamoe asi ḡitaḡauri tarimana ta noḡa. Benamo ḡia na dagara vovoka evaḡa-ribarito.

³⁵ Elavilavito-ḡoi nai, Iesu ḡena mero ḡia ḡenai ḡeiaḡoto, benamo ḡekirato, “Mai tu gabu fakana e ḡaro maki mo evariḡoni.

³⁶ Notuḡu-rakari, vamoka vei tarimari ḡeri tanu gaburi e vanuḡa kavinaḡiri ḡana ḡeiaḡo, be ḡari ḡaniḡani ḡea voi.”

³⁷ Senaḡi Iesu na evaḡa-veserito, ekirato, “Ḳomi na ḡaniḡani tari ḡoviniri.” Benamo ḡia na ḡedanaḡiato, ḡekirato, “Ḳoi ourani tu ḡaiaḡo, beredi silva moniri sinau ruarua (200) na ḡavoiri, benamo ḡama-ḡuburi otoni?” (Mai tu tarima ta davana ḡue imaima toitoi (8) nuḡanai beḡabini kavana).

³⁸ Iesu na ekirarito, ekirato, “Ḳomi ḡemi ai beredi tu vira manigeri? Ḳoiaḡo, ḡoa ḡitari.” Ḳea ḡitarito, benamo ḡekirato, “Beredi imaima, maḡani-kone ruarua maki.”

³⁹ Iesu na ḡena mero evaḡa-guruḡarito, tarimarima beḡene vareri, doḡoro doḡoro ai ḡauḡa iatari ai beḡene tanutanu-tari.

⁴⁰ Benamo doḡoro loriri ai ḡetanuto, tari sinau sebori (100), tari gabana imaimari (50).

⁴¹ Benamo Iesu na mo beredi imaima e maḡani-kone ruarua eḡabirito, eboḡe-raḡeto, gubai eḡitaiato, Barau evaḡa-namoato vau, beredi etavikirakirarito, benamo ḡena mero evinirito beḡene vareri ḡana. Maḡani-kone ruarua maki moḡesina edudu-ḡutuḡurito.

⁴² Tarimarima mabarari ḡeḡani-maseto.

⁴³ Murinai vau Iesu ḡena mero na beredi kwari e maḡani-kone kwari mabarari ḡevaḡa-vegogo-rito, boseḡa gabanana ruarua (12) ḡevaḡa-vonurito.

⁴⁴ Ḳeḡaniḡanito tauri mabarari tu 5,000.

Iesu nanu iatanai erakato

Mataio 14:22-33; Ioane 6:16-21

⁴⁵ Maoromaoro Iesu na ḡena mero ḡasi ai evaḡa-raḡerito, benamo etuḡu-guinerito kou tavi tai Betesaída ḡana, ma ḡia tu mo tarimarima ḡutuma roḡo etuḡu-lausirito.

⁴⁶ Benamo etuḡu-lausirito murinai, ḡoro ḡana evaraḡeto ḡuriḡuri.

⁴⁷ Emukuna-mukunato-ḡoi nai, ḡasi tu kou nuḡanai, a Iesu tu ḡereḡana tano ai.

⁴⁸ Benamo ḡena mero eḡitarito, ḡevewaraḡi rakavato-ḡoi levai, korana iavara tu ḡoirari na eiaḡomato-ḡoi. Benamo Iesu ḡeri ai eraka-iaḡoto nanu iatana na, ḡasi bene raka-vanaḡia etato. Mo tu horaḡauna 3 ema 6 koloko vefakanai boḡiboḡi rekenai.

⁴⁹ Senaḡi ḡena mero na ḡeḡitaiato, nanu iatanai erakato-ḡoi, ḡetuḡamaḡito, ḡekirato, “Murava ta!” ḡetato. Benamo ḡeḡaba-fouto,

⁵⁰ korana mabarari na ḡeḡitaiato e ḡegari-rakavato.

Senaḡina Iesu na eraga-vaḡa-guruḡarito, ekirato, “Ḳokokore, mai tu au, asi ḡogari!”

⁵¹ Benamo ḡasi ai eraḡekauto, ema iavara maki edokoto. Ḳena mero ḡeḡaba-rakavato,

⁵² korana tu mo beredi evaġa-ġutumarito nuġa-farevaġi veigana anina roġosi ġere tuġamaġi-doġaria, nuġari roġo bubu nai.

Iesu na keve tarimari evaġa-namorito e evaġa-maġuririto Genesareta ai Mataio 14:34-36

⁵³ Benamo ġasi ai kou na ġevanaġito, Genesareta tanonai ġeraġasito. Ġeri ġasi monai ġebaru-tariato.

⁵⁴ Benamo ġasi na ġeraka-vaġito nai, maoromaoro tarimarima na ġeġita-leaiato, ġeribato mo tu Iesu.

⁵⁵ Benamo mo tano mabarana ġeraga-ġauato, benamo ġeri keve tarimari ma gedari ġesi Iesu ainai ġeseġaġiato-ġoi gaburi ġana ġeġwa-iaġorito-ġoi.

⁵⁶ Iesu na eiaġo-vinirito-ġoi gaburi mabarari ai, vanuġa barari ai, vanuġa keiri ai, vamoka vei tarimari ġeri tanu gaburi ai, ġeri keve tarimari maketi gaburi ai ġetorerito-ġoi, benamo ġenoġiato-ġoi, ġena dabuġa rikinai moġo maki beġene veġabikau. Ġeveġabikauto-ġoi tarimari tu ġenamoto-ġoi e ġemaġurito-ġoi.

7

Namo e rakava

¹ Farisea tarimari e taravatu ġevevaġa-riba iaġiato-ġoi tarimari kota Ieruselema na ġeiaġomato, Iesu ġevegogo-ġeġeraġiato.

² Benamo ġena mero ġeġitarito, ġeġaniġanito-ġoi kota ġimari ma “mirori” ġesi, ġimari asi ġeġuririto ġia seneri vereri ġeri vevaġa-naġi ilailanai.

³ Boġono riba, Farisea tarimari e Iuda tarimari mabarari tu asi roġo beġe ġaniġanini, senaġi ġimari roġo beġe ġuriririni murinai vau beġe ġaniġanini. Mai tu ġia seneri vereri na ġevaġa-moġoniato ema ġevei-iaġomaġiato-ġoi veigana.

⁴ Maketi gaburi na beġe iaġomani maki asi roġo beġe ġaniġanini, senaġi beġe veġuriririni vau. Seneri ġeri vevaġa-naġi vovoka kotari maki ġekorana-iaġirito-ġoi, kapusi ġuriririni, ġuro, ketolo [e gEDA maki] ġeġuriririto-ġoi.

⁵ Moġesi nai Farisea tarimari e taravatu ġevevaġa-riba iaġiato-ġoi tarimari na Iesu ġedanġiato, ġekirato, “Karase nai ġemu mero na senera vereri ġeri vevaġa-naġi asi ġekorana-iaġiririni, ġimari ma ‘mirori’ ġesi ġeġaniġanini?”

⁶ Iesu na evaġa-veserito, ekirato, “Isaia na eperoveta-iaġimito ġofaġofa tarimami tu moġoni, maġesi etoreato,

‘Mai besena tu mururi koriri ai moġo au ġegubakauguni ġeri Barau, senaġina ġia nuġari tu manaġa rakava.

⁷ Ġetoma-rakaririgo vini-kavaguni, ġeri vevaġa-riba tu tarimarima ġeri vevaġa-naġi taravaturo, a dia au ġegu!’

⁸ Ġomi na Barau ġena taravatu tu ġoraga-kwanerini, benamo tarimarima ġeri vevaġa-naġi ġekorana-iaġiririni.”

⁹ Iesu na ma ekirarito, “Moġoni, ġomi na Barau ġena taravatu ġotuġamaġi-figaririni, tauġemi ġemi vevaġa-naġi boġono korana-iaġiri ġana.

¹⁰ Mose ekirato, ‘Tamami sinami boġono gubakauri. Dei na tamana o sinana guruġa rakavari eviniani tarimana tu boġono vaġi-masea.’

11 Senaĝi ĝomi ĝokirani, tarima ta na tamana o sinana bevaĝa-guruĝaiani, bekirani, ‘Au na ĝomi asi bavaĝa-kavamini, korana bara vinimi dagarana tu au na Koban aviniani nai.’ Koban anina tu Barau ĝena.

12 Moĝesi veigai ĝomi na tarima ĝokouani, tamana e sinana asi bene vaĝa-kavari ĝana.

13 Ĝomi na senemi ĝeri vevaĝa-naĝi ĝerina Barau ĝena guruĝa asi tauri ai moĝo ĝovaĝa-iaĝorini. Dagara vovoka moĝesi ĝoveirini.”

Tarimarima ĝevaĝa-rakavarini dagarari

Mataio 15:10-20

14 Benamo Iesu na tarimarima ĝutuma ma ekea-vegogorito ĝenai, benamo ekirarito, ekirato, “Mabarami ĝoseĝaĝi ema boĝono riba-maoro.

15 Tarimarima murika na ĝeĝanirini, ĝevariĝoni tarima nuĝari ĝana, dagarari na tarima asi ĝevaĝa-rakavarini, senaĝi tarimarima nuĝari o loruri ĝuturi na ĝemaraĝeni dagarari na vau tarimarima ĝevaĝa-rakavarini. [16 Ma seĝana tarimana bene seĝaĝi!]”

17 Iesu na mai tarimarima ĝutuma eraga-kwanerito, numai eraĝekauto; benamo ĝena mero na mo barabore anina ĝevedanaĝi-iaĝiato.

18 Iesu na evaĝa-guruĝarito, ekirato, “Ĝomi maki asi ĝotuĝamaĝi-fakani? Asi ĝoribani, murika na ĝevariĝoni dagarari na tarimarima asi ĝevaĝa-rakavarini?”

19 Korana mo tu dia loruna na ĝevariĝoni, senaĝina sinaĝena na ĝevariĝoni, be ĝeiaĝoni moĝo.” Moĝa anina tu, ĝia na ĝaniĝani mabarari evaĝa-moĝonirito, asi ĝeri rakava.

20 Benamo ma ekirato, “Kara tarimarima loruna na emaraĝeni, monana tarimarima evaĝa-rakavaiani,

21 korana tarima loruna na tuĝamaĝi rakavari, kima veigari, lema, vaĝivaĝi,

22 vegura-vanaĝi, mata-ĝaniĝani, veigari rakavari mabarari, ĝofaĝofa, mata-boraĝa, mama, vevaĝa-bade, veiavi, vei-babobabo ĝeiaĝomani.

23 Mabarari dagara rakavari, maiĝeri loruna na ĝemaraĝeni, tarima ĝevaĝa-rakavarini.”

Vavine ta ĝena veĝabidadama

Mataio 15:21-28

24 Iesu monana evariĝisito, Taia e Sidono tanori ĝana eiaĝoto. Benamo numa tai ea raĝekau-ĝairito, ĝia asi eurato tarima ta na bene ribaia ĝia tu monai, senaĝi asi ĝena vekuretoĝa dabarana.

25 Vavine ta, natuna ĝuiatona iauka rakavana na eboroĝiato, Iesu varina eseĝaĝiato nai, eiaĝoto, kwakuna koranai evetui-tarito.

26 Mo vavine tu Grik vavinena, Siriafonesia ai emagurito. Benamo ĝia na Iesu enoĝiato, mo iauka rakavana natuna ĝuiatona ĝenana bene lai-vaĝia.

27 Benamo Iesu na ekiraiato, ekirato, “Mero misiri roĝo beĝene ĝani-mase guine, korana asi maoro, mero misiri ĝari ĝaniĝani bita ĝabirini, kwaiva bita fiu-vinirini.”

28 Vavine na ma evaĝa-veŝeato, ekirato, “Vereĝauka, mani tu moĝoni, senaĝi kwaiva maki fata gaburenai mero misiri ĝeĝaniĝanini momori tu ĝeĝanirini.”

29 Benamo ĝia na mo vavine ma evaĝa-guruĝaĝiato, ekirato, “Maniĝesi bovaĝa-veŝe dainai, noĝenoĝoi, iauka rakavana tu natumu ĝenana beraka-vaĝi.”

30 Benamo mo vavine eĝenoĝoito ĝena numa ĝana nuĝanai, natuna ĝuiatona ea doĝariato, ĝena gedai eĝena-taĝoto-ĝoi eĝitaiato, iauka raka-vana tu moĝoni eraka-vaĝito.

Iesu na seĝa-bubu e muru-bubu tarimana evaĝa-namoato

31 Benamo Iesu Taia tanona eraga-kwaneato, Sidono e Vanuĝa Gabanana (10) tanori eraka-vanagirito, Galilea kou ai eragāsito.

32 Benamo tarima kotari na seĝa-bubu e asi eguruĝa-ginikauto-ĝoi tarimana ta ĝeĝabi-iaĝoato, benamo ĝenoĝiato, ĝimana iatanai bene tore-kausa.

33 Benamo Iesu na tarimarima ĝutuma nuĝari na eĝori-veĝitaiato, didina seĝana kouĝanai eduĝi-toĝarito, ekanunuto, benamo meana eĝabi-karaiato.

34 Gubai eboĝe-raĝeto, eiaĝa-raĝeto ma ĝabana ĝesi, ekirato, “Efata!” anina tu “Noĝwa-faka!”

35 Benamo seĝana ĝeĝwa-fakarito, meana everuĝato, eroroĝototo, benamo eguruĝa-ĝitakauto.

36 Iesu na ekirarito, tarima ta asi beĝene kira-varaia, senaĝi ekirarito-ĝoi guruĝari tu asi ĝeseĝaĝiato-ĝoi, ĝia varina tu ĝefiu-rovorovoato-ĝoi.

37 Tarimarima nuĝari ĝefarevaĝi-rakavato, ĝekirato, “Ĝia na dagara mabarari evei-ĝitakaurini, seĝa-bubu tarimari evaĝa-seĝaĝirini, muru-bubu tarimari evaĝa-guruĝarini.”

8

Iesu na tarimarima daĝara vasivasi (4,000) eĝuburito

1 Mo negai tarimarima ĝutuma lelevaĝi ma ĝevegogo-ĝenoĝoito. Ĝia asi ĝari ĝanigani nai, Iesu na ĝena mero ekea-kavirito sevina ĝana, benamo evaĝa-guruĝarito, ekirato,

2 “Au na mai tarimarima avetuĝarini, korana mai tu ĝaro toitoi veĝata au ĝesi maĝeri, nuĝanai tu asi ĝari ĝanigani.

3 Bema au na batuĝu-ĝenoĝoirini ĝeri vanuĝa ĝana ma vitori ĝesi nai, dabarai beĝe borimarini, korana kotari tu gabu manaĝa na ĝeiaĝomato nai.”

4 Benamo ĝena mero na ĝevaĝa-veseato, ĝekirato, “Kamara dabarai tarima ta na mai tarimarima beredi na beĝuburini mai tano fakanai?”

5 Benamo Iesu na edanaĝirito, ekirato, “Ĝomi ĝemi ai beredi tu vira?” Ĝia ĝevaĝa-veseto, ĝekirato, “Imaima ruarua (7).”

6 Iesu na vegogo tarimari evaĝa-guruĝarito, tano ai ĝetanutanu-tari. Benamo beredi imaima ruarua (7) eĝabirito, Barau evaĝa-namoato, ebuki-ĝuturito, ĝena mero evinirito, mo tarimarima ĝoirari ai beĝene toretoretariri ĝana. Benamo moĝesi ĝeveirito.

7 Ĝia ĝeri ai maki maĝani-kone misiri kotari. Iesu na Barau ma evaĝa-namoato, ĝena mero ekirarito, moĝeri maki ĝevareri.

8 Benamo tarimarima ĝeĝani-maseto murinai, Iesu ĝena mero na ĝanigani kwari ĝeĝogorito, boseĝa mabarari imaima ruarua (7) ĝevaĝa-vonurito.

9 Tarimarima mabarari tu 4,000 kavana. Benamo Iesu na etuĝu-rovorovorito,

10 ma ĝia ema ĝena mero ĝesi ĝasi ai ĝeraĝeto, Dalmanuta tanona ĝana ĝeiaĝoto.

*Farisea tarimari ĝeri ura vetoĝa ta guba na bene mariĝo
Mataio 16:1-4*

11 Farisea tarimari kota Iesu ġenai ġeiaġoto, benamo ġedanagi-ribaġaniato. Ġeri ura vetoġa ta guba na bene mariġo.

12 Iesu iaġana eġaniato ma nuġa metona ġesi, benamo ekirato, “Karase nai toma guru tarimari na vetoġa ġeġita-vetaurini? Mogoni akiramini, vetoġa ta asiġina ġinavaġi bavinimini!”

13 Benamo eraga-kwanerito, ġasi ai ma eraġeto, kou tavi ta ġana ea vanaġito.

Farisea tarimari e Heroda

Mataio 16:5-12

14 Iesu ġena mero ġevetuġa-rekwato, ġaniġani asi ġeġabikauto, beredi sebona moġo ġasi ai.

15 Benamo Iesu na esisiba-vinirito, ekirato, “Lorimi boġono vetore, Farisea tarimari e Heroda ġari farao evaġa-tubuani muramurana garina.”

16 Benamo mo guruġa tauġeri fakari ai ġeverori-iaġiato, ġekirato, “Moġesina bekira, korana ġita tu asi ġara beredi nai.”

17 Iesu na eribarito, benamo evaġa-guruġarito, ekirato, “Karase nai beredi ta sevimi ai asiġi guruġana ġoveini? Gomi roġosi boġono riba, roġosi boġono tuġamaġi-faka? Nuġami maki rogo bubu?”

18 Ma matami, senaġi asi ġoġitani? Ma seġami, senaġi asi ġoseġaġini? Asi ġovetuġamaġi-taġoni maki?

19 Au na beredi imaima abuki-ġutuġuturito tarimarima 5,000 ġari nai, beredi kwari ġogogorito tu, boseġa vira ġovaġa-vonurito?” Ġia ġevaġa-veseto, ġekirato, “Gabanana ruarua (12).”

20 “Au na beredi imaima ruarua (7) abuki-ġutuġuturito tarimarima 4,000 ġari nai, beredi kwari ġogogorito tu boseġa vira ġovaġa-vonurito?” Ġia ġevaġa-veseto, ġekirato, “Imaima ruarua (7).”

21 Benamo Iesu na ekirarito, “Ġomi roġosi boġono tuġamaġi-faka?”

Iesu na mata-bubu tauna matana evaġa-iaġiato Betesaida ai

22 Ġia Betesaida ġana ġeiaġoto, benamo tarima kotari na mata-bubu tauna ta Iesu ġenai ġeġori-iaġoato, benamo ġenoġiato, bene ġabi-karaia.

23 Benamo Iesu na mata-bubu tauna ġimanei eġabito, eġori-rosiato vanuġa na, benamo matana ekanunuato, ma ġimana ġenai etore-kaurito, edanaġiato, “Dagara tari oġitarini ba?”

24 Mo tarima eboġe-vaesito, ekirato, “Oi, tarima tari aġitani, senaġina noġa moġo ġau noġa ġerakao-rakaoni.”

25 Benamo Iesu ġimana matanai ma etore-kaurito, benamo eboġeboġe-ġinikauto, dagara mabarari eġita-ġinikaurito.

26 Benamo Iesu na numa ġana etuġu-iaġoato, evaġa-guruġaiato, ekirato, “Vanuġa nuġana na asi bono iaġo.”

Petero na Iesu tu Kerisona ekiraġito

Mataio 16:13-20; Luka 9:18-21

27 Iesu ma ġena mero ġesi Kaisarea Filipi tanona vanuġari ġana ġeiaġoto-ġoi nuġanai, dabarai Iesu na ġena mero edanaġirito, ekirato, “Tarimarima tu kara ġetoni au tu dei?”

28 Ġia ġevaġa-veseto, ġekirato, “Kotari ġekirani tu Ioane Babatiso, ma kotari tu Elia, ma kotari tu peroveta tarimana ta.”

²⁹ Iesu na edanaḡirito, ekirato, “Senāḡi ḡomi tu kara ḡotoni au tu dei?” Petero na evaḡa-veseato, ekirato, “Ḡoi tu Keriso, (Barau na ekiraḡi-toreato vevaḡa-maḡuri tauna).”

³⁰ Benamo Iesu na evaḡa-guruḡarito, tarima ta asi beḡene kira-varaia.

Iesu ḡena mase e variḡisi-ḡenoḡoi guruḡari

Mataio 16:21-28; Luka 9:22-27

³¹ Benamo Iesu na ḡena mero ma evaḡa-ribarito, ekirato, “Tarimarima Natuna tu midigu vovoka roḡo beḡanini. Iuda vereri, e Rubu Veaḡa vereri baregori, e taravatu ḡevevaḡa-riba iaḡiani tarimari na beḡe ruḡaiani; ema beḡe vaḡi-maseani maki, senaḡina ḡaro toitoi murinai mase na ma bevariḡisi-ḡenoḡoini.”

³² Mai guruḡa ekiraḡi-foforiato, benamo Petero na eḡori-veḡitaiato, ekiraḡoiato.

³³ Senaḡi Iesu eruḡa-kureto, ḡena mero eḡitarito, ḡia na Petero ekiraḡoiato, ekirato, “Satani, noraka-veḡita, korana ḡemu tuḡamaḡi tu dia Barau ḡena, senaḡi tarimarima ḡeri moḡo.”

³⁴ Iesu na tarimarima ḡutuma ma ḡena mero ḡesi ekea-vegogorito, benamo evaḡa-guruḡarito, ekirato, “Bema tarima ta eurani au murigu ai bene raka etoni tarimana, tauḡena bene veruḡa, ḡena satauro bene ḡwaia, au murigu ai bene raka.

³⁵ Korana deikara ḡena maḡuri moḡo lorina etoreani tarimana, ḡena maḡuri befitoḡaiani. A deikara au daigu ai e Vari Namona dainai ḡena maḡuri befitoḡaiani tarimana, ḡena maḡuri asi bevei-rekwarekwaiani.

³⁶ Bema tarima ta na tanobara mabarana uranai ḡena maḡuri befitoḡaiani, ḡena namo tu kara ḡia ḡenai?

³⁷ Korana tarima ta ḡena maḡuri efitoḡaiato nai tu, kara na vau ma bevoi-ḡenoḡoiiani?

³⁸ Deikara na au bemaiaka-viniguni ema ḡegu guruḡa bemaiaka-viniani mai veḡura-vaḡi e vei-rakava tarimari ḡoirari ai, ḡia maki Tarimarima Natuna na bemaiaka-viniani ḡena iaḡomai, ḡia Tamana mamana marevana e seḡuka baregona e ma ḡena aneru veaḡari ḡesi beḡe iaḡomani ḡaronai.”

9

¹ Benamo ekirarito, ekirato, “Moḡoni akiramini: Tarima kotari mai ḡeruḡa-taḡoni tu asi roḡo beḡe maseni, beiaḡoni mo, Barau ḡena Basileia ma seḡukana ḡesi beiaḡomani beḡe ḡitaiani.”

Iesu vetoḡana eirauto

Mataio 17:1-13; Luka 9:28-36

² Ḡaro imaima sebona (6) ḡevanaḡito murinai, Iesu na Petero, e Iakobo (o James), ema Ioane eḡabirito, benamo ḡoro baregona tai eḡori-raḡerito. Monai ḡia ḡereḡari moḡo nuḡanai Iesu ḡeḡitaiato, vetoḡana eirauto,

³ ema ḡena dabuḡa ekuro-ḡarogaro, tanobarai tarima ta na asi ilaila moḡesina bevaḡa-kurokuroani.

⁴ Benamo ḡia ḡoirari ai Elia ma Mose ḡefoforito, Iesu ḡesi ḡeguruḡa guruḡato-ḡoi.

⁵ Benamo Petero na Iesu evaḡa-guruḡaiato, ekirato, “Vevaḡa-riba tarimamu o, namo vedaurea ḡita tu maḡera, be fouta toitoi ḡaragari. Ta ḡoi ḡemu, ta Mose ḡena, ta Elia ḡena.”

⁶ Petero asi ribana kara bekiraḡiani, korana ḡia tu ḡegari-rakavato.

7 Benamo magube na ema iauka-taririto, ekumu-gaurito nuḡanai, garo ta magube nuḡana na ekea-rosito, ekirato, “Mai tu au Natugu, aura-viniani; ġia boḡono seḡaḡi-vinia!”

8 Ġia na mo gabu ġeraga-ġita-ġeġeragiatto, senaġi ta asi ġeġitaiato ġia ġesi, Iesu moḡo ġereḡana.

9 Ġoro na ġemariġoto-ġoi nuḡanai, Iesu na evaḡa-guruḡarito, kara ġeġitaiato dagarana tarima ta asi beġene kira-varaia, bene iaḡo mo, Tarimarima Natuna mase na ma bene variġisi-ġenoḡoi.

10 Moḡa lorinai ġena guruḡa fakari ai moḡo etanuto, senaġi ġia fakari ai ġeverorito, mai mase na variġisi-ġenoḡoi anina tu kara.

11 Benamo ġia na Iesu ġedanagiatto, ġekirato, “Karase nai taravatu ġevevaḡa-riba iaġiani tarimari ġekirani, Elia tu beiaḡoma-guineni?”

12 Iesu evaḡa-veseto, ekirato, “Moḡoni, Elia tu beiaḡoma-guineni, dagara mabarari bevaḡa-variġurini. A Tarimarima Natuna guruḡana kamasi ġetoreato midigu vovoka beḡanini e beḡe ġita-fitoḡaiani?”

13 Senaġi akiramini, Elia tu varau eiaḡomato, ema ġeri ura veiġari ġia ġenai varau ġeveirito, ġia guruḡana Buka Veaḡai ġetore-guineato ilailanai.”

*Iesu na iauka rakavana na eboroġiato merona evaḡa-namoato
Mataio 17:14-21; Luka 9:37-43*

14 Gena mero ġeri ai ġevotuto tu, tarimarima ġutuma lelevaġi na ġeruḡa-ġeġeragiatto, ġeġitarito, taravatu ġevevaḡa-riba iaġiato-ġoi tarimari maki ġia ġesi ġeveḡare veḡareto-ġoi.

15 Tarimarima na Iesu ġeġitaiato nai, nuḡari ġefarevaġito, benamo ġenai ġeraga-iaḡoto, ġea vaḡa-namoato.

16 Iesu na edanaġirito, ekirato, “Mai tarima ġesi tu kara veḡare-veḡarena ġoveini?”

17 Benamo tarima ta ġutuma nuḡari na evaḡa-veseto, ekirato, “Vevaḡa-riba tarimamu, au natugu ġoi ġemu ai baḡori-iaḡomaia. Ġia tu muru-bubu iaukana na eboroġiato nai, asi eguruḡani.

18 Ma mai iauka na eḡabiani ġarori ai, tano ekwaraġi-iaġiani. Bokana na kaburoburo ġeraka-rosini, gadikana eveḡara-tarini, tauḡanina egwaḡiḡini. Moḡa lorinai ġoi ġemu mero banoḡiri, mai iauka rakavana ġelai-vaḡia basi, senaġi beḡe lai-kavaia.”

19 Benamo Iesu ekirato, “Asi veḡabidadama tarimami! Ġaro vira au ġomi sevimi ai bana tanu? Ġaro vira bana vevaḡa-gwaḡiḡi vinimi? Ġoḡori-iaḡomaia!”

20 Benamo mo mero Iesu sevina ġana ġeḡori-iaḡoato. Iauka rakavana na Iesu eġitaiato nai, vaḡa-sebo mero evaḡa-ḡoḡo-ḡoḡoato, tano ai eketoto, egena-vebiro vebiroto, bokana na kaburoburo ġeraka-rosito.

21 Iesu na mero tamana edanaġiato, ekirato, “Aitoma mai keve edoḡariato?” Tamana evaḡa-veseto, ekirato, “Mai tu keina na veḡata!”

22 Nega vovoka iauka rakavana na karavai efiu-kauani, ema nanu ai efiu-reiani bene vaḡia ġana. Bema dagara ta boveiiani riba nai, mani ġemu veiḡa, boro vetuḡa-ḡwama, boro vaḡa-kavama.”

23 Benamo Iesu ekirato, “Bema dagara ta boveiiani riba otoni? Barau ġenai eveḡabi-dadamani tarimana dagara mabarari beveirini riba.”

24 Benamo mero tamana asikauna eḡaba-fouto, ekirato, “Au aveḡabidadamani, senaġi ġegu tuḡamaḡi iauvoiauvo noma boroḡia.”

²⁵ Iesu na tarimarima ġutuma ġeraga-vegogoto-ġoi eġitarito nai, ġia na mo iauka rakavana ekira-ġoiato, ekirato, “Muru-bubu e seġa-bubu iaukana, akiramuni, noraka-vaġi, ma nuġanai asi ma bono raka-toġa ġenoġoi!”

²⁶ Benamo iauka rakavana eġaba-fouto, ġia na mero evaġa-ġoġoġoġo rakavaiato, benamo eraka-vaġito. Mero tu ġitaġitana noġa emaseto, moġa lorinai tarimarima ġutuma ġekirato, “Mai tu bemase.”

²⁷ Senaġi Iesu na ġimanai eġabito, einu-vaishiato, benamo eruġa-vaishito.

²⁸ Moġa murinai Iesu numai eraġekauto, ġena mero na vekuretoġai ġedanaġiato, ġekirato, “Karase nai ġai na iauka rakavana asi ilaila baġa lai-vaġia?”

²⁹ Benamo Iesu na evaġa-veserito, ekirato, “Iauka maiġesina lailairi tu kara ta asiġina, senaġina ġauġau [e ġaniveaġa] ġereġana moġo.”

Iesu ġena mase ma ekiraġi-ġenoġoiato

Mataio 17:22-23; Luka 9:43-45

³⁰ Mo gabu ġeraga-kwaneato, Galilea tanona na ġevanaġito. Iesu asi ġena ura tarima ta bene riba ġia tu ainai,

³¹ korana ġena mero evaġa-ribarito, ekirato, “Tarimarima Natuna tu beġe revaianai vau, tarimarima ġimari ai beġe toreani, benamo beġe vaġi-maseani, senaġi beġe vaġiani nai, ġaro toitoi murinai tu ma bevariġisi-ġenoġoini.”

³² Senaġi ġia tu asi ġeriba-maoroto Iesu tu kara ekiraġiato, senaġi asi ma ġedanaġiato, korana ġegarito nai.

Deikara tu barego vedaurea

Mataio 18:1-5; Luka 9:46-48

³³ Kaperanaumai ġeraġasito, benamo Iesu na numa nuġanai vau edanaġirito, ekirato, “Gomi dabarai tu kara ġokiraġiani-ġoi?”

³⁴ Senaġi ġia tu asi ġevaġa-veseto, korana dabarai tu, deikara barego vedaurea ġekiraġiato-ġoi.

³⁵ Iesu etanu-tarito, ġena mero gabanana ruarua (12) ekearito, benamo ekirarito, ekirato, “Dei bene ġuine etoni tarimana tu gabi taunai bene iaġo, ema tarimarima mabarari vetuġunaġiri bene iaġo-vini.”

³⁶ Benamo ġia na mero keina ta eġabiato, ġia fakari ai evaġa-ruġa-tariato, efani-vaishiato, benamo ekirarito, ekirato,

³⁷ “Dei na mero keina maiġesina kavana beġabi-raġeani au aragu ai, ġia na tu au beġabi-raġeguni. Bema tarima ta na au beġabi-raġeguni tu, dia au ġereġagu moġo beġabi-raġeguni, senaġi etuġuguto Barauna maki beġabi-raġeani.”

Deikara na ġita asi bevaġa-rakavarani tarimana tu ġita ġesi

Luka 9:49-50

³⁸ Ioane na Iesu ekiraiato, ekirato, “Vevaġa-riba tarimamu, tarima ta ġaġitaiato, ġoi aramu ai iauka rakavari elai-vaġirito-ġoi, senaġi ġai na ġakira-ġoiato, korana ġia tu dia ġita ġesi taraka-vegogoni.”

³⁹ Iesu na ekirarito, ekirato, “Asi boġono kira-ġoia, korana tarima ta au aragu ai nuġa-farevaġi veġa boruri eveirini tarimana tu, au murigu ai au asi ma bekira-rakavaguni.

⁴⁰ Korana deikara na ġita asi evaġa-rakavarani tarimana tu ġita ġesi.

⁴¹ Moġoni akiramini, tarima ta na nanu kapusina au aragu ai bevinimini, korana ġomi tu Keriso ġena tarima nai, ġia voina tu beġabiani veġata.”

*Tarima ta na mero misina ġena veġabidadama asi bene vaġa-rakavaia
Mataio 18:6-9; Luka 17:1-2*

⁴² “Bema tarima ta na au eġabidadama-viniguni mero misina ta ġena veġabidadama evaġa-rakavaiani, ġia tu bere namo fore baregona ta ġaigonaġi ġere baru-kaua, davarai ġere fiu-reia.

⁴³ Bema ġoi ġimamu na evaġa-rakavamuni nai, bono basi-ġutua. Ġimamu sebonai maġuri vanagivanaġi bono dogaria tu namo, a asi namo ġimamu ruarua karava eġara-vanaġi vanaġini asi ebuseri gabuna ġana boiaġoni. [⁴⁴ Monai ‘dimu na beġe ġani-vanaġi vanaġimini, ema karava asi ebuseri.’]

⁴⁵ Bema ġoi kwakumu na evaġa-rakavamuni nai, bono basi-ġutua. Kwakumu sebonai maġuri vanaġivanaġi bono doġaria tu namo, a asi namo kwakumu ruarua karava eġara-vanaġi vanaġini gabunai beġe fiu-kaumuni. [⁴⁶ Monai ‘dimu na beġe ġani-vanaġi vanaġimini, ema karava asi ebuseri.’]

⁴⁷ Bema ġoi matamu na evaġa-rakavamuni nai, bono ġibo-vaġia. Matamu sebonai Barau ġena Basileiai bono raka-toga tu namo, a asi namo matamu ruarua karava eġara-vanaġi vanaġini gabunai beġe fiu-kaumuni.

⁴⁸ Monai ‘dimu na beġe ġani-vanaġi vanaġimini, ema karava asi ebuseri.’

⁴⁹ Mabarari karava na bedamenarini, beiarevarini.

⁵⁰ Damena tu namo, senaġi bema damena mamina bekorini nai, mamina kamasi ma bovaġa-mamina ġenoġoiani? Nuġami ai damena bene tanu, e ġomi tata karomi ġesi maino nuġanai boġono tanu.”

10

Veġaraġo ruġaruġana

¹ Iesu mo gabu eraga-kwaneato, benamo Iudea tanona ġana eiaġoto, Ioridana ġarukana tavi tai evanaġito. Tarimarima ġutuma lelevaġi ġia ġenai ma ġeiaġoto, benamo eveito-ġoi kavana ma evaġa-ribarito.

² Benamo Farisea tarimari ma ġeiaġoto, benamo ġea danaġi-ġofakauato, ġekirato, “Tau ta ġaraġona befitoġaiani nai, taravatu na beġabiani?”

³ Iesu na ma evaġa-veserito, ekirato, “Mose ġena taravatu nuġanai kara etoni?”

⁴ Ġekirato, “Mose ġena taravatu tu maiġesi ekirani, veġaraġo ruġaruġana fefana betoreani vau, ġaraġona betuġu-rakaiani.”

⁵ Iesu na ekirarito, ekirato, “Mose na mai taravatu etoreato, korana ġomi nuġami tu roġo bubu.

⁶ Senaġina Barau na dagara mabarari eveirito nai, ġia na tarimarima maki eveirito tau e vavine.

⁷ Moġesina nai tau ta na tamana e sinana beraga-kwanerini, ġaraġona ġesi beġe tanuni.

⁸ Benamo ġia tauri ruarua beġe sebonani, moġa lorinai ġia tu dia ruarua, senaġi sebona moġo.

⁹ Moġesi nai dei Barau na evaġa-sebonarito tu, tarima ta na asi ma bene tore-kirari.”

¹⁰ Ma ġeġenoġoito numai, ġena mero na ma ġedanaġiato mo guruġa anina tu kara.

¹¹ Iesu na evaġa-veserito, ekirato, “Deikara na ġaraġona betuġu-rakaiani, vavine ta ma beġaraġoani, ġia tu beveġura-vanaġini.

¹² Vavine maki moġesina, ġia ġaraġona beraga-kwaneani, tau ta na ma beġaraġoani, ġia maki beveġura-vanaġini.”

Iesu na mero misiri evaḡa-namorito

Mataio 19:13-15; Luka 18:15-17

¹³ Tarima kotari na naturi ḡeḡwa-iaḡorito-ḡoi Iesu ḡenai bene ḡabi-karari ḡana, senaḡi ḡena mero na ḡekira-ḡoirito.

¹⁴ Iesu na eḡitarito nai tu ebaruto. Benamo ḡena mero ekirarito, ekirato, “Mani mero misiri ḡeiaḡoma au ḡegu ai, asi ḡolai-ḡoiri, korana Barau ḡena Basileia tu maniḡesina kavana tarimari ḡeri.

¹⁵ Moḡoni akiramini, dei na Barau ḡena Basileia asi beḡabi-raḡeani mero misina na kavana, ḡia Basileiai tu asi beraka-toḡani.”

¹⁶ Benamo Iesu na mero misiri efaḡa-vaisirito, benamo ḡimana iatari ai etore-kaurito, evaḡa-namorito.

Farefare vovoka tarimana

Mataio 19:16-30; Luka 18:18-30

¹⁷ Iesu monana ma evaisi-raḡeto, benamo erakato nuḡanai, tarima ta ḡenai eraga-iaḡoto, benamo ḡoiranai ea vetui-tarito, edanaḡiato, ekirato, “Vevaḡa-riba tarimamu namona, au tu kara haveini vau maḡuri vanaḡivanaḡi baḡabiani?”

¹⁸ Iesu na evaḡa-veseato, ekirato, “Ḡoi tu karase nai au namogu okiraḡini? Tarima ta asi namo, Barau moḡo ḡereḡana.

¹⁹ Taravatu mabarari ma ribamu, ‘Asi bono vaḡivaḡi, asi bono veḡura-vanaḡi, asi bono lema, asi bono vevaḡa-daḡa ḡofaḡofa, asi bono ḡabikuretoḡa, tamamu sinamu bono gubakauri.’”

²⁰ Benamo mo tarima ekirato, “Vevaḡa-riba tarimamu, au tu keigu na beḡoma toma, mani taravatu mabarari akorana-iaḡirini.”

²¹ Iesu na eḡitaiato ma veuravinina ḡesi ekirato, “Dagara sebona moḡo orabuni, noiḡo, ḡemu farefare mabarari noa voivoi-iaḡiri, rabu tarimari bono viniri, benamo gubai tu ma ḡemu farefare; ma bono iaḡoma, murigu ai bonoma raka.”

²² Mo tarima na mai guruḡa eseḡaḡiato nai, ḡoirana evaḡa-gwaḡiḡiato, nuḡana ma metona ḡesi eraka-veḡitato, korana ḡia ḡena farefare tu ḡutuma lelevaḡi.

²³ Benamo Iesu na ḡena mero eḡita-ḡeḡeraḡirito, benamo evaḡa-guruḡarito, ekirato, “Ḡeri farefare vovoka tarimari Barau ḡena Basileiai ḡeri rakatoḡa tu gwaḡiḡi rakava.”

²⁴ Benamo Iesu ḡena mero na mo guruḡa ḡeseḡaḡiato nai, nuḡari ḡefarevaḡito, senaḡi Iesu na ma evaḡa-guruḡa ḡenoḡoirito, ekirato, “Natuḡore, Barau ḡena Basileia rakatoḡana tu gwaḡiḡi rakava.

²⁵ Kamela nila kadarena na bevanagini tu kotuna gwaḡiḡi, senaḡi ḡena farefare vovoka tarimana Barau ḡena Basileiai ḡena rakatoḡa tu gwaḡiḡi rakava.”

²⁶ Benamo ḡena mero nuḡari ḡefarevaḡi-rakavato, benamo ḡevaḡa-guruḡaiato, ḡekirato, “Be deikarari vau maḡuri beḡe ḡabiani?”

²⁷ Iesu na eḡitarito, benamo ekirato, “Tarimarima ḡeri ai tu asi ilaila, senaḡi Barau ḡenai tu ilaila, korana Barau ḡenai dagara mabarari tu ilaila.”

²⁸ Petero na ekiraiato, ekirato, “Ḡoi ribamu, ḡai ḡema dagara mabarari tu ḡaraga-kwanerito, benamo ḡoi murimu ai ḡarakani.”

²⁹ Iesu evaḡa-veseto, ekirato, “Moḡoni akiramini, tarima ta ḡena numa eraga-kwaneato, o tarikakana merori, tobanai, sinana, tamana, natuna e ḡena tano au daigu ai ema Vari Namona dainai,

³⁰ ĝia mai maĝuri nuĝanai ĝena numa, tarikakana merori, tobana, sinana, natuna e tano sinau-sinau beĝoitaĝoni, ema midigumidigu maki; ema ĝaro beiaĝomani nai, maĝuri vanagivanaĝi bedoĝariani.

³¹ Senaĝi tarimarima ĝutuma toma ĝequineni tu beĝe gabini, gabi tarimari tu beĝe guineni.”

Iesu ĝena mase ma ekiraĝi-foforiato

Mataio 20:17-19; Luka 18:31-34

³² Iesu ma ĝena mero ĝesi Ieruselema ĝana ĝevaraĝeto-ĝoi, dabara na ĝeraka-iaĝoto-ĝoi, Iesu tu ĝoirari ai erakato, benamo ĝia ĝeĝaba-rakavato, ema muriri na ĝerakato tarimari maki ĝegarito. Benamo Iesu na ĝena mero gabanana ruarua (12) ma eĝori-veĝitarito, benamo ĝenai kara beĝe ĝorani dagarari ekira-vararito,

³³ ekirato, “Goseĝaĝi, ĝita tu Ieruselema ĝana tavarage ni. Monai Tarimarima Natuna tu Rubu Veaĝa vereri baregori e taravatu ĝevevaĝa-riba iaĝiani tarimari ĝimari ai beĝe toreani. Ĝia na ĝena mase guruĝana beĝe vaĝa-moĝoniani, benamo irau bese (o Roma) tarimari ĝimari ai beĝe toreani.

³⁴ Ĝia na beĝe vaseva-vaseva iaĝiani, beĝe kanunuani, beĝe kwariani e beĝe vaĝi-maseani. Senaĝi ĝaro toitoi murinai ma bevarigisi-ĝenoĝoini.”

Iakobo (o Iames) ma Ioane ĝeri noĝinoĝi

Mataio 20:20-28

³⁵ Benamo Sebedaio natuna, Iakobo ma Ioane, Iesu ĝenai ĝeiaĝoto, benamo ĝekirato, “Vevaĝa-riba tarimamu, ĝai ĝaurani kara baĝa noĝimuni dagarana bono vinima.”

³⁶ Iesu na ekirarito, ekirato, “Kara ĝemi ai bana veia ĝotoni?”

³⁷ Benamo ĝia na ĝevaĝa-guruĝaiato, ĝekirato, “Ĝai ĝaurani, ĝai ta aroribamu rekenai, ma ta tu kaurimu rekenai baĝana tanu ĝoi ĝemu Basileia marevana nuĝanai.”

³⁸ Senaĝi Iesu na ekirarito, ekirato, “Ĝomi tu asi ribami kara ĝonoĝiani. Au na midigu bedina baniuani ĝomi maki boĝo niuni riba? Au beĝe babatisoguni babatisona ĝomi na maki boĝo gabiani riba?”

³⁹ Ma ĝevaĝa-veseto, ĝekirato, “Oi.” Iesu na ekirarito, ekirato, “Moĝoni, au baniuni bedinai ĝomi maki boĝo niuni, ema au beĝe babatisoguni babatisona ĝomi maki beĝe babatisomini.

⁴⁰ Senaĝi aroribagu rekenai o kaurigu ai boĝono tanu ĝotoni tu, dia au na bavaĝa-moĝoniani, a mai tu Barau na eĝabi-torerito tarimari ĝeri.”

⁴¹ Mai guruĝa mero gabanana (10) ĝeseĝaĝiato nai, Iakobo e Ioane ĝebaru-vinirito.

⁴² Benamo Iesu na mabarari ekea-vegogorito, benamo evaĝa-guruĝarito, ekirato, “Ĝomi ribami, irau bese tarimari ĝeri vere na tarimarima ĝedori-naĝinaĝirini, ema ĝeri veguine-iaĝi tarimari baregori na tu ĝeri maoro seĝukari na ĝelaunaĝi-naĝirini.

⁴³ Senaĝi ĝomi fakami ai moĝesina tu asi boĝono vei. Bema ta ĝomi fakami ai bene vere etoni nai tu, ĝomi mabarami vetuĝunaĝimi bene iaĝo-vini,

⁴⁴ ema dei bene guine etoni tarimana, ĝia tu mabarari ĝeri vetuĝunaĝi tarimanai bene iaĝo.

⁴⁵ Korana Tarimarima Natuna eiaĝomato tu, dia tarimarima na ĝia vetuĝunaĝina beĝene iaĝo-vini ĝana, senaĝina ĝia eiaĝomato tu, tarimarima vetuĝunaĝiri bene iaĝo-vini, ema ĝena maĝuri bene tore-taria, tarimarima ĝutuma bene voi-ĝenoĝoiri e bene vaĝa-maĝuriri ĝana.”

Iesu na mata-bubu tarimana Batimeo matana evaġa-namoato

Mataio 20:29-34; Luka 18:35-43

⁴⁶ Ieriko ai ġeraġasito, monana Iesu ma ġena mero e tarimarima ġutuma lelevaġi ġesi Ieriko ma ġeraga-kwaneato nuġanai, Batimeo, mata-bubu e noġivegame tarimana, Timeo natuna, dabara rikinai etanu-taġoto-ġoi.

⁴⁷ Ġia esegaġito Iesu, Nasareta tarimana, tu ġia sevinai, benamo ekea-fouto, ekirato, "Iesu o, Davida natuna, au novetuġa-ġwagu!"

⁴⁸ Tarimarima ġutuma na ġekira-ġoiato, asi bene guruġa ġetato, senaġi ġia ekea-ġiġiraġe ġiġiraġeto-ġoi, "Davida Natuna o, au novetuġa-ġwagu!"

⁴⁹ Iesu eruġa-tarito, benamo ekirato, "Ġokeaia." Benamo ġia na mata-bubu tarimana ġekeaġiato, ġekirato, "Asi bono gari, novariġisi, Iesu na ekeamuni bene."

⁵⁰ Benamo ġena koudi efitoġaġiato, eburi-vaġsito, Iesu sevina ġana eiaġoto.

⁵¹ Benamo Iesu na edanaġiato, ekirato, "Kara ġemu naveia otoni?" Mata-bubu tarimana evaġa-veseto, ekirato, "Vevaġa-riba tarimamu, matagu noma keo-fakaia."

⁵² Benamo Iesu ekirato, "Noiaġo, ġemu veġabidadama na bevaġa-namomu." Benamo asikauna matana enamoto e eboġeboġe-ġinikauto, benamo Iesu murina na dabara na eraka-iaġoto.

11

Iesu ġena rakatoġa Ieruselema ai ġevonevone-raġe viniato

Ioane 12:12-19

¹ Ġeraka-iaġoto-ġoi, Ieruselema ġekavinaġiato-ġoi, ma Betefage e Betania ai ġeraġasito Olive Ġorona rekenai, benamo Iesu na ġena mero ruarua etuġu-ġuinerito,

² ekirarito, ekirato, "Ġoiġo, ġoira vanuġana ġana. Boġo raġasini nai, doniki natuna ta barutarinai boġo ġitaiani, iatanai tarima ta roġosi bene raġe. Boġono ruġaia, benamo boġono ġori-iaġomaia.

³ Bema tarima ta na bedanaġimini, bekirani, 'Ġomi tu karase nai maniġesi ġoveiani?' betoni nai, boġono kiraia, 'Vereġauka na eura-viniani, vau ma betuġu-ġenoġoiani.' "

⁴ Benamo ġerakato, ġeiġoto, doniki natuna ġea ġoiġaġoato numa ta ġoiranai barutari. Ġeruġaġiato-ġoi nuġanai,

⁵ monai ġeruġa-taġoto-ġoi tarimari na ġedanaġirito, ġekirato, "Ġomi tu karase nai mani doniki natuna ġoruġaiani?"

⁶ Benamo ġevaġa-veserito Iesu na ekirarito kavana, vau ġetuġu-rakarito.

⁷⁻⁸ Benamo doniki natuna Iesu ġenai ġeġori-iaġoato, ġeri dabuġa barari doniki doġenai ġeiava-kaurito, benamo Iesu etanukauto. ⁸ Tarimarima ġutuma ġeri dabuġa barari dabarai ġeiavarito. Kota tu ġau lauri boġai ġebasito, benamo dabarai ġetorerito.

⁹ Ġoirai e gabi ai ġerakato tarimari mabarari na ġevone-raġeato-ġoi, ġekirato,

"Hosana, Vereġauka aranai eiaġomani tarimana sivaġa-namoa!

¹⁰ Davida ġita Tamara ġena Basileia eiaġomani, sivaġa-namoa!

Hosana guba tuġunai!"

11 Iesu Ierusalemai eraḡasito nai, Rubu Veaḡa nuḡanai eraka-toḡato, daga mabarari eḡita-vaḡa-ḡaurito. Senaḡi elavilavito nai, ḡia ma ḡena mero gabanana ruarua (12) ḡesi ḡeraka-rosito, Betania ḡana ma ḡeḡenoḡoito.

Iesu na figi ḡauna etovoḡaiato

Mataio 21:18-19

12 Ma elaganito, ḡia na Betania ḡeraga-kwaneato, ḡeraka-iaḡoto-ḡoi nuḡanai, Iesu evitoato.

13 Eboḡeto, figi ḡauna ma launa ta eḡitaiato fakana kota manaḡai, benamo eiagoto, nea ḡitaia ma tauna ba asiḡina. Monai ea raḡasito tu, ḡwana ta asi edoḡariato, launa korina moḡo, korana ḡena ḡwa ḡarona roḡo nai.

14 Benamo Iesu na figi ḡauna ekiraiato, ekirato, “Ḡoi ḡwaḡwamu tarima ta na asi ma beḡaniani, toma beiaḡoni vanaḡivanaḡi!” Mai guruḡa ḡena mero na ḡeseḡaḡiato.

Iesu na Rubu Veaḡa eiarevaiato

Mataio 21:12-17; Luka 19:45-48; Ioane 2:13-22

15 Ierusalemai ḡevotuto, Iesu Rubu Veaḡa nuḡanai eraka-toḡato, benamo voivoi tarimari elai-rosirito. Moni ḡesenisito-ḡoi tarimari ḡeri fata e pune ḡeivoivoi-iaḡirito-ḡoi tarimari ḡeri diḡoka eḡuke-vebuburito.

16 Rubu Veaḡa nuḡana na ḡeri farefare ḡeḡwa-iaḡorito-ḡoi tarimari maki ekira-ḡoirito.

17 Benamo tarimarima evaḡa-ribarito, ekirato, “Buka Veaḡa nuḡanai tu maiḡesi etoreato, Barau ekirato, ‘Au ḡegu numa tu bese irauirau ḡeri ḡuriḡuri numanai beḡe kiragiani,’ senaḡi ḡomi na tu lema tarimari ḡeri gumu gabunai boḡo vaḡa-iaḡoa.”

18 Rubu Veaḡa vereri baregori e taravatu ḡevevaḡa-riba iaḡiatio-ḡoi tarimari na ḡeseḡaḡiatio nai, Iesu beḡene vaḡia dabarana ḡevetauato. Iesu garina ḡeveito-ḡoi, korana tarimarima mabarari na ḡena vevaḡa-riba guruḡari ai ḡeḡaba-rakavato-ḡoi.

19 Elavilavito, benamo Iesu ma ḡena mero ḡesi vanuḡa barana ḡeraga-kwaneato.

Figi ḡauna emaseto

Mataio 21:20-22

20 Boḡiboḡi ai dabara na ma ḡeraka-vanaḡito nuḡanai, mo figi ḡauna ḡeḡitaiato, emarai-ḡosito, ḡokana maki ḡemaseto.

21 Petero na etuḡamaḡi-taḡoato, benamo Iesu ekiraiato, ekirato, “Vevaḡa-riba tarimamu, noḡitaia, ḡoi na mo figi ḡauna otovoḡaiato dagarana tu varau bemase.”

22 Benamo Iesu na evaḡa-veserito, ekirato, “Barau boḡono ḡabidadamavina.

23 Moḡoni akiramini, tarima ta na mai ḡoro bekiraiani, ‘Noveraḡa-raḡe, be davarai noa vefiu-rei,’ benamo nuḡana asi ma bedaradarani, senaḡi bevaḡa-moḡoniani, kara bekiragiani dagarana bemoḡonini nai, mo veḡa tu beḡorani.

24 Moḡa lorinai akiramini, kara boḡo noḡini ḡauḡau ai nai, boḡo vaḡa-moḡonia, boḡo doḡaria, benamo boḡo ḡabiani.

25 Bema ḡoruḡa-tarini, benamo ḡoḡauḡauni nai, rakava boḡono tuḡamaḡi-fitoḡari, bema tarima ta ḡenai ma ḡemi nuḡa meto nai, benamo ḡomi Tamami gubai etanuni na maki ḡemi rakava betuḡamaḡi-fitoḡarini. [26 Senaḡi bema

gomi na tarima ġeri rakava asi boġo tuġamaġi-fitoġarini nai, ġomi Tamami gubai etanuni na maki ġemi rakava asi betuġamaġi-fitoġarini.]”

*Iesu ġena seġuka korana ġedanaġiato
Mataio 21:23-27; Luka 20:1-8*

²⁷ Benamo ġia Ierusalemaj ma ġeraġasito. Monai Iesu Rubu Veaġa nuġanai erakato-ġoi nuġanai, Rubu Veaġa vereri baregori, e taravatu ġevevaġa-riba iaġiato-ġoi tarimari, ema Iuda vereri ġia ġenai ġeiaġoto.

²⁸ Benamo ġedanaġiato, ġekirato, “Kamara maoro ai ġoi na mai veiġa oveirini? Dei na maoro evinimuto?”

²⁹ Iesu na evaġa-veserito, ekirato, “Au na vedanaġi sebona avinimini, boġo vaġa-veaseani nai, au na kamara maoro ai mai veiġa aveirini bakira-varamini.

³⁰ Ioane ġena babatise veiġana tu guba na eiaġomato, ba tarimarima ġerina?”

³¹ Ġia fakari ai ġeverorito, ġekirato, “Bema ġita bita kirani, ‘Barau ġenana’ bita toni nai, ġia bekirani, ‘Karase nai Ioane asi ġovaġa-moġoniatto?’ betoni.

³² Senaġi bema ġita bita kirani, ‘Tarimarima ġerina’ bita toni nai maki asi ilaila.” Ġia tu tarimarima gariri ġegarito, korana ġia ribari, Ioane tu peroveta tarimana korikori.

³³ Moġa lorinai ġia na Iesu ġevaġa-veaseato, ġekirato, “Ġai asi ribama.” Benamo Iesu na ġia maki ekirarito, ekirato, “Au na maki kamara maoro ai mai veiġa aveirini asi bakira-varamini.”

12

Barabore - Vine tavoġana ġitaġauna tarimari rakavari

¹ Iesu na barabore ai ma evaġa-guruġarito, ekirato, “Tarima ta vine tavoġana evaroato, maġuna eġabiato, tano ai vine gigi-gigina gurina ekwa-iatto, tavoġa ġitaġauna numana maki evaġa-ruġaiato. Moġa murinai tavoġa ġitaġauna tarimari ġeri ai ġena tavoġa eraga-kwaneato, benamo erakato gabu ta ġana.

² Vine ġwari (o grapes) ġemaġeto, benamo ġia na ġena vetuġunaġi tauna ta etuġuato tavoġa narinarina tarimari ġeri ai, vine ġwari kota benea ġabi ġana.

³ Senaġi ġeġabi-tariato, benamo ġekwariato vau, ġimana kori ġetuġu-ġenoġoiato.

⁴ Tavoġa biaguna na ġena vetuġunaġi tauna ta ma etuġuato, senaġi ġia tu debana ġekodo-fakaiato e ġevei-maiaka maiakaiato.

⁵ Benamo ta ma etuġuato, senaġi ġevaġi-maseato; ema vetuġunaġi tarimari ġutuma etuġurito, kota tu ġekwaririto, kota tu ġevaġirito.

⁶ Tarima sebona ta tu roġo ġia sevinai, ġia natuna korikori, ġena lalokau merona. Dokonai ġia etuġuato, ekirato, ‘Natugu natuġua, ġia na beġene gubakaua.’

⁷ Senaġi tavoġa ġitaġauna tarimari tauġeri ġeveguruġa-vevinito, ġekirato, ‘Mani tu tavoġa beġaunaiani merona, be siġabia, sivaġia, benamo tavoġa tu ġita ġera.’

⁸ Benamo ġeġabi-tariato, ġevaġiato, vine tavoġana murikanai ġefiu-rosiato.”

⁹ Iesu evedanaĝito, ekirato, “Tavoĝa biaguna na tu kara beveiani? Ĝia beiaĝomani, tavoĝa narinarina tarimari bevaĝi-ĝosirini, benamo vine tavogana tarima irauri tari ma bevinirini.

¹⁰ Ĝomi na mai toretore Buka Veĝai asi ĝoiaviani, iniĝesi ekirani, ‘Fore numari ĝeragarini tarimari na asi ĝeura-viniato ma ĝefitoĝaiato forena tu duĝu forenai eiaĝoto.

¹¹ Mai veĝa maĝa tu Vereĝauka na eveiato, matara na taĝitaiani, ĝitaĝitana irau veĝata.’ ”

¹² Benamo Iuda vereri na Iesu beĝene ĝabia dabarana ĝevetauato, korana ĝia ribari, Iesu na mai barabore tu ĝia ekiraĝirito-ĝoi nai. Senaĝi tarimarima ĝutuma ĝevegogo-taĝoto-ĝoi gariri ĝeveito naima ĝeraga-kwaneato, ĝerakato.

Kaisara, Roma ĝeri vere, ĝena takesi moniri

Mataio 22:15-22; Luka 20:20-26

¹³ Gabivau Farisea tarimari e Heroda murinai ĝerakato-ĝoi tarimari kotari Iesu ĝenai ĝetuĝu-iaĝorito, ĝena guruĝai beĝene vaĝa-vedaĝa-raĝea e beĝene ĝabia ĝana.

¹⁴ Ĝeiaĝomato, benamo Iesu ĝema ribaĝaniato, ĝekirato, “Vevaĝa-riba tarimamu, ĝai ribama ĝoi tu moĝoni vei-jobukaiobuka tarimamu, tarimarima gariri asi oveini. Tarima ĝeri dagi maki asi otuĝamaĝirini, senaĝi ĝoi na moĝoni ai Barau ĝena dabara ovevaĝa-riba iaĝi-ĝitakauani. Novaĝa-ribama, Kaisara, Roma ĝeri vere, ĝenai takesi baĝana dava ba asiĝi? Baĝana vinia ba asi baĝana vinia?”

¹⁵ Senaĝi Iesu na ĝeri ĝofaĝofa eribaiato nai, ekirarito, ekirato, “Karase nai au ĝoribaĝaniguni? Silva monina ta ĝoĝwa-iaĝomaia, nama ĝitaia.”

¹⁶ Benamo ta ĝeĝwa-iaĝomaiato, Iesu na edanaĝirito, ekirato, “Mai tu dei laulauna e dei arana?” Ĝia ĝevaĝa-veseto, ĝekirato, “Kaisara ĝena.”

¹⁷ Iesu na ekirarito, “Kaisara ĝena dagara Kaisara boĝono vinia, Barau ĝena dagara Barau boĝono vinia.” Benamo ĝeĝaba-rakavato ĝia ĝenai.

Variĝisi-ĝenoĝoi guruĝari

Mataio 22:23-33; Luka 20:27-40

¹⁸ Sadukea tarimari kota Iesu ĝenai ĝeiaĝoto. Ĝia ĝeri tuĝamaĝi tu, mase tarimari asi ma beĝe variĝisi-ĝenoĝoini. Benamo Iesu ĝedanaĝiato, ĝekirato,

¹⁹ “Vevaĝa-riba tarimamu, Mose na taravatu ĝai ĝema maĝesina etoreato, ‘Bema tau ta kakana bemaseni, vabuna bemase-kwaneani, ma asi naturi nai, mo tau na kakana vabuna bene ĝaraĝoa, naturi beĝene maĝuri mase tauna ĝena.’

²⁰ Mero mabarari tu imaima ruarua (7). Mero guinena na eĝaraĝoato, ma emaseto asi natuna.

²¹ Mero vaĝa-ruaruana na vabuna ma eĝaraĝoato, senaĝi ĝia maki emaseto asi natuna. Mero vaĝa-toitoina maki moĝesina moĝo.

²² Moĝa nuĝanai ĝia mabarari tu imaima ruarua (7), naturi ta asi ĝevaĝa-ĝoraiato. Dokonai mo vavine maki emaseto.

²³ Variĝisi-ĝenoĝoi ĝaronai mo vavine tu dei ĝaraĝona? Korana ĝia tu tauri 7 na ĝeĝaraĝoato.”

²⁴ Iesu na evaḡa-veserito, ekirato, “Ĝomi tu ḡokerereni, korana Buka Veḡa anina ema Barau ḡena seḡuka asi ribami.

²⁵ Mase na ma beḡe variḡisi-ḡenoḡoini tarimari tu asi ma beḡe veḡaraḡoni. Ĝia tu aneru kavana gubai.

²⁶ Mase na ma beḡe variḡisi-ḡenoḡoini guruḡari Mose ḡena bukai asi ḡoiaviani? Ĝau eḡaraiato varina nuḡanai Barau na Mose ekiraiato, ekirato, ‘Au tu Aberahamo ḡena Barau, Isako ḡena Barau, ema Iakobo ḡena Barau.’

²⁷ Ĝia tu dia mase tarimari ḡeri Barau, senaḡi maḡuri tarimari ḡeri Barau. Ĝomi tu ḡokerere-rakava rakavani!”

Veuravini tu taravatu mabarari evanaḡirito

Mataio 22:34-40; Luka 10:25-28

²⁸ Taravatu ḡevevaḡa-riba iaḡiato-ḡoi tarimana ta eiaḡomato, ḡeri guruḡa-guruḡa eseḡaḡiato, benamo eḡitaiato, Iesu na evaḡa-veḡe ginikaurito nai, edanaḡiato, ekirato, “Taravatu mabarari nuḡari ai aḡa tu barego vedaureana?”

²⁹ Iesu na evaḡa-veḡeato, ekirato, “Barego vedaureana tu maḡa: ‘Isaraela tarimami o, ḡoseḡaḡi, Vereḡauka ḡita ḡera Barau tu Vereḡauka sebona kwariḡutu.

³⁰ Vereḡauka ḡoi ḡemu Barau bono ura-vinia ma nuḡamu mabarana, ma iaukamu mabarana, ma ḡemu tuḡamaḡi mabarana, ma kokoremu mabarana ḡesi.’

³¹ Vaḡa-ruaruana tu maḡa: ‘Sevimu tarimana bono ura-vinia, ḡoi tauḡemu oveura-vinini kavana.’ Taravatu ta na mai taravatu ruarua asi bevanaḡirini.”

³² Taravatu evevaḡa-riba iaḡiato-ḡoi tarimana ma evaḡa-veseto, ekirato, “Veḡa-riba tarimamu, ḡoi ḡemu guruḡa tu moḡoni, Barau tu sebona moḡo, asi ta maia.

³³ Bono ura-vinia ma nuḡamu mabarana, ma ḡemu tuḡamaḡi mabarana, ma gwadamu mabarana, ema sevimu ai etanuni tarimana maki bono ura-vinia, ḡoi tauḡemu oveura-vinini kavana. Maḡa tu barego vedaurea, ginitaḡo dagarari e boubou dagarari mabarari evanaḡirito.”

³⁴ Benamo Iesu na mo tarima ḡena vevaḡa-veḡe eḡitaiato ma iaunegana e ma tuḡamaḡi-fakana ḡesi, benamo ekiraiato, ekirato, “Goi e Barau ḡena Basileia fakami tu asi manaḡa.”

Moḡa murinai tarima ta na asi ma edanaḡiato, korana ḡegarito nai.

Keriso tu Davida natuna ba Davida ḡena Vereḡauka?

Mataio 22:41-46; Luka 20:41-44

³⁵ Iesu Rubu Veḡa nuḡanai evevaḡa-ribato-ḡoi nuḡanai, ekirato, “Tara-vatu ḡevevaḡa-riba iaḡiani tarimari tu kamasi nai Keriso tu Davida natuna ḡetoni?”

³⁶ Davida Iauka Veḡa na riba e tuḡamaḡi-faka eviniato, benamo eguruḡa-foforito, ekirato,

‘Barau na au ḡegu Vereḡauka ekiraiato:

Au ḡimagu aroribana rekenai

noma tanu,

bene iaḡo mo, ḡoi ḡebaru-vinimuni tarimari ḡoi kwakumu gaburenai batorerini.’

³⁷ Davida na Keriso tu ‘Vereḡaukana’ ekiraḡito; kamasi nai Keriso tu Davida natuna?”

*Taravatu ġevevaġa-riba iaġiato-ġoi tarimari ġeri ġofaġofa veġari
Mataio 23:1-36; Luka 11:37-54; 20:45-47*

Tarimarima ġutuma lelevaġi Iesu ġena guruġa ma iakuri ġesi ġeseġaġiato.

³⁸ Ġena vevaġa-riba nuġanai ekirato, “Taravatu ġevevaġa-riba iaġiani tarimari boġono ġita-ġinikauri. Ġia ġeurani dabuġa maukari beġene riġo, maketi ġaburi ai beġene rakao-rakao, tarimarima na beġene vaġa-namori urari ai.

³⁹ Rubu nuġari ai e ġanivegogo ġaburi ai ġeri ura sea namori ai beġene tanu.

⁴⁰ Ġia na vabu ġeri numa e farefare ġevaġa-koririni. Ġeri ġauġau tu mauka kenene, ġeġofaġofani. Ġia tu meto barego vedaurea beġe ġabini.”

*Vabu ġena houbou monina
Luka 21:1-4*

⁴¹ Iesu moni-tore mauġana ġoiranai etanu-tarito, benamo tarimarima moni ġeġurato-ġoi eġitarito. Farefare e moni vovoka tarimari ġutuma moni barari ġeġurato-ġoi.

⁴² Senaġi asi-ġena e asi-ġana vabuna ta eiaġomato, ġena moni misiri ruarua moġo eġura-riġorito, mai tu noġa moġo toea sebona kavana.

⁴³ Benamo Iesu na ġena mero ekearito ġia ġenai, benamo ekirarito, ekirato, “Moġoni akiramini, mai vabu na beġuraia monina na mabarari ġeri vini bevanagiri.

⁴⁴ Korana ġia mabarari ġeri moni vovoka ġerina koturi moġo beġe vini, senaġi mai vabu tu asi ġena-ġana na nuġanai ġenai kara ġetanuni ġena maġuri ai bere vevaġa-kava-iaġiri dagarari mabarari beġurari.”

13

Iesu na vau beġea ġorani dagarari ekiraġirito

¹ Iesu Rubu Veaġa na eraka-rosito-ġoi nai, ġena mero ta na ekiraiato, ekirato, “Vevaġa-riba tarimamu, mai fore asikeikeiri noġitari e mai numa baregori ma marevari maki noġitari.”

² Iesu na evaġa-veaseato, ekirato, “Mai numa baregori oġitarini? Mai fore ta fore ta iatanai asi beġe tanuni, mabarari beġe vare-bubu-riġorini.”

³ Iesu Olive Ġorona tuġunai etanu-taġoto-ġoi, Rubu Veaġa Ierusalemaj eġita-iaġoato-ġoi nuġanai, Petero, e Iakobo (o Iames), e Ioane, ema Anduru na ġedanagiri-ġairiato, ġekirato,

⁴ “Nokira-varama, mai dagara tu aitoma beġe ġorani, ema beġe ġorani nai, kamara vetoġa na bevaġa-foforiani, maniġeri mabarari beġe ġorani?”

⁵ Benamo Iesu na evaġa-veserito, ekirato, “Ġomi lorimi boġono vetore, tarima ta na asi bene ġofami.

⁶ Tarima vovoka au aragu ai beġe iaġomani, beġe kirani, “Tarimana tu au maiġegu!” Tarima ġutuma beġe ġofarini.

⁷ Bema ġomi na vetari o tuari gururi e tuari variri boġo seġaġirini nai, nuġami asi beġene raġe. Maniġeri dagara tu beġe ġorani, senaġi dokona tu asi roġo.

⁸ Tanobara ta tanobara ta ġesi beġe vevaġini, gavamani ta gavamani ta ġesi beġe vetarini. Gabu ġutuma nuġari ai tano beġe iagani, doġe maki beġe ġorani. Mai tu midigu moġo besinaliani, noġa moġo mero keina emaġurini midiguna kavana.

⁹ Tauḡemi boḡono venari-ginikau, korana beḡe ḡabimini, Iuda ḡeri kanisoro tarimari ḡeri ai beḡe ḡori-iaḡomini e rubu nuḡari ai beḡe kwari-mini. Au goḡabi-raḡeguni dainai, gavana e vere barari o kini ḡoirari ai rogo boḡo ruḡani, au vaḡa-moḡonigu ai boḡono iaḡo.

¹⁰ Vari Namona tu tanobara mabarari nuḡari ai beḡe ḡobata-iaḡi guineani.

¹¹ Bema Kota tarimari goirari ḡana beḡe ḡori-iaḡomini nai, kara toma boḡoa kiraḡirini guruḡari asi boḡono nuḡa-vekwaraḡi-iaḡiri. Ḡarona be-raḡasini vau, Barau na kara bevaḡa-ribamini guruḡari boḡono kiraḡiri, korana dia gomi boḡo guruḡani, senaḡi lauka Veaḡa beguruḡani.

¹² Kakana na tarina berevaiani bene mase ḡana, tamana na natuna maki moḡesina beveiani. Naturi na tamari sinari beḡe seḡafore-vinirini ema beḡe vaḡirini.

¹³ Tarimarima mabarari na beḡe iau-rakavamini, korana au ḡoḡabi-raḡeguni nai. Senaḡina deikara bevevaḡa-gwaḡiḡini mo dokona tu be-maḡurini.”

Vevaḡa-gari dagarana befoforini

Mataio 24:15-28; Luka 21:20-24

¹⁴ “Bema ḡomi na dagara rakava vedaureana, vevaḡa-gari dagarana, boḡo ḡitaiani, asi bene ruḡa gabunai beruḡani.” Mai guruḡa beiviani tarimana bene riba maoro anina tu kara. “Benamo deidei Iudeai ḡetanuni tarimari ḡoro ḡana beḡene raga-iaḡo.

¹⁵ Deikara numa tuḡunai etanu-taḡoni tu, asi ma bene raka-toḡa numa nuḡana ḡana ḡena farefare ḡabiḡabiri.

¹⁶ Deikara vamoka nuḡanai maki asi ma bene ḡenoḡoi ḡena koudi ḡabi-ḡabiri.

¹⁷ Mo negai vavine ma baniri e ḡabi-variḡu vavineri kika ma vetuḡari!

¹⁸ Boḡono ḡauḡau, mai dagara asi bene ḡora ḡura e nagure ḡarori ai!

¹⁹ Korana mo negai rakava e midigu barego beḡe raḡasini, Barau na tanobara eveiato beiaḡoma maitoma, rakava e midigu moḡesina asi ḡeḡorani. Ma maiḡa murinai moḡesina kavana ta asi ma beḡorani.

²⁰ Bema Vereḡauka na mo ḡaro rakavari asi bere vaḡa-kubiri, tarima ta asi bere maḡuri riba, senaḡi eḡabi-hidirito tarimari dairi ai, ḡia na ḡarori evaḡa-kubirito.

²¹ Mo negai, bema tarima ta na bekiramini, ‘Ḡoḡitaia, Keriso tu maiḡa!’ o ‘Ḡoḡitaia, ḡia tu iomoḡa!’ betoni nai, asi boḡono vaḡa-moḡonia.

²² Korana tu Keriso ḡofaḡofari e peroveta tarimari ḡofaḡofari beḡe fo-forini, vetoḡa boruri e nuḡa-farevaḡi veḡari beḡe veirini, Barau na eḡabi-viriḡirito tarimari beḡene ḡofa-veḡonuri ḡana.

²³ Moḡesi nai tauḡemi boḡono venari; dagara mabarari tu akiravara-guinemini, aoa roḡosi bene raḡasi nai.”

Tarimarima Natuna ḡena iaḡoma

Mataio 24:29-31; Luka 21:25-28

²⁴ “Senaḡi mo negai, rakava beḡe ḡorani murinai, ḡaro bemukunani e ḡue maki asi bemamani,

²⁵ viḡu guba na beḡe ketoni e guba seḡukari beḡe iagaiagani.

²⁶ Benamo tarima na Tarimarima Natuna beḡe ḡitaiani, magube na beiaḡomani ma seḡuka barana e ma marevana ḡesi.

²⁷ Benamo ḡia na aneru betuḡurini, eḡabi-viriḡirito tarimari beḡe vaḡa-veḡogorini tanobara mabarari na.”

*Barabore - Vevaḡa-riba figi ḡauna ḡenana**Mataio 24:32-35; Luka 21:29-33*

²⁸ “Figi ḡauna ḡenana mai barabore boḡono ribaia: Kabona ḡefori-raḡeni e launa ḡefafani nai, ḡoribani, ḡaro ḡena tora taimina tu bekavināḡi ḡotoni.

²⁹ Moḡa ilailanai, ḡomi maki bema mai dagara beḡe ḡorani boḡo ḡitarini nai, boḡono riba, Tarimarima Natuna tu bekavināḡi ḡatama bokai.

³⁰ Moḡoni akiramini, mai ḡuru asi bekorini, beḡaḡoni mo, mai dagara mabarari beḡe ḡorani.

³¹ Guba e tanobara beḡe rekwa-rekwani, senāḡi au ḡegu guruḡa tu asi beḡe rekwa-rekwani, beḡe tanu-vanaḡi vanaḡini.”

*Ḡaro ema hora tarima ta asi ribana**Mataio 24:36-44*

³² “Senāḡi mo ḡaro ema aoa tu tarima ta asi ribana, e aneru gubai asi ribari, ema Natuna maki asi ribana, senāḡi Tamana ḡereḡana moḡo ma ribana.

³³ Lorimi boḡono vetore, boḡono venari-ginikau, korana asi ribami, aitoma mo aoa beḡaḡasini.

³⁴ Ḡia tu maiḡesina kavana, tarima ta eraka-ḡerevaḡito, ḡena numa eraga-kwaneato, benamo ḡena vetuḡunaḡi tarimari maoro evinirito, tata ḡeri ḡauvei beḡene vei. Ḡatama-boka narinarina tarimana maki ekiraiato, bene rivigāua.

³⁵ Moḡesi nai ḡomi maki tataḡa-taḡo boḡono tanu, korana numa biaguna beḡenoḡoini aoana tu asi ribami, lavilavi ai, ba boḡi nuḡanai, ba kokoroku boḡoḡini ai, ba boḡiboḡi ai.

³⁶ Irau mai moḡo beḡaḡasini, benamo genami ai beḡoitaḡomini ḡesi.

³⁷ Au na kara ḡomi akira-varamini guruḡana tu tarimarima mabarari maki akira-vararini, akirani, “Tataḡa-taḡo boḡono tanu e boḡono venari-ginikau!”

14*Iesu beḡene vaḡia dabarana ḡevetauato Ioane 11:45-53*

¹ Ḡaro ruarua moḡo, benamo Pasova verekona o Iuda tarimari mase aneruna na evanaḡirito asi evaḡirito verekona e asi etubuni faraona verekona beḡe veiani nuḡanai, Rubu Veaḡa vereri baregori e taravatu ḡevevaḡa-riba iaḡiato-ḡoi tarimari na Iesu beḡene ḡabi-lemaiia, benamo beḡene vaḡi-masea dabarana ḡevetauato-ḡoi.

² Senāḡi ḡekirato, “Dia vereko nuḡanai bene ḡora, korana vereko beḡe iaḡoma tarimari ḡia iatana na beḡe burini garina.”

*Vavine ta ḡena veigā namona**Mataio 26:6-13; Ioane 12:1-8*

³ Iesu Betania ai Simona lepera tarimana ḡena numai eḡaniḡanito-ḡoi nuḡanai, vavine ta eraka-toḡato, kavabu namona ta, alabasta forena na ḡeveiato kavabuna, eḡabi-kauato, nuḡanai tu muramura ma bonana namona. Mo muramura tu ḡauḡa arana nad ḡokana na ḡeveito-ḡoi dagarana, ma voina tu varaḡe rakava. Mo vavine na mo kavabu bokana ebota-fakaiato, benamo muramura Iesu debanai ebubuato.

⁴ Ḡia sevinai tarimari kota tu ma nuḡa-metori ḡesi ḡeveguruḡa-vevinito, ḡekirato, “Karase nai mai muramura bonana namona efitoḡa-kavaiani?”

⁵ Bere voivoi-iaĝia, benamo silva moniri sinau toitoi (300) bere ĝoitaĝoa, (mai tu tarima ta davana laĝani ta nuĝanai kavana), benamo asi ĝeri-ĝari tarimari bere viniri.” Benamo ĝia na mo vavine ĝevaneato.

⁶ Senaĝi Iesu ekirato, “Ĝoraga-kwanea! Kara dainai ĝomi na meto ĝoviniani! Mai vavine na tu veiĝa namona au ĝegu ai beveia.

⁷ Asi ĝeri-ĝari tarimari tu ĝomi ĝesi boĝo tanu-vanaĝi vanaĝini, be boĝo urani nai, boĝono vaĝa-kavari. Senaĝi au tu dia ĝaro mabarari ĝomi ĝesi batanuni.

⁸ Mai vavine na tu kara bere veia dagarana beveia, ĝia na au tauĝanigu ai muramura bebubu-ĝuinea gurigurigu ĝana.

⁹ Moĝoni akiramini, Vari Namona beĝe ĝobata-iaĝiani tanobara mabarari nuĝari ai, mai vavine na veiĝa beveia veiĝana maki beĝea kiraĝiani, ĝia tuĝamaĝi-iaĝina.”

Iudas na Iesu erevaiato

Mataio 26:14-16; Luka 22:3-6

¹⁰ Benamo Iudas Isakariota, gabanana ruarua (12) tarimana ta, Rubu Veaĝa vereri baregori ĝeri ai eiagoto, Iesu benea revaia ĝia ĝeri ai ĝana.

¹¹ Benamo ĝia na ĝeseĝaĝiato nai, ĝeiku-rakavato, benamo ĝekira-toreato, moni beĝe viniani. Benamo Iudas na ĝimari ai betore-kauani dabarana ma evetauato-ĝoi.

Iesu ma ĝena mero ĝesi ginitaĝo mamoen a ĝeĝaniato

Mataio 26:17-25; Luka 22:7-14; 22:21-23; Ioane 13:21-30

¹² Ĝaro giniguenai, asi etubuni faraona verekona veiveina e ginitaĝo mamoen a vaĝivaĝina ĝaronai, Iesu ĝena mero ĝevedanaĝito, ĝekirato, “Ĝai tu ainai Pasova verekona baĝana vei-torea, bono ĝania?”

¹³ Benamo Iesu na ĝena mero ruarua etuĝurito, ekirarito, ekirato, “Vanuĝa baregonai boĝono raka-toĝa, benamo tarima ta nanu gwaĝutuna befaĝaiani boĝo ĝoitaĝoani. Murina na boĝono iaĝo.

¹⁴ Benamo beragekauni numanai numa biaguna boĝono vaĝa-guruĝaia, boĝono kira, “Vevaĝa-riba tarimana ekirani: Au ĝegu varivari daiĝutuna tu aiĝa, ĝegu mero ĝesi monai ginitaĝo mamoen a baĝana ĝania?”

¹⁵ Benamo ĝia na daiĝutu baregona ta numa tuĝunai bevaga-ĝitamini iarevatore. Monai boĝono dabaraia ĝita ĝara.”

¹⁶ Benamo mero ĝeiaĝoto, vanuĝa barana nuĝanai ĝeraka-toĝato, Iesu na ekiraĝirito ilailari ai ĝedoĝaririto. Monai vereko ĝeveiato.

¹⁷ Elavilavito, Iesu ma ĝena mero gabanana ruarua (12) ĝesi ma ĝeraĝasito.

¹⁸ Ĝeĝaniĝanito-ĝoi nuĝanai Iesu ekirato, “Moĝoni akiramini, ĝomi ta na au borevaguni, ta au ĝesi ini taĝaniĝani-vegogoni tarimamu ta na.”

¹⁹ Ĝia mabarari nuĝari ma metori ĝesi irau sebori irau sebori na ĝedanaĝiato, ĝekirato, “Moĝoni dia au, ene?”

²⁰ Iesu na ekirarito, ekirato, “Mai tu ĝomi gabanana ruarua (12) fakami ai ta dei au ĝesi diĝu sebonai ĝanaba-riĝoni tarimana.

²¹ Tarimarima Natuna bemaseni, Buka Veaiĝi ĝetoreato ilailanai. Senaĝi Tarimarima Natuna berevaiiani tarimana vetuĝana kekei, asi bere maĝuri tu namo.”

Vereĝauka ĝena ĝanivegogo veaĝana

Mataio 26:26-30; Luka 22:15-20; 1 Korinto 11:23-25

22 Ĝia ĝeĝaniĝanito-ĝoi nuĝanai, Iesu na beredi eĝabiato, Barau evaĝa-namoato, etaviato, evinirito, benamo ekirato, “Ĝoĝabia, mai tu au tauĝanigu.”

23 Ĝia na kapusi ma eĝabiato, evaĝa-namoato murinai evinirito, benamo mabarari na ĝeniuato.

24 Benamo Iesu na ekirarito, ekirato, “Mai tu au raragu, Ginitaĝo Variĝuna evaĝa-moĝoniani, bebebubuni, tarimarima ĝutuma vaĝa-maĝuriri.

25 Moĝoni akiramini, vine nanuna asi ma banu-ĝenoĝoiani, beiaĝoni mo, Barau ĝena Basileiai vau ma banu-ĝenoĝoiani.”

26 Benamo mari ta ĝemariato murinai, ĝeraka-rosito, Olive Ĝorona ĝana ĝeiaĝoto.

Iesu na Petero ĝena vekira-ĝuniĝau ekiraĝi-toreato

Mataio 26:31-35; Luka 22:31-34; Ioane 13:36-38

27 Benamo Iesu na evaĝa-guruĝarito, ekirato, “Ĝomi mabarami ĝemi veĝabidadama au ĝegu ai boĝo raga-kwaneani, korana Buka Veaĝai maĝesi etoreato,

‘Au na mamoe ĝitaĝauri
tarimana bavaĝiani,
benamo mamoe mabarari
beĝe raga-lausini.’

28 Senaĝi au mase na ma bavariĝisi-ĝenoĝoiani murinai, baraka-guineni Galilea ĝana. Monai vau bitana vedoĝari.”

29 Petero ekirato, “Mabarari na ĝeri veĝabidadama ĝoi ĝemu ai beĝe raga-kwaneani, senaĝi au na tu asigina.”

30 Iesu na evaĝa-veseato, ekirato, “Moĝoni akiramuni, toma boĝi koko-roku vaĝa-ruarua roĝosi bene goĝi nuĝanai, ĝoi na au vaĝa-toitoi bokira-ĝuniĝauguni.”

31 Senaĝi Petero eguruĝa-ĝigiraĝeto, ekirato, “Bema ĝoi ĝesi bita mase-vegogoni maki, au na ĝoi tu asi veĝata bakira-ĝuniĝaumuni.” Mabarari moĝesi moĝo ĝekirato.

Iesu eĝaŭgauto Getesemane ai

Mataio 26:36-46; Luka 22:39-46

32 Ĝia gabu arana Getesemane ai ĝea raĝasito, benamo Iesu na ĝena mero evaĝa-guruĝarito, ekirato, “Mainai ĝotanu, au tu naiaĝo, naguriĝuri roĝo.”

33 Benamo Petero, e Iakobo (o Iames), ema Ioane moĝo eĝoririto, ĝia ĝesi ĝeiaĝoto. Moĝa nuĝanai Iesu tauĝanina efarakaiato, egarito, nuĝana maki evekwaragi-toi.

34 Benamo ekirarito, ekirato, “Au nuĝagu na meto asikei eĝwaiiani, dori evaĝiguni; mainai ĝotanu, boĝono venari.”

35 Iesu kota ma eraka-naĝito, tano ai eketo-tarito, benamo Barau enoĝiato, ekirato, bema ma dabara ta moĝa neganai, mai aoa metona ĝenana bene vanaĝi.

36 Ekirato, “Tama, Tamaĝai o, dagara mabarari ĝoi ĝemu ai veiveiri tu ilaila. Mai midigu bedina ĝeguna noma ĝabi-vaĝia. Senaĝi dia au ĝegu ura, ĝoi ĝemu ura moĝo.”

37 Benamo eĝenoĝito nuĝanai tu, ĝena mero genamaseri ai eĝoitaĝo-rito, benamo Petero ekiraiato, ekirato, “Simona, ĝoi tu ogenani? Aoa sebona ta kavana maki asi bovevaĝa-gwaĝigini?

38 Boğono venari, boğono ġauġau, be veribaġani beiaġomani nai, asi boğono moira. Iauka tu moğoni eurani, senaġi tauġani tu emoirani.”

39 Benamo ma eraka-veġitato, ea ġuriġurito, mo ġauġau guruġari guineri ma ea kiraġirito.

40 Ma eġenoġoi-iaġomato nuġanai tu, genamaseri ai ma edoġaririto, korana matari tu gena na eġabi-rakavarito. Ġia asi ribari kamasi beġe vaġa-veseani.

41 Vaġa-toitoina ma eġenoġoito, benamo ekirarito, ekirato, “Ġomi tu roġo ġogenani e ġoiagaraġini? Bevaitovo! Aoana varau beraġasi! Goġitaia, Tarimarima Natuna tu beġe revaia, rakava tarimari ġimari ai beġe torea.

42 Ġovariġisi, be si-iaġosi! Ġoġitaia, au revarevagu tarimana mai beraġasi!”

Iesu tuari tarimari o soldia na ġeġabiato

Mataio 26:47-56; Luka 22:47-53; Ioane 18:3-12

43 Iesu roġo eguruġato-ġoi nuġanai, Iudas, mero gabanana ruarua (12) tauna ta, eraġasito. Tarimarima ġutuma maki ġia ġesi ma ġeri vetari baġari e vevaġi kwariri. Ġia tu Rubu Veaġa vereri baregori, e taravatu ġevevaġa-riba iaġiato-ġoi tarimari, ema Iuda vereri na ġetuġurito.

44 Reva tarimana na vetoġa ta ekiravara-torerito, ekirato, “Baverauani tarimana tu moġa. Boğono ġabi-taria, boğono ġori-iaġoa ġomi ġemi veġitaġau gaburenai.”

45 Iudas eraġasito nai, maoromaoro eiaġoto Iesu ġenai, benamo ekirato, “Vevaġa-riba tarimamu o!” benamo everauato.

46 Benamo tuari tarimari na ġeġabi-tariato, ġedegodegoato.

47 Senaġi monai eruġa-taġoto-ġoi tarimana ta, ġena vetari baġana einuvaġiato, edaveato, benamo Rubu Veaġa verena baregona ġena vetuġunaġi tarimana seġana ebasivaġiato.

48 Iesu na ekirarito, ekirato, “Au tu seġafore doġorona ta aġori-kauani? Be ġomi boġo iaġoma au ġabigabigu tu, ma ġemi vetari baġari e vevaġi kwariri ġesi?”

49 Ġaro mabarari ai au tu ġomi sevimi ai Rubu Veaġa nuġanai avevaġa-ribato-ġoi, senaġi asi ġoġabiguto. A mai tu Buka Veaġai ġetore-guineato guruġana vaġa-moġonina ġana.”

50 Ġena mero mabarari na ġeraga-kwaneato, ġeraka-rovorovoto.

51 Mero variguna ta tu kefina korina, senaġi dabuġa ta na moġo tauġanina eriġo-ġauato, Iesu murinai erakato. Ġia maki ġeġabi-tariato,

52 senaġi ġena dabuġa ġimari ai eraga-kwaneato, kefina kori moġo eraga-kwaraġato.

Iesu kanisoro tarimari ġoirari ai

Mataio 26:57-68; Luka 22:54-55; 22:63-71; Ioane 18:13-14; 18:19-24

53 Ġia na Iesu ġeġori-iaġoato Rubu Veaġa verena baregona ġenai, ema Rubu Veaġa vereri baregori, e Iuda vereri, ema taravatu ġevevaġa-riba iaġiato-ġoi tarimari mabarari ġeraka-vegogoto.

54 Petero na Iesu eraka-ġiuato, senaġi ma fakana eiaġoto mo, Rubu Veaġa verena baregona ġena numa maġuna nuġanai eraka-toġato. Monai gadi tarimari fakari ai ea tanuto, benamo karava na etunuato-ġoi.

55 Rubu Veaġa vereri baregori e Iuda ġeri kanisoro tarimari mabarari na tu Iesu vaġa-masena korana ta ġevetauato, senaġi ta tu asi ġedoġari-ato.

56 Tarimarima ġutuma ġeri ġofaġofa guruġari na ġevaġa-badeato-ġoi, senaġi ġeri guruġa tu asi ġesebonato-goi.

57 Benamo tarima kota ġeruġa-vaesito, benamo mai ġofaġofa guruġari ġekiraġirito, ġekirato,

58 “Ġai tu ġia ġena guruġa baġa seġaġia, bekira, ‘Au na mai tarimarima ġimari na ġeragaġato Rubu Veaġana barovoani, ema ġaro toitoi nuġanai ta ma baragaiani dia ġima veiveina rubuna.’”

59 Senaġi ġia ġeri vevaġa-bade guruġari maki asi sebona.

60 Benamo Rubu Veaġa verena baregona ġoirari ai eruġa-vaesito, benamo Iesu edanaġiato, ekirato, “Ġoi tu asi bovaġa-veseni? Maġeri na ġoi ġevarifju-iaġimuni guruġari tu kamasi?”

61 Senaġi Iesu asi eguruġato, ma asi evaġa-veserito. Benamo Rubu Veaġa verena baregona na ma edanaġi-ġenoġoiato, ekirato, “Ġoi tu Keriso, ġevaġa-namoani Barauna Natuna?”

62 Iesu na evaġa-veaseato, ekirato, “Tarimana au maġeggu! Ġomi na Tarimarima Natuna roġo boġo ġitaiani, Seġuka Barauna ġimana aroribanai betanuni, e guba maguberi iatari na beiaġomani!”

63 Benamo Rubu Veaġa verena baregona na ġena dabuġa edareato, ekirato, “Karase vevaġa-ġita tarimari roġo tavetaurini?”

64 Barau vaġa-rakavana guruġana boġo seġaġia. Ġomi kara ġotoni?” Ġia mabarari ġekirato, “Bene mase moġo.”

65 Benamo kota na ġekanunuato, matana ġekumu-ġauato, ġefaisiato, ġekiraiato, ġekirato, “Ġoi tu peroveta tarimana, be nokiraġia, deikara na bekwarimu?” Benamo gadi tarimari na ġeġabiato, ġimari na ġeforoato.

Petero na Iesu ekira-ġuniġauato

Mataio 26:69-75; Luka 22:56-62; Ioane 18:15-18; 18:25-27

66 Petero roġo numa maġuna nuġanai, Rubu Veaġa verena baregona ġena vetuġunaġi ġuiatori ta eiaġoto.

67 Ġia na Petero karava na etunuato-ġoi eġitaġiato, benamo eġita-ġinikauato, ekiraiato, ekirato, “Ġoi maki Iesu, Nasareta tauna, ġesi orakaoto-ġoi, okavaġato-ġoi.”

68 Senaġi ġia evekira-ġuniġauto, ekirato, “Au asi ribaġu ġoi kara okiraġiani,” benamo eraka-rosito maġu ġatama bokana ġana, benamo kokoroku egogito.

69 Mo vetuġunaġi ġuiatona na ma eġitaġiato, benamo monai ġeruġa-taġoto tarimari ekirarito, ekirato, “Tarimana ta tu maniġa.”

70 Petero ma evekira-ġuniġauto. Nega kotuna evanaġito nuġanai, ġia sevinaġi ġeruġa-taġoto-ġoi tarimari na ġekiraiato, ġekirato, “Moġoni, ġoi maki ġia ġesi ġorakaoto-ġoi tarimamu ta, korana ġoi tu Galilea taumu.”

71 Benamo Petero na ekirarito, ekirato, “Asiġina ġinavaġi, akira-korikorimini, ġomi na ġokiraġiani tarimana au tu asi ribaġu.”

72 Kokoroku vaġa-ruaruana ma egogito, benamo Petero na Iesu ġena guruġa etuġamaġi-doġariato, ekiraiato, “Kokoroku vaġa-ruaruana roġosi bene goġi nai, ġoi na au vaġa-toitoi bokira-ġuniġauguni.” Benamo etaġi-rakava rakavato.

¹ Boĝiboĝi iamoiamo, Rubu Veaĝa vereri baregori, e Iuda vereri, e taravatu ĝevevaĝa-riba iaĝiato-ĝoi tarimari, ema kanisoro tarimari mabarari na ĝevaĝa-moĝoniato. Benamo Iesu ĝebarbaruato, ĝeĝori-iaĝoato, Roma Gavana Pilato ĝea viniato.

² Pilato na edanaĝiato, ekirato, “Ĝoi tu Iuda tarimari ĝeri vere o kini?” Iesu na evaĝa-veseato, ekirato, “Oi, okiraĝiani maniĝa.”

³ Benamo Rubu Veaĝa vereri baregori na Iesu ĝevaĝa-badeato, guruĝa ĝutuma ĝekiraĝirito.

⁴ Pilato na ma edanaĝi-ĝenoĝoato, ekirato, “Ĝoi tu asi bovaĝa-veseni? Noĝitaia, ĝoi iatamu ai tu meto ĝutuma ĝekiraĝirini.”

⁵ Senaĝi Iesu asi eguruĝato, benamo Pilato tu edaradarato.

Pilato na Iesu ĝena mase ekiraĝiato

Mataio 27:15-26; Luka 23:13-25; Ioane 18:38-19:16

⁶ Vanaĝivanaĝi Pasova verekana ĝaronai tu Pilato na ĝia ĝeri dibura numanai etanuni, beĝe kiraĝiani tarimana ta, etuĝu-rosiato-ĝoi.

⁷ Mo laĝani ai tarima ta arana Barabas, ĝia tu dibura numai etanuto tarima kota ĝesi, korana ĝevevaĝito nai, tarima ta ĝevaĝi-maseato.

⁸ Benamo ĝutuma monai ĝevegogoto tarimari Pilato ĝenoĝiato, eveini kavana ma bene vei ĝana.

⁹ Pilato na edanaĝirito, ekirato, “Ĝomi ĝourani au na Iuda tarimami ĝemi vere natuĝu-rosia ba?”

¹⁰ Ĝia ribana, Rubu Veaĝa vereri baregori ĝeri mama dainai, Iesu ĝia ĝimanai ĝetoreato.

¹¹ Senaĝi Rubu Veaĝa vereri baregori na tarimarima nuĝari ĝeĝanirito, Pilato na Barabas bene tuĝu-rosia.

¹² Benamo Pilato na ma edanaĝirito, ekirato, “O mai Iuda tarimami ĝemi vere ĝotoni tu kamasi bana veia?”

¹³ Ĝia ĝefararato, ĝekirato, “Novaĝa-satauroa!”

¹⁴ Pilato na edanaĝirito, ekirato, “Karase nai, kamara veiĝa rakavana eveiato nai?” Senaĝi mabarari ĝefarara-gigitarito, ĝekirato, “Novaĝa-satauroa!”

¹⁵ Pilato ĝena ura mo tarimarima ĝutuma nuĝari bene vaĝa-namori ĝana, ĝia na Barabas etuĝu-rosiato, senaĝi Iesu tu ĝekwariato murinai, evinirito beĝene vaĝa-satauroa ĝana.

Iesu ĝevaseva-vaseva iaĝiato

Mataio 27:27-31; Ioane 19:2-3

¹⁶ Vetari tarimari na Iesu ĝeĝori-iaĝoato gavana ĝena numa nuĝanai, benamo karori mabarari ĝekea-vegogorito.

¹⁷ Benamo dabuĝa kakakakana ĝevaĝa-veiato, debana dagarana ĝau ma giniginina na ĝevatoato, korona noĝa ĝeveiato, benamo Iesu debanai ĝetore-kauato.

¹⁸ Benamo ĝevaĝa-namoato, ĝekirato, “Iuda ĝeri Kini o, ĝaro namona!”

¹⁹ Benamo oro kwarina na debana ĝekwari-ĝenoĝoi ĝenoĝoato-ĝoi, ĝekanunu-kanunuato, ĝevetui-tari viniato, ĝetoma-rakarigo ĝofakau-viniato.

²⁰ Ĝevaseva-vaseva iaĝi-ĝosiato murinai, dabuĝa kakakakana ĝekoki-vaĝiato, ĝena dabuĝa korikorina ma ĝevaĝa-veiato. Benamo ĝeĝori-rosiato beĝene vaĝa-satauroa ĝana.

*Iesu ġevaġa-satauroato**Mataio 27:32-44; Luka 23:26-43; Ioane 19:17-27*

21 Kurene tarimana ta arana Simona, Alesanda e Rufo tamari, gunika vanuġana ta na eiaġomato-ġoi, vetari tarimari na ġelaunaġi-naġiato Iesu ġena satauro neġwaia.

22 Benamo Iesu ġeġori-iaġoato gabu ta arana Golgota ġana, anina tu “Deba Ġavana Gabuna.”

23 Benamo ġia na vine nanuna, midigu vaġa-keina muramurana arana muro ġesi ġebubu-vegogoato, ġeviniato, senaġi asi eniuato.

24 Benamo ġevaġa-satauroato; ġena dabuġa dainai laki ġerena ta ġeveiato, benamo ġevarerito fakari ai.

25 Bogibogi ai horaġauna 9 koloko rekenai ġevaġa-satauroato.

26 Kara koranai ġevaġa-satauroato guruġana satauro iatanai maiġesi ġetoreato, “IUDA TARIMARI ĠERI VERE.”

27 Lema tarimari ruarua maki Iesu ġesi ġevaġa-sataurorito, ta aroribana rekenai, ma ta kaurina rekenai. [28 Monana Buka Veaġai ġetore-guineato guruġana evaġa-moġoniatu, ekirato, “Ġia vei-rakava tarimari ġesi ġeivi-vegogoato.”]

29 Ġeraka vanaġito-ġoi tarimari na guruġa rakavari Iesu ġeviniato-ġoi, debari ġekorakorarito, ġekirato, “Aha, be ġoi okirato Rubu Veaġa borovoani, ġaro toitoi nuġanai ma bovaġa-ruġa ġenoġoiani otato!

30 Satauro tuġuna na noraka-riġo, tauġemu novevaġa-maġuri!”

31 Rubu Veaġa vereri baregori e taravatu ġevevaġa-riba iaġiato-ġoi tarimari na maki fakari ai maiġesi ġevaseva-vaseva iaġiato, ġekirato, “Ġia na tarima boruri evaġa-maġuririto, senaġi tauġena tu asi evevaġa-maġurini!

32 Keriso, Isaraela tarimari ġeri vere, satauro na inimoġo noraka-riġo ġai ġoiramai, be baġana vaġa-moġonimu!” Iesu ġesi ġevaġa-satauro vegogorito tarimari ruarua na maki ġeguruġa-rakava viniato.

*Iesu ġena mase**Mataio 27:45-56; Luka 23:44-49; Ioane 19:28-30*

33 Horaġauna 12 koloko ea ġabiato nai, tanobara mabarana mukuna na eġabi-ġauato; mukuna etanuto, eiaġoto mo, horaġauna 3 koloko.

34 Horaġauna 3 koloko rekenai Iesu eġabato, ekirato, “Eloi, eloi, lama sabaktani?” anina tu, “Au ġegu Barau, au ġegu Barau, kara dainai au boraga-kwanegu?”

35 Iesu sevinaġi ġeruġa-taġoto-ġoi tarimari kota ġeseġaġito, benamo ġekirato, “Ġoseġaġi, Elia ekeaiani.”

36 Benamo tarima ta eragato, nanu erimaiani dagnarana ta eġabiato, vine nanuna mamakina nuġanai efereiatu, gobu lefai egwanu-kauato, benamo eduġi-raġeato Iesu na neniua ġana, ekirato, “Siġitaia, Elia beiaġomani, bema ġabi-riġoani ba?”

37 Benamo Iesu eġaba-fouto murinai emaseto.

38 Benamo Rubu Veaġa nuġanai veaġa lelevaġi daiġutuna kouġauna dabuġana o ketin evedare-kikimato, eruaruato, tuġuna na mo gabigabina.

39 Roma vetari verena Iesu ġoiranai eruġa-taġoto-ġoi, ġena ġaba eseġaġiato e kamasi emaseto eġitaiato, benamo ekirato, “Moġoni veġata, mai tarima tu Barau Natuna!”

⁴⁰ Vavine kotari maki ġemarereto-ġoi, kotuna manaġai ġeruġato, fakari ai tu Maria, Magadala vavinena; e Maria, mai tu Iakobo (o Iames) keina e Iosefa ġesi sinari; ema Salome.

⁴¹ Galileai mai vavine tu Iesu murina na ġerakato-ġoi e ġia vetuġunaġina ġeiaġo-vinto-ġoi. Vavine vovoka ġia ġesi Ierusalemna ġana ġemaraġeto vavineri maki monai.

Iesu ġeguriato

Mataio 27:57-61; Luka 23:50-55; Ioane 19:38-42

⁴² Mo lavilavi ai vereko beġe vei-toreani, Sabadi ġarona roġosi bere ġabia nai.

⁴³ Iosefa, Arimatea vanuġa tarimana, ġematauraiato-ġoi kanisoro fakari ai tarimana ta, Barau ġena Basileia evaġa-nogaiaito-ġoi tarimana, Pilato ġenai eiaġoto, benamo enoġi-ġinikauato, Iesu tauġanina bene ġabia etato.

⁴⁴ Pilato eseġaġito Iesu tu varau emaseto nai, nuġana efarevaġito, benamo vetari verena ekeaiato, edanaġiato, ekirato, “Moġoni, Iesu tu bemase ba?”

⁴⁵ Benamo vetari verena na Iesu ġena mase evaġa-moġoniatu vau, Iesu tauġanina Iosefa eviniato.

⁴⁶ Moġa murinai Iosefa na dabuġa kurokurona namona ta evoiato, benamo Iesu eġabi-riġoato, dabuġa na ekumuato. Gara gabuna fore kouġanai ea tore-toġaiato murinai, fore baregona na ġatama-boka ekure-ġauato.

⁴⁷ Maria, Magadala vavinena, e Maria, Iosefa sinana, na etoreato gabuna ġeġita-kauato.

16

Iesu evariġisi-ġenoġoito

Ioane 20:1-10

¹ Iuda tarimari ġeri Sabadi ekorito murinai, Maria, Magadala vavinena, e Maria, Iakobo (o Iames) sinana, ema Salome muramura ma bonana namona ġevoito, beġene iaġo, Iesu tauġanina beġene daua ġana.

² Fura ġarona ġiniguinena o Sandei ai, boġiboġi ġaro eraġekauto nai, gara ġana ġeiaġoto.

³ Benamo tauġeri moġo ġeverorito-ġoi, ġekirato, “Deikara na mo fore barana gara ġekouġau-iaġiatu tu, dei na toma ea kure-veġitaiani?”

⁴ Senaġi ġeboġe-iaġoto nuġanai, mo fore baregona tu irau ai vetore.

⁵ Ġia gara kouġana nuġanai ġeraka-toġato nai tu, mero variġuna ta ġeġitaiaito, aroriba rekenai etanuto, ġena dabuġa tu kurokuro e mauka kenene, benamo nuġari ġefarevaġi-rakavato.

⁶ Ġia na ekirarito, ekirato, “Asi ġogari, au ribagu ġomi tu Iesu, Nasareta tauna, ġevaġa-satauroato tarimana ġovetauani. Ġia tu bevariġisi-ġenoġoi! Ġia mainai tu asiġina, ġetoreato gabuna ġoma ġitaia.

⁷ Be ġoiġo, ġena mero e Petero boġonoa kira-varari, boġono kira, ‘Iesu tu beġuineni Galilea ġana. Monai vau boġoa ġitaiani evaġa-guruġamito ilailanai.’”

⁸ Benamo mo vavine ġeraka-rosito gara nuġana na, korana nuġari ġefarevaġito e tauġaniri ġeġoġo-ġoġorito-ġoi nai. Tarima ta maki asi ġevaġa-guruġaiaito, korana ġegarito nai.

Maria, Magadala vavinena, na Iesu eġitaiaito

Mataio 28:9-10; Ioane 20:11-18

[9 Fura ġarona giniguinenai, boġi-boġi iamoiamonai, Iesu evarigisi-ġenoġoito, benamo Maria, Magadala vavinena, ġenai efofori-guineto. Ġia ġenana tu iauka rakavari imaima ruarua (7) elai-vaġirito.

10 Ġia eiaġoto, benamo Iesu murina na ġerakato-ġoi tarimari ġeri nuġaraġe e taġitaġi nuġanai ekira-vararito.

11 Heġeġaġiato Iesu tu maġuri, Maria na eġitaiato, senaġi ġena guruġa asi ġevaġa-moġoniatto.

Dabarai tarima ruarua na Iesu ġeġitaiato

Luka 24:13-35

12 Moġa murinai ġia tauri ruarua gabu ta ġana ġeraka-iaġoto-ġoi nuġanai, Iesu ġeri ai efoforito, senaġi vetoġana tu eirauto.

13 Benamo tauri ruarua ġeġenoġoito, karori ġekira-vararito, senaġi ġeri guruġa asi ġevaġa-moġonirito.

Iesu ġena mero ġeri ai efoforito e ġia na seġuka evinirito

Mataio 28:16-20; Luka 24:36-49; Ioane 20:19-23

14 Moġa murinai ġena mero gabanana sebona (11) ġeġaniġanito-ġoi nuġanai, ġeri ai efoforito, evanerito, korana asi ġeri veġabidadama e ġeri nuġa-gwaġiġi dainai, korana mase na evarigisi-ġenoġoito murinai, ġeġitaiato tarimari ġeri guruġa asi ġevaġa-moġonirito.

15 Benamo ekirarito, ekirato, “Goiaġo, tanobara mabarari ai Vari Namona tarimarima mabarari ġoirari ai boġono ġobata-iaġia.

16 Deikara na mai Vari Namona bevaġa-moġoniani ema babatiso beġabiani tarimana tu bemaġurini, senaġi asi bevaġa-moġoniani tarimana Barau na rakava voina beviniani.

17 Ġeveġabi-dadamani tarimari ġesi mai vetoġa beġe iaġo-sebonani: Iauka rakavari au aragu ai beġe lai-vaġirini. Garo variġuri irauirau ai beġe guruġani.

18 Mota rakavari beġe ġabi-vaisini, mase ġarikiri beġe niurini, senaġi asi beġe vaġa-rakavarini. Ġimari keve tarimari iatari ai beġe tore-kaurini, benamo keve tarimari beġe namoni.”

Iesu tu Barau na eġabi-vaġeato guba ġana

Luka 24:50-53; Apostolo 1:9-11

19 Iesu Vereġauka na evaġa-guruġarito murinai, Barau na eġabi-vaiaiato, guba ġana evaraġeto, benamo Barau aroribana rekenai etanu-tarito.

20 Benamo Iesu ġena mero ġeraka-lausito, gabu mabarari ai ġea ġobatato. Vereġauka maki ġia ġesi ġeġauvei-vegogoto-ġoi, ema ġeri guruġa evaġa-moġonirito-ġoi nuġa-farevaġi veġa boruri ai.]

VARI NAMONA LUKA NA ETOREATO

Luka vaġa-foforina gurugari

Luka tu doketa tarimana, ma ġia tu irau bese tarimana. Ġia tu dia mo Iesu ġena mero 12 vekaravari ai tarimana ta, senaġi ġia tu Paulo ġesi erakaorakaoto-ġoi tauna.

Luka na mai Vari Namona tu Teofilo ġena etoreato. Etoreato laġanina tu 60 beiaġo 65 fakanai ta, mo tu Iesu emaseto murinai.

Luka ġena ura baregona Teofilo e Grik tarimari ema tarimarima mabarari maki beġene riba, Iesu tu Barau na evaġa-moġoniato, e tarima namo vedaureana, e tarimarima na Barau ġena vevaġa-maġuri beġene ġabia ġana uranai eruġa-boroġirito, benamo ġeri rakava eġwaiato, satauro ai emaseto, ema Iesu ġereġana ġenana moġo Barau ġena vevaġa-maġuri tarimarima na beġe ġabiani.

Luka ġena toretore tu maiġesina eboioġaiato:

1. Iesu keina na beiaġo mo etarimato varina - karoa 1:1-4:13
2. Iesu ġena vetuġunaġi ġauveiri eveirito variri - karoa 4:14-21:38
3. Iesu ġena midigumidigu ema ġena mase variri - karoa 22-23
4. Iesu ġena varigisi-ġenoġoi, e ġena tarimarima ġeri ai efororito, ema guba vanuġana evaraġeto variri - karoa 24

Luka na Vari Namona etoreato Teofilo ġena

¹ Vere taumu Teofilo, ġoi atore-vinimuni. Tarimarima ġutuma Iesu na eveirito veigari ġita fakarai variri varau ġetorerito.

² Tovotovona na tarimarima na matari na ġeġitarito dagarari ema ġeġobata-iaġirito variri ilailari ġevaġa-ribarato.

³ Moġa lorinai au maki atuġamaġini, namona maiġa, Vere o, karakara ġeġorato dagarari sigana toġana na bavetau-ġitakauri, benamo ġeġorato ilailari ai ama torerini ġoi ġemu.

⁴ Benamo vau bono riba, ġevaġa-ribamuto-ġoi gurugari tu moġoni veġata.

Ioane Babatiso ġena ġora ġekiraġi-foforiato

⁵ Heroda, vere barana o kini, na Iudea tanona eġitaġauato-ġoi nuġanai, Rubu Veaġa verena ta etanuto-ġoi arana Sakaria, Abia ġena doġoro tari-mana. Garaġona arana tu Elisabeta. Ġia maki Arona senena, Rubu Veaġa vereri doġorori vavinena.

⁶ Ġia tauri ruarua tu vei-iobukaiobuka tarimari Barau ġoiranai. Vereġauka ġena taravatu ema vevaġa-naġi mabarabarari ġekorana-iaġirito-ġoi ma nuġari mabarari ġesi.

⁷ Senaġi tauri ruarua asi naturi, korana Elisabeta tu gabani, ema ġia tauri ruarua tu varau ġeġaukato.

⁸ Garo ta Sakaria ġena vevaġa-veaġa ġauveiri eveirito Rubu Veaġi Barau ġoiranai, korana ġena doġoro ġeri nega dainai.

⁹ Benamo Rubu Veaġa vereri ġeri veġa ilailanai Sakaria ġeġabi-hidiato, muramura ma bonana namona bene gabu ġana. Moġa lorinai eraka-toġato Vereġauka ġena Rubu Veaġa nuġanai,

¹⁰ a tarimarima mabarari tu murikai ġeġuriġurito-ġoi muramura egabuto-ġoi nuġanai.

¹¹ Benamo Vereġauka ġena aneru ta ġia ġenai efororito, muramura goġuna ma bonana fatana veaġana aroriba rekenai eruġataġoto-ġoi.

12 Sakaria na eġitaiato nai, nuġana efarevaġito ema egarito.

13 Senaġi aneru na ekiraiato, ekirato, “Sakaria, asi nogari, korana ġemu ġauġau Barau na beseġaġia. Garaġomu Elisabeta na natumu ta beġabiani, arana bono vatoa Ioane.

14 Goi boiakuni, boverereni, tarimarima ġutuma maki ġia bemaġurini nai, beġe iakuni.

15 Korana Vereġauka ġoiranai ġia tu vere baregonai beiaġoni. Ġia tu vine nanuna asi bene niua ema niuniu dagarari gwaġiġiri maki asiġina moġo. Ġia roġo sinana dianai, Iauka Veaġa na bevaġa-vonuani.

16 Ġia na Isaraela tarimari vovoka beġori-kurerini Vereġauka, ġeri Barau, ġenai.

17 Vereġauka ġoiranai berakani Elia peroveta tarimana ġena kokore ema ġena seġua kavana. Tama e natu ġia na ma bevaġa-tanu vegogorini. Kira-sirivaġi tarimari maki bevaġa-tanu kurerini, vei-iobukaiobuka tarimari ai beġe iaġoni; benamo ġia na tarimarima beġabi-torerini Vereġauka ġena.”

18 Sakaria na aneru ekiraiato, ekirato, “Au tu kamasi baribaiani? Au tu ġauka, ġaraġogu maki beġauka.”

19 Aneru evaġa-veseto, ekirato, “Au tu Gabriela, Barau ġoiranai aruġani. Barau na au betuġugu, bana vaġa-guruġamu ema mai vari namona bana kira-varamu.

20 Senaġi au ġegu guruġa asi ovaġa-moġoniani nai, ġoi murumu bebubuni, asi boguruġani, beiaġoni mo, mai guruġa anina bea ġorani ġaronai. Aki-raġirini dagarari ġeri nega korikori ai beġe ġorani.”

21 Mai veiġa eġorato-ġoi nuġanai, tarimarima na ġenari-kavaiato nai, ġeverorito karase nai Sakaria Rubu Veaġa nuġanai ea kwaibo-rakavato.

22 Eraka-rosito nai, asi evaġa-guruġarito, benamo ġeribato, ġia tu emata-vanaġito, kara ta eġitaiato Rubu Veaġa nuġanai. Benamo ġia na vetoġai moġo evaġa-ribarito, asi eguruġato, korana muruna ebubuto nai.

23 Sakaria ġena ġauvei ġarori Rubu Veaġi evaġa-koririto murinai, eġenoġoito ġena vanuġa ġana.

24 Moġa murinai ġia ġaraġona Elisabeta varau ekuġato, benamo ġue imaima (5) etanu-vekuretoġato numai.

25 Ekirato, “Vereġauka na bevetuġagu, maiġesina au ġegu ai beveia. Ġegu maiaka tarimarima ġoirari ai beġabi-vaġia.”

Iesu ġena ġora aneru na ekiraġiato

26 Elisabeta ma banina ġue imaima sebona (6) nuġanai, Barau na aneru ta arana Gabriela etuġuato vanuġa ta Galilea nuġanai arana Nasareta ġana.

27 Ġuiato ta monai. Ġia tu ma kirakauna arana Iosefa, Davida ġena doġoro tarimana. Mo ġuiato arana tu Maria.

28 Aneru ġia ġenai eiaġoto, ekirato, “Ġaro namona, Vereġauka tu ġoi ġesi ema ġena vevaġa-namo bara ġoi ġemu ai.”

29 Maria na mai guruġa eseġaġiato nai, nuġana evekwaragi-rakavato, etuġamaġito mai vevaġa-namo anina tu kara.

30 Benamo aneru na ma ekiraiato, ekirato, “Maria, asi nogari, Barau na ġena namo e varevare-bara ġoi iatamu ai betorea.

31 Goi tu bokuġani ema mero ta boġabiani, arana bono vatoa Iesu.

32 Ġia arana bevaraġeni ema beġe kiraġiani Iaru-korokoro Barauna Natuna. Barau tuġutuġu na kini ai bevaġa-iaġoani, ġia senena Davida kavana.

33 Ĝia tu vere tuĝutuĝu ai beiaĝoni, vere betanu-vanaĝi vanaĝini Iakobo besena ĝeri, ĝena Basileia asi bekorini.”

34 Maria na aneru ekiraiato, ekirato, “Mai tu kamasi beĝorani? Au tau ta ĝesi tu roĝosi baĝana gena-vegogo.”

35 Aneru na evaĝa-veseato, ekirato, “Iauka Veaĝa ĝoi iatamu ai befoforini, Barau ĝena seĝuka na beboroĝimuni. Moĝesina nai ĝoi ĝemuna bemaĝurini merona veaĝana tu Barau Natunai beĝe kiragiani.

36 Bono riba, ĝoi garagaramu Elisabeta, ĝia varau beĝauka, senaĝi ma banina. Ribamu, tarimarima na ĝekiraĝiato-ĝoi, ĝia tu gabani vavinena ĝetato-ĝoi, senaĝi toma ĝena ĝue imaima sebona (6) maĝa.

37 Korana Barau tu dagara mabarari veiveiri ma ribana.”

38 Maria ekirato, “Au tu Vereĝauka ĝena vetuĝunaĝi vavinegu, be bokira kavana au ĝegu ai bene ĝora.” Benamo aneru na eraga-kwaneato, erakato.

Maria Elisabeta ĝenai eiaĝoto

39 Mo negai Maria evariĝisito, Iudea ĝorori vanuĝana ta ĝana eraga-iaĝoto.

40 Monai Sakaria ĝena numai eraĝekauto, Elisabeta evaĝa-namoato.

41 Elisabeta na Maria ĝena vevaĝa-namo guruĝana eseĝaĝiato nai, natuna tu diana nuĝanaĝi eĝarevato, benamo Elisabeta Iauka Veaĝa na evaĝa-vonuato, mamina eĝabiato.

42 Benamo eguruĝa-baregato, ekirato, “Vavine vefakari ai Barau ĝena vevaĝa-namo ĝoi iatamu ai tu barego vedaurea, ema boĝabiani merona iatanaĝi maki!

43 Senaĝi au ĝegu namo tu kara Vereĝauka sinana ĝegu ai beiaĝoma?

44 Ĝemu vevaĝa-namo guruĝana baseĝaĝia nai, natugu tu nuĝagu ai eiaĝoni nai eĝarevani.

45 Goi overerani, korana oveĝabi-dadamato, Vereĝauka ĝena guruĝa bemoĝonini ototo nai.”

Maria ĝena iaku marina

46 Benamo Maria ekirato, “Au nuĝagu na Vereĝauka evaĝa-raĝeani.

47 Au iaukagu na maki au vaĝa-maĝurigu Barauna eiaĝu-viniani,

48 korana tu au,
ĝena vetuĝunaĝi vavinena,
ĝegu tanu lealei roĝo
etuĝamaĝi-taĝoguni!

Mainana, beiaĝoni mo,
guru mabarari beĝe kirani,
Barau ĝena vevaĝa-namo tu
au iatagu ai beĝe toni,

49 korana tu veĝa baregori
Seĝuka Barauna na au ĝegu ai beveiri.

Ĝia arana tu veaĝa.

50 Ĝena vetuĝaĝwa tu
ĝia ĝegari-viniani tarimari
iatari ai betoreani,
guru ta beiaĝoni guru ta
iatari ai betanuni.

51 Ĝia ĝimana eĝabi-vaisirito seĝukana na ĝeveiavini tarimari elai-karovorito.

52 Ĝia na vere baregori
ĝeri tanutano gaburi na
edori-firiĝorito,
a tanu lealea tarimari
ĝia na eĝabi-vaisirito.

53 Vito tarimari maki dagara namori ai evaĝa-vonurito,
a farefare vovoka tarimari
ĝia na ĝimari kori
evaĝa-ĝenoĝoirito.

54 Ĝena kiraĝitore ĝita tubura ĝatara Isaraela tarimari ĝesi asi etuĝa-
rekwarito,
ema ĝia eiaĝomato
ĝena vetuĝunaĝi tarimari Isaraela bene vaĝa-kavari ĝana,

55 senera ekiraĝitore-vinirito ilailana.

Aberahamo ma besena ĝesi roĝo bevetuĝa-ĝwa vanaĝi-vanaĝirini, etato.”

56 Maria monai tu Elisabeta ĝesi ĝetanuto ĝue toitoi (3). Moĝa murinai
ĝena vanuĝa ĝana ma eĝenoĝoi-iaĝoto.

Ioane Babatiso emaĝurito

57 Elisabeta ĝena ĝabi ĝarona varau eraĝasito nai, mero ta eĝabiato.

58 Benamo sevinai ĝetanuto tarimari ema garagarana na varina
ĝeseĝaĝiato nai, ĝia ĝesi ĝeikaku-vegogoto, korana Vereĝauka ĝena namo e
varevare-bara ĝia ĝenai eĝorato nai.

59 Ĝaro vaĝa-imaime toitoinei (8) mero tauĝanina kefina beĝene lama-
vaĝia ĝana ĝevevegogoto. Mai ĝaro sebonai maki arana beĝene vatoa Sakaria,
tamana beĝene turiaia ĝetato.

60 Senaĝi sinana asi eurato nai ekirato, “Asiĝina! Ĝia arana tu Ioane.”

61 Ĝia ĝekirato, “Senaĝi ĝoi ĝemu bese nuĝanai mai ara tu asiĝina!”

62 Benamo ĝia na mero tamana ĝimari ai moĝo ĝedanĝiato, mero arana
tu deikara beĝene si.

63 Sakaria na toretore vetuĝuna ta ekiraĝiato, benamo maiĝesi etoreato,
“Ĝia arana tu Ioane.” Benamo mabarari nuĝari ĝefarevaĝito.

64 Monai vau muruna evekeoto, meana maki eroroĝototo, benamo
eguruĝato, Barau evaĝa-namoato.

65 Moĝa lorinai seviri ai ĝetanuto tarimari mabarari ĝeĝaba-rakavato ema
mo veĝa varina Iudea ĝoro vanuĝari mabarari nuĝari ai ĝevari-fiuato.

66 Varina ĝeseĝaĝiato tarimari mabarari na ĝetuĝamaĝi-iaĝiato, ĝekirato,
“Mai mero tu kamasi beveini?” Korana tu Vereĝauka ĝimana seĝukana tu
ĝia iatanai.

Sakaria ĝena mari

67 Ioane tamana Sakaria Iauka Veaĝa na evaĝa-vonuato, benamo Barau
ĝena guruĝa evaĝa-foforiato, ekirato,

68 “Vereĝauka,
Isaraela tarimari ĝeri Barau,
sivaĝa-namo,
korana tu ĝia ĝena bese
tarimari eiaĝoma-vinirito
bene voi-ĝenoĝoiri ema
bene vaĝa-maĝuriri ĝana.

69 Vevaĝa-maĝuri tauna ma seĝukana ĝesi etuĝuato ĝita ĝera,

ġia tu ġena vetuġunaġi tauna
 Davida garakana.

70 Mai kiragiġitore tu

ġena peroveta tarimari veaġari na irau laġani ai ġekiraġi-foforiato:

71 Ġita tu ġia na ekira-ġaurato,

ġevetari-vinirani ema ġebaru-vinirani tarimari ġimari na ġia na bevaġa-
 maġurirani etato.

72 Ekirato maki, ġita tubura ġatara bevetuġa-ġwarini,

ema ġena kiragiġitore veaġana

asi betuġa-rekwaiani.

73 Ġia na ġita senera Aberahamo ekiragiġitore-viniato,

74 benamo ekirato, ġevetari-vinirani tarimari ġimari na beġabi-maġurirani.

Benamo vetuġunaġina bisini iaġo-vini asi garira ġesi.

75 Goiranai bisini raka ma veaġara e ma iobukaiobukara ġesi

ġera maġuri ġarori mabarari ai.

76 Natugu o, ġoi tu Iaru-korokoro Barauna ġena peroveta tarimana beġe
 kiragiġimuni,

korana tu boraka-guineni Vereġauka ġena dabara bono vaġa-maġataia
 ġana.

77 Ġena bese tarimari

bono vaġa-ribari,

ġia na ġeri rakava bene tuġamaġi-fitoġari ema bene vaġa-maġuriri.

78 Korana ġita ġera Barau ġena vetuġaġwa tu barego ġita ġerai.

Ġaro eraġekauni mamana kavana vevaġa-maġuri ġita iatarai betanuni.

79 Benamo mukunai e mase gari nuġanai ġetanuni tarimari bevaġa-
 mamarini,

ema maino dabaranai beġori-kaurini.”

80 Ioane ebaregoto ema iaukana egwadato. Tano fakanai etanuto-ġoi,
 eiaġomato mo, Isaraela tarimari ġeri ai efoforito ġarona.

2

Iesu ġena ġora

1 Mo negai Kaisara Augusto, Roma ġeri vere, na ġena vevaġa-naġi
 etuġuato, tanobara tarimari mabarari arari beġene toreri, sisisi beġene
 ġabia.

2 Mai tu sisisi giniginena, Kwirinio na Siria evereato-ġoi neganai
 ġeġabiato.

3 Moġa lorinai tarimarima mabarari arari toretoreri uranai tata ġeri
 vanuġa korikori ġana ġeġenoġoito.

4 Iosefa maki erakato. Nasareta, Galilea rekena vanuġa ta na, Betelehema
 ġana eiaġoto, Iudea rekena vanuġa ta, Davida ġena vanuġa. Mo ġana
 eiaġoto, korana ġia tu Davida ġena doġoro tarimana.

5 Monai arana beġene torea ġana, ġia kirakauna Maria ġia ġesi ġeiaġoto.
 Ġia tu ma banina.

6 Tauri ruarua monai ġetanuto-ġoi nuġanai, ġena ġabi ġarona varau
 evotuto.

7 Ġia eġabito, mero guineni eġabiato, dabuġai eseġoato, boromakau ġeri
 ġaniġani fatanai evaġa-genakauato, korana varivari tarimari ġeri numa asi
 faka ta dainai.

Mamoe narinari tarimari ma aneru ġesi

⁸ Mo tano monai mamoe ġenaririto-ġoi tarimari kota tu boġai ġetanuto-ġoi, boġi ai ġeri mamoe ġeġitaġaurito-ġoi.

⁹ Benamo Vereġauka ġena aneru ta ġia ġeri ai eforrito, Vereġauka mamana na emama-taririto; ġegari-rakavato,

¹⁰ snaġi aneru na ekirarito, ekirato, “Asi ġogari! Vari Namona au na baġwa-iaġomaia ġomi ġemi, tarimarima mabarari vaġa-iakuri ema vaġa-verereri ġana.

¹¹ Maitoma Davida ġena vanuġai ġemi vevaġa-maġuri tarimana bemaġuri, Keriso Vereġauka!

¹² Vetogana tu maġa, mero raraka-raraka boġo dogariani boromakau ġeri ġaniġani fatanai genakau, dabuġa na beseġoa.”

¹³ Benamo asikauna guba aneruri ġutuma mai aneru sebona ġesi ġefoforibato, Barau ġevaġa-namoato, ġekirato,

¹⁴ “Guba tuġuna vanigerenai
Barau beġene vonevone-raġe vinya,
ema tanobarai maino
ġia na eiaunamo-vinirini
tarimari na beġene ġabia!”

¹⁵ Aneru mabarari na ġeraga-kwanerito, guba ġana ġeġenoġoito murinai, mamoe ġitaġauri tarimari ġeguruġa-vegogoto, ġekirato, “Ġita tu Betelehema ġana si-iaġo, Vereġauka na bevaġa-ribara dagarana sia ġitaia.”

¹⁶ Benamo ġeraga-iaġoto, Maria e Iosefa ġedoġaririto, mero keina maki boromakau ġeri ġaniġani fatanai genataġonai ġeġoitaġoato.

¹⁷ Mero ġeġitaġoato, benamo aneru na ġevaġa-ribarito mero varina ġekiraġi-foforiato.

¹⁸ Benamo ġeseġaġito tarimari mabarari mamoe ġitataġori tarimari ġeri guruġa na nuġari ġefarevaġito.

¹⁹ Maria na mo guruġa mabarari nuġanai etorerito ema etuġamaġirito-ġoi.

²⁰ Mamoe ġeġitaġauto-ġoi tarimari ġeġenoġoito, Barau ġevevato-iaġiato, ġevaġa-raġeato, korana ġeseġaġirito ema ġeġitarito dagarari tu moġoni, aneru na ġia evaġa-ribarito ilailana.

Iesu arana ġevatoato

²¹ Ġaro vaġa-imaima toitoinei (8), mero tauġanina kefina beġe lama-vaġiani ġaronai, ġia arana ġevatoato, Iesu. Sinana na roġosi bene ġoitaġoa nuġanai, aneru na ekiraġiato arana ġeviniato.

Iesu Rubu Veaġai ġea vaġa-foforiato

²² Mero eġorato ġaro gabana vasivasi (40) murinai, ġia ġeri veiareva ġarona eraġasito, Mose ġena taravatu ekirani ilailanai. Benamo Iosefa e Maria na Iesu Ieruselema ġana ġeġwa-iaġoato, Vereġauka ġoiranai ġea vaġa-foforia ġana.

²³ Korana Vereġauka ġena taravatu ekirani, “Gora guine merori mabarari tu veaġa Vereġauka ġena.”

²⁴ Vere-ġauka ġena taravatu ilailana varevare dagarana beġene vinya ġetato, pune ruarua o pune variġuri ruarua.

²⁵ Tau ta Ierusalem mai etanuto-ḡoi, arana tu Simeona. Ġia tu vei-iobukaiobuka tarimana ema Barau ḡena taravatu ekorana-iaḡiato-ḡoi tarimana. Ġia na Isaraela ḡeri vevaḡa-maḡuri enariato-ḡoi ema Iauka Veaḡa na evaḡa-vonuato.

²⁶ Iauka Veaḡa na maki evaḡa-guruḡaiato, ekirato, ḡia asi roḡo be-maseni mo, Keriso, (Barau na ekiraḡi-toreato vevaḡa-maḡuri tauna), roḡo beḡitaiani.

²⁷ Iauka Veaḡa na Rubu Veaḡa nuḡanai Simeona eḡori-toḡaiato vau, Iesu tamana ema sinana na ḡeḡwa-toḡaiato, taravatu ekirani veiḡana beḡene veia ḡana.

²⁸ Benamo Simeona na mero eḡabiato, efaniato, Barau evaḡa-namoato, ekirato,

²⁹ “Vereḡauka, ḡemu vetuḡunaḡi tauna mai vau bono tuḡu-fitoḡagu, ma mainogu ḡesi mai baiḡoni ḡemu kiraḡitore vaḡa-ilailana.

³⁰ Varau ḡemu vevaḡa-maḡuri matagu na bama ḡitaia,

³¹ ḡoi na ovei-toreato tarimarima mabarari ḡoirari ai.

³² Mamana maiḡa, bese irauirau vaḡa-mama-iaḡiri, ma ḡoi ḡemu bese Isaraela vevato-iaḡiri ḡana.”

³³ Mero tamana e sinana na Simeona ḡena guruḡa ḡeseḡaḡito nai, ḡeḡabarakavato.

³⁴ Benamo Simeona na tauri ruarua evaḡa-namorito, Maria ekiraiato, ekirato, “Mai mero na Isaraela tarimari ḡutuma vaḡa-ketori ema ḡutuma vaḡa-vaisiraḡeri ai beiḡoni. Ġia tu vetoḡa ta Barau ḡenana, tarimarima ḡutuma na beḡe kiraḡi-fitoḡaiani,

³⁵ moḡesi tarimarima nuḡari vekuretoḡari dagarari mabarari beḡea fororini. Goi, Maria, maki midigumidigu asikei boḡoitaḡoni, noḡa moḡo lorumu kaia na beḡe gwanu-toḡaiani midiguna kavana.”

³⁶ Monai peroveta vavinena ta arana Ana. Ġia tu Fanuela natuna, Asere ḡena doḡoro vavinena. Ġia tu eveḡaraḡoto, laḡani imaima ruarua (7) ḡaraḡona ḡesi ḡetanuto,

³⁷ benamo evabuto, laḡani gabana imaima ma gabana toitoi vasivasi (84) etanuto, varau eḡaukato. Rubu Veaḡa asi eraga-kwaneato, laḡani e boḡi ai Barau etoma-rakariḡo viniato-ḡoi, eḡurigurito-ḡoi ema eḡaniveaḡato-ḡoi.

³⁸ Mo hora sebonai ḡia maki eraḡasito, benamo Barau evaḡa-namoato, Ierusema vaḡa-maḡurina ḡenariato-ḡoi tarimari ḡoirari ai mai mero varina ekiraḡiato.

Nasareta ḡana ma ḡeḡenoḡoito

³⁹ Iosefa ema Maria na Vereḡauka ḡena taravatu ekirani veiḡari mabarari ḡeveirito murinai, Galilea ḡana ḡeḡenoḡoito, ḡeri vanuḡa Nasareta ḡana.

⁴⁰ Mai mero ebareḡoto ma gwadana ḡesi; Barau ḡena iaunega na evonuvonu-raḡoto ema ḡena namo e varevare-bara tu ḡia iatanai.

Iesu Rubu Veaḡa nuḡanai

⁴¹ Laḡani mabarari nuḡari ai Iesu tamana ema sinana tu Ierusema ḡana ḡeiaḡoto-ḡoi, Pasova verekona dainai. (Moḡa tu Iuda tarimari mase aneruna na evanaḡirito moḡo, asi evaḡirito verekona).

⁴² Iesu ġena laġani gabanana ruarua (12) eġabiato nai, ġia maki tamana ema sinana ġesi vereko urana ġeiaġoto, ġeveito-ġoi kavana.

⁴³ Vereko ekorito murinai, ġeġenoġoito ġeri vanuġa ġana, senaġi ġia asi ribari, Iesu tu Ierusalemaj ġeraga-kwaneato.

⁴⁴ Ġia ġeri tuġamaġi Iesu tu ġia ġesi. Ġaro sebona ġerakoto murinai, garagarari ema ġatari fakari ai ġevetauato.

⁴⁵ Ġevetauto nuġanai asi ġeġoitaġoato, moġa lorinai ma ġeġenoġoito Ieruselema ġana Iesu vetauvetauna.

⁴⁶ Ġaro toitoi murinai ġeġoitaġoato, Iesu tu Rubu Veaġa nuġanai Iuda tarimari ġeri vevaġa-riba tarimari ġesi. Barau ġena guruġa ġekiraġirito-ġoi eseġaġirito-ġoi ema ġia na maki edanaġirito-ġoi mai guruġa aniri tu kara.

⁴⁷ Mabarari na Iesu ġena vedanaġi ema evaġa-veseto guruġari ġeseġaġito nai, ġeġaba-rakavato.

⁴⁸ Iesu tamana ema sinana mainai ġeġoitaġoato nai, nuġari ġefarevaġi-rakavato, benamo sinana na ekiraiato, ekirato, “Natugu, karase nai ġoi na ġai maiġesi boveima? Goi tamamu ema au tu ġoi daimu ai dabarama maki beġe doko, kamasi ta mai bovei baġasi.”

⁴⁹ Iesu ekirato, “Karase nai au ġovetauguni? Ġomi asi ribami au tu Tamagu ġena numai?”

⁵⁰ Senaġi ġia asi ribari, Iesu karase maiġesina evevaġa-veseto.

⁵¹ Moġa guruġinai Iesu tamana ma sinana ġesi ġeġenoġoito Nasareta ġana. Ġeri guruġa mabarari eiaġo-vinirito-ġoi. Maiġeri dagara ġeġorato mabarari Maria na nuġanai etoreriġo ema etuġamaġi taġorito-ġoi.

⁵² Iesu efutuato ma iaunegana ġesi, Barau ema tarimarima na maki ġeuraviniato-ġoi.

3

Ioane Babatiso eġobatat

Ioane 1:19-28

¹ Tiberio Kaisara, Roma ġeri vere, evereto laġani gabanana imaima (15) nuġanai, Pontio Pilato tu Iudea ġeri gavana, Heroda tu Galilea verena, tarina Filipo tu Iturea ma Trakoniti tanori ġeri vere, Lisania tu Abilene verena.

² Anas ma Kaiafas tu Rubu Veaġa vereri baregori. Mo negai Barau na Ioane Sakaria evaġa-guruġaiato tano fakanai.

³ Benamo Ioane na Ioridana ġarukana tanona mabarana eraka-vaġa-ġauato, eġobatat-ġoi, tarimarima ġeri rakava ġerina beġene vetuġamaġi-kure e beġene raka-kure, ema babatiso beġene ġabia, Barau na ġeri rakava bene tuġamaġi-fitoġari ġana.

⁴ Isaia, peroveta tarimana, ġena bukai etoreato ilailanai, ekirato, “Tarima ta tano fakanai ekeani, ekirani, ‘Vereġauka ġena dabara ġoiarevaia, ġena iaġoma dabarana ġovaġa-maoromaoroa.

⁵ Douka gaburi mabarari

boġono vaġa-vonuri,

ġoro baregori e ġoro keiri mabarari boġono vaġa-faiarari.

Dabara ġeġeva-ġeġevari

boġono vaġa-maoromaorori,

ema dabara koufakoufari maki boġono vaġa-vonuri.

6 Benamo tarimarima mabarari na Barau ġena vevaġa-maġuri beġe ġitaiani!’ ”

7 Tarimarima ġutuma Ioane ġenai ġeiaġoto, bene babatisori ġana. Benamo Ioane na eġobatarito, ekirarito, “Gomi mota naturi, dei na bekirami, Barau ġena vevaġa-maoro ġenana boġo raga-maġurini?”

8 Ġemi rakava ġerina boġono vetuġamaġi-kure, ema boġono raka-kure Barau ġenai, benamo ġemi maġuri ai ġwaġwa namori boġono buri. Asi boġono kira, ‘Aberahamo tu ġai tamama, (be Barau na begabi-raġemani).’ Korana boġono riba, Barau tu ma seġukana Aberahamo natuna tu mai fore ġerina bevaġa-ġorarini!

9 Koko tu ġau korari ai varau beġe toreri. Benamo ġwaġwa namori asi beġe ġwani ġauri mabarari tu beġe basirini, karavai beġe fiu-raġerini.”

10 Vegogo tarimari na Ioane ġedanagiato, ġekirato, “Be, ġai tu kara baġana vei?”

11 Ġia na evaġa-veserito, ekirato, “Ġomi deidei ġemi sedi ruarua nai, ta tu asi ġena sedi tarimana bono vinia, e ma ġana ġaniġani tarimana na maki moġesi bene vei.”

12 Takesi gogo tarimari maki babatiso beġene ġabi ġana Ioane ġenai ġeiaġoto, ġedanagiato, ġekirato, “Vevaġa-riba taumu, ġai tu kamasi baġana vei?”

13 Ġia evaġa-veseto, ekirato, “Taravatu ekirani lorinai moġo boġono gogo.”

14 Vetari tarimari o soldia na maki ġedanagiato, ġekirato, “Ġai maki kamasi baġana vei? Ġia evaġa-veseto, ekirato, “Tarima ġeri moni asi boġono verariri ema asi boġono kira-rakavari. Gomi davami dainai maki asi boġono mugumugu.”

15 Tarimarima nuġari ai maġesi ġetuġamaġito, “Mai tarima tu Keriso, (Barau na ekiragi-toreato vevaġa-maġuri tauna), banaġu,” ġetato.

16 Benamo Ioane na mabarari evaġa-guruġarito, ekirato, “Au tu nanu na ababatisomini, senaġi tarima ta beiaġomani, ġia ġena seġuka na au ġegu seġuka tu evanaġiani. Au tu asi ilaila ġia ġena tamaka varona baruġaiani. Ġia na Iauka Veaġa ema karava na bebabatisomini.

17 Ġia ġimanai tu iareva-iareva dagarana, widi momona tu widi tauri ġenana bene iareva-ġitakauri ġana. Benamo widi tu ġena vaġa-vegogo numanai bevaġa-vegogorini, senaġi widi momona tu begabuani asi ebuseni karavanai.”

18 Ioane na mo guruġai ema guruġa ġutumai maki Barau ġena Vari Namona tarimarima eġobata-vinirito, ema enoġirito, ġeri rakava ġerina beġene vetuġamaġi-kure.

19 Ioane na maki Heroda, Galilea verena, evaneato, korana tu ġia kakana Filippo ġaraġona eġaraġoato nai, ema veiġa rakavari ġutuma eveirito nai.

20 Heroda na mo rakava mabarari iatari ai ta ma etore-kauato, ġia na Ioane dibura numanai ma ekou-ġauato.

*Ioane na Iesu ebatatisoato
Mataio 3:13-17; Mareko 1:9-11*

21 Tarimarima mabarari Ioane na ebatatisorito-ġoi nai, Iesu maki ebatatisoato. Benamo Iesu eġauġauto-ġoi nuġanai, guba evekeo-fakato,

²² Iauka Veāga emariḡoto ḡia iatanai, vetoḡana noḡa pune kavana. Garo ta guba na ekea-riḡoto, ekirato, “Ḡoi tu au Natugu, aura-vinimuni; ema ḡemu ai aiaku-rakavani maki.”

Iesu tubuna ḡatana arari

Mataio 1:1-17

²³ Iesu na ḡena ḡauvei esinaiato nai, ḡena laḡani tu gabana toitoi (30) kavana. Tarimarima ḡekirato-ḡoi, ḡia tu Iosefa natuna. Besena tu maigeri: Iosefa tu Heli natuna,

²⁴ Heli tu Matat natuna, Matat tu Levi natuna. Levi tu Melki natuna. Melki tu Ianai natuna. Ianai tu Iosefa natuna.

²⁵ Iosefa tu Matatia natuna. Matatia tu Amosa natuna. Amosa tu Nahum natuna. Nahum tu Eseli natuna. Eseli tu Nagai natuna.

²⁶ Nagai tu Mahat natuna. Mahat tu Matatia natuna. Matatia tu Semein natuna. Semein tu Ioseka natuna. Ioseka tu Ioda natuna.

²⁷ Ioda tu Ioanan natuna. Ioanan tu Resa natuna. Resa tu Serubabele natuna. Serubabele tu Sealtiele natuna. Sealtiele tu Neri natuna.

²⁸ Neri tu Melki natuna. Melki tu Adi natuna. Adi tu Kosam natuna. Kosam tu Elmadam natuna. Elmadam tu Ere natuna.

²⁹ Ere tu Iosua natuna. Iosua tu Eliesere natuna. Eliesere tu Iorim natuna. Iorim tu Matat natuna. Matat tu Levi natuna.

³⁰ Levi tu Simeona natuna. Simeona tu Iuda natuna. Iuda tu Iosefa natuna. Iosefa tu Ionam natuna. Ionam tu Eliakim natuna.

³¹ Eliakim tu Melea natuna. Melea tu Mena natuna. Mena tu Matata natuna. Matata tu Natan natuna. Natan tu Davida natuna.

³² Davida tu Iese natuna. Iese tu Obed natuna. Obed tu Boas natuna. Boas tu Salmone natuna. Salmone tu Nasona natuna.

³³ Nasona tu Aminadab natuna. Aminadab tu Admin natuna. Admin tu Areni natuna. Areni tu Hesron natuna. Hesron tu Perese natuna. Perese tu Iuda natuna.

³⁴ Iuda tu Iakobo natuna. Iakobo tu Isako natuna. Isako tu Aberahamo natuna. Aberahamo tu Tera natuna. Tera tu Nahoro natuna.

³⁵ Nahoro tu Serug natuna. Serug tu Reu natuna. Reu tu Peleg natuna. Peleg tu Ebere natuna. Ebere tu Sela natuna.

³⁶ Sela tu Kainana natuna. Kainana tu Afasada natuna. Afasada tu Sem natuna. Sem tu Noa natuna. Noa tu Lameka natuna.

³⁷ Lameka tu Metusela natuna. Metusela tu Enoka natuna. Enoka tu Iared natuna. Iared tu Mahalalel natuna. Mahalalel tu Kainana natuna.

³⁸ Kainana tu Enos natuna. Enos tu Seta natuna. Seta tu Adamu natuna. Adamu tu Barau natuna.

4

Satani na Iesu eriba-ḡaniato

¹ Iesu Ioridana ḡarukanai Iauka Veāga na evaḡa-vonuato vau, ea ḡenoḡoito, benamo Iauka na tano fakana ḡana eḡori-iaḡoato.

² Monai ḡaro e boḡi gabana vasivasi (40) Diabolo na eribaḡaniato-ḡoi. Mo ḡaro mabarari nuḡari ai asi eḡaniḡanito-ḡoi, moḡa lorinai mo ḡaro ḡekorito murinai, ḡia evito-rakavaiato.

³ Diabolo na ekiraiato, ekirato, “Bema ḡoi Barau Natuna nai, mai fore nokiraia, be ḡaniḡani ai neiāḡo.”

⁴ A Iesu na evaḡa-veseato, ekirato, “Buka Veāga nuḡanai maiḡesi ekirani, ‘Tarimarima tu dia ḡaniḡani na moḡo bemaḡurini.’”

5 Benamo Diabolo na Iesu eḡori-raḡeato gabu ta tuḡunai, tanobara basileiari mabarari vaḡa-sebo evaḡa-ḡitaiato.

6 Benamo Diabolo ekirato, “Au na seḡuka bavinimuni, maiḡeri dagara mabarari boḡita-ḡaurini, aramu maki bebaregoni. Mai dagara mabarari tu au ḡegu, benamo aura-viniani tarimana baviniani.

7 Moga lorinai bema au botoma-rakarigo viniguni nai, maiḡeri dagara mabarari boḡabirini ḡoi ḡemu.”

8 Senaḡi Iesu evaḡa-veseto, ekirato, “Buka Veaḡai tu maiḡesi ḡetoreato, ‘Vereḡauka, ḡoi ḡemu Barau bono toma-rakarigo vinia, ḡia moḡo ḡereḡana vetuḡunaḡina bono iaḡo-vini!’ ”

9 Benamo Satani na Ieruselema ḡana eḡori-iaḡoato, Rubu Veaḡa tuḡunai evaḡa-ruḡakauato, ekiraiato, “Bema ḡoi Barau Natuna, mainana noburi-firigo,

10 korana Buka Veaḡa nuḡanai maiḡesi ekirani, ‘Barau na ḡena aneru bekirarini, ḡoi beḡe narimuni.’

11 Ekirani maki, ‘Aneru na ḡimari na beḡe ḡobemuni, beḡe ḡabi-vaisimuni, kwakumu fore ai asi boraraiani.’ ”

12 Iesu evaḡa-veseto, ekirato, “Buka Veaḡa nuḡanai maki ekirani, ‘Vereḡauka ḡoi ḡemu Barau asi bono riba-ḡania.’ ”

13 Satani ḡena veribaḡani mabarari evaḡa-koririto, benamo eraga-kwaneato, eiaḡoto mo, ḡaro ta.

Iesu ḡena ḡauvei esinaiato Galileai

Mataio 4:12-17; Mareko 1:14-15

14 Iesu ma eḡenoḡoito Galilea ḡana, Iauka Veaḡa seḡukana maki ḡia ḡesi. Ḗia varina Galilea tano nuḡanai ḡefiu-rovorovoato.

15 Iesu tu ḡeri rubu nuḡari ai evevaḡa-ribato-ḡoi, mabarari na ḡevaḡa-raḡeato.

Nasareta tarimari na Iesu asi ḡeḡabi-raḡeato

Mataio 13:53-58; Mareko 6:1-6

16 Benamo Iesu Nasareta ḡana eiaḡoto. Mai tu ḡia ebaregato vanuḡana. Vanaḡivanaḡi eveito-ḡoi kavana Sabadi ai ḡia rubu ai eraka-toḡato. Benamo Buka Veaḡa bene iavia ḡana evariḡisito nai,

17 Isaia peroveta tarimana ḡena buka rubu ḡitaḡauna tarimana na Iesu eviniato, benamo ḡia na ereraiato, ḡena iavi-iavi gabuna eḡoitaḡoato, maiḡesi ekirani,

18 “Vereḡauka Iaukana tu
au ḡegu ai maiḡa,
korana ḡia na tu
au eboroḡiguto,
ema eviriḡiguto,

Vari Namona gara veḡubu tarimari bana ḡobata-viniri ḡana.

Etuḡuguto, dibura tarimari ḡeri ai Barau na dibura na varau eḡabi-vaḡirato
varina bana varifua ḡana,

ema mata-bubu tarimari
matari maki beḡene fafa.

Ḗevaḡa-rakavarini tarimari
bana vaḡa-maḡuriri,

19 ema Vereḡauka na tarimarima bevaḡa-maḡuririni laḡanina bana ḡobata-iaḡia.”

²⁰ Benamo Iesu na buka ma eiokuato, rubu ġitaġauna tarimana ma eviniġenoġoiato, benamo etanu-tarito. Mabarari rubu nuġanai tarimari na ġeġita-karakaraiato.

²¹ Benamo Iesu na eġobata-vinirito, ekirato, “Mai boġo seġaġia guruġana tu toma ġaro ai bemoġoni.”

²² Benamo mabarari na ġevaġa-namoato e ġeġabato, korana guruġa namori ekiraġirito nai. Ġekirato, “Mai tu Iosefa natuna ba?”

²³ Benamo Iesu na ekirarito, ekirato, “Au ribagu ġomi na mai sisiba guruġana au ġegu ai boġo kira-varaguni, boġo kirani, ‘Doketa tarimamu, tauġemu bono vevaġa-maġuri! Kaperanaumai oveirito veġari variri ġama seġaġirito, be mainai ġemu vanuġa korikori ai maki bono vei.’ ”

²⁴ Moġoni akiramini, peroveta tarimana tu ġena vanuġa korikori ai asi beġe ġabi-raġeani.

²⁵ Maiġa maki boġono seġaġi: Moġoni, Elia ġena negai vabu ġutuma Israelaġi ġetanuto-ġoi. Laġani toitoi (3) ma ġue imaima sebona (6) nuġanai ġura asi eraguto-ġoi, tanobara mabarana doġe na eġabi-ġauato.

²⁶ Senaġi mo Israela vaburi ġeri ai Barau na Elia asi etuġu-iaġoato. Irau gabu vanuġana ta arana Sarefata, Sidono tanonai, vabu ta ġenai etuġu-iaġoato.

²⁷ Elisa, peroveta tarimana, ġena negai lepera tarimari ġutuma Israelaġi ġetanuto-ġoi, senaġi sebona ta asi evaġa-namoato, Naman, Siria tarimana, moġo ġereġana.

²⁸ Rubu ai ġevegogoto tarimari mabarari mo guruġa ġeseġaġiato nai, ġebaru-rakavato.

²⁹ Benamo ġevarigisito, Iesu vanuġa na ġeinu-rosiato, ġeri vanuġa ġevaġa-ruġaiato ġorona tavi ta reke lofa asikeina na beġene fiu-riġoa ġetato.

³⁰ Senaġi Iesu tu ġia fakari na moġo eraka-vaġito, mo eiaġoto.

Iesu na iauka rakavana elai-vaġiato

Mareko 1:21-28

³¹ Iesu tu Kaperanauma, Galilea vanuġana ta, ġana evarigoto. Benamo Sabadi ai evevaġa-ribato.

³² Ġia ġena vevaġa-riba guruġari tarimarima na ġeseġaġiato nai, ġeġabarakavato, korana ġena guruġa ma seġukana.

³³ Rubu nuġanai iauka rakavana na eboroġiato tarimana ta etanu-taġoto-ġoi. Ġia ekoġo-gigitarito, ekirato,

³⁴ “Iesu, Nasareta taumu o, kara ġemai noveia otoni? Ġoi ġai vaġa-rakavama uranai boiaġoma, ene? Au ribagu, ġoi tu Barau ġena Veaġa Tarimamu.”

³⁵ Iesu na ekira-ġoiato, ekirato, “Gurumu, ġia ġenana noraka-vaġi!” Benamo mo iauka rakavana na tano eġidara-iaġiato tarimarima ġoirari ai, ġia ġenana eraka-vaġito, fau ta maki asi efororito ġia ġenai.

³⁶ Benamo tarimarima mabarari nuġari ġefarevaġi-rakavato, ġeveguruġa-vevinito, ġekirato, “Mainai kamasi eguruġani? Be, ma seġukana e ma gwadana ġesi iauka rakavari evaġa-guruġarini, benamo ġeraka-vaġini!”

³⁷ Benamo Iesu varina mo gabu mabaranaġi ġefiu-rovorovoato.

Iesu na Simona ġena taġama evaġa-namoato

Mataio 8:14-15; Mareko 1:29-31

³⁸ Iesu rubu eraga-kwaneato, benamo Simona ġena numa ġana eiaġoto. Simona ġena taġama vavinena ekeveto, tauġanina eseġuka-rakavato; benamo Iesu ġenoġiato bene vaġa-kavaia.

³⁹ Benamo Iesu eiaġoto mo vavine sevinai eruġato, keve ekira-ġoiato, benamo keve ekorito. Vavine maoromaoro evariġisito, benamo eġuburito.

Keve tarimari ġutuma Iesu na evaġa-namorito

Mataio 8:16-17; Mareko 1:32-34

⁴⁰ Ġaro ea keto-firiġoto-ġoi nai, tarimarima na keve irauirau tarimari mabarari Iesu ġenai ġeġori-iaġorito. Ġia ġimana tarima tata iatari ai etore-kaurito evaġa-namorito.

⁴¹ Iauka rakavari maki tarimarima ġutuma ġerina ġeraka-vaġito, benamo iauka rakavari ġekoġoto, ġekirato, “Ġoi tu Barau Natuna!” Senaġi Iesu na evaġa-guruġarito asi beġene guruġa, korana ġia ribari Iesu tu Keriso, (Barau na ekiraġi-toreato vevaġa-maġuri tauna).

Iesu rubu nuġari ai eġobatato-ġoi

Mareko 1:35-39

⁴² Elaġanito, Iesu evariġisito, tano fakana ġana eiaġoto. Tarimarima na ġea vetauato, ġedoġariato, ġeġabi-tariato asi ġeri ura ġia na bene raga-kwaneri ġetato.

⁴³ Senaġi Iesu na evaġa-guruġarito, ekirato, “Au tu vanuġa irauri ai maki bana ġobata, Barau ġena Basileia varina namona bana fiua, Barau na etuġuguto korana tu moġa.”

⁴⁴ Benamo Iudea tanona ruburi nuġari ai eġobatato-ġoi.

5

Iesu na ġena mero ekearito

¹ Ġaro ta Iesu tu Genesareta kouna rikinai eruġa-taġoto-ġoi, tarimarima na ġeraga-ġeġeragiato, Barau ġena guruġa beġene seġaġia ġana.

² Ġia tu ġasi ruarua eġitarito, kou rikinai ġeinu-raġerito; maina tarimari na ġeraga-kwanerito, ġeri reke ġeġurigiirito-ġoi.

³ Benamo Iesu tu mo ġasi tai eraġeto, Simona ġena ġasi. Ġia na Simona ekiraiato, kota negini-rosia nanu ġana. Benamo ġasi ai etanu-tarito, tarimarima ġutuma evaġa-ribarito.

⁴ Egruġa-ġosito vau, ġia na Simona ekiraiato, ekirato, “Ġemi ġasi dodoku rekena ġana ġogini-rosia, be ġemi reke boġono toreri, maġani-kone boġono vaġi ġana.”

⁵ Simona evaġa-veseto, ekirato, “Vevaġa-riba taumu, ġai tu baġa vek-waraġi-laġani, maġani-kone ta maki asi baġa doġaria, senaġi ġoi ġemu guruġa dainai reke atorerini.”

⁶ Benamo ġetorerito, maġani-kone asisebo ġetoġato, ġeri reke maki dori ġevedareto.

⁷ Moġesi nai karori ġasi tai ġelau-iaverito, beġene iaġoma, be ġia beġenema vaġa-kavari ġetato. Ġeiaġomato, ġasi ruarua maġani-kone na ġevaġa-vonorito, dori ġeburuto-ġoi.

⁸ Simona Petero na mo veġa eġorato dagarana eġitaiato, benamo Iesu kwakuna koranai eketo-tarito vau ekiraiato, ekirato, “Vereġauka, noraka-veġita au ġeguna, au tu vei-rakava tarimagu!”

⁹ Korana tu ġia ma karonna mabarana ġesi nuġari ġefarevaġi-rakavato, mo maġani-kone asisebo ġevaġirito nai.

¹⁰ Simona ġesi ġemaina-vegogoto-ġoi tarimari maki Iakobo (o Iames) e Ioane, Sebedaio natuna, ġeġaba-rakavato. Iesu na Simona ekiraiato, ekirato, “Asi nogari; maitoma bevesina beiaġoni, ġoi tu tarimarima bomainaviririni.”

¹¹ Benamo ġasi ruarua tu kou rikinai ġeinu-raġerito, ġeri dagara mabarari ġeraga-kwanerito, Iesu murinai ġerakato.

Iesu na lepera tarimana evaġa-namoato

Mataio 8:1-4; Mareko 1:40-45

¹² Ġaro ta Iesu tu vanuġa ta nuġanai, tarima ta monai kefina mabarana lepera moġo. Ġia na Iesu eġitaiato nai, ġoiranai evetui-tarito, enoġiato, ekirato, “Vereġauka, bema ġoi ourani nai, moġoni boiarevaguni, bovaġa-namoguni riba!”

¹³ Iesu ġimana etuġu-iaġoato, eġabi-karaiato, ekirato, “Aurani, be non-amo!” Benamo vaġa-sebo lepera na eraga-kwaneato.

¹⁴ Iesu na evaġa-guruġaiato, ekirato, “Tarima ta asi bono kira-varaia.” Ma ekirato, “Noiaġo, Rubu Veaġa verena na bene ġitamu, ema veiareva varevare dagarari Mose na ekiraġiato ilailanai bono vinia, be tarimarima beġene riba, ġoi tu bonamo.”

¹⁵ Senaġi Iesu varina tarimarima na ġefiu-rovorovoato-ġoi vau, tarimarima ġutuma-bara ġevevogoto-ġoi, ġia ġena guruġa seġaġi-seġaġiri e ġeri keve vaġa-namori uranai.

¹⁶ Senaġi Iesu tu eraka-veġitato-ġoi tano fakana ġana, ea ġuriġurito-ġoi.

Iesu na rakava etuġamaġi-fitoġarito

Mataio 9:1-8; Mareko 2:1-12

¹⁷ Ġaro tai Iesu evevaġa-ribato-ġoi nuġanai, Farisea tarimari e taravatu vaġa-riba-iaġina tarimari Galilea e Iudea vanuġari mabarari na, ema Ierusalemna na ġeiaġomato, ġia sevinai ġema tanu-tarito. Barau ġena seġuka Iesu ġenai evaġa-foforiato, keve tarimari bene vaġa-namori ġana.

¹⁸ Tarima kotari na tauġanina tavi ta emaseto tarimana ta gedai genagenanai ġeġwa-iaġoato. Numa nuġanai beġene raka-toġa dabarana ġevetauato, Iesu ġoiranai beġene tore-taria ġetato.

¹⁹ Senaġi tarimarima ġutuma naima, rakatoġa dabara ta asi ġedoġaritato. Moġa lorinai keve rakava tarimana ma gedana ġesi ġeġwa-raġeato numa tuġunai, ġuduġu ġeġiu-fakaiato vau, ġetuġu-rigoato tarimarima fakari ai Iesu ġoiranai.

²⁰ Iesu na ġeri veġabidadama eġitaiato, benamo keve rakava tarimana ekiraiato, ekirato, “Gata, ġoi ġemu rakava batuġamaġi-fitoġari.”

²¹ Farisea tarimari e taravatu ġevevaġa-riba iaġiato-ġoi tarimari maiġesi ġetuġamaġito, “Mai tu deikara, ġia na Barau ekira-fitoġaiani? Barau ġereġana na moġo rakava etuġamaġi-fitoġarini!”

²² Iesu ma ribana ġia kara ġetuġamaġirito-ġoi, benamo evaġa-guruġarito, ekirato, “Karase nai nuġami ai maniġesi ġotuġamaġini?”

²³ Aiġesina baguruġani tu meraġa, ‘Ġemu rakava batuġamaġi-fitoġari’ banasi, ba bara kira, ‘Novariġisi, be noraka’ barasi?

24 Au na navaġa-ġitami, Tarimarima Natuna tu ma seġukana rakava betuġamaġi-fitoġarini tanobarai.” Ġia na keve rakava tarimana evaġa-guruġaiato, ekirato, “Novariġisi, ġemu gEDA noġabia, be numa ġana noiaġo!”

25 Benamo ġia maoromaoro evariġisito tarimarima ġoirari ai, egena-iaġirito dagarari eġabirito, ġena numa ġana eiaġoto, Barau evaġa-raġeato.

26 Tarimarima mabarari nuġari ġefarevaġito ema Barau ġevaġa-raġeato. Gari na evaġa-vonurito, benamo ġekirato, “Veġa boruri toma ġaro ai bita ġita!”

Iesu na takesi gogo tarimana arana Levi ekeaiato

Mataio 9:9-13; Mareko 2:13-17

27 Moġa murinai Iesu tu vanuġa na eraka-rosito, benamo takesi gogo tarimana arana Levi takesi moniri ġeġabito-ġoi numanai tanutaġo eġitaiato. Benamo Iesu na ekiraiato, ekirato, “Murigu ai noma raka.”

28 Benamo Levi evariġisito, ġena dagara mabarari eraga-kwanerito, Iesu murinai erakato.

29 Benamo Levi na ġaniġani baregona ġena numai eveiato Iesu ġana. Varivari tarimari vefakari ai tarimarima ġutuma takesi gogo tarimari ema tarima tari ġia ġesi ġeġaniġanito.

30 Farisea tarimari tari e taravatu ġevevaġa-riba iaġiato-ġoi tarimari, ġia ġeri doġoro tarimari, ġevanevaneto Iesu ġena mero ġeri ai, ġekirato, “Karase nai ġomi tu takesi gogo tarimari e vei-rakava tarimari ġesi ġoġaniġanini ema ġoniuniu-vegogoni?”

31 Iesu na evaġa-veserito, ekirato, “Namo tarimari tu doketa asi beġe vetaurini, senaġi keve tarimari moġo.

32 Au maki vei iobukaiobuka tarimari keakeari asi aiaġomato, senaġi vei-rakava tarimari beġene vetuġamaġi-kure e beġene raka-kure ġana aiaġomato.”

Ġaniveaġa

Mataio 9:14-17; Mareko 2:18-22

33 Farisea tarimari na Iesu ġevaġa-guruġaiato, ġekirato, “Ioane Babatiso ġena mero nega-ġutuma ġeġani-veaġani e ġeġurigurini. Ġai ġema mero maki moġesi ġeveini, a ġoi ġemu mero tu ġeġaniġanini e ġeniuniuni moġo.”

34 Iesu na evaġa-veserito, ekirato, “Ġomi ġotuġamaġini veġaraġo varigu tarimana ġatana seviri ai etanuni nuġanai beġe ġani-veaġani ei?”

35 Ġarona eiaġomani, veġaraġo varigu tarimana ġia ġerina beġe ġabi-veġitaiani, monai vau beġe ġani-veaġani.”

36 Iesu na ġeri barabore ta ma ekiraġiato, ekirato, “Tarima ta na dabuġa variguasi asi bedareani, dabuġa ġuinena bani-iaġina. Bema moġesi beveini nai, dabuġa variguasi bedareani, ema dabuġa variguasi veseana dabuġa ġuinena ġesi asi beġe ilailani.

37 Tarima ta na vine nanuna variguasi nanigosi kefina ġuinenai asi besisiani. Bema moġesi beveini nai, vine nanuna variguasi na kefi ġuinena beġani-fakaiani. Vine nanuna bevebubuni e kefina berakavani.

38 Senaġi vine nanuna variguasi nanigosi kefina variguasi besisiani tu namo!

39 Ema tarima ta na vine nanuna ġuinena eniuani murinai vine nanuna variguasi asi beura-viniani, korana ġia bekirani, ‘Vine nanuna ġuinena tu namo vedaurea.’ ”

6

Iesu tu Sabadi Verena

¹ Sabadi tai Iesu widi vamokari nuğari na eraka-iağoto-ğoi, benamo ġena mero widi ġebukito, ġimari ai ġemuturito-ğoi, benamo tauri tu ġeganirito-ğoi.

² Farisea tarimari kotari na ġedanağirito, ġekirato, “Ġomi tu kara dainai ġaina taravatu asi ġokorana-iağiani, Sabadi ai widi ġobukini?”

³ Iesu na evağa-veserito, ekirato, “Ġomi Davida ma karona ġesi ġevitorito nai, Davida na veiğa ta eveiato gurugana tu asi ġoiaviani?”

⁴ Barau ġena numai eraka-toğato, Barau ġoiranai ġetorerito-ğoi beredi eğabito, eğanito ema karona maki evinirito. Mo beredi tu veağa, Rubu Veağa vereri moğo ġari, taravatu.”

⁵ Iesu na ma ekirarito, ekirato, “Tarimarima Natuna tu Sabadi Verena.”

*Ġima boso tarimana**Mataio 12:9-14; Mareko 3:1-6*

⁶ Ma Sabadi tai Iesu rubu ai eraka-toğato, benamo evevağa-ribato-ğoi. Monai tarima ta tu ġimana aroribana tu ebosoto.

⁷ Taravatu ġevevağa-riba iağiato-ğoi tarimari e Farisea tarimari na tu ġia ġeğita-tağoto-ğoi, mai Sabadi ai bevevağa-namoni ba asiği, korana beğene samania ġana.

⁸ Senağina Iesu na ġia kara ġetuğamağiato-ğoi tu eribaiato, benamo mo tarima ġimana boso ekiraiato, ekirato, “Noruğa-vaisi, mainai noma ruğa.” Benamo eruğa-vaisito, ea ruğato.

⁹ Benamo Iesu na evağa-guruğarito, ekirato, “Nadanağimi roğo, taravatu nuğanai aiğa tu namo, Sabadi ai veiğa namori veiveiri namo ba veiğa rakavari sini veiri? Tana vevağa-mağuri ba tana vağivaği?”

¹⁰ Eboge-geğerağito, mabarari eğitarito, benamo mo tarima ekiraiato, ekirato, “Ġimamu notuğu-roroğotoa.” Ġimana etuğu-roroğotoato, benamo enamoto ġimana reke ta kavana.

¹¹ Senağina ġia tu ġebaru-rakavato, benamo tauğeri fakari ai moğo ġeguruğa-vegogoto Iesu kamasi ta beğene veia ġana.

*Iesu na tarima gabanana ruarua (12) eğabi-hidirito**Mataio 10:1-4; Mareko 3:13-19*

¹² Mo ġaro tai Iesu ġoro ta tuğuna ġana evarağeto ġuriğuri, benamo mo boği vinubana Barau ġenai egağauto.

¹³ Elağanito, ġena mero ekea-vegogorito, benamo gabanana ruarua (12) eğabi-viriğirito, arari evatorito, apostolo.

¹⁴ Simona, arana ta tu Petero, ma tarina Anduru; e Iakobo (o Iames), e Ioane, e Filipino, e Batolomeo,

¹⁵ e Mataio, e Tomasi; e Iakobo (o Iames), Alfeo natuna; e Simona, Selote tarimana;

¹⁶ e Iudas, Iakobo (o Iames) natuna; ema Iudas Isakariota, Iesu berevaiani tarimana.

*Iesu evevağa-ribato e keve evağa-namorito**Mataio 4:24-25; Mareko 3:7-12*

¹⁷ Ġia ġesi ġoro na ġeseiriğoto tano faiaranai, benamo Iesu ema ruğa-tarito. Ġia ġenai riba ġeğabito-ğoi tarimari ġutuma ema tarimarima ġutuma lelevağiri maki Iudea ema Ierusalem na ġeiağomato, Taia konena na e Sidono konena na ġeiağomato,

18 ġia beġene seġaġia uranai ema ġeri keve bene vaġa-namori ġana. Iauka rakavari na ġeboroġirito tarimari maki evaġa-namorito.

19 Benamo tarimarima mabarari ġeurato-ġoi Iesu beġene ġabi-karaia, korana tu seġuka ġia ġenana eiagomato-ġoi, benamo tarimarima mabarari ġeri keve ġenamato-ġoi.

Deikara beġene iaku e deikara ġeri ai tu rakava

Mataio 5:1-12

20 Iesu eboġeboġeto, benamo eboġe-iaġoto ġena mero eġitarito vau ekirato:

“Gara veġubu tu ġoiaku,
korana Barau ġena Basileia tu ġomi ġemi.

21 Ġomi deidei toma ġevitomini tu boġono iaku,
korana ġomi roġo boġo ġani-maseni bene.

Ġomi deidei toma ġotaġi-taġini tu boġono iaku,
korana boġo rikini bene.

22 Boġono verere bema tarima na beġe baru-vinimini, beġe kira-
fitoġamini, beġe rori-toremimi, ema arami beġe vaġa-rakavarini Tarimarima
Natuna dainai.

23 Moġeri beġe ġorani ġaronai boġono iaku e boġono buri-vaisi ma
vereremi ġesi, korana davami tu asikeikeina gubai. Korana ġia seneri na
maki peroveta tarimari moġesi ġeveirito.

24 Senaġina ġomi ma ġemi
farefare ġutuma tarimami
vetuġami kika,
korana vaġa-iakumi farefareri tu varau ġoġabito bene.

25 Toma ġoġani-maseni tarimami,
vetuġami,
korana beġea vitomini.
Toma ġorikini tarimami,
vetuġami kika,
korana nuġami beġea metoni
e boġoa taġini.

26 Tarimarima na ġekiraġi-varaġe varaġemini tarimami, vetuġami, korana
seneri na maki peroveta tarimari ġofaġofari tu maniġesi ġevaġa-raġerito.”

Ġevaġa-rakavamini tarimari boġono ura-viniri

Mataio 5:38-48

27 “Senaġina au ġoseġaġiguni tarimami akiramini: Ġebaru-vinimini tari-
mari boġono ura-viniri, ġevaġa-rakavamini tarimari veiġa namori boġono
vei-viniri.

28 Ġekira-rakavamini tarimari boġono vaġa-namori ema veiġa rakavari
ġevei-vinimini tarimari ġeri boġono ġurigiuri.

29 Bema tarima ta na taġomu tavi ta beforoani nai, taġomu reke ta maki
bono vinia. Tarima ta na ġemu koudi beġabiani nai, sedi maki asi bono ġabi-
taria, bene ġabia.

30 Ġemu ai beġe noġinoġini tarimari bono viniri ema deikara na ġemu
dagara ta beġabi-rakaiani, ġabiġoina guruġana asi bono vei.

31 Kara ourani tarimarima na ġemu ai beġene veia veiġana, ġia ġeri ai
maki mo veiġa bono veia.

³² Bema ġoura-vinirini tarimari tu ġomi ġeura-vinimini tarimari moġo nai, ġomi ġemi namo tu kara? Rakava tarimari maki ġeura-vinirini tarimari moġo ġeura-vinirini.

³³ O bema veġa namori ġemi ai ġeveini tarimari moġo veġa namori ġovei-vinirini, ġomi ġemi namo tu kara? Rakava tarimari maki mani veġa sebona ġeveiani.

³⁴ O bema ma beġe vini-ġoimini tarimari moġo ġovinirini, ġomi ġemi namo tu kara? Rakava tarimari na maki tarima ġevinirini, murinai tu mabarari ma beġene dava-ġoiri ġetoni.

³⁵ Senaġina ġebaru-vinimini ema ġevaġa-rakavamini tarimari boġono ura-viniri, veġa namori ġeri ai boġono vei, boġono viniri, a tuġu vaġa-voi tuġamaġina asi boġono vei. Benamo davami beġene barego, ema Iarukorokoro Barauna natunai boġono iaġo, korana tu ġia na asi ġevaġa-namoani tarimari e vei-rakava tarimari evaġa-namorini.

³⁶ Boġono vevetuġa-ġwa, ġomi Tamami evevetuġa-ġwani kavana.”

Nuġami ai tarimarima asi boġono vaġa-rakavari

Mataio 7:1-5

³⁷ “Nuġami ai tarimarima asi boġono kira-kerereri. Moġesi tu Barau na maki asi bekiraġimini ġomi tu kerere. Rakava voina tarimarima ġeri ai asi boġono kiraġi-kaua, benamo Barau na rakava voina ġemi ai asi bekiraġi-kauani. Rakava boġono tuġamaġi-fitoġaia, be Barau na maki ġemi rakava bene tuġamaġi-fitoġari.

³⁸ Boġono vini, be Barau na maki bene vinimi, gutumari bene dori-riġori, bene kora-vegogori, bene vonu-fokafoka, bene ġiġiġiġi-seġi, bene bubu-riġoa ġemi ai. Korana aiġesi ġomi ġovinini, Barau na maki moġesi bevinimini.”

³⁹ Iesu na barabore ta ma ekira-vararito, ekirato, “Mata-bubu tarimana na mata-bubu tarimana ta beġori-kauani riba ba? Ba tauri ruarua koufai beġea keto-ġurani?

⁴⁰ Riba vetau merona na evaġa-ribaiani tarimana asi bevanāġiani, senaġina ġena sikuli bevaġa-koriani vau, evaġa-ribaiani tarimana ġesi beġe ilailani.

⁴¹ Kara dainai tarikakamu matanai libika oġitaiani, senaġi ġoi matamu ai ġau tubina tu asi otuġamaġiani.

⁴² Kamara dabarai ġoi tarikakamu okiraiani, okirani, ‘Gata, au na roġo matamu ai libika nakokia,’ senaġina ġoi taugemu matamu ai ġau tubina tu asi oġitaiani? Ġoġaġoġa tarimamu, guine tu ġoi matamu ai ġau tubina nokoki-vaġia roġo, benamo boboġeboġe-ġinikauni vau, tarikakamu matanai libika bono kokia.”

Ġau ta ġwaġwana

Mataio 7:16-20; 12:33-35

⁴³ “Ġau namona beġwani ġwaġwana tu dia rakava, ema ġau rakavana beġwani ġwaġwana tu dia namo.

⁴⁴ Ġau mabarari tu ġwari ai bita ribani. Figi ġwari maki ġau ma ġiniginiri ġerina asi ġebokoni, ema vine ġwari (o grapes) ġauġa ġiniginiri ġeri ai asi ġebokoni.

⁴⁵ Tarima namona na dagara namori nuġanai evaġa-vegogorini dagarari bevaġa-raka-rosirini. Tarima rakavana na dagara asi namori nuġanai evaġa-vegogorini dagarari bevaġa-raka-rosirini. Korana tarima tu nuġana na kara eiaġomani murunai ekiraġirini.”

Numa ġeragani tarimari ruarua

Mataio 7:24-27

⁴⁶ “Karase nai au ġokiraġiguni, ġokirani, ‘Vereġauka, Vereġauka,’ nuġanai au aguruġani veiġari tu asi ġoveirini?”

⁴⁷ Navaġa-ribami, deikara au ġegu ai eiaġomani, au ġegu guruġa ema seġaġini ma veġari eveirini tu kamasi.

⁴⁸ Ġia tu tarima ta ġena numa eragaiato kavana. Guri ekwa-variġo kwareġaiato, ema fore iatanai evaġa-ruġaiato, benamo ġabata baregona eragato, mo numa edoriato, senaġi asi eketoto, korana fore iatanai eragaiato nai.

⁴⁹ A tarima ta au ġegu guruġa eseġaġirini, senaġi veġari tu asi eveirini, ġia tu numa eragaiato nai, tano moirana iatanai moġo evaġa-ruġaiato, ġabata na mo numa edoriato nai, eketo-tarito, benamo eġwa-rovorovoato.”

7

Roma vetari verena ġena vetuġunaġi merona

¹ Iesu na moġeri guruġa mabarari tarimarima ġoirari ai ekiraġi-ġosirito vau, Kaperanauma vanuġanai eraka-toġato.

² Monai Roma vetari verena ta etanuto-ġoi. Ġena vetuġunaġi merona, euravini-baregoato-ġoi merona, ekeve-rakavato, dori emaseto-ġoi.

³ Vetari verena na Iesu varina eseġaġiato, benamo Iuda tarima baregori kota etuġu-iaġorito, Iesu beġene noġia, bene iaġoma, ġena vetuġunaġi merona benema vaġa-namoa.

⁴ Benamo Iesu ġenai ġeiaġoto, ma nuġari mabarari ġesi ġenoġiato, ġekirato, “Mai vetari verena tu tarima namona naima bono vaġa-kavaia.

⁵ Korana ġia na ġita besera eura-vinirini, ema ġai ġema rubu maki ġia na eragaiato.”

⁶ Iesu ġia ġesi ġeiaġoto. Numa ġeraka-kavinaġiato-ġoi nai, vetari verena na ġatana kota etuġu-iaġorito Iesu ġoirana ġana, benamo vetari verena ġena guruġa Iesu ġekira-varaiato, ġekirato, “Vereġauka, asi novekwaragi, au tu asi ilaila, ġoi ġegu numai boraġekauni.

⁷ Au maki asi ilaila, ġoi ġemu ai baiaġosini. Senaġi ġoi noguruġa moġo, benamo au ġegu vetuġunaġi merona benamoni.

⁸ Au maki tarima kota ġeri veġitaġau gabureri ai ema vetari tarimari o soldia tu au gaburegu ai. Au na ta bakiraiani, ‘Noraka!’ benamo berakani, ma ta bakiraiani, ‘Noiaġoma!’ benamo beiaġomani. Ema au ġegu vetuġunaġi merona bakiraiani, ‘Maiġa noveia!’ benamo beveiani.”

⁹ Iesu na mai guruġa eseġaġiato nai, eġaba-rakavato, eruġa-kureto, ġia murinai ġerakato tarimari ġutuma evaġa-guruġarito, ekirato, “Au na ġomi akiramini, veġabidadama maiġesi kavana Isaraela nuġanai asi adoġariato.”

¹⁰ Benamo vetari verena na etuġurito tarimari ma ġeġenoġito ġia ġena numa ġana. Keve merona ġedoġariato, ġena keve varau ekorito.

Iesu na vabu ta natuna mase na evaġa-maġuri-ġenoġiato

¹¹ Moġa murinai Iesu tu vanuġa ta ġana eiaġoto arana Nain. Ġena mero ema tarimarima ġutuma maki ġia ġesi ġeiaġoto.

¹² Vanuġa nuġanai roġosi ġene raka-toġa nuġanai, mase ta vanuġa nuġana na ġeġwa-rosiato-ġoi. Vabu ta natuna merona ġora ġereġa emaseto. Vanuġa tarimari ġutuma na vabu ġekavaiato.

13 Iesu na mo vabu eġitaiato, benamo evetuġaiato, ekiraiato, ekirato, “Asi notaġi.”

14 Benamo Iesu eraka-kavi-iaġoto, mase mauġana eġabi-karaiato. Mauġa ġeġwaiato tarimari ġeruġa-tarito. Benamo Iesu ekirato, “Mero futua, akiramuni, novariġisi!”

15 Benamo etanu-vaisito, eguruġato. Moġa murinai Iesu na ġia sinana ma evini-ġenogoiato.

16 Mabarari gari na evaġa-vonurito. Barau ġevaġa-raġeato, ġekirato, “Peroveta tarimana barana ta ġita fakarai bema fofori!” ema, “Barau na ġena bese tarimari benema vaġa-kavari ġana beiaġoma!”

17 Benamo mai veġa varina Iudea mabaranai ema Iudea sevina vanuġari mabarari ai ġefiu-rovorovoato.

Iesu ma Ioane Babatiso Mataio 11:2-19

18 Ioane ġena mero na mai dagara mabarari ġeġorato dagarari ġekiravaraiato. Benamo Ioane na ġena mero ruarua ekearito,

19 etuġurito Vereġauka ġenai, ġene danāġia, “Ioane na ekiraġiatio, beiaġomani tarimana tu ġoi, ba tarima boruna ta baġana vaġa-nogaia?”

20 Tauri ruarua Iesu ġenai ġeraġasito, benamo ġekirato, “Ioane Babatiso na betuġuma, bekira, ‘Ġia na ekiraġiatio beiaġomani tarimana tu ġoi, ba tarima boruna ta baġana vaġa-nogaia?’ ”

21 Mo aoa ai Iesu na tarimarima ġutuma evaġa-namorito, keve tarimari, midġu ġeġanito-ġoi tarimari, iauka rakavari na ġeboroġirito tarimari. Mata-bubu tarimari ġutuma maki matari evaġa-iaġarito.

22 Benamo Iesu na tauri ruarua evaġa-veserito, ekirato, “Ġoġenoġoi, ġomi na boġo ġitari e boġo seġaġiri veġari Ioane boġono kira-varaia: Mata-bubu tarimari ġeboġeboġeni, kwaku rakava tarimari ġerakani, lepera tarimari ġenamoni, seġa-bubu tarimari ġeseġaġini, mase tarimari ġevarigisi-ġenoġoini, ema asi ġeri-ġari tarimari ġeri ai Vari Namona eġobata-vinirini.

23 Ġena veġabadadama au ġegu ai asi beraga-kwaneani tarimana tu eiakuni!”

24 Ioane ġena vetuġunaġi tarimari ġerakato vau, Iesu na ġevevogoto tarimari evaġa-guruġarito, Ioane varina ġeri ekiraġiatio, ekirato, “Kara boġono ġitaia ġana tano fakana ġana ġoiāġoto? Gobu iavara na ekwari-ġarevaiani ġitaġitana ġoiāġoto?”

25 Kara boġono ġitaia ġana ġoiāġoto? Dabuġa namona eveiani tarimana ġitaġitana ġoiāġoto? Asiġina, dabuġa namori ġeveirini tarimari ema ġaniġani namori ġeġanirini tarimari tu vere tarimari ġeri numai ġetanuni!

26 Be, kara boġono ġitaia ġana ġoiāġoto? Peroveta tarimana dainai? Aba! Akiramini, ġoġitaiato tarimana tu peroveta tarimari mabarari evanāġirini.

27 Ioane varina Buka Veāġai maiġesi etoreato, Barau ekirato,

‘Au na ġegu vetuġunaġi tarimana tu batuġu-guineani, ġemu dabara ġoiramu ai vaġa-maġatana.’ ”

28 Iesu ma ekirato, “Akiramini, mai tanobarai beġe maġuri tarimari mabarari fakari ai ta na Ioane asi bevanaġiani. Senaġi Barau ġena Basileia nuġanai gabi tarimana na Ioane tu evanaġiani.”

29 Tarimarima mabarari ema takesi gogo tarimari maki mai guruḡa geseḡaḡiato nai, ḡia na Barau ḡena dabara ḡevaḡa-moḡoniato, Ioane ḡena babatiso ḡeḡabiato.

30 Senaḡi Farisea tarimari e taravatu ḡevevaḡa-riba iaḡiato-ḡoi tarimari na Barau ḡena vevaḡa-maḡuri dabarana ḡia ḡeri ai ḡetuḡamaḡi-fitoḡaiato. Ioane ḡena babatiso ḡia ḡeri ai asi ḡeḡabi-raḡeato.

31 “Toma ḡuru tarimari tu deikarari ḡesi bana vaḡa-ilailari? ḡia tu kamasi?”

32 ḡia tu noḡa mero keiri kavana, vanuḡa ḡatamanai ḡetanu-taḡoni, ḡeḡereni, tavi ta merori na tavi tai ḡekea-vinirini, ḡekirani, ‘Ḗai tu veḡaraḡo vererenai gita ḡalauto-ḡoi ḡomi ḡemi, senaḡi ḡomi tu asi ḡobarato-ḡoi! Ḗai tu mase mariri ḡaḡabito-ḡoi, senaḡi ḡomi tu asi ḡotaḡito-ḡoi!’

33 Korana tu Ioane Babatiso eiaḡomato, eḡani-veaḡato ema vine nanuna asi eniuato. Benamo ḡomi ḡokirani, ‘Ḗia tu iauka rakavana na eboroḡiato,’ ḡotoni.

34 Tarimarima Natuna eiaḡomato, ḡia tu ḡaniḡani ta asi eruḡaiani. Benamo ḡomi ḡokirani, ‘Ḗia tu boḡeka tarimana ema vine nanuna eniu-ḡutumani tarimana, takesi gogo tarimari e vei-rakava tarimari ḡatari,’ ḡotoni.

35 Senaḡi Barau ḡena iaunega ḡeḡabi-raḡeani tarimari na Barau ḡena iaunega ḡevaḡa-moḡoniani.”

Iesu tu Simona, Farisea tarimana, ḡena numai

36 Farisea tarimana ta na Iesu enoḡiato, beḡene ḡaniḡani-vegogo etato. Benamo Iesu eiaḡoto ḡena numa ḡana, ḡaniḡani gabunai etanu-tarito.

37 Mo vanuḡai vavine ta etanuto-ḡoi, ḡia tu mata-boraḡa vavinena. Ḗia eseḡaḡito, Iesu tu Farisea tarimana ḡena numai eḡaniḡano-ḡoi, benamo fore kavabuna namona, alabasta forena na ḡeveiatio kavabuna, nuḡanai tu muramura ma bonana namona eḡabi-kauato,

38 eiaḡoto Iesu murinai eritoḡo-tarito, kwakuna koranai etaḡi-rakavato, benamo matana nanuna na Iesu kwakuna evaḡa-nufarito. Benamo ḡwina na ma edau-kaukaurito, kwakuna everauato, muramura ma bonana namona kwakunai ebubuato.

39 Farisea tarimana na, mo veḡa eḡitaiao nai, ḡia nuḡanai maiḡesi etuḡamaḡito, “Mai tau bema moḡoni peroveta tarimana nai tu, ḡia bere riba, ḡia eḡabi-karaiani vavinena tu deikara. Ḗia bere riba, mo vavine tu mata-boraḡa vavinena!”

40 Benamo Iesu na ḡia evaḡa-guruḡaiato, ekirato, “Simona, au tu ma ḡegu guruḡa ḡoi ḡemu ai.” Simona ekirato, “Vevaḡa-riba taumu, noguruḡa, be naseḡaḡi.”

41 Iesu ekirato, “Tarima ruarua na moni evinito-ḡoi tarimana ḡenai moni ḡeḡabi-toreto. Tarima ta na silva moniri sinau imaima (500) eḡabi-torerito, ma ta na tu silva moniri gabana imaima (50) eḡabi-torerito.

42 Senaḡi mai tarima ruarua na ḡeri ḡabitore vaḡa-ḡenoḡoina tu gwaḡiḡi rakava nai, moni evinito-ḡoi tarimana na ḡeri ḡabitore etuḡamaḡi-fitoḡaiato moḡo. Dei na mo tarima euravini-baregoato?”

43 Simona evaḡa-veseto, ekirato, “Au atuḡamaḡini tu, eḡabitore-baregoto tarimana.” Iesu ekirato, “Oi, ḡemu vaḡa-vese tu maoro.”

44 Moḡa murinai Iesu etanu-kureto, vavine eḡoiraiato vau, Simona ekirato, “Mai vavine oḡitaiani? Au ḡoi ḡemu numai bama raḡekau nai,

kwakugu ġurigi-ġurigina nanuna ta asi boġwa-iaġomaia, a mai vavine na tu matana gorana na au kwakugu beġurigia vau, ġwina na bedau-kaukauri.

⁴⁵ Ġoi na ġita ġera veġabirage veraunai au asi boġabi-raġegu, a mai vavine oġitaiani, roġosi bene doko au kwakugu roġo everauani.

⁴⁶ Ġoi na debagu ai diġa ta asi bobubua, a ġia tu au kwakugu muramura ma bonana namona na bevaġa-fari vekoraġiri.

⁴⁷ Moġa lorinai au na ġoi akiramuni, ġena rakava ġutuma, senaġi Barau na varau betuġamaġi-fitoġari. Moġa lorinai ġena veuravini tu barego. A ġena rakava koturi moġo etuġamaġi-fitoġarito tarimana tu ġena veuravini maki asi barego.”

⁴⁸ Benamo Iesu na mai vavine ekiraiato, ekirato, “Ġemu rakava varau bama tuġamaġi-fitoġari.”

⁴⁹ Ġia ġesi ġeġaniġani-vegogoto tarimari ġevedanaġi-vedanaġito, ġekirato, “Mai tu kamara tarima, be ġia na tarima ġeri rakava maki etuġamaġi-fitoġarini etoni?”

⁵⁰ Senaġi Iesu na vavine ma evaġa-guruġaiato, ekirato, “Ġemu veġabidadama na varau bevaġa-maġurimu. Maivau noiaġo ma nuġa namomu ġesi.”

8

Vavine kota Iesu ġesi ġeiaġoto

¹ Moġa murinai Iesu na vanuġa barari e vanuġa keiri eiaġo-vinirito-ġoi, Barau ġena Basileia Varina Namona eġobata-iaġiato-ġoi. Ġena mero gabanana ruarua (12) ġia ġekavaiato.

² Vavine kota maki ġia ġesi ġeiaġoto. Iesu na iauka rakavari mo vavine ġerina elai-vaġirito ema ġeri keve evaġa-namorito. Ta tu Maria, arana ġevatoato Magadala vanuġana vavinena. Mai tu iauka rakavari imaima ruarua (7) ġia ġenana elai-vaġirito vavinena.

³ Ma ta tu Ioana, Kusa ġaraġona. Kusa tu Heroda ġena farefare eġita-ġaurito-ġoi tarimana ta. Ta tu Susana ema vavine vovoka maki. Moġeri vavine na Iesu ma ġena mero ġeri farefare na ġevaġa-kavarito.

Barabore - Iaraġa tarimana widi ġueri evaroto

Mataio 13:1-9; Mareko 4:1-9

⁴ Tarimarima ġutuma bara ġevegogoto, vanuġa mabarari na Iesu ġenai ġeiaġoto. Benamo ġia na ġeri barabore ta ekiraġiato, ekirato,

⁵ “Iaraġa tarimana vamoka ġana eiaġoto, ġena widi ġueri bene fiu-rovorovori ġana. Efiurito-ġoi nai, kota dabarai ġeketoto. Benamo tarimarima na ġefana-veġonurito ema guba manuri na ġeġanirito.

⁶ Kotari tu fore tanonai ġeketoto. Ġetubuto, senaġi asikauna ġemaraito, korana tano tu asi nanuna nai.

⁷ Kotari tu ġauġa ġiniġiniri nuġari ai ġeketoto. Benamo ġauġa ġiniġiniri ġesi ġetubu-sebonato, senaġi varovaro dagarari ġetuturarito nai ġemaseto.

⁸ Kotari tu tano namonai ġeketoto. Benamo ġetubu-ġinikauto, ġeġwato, tata ġwana sinau ta (100).” Benamo Iesu garona evaġa-baregoato, ekirato, “Ma seġana tarimana bene seġaġi.”

Kara dainai Iesu na barabore ekiraġirito

Mataio 13:10-17; Mareko 4:10-12

⁹ Ġena mero na Iesu ġedanaġiato mo barabore anina tu kara.

10 Iesu evaġa-veseto, ekirato, “Barau ġena Basileia guruġari vekuretoġari ġemi ai evaġa-foforirini, senaġi mabarari tu barabore ai avaġa-guruġarini, beġene ġita, senaġi anina asi beġene ribaia, beġene seġaġi, senaġi asi beġene tuġamaġi-fakaia.”

Widi ġueri baraborena anina

Mataio 13:18-23; Mareko 4:13-20

11 Mai barabore anina tu maġa: Widi ġueri tu Barau ġena guruġa.

12 Dabarai ġeketoto widi ġueri tu tarimarima na Barau ġena guruġa ġeseġaġiani. Senaġi Satani eiaġomani, Barau ġena guruġa ġia nuġari na eġabi-vaġirini, Vari Namona beġe vaġa-moġoniani e beġe maġurini garina.

13 Tano ma forenai widi ġueri ġeketoto tu tarimarima na Barau ġena guruġa ġeseġaġiani e ma iakuri ġesi ġeġabi-raġeani. Senaġi ġia tu noġa tarima asi lamuri kavana. Nega-kotuna moġo Barau ġena guruġa ġekorana-iaġiani, senaġi veribaġani heragaġiani nai, beġe ketoni.

14 Ġauġa ġiniġiniri nuġari ai ġeketoto widi ġueri tu tarimarima na Barau ġena guruġa ġeseġaġiani, senaġi ġetuġamaġi-ġutumani, tanobara farefareri ġetuġamaġi-gogo gogorini ema tanobara ġena maġuri iakuri na Vari Namona elau-tariani. Moġa lorinai ġwaġwa namori asi ġeġorani.

15 Senaġi tano namonai ġeketoto widi ġueri tu tarimarima na Barau ġena guruġa ġeseġaġiani, ma nuġari namori e ma manauri ġesi ġeġabi-raġeani, ġeġabi-tariani mo, ġwaġwa namori ġeġorani.

Lamefa toretorena gabuna

Mareko 4:21-25

16 “Tarima ta lamefa begabuani nai tu, dia ġuro na beġoġoi-tariani o fata gaburenai betoreani. Asiġina, ġia tu lamefa toretorena fatanai betorekauani. Benamo tarima beġe raġekauni nai, mabarari na mama beġene ġitaia ġana.

17 Vekuretoġa dagarari mabarari beġe foforini, veġuni guruġari beġe ribani e beġe kiraġi-foforirini.

18 Moġa lorinai ġoseġaġirini guruġari loriri boġono toreri. Korana ma ġena seġaġi tarimana Barau na riba e tuġamaġi-faka beviniani, asi ġena seġaġi tarimana, ġia etuġa-maġini ma ġena tuġamaġi-faka, senaġi ġena tuġamaġi-faka aiġesi misina maki beġabi-vaġiani.”

Iesu sinana ema tarina merori

Mataio 12:46-50; Mareko 3:31-35

19 Iesu sinana ema tarina merori ġia ġenai ġeiaġoto, senaġi tarimarima ġutuma nai, asi ġeri dabara Iesu ġenai beġe raka-kavini.

20 Tarima ta na Iesu ekira-varaiato, ekirato, “Ġoi sinamu ema tarimu tu murikai ġeruġa-taġoni, ġoi ġevetaumuni.”

21 Benamo Iesu na mabarari ekirarito, “Barau ġena guruġa ġeseġaġirini e ġeveirini tarimari tu au sinagu ema au tarigu.”

Iesu na iavara e geta o ureure ekira-ġoirito

Mataio 8:23-27; Mareko 4:35-41

22 Ġaro ta Iesu ma ġena mero ġesi ġasi ai ġeraġekauto, benamo Iesu na evaġa-guruġarito, ekirato, “Siveġasi-vanaġi, kou mo rekena ġana.” Benamo ġeiaġoto.

²³ Ĝeiaiĝoto-ĝoi nuĝanai, Iesu egena-maseto. Benamo iavara asikei kou ai eraĝasito, benamo ureure ĝasi nuĝanai ĝevebubu-ĝurato nai, ĝasi dori eburuto.

²⁴ Benamo ĝena mero Iesu ĝenai ĝeiaiĝoto, ĝevaĝoato, ĝekirato, “Vevaĝa-riba taumu o, vevaĝa-riba taumu o, ĝita tu mai taburuni!” Iesu evariĝisito, iavara e ureure ekira-ĝoirito, benamo ĝedokoto, ĝemeĝomeĝo-tarito.

²⁵ Iesu na ĝena mero evaĝa-guruĝarito, ekirato, “Ĝomi ĝemi veĝabidadama tu ainai?” Ĝia ĝegarito e ĝeĝaba-rakavato nai, tauĝeri mo ĝevedanaĝi-vedanaĝito, ĝekirato, “Mai tarima tu dei? Ĝia na iavara e ureure evaĝa-guruĝarito nai, garona ĝeseĝaĝiani!”

*Iesu na iauka rakavari na ĝeboroĝiato tarimana evaĝa-namoato
Mataio 8:28-34; Mareko 5:1-20*

²⁶ Monana Iesu ma ĝena mero ĝeiaiĝoto, Gerasa (o Gadara) tarimari ĝeri gabu ai ĝeraĝasito, Galilea tavi ta kefonai.

²⁷ Iesu ĝasi na eraka-riĝoto nuĝanai, iauka rakavari na ĝeboroĝiato tarimana ta eiaĝomato Iesu ĝenai. Ĝia tu mo vanuĝa tarimana. Kai-veĝata asi dabuĝana etanuto-ĝoi, dia numai, senaĝi gara gabuna fore kouĝari ai.

²⁸ Ĝia na Iesu eĝitaiato nai, ekoĝo-fouto, benamo Iesu kwakuna koranai eketo-tarito, ekirato, “Iesu o, ĝoi Iaru-korokoro Barauna Natuna, kara au ĝegu ai noveia otoni? Anoĝimuni, asi bono vaĝa-midigu midigugu!”

²⁹ Ĝia moĝesi ekirato, korana Iesu na iauka rakavana evaĝa-guruĝiaito, mo tarima ĝenana neraka-vaĝi. Nega ĝutuma iauka rakavana na egabiato-ĝoi, kwakuna e ĝimana seini na ĝebarurito-ĝoi, senaĝi seini edabu-ĝuturito-ĝoi, benamo iauka rakavana na tano fakana ĝana eĝwa-iaĝoato-ĝoi.

³⁰ Iesu na edanaĝiato, ekirato, “Ĝoi aramu tu deikara?” Ĝia na evaĝa-veĝeato, ekirato, “Au aragu tu ‘Gutuma,’” korana iauka rakavari vovoka na ĝeboroĝiato nai.

³¹ Benamo iauka rakavari na Iesu ĝenoĝiato-ĝoi, guri variĝo kwareĝana ĝana asi bene tuĝu-iaĝori. (Mo tu iauka rakavari ĝeri dibura gabuna).

³² Monai bai serina tu ĝoro gabakanai ĝedokadokato-ĝoi. Moĝa lorinai iauka rakavari na Iesu ĝenoĝiato, bai nuĝari ai ĝeraka-toĝa, ĝetato. Benamo Iesu na ekirarito, “Be, ĝoiiaĝo!”

³³ Benamo iauka rakavari mo tarima ĝenana ĝeraka-vaĝito, bai ĝeri ai ĝeraka-toĝato. Benamo moĝeri bai ĝeĝwa-bubu-lausiato, lalaĝa na ĝekokosi-firiĝoto, kou ai ĝevebora-maseto.

³⁴ Bai ĝitaĝauri tarimari na kara eĝorato dagarana ĝeĝitaiato, benamo ĝeragato, mo vari ĝea fiuato vanuĝa baranai e vanuĝa keiri ai.

³⁵ Tarima-rima ĝeĝoto-iaĝoto, kara eĝorato dagarana ĝea ĝitaiĝa ĝana. Iesu ĝenai ĝeraĝasito nai, ĝia na mo tarima, iauka rakavari vovoka ĝia ĝenana ĝeraka-vaĝito tarimana, ĝedoĝariato, Iesu kwakuna koranai etanu-taĝoto-ĝoi ma dabuĝana e ĝena tuĝamaĝi maki maoro. Benamo ĝia mabarari ĝegarito.

³⁶ Mo veĝa ĝeĝitaiato tarimari na iauka rakavari na ĝeboroĝiato tarimana kamasi enamoto varina tarimarima ĝekira-vararito.

³⁷ Benamo Gerasa tano tarimari mabarari na Iesu ĝenoĝiato, neraga-kwaneri ĝetato, korana ĝegari-rakavato nai. Moĝa lorinai Iesu ĝasi ai eraĝekauto, ma eĝenoĝoito.

38 Iauka rakavari ġia ġenanana ġeraka-vaġito tarimana na enoġiato, Iesu ġesi bene iaġo etato. Senaġi Iesu na etuġu-ġenoġoiato, ekirato,

39 “Noġenoġoi ġemu numa ġana. Barau na ġoi ġemu ai beveia veġana tarimarima bono kira-varari.” Benamo ġia eiaġoto, ġena vanuġa tarimari mabarari Iesu ġena veġa ġia ġenai ġeġorato eġobata-iaġirito.

Iesu na kekeni ta ema vavine ta evaġa-namorito

Mataio 9:18-26; Mareko 5:21-43

40 Iesu kou mo reke na ma eġenoġoito nai, tarimarima ġutuma na ġeġabi-raġeato ma iakuri ġesi, korana mabarari na Iesu ġevaġa-nogaiato-ġoi.

41 Benamo tau ta arana Iairo, rubu ġitaġauna tarimana, Iesu ġenai eiaġoto, kwakuna koranai evetui-tarito, enoġiato, ġena numa ġana ġeiaġo etato,

42 korana ġia natuna kekenina, ġora ġereġa, dori emaseto-ġoi nai. Ġena laġani tu gabanana ruarua (12).

Iesu eiaġoto-ġoi nuġanai, tarimarima ġutuma na ġeraka-vebibi vebibiato-ġoi.

43 Moġa nuġanai vavine ta, ġena keve tu rara kevena; laġani gabanana ruarua (12) ekeve-iaġiato. Ġia na ġena farefare e moni mabarari evaġa-koririto doketa ġeri ai ġena keve beġene vaġa-namoa ġana. Senaġi ta na asi evaġa-namoato.

44 Tarimarima ġutuma muriri ai vau evebibi-toġato, ma tavi ta na ea raka-risito mo, Iesu sevina i ea raġasito. Iesu ġena dabuġa dudunai eveġabikauto. Benamo vaġa-sebo ġena rara kevena ekorito.

45 Iesu evedanaġito, ekirato, “Dei na au beġabi-karagu?” Mabarari ġevekura-ġuniġauto, ġekirato, “Au tu asiġi.” Benamo Petero ekirato, “Ve-vaġa-riba taumu, tarimarima oġitarini, ġekou-ġeġeraġimuni ema ġeraka-vebebesi vebebesini.”

46 Senaġi Iesu ekirato, “Ta na au beġabi-karagu, korana au ribagu, seġuka au ġeguna varau beraka-vaġi.”

47 Mai vavine varau eribato, ġia asi ġena vekuretoġa dabarana, benamo ma ġoġo-ġoġona ġesi eiaġoto, Iesu kwakuna koranai evetui-tarito, Iesu kara dainai eġabi-karaiato ema ġena keve vaġa-sebo ekorito varina ekiraġi-foforirito tarimarima ġoirari ai.

48 Benamo Iesu na ekiraiato, ekirato, “Natugu, ġemu veġabidadama na bevaġa-namomu. Be, ma nuġa namomu ġesi noiaġo.”

49 Iesu roġo mo eguruġato-ġoi nuġanai, tarima ta rubu ġitaġauna tauna Iairo ġena numa na eiaġomato, ekirato, “Natumu varau bemase. Vevaġa-riba tauna asi novaġa-vekwaraġia.”

50 Iesu na mo guruġa eseġaġiato nai, Iairo ekiraiato, ekirato, “Asi bono gari, bono veġabidadama moġo, benamo ġia tu bemaġurini.”

51 Iairo ġena numai eraġasito, benamo Iesu na tarimarima ekirarito, numai asi beġene raġekau, Petero, e Iakobo (o Iames), e Ioane, ema kekeni tamana ma sinana moġo.

52 Mabarari tu ġetaġito-ġoi ema ġetaġi-guruġa guruġato-ġoi nuġanai, Iesu ekirato, “Asi ġotaġi, kekeni tu asi bemase, ġia tu egenani moġo.”

53 Tarimarima na ġerikiriki-iaġiato, korana ġia ribari, kekeni tu emaseto.

54 Senaġi Iesu na kekeni ġimanai eġabito, evaġa-guruġaiato, ekeato, “Natugu o, novariġisi!”

⁵⁵ Benamo iaukana eġenoġoito, ma emagurito, vaġa-sebo evarigisito. Iesu na ekirarito, kekeni beġene ġubua.

⁵⁶ Ġia tamana sinana ġeġaba-rakavato, senaġi Iesu na evaġa-naġirito, mai veiġa varina tarima ta asi beġene kira-varaia.

9

Iesu na ġena mero gabanana ruarua (12) etuġurito

¹ Iesu na ġena mero gabanana ruarua (12) ekea-vegogorito, seġuka evinirito, iauka rakavari mabarari beġene lai-vaġiri, ema keve tarimari beġene vaġa-namori ġana.

² Benamo etuġurito, Barau ġena Basileia varina beġene ġobata-iaġia, ema keve tarimari beġene vaġa-namori.

³ Evaġa-guruġarito, ekirato, “Ġemi iaġoiāġo ai kara ta asi boġono ġabikaua, togoi, dura, ġaniġani dagarari, moni, ema sedi ruarua maki asi boġono ġabi.

⁴ Beġe ġabi-raġemini numanai boġono tanu, bene iaġo mo, vanuġa boġono raga-kwanea.

⁵ Bema vanuġa tai asi beġe ġabi-raġemini nai, mo vanuġa boġono raga-kwanea, kwakumi kauri boġono kwari-ketoketori, ġia ġeri kira-sirivaġi vaġa-moġoniri ġana.”

⁶ Iesu ġena mero ġerakato, vanuġa tata ġana ġeiaġoto, Vari Namona ġeġobata-iaġiato-ġoi ema keve tarimari ġevaġa-namorito-ġoi gabu mabarari ai.

Heroda ġena daradara

Mataio 14:1-2; Mareko 6:14-16

⁷ Heroda, Galilea tanona verena, Iesu varina eseġaġiato, benamo edaradara-rakavato, korana tarima kota ġekirato, Ioane Babatiso tu mase na ma evarigisi-ġenoġoito.

⁸ Ma kota ġekirato, Elia efororito. Ma kota ġekirato, peroveta tarimana guinena ta evarigisi-ġenoġoito, ġetato.

⁹ Senaġi Heroda ekirato, “Ioane debana tu au na abasi-ġutuato. Be, mai varina aseġaġiani tarimana tu dei?” Heroda eurato Iesu bene ġitaia.

Iesu na tarimarima daġara imaima (5,000) eġuburito

Mataio 14:13-21; Mareko 6:30-44; Ioane 6:1-13

¹⁰ Iesu ġena apostolo ma ġeġenoġoito, karakara ġeveirito veiġari variri Iesu ġekira-varaiato. Benamo Iesu na eġori-ġerevaġirito, vanuġa ta arana Betesaïda ġana eġori-iaġorito.

¹¹ Senaġi tarimarima na ġeseġaġirito nai, Iesu murina na ġerakato. Benamo Iesu na eġabi-raġerito, Barau ġena Basileia varina eġobata-vinirito ema keve tarimari evaġa-namorito.

¹² Ġaro evarigoto-ġoi nuġanai, ġena mero gabanana ruarua (12) Iesu ġenai ġeiaġoto, ġekirato, “Mai tarimarima notuġuri, be kavinaġi vanuġari ai ema vamoka vei tarimari ġeri tanu gaburi ai, ġari ġaniġani e gena-gaburi ġea vetau, korana mai tu tano fakana nai.”

¹³ Senaġi Iesu na evaġa-guruġarito, ekirato, “Ġomi na ġaniġani ġoviniri.” Ġia na ġevaġa-veſeato, ġekirato, “Ġai ġemai beredi tu imaima (5) ema maġani-kone ruarua (2) moġo. Ġoi ourani ġai baġana iaġo, ġaniġani baġana voiri mai tarimarima ġutuma ġari?”

¹⁴ Korana tau mabarari tu 5,000 kavana.

Iesu na ġena mero ekirarito, ekirato, “Tarimarima ġovareri doġoro ta gabana imaima (50), doġoro ta gabana imaima (50), benamo ġene tanutanu-tari.”

¹⁵ Iesu ekirato lorinai ġeveiato, tarimarima mabarari ġevaġa-tanutanu-taririto.

¹⁶ Moġa murinai Iesu na beredi imaima e maġani-kone ruarua eġabirito, gubai egaga-raġeto, Barau evaġa-namoato vau, ebuki-ġutuġuturito ema ekini-misimisirito, benamo ġena mero evinirito beġene vareri.

¹⁷ Tarimarima na ġeġanirito nai, mabarari ġeġani-maseto. Gabivau Iesu ġena mero na ġaniġani kwari ġevaġa-vegogorito, boseġa gabanana ruarua (12) ġevaġa-vonurito.

Petero na Iesu tu Kerisona ekiraġito

Mataio 16:13-19; Mareko 8:27-29

¹⁸ Garo ta Iesu ġereġana eġurigurito, ġena mero maki ġia ġesi. Benamo Iesu na edanaġirito, ekirato, “Tarimarima tu kara ġetoni au tu dei?”

¹⁹ Ġia ġevaġa-veseto, ġekirato, “Kota ġekirani ġoi tu Ioane Babatiso, ma kota tu Elia, ma kota tu peroveta tarimana guinena ta evariġisi-ġenoġito.”

²⁰ Iesu na ekirarito, ekirato, “Senagi ġomi tu kara ġotoni au tu dei?” Petero na evaġa-veseato, ekirato, “Ġoi tu Barau ġena Keriso, ġia na ekiraġi-toreato vevaġa-maġuri tauna.”

Iesu ġena mase ema variġisi-ġenoġoi ekiraġirito

Mataio 16:20-28; Mareko 8:30-9:1

²¹ Iesu na elaunaġirito, ġia varina tarima ta asi beġene kira-varaia.

²² Ġia ma ekirato, “Tarimarima Natuna midigu vovoka roġo beġanini. Iuda vereri, e Rubu Veaġa vereri baregori, e taravatu ġevevaġa-riba iaġiani tarimari na beġe ruġaiani; ema beġe vaġi-maseani maki, senaġina ġaro vaġa-toitoinai vau mase na ma bevariġisi-ġenoġoini.”

Maġuri guruġari o Iesu murinai raka

Mataio 10:33; 10:39; Ioane 12:25

²³ Iesu na ġia mabarari evaġa-guruġarito, ekirato, “Bema tarima ta eurani au murigu ai bene raka etoni tarimana, tauġena bene vekira-fitoġa, ġena satauro bene ġwaia ġaro mabarari ai, au murigu ai bene raka.

²⁴ Korana deikara ġena maġuri moġo lorina etoreani tarimana, ġena maġuri befitoġaiani. A deikara au daigu ai ġena maġuri befitoġaiani tarimana, ġena maġuri asi bevei-rekwarekwaiani.

²⁵ Bema tarima ta na tanobara mabarana uranai ġena maġuri befitoġaiani, a ġia tauġena ġena maġuri bevaġa-rakavaiani, ġena namo tu kara ġia ġenai?

²⁶ Bema tarima ta na au ema ġegu guruġa maiakari na bemaikaiani nai tu, Tarimarima Natuna na maki ġia bemaika-viniani ġena iaġomai, ma mamana marevana e seġuka baregona ġesi, Tamana ma aneru veaġari ġesi beġe iaġomani ġaronai.

²⁷ Moġoni akiramini, mainai ġeruġa-taġoni tarimari kota asi roġo beġe maseni, Barau ġena Basileia beġe ġitaiani.”

Iesu vetoġana eirauto

Mataio 17:1-13; Mareko 9:2-13

²⁸ Mai guruġa ekiraġi-ġosiato murinai, ġaro imaima toitoi (8) kavana ġevanaġito vau, Iesu na Petero, e Ioane, ema Iakobo (o Iames) eġabirito, ġoro ta ġana ġevarageito bene ġuriguri ġana.

²⁹ Eḡauḡauto-ḡoi nuḡanai, ḡia ḡoirana vetoḡana eirauto, ema ḡena dabuḡa ekuro-ḡarogaro.

³⁰ Benamo tarima ruarua ḡefoforito, Mose ma Elia, Iesu ḡesi ḡeguruḡa guruḡato-ḡoi.

³¹ Tauri ruarua ma marevari e mamari ḡesi ḡefoforito, Iesu ḡesi ḡeguruḡato, Ierusalemi bemaseni ḡetato, Barau ḡena ura ilailanai.

³² Petero ma karona ḡegenamaseto, senaḡi ma ḡetataḡato nai, Iesu ma marevana e mamana ḡesi ḡeḡitaiato, ema ḡia ḡesi ḡeruḡa-taḡoto tarimari maki ḡeḡita-rito.

³³ Tauri ruarua Iesu ḡeraga-kwanea ḡana nuḡanai, Petero na Iesu eki-raiato, ekirato, “Vevaḡa-riba taumu, namo vedaurea ḡita tu maiḡera, be mainai fouto toitoi ḡaragari. Ta ḡoi ḡemu, ta Mose ḡena, ta Elia ḡena.” ḡia asi ribana kara ekiraḡiato.

³⁴ ḡia roḡo eguruḡato-ḡoi nai, magube na ema iauka-taririto. Magube na eḡabi-ḡaurito nai, ḡia ḡegarito.

³⁵ ḡaro ta magube nuḡana na ekea-rosito, ekirato, “Mai tu au Natugu, aḡabi-hidiato tarimana, ḡia boḡono seḡaḡi-vinia!”

³⁶ Mo ḡaro ekorito nai, Iesu ḡereḡana ḡeḡitaiato. Mai veḡa ḡeḡitarito dagarari, tarima ta asi ḡekira-varaiato mo negai.

Iesu na iauka rakavana na eborogiatu merona evaḡa-namoato

Mataio 17:14-21; Mareko 9:14-29

³⁷ ḡaro ta ekorito murinai, ḡia tu ḡoro na ḡeraka-variḡoto-ḡoi nuḡanai, tarimarima ḡutuma lelevaḡi ḡesi ḡeraka-veḡoitaḡoto.

³⁸ Benamo tau ta ḡutuma nuḡari na ekea-fouto, ekirato, “Vevaḡa-riba taumu o, anoḡimuni, au natugu merona noma ḡitaia. Mai tu au natugu sebona, ḡora ḡereḡa.

³⁹ Nega tari ai ḡia tu iauka rakavana na eḡabiani, benamo ekoḡo-founi; tauḡanina maki evaḡa-ḡoḡo-ḡoḡoani, benamo bokana na kaburoburo ḡeraka-rosini. Maiḡesina evaḡi-mase vanaḡi-vanaḡiani.

⁴⁰ ḡoi ḡemu mero banogiri, ḡelai-vaḡia basi, senaḡi ḡia asi beḡe ilaila.”

⁴¹ Iesu evaḡa-veseto, ekirato, “Asi veḡabidadama ema kira-sirivaḡi ḡuruna o! ḡaro vira au tu sevimi ai bana tanu? ḡaro vira bana vevaḡa-gwaḡiḡi-vinimi?” Benamo Iesu na mo tau ekiraiato, ekirato, “Natumu noḡori-iaḡomaia.”

⁴² Mero eiaḡomato-ḡoi nai, iauka rakavana na tano ekwaraḡi-iaḡiato, tauḡanina evaḡaḡoḡo-ḡoḡoato. Senaḡi Iesu na iauka rakavana ekira-ḡoiato, mero evaḡa-namoato, benamo tamana ma evini-ḡenoḡoiato.

⁴³ Tarima mabarari ḡeḡaba-rakavato, korana Barau ḡena seḡuka ḡeḡitaiato nai.

Iesu ḡena mase ma ekiraḡi-ḡenoḡoiato

Mataio 17:22-23; Mareko 9:30-32

Tarimarima roḡo Iesu ḡena veḡa ḡeḡaba-iaḡiato-ḡoi nai, Iesu na ḡena mero evaḡa-guruḡarito, ekirato,

⁴⁴ “Au na guruḡa ta ḡemi nakiraḡia, be ḡoseḡaḡi ema asi boḡono tuḡa-rekwaia. Tarimarima Natuna tu beḡe revaiani vau tarimarima ḡimari ai beḡe toreani.”

⁴⁵ Senaḡi ḡena mero na asi ḡetuḡamaḡi-doḡariato, Iesu tu kara ekiraḡiato. Mo guruḡa anina tu ḡia ḡeri ai vekuretoḡa, asi beḡene ribaia ḡana, ema Iesu maki asi ḡedanaiato, korana ḡegarito nai.

*Deikara tu barego vedaurea**Mataio 18:1-5; Mareko 9:33-37*

46 Iesu ġena mero fakari ai vevane eġorato, korana tu ġekirato, dei tu barego vedaurea ġia fakari ai.

47 Iesu varau eribato kara ġetuġamaġiato, moġa lorinai mero keina ta eġabiato, ġia sevinai evaġa-ruġa-tariato vau,

48 ekirarito, ekirato, “Dei na mai mero beġabi-raġeani au aragu ai, ġia na au beġabi-raġeguni. Bema tarima ta na au beġabi-raġeguni, etuġuguto Barauna maki beġabi-raġeani. Korana deikara ġomi na ġokira-fitoġaiani tarimana ġomi fakami ai, ġia tu barego vedaurea.”

*Iesu arantai nuġa-farevaġi veġa boruri eveirito tarimana**Mareko 9:38-40*

49 Ioane na Iesu evaġa-guruġaiato, ekirato, “Vevaġa-riba taumu, tarima ta ġaġitaiato, ġoi aramu ai iauka rakavari elai-vaġirito-ġoi, senaġi ġai na ġakira-ġoiato, korana ġia tu dia ġita ġesi taġauveini nai.”

50 Iesu na ekirarito, ekirato, “Asi boġono kira-ġoia, korana deikara na ġomi asi evaġa-rakavamini tarimana tu ġomi evaġa-kavamini.”

Samaria tarimari kotari na Iesu asi ġeġabi-raġeato

51 Iesu guba ġana bevaraġeni ġarona ekavinaiato-ġoi nai, Ierusalem bene iaġo-vinia, etato.

52 Benamo Iesu na vetuġunaġi tarimari etuġu-guinerito, Samaria vanuġana tai ġeraġasito, Iesu ġena totoġa gabuna ġea vetauato.

53 Senaġi vanuġa tarimari na Iesu asi ġeġabi-raġeato, korana tu Ierusalem eiaġo-viniato-ġoi nai.

54 Iesu ġena mero Iakobo (o Iames) e Ioane mo veġa ġeġitaiato, benamo ġekirato, “Vereġauka, ġoi ourani karava guba na baġana kiragġia, bene mariġo, bene vaġa-rakavari?”

55 Iesu eruġa-kureto, tauri ruarua ekira-ġoirito.

56 Benamo ġia ma ġerakato, vanuġa ta ġana ġeiaġoto.

*Iesu murinai beġene raka ġetato tarimari**Mataio 8:19-22*

57 Ġia dabara na ġeiaġoto-ġoi nai, tarima ta na Iesu evaġa-guruġaiato, ekirato, “Ġemu iaġoiato gaburi mabarari ai bana kavamu.”

58 Iesu na ekiraiato, ekirato, “Boġa kwaivari ma ġeri kouġa, ema manu ma ġeri nuġi, senaġi Tarimarima Natuna tu asi ġena gena-gabuna.”

59 Iesu na tarima ta ma evaġa-guruġaiato, ekirato, “Murigu ai noma raka.” Senaġi mo tarima evaġa-veseto, ekirato, “Vereġauka, asi roġo, naġenoġoi, be tamagu roġo naguria.”

60 Iesu na evaġa-veseato, ekirato, “Mani tu noiaġuiri, mase tarimari (o Barau asi ġekorana-iaġiani tarimari) na ġeri mase tauġeri na beġene guriri. Senaġi ġoi tu noiaġo, Barau ġena Basileia varina noa vari-flua.”

61 Tarima ta na ma ekiraiato, ekirato, “Vereġauka, murimu ai naraka, senaġi naiato roġo, ġegu numa tarimari ġesi ġaveġabi-tuġu.”

62 Iesu na evaġa-veseato, ekirato, “Tarima ta efokafokani nai, murina ġana ma eboġe-ġenoġoini, ġia tu asi ilaila Barau ġena Basileia beġabiani.”

10

Iesu na tarima gabana imaima ema gabana ruarua ma ruarua (72) etuḡurito

¹ Moḡa murinai Vereḡauka na tarima 72 eḡabi-viriḡirito, benamo ruari ruari etuḡu-guinerito, ḡia beiaḡoni vanuḡari e gaburi mabarari ḡana.

² Evaḡa-guruḡarito, ekirato, “Kwakwa ḡaniganiri tu ḡutuma lelevaḡi, senaḡi kwakwa tarimari tu viravira moḡo. Moḡa lorinai kwakwa Vereḡaukana ḡonoḡia, be kwakwa tarimari tari ma bene tuḡu-iaḡori, ḡaniḡani beḡenea kwari.

³ Ḡoiḡo, au na mamoe kavana atuḡumini, boḡa kwaivari rakavari fakari ai.

⁴ Moni fusefuseri, dura e tamaka asi boḡono ḡabikau; dabarai tarima ta asi boḡono vaḡa-guruḡaia.

⁵ Bema numa tai boḡo raḡekauni nai, boḡono kira, ‘Maino mai numai bene tanu.’

⁶ Bema maino eura-viniani tarimana monai etanuni nai, ḡemi maino guruḡana ḡia iatanai bene tanu. Bema asiḡina nai, maino tu ḡemi ai ma bene ḡenoḡoi.

⁷ Karakara beḡe vinimini boḡono ḡaniri e boḡono niuri, korana eḡauveini tarimana davana bene ḡabia ḡana. Numa ta na ma numa ta ḡana asi boḡono iaḡo, senaḡi mo numa sebonai moḡo boḡono tanu.

⁸ Bema vanuḡa tai boḡo raḡasini, beḡe ḡabi-raḡemini, karakara ḡoirami ai beḡe tore-rosirini dagarari boḡono ḡaniri.

⁹ Mo vanuḡai keve tarimari boḡono vaḡa-namori e tarimarima boḡono vaḡa-guruḡari, boḡono kira, ‘Barau ḡena Basileia, (ḡena veḡitaḡau seḡukana evaḡa-ruḡaiiani), tu sevimi ai maḡa.’

¹⁰ Senaḡi bema vanuḡai boḡo raḡasini, benamo asi beḡe ḡabi-raḡemini nai, ḡatamanai boḡono raka-rosi, boḡono kira,

¹¹ ‘Ḡemi vanuḡa gagauri kwakumai beḡe kafakau dagarari maki mai ḡakora-vaḡirini ḡemi kira-sirivaḡi vaḡa-foforiri ḡana. Senaḡi boḡono riba, Barau ḡena Basileia tu bekavi-naḡi.’

¹² Au na akiramini, Kota baregona ḡaronai mai vanuḡa na meto beḡwaiiani tu, Sodoma ḡena meto maki bevanagiani.”

Asi veḡabidadama vanuḡari

Mataio 11:20-24

¹³ “Korasini o, ḡoi ema Betesaida, vetuḡami kika! Korana nuḡa-farevaḡi veḡari ḡemi ai ḡefoforito-ḡoi tu, Taia e Sidono nuḡari ai beḡere fofori, benamo ḡia tu irau laḡani ai ḡere vetuḡamaḡi-kure, fuse rakavari ai e tauḡaniri ma gurumari ai ḡeri vetuḡamaḡi-kure ḡere vaḡa-foforia.

¹⁴ Barau na tarimarima bekota-vinirini ḡarona baregonai, ḡomi na boḡo doḡariani metona tu Taia e Sidono ḡeri meto bevanagiani.

¹⁵ Ḡoi maki, Kaperanauma o, ḡoi ourani guba ḡana bono varaḡe otoni? Asiḡina, ḡoi tu mase gabuna ḡana boiaḡoni!”

¹⁶ Iesu na ḡena mero evaḡa-guruḡarito, ekirato, “Dei na ḡomi beseḡaḡi-vinimini, au maki beseḡaḡi-viniguni; dei na asi beḡabi-raḡemini, au maki asi beḡabi-raḡeguni; ema dei na asi beḡabi-raḡeguni, etuḡuguto Barauna maki asi beḡabi-raḡeani.”

Iesu na etuḡurito tarimari 72 ḡeḡenoḡoito

17 Ĝena mero 72 ma ĝeĝenoĝoito ma iakuri ĝesi, ĝekirato, “Vereĝauka o, iauka rakavari ĝoi aramu ai ĝavaĝa-guruĝarito, benamo garoma ĝeseĝagirito-ĝoi.”

18 Iesu na evaĝa-veserito, ekirato, “Satani aĝitaiato, kiriku ekimoreani kavana guba na eketo-firiĝoto.

19 Boĝono riba, au na seĝuka varau avinimito, mota ema kavikavi boĝono fana-tariri, ema Satani ĝena seĝuka maki boĝono vaĝa-farakaia ĝana; dagara ta na asi bevaĝa-rakavamini.

20 Senaĝina, dia boĝono iaku korana iauka rakavari ĝomi ĝemi seĝuka nuĝanai, asiĝina, a ĝomi tu boĝono verere korana arami gubai etorerito nai.”

Iesu eiakuni

Mataio 11:25-27; 13:16-17

21 Mo tanu-vegogo nuĝanai Iauka Veaĝa na Iesu tu iaku na evaĝa-vonuato, benamo ekirato, “Tamagu o, avaĝa-namomuni, guba ema tanobara Verena! Korana ĝoi na ma iaunegari e riba tarimari ĝeri ai okure-togarini dagarari tu, asi ĝeri riba tarimari ĝeri ai ovaĝa-foforirini. Aba, Tamagu, mai tu ĝoi ĝemu veuravini korana evaĝa-foforiani.

22 Dagara mabarari Tamagu na eviniguto. Tarima ta asi ribana ĝia Natuna, Tamana moĝo ĝereĝana, ema ta asi ribana ĝia Tamana, senaĝi Natuna ĝereĝana moĝo, ema Natuna na eura-vinirini tarimari ĝeri ai vau evaĝa-foforirini.”

23 Benamo Iesu eboĝe-kureto ĝena mero ĝeri ai, veĝuni ai evaĝa-guruĝarito, ekirato, “Ĝomi tu boĝono iaku, korana tu mai ĝoĝitarini dagarari dairi ai.

24 Au na akiramini, peroveta tarimari e tanobara vereri baregori o kini vovoka ĝeurato, mai ĝoĝitarini dagarari beĝere ĝitari, senaĝi asi ĝeĝitarito, ema ĝoseĝagirini dagarari beĝere seĝaĝiri, senaĝi asi ĝeseĝagirito.”

Barabore - Samaria tarimana namona

25 Taravatu evevaĝa-riba iaĝiato-ĝoi tarimana ta evariĝisito, benamo Iesu eribaĝaniato, ekirato, “Vevaĝa-riba taumu, au tu kara baveini vau, maĝuri vanaĝivanaĝi badoĝariani?”

26 Iesu na evaĝa-veseato, ekirato, “Taravatu tu kara etoni? Ĝoi na tu kamasi oiaviani?”

27 Ĝia evaĝa-veseto, ekirato, “ ‘Vereĝauka ĝoi ĝemu Barau bono ura-vinia ma nuĝamu mabarana, ma iaukamu mabarana, ma kokoremu mabarana, e ma tuĝamaĝimu mabarana’; ema ‘Sevimu tarimana maki bono ura-vinia ĝoi tauĝemu oveura-vinini kavana.’ ”

28 Iesu na ekiraiato, ekirato, “Bovaĝa-vese maoro, maniĝesi bono vei, be bono maĝuri.”

29 Senaĝi taravatu evevaĝa-riba iaĝiato-ĝoi tarimana tu ma veiavina ĝesi Iesu ma edanaĝi-veribaĝaniato, ekirato, “Au sevigu tarimana tu dei?”

30 Iesu evaĝa-veseto, ekirato, “Tau ta Ieruselema na Ieriko evariĝo-viniato-ĝoi nuĝanai, lema tarimari na dabarai ĝeguru-viniato, ĝena dabuĝa ĝekokirito, ĝevaĝa-vevaĝiato, dori moĝo ĝevaĝi-maseato, benamo monai ĝeraga-kwaneato.

31 Moĝa Rubu Veaĝa verena ta mo dabara na evariĝoto-ĝoi nai, mo tau edoĝariato, senaĝi eraka-ĝevi-raĝiato moĝo.

32 Levi doĝorona tarimana ta, (Rubu Veaĝai vetuĝunaĝi tauna), maki moĝesi, mo tau ea doĝariato nai, maki eraka-ĝevi-raĝiato moĝo.

³³ Senaĝina Samaria tarimana ta ĝena iaĝoiaĝo ai mo tau ea doĝariato, eĝitaiato nai, evetuĝaiato.

³⁴ Sevina ĝana eiaĝoto, diĝa e vine nanuna manuĝanai ebubuto, eku-muato, benamo ĝena doniki ai evaĝa-tanu-kauato, vinitaĝo numana ĝana eĝori-iaĝoto, monai enariato.

³⁵ Boĝiboĝi evarigisito nai, silva moniri ruarua numa ĝitaĝauna tarimana eviniato, ekirato, 'Mai tau bono nariĝau-ĝitakaua. Bema moni asi beilailani nai, ĝegu ĝenoĝoi ai vau ĝemu moni davana bavanimuni.' "

³⁶ Iesu evedanaĝito, ekirato, "Ĝoi tu kara otoni? Mai tarima toitoi fakari ai deikara sevina tarimana tu mo lema tarimari na ĝevaĝa-vevaĝiatio tauna ĝenai bita kiragiĝani?"

³⁷ Taravatu evevaĝa-riba iaĝiatio-ĝoi tarimana evaĝa-veseto, ekirato, "Evetuĝaiato tarimana." Benamo Iesu na ekiraiato, "Noiaĝo, ĝoi maki moĝesi bono vei."

Mareta e Maria

³⁸ Iesu ma ĝena mero ĝesi ĝeri iaĝoiaĝo ai vanuĝa tai ĝea votuto. Monai vavine ta arana Mareta ĝena numai eĝabi-raĝeato.

³⁹ Ĝia tu ma tarina arana Maria, benamo Maria tu eiaĝoto, Vereĝauka kwakuna koranai etanu-tarito, ĝena guruĝa eseĝaĝirito-ĝoi.

⁴⁰ Mareta tu veĝabiraĝe dagarari eveito-ĝoi, evekwaragiĝito-ĝoi. Benamo eiaĝomato, ekirato, "Vereĝauka, ĝoi tu otuĝamaĝini ba? Tarigu na beraga-kwanegu, au ĝereĝagu moĝo avekwaragiĝini. Nokiraia, be nema vaĝa-kavagu!"

⁴¹ Vereĝauka na evaĝa-veseato, ekirato, "Mareta! Mareta! Dagara gutumari na nuĝamu ĝevaĝa-veĝonuani e ĝevaĝa-vekwaragiĝini,

⁴² senaĝi dagara sebona moĝo ĝerevaĝi. Maria na tu namona beĝabi-virigiĝa, ta na ĝia ĝenana asi ma beĝabi-vaĝiani."

11

Iesu na ĝena mero ĝurigiĝuri evaĝa-ribarito

¹ Ĝaro tai Iesu tu gabu tai eĝaugauto. Ekorito nai, ĝena mero ta na evaĝa-guruĝiatio, ekirato, "Vereĝauka o, ĝurigiĝuri novaĝa-ribama Ioane na ĝena mero evaĝa-ribarito ilailanai."

² Iesu na ekirarito, ekirato, "Ĝoĝurigiĝurini nai, boĝono kira:

'Ĝai Tamama o,
ĝoi aramu baĝana vaĝa-veaĝaia;
ĝemu Basileia bene iaĝoma.

³ Ĝaro tata ĝai ĝema-ĝama bonoma vinima.

⁴ Ĝema rakava notuĝamaĝi-fitoĝari,
korana ĝai maki ĝevaĝa-rakavamani tarimari ĝeri rakava ĝatuĝamaĝi-fitoĝarini.

Ema veribaĝani ai asi bono ĝori-kauma.' "

⁵ Benamo Iesu na evaĝa-guruĝarito, ekirato, "Bema ĝomi ta boĝi nuĝanai ĝatana ĝenai bere iaĝo, bere noĝia, bere kira, 'Ĝatagu o, ĝaniĝani dagarari kota naĝabi-toreri roĝo,

⁶ korana au ĝatagu ta tu ĝena iaĝoiaĝo ai ĝegu ai beiaĝoma, senaĝi au tu asi ĝegu ĝaniĝani ĝia baĝubuanai.'

7 Benamo mo tarima na numa nuḡana na bere vaḡa-vesea, bere kira, ‘Asi novaḡa-vekwaraḡigu. Ġatama-boka varau babiria, ema au tu natugu ḡesi ḡagenani. Au tu asi bavariḡisini, dagara ta asi baviniḡuni.’

8 Akiramini, enabe ḡia ḡatana, senaḡi asi bevariḡisini, ḡaniḡani asi beviniani, senaḡi ḡena noḡinoḡi ḡenoḡoi-ḡenoḡoi dainai bevariḡisini, eura-vinirini dagarari beviniani.

9 Moḡa lorinai, au na ḡomi akiramini, noḡinoḡi ai Barau na bevinimini, vetauvetau ai boḡo doḡarini, sekeseke o fidifidi ai ḡemi ḡatama-boka bekeoani.

10 Korana benoḡi-noḡini tarimana tu beḡabini, bevetauni tarimana bedoḡarini, ema beseke-sekeni tarimana Barau na ḡena ḡatama boka bekeoani.

11 Gomi tama fakami ai deikara bema natumu merona maḡani-kone benoḡini nai, ḡoi na tu mota boviniani?

12 O ḡatoi benoḡini nai, kavikavi boviniani?

13 Boḡono tuḡamaḡi, ḡomi tu rakava tarimami, senaḡi dagara namori natumi viniviniri ma ribami, moḡa lorinai ḡomi Tamami gubai etanuni, ḡia na Iauka Veaḡa ḡenoḡi-viniani tarimari bevinirini veḡatana!”

Iesu e Belsebul

Mataio 12:22-30; Mareko 3:20-27

14 Iesu na iauka rakavana, muru-bubu iaukana, elai-vaḡiato, benamo mo muru-bubu tarimana eguruḡato. Tarimarima ḡutuma na ḡevaḡa-raḡeato,

15 senaḡi tarima kota ḡekirato, “Mai tu Belsebul, iauka rakavari ḡeri vere, ḡena seḡukai iauka rakavari elai-vaḡirini.”

16 Tarima kotari na Iesu ḡedanaḡi-veribaḡaniato, vetoḡa ta guba na bene viniri ḡetato.

17 Senaḡi Iesu na ḡia ḡeri tuḡamaḡi eribarito, benamo evaḡa-guruḡarito, ekirato, “Gavamani ta beveḡabi-kirani, ḡia tu berakavani, ema doḡoro ta beveḡabi-kirani, ḡia tu beketoni.

18 Moḡa lorinai Satani tu tauḡena moḡo bebevare-kirani, ḡena basileia tu kamasi beruḡani? Maiḡesi akiraḡiani, korana tu ḡomi ḡokirani, au tu Belsebul ḡena seḡukai iauka rakavari alai-vaḡirini.

19 Bema au iauka rakavari Belsebul ḡena seḡukai alai-vaḡirini nai, ḡomi murimi ai ḡerakani tarimari na iauka rakavari aiḡesi ḡelai-vaḡirini? ḡia na ḡevaḡa-moḡoniani ḡomi ḡemi guruḡa tu asi anina.

20 Senaḡi bema au iauka rakavari Barau ḡena seḡukai alai-vaḡirini nai, boḡono riba, Barau ḡena Basileia, ḡena veḡitaḡau seḡukana, tu ḡomi ḡemi ai varau beragasi.

21 Kokore tarimana ma ḡena vaḡivaḡi dagarari ḡesi ḡena numa beḡitaḡauani nai, ḡena farefare tu roḡo beḡe tanu-ginikauni.

22 Senaḡina kokore vedaurea tarimana ta ma beiḡomani, mai tarima bevaḡa-vevaḡiani, benamo bevaḡa-darereani, ḡia ḡena vaḡivaḡi dagarari, veḡabadadama dagarari, beverariani, benamo ḡena farefare mabarari bevare-rovorovorini.

23 Deikara dia au ḡatagu tu, au ḡegu inai tarimana, ema deikara au ḡesi asi etore-vegogoni tu eveiari-lautilusini.”

Iauka rakavana ma eḡenoḡito

Mataio 12:43-45

24 “Iauka rakavana ta tarima ta ḡenana eraka-rosito, benamo gabu kaukauri na eraka-vanaḡito, iaḡana bene ḡania etato, senaḡi iaḡaraḡi

gabuna ta asi edoḡariato. Benamo ḡia tauḡena ekirato, ‘Naḡenoḡoi, araga-kwaneato numana ḡana.’

²⁵ Eḡenoḡoi-iaḡoto, numa edoḡariato. Numana tu veiareva ema ḡitaḡitana namo vedaurea.

²⁶ Benamo ḡia na iauka rakava kwaikwairi imaima ruarua (7) ma eḡori-iaḡorito, mabarari ḡeraka-toḡato, monai ḡetanuto. Moḡa lorinai mo tarima tu tovotovonai ḡena rakava tu kota misina, senaḡi dokonai ḡena rakava tu barego vedaurea.”

Verere moḡonina

²⁷ Mo guruḡa ekiraḡiato-ḡoi nai, vavine ta tarimarima ḡutuma fakari na eguruḡa-vaisito, ekirato, “Ḡoi evaḡa-maḡurimuto e evini-rurumuto vavina na namo!”

²⁸ Senaḡi Iesu evaḡa-veseto, ekirato, “Iniḡesi nokira, Barau ḡena ḡuruḡa ḡeseḡaḡiani ema ḡekorana-iaḡiani tarimari neḡi namo!”

Seḡuka vetoḡana ḡevetauato

Mataio 12:38-42; Mareko 8:12

²⁹ Tarimarima ḡutuma na Iesu ḡeruḡa-ḡeḡeraḡiato, benamo evaḡa-guruḡarito, ekirato, “Toma ḡuru tu ḡuru rakavana! Seḡuka vetoḡana ḡevetauani, senaḡi vetoḡa ta asi beḡe doḡariani, Iona, peroveta tarimana, vetoḡana moḡo.

³⁰ Korana Iona tu vetoḡa ta Nineva tarimari ḡeri ai, moḡa ilailanai Tarimarima Natuna tu vetogai beiḡoni mai ḡuru tarimari ḡeri ai.

³¹ Barau na tarimarima bekota-vinirini ḡaronai, Seba vavine baregona o Kwin beruḡa-vaisini, mai ḡuru tarimari besamanirini, korana ḡia tu ḡena tanobara manaḡana na eiaḡomato, Solomona ḡena iaunega guruḡari bene seḡaḡiri ḡana. Senaḡi ḡoḡitaia, tarima ta na Solomona evanaḡiani tu maiga.

³² Barau ḡena Kota baregona ḡaronai, Nineva tarimari beḡe ruḡa-vaisini, toma ḡuru tarimari beḡe samanirini, korana Iona ḡena ḡobata ḡeseḡaḡiato neganai, ḡia ḡeri rakava ḡerina ḡevetuḡamaḡi-kureto. Senaḡi tarima ta na Iona evanaḡiani tu maiga.”

Tauḡani mamana

Mataio 5:15; 6:22-23

³³ “Tarima ta na lamefa begabuani nai, asi bekure-toḡaiani, diḡu na asi beḡoḡoi-tariani, senaḡi lamefa tore-torena gabuna korikorinai betoreani, beḡe raka-toḡani tarimari na mama beḡene ḡitaia ḡana.

³⁴ Ḡoi matamu tu ḡoi tauḡanimu ḡena lamefa kavana. Bema ḡoi matamu namo nai, tauḡanimu mabarana bemamani. Senaḡi ḡoi matamu rakava nai, tauḡanimu mabarana bemukunani.

³⁵ Moḡa lorinai, lorimu bono vetore, mama ḡoi nuḡamu ai bemukunani garina.

³⁶ Bema ḡoi tauḡanimu mabarana mama na bevonuvonu-raḡeni, mukuna kota maki asi betanuni, ḡia tu mama dikadika, lamefa emore-rovorovoni, ḡoi evaḡa-mamamuni kavana.”

Iesu na Farisea tarimari ema taravatu ḡevevaḡa-riba iaḡiato-ḡoi tarimari evanerito

Mataio 23:1-36; Mareko 12:38-40; Luka 20:45-47

³⁷ Iesu eguruḡa-ḡosito nai, Farisea tarimana ta na ekeaiato, ḡia ḡesi beḡene ḡaniḡani-vegogo; benamo ḡena numa ḡana eiaḡoto, ḡaniḡani gabunai etanu-tarito.

38 Mo Farisea tarimana na eġitaiato nai, nuġana efarevaġi-rakavato, korana Iesu tu asi eveġurigiġito, (ġia seneri vereri ġeri vevaġa-naġi ilailanai), senaġi eġani-ġanito moġo.

39 Benamo Vereġauka na evaġa-guruġaiato, ekirato, “Ġomi Farisea tarimami na ġemi kapusi ema disi muriri rekeri moġo ġoġurigi-ġinikaurini, senaġi nuġami tu verariverari ema vei-taġuitaġui na ġevonu-fokafokato.

40 Ġomi tu babo! Ġomi asi ġoribani, murika rekena eveiato Barauna na nuġana rekena maġi ġia na eveiato?

41 Senaġi kapusi ema disi nuġari dagarari tu asi ġeri-ġari tarimari boġono viniri vau, dagara mabarari ġemi ai beġe veiarevani.

42 Farisea tarimami, vetuġami kika! Korana ġomi na Barau ġovarevareviniani dagarari misimisiri, ġemi sivoġa, kodukarava ema ġaniġani ġailauri maki karava gabanana (10) ġoveirini, karava sebona boubou dagaranai ġovaġa-iaġoani, senaġina vei-iobuka-iobuka ema Barau uravinina maġurina tu ġoleaiani. Ġomi na tu maġeri veġa baregori ġoro veiri ema mo veġa keiri maki asi boġoro iaġuri.

43 Farisea tarimami, vetuġami kika! Korana ġemi ura rubu ai tu tanutanu namori ai boġono tanu, ema ġemi ura maki maketi gaburi ai beġene vaġa-namomi.

44 Vetuġami kika! Ġomi tu asi ġita vetoġari gara gaburi kavana, tarimarima iatari na ġeraka-vanaġini nai ġemirorini, ġia asi ġeribani mo tu gabu rakavana.”

45 Taravatu ġevevaġa-riba iaġiato-ġoi tarimana ta na Iesu evaġa-guruġaiato, ekirato, “Vevaġa-riba taumu o, maġesi okirani nai, ġai maki okira-fitogamani!”

46 Iesu evaġa-veseto, ekirato, “Ġomi taravatu ġovevaġa-riba iaġiani tarimami maki vetuġami kika! Ġomi na maruna metori tarimarima ġovaġa-faġarini, senaġi ġimami didina ta maki ġeri marunai asi ġoveġabikauni, asi ġovaġa-kavarini.

47 Vetuġami kika! Ġomi tubumi ġatami na peroveta tarimari ġevaġi-maserito, ema ġomi na tu ġeri gara gaburi namori ġoveirini.

48 Moġesi ġomi tauġemi tubumi ġatami ġeri veġa ġokiraġi-foforirini ema ġovaġa-moġonirini; moġoni veġata, tubumi ġatami na peroveta tarimari ġevaġi-maserito, ema ġomi na ġeri gara gaburi ġoveirini.

49 Moġa lorinai Barau ġena launega ekirani, ‘Au na peroveta tarimari ema apostolo tarimari batuġu-iaġorini ġeri ai, benamo tari tu beġe vaġi-maserini, ma tari tu beġe lai-lausilausirini.’

50 Moġesi nai, peroveta tarimari mabarari ġevaġi-maserito, Barau na tanobara eveiato veġata beiaġoma mo maitoma, metona tu toma ġuru tarimari na beġe ġabiani.

51 Abela ġevaġi-maseato, monana eiaġomato mo Sakaria, ġia tu fata veaġana ema Barau ġena numa veaġana fakari ai ġevaġi-maseato. Aba, au na akiramini, mabarari metori tu toma ġuru tarimari na beġe ġabiani!

52 Taravatu ġovevaġa-riba iaġiani tarimami, vetuġami kika! Riba numana keo-fakana ġatama-boka kina tu ġomi na ġoġabiato. Ġomi ġereġami asi boġo raka-toġani, ema ġeraka-toġa ġetoni tarimari ġeri dabara ġomi na ġokourini!”

53 Iesu mo gabu na eraka-rosito, benamo taravatu ġevevaġa-riba iaġiato-ġoi tarimari ema Farisea tarimari na ġekira-fitoġaiato, ema dagara vovoka ġevedanaġi-viniato,

⁵⁴ ġeribaġaniato, ġeri ura tu dagara ta bene kiraġi-kererea, be beġene samania ġana.

12

Ġeġofaġofani tarimari boġono nariri

¹ Mo faka nuġanai tarimarima ġutuma lelevaġi varau ġevegogoto, asi-aġo asi-fana, benamo Iesu na ġena mero evaġa-guruġa guinerito, ekirato, “Boġono venari-ginikau Farisea tarimari ġeri farao evaġa-tubuani muramura na ġerina, korana mani tu ġia ġeri ġofaġofa veiġana bene.

² Vekouġau dagarari mabarari beġea foforini, vekuretoġa guruġari mabarari beġea ribani.

³ Moġa lorinai kara dagara mukunai ġokiraġiato, mamai beġea seġaġiani, kara dagara koutoġai seġai ġoguruġa-ġurato dagarana, beġea kiraġi-foforiani numa tuġuna na, tarimarima mabarari na beġene seġaġia ġana.”

Barau bitana gari-vinia

Mataio 10:28-31

⁴ “Gataġu mabarami, akiramini, tauġani beġe vaġiani, ma murinai kara ta ma asi beġe veiani tarimari gariri asi boġono vei.

⁵ Senaġi navaġa-ribami, deikara garina boġono vei: Barau boġono gari-vinia. Tauġani bevaġiani murinai ma ġena seġuka, ġomi ma befiu-ġuramini, karava eġara-vanaġi vanaġini gabunai. Aba, au na akiramini, ġia moġo boġono gari-vinia!

⁶ Bisini imaima (5) maki fene ruarua na moġo ġevoirini, ene? Senaġina Barau na tu sebona ta maki asi etuġa-rekwaiani.

⁷ Moġoni veġatana, ġomi tu debami ġuiri maki mabarari Barau na eiavi-ginikaurito. Be asi boġono gari; ġomi voimi tu varaġe lelevaġi, bisini ġutuma voiri maki ġovanaġirito!”

Iesu bekiraġi-foforiani ema bekira-ġuniġauani

Mataio 10:32-33; 12:32; 10:19-20

⁸ “Au na akiramini, deikara na au tarimarima ġoirari ai bekiraġi-foforiguni, ġia maki Tarimarima Natuna na Barau ġena aneru ġoirari ai bekiraġi-foforiani.

⁹ Senaġina au deikara na tarimarima ġoirari ai beruġaġuni e bekira-ġuniġauguni, ġia maki Barau ġena aneru ġoirari ai baruġaġiani e bakira-ġuniġauani.

¹⁰ Tarimarima Natuna deikara na bekira-rakavaiani, Barau na ġia ġena rakava betuġamaġi-fitoġaiani, senaġina deikara na Iauka Veaġa bekira-rakavaiani, ġia ġena rakava tu asi betuġamaġi-fitoġaiani.

¹¹ Iuda tarimari ġeri rubu ai beġe vaġa-kotamini, ema vanuġa vereri e Kota baregori ġeseġaġini tarimari ġoirari ġana beġe ġori-iaġomini nai, nuġami asi beġene vekwaraġi, aiġesi toma boġo guruġani o kara toma boġo kiraġirini.

¹² Korana Iauka Veaġa na mo ġaro ai kara boġo kiraġirini guruġari bevaġa-ribamini.”

Barabore - Farefare vovoka tarimana

¹³ Tarimarima ġutuma nuġana na tarima ta na Iesu ekiraiato, ekirato, “Vevaġa-riba tarimamu o, au kakagu nokiraia, ġai tamama na eraga-kwanerito farefareri nevareri, be au tavi ta nevinigu.”

¹⁴ Iesu na evaḡa-veſeato, ekirato, “Ḡoi tau o, au tu deikara na ḡomi taumi ruarua ḡemi farefare-tore viriḡi-viriḡina ḡana etoreguto?”

¹⁵ Benamo evaḡa-guruḡarito, ekirato, “Boḡono boḡeboḡe! Lorimi boḡono vetore, farefare vovoka mata-ḡaniḡaniri boḡo veini garina; korana tari-marima ḡeri maḡuri korikori tu dia ḡeri farefare vovoka na ḡevaḡa-ḡorarini.”

¹⁶ Benamo mai barabore ekiraḡiato, ekirato, “Farefare vovoka tarimana ta ḡena tano na ḡaniḡani namori evaḡa-ḡorarito.

¹⁷ Ḡia etuḡa-maḡito, ekirato, ‘Kamasi toma haveini? Mai ḡaniḡani mabarari tu ainai bana vaḡa-vegogori?’

¹⁸ Benamo ekirato, ‘Au tu maiḡesi navei. Ḡaniḡani atorerini numari guineri narovori, benamo numa baregori naragari. Mainai vau au ḡegu ḡaniḡani e farefare mabarari monai bana vaḡa-vegogori.

¹⁹ Benamo au tauḡegu bana vekira, ‘Ḡoi ḡemu dagara namori tu ḡutama gorogoro bovaḡa-vegogori laḡani vovoka ḡana. Be, noiaḡaraḡi, noḡaniḡani, noniuniu e noverere.’

²⁰ Senaḡina Barau na ekiraiato, ekirato, ‘Kamuto, ḡoi tu babo! Toma boḡi ḡoi ḡemu maḡuri aḡabi-vaḡiani ḡemuna, benamo mai ḡemu farefare bovaḡa-vegogorini tu deikara na beḡabirini?’

²¹ Maiḡesina mo deidei tauḡeri moḡo ḡeri farefare ḡevaḡa-vegogoni tari-mari tu asi ḡeri farefare Barau ḡoiranai.”

Asi bono tuḡamaḡi-vekwaraḡi

Mataio 6:25-34

²² Benamo Iesu na ḡena mero evaḡa-guruḡarito, ekirato, “Moḡa lorinai, akiramini, ḡemi maḡuri asi boḡono tuḡamaḡiri, kara boḡo ḡanini; o tauḡaniami kara na boḡo dabuḡarini.

²³ Maḡuri tu dagara baregona, a ḡaniḡani tu dagara keina, ema tauḡani tu dagara baregona, a dabuḡa tu dagara keina.

²⁴ Gaio ḡotuḡamaḡiri, asi ḡevarovaroni ema asi ḡekwa-kwani; asi ḡeri ḡaniḡani-tore numari, senaḡina Barau na eḡuburini! Ḡomi tu dagara baregomi, a manu tu kei!

²⁵ Gomi deikara otuḡamaḡi-vekwaraḡini nai, ḡemu maḡuri kota maia bovaḡa-maukaiani?

²⁶ Mai dagara misina asi boveiani riba, karase nai tu dagara tari maia urari ai ovetuḡamaḡini?

²⁷ Boḡa veraverari ḡoḡitari aiḡesi ḡegarani. Asi ḡeḡauveini ema dabuḡa asi ḡeturini. Senaḡina akiramini, Kini Solomona ḡena vedabuḡa marevana maki ḡevanagiani.

²⁸ Bema Barau na tanobara ḡauḡari moḡesi edabuḡarini, ḡia toma tu ḡegarani, ma boinani tu karavai beḡe fiu-raḡerini, Barau na ḡomi tu bevaḡa-dabuḡa ginikau-raḡemini. Gomi veḡabidadama misimisi tarimami!

²⁹ Moḡa lorinai asi boḡono boḡe vetau-vetau, kara toma ḡoḡanini e kara toma ḡoniuni; ema asi boḡono tuḡamaḡi-vekwaraḡi maki.

³⁰ Korana Barau asi ribari tarimari mabarari tu manigeri dagara ḡevetaurini, a ḡomi Tamami tu ma ribana manigeri dagara tu ḡoura-vinirini.

³¹ Senaḡina Barau ḡena Basileia boḡono vetaua, benamo manigeri dagara mabarari bevinimini.”

Farefare boḡono vaḡa-vegogo gubai

Mataio 6:19-21

³² “Seri misina, asi boĝono gari, korana Tamami ĝena ura tu ma nuĝa namona ĝesi ĝena Basileia bene vinimi.

³³ Ĝemi farefare ĝovoivoi-iaĝiri, ma moni asi-ĝeri e asi-ĝari tarimari ĝoviniri. Asi beĝe rakavani moni fusefuseri ĝoĝabiri, ĝemi farefare gubai ĝovaĝa-vegogori, monai tu asi beĝe korini, monai lema tarimari asi beĝe raka-kavini ema faro na maki asi beĝe vaĝa-rakavarini.

³⁴ Korana tu ĝomi ĝemi farefare ainai, ĝomi nuĝami maki monai.”

Vetuĝunaĝi tarimari namori

Mataio 24:42-51

³⁵ “Ĝauvei ĝana boĝono vedabuĝa-tore ema ĝemi lamefa beĝene ĝara-taĝo.

³⁶ Vetuĝunaĝi tarimari na ĝeri vere numai ĝenari-taĝoani kavana boĝono tanu. Vevaĝa-veĝaraĝo verekona na ma beĝenoĝoini, ĝatama-bokai befidifidini nai, ĝena ĝatama beĝene raga-keoa ĝana.

³⁷ Vetuĝunaĝi tarimari roĝo tataĝa ĝeri vere beĝenoĝoini tu namo. Moĝoni akiramini, ĝena rami beriĝoani, ĝaniĝani gabunai bevaĝa-tanurini, benamo ĝaniĝani bevinirini.

³⁸ Mo vetuĝunaĝi tarimari roĝo naritaĝo ĝeri vere beĝenoĝoini tu namo, kamasi boĝi nuĝanai o boĝiboĝi rekenai beiaĝomani.

³⁹ Senaĝi boĝono riba, bema numa tarimana ma ribana, kamara horai lema tarimana beiaĝomani tu, numa benariani, be lema tarimana maki lema bevedaureani.

⁴⁰ Moĝa lorinai ĝomi maki boĝono venari-taĝo, korana Tarimarima Natuna tu asi ĝotuĝamaĝiani aoanai beiaĝomani.”

⁴¹ Benamo Petero na edanaĝiato, ekirato, “Vereĝauka, mai barabore tu ĝai ĝemai moĝo okiraĝiani, ba tarimarima mabarari ĝeri ai maki?”

⁴² Vereĝauka evaĝa-veseto, ekirato, “Deikara tu mo farefare nari tarimari na guruĝa eseĝaĝini ema veĝa roroĝotori eveini, ĝena vere na eĝabivirigiato, numa ema vetuĝunaĝi tarimari bene ĝitaĝauri, ema ĝaniĝani maki nega korikori ai bene viniri?”

⁴³ Mo vetuĝunaĝi tarimana, ĝena vere na ekiraiato ilailanai eĝauveini, bema-ĝoitaĝoani tu namo.

⁴⁴ Moĝoni akiramini, ĝia tu ĝena vere ĝena farefare mabarari ĝitaĝauri tarimanai bevaĝa-iaĝoani.

⁴⁵ Senaĝina bema vetuĝunaĝi tarimana bekirani, ‘Au ĝegu vere ĝena ĝenoĝoi tu bekwailbo rakava,’ benamo vetuĝunaĝi tauri ema vavineri bekwaririni, ma beĝanini e beniu-babobaboni.

⁴⁶ Vetuĝunaĝi tarimana ĝena vere ĝena ĝenoĝoi ĝaronu tu asi etuĝamaĝiani ĝaronai, ma asi eribaiani aoanai beaĝasini. Ĝena vere na bea basiĝutuĝutuani, ma asi ĝevaĝa-moĝonini tarimari ĝesi bea toreani.

⁴⁷ Mo vetuĝunaĝi tarimana ĝena vere ĝena ura tu ma ribana, senaĝi asi eĝabi-kavini ema ĝena vere ĝena ura asi eveiani tu, ribi baregona korikori beĝabiani.

⁴⁸ A vetuĝunaĝi tarimana asi ribana ĝena vere ĝena ura, ma bea ĝauveikavani, voina tu ribi, senaĝi asi vovoka beĝabini. Ĝutumari eviniato tarimana ĝenana tu ĝutumari ma beura-viniani; vovoka lelevaĝiri eviniato tarimana ĝenana tu vovoka lelevaĝiri ma bevetau-viniani.”

Dia maino, senaĝi vetavi

Mataio 10:34-36

49 “Au tu karava aḡabi-iaḡomaiato tanobara ḡana, ema ḡegu ura bere ḡarakau guine tu namo!

50 Senaḡi au tu babatiso ta baḡabiani, ema au tu anuḡa-vekwarāḡini, beiaḡoni mo, bavāḡa-koriani!

51 Ġomi ḡotuḡamaḡini, au tu maino tanobara ḡana aḡabi-iaḡomaiato? Asiḡi, senaḡi akiramini, vetavi-kirakira urana na aiaḡomato.

52 Toma beiaḡoni mo ḡoira laganiri ai, bese tai imaima tu beḡe vetavi-kirani, toitoi beḡe veḡitani ruarua ḡerina, ema ruarua beḡe veḡitani toitoi ḡerina.

53 Tamana natuna tauna ḡenana beveḡitani, natuna tauna tamana ḡenana beveḡitani; sinana natuna vavinena ḡenana beveḡitani, ma natuna vavinena sinana ḡenana beveḡitani; taḡama vavine barana taḡama vavine keina ḡenana beveḡitani, ma taḡama vavine keina taḡama vavine barana ḡenana beveḡitani.”

Aoa beraḡasini vetoḡana

Mataio 16:1-4

54 Iesu na tarimarima ḡutuma evaḡa-guruḡarito, ekirato, “Bema ḡaro eketoni rekenai magube dubadubari ḡeraḡekauni ḡoḡitarini nai tu, ḡokirani, ‘Gura beraguni,’ benamo eraguni.

55 Ma gabina rekena (o south) na iavara eiaḡomani nai ḡokirani, ‘Ḡaro beseḡukani,’ benamo ḡaro eseḡukani.

56 Gofaḡofa tarimami! Tanobara e guba vetoḡari kiraḡi-kiraḡiri tu ma ribami; kamasi nai mai toma ḡaro vetoḡana tu asi ribami?

57 Karase nai tauḡemi na asi ḡotuḡamaḡi-fakaiani kara tu maoro?

58 Esamanimuto tarimana ḡesi roḡo ḡoiaḡoni Kota ḡana nuḡanai boḡono maino. Bema asiḡina nai, Kota eseḡaḡini tarimana ḡimananai bea tore-kaumuni, ma Kota eseḡaḡini tarimana na folisi ḡimananai bea tore-kaumuni, benamo folisi na dibura numanai bea fiu-toḡamuni.

59 Akiramuni, asi boraka-vaḡini, beiaḡoni mo, moni mabarana boa vaḡa-voi-ḡosiani.”

13

Ḡemi rakava ḡerina boḡono vetuḡamaḡi-kure e boḡono raka-kure boḡo maseni ḡesi

1 Mo negai tarima kota Iesu ḡenai ḡeiaḡoto, benamo Iesu ḡekira-varaiato, Galilea tarimari Pilato na evaḡirito, ḡeri ginitaḡo dagarari Barau ḡeviniato-ḡoi nuḡanai; ḡia rarari tu ginitaḡo dagarari rarari ḡesi ebubu-sebonarito.

2 Iesu na evaḡa-veserito, ekirato, “Ḡomi ḡotuḡa-maḡini, mo Galilea tarimari moḡesi ḡevaḡirito-ḡoi nai, monana ḡevaḡa-moḡoniato, ḡeri rakava tu Galilea tarimari mabarari ḡeri rakava evanaḡirito?

3 Asiḡina! Au na akiramini, bema ḡemi rakava ḡerina asi boḡo vetuḡamaḡi-kureni, ḡomi mabarami moḡesi boḡo maseni ḡia ḡemaseto kavana.

4 A mo tarima gabanana imaima toitoi (18) Siloam kounai numa baregona eketoto ḡia iatari ai nai, evaḡirito tu kamasi? Gomi ḡotuḡamaḡini, mo tarima ḡeri rakava tu Ierusalemata tarimari mabarari ḡeri rakava evanaḡirito?

5 Asiḡina! Au na akiramini, bema ḡemi rakava ḡerina asi boḡo vetuḡamaḡi-kureni, ḡomi mabarami maki boḡo maseni ḡia ḡemaseto kavana.”

Barabore - Figi ḡauna asi ḡwana

6 Iesu na mai barabore ekira-vararito, ekirato, “Tarima ta ġena vine tavogana nuġanai figi ġauna evaroato. Benamo eiaġoto, figi ġauna ġwaġwana ea vetuato, senaġina ġwana ta asi edoġariato.

7 Moġa lorinai ġena vamoka narinarina tarimana evaġa-guruġaiato, ekirato, ‘Nogitaia, laġani toitoi beġe iaġo, au mai ġau ġitaġitana aiaġomani, senaġina ġwana ta asi adoġariani. Nobasi-laua, korana asi tauna bene! Mai tano eġauvei-iaġi-taġuiani.’

8 Senaġi vamoka ġitaġauna tarimana evaġa-veseto, ekirato, ‘Vereġauka, noraga-kwanea, mai laġani sebna moġo bene tanu. Au na bakwa-geġeraġiani ema tano namori ma babubuni.

9 Benamo ġwaġwana namori beġe burini laġani ġoirai tu namo, bema asiġi nai, vau bono basia.’ ”

Iesu na Sabadi ai asi erakato vavinena evaġa-namoato

10 Sabadi tai Iesu tu evaġa-ribatoġoi rubu ta nuġanai.

11 Vavine ta monai iauka rakavana na eboroġiato, evei-kevekeveato laġani gabanana imaima toitoi (18). Ġia doġena eġeġevato, asi eruġa-vaesito-ġoi.

12 Iesu na eġitaiato, benamo ekea-iaġomaiato, ekiraiato, “Vavine o, ġoi tu mani keve manina na varau bofaka.”

13 Benamo Iesu ġimana mo vavine iatanai eveġabikauto nai, vaġa-sebo moġo doġena eroroġototo, Barau evaġa-raġeato.

14 Rubu ġitaġauna tarimana ebaruto, korana Iesu na Sabadi ai evevaġa-namato nai. Moġa lorinai ġia na tarimarima evaġa-guruġarito, ekirato, “Ġaro imaima sebna tarimarima ġeri ġauvei ġarori. Mo ġaro ai vevaġa-namo uranai boġono iaġoma, senaġi Sabadi ai asi boġono iaġoma.”

15 Vereġauka na evaġa-veseato, ekirato, “Ġofaġofa tarimami! Sabadi ai ġemi boromakau o doniki asi ġoruġarini, ġeri numa na asi ġoġori-rosirini nanu niu?”

16 A mai vavine, Aberahamo besena vavinena, Satani na laġani gabanana imaima toitoi (18) ebarubaruato, au na Sabadi ai barubaru ġenana asi baruġaiani ba?”

17 Moġesi ekirato nai, ġebaru-viniato-ġoi tarimari ġemaiakarito, senaġi tarimarima mabarari na Iesu ġena veġa boruri ġeġitarito nai, ġeiau-rakavato.

Barabore - Mastadi ġauna ġutuna

Mataio 13:31-32; Mareko 4:30-32

18 Benamo Iesu na edanaġirito, ekirato, “Barau ġena Basileia tu aiġesi? Kara ġenai bavaġa-ilailaiani?”

19 Ġia tu mastadi ġauna ġutuna kavana. Tarima ta na eġabiato, ġena vamokai evaroato. Mastadi ġauna ġutuna eġarato, ġau ai eiaġoto, benamo guba manuri leganaġi ġesikokauto.”

Faroo evaġa-tubuani muramura

Mataio 13:33

20 Iesu na ma edanaġirito, ekirato, “Barau ġena Basileia tu kara ġesi bavaġa-ilailaiani?”

21 Ġia tu maiġesi, vavine ta na farao evaġa-tubuani muramura kotuna ta moġo eġabiato, benamo farao fuseri toitoi ġesi eġiroato, eiaġoto mo, muramura na mabarana evaġa-tubu bareoato.”

Barau ġena Basileia rakatoġana

Mataio 7:13-14; 7:21-23

²² Iesu Ierusalemna dabaranai eiaġoto-ġoi nai, vanuġa baregori ema keiri nuġari ai evevaġa-ribato-ġoi.

²³ Tarima ta na edanaġiato, ekirato, “Vereġauka, tarima viravira moġo beġe maġurini ba?” Iesu na evaġa-veserito, ekirato,

²⁴ “Boġono vebibi-toġa, ġatama-boka kibobona boġono raka-toġa ġana, korana au na akiramini, tarimarima ġutuma ġeraka-toġa ġetoni, senaġi asi beġe raka-toġani.

²⁵ Numa tarimana bevariġisini, ġatama-boka bekouani murinai, ġomi tu murikai boġo ruġa-taġoni, ġatama-bokai boġo fidifidini, boġo kirani, ‘Vereġauka, ġai ġema ġatama-boka nokeoa!’ senaġi ġia bekirani, ‘Au asi ribaġu ġomi ainana boġo iaġoma!’

²⁶ Benamo ġomi boġo kirani, ‘Ġai tu ġoi ġesi taġaniġanito-ġoi ema taniuniu-vegogoto-ġoi; ema ġoi tu ġai ġema vanuġa ġatamanai ovevaġa-ribato-ġoi!’

²⁷ Senaġina ġia ma bekirani, ‘Au asi ribaġu ġomi ainana ġoiġaġomani. Au ġeguna ġoraka-veġita vei-rakava tarimami!’

²⁸ Benamo Aberahamo, Isako, Iakobo, ema peroveta tarimari mabarari boġo ġitarini Barau ġena Basileia nuġanai, senaġi ġomi tu murikai beġe dorirosimini; mo ġaro ai boġo taġini, gadikami beġe veġara-tarini.

²⁹ Tarimarima ġaro eraġekauni ema ġaro evariġoni, e debana (o north) ema gabina (o south) rekana na beġe iaġomani, beġe tanu-tarini vereko ai Barau ġena Basileia nuġanai.

³⁰ Boġono riba, toma ġegabini tarimari tu beġe guineni, a ġeguineni tarimari tu beġe gabini.”

Iesu Ierusalemna taġina eveito

Mataio 23:37-39

³¹ Mo negai Farisea tarimari kota Iesu ġenai ġeiġaġoto, ġevaġa-guruġaiato, ġekirato, “Mai gabu noraga-kwaneana, gabu ta ġana noiaġo, korana Heroda eurani ġoi bene vagimu etoni.”

³² Iesu evaġa-veseto, ekirato, “Ġoiġo, mo boġa kwaivana ġoa kiraia, ‘Au tu iauka rakavari alai-vaġirini ema tarimarima avaġa-namorini toma, boinani, ema ġaro vaġa-toitoinai ġegu ġauvei bavaġa-kori ġinikauani.’

³³ Senaġi toma, boinani, ilaġani ġegu iaġoiġo ai roġo baiġoni, korana peroveta tarimana tu irau gabu ai asi bemaseni, senaġi Ierusalemni moġo!

³⁴ Ierusalemna, Ierusalemna o, ġoi na peroveta tarimari ovaġirini ema Barau na etuġu-iaġosirini tarimari fore na otaki-maserini. Nega ġutuma aurato, natumi bana gana-ġeġeraġiri, kokoroku vavinena na natuna egoru-taririni kavana, senaġi ġomi tu asi ġourato!

³⁵ Moġa lorinai ġemi vanuġa e Rubu Veġa korina betanuni. Au na akiramini, ġomi roġo au asi boġo ġitaguni, beiaġoni mo, ġaro ta beragaġasini, monai vau boġo kirani, ‘Barau aranai eiaġomani tauna sivaġa-namoa.’”

14

Iesu na Sabadi ai keve tarimana evaġa-namoato

¹ Sabadi tai Iesu (ġekeaiato nai) eiaġoto, Farisea ġeri veġorikau tarimana ta ġena numai beġene ġaniġani ġana, benamo tarimarima na ġena veġa ġeġita-ġinikaurito-ġoi.

² Monai tarima ta ġia tauġanina eroro-roroto, Iesu ġoiranai etanu-taġoto.

³ Benamo Iesu na taravatu ġevevaġa-riba iaġiatio-ġoi tarimari e Farisea tarimari edanaġirito, ekirato, “Sabadi ai keve vaġa-namo tu maoro ba asiġina?”

⁴ Senaġi ġia asi ġeguruġato, ta na maki asi evaġa-veaseato. Benamo Iesu na mo keve tarimana eġabiato, evaġa-namoato murinai etuġuato.

⁵ Benamo ekirarito, ekirato, “Ġomi deikara natumu o ġemu boromakau nanu gurina nuganaġi bere keto-ġura nai, ġoi na Sabadi ai boro inu-raġea ba asiġina?”

⁶ Senaġi ġia na Iesu asi ġevaġa-veaseato.

Barabore - Veġaraġo verekona

⁷ Iesu na varivari tarimari eġitarito, tanutanu namori moġo ġeġaunarito, benamo ġeri barabore ta ekiragiato, ekirato,

⁸ “Bema tarima ta na bekeamuni, veġaraġo verekona raka-vegogonai, gabu namonai asi bono tanu-tari, korana irau vereko ġorikauna tauna na tarima barana ta bekeaiani ġesi.

⁹ Benamo ekeamito tarimana beiaġomani, bekiramuni, ‘Noveġita, mai vere ġena tanutanu novaġa-fakaia.’ Ġoi tu bemaiakamuni, benamo botanu-riġoni.

¹⁰ Bema ġoi ġekeamuni nai, tanutanu tanonai bono tanu. Benamo vereko ġorikauna tarimana beiaġomani nai, bekirani, ‘Ġata, tuġuna ġana novaraġe.’ Benamo ġoi tu beġe vaġa-raġemuni vereko tarimari mabarari na.

¹¹ Korana tu tauġena eveġabi-vaġisini tarimana tu, Barau na betore-riġoani, a tauġena evetore-riġoni tarimana tu, beġabi-vaġisiani.”

¹² Iesu na vereko ġorikauna tarimana ekiraiato, ekirato, “Bema ġoi ġaniġani o vereko ta bodabaraiani nai, ġatamu, tarikakamu, garagaramu o sevimu ai ġetanuni taġa tarimari asi bono keari, korana ġia na ġoi ma beġe keamuni, ġoina keakau beġe vaġa-voiani.

¹³ Senaġi bema vereko ta bodabaraiani nai, gara veġubu, tauġaniri rakava, kwaku rakava, mata-bubu tarimari bono keari,

¹⁴ benamo ġoi tu Barau ġena vevaġa-namo boġoitaġoani. Moġoni, ġia na asi beġe vaġa-voimuni, senaġi veġa iobuka-iobuka tarimari mase na ma beġe varigiġi-ġenoġoini ġaronai vau, voimu boa ġoitaġoani.”

Barabore - Vereko barana

Mataio 22:1-10

¹⁵ Iesu ġesi ġeġaniġani-vegogoto tarimana ta na mo guruġa eseġagiato nai, ekiraiato, ekirato, “Barau ġena Basileiai vereko bea ġaniġani tarimana tu beiakuni.”

¹⁶ Iesu na evaġa-veaseato, ekirato, “Tarima ta na vereko barana ta edabaraiato, benamo tarimarima ġutuma ekearito.

¹⁷ Ġani-vereko ġaronai ġena vetuġunaġi tarimana ta etuġuato, ekearito tarimari nea kirari, ‘Goiaġoma, dagara mabarari beġe rovina-toreri.’

¹⁸ Senaġi ġia mabarari ġekira-sirivaġito. Ta ekirato, ‘Au tu tano ta bavoia, be aurani bana ġitaia nai, asi bono baru.’

¹⁹ Ta ma ekirato, ‘Au tu boromakau gabanana (10) bavoiri nai, aiaġoni fokafokai atovo-naġirini, be asi bono baru.’

²⁰ Ta ma ekirato, ‘Au tu inivau mo haveġaraġo nai, asi baiaġosini.’

²¹ Vetuġunaġi tarimana eġenoġoito, ġena vere ekira-varaiato. Benamo numa tarimana ma baruna ġesi ġena vetuġunaġi tarimana ekiraiato,

ekirato, ‘Noraga-iaḡo vanuḡai, gara veḡubu, tauḡaniri rakava, mata-bubu ema kwaku rakava tarimari bono ḡori-iaḡomari.’

²² Benamo vetuḡunaḡi tarimana eḡenoḡoito, ekirato, ‘Vere o, mani ḡemu ura ḡauveina tu varau baveia, senaḡi numa roḡosi bene vonu.’

²³ Benamo vere na vetuḡunaḡi tarimana ma ekiraiato, ekirato, ‘Noiaḡo dabara barai ema vamoka dabarari ai, tarimarima bono kirari, beḡene iaḡoma, be auna numa benema vonu.

²⁴ Au na akiramini, akearito tarimari ta na ḡegu vereko ḡaniḡanina misina ta asi bevaḡa-mamiani.’”

Barabore - Iesu ḡena mero tu vevaḡa-gwaḡiḡi tarimari

Mataio 10:37-38

²⁵ Tarimarima ḡutuma-bara Iesu ḡesi ḡeiaḡoto-ḡoi, benamo eruḡa-kureto, ekirarito, ekirato,

²⁶ “Bema tarima ta eurani, au ḡegu ai bene iaḡoma etoni, senaḡi ḡia tamana ema sinana, ḡaraḡona ema natuna, kakana tarina ema tauḡena ḡena maḡuri maki veuraviniri asi betuḡamaḡi-fitoḡaiani nai, ḡia tu dia au ḡegu mero.

²⁷ Deikara tauḡena ḡena satauro asi beḡwaiani, benamo au murigu na asi berakani, ḡia tu dia au ḡegu mero.

²⁸ Bema ḡomi ta eurani numa ta bene ragaia etoni nai, betanu-tari guineni, numa voina beribaiani, moni beilailani ba asiḡina, ene?

²⁹ Irau ḡauvei besinaiani, benamo asi bevaḡa-koriani, mabarari na beḡe ḡitaiani tarimari na beḡe rikiriki-iaḡiani,

³⁰ beḡe kirani, ‘Mai tarima na esinaiato, senaḡi asi evaḡa-koriato.’

³¹ O kamara vanuḡa verena, irau vanuḡa verena ta bene vetari-vinia etoni, benamo asi betanu-tari guineni, sisiba asi bevetauni, ḡena vetari tarimari mabarari 10,000, ema reke ta vere ḡena 20,000, ḡia ḡeiaḡoma-viniani nai, bevaḡa-darereani ba?

³² Bema ḡia asi ilaila nai, ḡia aranai ḡena tarima tari betuḡu-iaḡorini, mo doḡoro barana roḡo fakari manaḡa nuḡanai, maino beḡene ḡabia dabarana beḡea veiani.

³³ Moḡa ilailanai deikara ḡena dagara mabarari asi beiaḡuirini tu asi au ḡegu mero.”

Barabore - Damena

Mataio 5:13; Mareko 9:50

³⁴ “Damena tu namo, senaḡi bema damena mamina berekwa-rekwani nai, kamara dabarai mamina ma beḡenoḡoini?

³⁵ ḡia tu asi ilaila tano vaḡa-namona ema asi namo varovaro dagarari ḡesi vaḡa-ḡarari ḡana; moḡa lorinai tarima na beḡe fitoḡaiani. Ma seḡana tarimana bene seḡaḡi!”

15

Barabore - Rekwerekwa mamoeni

Mataio 18:12-14

¹ Takesi gogo tarimari ema vei-rakava tarimari ḡutuma Iesu ḡenai ḡeiaḡoto, ḡena guruḡa beḡene seḡaḡiri ḡana.

² Farisea tarimari ema taravatu ḡevevaḡa-riba iaḡiato-ḡoi tarimari ḡemugumuguto, ḡekirato, “Mai tarima tu rakava tarimari eḡabi-raḡerini ema ḡia ḡesi ḡeḡaniḡani-vegogoni!”

³ Benamo Iesu na mai barabore ḡeri ekiraḡiato, ekirato,

4 “Bema ġomi ta ma ġena mamoe sinau ta (100), benamo sebona berekwa-rekwani nai, ġia tu kara beveini? Ġia na 99 tano fakanai beraga-kwanerini, edobito mamoea bevetauani mo beġoitaġoani.

5 Bedoġariani nai, ġabanai befaġa-gabagabaiani ma iakuna ġesi,

6 benamo numa ġana beiaġoni. Beragasinai nai, ġatana e sevina tarimari bekearini, bekirani, ‘Sima iaku-vegogo, korana ġegu mamoe, edobito dagarana, ma badoġaria.’

7 Au na akiramini, moġa ilailanai rakava tarimana ta ġena rakava ġerina evetuġamaġi-kureni nai, gubai iaku ema verere tu barego lelevaġi, a vei-iobuka-iobuka tarimari 99 ġeri vei-iobuka-iobuka dairi ai asi beġe vetuġamaġi-kureni maki bevanaġirini.”

Barabore - Rekwarkwa monina

8 “Bema vavine ta ġena silva moniri mabarana gabanana (10), benamo sebona bevei-rekwa-rekwani nai, ġia tu kara beveini? Ġia na lamefa begabuani, numa bedaroani, mo moni sebona bevetau-ġitakuani mo bea ġoitaġoani.

9 Bedoġariani nai, ġia na ġatana e sevina tarimari bekearini, bekirani, ‘Sima iaku-vegogo, korana tu ġegu silva monina, erekwa-rekwato dagarana, varau badoġaria.’

10 Au na akiramini, rakava tarimana ta ġena rakava ġerina evetuġamaġi-kureni nai, Barau ġena aneru moġesi beġe iakuni.”

Barabore - Rekwarkwa merona

11 Iesu ma ekirato, “Tarima ta natuna ruarua.

12 Tau muriseina na tamana ekiraiato, ekirato, ‘Tama, ġitana farefare novareri, be au debaġu farefareri tu novinigu.’ Benamo farefare mabarari natuna ruarua fakari ai evarerito.

13 Ġaro asi vovoka ġeiaġoto nuġanai, tau muriseina ġena farefare evaġa-vegogoto, benamo tano manaġa ġana erakato. Monai ġena farefare ea ġereiaġirito.

14 Ġena farefare mabarari evaġa-koririto murinai, mo tano ai doġe barego eġorato. Ġia varau asi-ġena, asi-ġana.

15 Benamo eiaġoto, mo tanobara tarimana ta ġenai ġauvei ea vetauto, benamo ġia na etuġuato ġena tano ai bai bene ġitaġauri ġana.

16 Ġia evito-rakavaiato nai, bai ġari ġanigani bene ġaniri etato, senaġi mo ġanigani maki ta na asi eviniato.

17 Benamo ea vetuġamaġi-kureto, ekirato, ‘Tamagu ġena ġauvei tarimari tu vovoka, ema ġari ġanigani maki ġutuma, senaġi au tu mainai vitona evaġiguni.

18 Naġenoġoi, tamagu ġenai naiaġo, benamo bana kiraia: Tama, Barau ġoiranai ema ġoi ġoiramu ai avei-rakavato.

19 Au tu asi ilaila ġoi natumu ai ma bono kiraġigu; senaġi anoġimuni, ġemu vetuġunaġi tarimanai bono vaġa-iaġoġu, banasi.’

20 Benamo evarigisito, tamana ġenai eiaġoto.

Gabu manaġa na roġo eiaġomato-ġoi nai, tamana na varau eġita-doġariato, benamo evetuġa-rakavaiato, benamo eraga-iaġoto, ea faġa-maġuriato, everauato.

21 Benamo natuna na ekiraiato, ekirato, ‘Tama, au tu Barau ġoiranai ema ġoi ġoiramu ai ma ġegu vei-rakava. Au tu asi ilaila ġoi natumu ai bono kiraġigu.’

²² Senaĝi tamana na ĝena vetuĝunaĝi tarimari evaĝa-guruĝarito, ekirato, ‘Ĝoraga-vei! Dabuĝa namo vedaureana ta ĝoĝwa-iaĝomaia, ĝoma vaĝa-riĝoa. Rini ta didinai ĝoma dori-toĝaia, ema tamaka maki kwakunai ĝoma toreri.

²³ Ema boromakau natuna ma monana ĝoĝwa-iaĝomaia, ĝovaĝia, benamo bisini ĝania e bisini verere-vegogo.

²⁴ Korana natugu maĝa emaseto, senaĝi ma bemaĝuri-ĝenoĝoi; erekwa-rewato, senaĝi ma bama doĝaria!’ Benamo ĝia ĝeverere-vegogoto.

²⁵ Natuna tau guinena tu vamokai. Vamoka na eĝenoĝoito, numa eiago-viniato-ĝoi nai, mari e bara gururi eseĝaĝirito.

²⁶ Benamo vetuĝunaĝi tarimana ta ekeaiato, mo guru korana evedanaĝi-iaĝiato.

²⁷ Vetuĝunaĝi tarimana na evaĝa-veŝeato, ekirato, ‘Ĝoi tarimu beĝenoĝoi, tamamu na ma namona e ma maĝurina ĝesi bema doĝaria lorinai, ĝia na vetuĝunaĝi tarimari bevaĝa-guruĝari, boromakau natuna ma monana ĝesi beĝe vaĝia.’

²⁸ Tau guinena ebaru-rakavato, numai asi eraka-toĝato, benamo tamana eraka-rosito, enoĝiato neraka-toĝa ĝana.

²⁹ Senaĝi ĝia na tamana evaĝa-veŝeato, ekirato, ‘Noĝitaia, au tu laĝani ĝutuma ĝoi rekemu ai atanuni, vetuĝunaĝimu aiaĝo-vinini, ĝemu ura mabarana akorana-iaĝirini, ĝemu vevaĝa-naĝi ta asi afitoĝaiato, senaĝi ĝoi na nanigosi natuna ta maki asi oviniguni au ma ĝatagu ĝesi vaĝa-iaku-iaĝima ĝana.

³⁰ A mai natumu mata-boraĝa vavineri ĝeri ai ĝemu farefare mabarari bea vaĝa-koriri; bea ĝenoĝoi nai tu, ĝoi na tu boromakau natuna mona mase bovaĝia ĝia ĝana!’

³¹ Tamana evaĝa-veseto, ekirato, ‘Natugu, ĝoi tu au sevigu ai otanuvanaĝi vanagi, au ĝegu dagara mabarari tu ĝoi ĝemu.

³² A toma ĝita si-iaku, bisini verere, korana tarimu emaseto, senaĝi bemaĝuri; erekwa-rewato, senaĝi ma bitama doĝaria.’ ”

16

Vetuĝunaĝi tarimana ĝena tuĝamaĝi-iobuka

¹ Iesu na ĝena mero evaĝa-guruĝarito, ekirato, “Farefare e moni vovoka tarimana ta etanuto-ĝoi. Benamo tarima kotari na farefare vovoka tarimana ĝekira-varaiato, ĝia ĝena farefare ĝitaĝauna tarimana na ĝena farefare eĝere-iaĝirini.

² Moĝa lorinai taĝa tarimana na ekea-toĝaiato, benamo ekirato, ‘Ĝoi varimu baseĝaĝia moĝoni ba? Au ĝegu ĝauvei oĝwa-ragaiato nai, novevarifiu-iaĝia, korana initoma ĝoi tu dia au ĝegu farefare narinarina tarimana.’

³ Benamo mo farefare ĝitaĝauna tarimana etuĝamaĝito, ekirato, ‘Au ĝegu baregona na toma evaĝa-dokoguni ĝegu ĝauvei na. Kara haveini? Au tu asi gwadagu baiaraĝani ema noĝinoĝi au ĝegu ai tu maiaka dagarana.’

⁴ Etuĝamaĝito-ĝoi nuĝanai, ekirato, ‘Mai bama riba kara haveiani! Benamo bevaĝa-dokoguni nai, ĝatagu namori ĝutum na beĝe ĝabi-raĝeguni ĝeri numai.

⁵ Moĝa lorinai ĝena baregona ĝenai ĝeĝabi-toreto tarimari mabarari ekea-vegogorito. Benamo ta edanaĝiato, ekirato, ‘Ĝoi ĝemu ĝabitore tu vira?’

⁶ Evaḡa-veseto, ekirato, ‘Olive diḡana kavaburi sinau imaima toitoi (800).’ Benamo farefare ḡitaḡauna tarimana na ekiraiato, ‘Ġemu ḡabitore fefana maiḡa, noraga-tanutari, benamo sinau vasivasi (400) notorea.’

⁷ Benamo ta ma edanaḡiato, ekirato, ‘Ġoi ḡemu ḡabitore tu vira?’ Ġia ekirato, ‘Widi fuseri mabarari 1,000.’ Benamo farefare ḡitaḡauna tarimana na ekiraiato, ‘Ġemu ḡabitore fefana maiḡa, noḡabia, benamo sinau imaima toitoi (800) notorea.’

⁸ Dokonai mo farefare narinarina tarimana rakavana ḡena baregona na evaḡa-raḡeato, korana ḡena tuḡamaḡi-iobuka dainai. Korana tanobara tarimari tu ḡeiaunega-lelevaḡito ḡeri tanu-vegogo ai, a mamai ḡetanuni tarimari tu asiḡina.

⁹ Au na akiramini, mai tanobara farefareri e moniri rakavari ḡerina tarimarima tu ḡomi ḡatami ai boḡono vaḡa-iaḡori, korana ḡemi moni bea korini nai, ḡomi tu beḡe tanu-vanaḡi vanaḡini numari ai beḡene ḡabi-raḡemi gubai.

¹⁰ Deikara dagara misina ḡauvei-iaḡina ma ribana nai, dagara baregona maki ḡauvei-iaḡina ma ribana; ema deikara dagara keinai beḡofaḡofani nai, dagara baregonai maki beḡofaḡofani.

¹¹ Bema ḡomi tanobara farefareri e moniri ḡauvei-iaḡiri asi ribami nai, Barau na kamasi farefare korikoriri gubai bevinimini boḡo ḡauvei-iaḡirini?

¹² Ema bema ḡomi tarima ta ḡena farefare asi boḡo ḡitaḡau-ginikaurini nai, Barau na ḡomi ḡemi farefare maki asi bevinimini?

¹³ Vetuḡunaḡi tarimana na baregona ruarua vetuḡunaḡiri asi beiaḡo-viniri riba. Korana ḡia na ta tu asi beura-viniani, a ta tu beura-viniani; ta bevaḡa-moḡoniani, a ta tu beḡofaḡofa-iaḡiani. Ġomi maki Barau ema moni nega sebonai vetuḡunaḡiri asi boḡo iaḡo-vinirini, asiḡina-ḡinavaḡi.”

Iesu ḡena guruḡa kota

¹⁴ Farisea tarimari tu moni ḡeuravini-baregorito-ḡoi. Iesu ḡena guruḡa mabarana ḡeseḡaḡiato nai, ḡerikiriki-iaḡiato.

¹⁵ Iesu na evaḡa-guruḡarito, ekirato, “Ġomi tu tarimarima ḡoirari ai govekiragini, senaḡi Barau tu nuḡami ribana. Tarimarima na ḡevaḡa-raḡerini dagarari Barau na tu asi eura-vinirini, etuḡamaḡi-fitoḡarini.

¹⁶ Mose ḡena taravatu ema peroveta tarimari ḡeri guruḡa ḡetanuto-ḡoi eiaḡomato mo, Ioane Babatiso ḡena negai. Monana Barau ḡena Basileia varina ḡeḡobata-iaḡiani nai, tarimarima mabarari ḡevebibi-toḡani beḡene raka-toḡa ḡana.

¹⁷ Guba ema tanobara beḡe rekwa-rekwani tu ma dabarana, senaḡi taravatu ḡena toutou ta maki asi berekwa-rekwani.

¹⁸ Tau ta na ḡaraḡona belaiiani, benamo vavine ta ma beḡaraḡoani nai, ḡia mo tu veḡura-vanaḡi veiḡana beveiani; ma tarima boruna ta na mo tau na elaiato vavinena moḡa ma beḡaraḡoani nai, ḡia maki beveḡura-vanaḡini.”

Farefare e moni vovoka tarimana ema Lasaro

¹⁹ “Farefare e moni vovoka tarimana ta etanuto-ḡoi. Ġia tu dabuḡa namori moḡo eveito-ḡoi e ḡaro mabarari ai everereto-ḡoi ema ḡaniḡani namona moḡo eḡanito-ḡoi.

²⁰ Ġena numa ḡatama bokanai tarima ta asi-ḡena ema asi-ḡana arana Lasaro eḡena-taḡoto-ḡoi. Ġia tu kefina mabarana lakufodo.

²¹ Eura-baregoto-ḡoi taḡa tarimana ḡana ḡaniḡani momori bene ḡani. Kwaiva maki ḡeiaḡoto, ḡia manuḡana ḡeiamuserito-ḡoi.

²² Asi ġena-ġana tarimana emaseto, benamo aneru na Aberahamo sevina ġana ġeġwa-iaġoato. Farefare vovoka tarimana ma emaseto, benamo ġeguriato.

²³ Mase gabunai (o Hades) midigu eġanito-ġoi nai, eboġe-raġeto, manaġai Aberahamo eġitaiao, ema Lasaro maki ġia ġesi.

²⁴ Benamo ekeato, ekirato, 'Aberahamo, tamagu o, novetuġagu, mani Lasaro notuġua, ġimana didina nanu ai nea duġi-reia, be meagu moġo nama vaġa-ġavea, korana tu au mai karava morenai midigu vovoka aġanini.'

²⁵ Senaġi Aberahamo ekirato, 'Natugu o, notuġamaġia, ġoi omaġurito-ġoi ġarori ai dagara namori oġabito-ġoi, a Lasaro tu dagara rakavari eġabito-ġoi. Senaġi toma ġia tu everereni, a ġoi tu midigu oġanini.'

²⁶ Ġita fakarai maki koufa bara ta etanuni, moġa lorinai maina na tarima ta maniġana asi beiaġosini, ema manina na maki ta maiġana asi beiaġomani.'

²⁷ Benamo farefare vovoka tarimana ekirato, 'Tamagu o, anoġimuni, Lasaro notuġua tamagu ġena numa ġana.'

²⁸ Au tarigu merori tu imaima. Ġia na bene vaġa-guruġari, mai midigu ġani gabuna ġana beġe iaġomani garina.'

²⁹ Senaġi Aberahamo ekirato, 'Mose ema peroveta tarimari tu ġia ġesi, be garori neġi beġene seġaġiri.'

³⁰ Taġa tarimana ekirato, 'Asiġi, tamagu! Senaġi bema emaseto tarimana ta beiaġoni nai, ġia tu ġeri rakava ġerina beġe vetuġamaġi-kureni.'

³¹ Aberahamo ekirato, 'Bema Mose ġena taravatu ema peroveta tarimari ġeri ġuruġa asi beġe seġaġirini nai, mase na tarima ta bere varigiġi-ġenoġoi maki asi ġere seġaġi-vinia.' "

17

Vei-rakava ema rakava tuġamaġi-fitoġari

¹ Iesu na ġena mero evaġa-guruġarito, ekirato, "Tarimarima vaġa-ketori dagarari roġo beġe ġorani, senaġi bevaġa-ġorarini tarimana tu vetuġana kekei.

² Ġia tu bere namo fore baregona ta ġaiġonai ġere baru-kaua, benamo davarai ġere fiu-reia, korana mai misimisiri ta rakavai beġofa-toġaiani garina.

³ Moġesi nai lorimi boġono vetore! Bema ġoi tarikakamu veiġa rakavari eveini nai, bono kira-ġoia, ema ġena rakava ġerina bevetuġamaġi-kureni nai, ġena rakava bono tuġamaġi-fitoġari.

⁴ Bema ġia na ġaro ta vaġa-imaima ruarua (7) bevaġa-rakavamuni, ema vaġa-imaima ruarua (7) beġenogoini ġemu ai, bekirani, 'Bavetuġamaġi-kure,' betoni nai, ġoi na ġena rakava bono tuġamaġi-fitoġari.' "

Veġabidadama

⁵ Iesu ġena apostolo na Vereġauka ġevaġa-guruġaiato, ġekirato, "Ġema veġabidadama novaġa-baregori!"

⁶ Vereġauka na evaġa-veserito, ekirato, "Bema ġomi ġemi veġabidadama tu mastadi ġauna ġutuna ġena barego kavana, misina korokoro moġo, senaġi ġomi na mai ġau baregona o malberi ġauna boġo kiraiani, 'Noveraġa-vaġi, be davarai noa vevaro!' boġo toni, benamo garomi tu beseġaġiani.' "

Vetuġunaġi tarimana ġena ġauvei

7 “Bema ġomi ta ġemu vetuġunaġi tarimana tano befokani o mamoe beġita-ġaurini murinai, ġauvei gabuna na numa ġana beiaġomani nai, ġoi na bokiraiani, ‘Noraka-ġarigari, be noma ġanigani,’ botoni ba?”

8 Asiġina, senaġi ġoi bokirani, ‘Ġagu ġanigani novei, ema bono vedabuġa, be bonoma nari-ġaugu; au bana ġanigani ema bana niuniu-ġosi murinai vau, ġoi ma bono ġanigani ema bono niuniu.’

9 Ba vetuġunaġi tarimana ġena seġaġi ai dainai bevaġa-namoani? Asiġina.

10 Ġomi maki moġesi; bema Barau na bekiramini ġauveiri mabarari boġo veirini nai, boġo kirani, ‘Ġita vetuġunaġi tarimara ġera ġauvei.’”

Iesu na lepera tarimari gabanana (10) evaġa-namorito

11 Iesu Ieruselema eiaġo-viniato-ġoi nai, Samaria ema Galilea tanori vefakari na eraka-vanaġito.

12 Vanuġa tai eraka-toġato, benamo lepera tarimari gabanana (10) ġesi ġevedoġarito. Roġo manaġai ġeruġa-tarito,

13 ġia ġekeato, ġekirato, “Iesu! Gema Vereġauka! Novetuġama!”

14 Iesu na eġitarito, benamo evaġa-guruġarito, ekirato, “Rubu Veaġa vereri ġeri ai ġoiāġo, be beġenea ġitami.” Benamo ġeiaġoto-ġoi nuġanai, tauġaniri ġevieirevato, ġenamoto.

15 Tarima sebona moġo ġia fakari ai kefina eġitaiato enamoto, benamo eġenoġoi-iaġoto, Barau evonevone-raġe viniato.

16 Benamo Iesu kwakuna koranai evetui-tarito, evaġa-namoato. Ġia tu Samaria tarimana.

17 Iesu ekirato, “Tarima mabarari tu gabanana (10) beġe namo. Imaima vasivasi (9) tu aiġeri?”

18 Kara dainai mai irau gabu tarimana ġereġana moġo beġenoġoi-iaġoma, Barau bema vaġa-raġea?”

19 Benamo Iesu na ekiraiato, ekirato, “Novariġisi, noiaġo, ġemu veġabidadama na bevaġa-maġurimu.”

Barau ġena Basileia beiaġomani guruġari

Mataio 24:23-28; 24:37-41

20 Farisea tarimari kota na Iesu ġedanāġiato, Barau ġena Basileia tu aitoma beiaġomani. Ġia na evaġa-veserito, ekirato, “Barau ġena Basileia beiaġomani tu asi boġo ġitaiani dagarana.

21 Tarima ta asi bekirani, ‘Noġitaia, iniga!’ o ‘Iomoġa!’; korana Barau ġena Basileia tu ġomi fakami ai maniġa.”

22 Benamo ġia na ġena mero evaġa-guruġarito, ekirato, “Ġaro ta be-raġasini nai, ġomi ġemi ura baregona tu Tarimarima Natuna ġena ġaro sebona ta moġo boġono ġitaia, senaġi asi boġo ġitaiani.

23 Kotari na beġe kiramini, ‘Tarimana iomoġa!’ o ‘Tarimana maiġa!’ beġe toni. Senaġi asi boġono iaġo, murinai asi boġono raka.

24 Korana kiriku eragani nai, morena gubai reketa-reketa ġana eiaġoni kavana, Tarimarima Natuna ġena ġaro nuġanai maki moġesi beveini.

25 Senaġi ġia midigumidigu vovoka roġo beġani-guineni, ema toma ġuru tarimari na roġo beġe kira-fitōġaiani.

26 Tarimarima Natuna beiaġomani ġaronai tu Noa ġena negai kavana.

27 Tarimarima mabarari ġeġaniganito-ġoi, ġeniuniuto-ġoi, tau e vavine ġeveġaraġoto-ġoi, eiaġomato mo, Noa ġena lagatoi ai eraka-toġato ġaronai, benamo ġutuġutu na mabarari eġutu-maserito.

²⁸ Lota ġena negai maki moġesi moġo. Ġeġaniġanito-ġoi, ġeniuniuto-ġoi, ġeivoivoito-ġoi, ġevaro-varoto-ġoi, numa ġeragato-ġoi.

²⁹ Senaġi Lota Sodoma eraga-kwaneato ġaronai, karava ma salfa o fore seġukari ġesi guba na ġeketo-firiġoto, mabarari evaġi-masemaserito.

³⁰ Tarimarima Natuna befororini nai, maki moġesina beġorani.

³¹ Mo ġaro ai, bema tarima ta tu numa tuġunai etanu-taġoni, numai asi ma bene raka-toġa ġena farefare bene ġabiri. Ema bema tarima ta tu vamokai nai, ġia ġena numa ġana asi ma bene ġenoġoi ġena farefare ġabiġabiri.

³² Lota ġaraġona boġono tuġamaġia!

³³ Deikara tauġena moġo ġena maġuri lorina etoreani tarimana, ġena maġuri beleaiani; a ġena maġuri eleaiani tarimana na maġuri bedoġariani.

³⁴ Akiramini, mo boġi ai tarima ruarua geda sebonai beġe genani nuġanai, ta tu Barau na beġabi-vaġiani, (korana beġabi-raġeani nai), a ta tu betanuni, (korana bekira-fitoġaiani nai).

³⁵ Vavine ruarua widi giro dagarana beġe giro-vegogoani nai, ta tu beġabi-vaġiani, a ta tu betanuni. [³⁶ Tarima ruarua vamokai beġe ġauveini nai, ta tu beġabi-vaġiani, a ta tu betanuni.]”

³⁷ Iesu ġena mero na ġedanaġiato, ġekirato, “Vereġauka o, ainai beġorani?” Iesu evaġa-veseto, ekirato, “Mase tauġanina etanuni gabunai, gaio maki monai beġe vegogoni, (be ġia na beġe vaġa-foforiani).”

18

Barabore - Vabu ema Kota eseġaġini tarimana

¹ Benamo Iesu na ġena mero ġeri barabore ta ekiraġiato. Mo barabore na bene vaġa-ribari, be vanaġivanaġi beġene ġauġau ema asi beġene moiramaira ġana.

² Maġesi ekirato, “Vanuġa tai Kota eseġaġini tarimana ta etanuto-ġoi. Ġia tu Barau ġarina asi eveito-ġoi, ema tarimarima maki asi egubakaurito-ġoi.

³ Mo vanuġa vabuna ta mai Kota eseġaġini tarimana ġenai eiaġo-ġenoġoi ġenoġoito-ġoi, ġena maoro evevaġa-doġe-ġani viniato-ġoi ema ekirato-ġoi, ‘Novaġa-kavagu, be ġevaġa-rakavaguni tarimari davari noviniri!’

⁴ Nega emanaġato nuġanai, Kota eseġaġini tarimana na vabu ġena ura veġana asi eveiato. Senaġi ġaro ta ġia tauġena evetuġamaġito, ekirato, ‘Au tu Barau ġarina asi aveini ema tarimarima maki asi agubakaurini,

⁵ senaġi dagara sebona tu, mai vabu na au evaġa-doġe-ġaniguni nai, ġena ura veġana naveia, korana vanaġivanaġi beiaġomani, benamo au bevaġa-doġe-ġani iaġoguni ġesi.”

⁶ Vereġauka ma ekirato, “Mo Kota eseġaġini tarimana kara etato, ġoseġaġia.

⁷ Be kamasi? Barau na eviriġirito tarimari, ġia ġenai boġi ema laġani mabarari ai ġetaġitaġini ema ġenoġinoġi-viniani tarimari, vevaġa-maoro nuġanai tu asi bevaġa-kavarini? Nevaġa-kavari ġana nai tu bekwaiboni?

⁸ Au na akiramini, ġeri maoro ai ġia na bevaġa-kava ġariġaririni. Senaġi Tarimarima Natuna ma beiaġomani nai, ġia veġabi-dadama tanobarai bedoġariani ba asiġina?”

Farisea tarimana ema takesi gogo tarimana

⁹ Tarima kotari ġeri tuġamaġi ġia tu vei-iobukaiobuka, a tarimarima mabarari tu vei-rakava tarimari. Iesu na mai tarima ġeri barabore ekiraġiato, ekirato,

10 “Tarima ruarua Rubu Veāga gāna gēiaḡoto, gēa ḡurīgurito; ta tu Farisea tarimana, a ta tu takesi gogo tarimana.

11 Farisea tarimana gēreḡana reke tai eruḡato, benamo eḡauḡauto, eki-rato, ‘Barau o, avaḡa-namomuni, korana au tu dia tarima mabarari kavana, be seḡafore tarimari, vei gēgeva-gēgeva tarimari, veḡura-vanaḡi tarimari. Avaḡa-namomuni, korana au tu dia iomo takesi gogo tarimana kavana.

12 Fura o wiki ta nuḡanai au tu ḡaro ruarua aḡani-veaḡani, ema adoḡarini dagarari karava gabanana (10) aveirini, benamo karava sebona tu ḡoi avinimuni.’

13 Senaḡi takesi gogo tarimana tu manaḡai eruḡato, asi eboḡe-raḡeto gubai, kobana ebotaiaito, ekirato, ‘Barau o, au tu rakava tarimagu, noma vetuḡagu!’

14 Au na akiramini, takesi gogo tarimana tu Barau na evaḡa-moḡoniato, ma vei-iobukaiobukana ḡesi vanuḡa gāna eḡenoḡoito, a Farisea tarimana tu asiḡina. Korana tauḡena moḡo eveḡabi-varaḡeni tarimana tu, Barau na bevaḡa-variḡoani, a tauḡena evevaḡa-variḡoni tarimana tu, bevaḡa-varaḡeani.”

Iesu na mero misiri evaḡa-namorito

Mataio 19:13-15; Mareko 10:13-16

15 Tarima kotari mero misimisiri Iesu ḡenai gēḡwa-iaḡorito, ḡimana iatari ai bene toreri gāna. Ḣena mero na gēḡitarito, benamo ḡekira-ḡoirito.

16 Senaḡi Iesu na mero misiri ekea-iaḡomarito, ḡena mero ekirarito, eki-rato, “Mani mero misiri au ḡegu ai gēiaḡoma, asi ḡolairi, korana manigēsina kavana tu Barau ḡena Basileia tarimari.

17 Moḡoni au na ḡomi akiramini, dei na Barau ḡena Basileia asi beḡabi-raḡeani mero misina kavana, Basileiai asi beraka-toḡani.”

Farefare vovoka tarimana

Mataio 19:16-30; Mareko 10:17-31

18 Iuda tarimari ḡeri vere tauna ta na Iesu edanaḡiatio, ekirato, “Ve-vaḡa-riba taumu namona, au kara baveini vau, maḡuri vanaḡivanaḡi badoḡariani?”

19 Iesu na evaḡa-veseato, ekirato, “Ḣoi karase nai au namogu okiraḡini? Tarima ta asi namo, Barau moḡo ḡereḡana.

20 Taravatu ma ribamu, ‘Asi bono veḡura-vanaḡi, asi bono vaḡivagi, asi bono lema, asi bono vevaḡa-daḡa ḡofaḡofa, tamamu sinamu bono gubakauri.’ ”

21 Mo tarima ekirato, “Au keigu na beiaḡoma toma mani taravatu mabarari akorana-iaḡirini.”

22 Iesu na mo guruḡa eseḡaḡiatio, benamo ekiraiatio, “Ḣoi tu dagara sebongi moḡo orabuni. Ḣemu farefare mabarari novoivoi-iaḡiri, moniri tu asi-ḡeri ema asi-ḡari tarimari bono viniri, benamo gubai ḡoi ḡemu farefare bodoḡaririni. Moḡesi boveini vau, au murigu ai bonoma raka.”

23 Mo guruḡa eseḡaḡiatio nai, nuḡana emeto-rakavato, korana ḡia tu farefare ḡutuma tarimana.

24 Iesu na eḡitaiatio, benamo ekiraiatio, ekirato, “Farefare vovoka tarimari Barau ḡena Basileia ḡeri rakatoḡa tu gwaḡiḡi rakava!

25 Kamela nila kadarena na ḡena rakatoḡa tu kotuna gwaḡiḡi, a farefare vovoka tarimana Barau ḡena Basileia rakatoḡana ḡia ḡenai tu gwaḡiḡi rakava.”

26 Tarimarima na mai guruḡa ḡeseḡaḡiatio, benamo Iesu ḡedanaḡiatio, ḡekirato, “Be, deikarari vau maḡuri beḡe doḡariani?”

27 Iesu evaḡa-veseto, ekirato, “Tarimarima na asi beḡe veirini riba dagarari tu Barau na beveirini riba.”

28 Petero na ekiraiatio, ekirato, “Ḡoi ribamu, ḡai tu ḡema dagara mabarari ḡaraga-kwanerito, murimu ai ḡarakani.”

29 Iesu na ekirarito, “Moḡoni akiramini, tarima ta ḡena numa eraga-kwaneato, o ḡaraḡona, kakana, tarina, tamana, sinana, natuna Barau ḡena Basileia uranai,

30 ḡia na mai maḡuri nuḡanai dagara ḡutuma beḡoitaḡoni, ema mo negai vau maḡuri vanaḡivanaḡi bedoḡariani.”

Iesu na ḡena mase ma ekiraḡi-foforiatio

Mataio 20:17-19; Mareko 10:32-34

31 Iesu na ḡena mero gabanana ruarua (12) eḡori-veḡitarito, benamo ekirarito, ekirato, “Goseḡaḡi! Gita tu Ierusalemata ḡana tavarageni. Monai peroveta tauri na Tarimarima Natuna varina ḡetore-guineto guruḡari aniri mabarari beḡe moḡonini.

32 Irau bese (o Roma) tarimari ḡimari ai beḡe toreani. Ḡia na beḡe vaseva vaseva-iaḡiani, beḡe rikiriki-iaḡiani e beḡe kanunu-kanunuani.

33 Beḡe botaiani e beḡe vaḡi-maseani, senaḡi ḡaro vaḡa-toitoinai vau ma bevariḡisi-ḡenoḡoini.”

34 Iesu ḡena mero mo guruḡa tauna asi ḡeḡoitaḡoato. Guruḡa anina ḡia ḡeri ai tu vekuretoḡa. Ḡia asi ribari Iesu na kara ekiraḡiatio.

Iesu na mata-bubu tauna evaḡa-namoato

Mataio 20:29-34; Mareko 10:46-52

35 Iesu tu Ieriko ekavinaḡiatio nai, mata-bubu tauna ta dabara rikinai etanu-taḡoto-ḡoi, enoḡinoḡito-ḡoi.

36 Tarimarima ḡutuma dabarai ḡeraka-vanaḡito eseḡaḡito, benamo evedanaḡito, “Mai guru anina tu kara?”

37 Ḡekirato, “Iesu, Nasareta tauna, eraka-vanaḡini.”

38 Benamo ekea-fouto, ekirato, “Iesu o, Davida natuna, au novetuḡagu!”

39 Goirai ḡerakato tarimari na ḡekira-ḡoiatio, senaḡi ḡia ekea-ḡiḡiraḡe ḡiḡiraḡeto-ḡoi, “Davida Natuna o, au novetuḡagu!”

40 Iesu eruḡa-tarito, benamo ekirato, “Ḡoḡori-iaḡomaia!” Ḡia eiaḡomato, benamo Iesu na edanaḡiatio, ekirato,

41 “Kara ourani ḡemu ai naveia otoni?” Ḡia evaḡa-veseto, ekirato, “Vereḡauka o, matagu noma vaḡa-iaḡaia.”

42 Iesu ekirato, “Be, matamu nenamo, ḡemu veḡabidadama na bevaḡa-namomu.”

43 Vaḡa-sebo matana enamoto, eboḡeboḡe-ginikauto, Iesu murinai erakato, Barau evaḡa-raḡeato. Mo veḡa ḡeḡitaiatio tarimari mabarari na maki Barau ḡevaḡa-raḡeato.

19

Iesu ema Sagaio

1 Iesu Ieriko ai eraḡasito, benamo vanuḡa nuḡana na eraka-iaḡoto-ḡoi.

2 Monai tu takesi gogo tarimari ḡeri vere ta arana Sagaio; ḡia tu moni ema farefare vovoka tarimana.

³ Ĝia ĝena ura tu Iesu neĝita-*vetoĝaia* ĝia tu dei, senaĝi tarimarima ĝutuma ema ĝia tu tau kubina nai, neĝitaia ĝana egera-kavato.

⁴ Moĝa lorinai eraga-*guine-iaĝoto*, sikamoa ĝauna tai eraĝeto, Iesu monana beraka-*vanaĝini* nai, bene ĝitaia ĝana.

⁵ Iesu mo gabu ai eraĝasito, eboĝe-*raĝeto*, eĝitaiato, benamo ekiraiato, “Sagaio, norakariĝo-*ragaraga*, korana au toma tu ĝoi ĝemu numai batanuni bene.”

⁶ Benamo Sagaio eraga-*rakariĝoto*, ma iakuna ĝesi Iesu eĝori-*iaĝoato* ĝena numa ĝana.

⁷ Ĝeĝitaiato tarimari mabarari ĝemugumuguto, ĝekirato, “Mai tau tu rakava tarimana, ĝena numai ea tanuni.”

⁸ Sagaio eruĝa-*vaisito*, Vereĝauka e*vaĝa-guruĝaiato*, ekirato, “Vereĝauka, noseĝaĝi! Gegu farefare reke-ta tu gara veĝubu tarimari bavinirini, ema ĝena farefare aĝabi-*kavaiato* tarimana tu, nega vaĝa-*vasivasi* bavinigenoĝiani.”

⁹ Iesu na ekiraiato, ekirato, “Toma vevaĝa-*maĝuri* tu mai numai bema raĝasi, korana mai tarima maki Aberahamo natuna.

¹⁰ Korana Tarimarima Natuna tu rekwarekwa tarimari vetauvetauri ema bene vaĝa-*maĝuriri* ĝana eiaĝomato.”

Barabore - Vetuĝunaĝi tarimari moni ĝenarito
Mataio 25:14-30

¹¹ Mabarari ĝeseĝaĝito-*ĝoi* nuĝanai, Iesu na ĝeri barabore ta ekiraĝiato. Korana ĝia tu Ieruselema ekavi-*naĝiato* nai, ĝia maboru ĝekirato, Barau ĝena Basileia tu mo negai beforinini.

¹² Benamo ĝia ekirato, “Dagi baregona tarimana ta gabu manaĝana ĝana eiaĝoto, kini o vere dagina bene ĝabia vau, ma bene ĝenoĝoi ĝana.

¹³ Roĝosi bere raka nai, ĝena vetuĝunaĝi tarimari gabanana (10) eke-*iaĝomarito*, golo moniri ĝia tata sebori-*sebori* evinirito, benamo ekirarito, ekirato, ‘Au murigu ai boĝono ĝauvei-*iaĝiri*, be moni boruri tari ma boĝono doĝari.’

¹⁴ Senaĝi ĝena tanobara tarimari na asi ĝeura-*viniato-ĝoi* nai, murina na guruĝa ĝetuĝuto, ĝekirato, ‘Gai asi ĝaurani mai tarima ĝai ĝema vere ai bene iaĝo.’

¹⁵ Senaĝi mo tarima na kini dagina ĝeviniato murinai, eĝenoĝoi-*iaĝomato*. Benamo ĝena vetuĝunaĝi tarimari eke-*iaĝomarito*, beĝene vaĝa-*ribaia*, moni boruri vira ĝia tata ĝedoĝarito.

¹⁶ Tarima ginigunina eiaĝomato, benamo ekirato, ‘Vereĝauka, golo monina sebona oviniguto nuĝanai, au na tu moni gabanana (10) ma adoĝaririto.’

¹⁷ Ĝia na e*vaĝa-namoato*, ekirato, ‘Ĝoi tu vetuĝunaĝi taumu namona! Dagara misiri oĝauvei-*iaĝi* ginikaurini nai, au na vanuĝa mabarari gabanana (10) avinimuni, ĝoi na boĝita-*ĝaurini*.’

¹⁸ Vaĝa-*ruaruana* eiaĝomato, benamo ekirato, ‘Vereĝauka, sebona oviniguto nuĝanai, au na moni imaima ma adoĝaririto.’

¹⁹ Ĝena vere na ekiraiato, ‘Ĝoi tu vanuĝa imaima boĝita-*ĝaurini*.’

²⁰ Vetuĝunaĝi tarimana ta ma eiaĝomato, benamo ekirato, ‘Vereĝauka o, ĝoi ĝemu moni sebona tu iniĝa, au na muko ai akumuato, akure-*toĝaiato*.’

21 Au tu ƒoi garimu aveito, korana ƒoi tu asi vegubakau taumu. Tarima ƒeri dagara oƒabirini, ema dia ƒoi na ovarorito dagarari obasirini e okwarini.’

22 ƒena vere na ekiraiato, ‘ƒoi tu vetuƒunaƒi tarimana rakavana! Tauƒemu ƒemu guruƒa na bavevaƒa-maoro vinimuni. ƒoi ribamu au tu asi vegubakau taugu, dia au ƒegu dagarari aƒabirini, ema dia avaroto dagarari abasirini.

23 Be, karase nai ƒegu moni tu banikai asi otoreato? Benamo au bara ƒenoƒoi nai tu, ma torekauna o interestina ƒesi bara doƒaria.’

24 Benamo monai ƒeruƒa-taƒoto-ƒoi tarimari ekirarito, ekirato, ‘Mani moni sebona ƒenai maniƒa ƒoƒabia, moni gabanana (10) tarimana ƒovina.’

25 Senaƒi ƒia na ƒekiraiato, ‘Vereƒauka, ƒia ƒena moni tu varau 10 begabia.’

26 ƒia evaƒa-veseto, ekirato, ‘Au na akiramini, ma ƒena-ƒana tarimana tu ƒutumari ma baviniyani, a asi ƒena-ƒana tarimana tu, ƒenai misina maki baƒabi-vaƒiani.

27 Senaƒi au ƒebaru-viniguni tarimari, asi ƒeurato au ƒia bana guine-iaƒiri ƒetato tarimari, ƒoƒori-iaƒomari, au ƒoiragu ai ƒoma vaƒi-maseri!’ ”

Iesu ƒena rakatoƒa Ierusalemai ƒevonevone-raƒe viniato

Mataio 21:1-11; Mareko 11:1-11; Ioane 12:12-19

28 Eguruƒa-ƒosito vau, Iesu eraka-guineto, Ieruselema ƒana evaraƒeto.

29 Betefage e Betania ekavinagiritito-ƒoi nai, Olive ƒorona rekenai, benamo Iesu na ƒena mero ruarua etuƒu-guinerito, ekirarito, ekirato,

30 “ƒoira vanuƒana ƒana ƒoiaƒo. Boƒo raƒasini nai, doniki natuna ta barutari boƒo ƒitaiani, iatanai tarima ta roƒosi bene raƒe. Boƒono ruƒaia, benamo boƒono ƒori-iaƒomaia.

31 Bema tarima ta na bedanaƒimini, bekirani, ‘Karase nai ƒoruƒaiani?’ betoni nai, ƒomi boƒono kira, ‘Vereƒauka na eura-viniani.’ ”

32 Benamo tauri ruarua ƒeiaƒoto, Iesu na ekira-vararito ilailanai ƒedoƒariato.

33 Doniki natuna ƒeruƒaiaito-ƒoi nuƒanai, doniki biaguri na ƒedanaƒirito, “ƒomi tu karase mani doniki ƒoruƒaiani?”

34 ƒevaƒa-veseto, ƒekirato, “Vereƒauka na eura-viniani.”

35 Benamo Iesu ƒenai ƒeƒori-iaƒoato. ƒeri dabuƒa barari doniki doƒenai ƒeiavarito vau, Iesu ƒevaƒa-tanu-kauato.

36 Iesu eiaƒoto-ƒoi nai, tarimarima ƒeri dabuƒa barari dabarai ƒeiavarito.

37 Ieruselema varau ekavinagiatito, Olive ƒorona na evarigoto-ƒoi, benamo Iesu ƒena mero ƒutuma lelevaƒi ƒeiaƒuto, Barau ƒevonevone-raƒe viniato, korana nuƒa-farevaƒi veƒiƒari ƒeƒitarito nai.

38 ƒekirato,

“ƒera Vere baregona,
Vereƒauka aranai eiaƒomani Kinina,
sivaƒa-namoa!

Maino gubai bene barego ema vevaƒa-raƒe tu guba tuƒunai!”

39 Benamo Farisea tarimari kota na tarimarima ƒutuma nuƒari na Iesu ƒekiraiato, ƒekirato, “Vevaƒa-riba taumu, ƒoi ƒemu mero nokira-ƒoiri!”

40 Iesu na evaƒa-veserito, ekirato, “Au na akiramini, bema ƒia asi beƒe koƒoni nai, mai fore beƒe koƒoni.”

Iesu Ieruselema taƒina eveito

⁴¹ Iesu vanuḡa barana Ieruselema ḡana eraka-kavinagīto, eḡitaiato, benamo taḡina eveito,

⁴² ekirato, “Toma ḡaro ai ḡemu maino korana boro ribaia bere namo! Senaḡi toma, ḡoi na asi oḡitaiani.

⁴³ Ḡarona beraḡasini nai, ḡebaru-vinimuni tarimari na tano beḡe ragaiani, beḡe kobe-ḡeḡeraḡimuni, asi ḡemu rakarosi dabarana.

⁴⁴ Benamo ḡoi ema nuḡamu ai ḡetanuni tarimari beḡe fuki-bubu-riḡomini tano ai; fore maki ta iatanai asi beḡe iaḡuiani, korana Barau ḡena vevaḡa-kava emariḡoto asi oribaiani nai.”

Iesu na Rubu Veaḡa eiarevaiato

Mataio 21:12-17; Mareko 11:15-19; Ioane 2:13-22

⁴⁵ Iesu Rubu Veaḡa nuḡanai eraka-toḡato, voivoi tarimari elai-rosirito,

⁴⁶ ekirarito, ekirato, “Buka Veaḡa nuḡanai tu maḡesi ekirani, ‘Ḡegu numa tu ḡuriḡuri numana beḡe kiraḡiani,’ senaḡi ḡomi na tu lema tarimari ḡeri gumu gabunai boḡo vaḡa-iaḡoa.”

⁴⁷ Iesu tu ḡaro mabarari ai Rubu Veaḡa nuḡanai evevaḡa-ribato-ḡoi. Rubu Veaḡa vereri bareḡori, e taravatu ḡevevaḡa-riba iaḡiato-ḡoi tarimari, ema Iuda vereri na ḡia beḡene vaḡia dabarana ḡevetauato-ḡoi.

⁴⁸ Senaḡi asi ḡeri dabara, korana tu tarimarima mabarari ḡeurato-ḡoi, Iesu ḡena guruḡa ta maki asi beḡene vei-ketoea.

20

Ieruselema vereri na Iesu ḡena seḡuka korana ḡevedanaḡi-iaḡiato

¹ Ḡaro tai Iesu tu Rubu Veaḡa nuḡanai evevaḡa-ribato-ḡoi, Vari Namona tarimarima eḡobata-vinirito-ḡoi. Benamo Rubu Veaḡa vereri bareḡori, e taravatu ḡevevaḡa-riba iaḡiato-ḡoi tarimari, ema Iuda vereri Iesu ḡenai ḡeiaḡoto,

² ḡedanagīato, ḡekirato, “Kamara seḡukai ḡoi na mai dagara oveirini? Dei na mai seḡuka evinimuto?”

³ Iesu na evaḡa-veserito, ekirato, “Au na maki vedanaḡi ta avinimini. Ḡokira-varagu,

⁴ Ioane ḡena babatiso veiḡana tu Barau ḡenana eiaḡomato, ba tarimarima ḡerina?”

⁵ Ḡia fakari ai ḡeverorito, ḡekirato, “Bema ḡita bita kirani, ‘Barau ḡenana,’ bita toni nai, ḡia bekirani, ‘Karase nai Ioane asi ḡovaḡa-moḡoniato?’ betoni.

⁶ Senaḡi bema ḡita bita kirani, ‘Tarimarima ḡerina,’ bita toni nai, tarimarima mabarari na fore na beḡe taki-maserani, korana ḡia ḡekirani, Ioane tu peroveta tarimana, ḡetoni.”

⁷ Iesu ḡevaḡa-veseato, ḡekirato, “Ḡai asi ribama,” ḡetato.

⁸ Benamo Iesu na ḡia maki ekirarito, ekirato, “Au na maki kamara seḡukai mai dagara aveirini asi bakira-varamini.”

Barabore - Tavoḡa ḡitaḡauna tarimari rakavari

Mataio 21:33-46; Mareko 12:1-12

⁹ Benamo Iesu na tarimarima mai barabore ekira-vararito, ekirato, “Tarima ta vine tavoḡana evaroato vau, tavoḡa ḡitaḡauna tarimari ḡeri ai eraga-kwaneato. Benamo erakato gabu ta ḡana. Monai ḡaro ḡutuma ea tanuto.

10 Vine ġwari (o grapes) ġemaġeto, benamo ġia na ġena vetuġunaġi tauna ta etuġuato tavoġa narinarina tarimari ġeri ai, vine ġwari kota benea ġabi ġana. Senaġi tavoġa ġitaġauna tarimari na ġekwariato vau, ġimana kori ġetuġu-ġenoġoiato.

11 Benamo vetuġunaġi tauna ta ma etuġuato, senaġi ġia maki ġevaġa-vevaġiato, ġevei-maiaka maiakaiato, ġimana kori ġetuġu-ġenoġoiato.

12 Vetuġunaġi tauna vaġa-toitoina maki etuġuato, senaġi ġevaġa-vevaġi rakavaiato, kefina maki ma fauri vau ġelai-rosiato.

13 Benamo tavoġa biaguna ekirato, 'Au tu kara ma haveini? Au natugu, auravini-baregoani merona, na-tuġua, atuġamaġini ġia beġe gubakauani!'

14 Senaġi tavoġa narinarina tarimari na ġeġitaiato nai, tauġeri ġevoguruġa-vevinito, ġekirato, 'Mani tu tavoġa biaguna natuna, be sivaġia, benamo tavoġa tu ġita ġera.'

15 Benamo tavoġa murikanai ġeinu-rosiato, ġevaġi-maseato.

Iesu evedanaġito, ekirato, "Tavoġa biaguna tu kara beveiani ġia ġeri ai?"

16 Ġia beiaġomani, tavoġa ġitaġauna tarimari bevaġi-ġosirini, benamo tavoġa tu tarima irauri ma bevinirini." Tarimarima na mai guruġa ġeseġaġiato nai, ġekirato, "Asiġi, maiġesi asi bene vetore!"

17 Iesu na eġitarito, benamo edanaġirito, ekirato, "Be, mai guruġa Buka Veaġa nuġanaġi anina tu kara? Maiġesi ekirato,

'Fore numari ġeragarini tarimari na asi ġeura-viniato ma ġefitoġaiato forena tu duġu forenai eiaġoto.'

18 Deikara mo fore iatanai beketokauni tarimana beġwa-kirakiraiani; ema mai fore tarima ta iatanai beketokauni nai, belau-fatafataiani."

Kaisara, Roma ġeri vere, ġena takesi moniri

Mataio 22:15-22; Mareko 12:13-17

19 Taravatu ġevevaġa-riba iaġiato-ġoi tarimari e Rubu Veaġa vereri baregori na Iesu inimoġo beġene ġabia dabarana ġevetauato-ġoi, korana ġia ribari, Iesu na mai barabore tu ġia iatari ai ekiraġirito-ġoi nai. Senaġi tarimarima ġutuma vegogo-taġo naima ġegarito.

20 Moġa lorinai ġeġita-taġoato moġo. Gabivau ġofaġofa tarimari ġetuġurito, ġia na beġene danaġia noġa vei-iobukaiobuka tarimari kavana; beġene danaġia, bema Iesu ġena guruġa beiaġo-irauni nai, Iesu beġene ġabia, Roma gavanana ġimana seġukanai beġene torea.

21 Mo ġofaġofa tarimari na Iesu ġedanaġiato, ġekirato, "Vevaġa-riba taumu o, ġai ribama, ġemu guruġa e ġemu vevaġa-riba tu maoromaoro. Tarimarima ġeri dagi asi otuġamaġirini, senaġi ġoi na Barau ġena dabara ovevaġa-riba-iaġi ġitakauani ma moġonimu ġesi.

22 Nokirama, Kaisara, Roma ġeri vere, takesi moniri bitana vinia tu namo ba asiġi?"

23 Iesu na ġeri ġofaġofa varau eġitaiato, benamo ekirarito, ekirato,

24 "Silva monina ta ġovaġa-ġitagu! Mai tu dei iouiouna e dei arana?" Ġia ġevaġa-veseto, ġekirato, "Mai tu Kaisara laulauna e arana," ġetato.

25 Benamo Iesu na ekirarito, "Kaisara ġena, Kaisara boġono vinia, Barau ġena, Barau boġono vinia."

26 Iesu ġena guruġa tarimarima ġoirari ai tu maoro nai, asi ġeri dabara ġia beġe ġofa-darereani, senaġi ġena vevaġa-vese na nuġari ġefarevaġito, asi ma ġeguruġato.

Varigisi-ġenoġoi guruġari

Mataio 22:23-33; Mareko 12:18-27

27 Sadukea tarimari kota Iesu ġenai ġeiagoto. Ġeri tu tuġamaġi tu, mase tarimari asi ma beġe varigisi-ġenoġoini. Iesu ġedanaġiato, ġekirato,

28 “Vevaġa-riba taumu o, Mose na taravatu ġai ġema maiġesi etoreato, ‘Bema tau ta kakana bemaseni, ma vabuna tu roġo maġuri, senaġi asi naturi nai tu, mo tau na kakana vabuna bene ġaraġoa. Korana tu ġia na naturi tari beġene vaġa-maġuriri mo mase tauna ġena.’

29 Tarikaka tau moġo korina mabarari tu imaima ruarua (7). Tau guinena na vavine ta eġaraġoato, ma emaseto, natuna ta asi evaġa-ġoraiato.

30 Tau vaġa-ruaruana na vabu ma eġaraġoato,

31 tau vaġa-toitoina maki moġesina moġo. Moġa nuġanai ġia mabarari tu imaima ruarua (7), senaġi mabarari ġemaseto, naturi ta asi ġevaġa-ġoraiato.

32 Dokonai mo vavine maki emaseto.

33 Varigisi-ġenoġoi ġaronai mo vavine tu dei ġaraġona, korana ġia tu tau imaima ruarua (7) na ġeġaraġoato nai?”

34 Iesu na evaġa-veserito, ekirato, “Mai tanobarai tau e vavine ġeveġaraġoni,

35 senaġi roġo beiagomani Basileianai, vei-iobukaiobuka tarimari beġe varigisi-ġenoġoini. Ġia tu asi beġe veġaraġoni.

36 Ġia asi beġe maseni maki, senaġi aneru kavana beġe tanuni. Barau natunai beġe iaġoni, korana ġia tu varigisi-ġenoġoi tarimari.

37 Mose na evaġa-moġoniato, mase na ma beġe varigisi-ġenoġoini. Ġau eġaraiato-ġoi varina nuġanai, Mose na Vereġauka tu ‘Aberahamo ġena Barau, Isako ġena Barau, Iakobo ġena Barau’ ekiraġiato.

38 Moġoni, ġia tu maġuri tarimari ġeri Barau, dia mase tarimari ġeri Barau. Korana Barau ġenai tu, tarimarima mabarari tu maġuri.”

39 Taravatu ġevevaġa-riba iaġiato-ġoi tarimari kota ġekirato, “Vevaġa-riba taumu o, vevaġa-vese namona tu maniġa.”

40 Benamo moġa murina na asi ma ġedanaġi-ġenoġoiato, ġegarito nai.

Keriso tu Davida natuna ba Davida ġena Vereġauka?

Mataio 22:41-46; Mareko 12:35-37

41 Iesu na ekirarito, ekirato, “Ġia tu kamasi nai Keriso tu Davida natuna ġetoni?

42 Davida tu Salamo nuġanai ekirato,

‘Barau na ġegu Vereġauka ekiraiato:
Au ġimaġu aroribana rekenai bono tanu,

43 bene iaġo mo, ġoi ġebaru-vinimuni tarimari ġoi kwakumu gaburenai batorerini.’

44 Davida na Keriso tu ‘Vereġauka’ etato. Kamasi nai Keriso tu Davida natuna?”

Taravatu ġevevaġa-riba iaġiato-ġoi tarimari ġeri ġofaġofa

Mataio 23:1-36; Mareko 12:38-40; Luka 11:37-54

45 Tarimarima mabarari ġoirari ai Iesu na ġena mero ekirarito, ekirato,

⁴⁶ “Taravatu ġevevaġa-riba iaġiani tarimari ġerina lorimi boġono vetore. Ġia ġeurani dabuġa maukari beġene riġo, maketi gaburi ai beġene rakao-rakao, tarimarima na beġene vaġa-namori urari ai. Rubu nuġari ai ema ġani-vegogo gaburi ai ġeri ura tanutanu namori ai beġene tanu.

⁴⁷ Ġia na vabu ġeri numa ma farefare ġevaġa-koririni. Ġeri ġauġau tu mauka kenene, senaġi ġeġofaġofani. Moġesi ġeveini tarimari meto barego vedaurea beġe ġabini.”

21

Vabu ġena boubou monina

¹ Iesu eboġe-vaisito nai, moni vovoka tarimari ġeri boubou moni mauġai ġeġurato-ġoi eġitarito.

² Asi-ġena ema asi-ġana vabuna ta eiaġomato, eġitaiato, ġena moni misiri ruarua moġo eġura-riġorito, (mai tu noġa moġo toea sebna kavana).

³ Benamo Iesu ekirato, “Moġoni, au na akiramini, mai vabu na beġuraia monina tu mabarari ġeri vini bevanāġiri.

⁴ Korana mabarari ġeri moni vovoka ġerina koturi moġo beġe vini, senaġi mai vabu tu ġena moni misina ġenana moġo, ġena maġuri ai bere vevaġa-kava-iaġiri dagarari mabarari beġurari.”

Iesu na vau beġea ġorani dagarari ekiraġirito

Mataio 24:1-14; Mareko 13:1-13

⁵ Iesu ġena mero kota na Rubu Veaġa ġeguruġa-iaġiato, ġitaġitana ma marevana, ma ġena fore namori ġesi ema Barau ġevarevare-viniato varevare dagarari namori na ġevaġa-veraiato, ġetato. Senaġi Iesu ekirato,

⁶ “Ġarona beraġasini, mainai ġoġitarini dagarari mabarari tarima tari na beġe vare bubu-riġorini, fore ta fore ta iatanai asi beġe tanuni.”

⁷ Benamo Iesu ġedanāġiato, ġekirato, “Vevaġa-riba taumu, aitoma beġorani? Ema beġorani nai, kamara vetoġa na bevaġa-moġoniani?”

⁸ Iesu evaġa-veseto, ekirato, “Ġomi lorimi boġono vetore, beġe ġofamini ġesi. Korana tu tarimarima ġutuma au aragu ai beġe iaġomani, beġe kirani, ‘Tarimana tu au maġeġu!’ ema, ‘Ġarona beraġasi!’ beġe toni. Senaġi ġia muriri ai asi boġono raka.

⁹ Bema ġomi na vetari o tuari gururi e gururaġe boġo seġaġirini nai, nuġami asi beġene raġe. Mai dagara beġe ġora-quineni, senaġi dokona asi roġo beraġasini.”

¹⁰ Iesu ma ekirato, “Tanobara ta tanobara ta ġesi beġe vevaġini, gavamani ta gavamani ta ġesi beġe vetarini.

¹¹ Gabu ġutuma nuġari ai tano beġe iagaiagani, doġe beġe ġorani, ema tarimarima ġutuma keve beġe doġarini ta ġenana bevanāġini ta ġenai. Vevaġa-gari vetoġari baregori guba na beġe oforini.

¹² Senaġi mo dagara roġosi beġene ġora nai, ġia na ġomi beġe ġabimini, beġe vaġa-midigumini. Rubu ai beġe vaġa-kotamini, dibura numari ai beġe tore-toġamini. Kini e gavana ġoirari ai beġe ġori-iaġomini, korana au ġoġabi-raġeġuni nai.

¹³ Mai tu ġomi ġemi nega namona au vaġa-moġonigu ai boġo iaġoni.

¹⁴ Boġono vetuġamaġi, ġemi vevaġa-veve guruġari asi boġono tuġamaġi-guineri,

¹⁵ korana tu au na guruġa e iaunega bavinimini, beġe baru-vinimini tarimari na beġe kira-ġoimini, senaġi asi beġe kokoreni.

16 Tamami, sinami, kakami, tarimi, garagarami, e ġatami na tarimarima ġimari ai beġe revamini. Ġomi kota maki beġe vaġi-masemini.

17 Tarimarima mabarari na beġe iau-rakavamini, korana au ġoġabi-raġeguni nai.

18 Senaġi debami ġuiri sebona maki asi berekwa-rekwani.

19 Boġo vevaġa-gwaġiġini nai tu, boġo maġurini.”

Ierusalem a beġe vaġa-rakavaiani

Mataio 24:15-21; Mareko 13:14-19

20 “Vetari o tuari doġorori na Ierusalem a beġe tanu-ġeġeraġiani boġo ġitaiani, benamo boġo ribani, Ierusalem a dori ġevaġa-rakavaiani.

21 Mo negai Iudeai ġetanuni tarimari tu ġoro ġana beġene raga-iaġo. Vanuġa barana Ierusalem a nuġanai ġetanuni tarimari tu, vanuġa beġene raga-kwanea, ema ġunikai ġetanuni tarimari tu vanuġa barana nuġanai asi beġene raka-toġa.

22 Korana mo negai tu Barau na tarimarima ġeri rakava voiri bevinirini Buka Veaġai ġetore-guineato vaġa-moġoniri.

23 Vavine ma baniri e ġabi-varिġu vavineri kika ma vetuġari! Midigu barego mai tano ai beġe raġasini, ema Barau na ġena bese tarimari bevaġa-maoro vinirini.

24 Tarima kota tu vetari baġari na beġe vaġi-maserini, kota tu beġe ġabi-maġuririni, tanobara mabarari ġana beġe ġori-iaġorini, beġea diburarini; ema irau bese tarimari na Ierusalem a beġe fana-tariani, beiaġoni mo, ġeri ġaro bea korini.”

Tarimarima Natuna ġena iaġoma

Mataio 24:29-31; Mareko 13:24-27

25 “Ġaro, ġue, ema visiġu nuġari ai vetoġa beġe ġorani. Tanobara beseri davara ema ureure gururi ai beġe gari-rakavani.

26 Tarimarima beġe keto-founi gari dainai, ġeri tuġamaġi maki roġo beġe korini mo beġe ġorani dagarari dairi ai; korana tu guba seġukari beġe iagaiaġani.

27 Mo negai Tarimarima Natuna beġe ġitaiani, magube nuġana na beiaġomani ma seġukana e ma mamana baregona ġesi.

28 Mo dagara beġe ġorani nai, boġono varिġisi, boġono boġe-vaisi, korana vaġa-maġurimi tu varau bekavinaġi.”

Barabore - Vevaġa-riba figi ġauna ġenana

Mataio 24:32-35; Mareko 13:28-31

29 Iesu na ġeri barabore ta ekiraġiato, ekirato, “Figi ġauna ema ġau mabarari ġoġitari.

30 Lauri varिġuri ġefafani ġoġitarini, ġomi ġoribani, ġaro ġena tora taimina varau bekavinaġi.

31 Moġa ilailanai, ġomi maki bema boġo ġitarini, mai dagara beġe ġorani nai, boġo ribani, Barau ġena Basileia tu bekavinaġi.

32 Moġoni akiramini, mai ġuru asi bekorini, beiaġoni mo, mai dagara mabarari beġe ġorani.

33 Guba e tanobara beġe rekwa-rekwani, senaġi au ġegu guruġa tu asi beġe rekwarekwani, beġe tanu-vanaġi vanaġini.”

Boġono venari

34 “Lorimi boĝono vetore, ĝaniĝani e niuniu ĝutuma, ema tanobara ĝena tuĝamaĝi dagarari na ĝomi nuĝami beĝe vaĝa-metorini ĝesi. Benamo mo ĝaro na nuĝami bevaĝa-farevaĝirini.

35 Korana mo ĝaro tu tanobarai ĝetanuni tarimari mabarari ĝeri ai beragaŝini.

36 Moĝa lorinai boĝono venari, boĝono ĝauĝau ĝaro mabarari ai, beĝe ĝorani dagarari mabarari ĝerina boĝono raga-maĝuri ĝana, korana Tarimarima Natuna ĝoiranai roĝo boĝo ruĝani.”

37 Ĝaro mabarari ai Iesu tu Rubu Veaĝai evevaĝa-ribato-ĝoi, a lavilavi ai tu eraka-rosito-ĝoi, Olive Ĝorona tuĝunai ea genato-ĝoi.

38 Boĝiboĝi iamoiamonai tarimarima mabarari Rubu Veaĝai ĝevevogoto-ĝoi ĝia ĝena guruĝa beĝene seĝaĝia ĝana.

22

Iesu beĝene vaĝia dabarana ĝevetauato

1 Asi etubuni faraona verekona arana Pasova varau ekavi-naĝito. (Mo tu Iuda tarimari mase aneruna na evanaĝirito moĝo, asi evaĝirito verekona).

2 Rubu Veaĝa vereri baregori ema taravatu ĝevevaĝa-riba iaĝiato-ĝoi tarimari na Iesu beĝene ĝabia, benamo beĝene vaĝi-ĝairia dabarana ĝevetauato, korana tarimarima gariri ĝeveito.

Iudas na Iesu erevaiato

Mataio 26:14-16; Mareko 14:10-11

3 Mo negai Satani na Iudas Isakariota, tarima ta gabanana ruarua (12) fakari ai, eboroĝiato.

4 Benamo Iudas eiaĝoto Rubu Veaĝa vereri baregori ema Rubu Veaĝa narinarina tarimari ĝeri vere ĝeri ai, Iesu tu ĝia ĝimari ai kamasi bene tore-kaua dabarana ĝeboioĝa-vegogoato.

5 Ĝia ĝeiau-rakavato, ĝekira-toreato, moni beĝe viniani, ĝetato.

6 Iudas na eĝabi-raĝeato, benamo Iesu ĝia ĝimari ai vekuretoĝai betore-kauani dabarana evetauato-ĝoi.

Ginitaĝo mamoea ĝerovina-toreato

Mataio 26:17-25; Mareko 14:12-21

7 Ginitaĝo mamoei beĝe vaĝirini ĝarona varau eraĝasito.

8 Benamo Iesu na Petero ma Ioane etuĝurito, ekirato, “Ĝoiaĝo, Pasova verekona boĝono dabaraia, bitana ĝania.”

9 Ĝevaĝa-veseto, ĝekirato, “Ĝai tu ainai baĝana dabara-torea?”

10 Benamo Iesu na ekirarito, ekirato, “Vanuĝa baregonai boĝo raka-toĝani nai, tarima ta nanu gwaĝutuna befaĝaiani boĝo ĝoitaĝoani. Murina na boĝono iaĝo, ĝia beragekauani numanai boĝono raĝekau.

11 Benamo numa tarimana boĝono vaĝa-guruĝaia, boĝono kira, “Vevaĝa-riba tauna ekirani, ‘Varivari daiĝutuna tu aiĝa, au ema ĝegu mero ĝesi monai ginitaĝo mamoea baĝana ĝania?’

12 Benamo ĝia na daiĝutu baregona ta numa tuĝunai bevaĝa-ĝitamini, ĝeiareva-toreato. Monai boĝono dabara-torea.”

13 Benamo ĝeiaĝoto, Iesu na ekiraĝirito kavana ĝedoĝaririto. Monai vereko ĝedabaraiato.

Ĝani-vegogo veaĝana

Mataio 16:26-30; Mareko 14:22-26; 1 Korinto 11:23-25

14 Ginitaḡo mamoea beḡe ḡaniani aoana eraḡasito. Iesu tu ḡena apostolo tarimari ḡesi ḡaniḡani gabunai ḡetanu-tarito.

15 Benamo Iesu na evaḡa-guruḡarito, ekirato, “Au ḡegu ura baregona mai ginitaḡo mamoea ḡomi ḡesi bitana ḡani-vegogo-guinea vau, midigu bana ḡani.

16 Korana tu akiramini, ginitaḡo mamoea asi ma baḡaniani, beiaḡoni mo, ginitaḡo anina korikorina bea foforini Barau ḡena Basileia nuḡanai.”

17 Benamo Iesu na kapusi ta eḡabiato, evaḡa-namoato, ekirato, “Maḡa tu ḡoḡabia, mabarami boḡono niua.

18 Korana tu akiramini, vine nanuna asi ma banu-ḡenoḡoiani, beiaḡoni mo, Barau ḡena Basileia beiaḡomani vau.”

19 Benamo Iesu na beredi eḡabiato, evaḡa-namoato, ebuki-ḡutuato, evinirito, ekirato, “Mai tu au tauḡanigu, ḡomi avinimini; maḡa boḡono veia, au vetuḡamaḡi-iaḡigu ḡana.”

20 Ḣeḡani-ḡosito vau, kapusi ma eḡabiato, ekirato, “Mai kapusi tu Ginitaḡo Variguna, au raragu na bevaḡa-moḡoniani, bevebubuni ḡomi vaḡa-maḡurimi ḡana.

21 Senaḡi au berevaguni tarimana tu mainai au ḡesi taḡani-vegogoni!

22 Moḡoni, Tarimarima Natuna bemaseni, Barau na ekiraḡi-guineato ilailanai, senaḡi berevaiiani tarimana vetuḡana kekei!”

23 Benamo tauḡeri ḡevedanaḡi-vedanaḡito, ḡia deikara na moḡesi beveiani.

Deikara tu barego vedaurea

Mataio 20:25-28; Mareko 10:42-45

24 Benamo Iesu ḡena mero tauḡeri ḡeveḡare-veḡareto, deikara ḡia fakari ai barego lelevaḡi.

25 Iesu na evaḡa-guruḡarito, ekirato, “Irau bese tarimari ḡeri vere na tarimarima ḡedori-naḡinaḡirini, ema veguine-iaḡi tarimari baregori na ḡeri maoro seḡukari na ḡelaunaḡi-naḡirini, ema tarimarima na beḡene vevato-iaḡiri ḡetoni.

26 Senaḡi ḡomi tu dia moḡesina. Ḣomi fakami ai tau guinena tu tau muriseinai bene iaḡo, ema vere tauna tu vetuḡunaḡi taunai bene iaḡo.

27 Dei tu barego, ḡaniḡani gabunai etanu-taḡoni tarimana ba vetuḡunaḡi tarimana? Ḣaniḡani gabunai etanu-taḡoni tarimana, ene? Senaḡi au tu ḡomi fakami ai vetuḡunaḡi tarimana noḡa.

28 Ḣomi tu au ḡeribaḡaniguto-ḡoi nai, ḡotanu-gwaḡiḡito-ḡoi tarimami.

29 Moḡa lorinai au Tamaḡu na maoro eviniguto, Basileia ta au ḡegu ekiraḡiato ilailanai, au maki Basileia ta ḡomi ḡemi akiraḡiani.

30 Benamo ḡomi maki au ḡegu Basileiai bita ḡaniḡani-vegogoni e bita niuniu-vegogoni, ema ḡomi teronai o vere seari ai boḡo tanuni, Isaraela beseri gabanana ruarua (12) boḡo vaḡa-maoro vinirini.”

Iesu na Petero ḡena vekira-ḡuniḡau ekiraḡi-toreato

Mataio 26:31-35; Mareko 14:27-31; Ioane 13:36-38

31 “Simona, Simona o, noseḡaḡi! Au na akiramini, Barau na Satani maoro eviniato, ḡomi bene ribaḡanimi, namo e rakava bene tore-kirari ḡana, noḡa iaraḡa tarimana na widi ema momo etore-kirarini kavana.

32 Senaḡi au na ḡemu varau aḡuriguḡurito, ḡemu vegaḡidadaḡa asi bene keto ḡana. Benamo ma bovetuḡamaḡi-ḡenoḡoiani au ḡegu ai nai, tarikakamu bono vaḡa-kokoreri.”

33 Petero evaḡa-veseto, ekirato, “Vereḡauka, au tu ḡoi ḡesi dibura numai beḡe torerani ema bita mase-vegogoni!”

34 Iesu ekirato, “Petero, au na akiramuni, toma kokoroku asi begoḡini, beiaḡoni mo, ḡoi na au vaḡa-toittoi bokira-ḡuniḡauguni, bokirani, ‘Au tu asi ribaḡu ḡia,’ botoni.”

Nega rakavana

35 Iesu na ḡena mero evaḡa-guruḡarito, ekirato, “Au na ḡomi atuḡumito nai, asi ḡemi fusefuse, dura, o tamaka. Gomi dagara tai ḡorabuto ba? ḡia ḡevaḡa-veseto, ḡekirato, “Asiḡina!”

36 Iesu na ma evaḡa-guruḡarito, ekirato, “Senaḡi toma ḡomi deikara ma ḡena fusefuse ema dura, bene ḡabiri; ema deikara asi ḡena vetari baḡana, ḡena koudi bene voivoi-iaḡia, benamo ta ma bene voia.

37 Korana au na akiramini, Buka Veḡa nuḡanai ekirani, ‘Seḡafore tarimari ḡesi beḡe iavi-vegogoani.’ Mo guruḡa au ḡegu ai bemoḡonini.”

38 Iesu ḡena mero ḡevaḡa-veseto, ḡekirato, “Noḡitaia, Vereḡauka, vetari baḡari ruarua maiḡeri.” Iesu evaḡa-veseto, ekirato, “Benamo!”

Iesu eḡuriḡurito Getesemane ai

Mataio 26:36-46; Mareko 14:32-42

39 Benamo Iesu tu vanuḡa barana eraga-kwaneato, Olive ḡorona ḡana eiaḡoto eveito-ḡoi kavana. ḡena mero ḡia murinai ḡerakato.

40 Monai ḡeraḡasito, benamo Iesu na evaḡa-guruḡarito, ekirato, “Boḡono ḡauḡau, be veribaḡani ai asi boḡono moira.”

41 Benamo ḡereḡana eraka-ḡerevaḡito, fore tafiurini ḡea keto-tarini ḡena manaḡa ilailanai, benamo evetui-tarito, eḡuriḡurito.

42 Ekirato, “Tamagu o, bema nuḡamu ilaila nai, mai midigu bedina au ḡeguna noma ḡabi-vaḡia; senaḡi dia au ḡegu ura, ḡoi ḡemu ura moḡo.”

[43 Benamo aneru ta guba na emariḡoto, Iesu kokore eviniato.

44 Midigu barana na ḡia nuḡana evaḡa-vonuato, benamo eḡauḡauto ma nuḡana mabarana ḡesi, eiaḡoto mo, seḡurina tano ai eriḡoto rara kabudona noḡa.]

45 Eḡauḡau-ḡosito vau, evariḡisito, ḡena mero ḡeri ai eḡenoḡoi-iaḡoto, genari ai eḡoitaḡorito, dabarari ḡedokoto nai.

46 Benamo ḡia na evaḡa-guruḡarito, ekirato, “Karase nai ḡomi ḡogenani? ḡovarigisi, ḡoḡuriguri, be veribaḡani ai asi boḡono moira.”

Iesu tuari tarimari na ḡeḡabi-tariato

Mataio 26:47-56; Mareko 14:43-50; Ioane 18:3-11

47 Iesu roḡo mo eguruḡato-ḡoi nuḡanai, tarimarima ḡutuma ḡeraḡasito, Iudas, mero ta gabanana ruarua (12) fakari ai, ḡia na eḡori-kaurito. Iesu eiaḡo-viniato bene veraua ḡana.

48 Senaḡi Iesu na ekiraiato, ekirato, “Iudas o, Tarimarima Natuna verau na borevaiani ba?”

49 Iesu sevinai ḡeruḡa-taḡoto merori na ḡeḡitaiato kara beḡorani, benamo ḡedanaḡiato, ḡekirato, “Vetari baḡana na baḡana basiri ba?”

50 Benamo ḡia ta na Rubu Veḡa verena bareḡona ḡena vetuḡunaḡi tarimana vetari baḡana na eiaḡo-viniato, benamo seḡana aroribana ebasi-vaḡiato.

⁵¹ Senaḡi Iesu ekirato, “Benamo, ḡovaḡa-dokoa!” Mo tarima seḡana eḡabi-karaiato, evaḡa-namoato.

⁵² Benamo Iesu ḡabiḡabina ḡeiaḡomato tarimari, Rubu Veaḡa vereri baregori e Rubu Veaḡa ḡitaḡauna tarimari ḡeri baregona ema Iuda vereri ḡia na evaḡa-guruḡarito, ekirato, “Ḡomi boḡo iaḡoma ma ḡemi vetari baḡari e ma ḡemi fato ḡesi, noḡa moḡo seḡafore tarimana ta ḡabiḡabina ḡoro iaḡoma kavana?”

⁵³ Ḡaro mabarari ai au tu ḡomi sevimi ai Rubu Veaḡa nuḡanai, senaḡi asi ḡoḡabi-tariḡuto. Mai tu ḡomi ḡemi nega, mukuna (o Satani) ḡena seḡuka negana.”

Petero na Iesu ekira-ḡuniḡauato

Mataio 26:57-58; 26:69-75; Mareko 14:53-54; 14:66-72; Ioane 18:12-18; 18:25-27

⁵⁴ Benamo ḡia na Iesu ḡeḡabi-tariato, Rubu Veaḡa verena baregona ḡena numa ḡana ḡeḡori-iaḡoato. Petero maki ḡia murinai erakato, senaḡi ma fakana.

⁵⁵ Numa maḡuna nuḡanai tarima kota na karava ḡevaḡa-ḡaraiato, benamo ḡetanu-ḡeḡeraḡiato. Petero maki ḡia seviri ai etanu-tarifo.

⁵⁶ Benamo vetuḡunaḡi ḡuiatona ta na karava mamananai eḡitaiato, eḡita-karakaraiato, ekirarito, ekirato, “Mai tarima maki Iesu ekavaiato-ḡoi!”

⁵⁷ Senaḡi ḡia evekira-ḡuniḡauto, ekirato, “Ḡoi vavine, au tu asi ribagu ḡia!”

⁵⁸ Nega kotuna evanaḡito nuḡanai, tarima ta na Petero eḡitaiato, ekiraiato, “Ḡoi maki ḡia karori ta!” Senaḡi Petero evaḡa-veseto, ekirato, “Ḡoi tau, au tu asiḡi!”

⁵⁹ Aoa ta evanaḡito vau, tarima ta ma eguruḡato ma nuḡana mabarana ḡesi, ekirato, “Moḡoni, ḡia maki Iesu ḡesi tarimana ta, korana ḡia maki Galilea tauna!”

⁶⁰ Senaḡi Petero evaḡa-veseto, ekirato, “Ḡoi tau, au asi ribagu ḡoi kara okiraḡiani!” Ḡia roḡo mo eguruḡato-ḡoi nuḡanai, kokoroku egoḡito.

⁶¹ Benamo Vereḡauka eruḡa-kureto, ḡia na Petero eḡitaiato nai, Vereḡauka ḡena guruḡa etuḡamaḡi-doḡariato, ekiraiato, “Toma kokoroku asi begoḡini, beiaḡoni mo, ḡoi na au vaḡa-toitoi bokira-ḡuniḡauguni.”

⁶² Benamo Petero eraka-rosito, etaḡi-rakava rakavato.

Iesu ḡevaseva-vaseva iaḡiato

Mataio 26:67-68; Mareko 14:65

⁶³ Iesu ḡenariḡauato tarimari na ḡevaseva vaseva-iaḡiato e ḡekwariato.

⁶⁴ Matana ḡekumu-ḡauato, ḡekiraiato, ḡekirato, “Ḡoi tu peroveta tarimana, be nokiraḡia, dei na bekwarimu?”

⁶⁵ Guruḡa rakavari ḡutuma ḡia ḡeviniato.

Iesu kanisoro tarimari ḡoirari ai

Mataio 26:59-66; Mareko 14:55-64; Ioane 18:19-24

⁶⁶ Elaḡanito, Iuda vereri, e Rubu Veaḡa vereri baregori, ema taravatu ḡevevaḡa-riba iaḡiato-ḡoi tarimari ḡeraka-vegogoto. Iesu ḡeḡori-iaḡoato Iuda kanisoro tarimari ḡoirari ai.

⁶⁷ Benamo ḡekiraiato, ḡekirato, “Nokira-varama, ḡoi tu Keriso, (Barau na ekiraḡi-toreato vevaḡa-maḡuri tauna), ba?” Iesu na evaḡa-veserito, ekirato, “Bema au na bakiramini, ḡomi na asi boḡo vaḡa-moḡoniguni,

⁶⁸ ema bema vedanaḡi ta bavinimini, asi boḡo vaḡa-veseguni.

69 Senaġi toma beiaġoni mo ġoira laġaniri ai, Tarimarima Natuna tu Seġuka Barauna ġimana aroribanai betanu-taġoni.”

70 Benamo mabarari ġekirato, “Be, ġoi tu Barau Natuna otoni?” Ġia evaġa-veseto, ekirato, “Gomi na ġokiraġiani maniġa.”

71 Ġia ġekirato, “Karase vevaġa-moġoni tarimari tari roġo tavetaurini? Ġia tauġena muruna na bekiraġia bita seġaġia.”

23

Iesu Pilato ġoiranai

Mareko 15:1-5; Ioane 18:28-38

1 Benamo veggo tarimari mabarari ġevariġisito, Iesu ġeġori-iaġoato gavana Pilato ġenai.

2 Monai ġeġofaġofa-iaġiato, ġekirato, “Mai tarima maiġa baġa doġaria, ġai ġema bese tarimari eġorikau-kerererini, ekirani, Kaisara, Roma ġeri vere, ġena takesi moniri asi beġene vinia etoni, ema tauġena evekiraġini, ġia tu Keriso, Barau na ekiraġi-toreato verena o kinina.”

3 Benamo Pilato na edanaġiato, ekirato, “Ġoi tu Iuda tarimari ġeri vere ba?” Iesu evaġa-veseto, ekirato, “Oi, okiraġiani maniġa.”

4 Benamo Pilato na Rubu Veaġa vereri baregori e tarimarima ġutuma ekirarito, ekirato, “Kerere ta asi badoġaria mai tarima ġenai.”

5 Senaġi mo tarimarima roġo ġeġiġiraġeto, ġekirato, “Ġia ġena vevaġa-riba guruġari na Iudea tarimari mabarari nuġari evei-veġonurini. Galileai esinaiato mo beiaġoma mai gabu ai.”

Iesu Heroda ġoiranai

6 Mo guruġa eseġaġiato nai, Pilato evedanaġito, ekirato, “Mai tarima tu Galilea tarimana ba?”

7 Benamo Pilato eribato, Iesu tu Heroda ġena seġuka gaburenai nai, Iesu Heroda ġenai ġetuġu-iaġoato. Ġia maki Ierusalemaj mo ġaro ai.

8 Heroda eiaku-rakavato Iesu eġitaiato nai, korana Heroda na Iesu varina eseġaġiato, ema kai-veġata evaġa-nogato Iesu bene ġitaia ġana. Ġia eurato Iesu na nuġa-farevaġi veġari kota bene veiri bene ġitari.

9 Moġa lorinai vedanaġi ġutuma Iesu edanaġiato, senaġi ġia asi evaġa-veseto.

10 Rubu Veaġa vereri baregori ema taravatu ġevevaġa-riba iaġiato-ġoi tarimari monai ġeruġa-taġoto-ġoi, Iesu ġeġofaġofa-iaġi lelevaġiato-ġoi.

11 Heroda ema ġena vetari tarimari o soldia na Iesu ġerikiriki-iaġiato-ġoi, ġevei-veġare veġareato, ema dabuġa namona ta ġevaġa-dabuġa-iaġiato, benamo ma ġetuġu-ġenoġoiato Pilato ġenai.

12 Pilato ema Heroda ġevebaru-vevinito-ġoi, senaġi mo ġaro ai ġeveġata-ġenoġoito.

Iesu vaġa-ruaruana Pilato ġoiranai

Mataio 27:15-26; Mareko 15:6-15; Ioane 18:38-19:16

13 Pilato na Rubu Veaġa vereri baregori, e Iuda vereri, ema tarimarima mabarari ekea-vegogorito,

14 ekirarito, ekirato, “Gomi na mai tarima boġo ġori-iaġomaia au ġegu ai, ġokirani, ġia na tarimarima eġorikau-kerererini ġotoni. Toma au na ġomi ġoirami ai ġemi guruġa bavetauri, senaġi kerere ta asi badoġaria.”

15 Heroda maki kerere ta asi edogāriato ġia ġenai nai, ma betuġu-ġenoġoi iaġomaia ġita ġerai. Gomi na ġoġitaiani, ġia tu rakava ta asi eveiato bene mase ġana.

16 Moġa lorinai au na mai akwariani vau baruġaiani.” [

17 Vanaġivanaġi eveini kavana Pilato na Pasova verekona ġaronai dibura numai etanuni tarimana ta beruġaiani.]

18 Senaġi tarimarima mabarari ġekoġo-vegogoto, ġekirato, “Bono vaġia! Barabas noruġaia, novinima!”

19 Barabas tu dibura numai ġekou-ġauato, korana vanuġa barana nuġanai ġevevaġito ema tarima ta ġevaġi-maseato nai.

20 Pilato enuġa-vekwarāġito Iesu bene ruġaia, moġa lorinai tarimarima ma evaġa-guruġa ġenoġoirito,

21 senaġi ġia ma ġekoġo-ġenoġoi ġenoġoito-ġoi, ġekirato, “Novaġa-satauroa, novaġa-satauroa!”

22 Nega vaġa-toitoina evaġa-guruġarito, ekirato, “Karase nai, kamara rakava mai tarima na eveiato? Au na rakava ta asi aġoitaġoani eveiato bene mase ġana. Moġa lorinai au na mai akwariani vau baruġaiani.”

23 Senaġi ġia ġekoġoto ma nuġari mabarari ġesi, ġekirato, novaġa-satauroa; benamo dokonai ġia ġeri ura ekwalimuto.

24 Benamo Pilato na ġia ġeri ura eġabi-raġeato.

25 Mo vevaġi ema vaġivaġi dainai dibura numanai etanuto tarimana, eruġa-fitogaġato ġeri noġinoġi ilailanai, a Iesu tu evinirito ġeri ura veigana beġene veia.

Iesu ġevaġa-satauroato

Mataio 27:32-44; Mareko 15:21-32; Ioane 19:17-27

26 Vetari tarimari na Iesu ġeġori-rosiato, benamo ġeġori-iaġoato-ġoi nai, tarima ta ġesi ġevedoġarito, Simona, Kurene tarimana, ġia tu gunika na ema raka-rosito vanuġa barana ġana eiaġoto-ġoi nai, tuari tarimari na ġeġabi-tariato, satauro ġia faġanai ġetore-kauato. Ġia na satauro efaġaġato, benamo Iesu murina na eiaġoto-ġoi.

27 Tarimarima ġutuma tu Iesu murinai ġerakato. Ġia vefakari ai tari tu vavine, ġia tu Iesu taġina ġeveito-ġoi ema ġetaġi-guruġa guruġato-ġoi.

28 Benamo Iesu eruġa-kureto, evaġa-guruġarito, ekirato, “Ierusalem vavinemi! Au taġigu asi ġotaġi, senaġi tauġemi taġimi ema natumi taġiri govei.

29 Korana ġaro rakavari beġe iaġomani, tarimarima maiġesi beġe kirani, ‘Sinaġe gabani vavineri ema ratari asi ġerururini vavineri beġene iaku!’

30 Benamo ġoro baregari beġe vaġa-guruġarini, beġe kirani, ‘Ġai iatamai ġoketokau!’ ema ġoro keiri beġe kirarini, ‘Ġai ġolautarima!’

31 Bema au, ġau maġurigu, na maiġesi beġe veiguni nai tu, ġomi, ġau matuġumi, kamasi beġe veimini?”

32 Seġafore tarimari ruarua maki Iesu ġesi ġeġori-rosirito ġia ġesi beġene vaġa-sataurori ġana.

33 Gabu ta arana “Deba Ġavana” ai ġeraġasito. Monai seġafore tarimari ġesi ġevaġa-satauroato, ta aroribana rekenai, ma ta kaurina rekenai.

34 Iesu ekirato, “Tamagu o, ġeri rakava bono tuġamaġi-fitogaġari, korana kara ġeveiani ġia asi ribari.” Benamo laki ġerena ta ġeveiato vau, ġena dabuġa ġevarerito.

35 Tarimarima ġeruġa-tarito, ġe-marereto-ġoi, ema Iuda tarima baregori na ġerikiriki-iaġiato-ġoi, ġekirato, “Ġia na tarima tari evaġa-maġuririto, a ġia tauġena tu asi bevevaġa-maġurini bema ġia Keriso, Barau na eġabi-viriġiato vevaġa-maġuri tauna.”

36 Vetari tarimari na maki ġevaseva-vaseva-iaġiato, ġia ġenai ġeiaġoto, vine nanuna mamakina ġeduġi-viniato,

37 benamo ġekirato, “Bema ġoi Iuda tarimari ġeri vere otoni, ġoi tauġemu novevaġa-maġuri.”

38 Toretore ta maki ġia iatanai ġetoreato, ekirato: “MAI TU IUDA TARIMARI ĠERI VERE.”

39 Seġafore tarimana ta, ġia ġesi ġevaġa-satauro vegogoato tarimana, na evaneato, ekirato, “Ġoi tu dia Keriso, (Barau na ekiraġi-toreato vevaġa-maġuri tauna)? Ġoi tauġemu novevaġa-maġuri, ġai maki novaġa-maġurima!”

40 Ġia karona na ekira-ġoiato, ekirato, “Ġoi Barau garina asi ogarini? Ġoi maki bomaseni ġia ilailanai.

41 Dagara sebona, ġita taura ruarua tamaseni ġera rakava voiri dainai, senaġi mai tarima tu asi ġena vei-rakava.”

42 Benamo ġia na Iesu enoġiato, ekirato, “Iesu, ġemu Basileia boġabiani nai, au maki bono tuġamaġigu.”

43 Iesu na evaġa-veaseato, ekirato, “Moġoni akiramuni, toma ġaro ai ġoi tu au ġesi paradaiso ai.”

Iesu ġena mase

Mataio 27:45-56; Mareko 15:33-41; Ioane 19:28-30

44 Ġaroġota, horaġauna 12 koloko varau eġabiato, ġaro ġena seġuka ekirato, tanobara mabarana mukuna na eġabi-ġauato, eiaġoto mo, horaġauna 3 koloko.

45 Benamo Rubu Veaġa nuġanai veaġa lelevaġi daiġutuna kouġauna dabuġana o ketin evedare-kikimato.

46 Iesu ekogoto, ekirato, “Tamagu o, iaukagu tu ġoi ġimamu ai atoreani!” Egruġa-ġosito vau emaseto.

47 Vetari verena na mo veiġa eġitaiato, benamo Barau evaġa-raġeato, ekirato, “Moġoni veġata, mai tarima tu vei-iobukaiobuka tarimana!”

48 Marere tarimari ġutumma na mo veiġa eġorato dagarana ġeġitaiato, benamo kobari ġeifarito, ġevetuġamaġi-rakavato, ġeri numa ġana ġeġenoġoito.

49 Senaġi Iesu ġeribaiao tarimari mabarari, Galilea na ġia murina na ġeiaġomato vavineri maki, manaġai ġeruġato, ġeġorato dagarari ġeġitarito.

Iesu ġeguriato

Mataio 27:57-61; Mareko 15:42-47; Ioane 19:38-42

50-51 Tarima ta arana Iosefa etanuto-ġoi Iudea vanuġana Arimatea nuġanai. Ġia tu varina namo tarimana ta, Barau ġena Basileia evaġa-nogaiato-ġoi. Ġia maki Iuda kanisoro tarimana, senaġi ġevetara-toreto veiġana asi eġabi-raġeato.

52 Benamo Pilato ġenai eiaġoto, Iesu tauġanina bene ġabi-riġoa etato.

53 Moġa murinai Iesu tauġanina eġabi-riġoato, dabuġa kurokuro na mona na ekumuato, gara gabuna fore ġebasiato kouġanai etore-toġaiato. Mo gara tu variguna, nuġanai mase ta roġosi beġere torea.

54 Mo veiġa tu Fraidei lavilavi ai eġorato, Sabadi ġana ġevei-toreato-ġoi ġarona, Sabadi dori eraġasito nai.

⁵⁵ Galilea na Iesu ġesi ġeiaġomato vavineri, Iosefa murina na ġeiaġoto, gara kouġana ema Iesu tauġanina aiġesi etore-toġaiato ġeġitaiato.

⁵⁶ Benamo ġeġenoġoito Ierusalemna sitina ġana, muramura ma bonari ema daudau muramurari ġeġabi-torerito.

Sabadi ai ġeiaġaraġito taravatu ekirani lorinai.

24

Iesu evariġisi-ġenoġoito

Ioane 20:1-10

¹ Fura ġarona ġinġuinenai o Sandei ai, vavine tu boġiboġi iamoiamonai gara ġana ġeiaġoto, muramura bonari namori ġerovina-torerito dagarari ġeġwa-iaġorito.

² Gara kouġana forena tu kure-veġita, irau ai vetore ġeġitaiato.

³ Gara kouġana na ġeraka-toġato, senaġi Iesu Vereġauka tauġanina tu asi ġedoġariato.

⁴ Ġia roġo mo ġedaradarato-ġoi nuġanai, tau ruarua ġia seviri ai ġeruġa-tarito, ġeri dabuġa tu kuro-ġaroġarori.

⁵ Vavine tu ġegari-rakavato, tano ai ġetutuġu-tarito, benamo mo tarima na ġevaġa-guruġarito, ġekirato, “Karase nai maġuri tarimana mase gabunai ġovetaunai?”

⁶ Ġia tu dia mainai; mase na ma bevariġisi-ġenoġoi. Galileai etanuto-ġoi nai, evaġa-guruġamito guruġana boġono tuġamaġia,

⁷ ekirato, ‘Tarimarima Natuna tu rakava tarimari ġeri ai beġe revaiani, beġe vaġa-satauroani, ġaro vaġa-toitoinai vau ma bevariġisi-ġenoġoini.’ ”

⁸ Benamo vavine na mo guruġa ġetuġamaġi-doġariato.

⁹ Gara ġeraga-kwaneato, ġeġenoġoito, mo dagara eġorato dagarana varina mabarana Iesu ġena mero gabanana sebona (11) ma karori ġesi ġekira-vararito.

¹⁰ Vavineri tu maiġeri: Maria, Magadala vavinena, e Ioana, e Maria, Iakobo (o Iames) sinana, ema karori tari maki. Ġia na mai vari Iesu ġena apostolo tarimari ġeri ġekiraġito.

¹¹ Senaġi vavine ġeri guruġa asi ġevaġa-moġonirito, korana apostolo ġetuġamaġito, ġia noġa ġeguruġa-babobaboto-ġoi.

¹² Senaġi Petero tu evariġisito, eraga-iaġoto, gara kouġanai ea boġe-toġato, senaġi Iesu ġekumuato dabuġari moġo eġitarito. Benamo numa ġana eġenoġoi-iaġoto nuġanai, ġeġorato dagarari etuġamaġirito nai, eġabarakavato.

Iesu Emausa dabaranai eforito

Mareko 16:12-13

¹³ Mo ġaro sebonai Iesu ġena mero ruarua tu Emausa vanuġana ġana ġeiaġoto; mo gabu ġena manaġa Ierusalemna na tu 11 kilomita kavana.

¹⁴ Ġerakato-ġoi nuġanai, ġeġorato dagarari ġeguruġa-guruġa iaġirito-ġoi.

¹⁵ Ġeri raka guruġa-guruġai Iesu maki eraka-kavi-iaġoto, ġia ġesi ġeraka-iaġoto-ġoi.

¹⁶ Senaġi tauri ruarua asi ġeribato ġia tu dei.

¹⁷ Iesu na edanaġirito, ekirato, “Ġomi tu kara mai dabarai ġoraka-guruġa guruġa-iaġiani?” Benamo tauri ruarua ġeruġa-tarito, ġeboġe-vetuġato.

18 Benamo ġia ta, arana Kleopa, na evaġa-veſeato, ekirato, “Ierusalem a ġana ġeiaiġomato tarimari fakari ai betaġu ġoi moġo ġereġamu mainai beġe ġora dagarari asi ribamu?”

19 Iesu evedanaġito, ekirato, “Kamara dagara?” Ġia ġevaġa-veſeto, ġekirato, “Iesu, Nasareta tarimana, ġenai ġeġorato dagarari. Ġia tu peroveta tarimana, Barau ġoirani e tarimarima mabarari ġoirari ai ġena veiġa ema ġena guruġa maki ma ſeġkari.

20 Ġita ġera Rubu Veaġa vereri baregori ema ġera veġorikau tarimari na ġerevaiato bene mase ġana, ġevaġa-satauroato.

21 Senaġi ġai ġatuġamaġito, ġia na Isaraela tarimari bevaġa-maġuririni. Mai dagara eġorato belaġoma toma tu varau ġaro toitoi beġe iaġo.

22 Moġa iatanai, ġema vavine tari na ġai nuġama beġe vaġa-farevaġiri. Ġia tu bogibogi iamoiamonai gara ġana beġe iaġo.

23 Senaġi tauġanina asi beġe doġaria. Benamo beġe ġenoġoi-iaġoma, beġe kira tu, aneru beġe ġitari, mo aneru na beġe kirari, ‘Ġia tu varau bemaġuri-ġenoġoi,’ beġesi.

24 Ġai karoma tari maki gara ġana beġe iaġo, vavine na beġe kiraġia kavana beġe doġaria, senaġi Iesu asi beġe ġitaia.”

25 Benamo Iesu na ekirarito, ekirato, “Ġomi tu babo, peroveta tarimari ġeri guruġa vaġa-moġoniri ai maki kwaibo rakava!

26 Keriso tu moġesi bene midigu-midigu murinai vau, mareva namonai bene raka-toġa, ene?”

27 Benamo ġia varina Mose e peroveta tarimari ġeri bukai ema Buka Veaġa mabarana maki ġetorerito guruġari aniri evaġa-ribarito.

28 Ġeiaġo-viniato-ġoi vanuġana Emausa ġekavinaġiato, benamo ġia tu bene raka-vanaġi etato.

29 Senaġi ġekira-ġoiato, ġekirato, “Ġai ġesi notanu, korana belavilavi ema ġaro maki mai emukunani bene.” Benamo ġia ġesi ġeraka-toġato, ġetanuto.

30 Ġaniġani gabunai ġetanu-taġoto-ġoi nai, Iesu na beredi eġabiato, evaġa-namoato, edudu-ġutuato, tauri ruarua evinirito.

31 Benamo matari ġevekeoto, ġeribato mo tu ġia. Senaġi ġia tu ġoirari ai erekwa-rekwato.

32 Benamo tauri ruarua ġeveguruġa-vevinito, ġekirato, “Dabarai evaġa-guruġarani-ġoi nai, ema Buka Veaġai ġetorerito guruġari aniri ġera ekiraġi-maġatarini-ġoi nai, ġita nuġara tu ġeseġuseġuni-ġoi, noġa moġo karava na ġeġararini-ġoi, ene?”

33 Benamo maoromaoro ġevarigisito, Ierusalem a ġana ma ġeġenoġoi-iaġoto, Iesu ġena mero gabanana sebona (11) ma karori ġesi vegogo-taġori ai ġedoġaririto.

34 Ġia na tauri ruarua ġevaġa-guruġarito, ġekirato, “Moġoni veġata, Vereġauka tu bevarigisi-ġenoġoi ema Simona ġenai maki eforrito.”

35 Benamo tauri ruarua na dabarai eġorato dagarana ema kamasi Iesu na beredi edudu-ġutuato vauro, Iesu ġia na ġeġita-leaiato ġeri ġekiraġito.

Iesu tu ġena mero ġeri ai eforrito

Mataio 28:16-20; Mareko 16:14-18; Ioane 20:19-23

36 Mo tarima ruarua roġo ġeguruġato-ġoi nuġanai, Vereġauka ġia fakari ai eruġa-rosito, benamo ekirarito, ekirato, “Maino ġemi ai bene tanu.”

37 Ġia tu nuġari maki ġefarevaġi-rakavato ema ġegarito, ġia mataboru ġekirato, murava ta ġeġitaio.

³⁸ Senaḡi ḡia ekirato, “Karase nai nuḡami beḡe vekwaraḡi-rakava? Kara dainai ḡodaradarani?”

³⁹ Ġimagu ema kwakugu ḡoma ḡitari, benamo boḡono riba mai tu au. Ġoma ḡabi-karagu, benamo boḡono riba, korana murava tu asi viriḡona ema asi turiḡana, ḡoḡitaḡuni au tu ma viriḡogu e ma turiḡagu.”

⁴⁰ Moḡesi ekirato, benamo ḡimana ema kwakuna evaḡa-ḡitarito.

⁴¹ Senaḡi ḡia tu roḡo ḡedaradarato-ḡoi ḡeri iaku ema ḡeri nuḡa-farevaḡi dainai; benamo Iesu na edanaḡirito, ekirato, “Ġanigani tari manigeri ba?”

⁴² Ġia na maḡani-kone gabugabuna ta ḡeviniato.

⁴³ Benamo Iesu na eḡabiato, ḡoirari ai eḡaniato.

⁴⁴ Benamo evaḡa-guruḡarito, ekirato, “Au tu roḡo ḡomi ḡesi tatanu-vegogoto-ḡoi nai, akiramito-ḡoi: Mose ḡena taravatu e peroveta tarimari ḡeri guruḡa ema Salamo ai au varigu ḡetorerito guruḡari mabarari beḡe moḡonini.”

⁴⁵ Benamo Iesu na nuḡari ekeorito, Buka Veaḡa guruḡari aniri beḡene tuḡamaḡi-fakari ḡana.

⁴⁶ Ma ekirarito, ekirato, “Maiḡesi ḡetoreato: Keriso tu moḡesi roḡo bemidigu-midiguni, ema ḡaro vaḡa-toitoinai mase na ma bevariḡisi-ḡenoḡoini.

⁴⁷ Ema ḡia aranai vetuḡamaḡi-kure ema rakava tuḡamaḡi-fitoḡari beḡene ḡobata-iaḡi-rovorovori tanobara mabarari ai, Ieruselema na bene vetamata.

⁴⁸ Mai dagara vaḡa-moḡoniri tarimami tu ḡomi.

⁴⁹ Au tauḡegu na tu Tamagu na ekiraḡi-toreato Iaukana batuḡuani, iatami ai befororini. Ġomi tu Ieruselemai boḡono tanu, bene iaḡo mo, guba na bemariḡoni seḡukana boḡo ḡabiani.”

Iesu Barau na eḡabi-varaḡeato guba ḡana

Mareko 16:19-20; Apostolo 1:9-12

⁵⁰ Moḡa murinai Iesu na Ieruselema na eḡori-rosirito, ḡeiaḡoto mo, Betania ḡana, benamo ḡimana eḡabi-vaisirito, evaḡa-namorito.

⁵¹ Evaḡa-namorito-ḡoi nuḡanai, Iesu tu ḡia ḡerina eveḡitato, Barau na eḡabi-varaḡeato guba ḡana.

⁵² Ġia na ḡetoma-rakariḡo viniato murinai, ma iakuri e ma verereri ḡesi Ieruselema ḡana ma ḡeḡenoḡoi-iaḡoto.

⁵³ Benamo Rubu Veaḡai ḡetanuto-ḡoi, Barau ḡevaḡa-raḡeato-ḡoi.

VARI NAMONA IOANE NA ETOREATO

Ioane vaġa-foforina guruġari

Ioane tu Iesu ġena apostolo tarimari gabanana ruarua (12) nuġari ai tarimana ta. Ġia tamana tu Sebedaio, ma ġia tu kone ai maina tarimari.

Ioane ġena mai Vari Namona tu laġani 85 beiaġo 95 fakari ai ta etoreato, mo tu Iesu emaseto murinai. Ġia na mai Vari Namona tu tanobara tarimari mabarari, ġemaġuri-ġenoġoito ema asi ġemaġuri-ġenoġoito, ġeri etoreato.

Ġia ġena ura baregona tanobara tarimari mabarari bene vaġa-ribari, Iesu Nasareta tarimana tu moġoni Barau Natuna, e Iesu tu moġoni Barau na tanobara ġana etuġu-marigoato, tanobara tarimari ġia ġenana maġuri beġene ġabia uranai, ema Barau vetoġana korikorina tu ġia ġenana ema vevaġa-foforiato tarimarima ġeri ai. Siri baregona Ioane ġena Vari Namona bukana nuġanai tu karoa 20:31, “Maġeri guruġa atorero, korana tu ġomi na Iesu boġono vaġa-moġonia, ġia tu moġoni Keriso, Barau Natuna. Ma bema ġomi na ġia boġo vaġa-moġoniani nai tu, ġia aranai maġuri vanaġivanai boġo ġabiani.”

Ioane ġena toretore tu maġesina eboioġaiato:

1. Barau Natuna - karoa 1:1-18

2. Barau ġena vetuġunaġi Iuda tarimari fakari ai ema iaġo-vinito - karoa 1:19-12:50

3. Barau ġena vetuġunaġi Iesu tauġena ġena mero fakari ai ema iaġo-vinito - karoa 13-17

4. Barau vetuġunaġina ema iaġo-vinito tanobara vaġa-maġurina ġana - karoa 18-21

Maġuri guruġana

¹ Tovotovonai veġata Guruġa etanuto-ġoi. Mo Guruġa tu Barau ġesi ġetanuto-ġoi, ema mo Guruġa tu Barau.

² Ġia tu tovotovona na veġata Barau ġesi ġetanuto-ġoi.

³ Dagara mabarari tu Barau na ġia ġenana eveirito. Ma Barau na dagara sebona kwariġutu ta maki dabara borunai ta maki asi eveiato, asiġina ġinavaġi.

⁴ Maġuri tu ġia nuġanai etanuni; mo maġuri tu tarimarima ġeri mama.

⁵ Mama tu mukuna nuġanai emamani, senaġi mukuna na asi etuġamaġi-fakaiato e asi eġita-leaiato.

⁶ Barau na tarima ta etuġuato, arana tu Ioane.

⁷ Ġia tu guruġa moġonina kiraġi-kiraġina ema mama vaġa-foforina ġana eiaġomato. Be ġia ġenana tarimarima mabarari na vari beġene seġaġia e beġene vaġa-moġonia ġana.

⁸ Ġia tauġena tu dia mo mama, senaġi ġia eiaġomato tu, mama benema kiraġia ġana.

⁹ Mo mama tu mama korikorina, tanobara ġana eiaġomato, tarimarima mabarari mama benema viniri ġana.

¹⁰ Guruġa tu tanobarai etanuto-ġoi, ema mo guruġa ġenana Barau na tanobara eveiato, senaġi tanobara na tu asi eribalato.

¹¹ Ġia tu ġena tanobara ġana eiaġomato, senaġi ġena tarimarima na asi ġeġabi-raġeato.

¹² A tarimarima kotari na ġeġabi-raġeato e ġevaġa-moġoniato nai, ġia na maoro evinirito, Barau natunai beġene iaġo.

13 Ğia Barau natunai ġeiaġoto tu dia tauġanina ġenana. Mo tu dia sina tama rarari na o tauġani ġena urai o sina tama ġeri urai. Asiġi, tarimarima tu Barau tauġena ġereġana na moġo ġia natunai evaġa-iaġorini.

14 Mo Guruġa tu tarimarima tauġaninai eiaġoto, benamo ġai fakamai ema tanuto. Ğia marevana e seġukana baregona ġaġitaiato. Moġa tu Barau na Natuna sebona kwariġutu eviniato marevana e seġukana. Varevare-bara ema guruġa e maġuri moġonina na evonuvonu-raġeto.

15 Ioane na ġia guruġana ekiraġi-foforiato, ekeato, ekirato, “Au na akiraġiato tarimana tu maiġa, akirato, ‘Au murigu na beiaġomani tarimana na au evanaġiguto. Korana tu au maki roġosi roġo bana maġuri nuġanai veġata, ġia tu etanuto-ġoi.’”

16 Ğia tu varevare-bara na evonuvonu-raġeto. Mo ġena varevare-bara lorinai ġita mabarara vevaġa-namo iatai-iatai maki evinirani.

17 Korana Barau na Mose ġenana taravatu evinirato, a varevare-bara ema guruġa e maġuri moġonina tu Iesu Keriso na eġwa-iaġomarito.

18 Tovotovona na veġata beiaġoma maitoma tarima ta na Barau asi eġitaiato. Natuna ġora ġereġa, Tamana sevina etanuni tarimana, ġia na Barau ema vaġa-foforiato.

Ioane Babatiso ġena guruġa-fofori

Mataio 3:1-12; Mareko 1:7-8; Luka 3:15-17

19 Ioane ġena guruġa-fofori tu maiġa. Iuda tarimari na Rubu Veaġa vereri e Levi doġorona tarimari, (mai tu Rubu Veaġai vetuġunaġi tarimari), kotari Ierusalemna na Ioane ġenai ġetuġu-iaġorito, beġene danaġia ġana, beġene kira, “Ğia tu deikara?”

20 Benamo Ioane asi evekira-ġuniġauto, senaġi ġoirari ai eguruġa-foforito, ekirato, “Au tu dia Keriso, (Barau na ekiraġi-toreato vevaġa-maġuri tauna).”

21 Ma ġedanagiato, ġekirato, “Ba ġoi tu deikara? Ğoi tu Elia ba?” Ğia ekirato, “Au tu dia Elia.” Ma ġekirato, “Ğai na peroveta tarimana ġanariani tarimana tu ġoi ba?” Ğia evaġa-veseto, ekirato, “Asiġina!”

22 Benamo ġia na ma ġedanagi-ġenoġoiato, ġekirato, “Ba ġoi tu deikara? Ğemu vevaġa-vese novini-ginikauma, be beġe tuġuma tarimari ġeri ai baġana iaġo, baġana vaġa-ribari. Ğoi tauġemu varimu tu aiġesi?”

23 Benamo Ioane tauġena evevari-fiuto, ekirato, “Au tu garo ta tano fakanai ekea-koġokoġoni, ekirani, ‘Vereġauka ġena dabara boġono iarevatorea.’” Isaia peroveta tarimana na ekiraġi-guineato ilailana.

24 Mo vetuġu ġeiaġo-viniato tarimari tu Farisea tarimari.

25 Benamo Ioane ġedanagiato, ġekirato, “Bema ġoi tu dia Keriso, e dia Elia, e dia mo peroveta tarimana, karase nai ġoi tu ovevaġa-babatisoni?”

26 Ioane evaġa-veseto, ekirato, “Au tu nanu na moġo ababatisoni, senaġina tarima ta tu ġomi fakami ai eruġa-taġoni, ma ġomi tu asi ribami ġia.

27 Ğia tu au murigu na eiaġomani, ema au tu asi ilaila, ġia ġena tamaka varori baruġarini.”

28 Mai dagara mabarari tu Betania, Ioridana ġarukana mo rekenai, ġeġorato, Ioane ebabatisoto-ġoi gabunai.

Barau ġena ġinitaġo mamoen

29 Ma elāganito nuḡanai, Ioane na Iesu eḡitaiato, ḡia ḡenai eiaḡomato-ḡoi, benamo ekirato, “Goboḡe, mani tu Barau ḡena Mamoe Natuna, ḡia na tanobara ḡena rakava beḡabi-vaḡiani.

30 Au na tu ḡia akiraḡiatio, akirato, ‘Au murigu na eiaḡomani tarimana na evanaḡiguto, korana tu au roḡosi roḡo bara maḡuri nuḡanai veḡata, ḡia tu etanuto-ḡoi.’

31 Tovo-tovonai au tu asi ribagu ḡia, senaḡi au aiaḡomato nanu na ababatisoni, korana tu Isaraela tarimari na Iesu beḡene ribaia ḡana.”

32 Benamo Ioane ma eguruḡa-foforito, ekirato, “Iauka aḡitaiato, guba na emariḡoto pune noḡa, ḡia iatanai etanukauto.

33 Tovotovonai au tu asi ribagu ḡia, senaḡi Barau na etuḡuguto, bana iaḡoma tu, tarimarima nanu na bana babatisori ḡana. Ḗia na evaḡa-guruḡaguto, ekirato, ‘Ḗoi na tarima ta boḡitaiani, Iauka bemariḡoni, iatanai betanu-kauni. Mo tau tu tarimarima Iauka Veaga na bebabatisorini.’ ”

34 Ioane ekirato, “Au na aḡitaiato naima akiraḡi-foforiani, ḡia tu Barau Natuna.”

Iesu ḡena mero ḡiniguineri

35 Ma elāganito nai tu, Ioane e ḡena mero ruarua ḡesi monai ma ḡeruḡa-taḡoto-ḡoi.

36 Ḗeruḡa-taḡoto-ḡoi nuḡanai tu, Iesu eraka-vanaḡito, eḡitaiato, benamo ekirato, “Goboḡe, Barauna Mamoe Natuna, (ḡena ginitaḡo mamoen), ḡoḡitaia.”

37 Ma Ioane ḡena mero ruarua na mo guruḡa ḡeseḡaḡiatio, benamo Iesu murina na ḡeiaḡoto.

38 Iesu eruḡa-kureto, ma murinai ḡerakakauto tarimari ruarua eḡitarito, benamo edanaḡirito, ekirato, “Gomi tu kara ḡourani?” Ḗia ḡevaḡa-veseto, ḡekirato, “Rabi, ḡoi tu ainai otanuni?” Rabi anina tu vevaḡa-riba tarimana.

39 Ḗia evaḡa-veseto, ekirato, “Ḗoiaḡoma, ḡoma ḡitaia.” Benamo ḡia ḡesi ḡeiaḡoto, ma ḡena tanu gabuna ḡea ḡitaiato, mo ḡaro vinubana tu ḡia ḡesi ḡebukato. Mo tu horaḡauna 4 koloko livilavi rekenai.

40 Ioane ḡena guruḡa ḡeseḡaḡiatio, benamo Iesu murinai ḡerakato tarimana ta tu Anduru, Simona Petero tarina.

41 Anduru na Iesu eraga-kwaneato. Asikauna kakana Simona edoḡariato, benamo ekiraiato, ekirato, “Ḗai na Mesia baḡa doḡaria.” Mesia anina tu Keriso, (Barau na ekiraḡi-toreato vevaḡa-maḡuri tarimana).

42 Benamo ḡia na Simona Iesu ḡenai eḡori-iaḡoato. Iesu na eḡitaiato, benamo ekirato, “Ḗoi aramu tu Simona, Ioane natuna, senaḡi ḡoi toma aramu beḡe kiraḡiani tu Kefas beḡe toni.” Mai ara “Kefas” ema “Petero” aniri tu sebona, garo ai anina tu “Fore”.

Iesu na Filipino e Natanaela ekearito

43 Ma elāganito nai tu, Iesu tu Galilea tanona ḡana neiaḡo etato. Ḗia na Filipino edoḡariato, benamo ekiraiato, ekirato, “Murigu ai noma raka.”

44 Filipino tu Betesaida tarimana, Anduru e Petero ḡesi vanuḡa sebona.

45 Filipino na Natanaela edoḡariato, benamo ekiraiato, ekirato, “Mose ḡena taravatu ai ema peroveta tarimari ḡeri bukai varina ḡetoreato tarimana tu baḡa doḡaria; ḡia tu Iesu, Nasareta tarimana, Iosefa natuna.”

46 Natanaela evedanaḡito, ekirato, “Nasareta na dagara namona ta beiaḡomani?” Filipino ekirato, “Noiaḡoma, noma ḡitaia.”

47 Iesu na Natanaela eġitaiato, eiaġomato-ġoi, benamo ġia ekiraġiatio, ekirato, “Ġoboġe, mani tarima tu Isaraela tarimana korikorina, ġia ġenai ġofaġofa ta tu asi etanuni.”

48 Natanaela na edanaġiatio, ekirato, “Kamasi boribagu?” Iesu na evaġa-veaseato, ekirato, “Filipo tu vau bekeamu. Au na ġoi tu baġita-guinemu figi ġauna gaburenai roġo otanuto-ġoi nai.”

49 Benamo Natanaela na evaġa-veaseato, ekirato, “Vevaġa-riba tarimamu, ġoi tu Barau Natuna; ġoi tu Isaraela Verena.”

50 Iesu na ma evaġa-veaseato, ekirato, “Ġoi na au ovaġa-moġoniguni, korana au na bakira-varamu, ġoi tu figi ġauna gaburenai baġita-guinemu, nene? Veiġa tari vau boġitarini, mai veiġa maġa maki beġe vanaġiani.”

51 Benamo ma ekirarito, ekirato, “Moġoni veġata, au na ġomi akiramini, guba bevekeo-fakani boġo ġitaiani, ema Barau ġena aneru beġe varaġeni e beġe marġoni boġo ġitarini Tarimarima Natuna ġenai.”

2

Veġaraġo verekona Kana vanuġanai

1 Ġaro ruarua ġekorito murinai, Kana vanuġana nuġanai veġaraġo verekona ta ġeveiatio. Kana vanuġana tu Galilea tanona nuġanai. Mo veġaraġo verekona nuġanai tu Iesu sinana maki monai.

2 Ema Iesu na ġena mero ġesi maki ġeura-maġirito, be mo veġaraġo verekona nuġanai ġeraka-toġato.

3 Vine nanuna o wain ekorito, benamo Iesu sinana na Iesu evaġa-guruġaiatio, ekirato, “Ġia tu asi ġari vine nanuna.”

4 Iesu na evaġa-veaseato, ekirato, “Vavine, karase nai au oma kira-varaguni? Mani tu ġomi ġemi ġauvei. Au ġegu ġaro tu roġosi bene votu.

5 Benamo sinana na vetuġunaġi tarimari evaġa-guruġarito, ekirato, “Kara bekira-varamini veiġana boġono veia.”

6 Monai tu fore gwaġuturi imaina sebona (6) vaġa-ruġa, Iuda tarimari ġeri veiareva veiġari ġari ġeġauvei-iaġirito-ġoi. Mo fore gwaġuturi tata nuġari tauri galon gabana ruarua (20) o gabana toitoi (30) kavari.

7 Iesu na vetuġunaġi tarimari ekirarito, ekirato, “Mani gwaġutu nanu na ġovaġa-vonuri!” Benamo ġevaġa-vonu fokafokarito.

8 Moġa murinai na ekirarito, ekirato, “Kota ġoġutu-vaġia, ġoġwa-iaġoa vereko ġorikauna tarimana ġenai.” Ġeġutu-vaġito, benamo ġeġwa-iaġoato,

9 vereko ġorikauna tarimana na mo nanu, vine nanunai evaġa-iaġoato moġa, eniu-tovoato. Ġia tu asi ribana mo vine nanuna tu ainana eiaġomato; a nanu ġesisiatu merori ġereġari moġo ma ribari. Benamo vereko ġorikauna tarimana na veġaraġo varġu tauna ekea-iaġomaiatio, benamo evaġa-guruġaiatio, ekirato,

10 “Tarimarima mabarari na vine nanuna namo vedaureana tu ġetore-rosi guineani, benamo vereko tarimari ġeniu-maseni murinai vau, vine nanuna kota namo raġina ma ġetore-rosiani. Senaġina ġoi na tu vine nanuna namo vedaureana tu boġabi-taria mo maitoma.”

11 Mai tu Iesu ġena vetoġa boruna giniguinena evaġa-foforiatio Kana vanuġanai, Galilea tanona nuġanai. Monana ġia marevana e seġukana baregona evaġa-foforiatio, ema ġena mero na ġevaġa-moġoniatio.

12 Moġa murinai Iesu ma sinana e tarina merori, ema ġena mero ġesi ġevariġoto Kaperanauma ġana. Ma monai ġaro viravira ta ġetanuto.

Iesu na Rubu Veāga eiarevaiato

Mataia 21:12-13; Mareko 11:15-17; Luka 19:45-46

¹³ Iuda tarimari ġeri Pasova o Iuda tarimari mase aneruna na evanaġirito moġo verekona ġorai ekavinaġito naima, Iesu tu Ierusalemā ġana evaraġeto.

¹⁴ Rubu Veāga nuġanai tarimarima na boromakau, e mamoe, ema pune ġeivoivoi-iaġirito-ġoi, ema tarima kotari teibolo ai ġetanuto ma moni ġesenisito-ġoi edoġaririto.

¹⁵ Benamo varo kwarina ta evatoato. Monana Rubu Veāga na mamoe e boromakau mabarari ema lailai-rosirito. Moni ġesenisirito-ġoi tarimari ġeri fata eġuke-vebuburito, ġeri moni ebubu-lautilausirito.

¹⁶ Benamo pune ġeivoito-ġoi tarimari ekira-ġoirito, ekirato, “Maiġeri dagara mainana ġoġabi-rosiri! Au Tamagu ġena numa tu voivoi numanai asi ġovaġa-iaġoa!”

¹⁷ Benamo ġena mero na Buka Veāgai evetoreto guruġana ġetuġamaġi-doġariato, ekirani, “Ġoi ġemu numa uravinina nuġagu ai tu karava noġa eġarani.”

¹⁸ Moġa murinai Iuda tarimari na ġevaġa-guruġaiato, ġekirato, “Maiġesi oveini anina tu kara? Kamara vetoġa na bevaġa-foforimuni ġai ġemai, ġoi tu ma ġemu maoro maiġeri boveirini?”

¹⁹ Iesu evaġa-veseto, ekirato, “Mai Rubu Veāga ġorovoa, benamo ġaro toitoi nuġanai au na ma bana vaġa-ruġa-vaisi ġenoġoia.”

²⁰ Ġia na ġekiraiato, ġekirato, “Mai Rubu Veāga tu laġani gabana vasivasi ma imaima sebona (46) nuġari ai ġeragaiato. A ġoi na tu ġaro toitoi nuġanai ma boraga-ġenoġoiani otoni?”

²¹ Senaġi Iesu na tu ġia tauġanina Rubu Veāgai evaġa-ilailaiato.

²² Iesu mase na evaisi-raġeto murinai, ġena mero na mo guruġa ġetuġamaġi-doġariato, benamo ġia na Buka Veāga ema Iesu na evaġa-ribarito guruġari ġevaġa-moġonirito.

Iesu ribana tarimarima ġeri veiġa

²³ Iesu Pasova o Iuda tarimari mase aneruna na evanaġirito moġo verekona ġarori ai Ierusalemā etanuto-ġoi nai, tarima vovoka na ġevaġa-moġoniato, korana tu vetoġa boruri ġutuma eveirito ġeġitarito nai.

²⁴ Senaġi Iesu na ġia asi evaġa-moġonirito, korana tarimarima mabarari ġia tu ma ribana ġinikau.

²⁵ Ema tarima ta tu asi ilaila ġia tarimarima ġeri maġuri dabarari bekiravaraiani, korana tarimarima mabarari nuġari tu ġia ma ribana.

3

Iesu e Nikodemo

¹ Farisea tarimana ta etanuto-ġoi arana Nikodemo; ġia tu Iuda tarimari ġeri veġorikau tauna ta.

² Nega ta boġi ai Iesu ġenai eiaġoto, benamo ekirato, “Rabi, ġai ribama, ġoi tu vevaġa-riba tarimamu, Barau ġenana oiaġomato, korana tu vetoġa boruri oveirini maiġeri tu Barau na asi evaġa-kavaiiani tarimana na tu asiġina ġinavaġi beveirini riba.”

³ Iesu na evaġa-veseato, ekirato, “Moġoni veġata akiramuni, asi beġora-ġenoġoini tarimana na Barau ġena Basileia tu asiġina ġinavaġi beġitaiani.”

⁴ Benamo Nikodemo na edanaĝiato, ekirato, “Tarima baregona ta tu kamasi ma beĝora-ĝenoĝoini? Sinana nuĝanai ma beraka-toĝani, benamo ma beĝora-ĝenoĝoini?”

⁵ Iesu ma evaĝa-veseto, ekirato, “Au na akira-korikorimuni, tarima ta Barau ĝena Basileia nuĝanai asi berakatoĝa-kavani, senaĝina nanu ĝenana beĝorani ema lauka ĝenana maki beĝorani tarimana vau beraka-toĝani.

⁶ Tarimarima tauĝanina ĝenana eĝorani tu tauĝani, ma Barau Iaukana ĝenana eĝorani tu iauka.

⁷ Ĝoi nuĝamu asi bene farevaĝi maĝesi akiramuni nai, korana au bakira, ‘Ĝomi mabarami boĝono ĝora-ĝenoĝoi.’

⁸ Iavara etoĝani tu, eurani gaburi ĝana eĝau-iaĝoni. Guruna tu ĝoseĝaĝiani, senaĝi ainana eiaĝomani, ma aĝana eiaĝoni tu asi ĝoribaiani. Barau Iaukana ĝenana ĝeĝorani tarimari mabarari maki moĝesina, asi ĝoribani kamasi ĝeĝorani.”

⁹ Nikodemo ma evedanaĝito, ekirato, “Mai dagara tu kamasi beĝe ĝorani?”

¹⁰ Iesu ma evaĝa-veseto, ekirato, “Ĝoi tu Isaraela ĝeri vevaĝa-riba tarimamu, senaĝi maĝeri dagara ĝoi tu asi ribamu?”

¹¹ Au na akira-korikorimuni, ĝai tu ribama dagarari ĝaguruĝa-iaĝirini, ema ĝaĝitarito dagarari ĝakiraĝi-foforirini, senaĝina ĝema guruĝa tu asi ĝoĝabi-raĝerini.

¹² Au na ĝomi ĝemi tu tanobara dagarari akiraĝirini, senaĝi asi ĝovaĝa-moĝoniguni, a guba dagarari bakira-varamini nai tu, kamasi boĝo vaĝa-moĝoniguni?

¹³ Tarima ta guba ĝana asigina ĝinavaĝi evaraĝeto, senaĝina guba na emariĝoto tarimana ĝereĝana moĝo, mo tu Tarimarima Natuna.

¹⁴ Mose na tano fakanai mota eĝabi-vaisiato ilailanai, Tarimarima Natuna maki moĝesi beĝe ĝabi-vaisiani.

¹⁵ Monana vau ĝia ĝenai beĝe veĝabidadamani tarimari mabarari na maĝuri vanaĝivanaĝi beĝe ĝabiani.

¹⁶ Korana Barau na tanobara euravini-baregoato nai, Natuna ĝora ĝereĝa evinirato, be ĝia beĝe ĝabidadama-viniani tarimari mabarari tu asi beĝe maseni, a maĝuri vanaĝivanaĝi beĝe ĝabiani.

¹⁷ Korana Barau na Natuna etuĝu-mariĝoato tanobara ĝana tu, dia tanobara bene vaĝa-kotaia ĝana, senaĝi tanobara ĝia bakunai bene maĝuri ĝana.

¹⁸ Ĝia ĝenai eveĝabidadamani tarimana tu meto asi beviniani, senaĝi asi eveĝabidadamani tarimana tu varau meto eĝwa-taĝoani, korana ĝia na tu Barau Natuna ĝora ĝereĝa asi eĝabidadama-viniani nai.

¹⁹ Mo meto korana tu maĝesi: Mama tu tanobarai varau ema foforito, senaĝi tarimarima na mukuna ĝeuravini-baregoato, korana ĝeri veĝa tu rakava nai.

²⁰ Veĝa rakavari ĝeveini tarimari mabarari na tu mama ĝeruĝaiani, mama asi ĝeiaĝo-viniani. Ĝia tu ĝegarini, korana ĝeri veĝa rakavari beĝe foforini mamai garina.

²¹ Senaĝi deikara dabara moĝonina ekorana-iaĝiani tarimana na mama eiaĝo-viniani, benamo tarimarima na beĝe ĝita-ginikauani, ĝena veĝa namori eveirito tu Barau ĝenana eveirito.

²² Moĝa murinai Iesu ma ĝena mero ĝesi Iudea tanona rekena ĝana ĝeiaĝoto. Monai Iesu tu ĝena mero ĝesi ĝetanuto-ĝoi e ebatisoto-ĝoi.

²³ Ioane maki Aenon ai, Salim rekenai, ebatisoto-ĝoi, korana nanu tu barego monai. Tarimarima mo ĝana ĝeiaĝoto-ĝoi, ea babatisorito-ĝoi.

²⁴ Mo tu Ioane dibura numanai roĝosi ĝere kou-ĝaua nuĝanai.

²⁵ Moĝa ĝaronai Ioane ĝena mero Iuda tarimana ta ĝesi ĝeveĝare-veĝareto. Ĝia ĝeri guruĝa tu, kamara veĝurigi veĝanai tu tarimarima benamo-vedaureani.

²⁶ Ioane ĝena mero Ioane ĝenai ĝeiaĝoto, benamo ĝekirato, “Vevaĝa-riba tarimamu, Ioridana ĝarukana mo rekenai ĝoi ĝesi ĝotanuto-ĝoi e ĝoi na oguruĝa-iaĝiato tarimana tu ebatisoni, ema tarimarima vovoka ĝia ĝenai ĝeiaĝoni.”

²⁷ Ioane evaĝa-veseto, ekirato, “Tarima ta na dagara ta asi beĝoitaĝo-kavaiani, senaĝi Barau na guba na bevini-rigoani vau beĝoitaĝoni.

²⁸ Gomi tauĝemi na ĝoseĝaĝiguto, be ma ribami au akirato, ‘Au tu dia Keriso, (Barau na ekiraĝi-toreato vevaĝa-maĝuri tauna), senaĝi au tu etuĝu-quineguto ĝia ĝoirana ĝana.’

²⁹ Beveĝaraĝoni ĝuiatona tu beĝaraĝoani futuana na beĝaraĝoani. A beveĝaraĝoni futuana ĝatana tu eruĝa-taĝoni moĝo, (mai tu au, Ioane), ema ĝatana eseĝaĝi-ĝauni, ma ĝatana beveĝaraĝoni futuana ĝarona beseĝaĝiani nai tu, beiakuni. Moĝesi naima au tu iaku na bama vonuvonu-raĝe.

³⁰ Ĝia tu bene barego, a au tu bana kei.”

Iesu tu guba na eiaĝomato

³¹ “Tuĝuna na emariĝoto tarimana tu dagara mabarari iatari ai; tano na eiaĝomato tarimana tu tanobara tarimana ema tanobara guruĝari moĝo bekiraĝini. Guba na eiaĝomato tarimana dagara mabarari iatari ai.

³² Ĝia tu monai eĝitato e eseĝaĝito dagarari ekiraĝi-foforirini, senaĝi tarima ta na ĝena guruĝa asi eĝabi-raĝeani.

³³ Deikara na ĝia ĝena guruĝa eĝabi-raĝeani tarimana na evaĝa-moĝoni korikoriani, Barau tu moĝoni veĝata.

³⁴ Korana tu Barau na etuĝuato tarimana na Barau ĝena guruĝa beki-raĝiani, korana tu Barau na ĝena Iauka Veaĝa eviniato ema evaĝa-vonuvonu-raĝeani.

³⁵ Tamana na Natuna eura-viniani, ema dagara mabarari ĝia ĝimanai etore-kaurito.

³⁶ Deikara na Natuna evaĝa-moĝoniani tarimana na maĝuri vanaĝivanagi beĝabiani. A Natuna asi evaĝa-moĝoniani tarimana na maĝuri asi beĝabiani, senaĝi Barau ĝena baru tu ĝia iatanai betanuni.”

4

Iesu ema Samaria vavinena

¹ Farisea tarimari tu varau ĝeseĝaĝito, Iesu na tarima vovoka eĝabirito, ĝena mero ai evaĝa-iaĝorito e ebatisorito, ma Ioane na tu asi vovoka eĝabirito.

² Senaĝina Iesu tauĝena na ta tu asi ebatisoto; mo tu ĝena mero moĝo ĝebabatisoto-ĝoi.

³ Iesu eribato ĝia varina Farisea tarimari na eseĝaĝiato, benamo Iudea eiaĝuiato, Galilea ĝana ma eĝenoĝoi-iaĝoto.

⁴ Galilea ĝana tu Samaria tanona na eraka-vanaĝito.

⁵ Samaria vanuḡana tai eraḡasito. Mo vanuḡa arana tu Sika. Mo vanuḡa tu Iakobo na natuna Iosefa eviniato tanona sevina.

⁶ Iakobo ḡena nanu gurina maki monai. Iesu tu eraka-iaḡomato, be egaugau-raḡeto, benamo mo nanu gurina sevina etanu-tarifo. Mo tu horaḡana 12 koloko nuḡanai ḡarogotai.

⁷ Etanu-taḡoto-ḡoi nuḡanai, Samaria vavinena ta nanu ḡutu eiaḡoto, benamo Iesu na enoḡiato, ekirato, “Nanu kota noma vinigu, be nama niu.”

⁸ Gena mero tu vanuḡa ḡana, ḡaniḡani voi ḡeiaḡoto.

⁹ Samaria vavinena evaḡa-veseto, ekirato, “Ḡoi tu Iuda taumu, ma au tu Samaria vavinegu, karase nai au ḡegu ai nanu onoḡini?” Moḡesi ekirato, korana Iuda tarimari tu Samaria tarimari ḡesi asi ḡevagara-ḡarato-ḡoi.

¹⁰ Benamo Iesu na evaḡa-veseato, ekirato, “Bema Barau ḡena varevare dagarana boro riba, ema boro riba maki, nanu kota ḡemu ai enoḡiani tarimana tu deikara nai tu, ḡia boro noḡia, benamo ḡia na maḡuri nanuna bere vinimu.”

¹¹ Vavine ekirato, “Vereḡauka, ḡoi tu asi ḡemu tuḡu-rigo dagarana e guri maki variḡo. Mani maḡuri nanuna tu ainana boḡabiani?”

¹² Ḡoi tu varaḡe lelevaḡi, ma ḡai senema Iakobo tu kei, ei? Mai nanu gurina tu ḡia na evinimato, ema ḡia tauḡena na eniuato-ḡoi, natuna mabarari na ema ḡena boromakau e mamoe seriri na maki ḡeniuato-ḡoi.”

¹³ Iesu na ma evaḡa-veseato, ekirato, “Mai nanu beḡe niuani tarimari mabarari bokari ma beḡe koke-ḡenoḡoini.”

¹⁴ A au na baviniyani nanuna beniuani tarimana tu, bokana asi ma bekoke-ḡenoḡoini. Korana au na baviniyani nanuna tu ḡia nuḡanai nanu gurina beiaḡoni, bevoneḡoi-voneḡoini ema maḡuri vanaḡivanaḡi beviniani.”

¹⁵ Mo vavine na enoḡiato, ekirato, “Vereḡauka, mani nanu novinigu, be bokagu asi ma bene koke-ḡenoḡoi, ema maḡana nanu-ḡutu asi ma bana iaḡoma.”

¹⁶ Benamo Iesu na evaḡa-guruḡaiato, ekirato, “Noiaḡo, ḡaraḡomu noa keaia, benamo taumi ruarua boḡono iaḡoma.”

¹⁷ Mo vavine evaḡa-veseto, ekirato, “Au tu asi ḡaraḡogu.” Iesu ekirato, “Mani tu moḡoni okirani, ‘Au tu asi ḡaraḡogu’ otoni tuna.”

¹⁸ Ḡemu guruḡa tu moḡoni, korana ḡoi tu vaḡa-imaima veḡata oveḡaraḡoto, ema mani oḡabiato tarimana maniḡa tu dia ḡoi ḡaraḡomu.

¹⁹ Mo vavine ekirato, “Vereḡauka, au toma bama riba, ḡoi tu peroveta tarimamu.”

²⁰ Ḡai tubuma ḡatama na tu mai ḡoro ai Barau ḡetoma-rakarigo viniato-ḡoi, a ḡomi Iuda tarimami ḡokirani, toma-rakarigo gabuna tu Ierusalemi moḡa, be tarimarima tu monai beḡene toma-rakarigo.”

²¹ Iesu ekirato, “Vavine, ḡegu guruḡa bono vaḡa-moḡonia, ḡaro ta eiaḡomani, mai ḡoro ai e Ierusalemi maki Tamara asi boḡo toma-rakarigo viniyani.”

²² Ḡomi Samaria tarimami na ḡotoma-rakarigo viniyani Barauna tu asi ribami; a ḡai na ḡatoma-rakarigo viniyani Barauna tu ribama, korana vevaḡa-maḡuri tu ḡai Iuda tarimama ḡemana eiaḡomani.

²³ Senaḡi ḡarona eiaḡomani ema varau beraḡasi maḡa, toma-rakarigo tarimari moḡoniri na Tamara Barau tu iaukai e moḡoni ai beḡe toma-rakarigo viniyani. Korana Tamara na tu moḡesi beḡe toma-rakarigo viniyani tarimari evetaurini.

²⁴ Barau tu iauka, ma beḡe toma-rakarigo viniyani tarimari na tu iaukai ema moḡoni ai beḡene toma-rakarigo vinia.”

25 Mo vavine na ekiraiato, ekirato, “Au ribagu, Mesia, ġekiraġiani Keriso ġetoni, tu beiaġomani. Ġia beiaġomani ġaronai, ġia na dagara mabarari bekirāġi-foforirini.”

26 Benamo Iesu na evaġa-veaseato, ekirato, “Tarimana tu au maiġegu, ġoi avaġa-guruġamuni.”

Iesu ġena mero ġeġenoġoito

27 Iesu moġesi eguruġato-ġoi nuġanai, ġena mero ġeraġasito. Ġia mabarari nuġari ġefarevaġito, korana Iesu tu vavine ta ġesi ġeguruġa guruġato-ġoi, senaġi tarima ta asi ekirato, “Ġoi tu kara ourani?” O “Karase nai mai vavine ġesi ġoguruġa-guruġani?”

28 Benamo mo vavine na ġena nanu gwaġutuna eraga-kwaneato, eġenoġoi-iaġoto vanuġa ġana, benamo vanuġa tarimari ea kirarito.

29 Ekirato, “Goiaġoma, tarima ta ġoma ġitaia. Ġia na au ġegu veġa aveirito dagarari mabarabarari bekirāġi-fofori fororiri. Betaġu ġia tu Keriso, (Barau na ekiraġi-toreato vevaġa-maġuri tauna), banaġu?”

30 Benamo tarimarima na vanuġa ġeiaġuiato, ma Iesu ġenai ġeiaġoto.

31 Mo faka nuġanai ġena mero na Iesu ġekiraiato, ġekirato, “Vevaġa-riba tarimamu, nuġaniġani.”

32 Senaġi ġia evaġa-veseto, ekirato, “Au tu ma ġagu ġaniġani, ġomi asi ribami ġaniġanina.”

33 Moġesina naima ġena mero tauġeri ġevedanaġito, ġekirato, “Tarima ta na ġana ġaniġani beġwa-iaġoma ba?”

34 Iesu na ekirarito, ekirato, “Au ġagu ġaniġani tu etuġuguto Barauna ġena ura bana veia, ema eviniguoto ġauveina bana vaġa-koria.

35 Ġomi ma ġemi sisiba guruġana, ġokirani, ‘Ġue vasivasi murinai vau kwakwa ġarona beiaġomani.’ A au na akiramini, matami ġokeori, benamo vamoka ġoġita-ġinikauro, tauri tu varau beġe gwaġiġi, kwakwa ġarona tu beraġasi.

36 Kwakwa tarimana ġena ġauvei voina tu beġabiani, ema vamoka ġaniġanina bevaġa-vegogoani tu, maġuri vanaġivanaġi ġana. Tauna moġa, varovarona tarimana e kwakwa tarimana beġe iaku-vegogoni.

37 Korana moġesi bevetoreni nai tu, iniġesina ġekiraġiani guruġana tu moġoni, ‘Tarima ta na tu evaroani, ma ta na tu ekwaiani.’

38 Au na ġomi atuġumito tu, asi ġovaro-vekwaraġito dagarari kwakwari. Varovarori vekwaraġiri tu tarima tari ġevewkaraġito, a ġomi na tu ġia ġeri vekwaraġi dagarari kwakwari boġo raka-toġa.”

Samaria tarimari ġutuma na Iesu ġevaġa-moġoniato

39 Benamo Samaria tarimari vovoka mo vanuġa nuġanai Iesu ġevaġa-moġoniato, korana tu mo vavine ġena vevarifju guruġana ġenana naima, ġia ekirato, “Au ġegu veġa rakavari aveirito dagarari mabarabarari bekirāġi-fofori fororiri.”

40 Moġesina naima Samaria tarimari Iesu ġenai ġeiaġomato nai tu, ġenoġiato, ġia ġesi roġo beġene tanu. Moġa lorinai Iesu mo vanuġai ġaro ruarua ma etanuto.

41 Ma tarimarima vovoka na Iesu ġevaġa-moġoniato, korana ġena vevarifju guruġari na.

42 Benamo ġia na mo vavine ġekiraiato, ġekirato, “Ġai na maitoma Iesu ġavaġa-moġoniani, dia ġoi ġemu guruġa lorinai, senaġi ġai tauġema na ġia

baġa seġaġia, ma baġama riba-ginikau, ġia tu moġoni Keriso, tanobara Vaġa-maġurina Tarimana.”

Vere ta natuna merona Iesu na keve na evaġa-maġuriato

⁴³ Iesu monai ġaro ruarua etanuto murinai, Galilea ġana ma eiaġoto.

⁴⁴ Iesu tauġena na ekiraġi-foforiato, ekirato, “Peroveta tarimana tu ġena vanuġa korikorina tarimari na asi beġe gubakauani.”

⁴⁵ Benamo Galileai ea votuto nai tu, Galilea tarimari na ġeġabi-raġeato. Iesu ġeġabi-raġeato korana Ierusalemaj Pasova verekona nuġanai tu ġia maki monai, be Iesu na kara eveirito dagarari mabarari tu, matari na ġeġitarito.

⁴⁶ Benamo Iesu ma eġenoġoito Galilea vanuġana ta arana Kana ġana. Kana tu Iesu na nanu wain ai evaġa-iaġoato vanuġana. Monai kini ġena vere ta Kaperanaumaj etanuto-ġoi, ma ġia natuna merona tu ekeve-rakavato.

⁴⁷ Mo vere eseġaġito, Iesu tu Iudea na eiaġomato Galilea ġana, benamo eiaġoto ġia ġenai, benamo enoġiato, Kaperanauma ġana nevariġo, be ġia natuna merona nea vaġa-maġuria, korana ġia natuna merona tu dori emaseto-ġoi.

⁴⁸ Iesu na ekiraiato, ekirato, “Ġomi tu vetoġa boruri e nuġa-farevaġi veiġari asi boġo ġitarini tu, asi boġo vaġa-moġoniguni.”

⁴⁹ Mo vere ekirato, “Vereġauka, si-iaġo, natugu bemaseni ġesi.”

⁵⁰ Iesu na ekiraiato, ekirato, “Noiaġo, natumu merona tu bemaġuri bene.” Mo tarima na Iesu ġena guruġa evaġa-moġoniato, benamo eiaġoto.

⁵¹ Dabara na eġenoġoi-iaġoto-ġoi nuġanai, ġena vetuġunaġi tarimari ġesi ġevedoġarito, benamo ġekira-varaiato, ġekirato, “Ġoi natumu merona tu bemaġuri.”

⁵² Benamo ġia na edanaġirito, kamara horai natuna merona enamoto. Ġia ġevaġa-veseto, ġekirato, “Goraġani horaġauno 1 koloko lavilavi rekenai ġia mo keve na eraga-kwaneato.”

⁵³ Benamo tamana eriba-maoroto, mo aoa korikorinai enamoto, Iesu na ġia evaġa-guruġaiato, ekirato, “Goi natumu tu bemaġuri.” Benamo ġia e ġena numa tarimari mabarari ġesi Iesu ġevaġa-moġoniato.

⁵⁴ Mai tu vetoġa boruna vaġa-ruaruana Iesu na eveiato, Iudea na Galilea ġana eiaġoto murinai.

5

Kou ai Iesu na tarima ta evaġa-namoato

¹ Mai veġa murinai Iesu tu Ierusalemaj ġana ma evaraġeto, korana Iuda tarimari tu ġeri vereko ta ġeveiato-ġoi.

² Ierusalemaj kou ta tu ġatama-boka baregona arana Mamoe Ġatama-bokana sevinai. Mo kou arana Heberu garo ai tu Betesda, ma ġia sevinai tu iaġaraġi foutari imaima (5).

³ Ġaro mabarari ai kevekeve tarimari vovoka monai ġegena-taġoto-ġoi, mata-bubu, kwaku rakava, ema tauġaniri ġemaseto tarimari, [nanu ġena ġareva-ġareva ġevaġa-nogaġato-ġoi.

⁴ Korana aneru ta guba na emariġoto-ġoi, mo nanu evaġa-ġareva ġarevaiato-ġoi. Mo nanu eġarevato-ġoi nuġanai, eturu-ferei ġuineto-ġoi tarimana tu ġena keve enamoto-ġoi.]

⁵ Monai tarima ta egena-tağoto-ğoi, ġena keve lağaniri tu gabana toitoi ma imaima toitoi (38).

⁶ Iesu na monai genatağonai eġitaiao, ma eribato, ġia tu ġaro vovoka veğata ekeve-iaġiato. Benamo Iesu na edanaġiato, ekirato, “Ġoi ourani nonamo ba?”

⁷ Keve tarimana na evaġa-veseato, ekirato, “Vereġauka, nanu eġareva-ġarevani nai, au kou ai tu asi tau raga tore-reigu tarimana ta. Mainana tauġegu kou aiaġo-viniani nai tu, ta eraka-rei-guineni.

⁸ Iesu na ekiraiato, ekirato, “Novariġisi, ġemu geda noġabi-vaisia, be noraka.”

⁹ Benamo mo tarima ġena keve asikau enamoto, ma ġena geda eġabi-vaisiato, benamo eruġa-vaisito, erakato.

Mo veiġa tu Sabadi ai eġorato.

¹⁰ Moġa lorinai Iuda tarimari na mo keve na enamoto tarimana ġekiraiato, ġekirato, “Toma tu Sabadi, ġemu geda asi bono ġwa-rakao rakaoa, taravatu.”

¹¹ Ġia na evaġa-veserito, ekirato, “Au bevaġa-namogu tarimana na bekiragu, bekira, ‘Ġemu geda noġabi-vaisia, be noraka,’ besi.”

¹² Benamo ġia na ġedanaġiato, ġekirato, “Mo tu kamara tarima na bekiramu, ‘Ġemu geda noġabi-vaisia, be noraka,’ besi?”

¹³ Senaġi mo Iesu na evaġa-namoato tarimana tu asi ribana, dei na evaġa-namoato, korana Iesu tu eraka-veġitato, tarima ġutuma mo gabu ai vekaravari na.

¹⁴ Gabivau Iesu na mo tarima Rubu Veaġa nuġanai edoġariato, benamo ekiraiato, ekirato, “Noseġaġi, maitoma ġoi tu bonamo. Veiġa rakavana ta asi ma bono vei-ġenoġoia, rakava barego vedaureana ta na beġabimuni ġesi.”

¹⁵ Benamo mo tarima erakato, eiaġoto, Iuda tarimari ea kira-vararito, ġia tu Iesu na evaġa-namoato.

¹⁶ Monana vau Iuda tarimari na Iesu ġevaġa-rakavaiao-ğoi, korana Sabadi ai mo vevaġa-maġuri veiġana eveiato nai.

¹⁷ Benamo Iesu na evaġa-veserito, ekirato, “Au Tamagu tu vanaġivanagi eġauveini naima, au maki aġauveini.”

¹⁸ Moġesi ma ekirato nai, Iuda tarimari ġeri ura tu dabara ta veġata beġene ġoitaġoa, be Iesu tu beġene vaġi-masea ġetato. Dia mo Sabadi asi ekorana-iaġiato moġo dainai, senaġina ekirato, Barau tu ġia Tamana ma etato. Korana mo dabarai ġia tu Barau ġesi ilaila etato.

Barau Natuna ġena seġuka

¹⁹ Benamo Iesu na evaġa-veserito, ekirato, “Moġoni, au na akira-korikorimini, Natuna ġereġana na kara ta asi beveiani, senaġi Tamana ġena veiġa beġitarini veiġari moġo ġia na beveirini. Tamana kara eveini dagarari mabarabarari Natuna na maki beveirini.

²⁰ Korana tu Tamana na Natuna eura-viniani, ema ġia na eveirini dagarari mabarari maki evaġa-ġitaiani. Oba, dagara barego lelevaġiri maki ġenai bevaġa-foforiani, maiġeri dagara maki beġe vanaġirini, ġomi nuġami beġene farevaġi ġana.

²¹ Vaġa-ilailana Tamana na mase tarimari evaġa-vaisi-raġerini, benamo maġuri evinirini kavana, Natuna na maki ġena ura tarimari maġuri evinirini.

²² Tamana na tu tarima ta asi evaġa-kotaiani, korana vevaġa-kota seġukana mabarana tu Natuna eviniato.

23 Moġa tauna tu, tarimarima mabarari na Natuna beġene gubakaua, Tamana ġeguba-kauani kavana. Natuna asi eguba-kauani tarimana na tu Tamana maki asi egubakauani, korana Tamana na tu Natuna etuġuato.

24 Moġoni au na akiramini, au ġegu guruġa eseġaġiani ema etuġuguto Barauna evaġa-moġoniani tarimana na maġuri vanaġivanaġi varau beġabia. Ġia tu Barau ġena Kota nuġanai asi beraka-toġani. Asiġina. Mase varau beraga-kwanea, maġuri nuġanai varau beraka-toġa.

25 Moġoni akiramini, ġarona roġo beiaġomani, ma varau bevotu, mase tarimari na Barau Natuna ġarona beġe seġaġiani, ma beġe seġaġiani tarimari tu beġe maġurini.

26 Korana tu Tamana tauġena ġenai maġuri etanuni ilailanai, Natuna maki moġesi eviniato, maġuri ġenai etanuni.

27 Ema ġia Natuna maoro eviniato, bene vevaġa-kota ġana, korana ġia tu Tarimarima Natuna.

28 Nuġami asi beġene farevaġi! Ġarona mani eiaġomani, mase tarimari mabarari roġo gara nuġari ai na Barau Natuna ġarona beġe seġaġiani.

29 Benamo beġema raka-rosini: Vei-namo tarimari beġe vaisi-raġeni, maġuri beġene ġabia ġana, a vei-rakava tarimari beġe vaisi-raġeni, rakava voina metona beġene ġabia ġana.”

Iesu beġe kiraġi-foforiani

30 “Au tu ġereġagu na dagara ta asi baveiani riba. Avevaġa-kotani maki Barau na ekiraguni aseġaġirini ilailari ai aveirini, moġa lorinai ġegu vevaġa-kota tu roroġoto, korana dia au tauġegu ġegu ura ta akorana-iaġiani, senaġi au etuġuguto Barauna ġena ura moġo aveiani.

31 Bema au tauġegu moġo bara vekiraġi-fofori nai tu, au ġegu guruġa tu asi tau vaġa-moġonina.

32 Senaġi tarima ta na maki au evaġa-moġoniguni, ma au ribagu, ġia na au ekiraġi-foforiguni guruġana tu moġoni.

33 Ġomi na tarima kotari ġotuġu-iaġorito Ioane ġenai, benamo ġia na guruġa moġonina ekiraġiato.

34 Au vaġa-moġonigu guruġari tu dia tarimarima ġerina eiaġomani, a Ioane bakiraġia korana tu, ġomi maġuri boġono doġaria uranai.

35 Ioane tu noġa moġo lamefa eġarato-ġoi ema emore-taġoto-ġoi, benamo ġomi mo faka kotunai ġemi ura tu, ġia ġena mamai boġono iaku-tanu moġo ġotato-ġoi.

36 Senaġi au ġevaġa-moġoniguni veigari na, Ioane na evaġa-moġoniguni guruġari, moġeri tu ġevanaġirini. Korana tu Tamagu na eviniġuto ġauveina maitoma aveiani, mainana au evaġa-moġoniguni, au tu Tamagu na etuġuguto.

37 Au tu Tamagu na etuġuguto, ma ġia tauġena na maki au ekiraġi-foforiguto. Ġomi na ġia ġarona tu roġosi ġoro seġaġia, ema vetoġana maki roġosi ġoro ġitaia.

38 Ema ġena guruġa ġomi nuġami ai tu asi etanuni, korana ġia na etuġuato tarimana tu asi ġovaġa-moġoniani.

39 Ġomi na Buka Veġa guruġari ġovetau-ginikaurini, korana ġomi ġotuġamaġini tu, moġeri guruġa nuġari ai maġuri vanaġivanaġi boġo doġariani. Moġeri guruġa na tu au ġekiraġiguni.

40 Senaġina ġomi maġuri ġabigabina uranai au ġegu ai iaġoma tu asi ġourani.

41 Au tu tarimarima ġerina vevaġa-raġe tu asi avetauani.

⁴² Senaġi ġomi aiġesi, au tu ma ribagu. Au ma ribagu ġomi nuġami o lorumi ġuturi ai Barau uravinina tu asi etanuni.

⁴³ Au aiaġomato tu Tamagu aranai, ma asi ġoġabi-raġeguni. Senaġi tarima boruna ma beiaġomani tauġena aranai nai tu, boġo ġabi-raġeani.

⁴⁴ Gomi tu tauġemi fakami ai moġo ġovevaġa-raġeni tu ġoġabi-raġerini. Senaġi mo vevaġa-raġe tu Barau ġereġana na moġo beveiani. Ma Barau ġenana eiaġomani mo vevaġa-raġe, ġomi na tu asi ġourani boġono ġabia. Bema ġomi maniġesi tauġemi fakami ai moġo ġovevaġa-raġeni nai tu, kamasi au boġo vaġa-moġoniguni?

⁴⁵ Asi boġono tuġamaġi, au na Tamagu ġoiranai bavaġa-daġamini, asiġina. Vaġa-daġa tarimana tu ġoġabi-raġeani tarimana, Mose, ġia na ġomi bevaġa-daġamini.

⁴⁶ Bema ġomi na Mose moġoni boġoro vaġa-moġonia nai tu, au maki boġoro vaġa-moġonigu, korana ġia na tu au varigu etoreato.

⁴⁷ Senaġina bema ġia na etoreato guruġana asi boġo vaġa-moġoniani nai, au ġegu guruġa tu kamasi boġo vaġa-moġoniani?"

6

Iesu na daġara imaima (5,000) eġuburito *Luka 9:10-17*

¹ Moġa murinai Iesu Galilea kouna na evanaġi-iaġoto tavi ta reke ġana. Mo kou arana ta tu Tiberia.

² Benamo tarimarima vovoka tabutabu ġia murina na ġeiaġoto, korana vetoġa boruri eveito keve tarimari ġeri ai ġeġitarito nai.

³ Moġa murinai Iesu ġoro ġana evaraġeto, benamo monai ġena mero ġesi ġetanu-tarito.

⁴ Iuda tarimari ġeri vereko arana Pasova ekavinaġito-ġoi ġoirai. (Mai tu Iuda tarimari mase aneruna na evanaġirito moġo, asi evaġirito, verekona).

⁵ Iesu eboġe-vaesito, tarimarima asisebo ġia ġenai ġeiaġomato-ġoi, benamo ġia na Filipino ekiraiato, ekirato, "Ġita ġaniġani tu ainai toma tavoini, maġeri tarimarima mabarari taġubu-iaġirini?"

⁶ Iesu moġesi ekirato, korana Filipino nuġana bene ribaia ġana. A ġia tu ma ribana kara beveiani.

⁷ Filipino na evaġa-veaseato, ekirato, "Silva moniri sinau ruarua (200) na ġaniġani dagarari bita voini, senaġi asi beġe ilailani, mai tu koturi koturi moġo maki asi veġata mabarari beġe ġanini." (Silva moniri sinau ruarua (200) tu tarima ta davana ġue imaima toitoi (8) nuġanai beġabini kavana).

⁸ Ġena mero ta arana Anduru, Simona Petero tarina, ġia na ma evaġa-veaseato, ekirato,

⁹ "Mero misina ta maġa, ġia tu ma ġana beredi imaima (5) e maġani-kone ruarua (2). Senaġi asi beġe ilailani mai tarimarima mabarari ġeri ai tu-na."

¹⁰ Iesu na ekirarito, ekirato, "Tarimarima ġokirari, ġetanutanu-tari." Mo gabu moġa ġauġana tu vovoka. Benamo tarimarima mabarari ġetanutanu-tarito. Tau ġereġari moġo mabarari tu 5,000 kavana.

¹¹ Benamo Iesu na mo beredi eġabirito, Barau evaġa-namoato, benamo ġetanutanu-tarito tarimari mabarari ġevini-vaġa-ġaurito. Maġani-kone maki moġesi eveirito, mabarari ġeġabito ġeri ura ilailari ai.

¹² Ġia mabarari ġeġani-maseto, benamo Iesu na ġena mero ekirarito, ekirato, "Beredi kwari mabarari ġovaġa-vegogori, misina ta maki asi bene rekwa-rekwa."

13 Benamo mo beredi ġeġanirito kwakwari moġeri mabarari ġevaġa-vegogorito, boseġa gabanana ruarua (12) ġevaġa-vonurito.

14 Tarimarima na Iesu na mai vetoġa boruna eveiato ġeġitaiato nai, ġekirato, “Moġoni, mai tu peroveta tarimana tanobara ġana beiaġomani ġetato tarimana.”

15 Iesu eribato, tarimarima tu beġe iaġomani, ġia beġema ġabi-tariani ġeri kini ai beġene vaga-iaġoa ġana. Moġesina naima ġereġana ġoro ġana ma eiaġo-ġenoġoito.

Iesu nanu iatanai erakato

Mataio 14:22-33; Mareko 6:45-52

16 Elaviboġi-iaġoto nai, Iesu ġena mero kou ġana ġevarigoto.

17 Monai ġasi tai ġeraġeto, benamo kou na ġevanaġito, Kaperanauma ġana ġeiaġoto. Mo tu varau eboġito, ma Iesu tu roġosi bere rakakau ġia ġeri ai.

18 A iavara baregona tu eragato-ġoi, be mo kou ureurena maki ebaregato.

19 Iesu ġena mero kilomita imaima (5) o imaima sebona (6) kavana ġasi ġelevaiato nugana, ġia na Iesu ġeġitaiato, nanu iatana na eraka-iaġomato-ġoi, ġasi eiaġoma-viniato-ġoi, benamo ġia tu ġegarito.

20 Iesu na ekirarito, ekirato, “Asi ġogari, mai tu au.”

21 Benamo ġia ġeġabi-raġeato, ġasi ai eraġekauto, ma asikauna tu ġeiaġo-viniato-ġoi gabunai ġevotuto.

Tarimarima na Iesu ġevetauato

22 Elaġanito boġiboġinai, tarimarima vovoka Iesu ġena mero ġasi ai ġeraġeto gabunai ġeruġa-taġoto-ġoi. Ġia ġeribato, tovtovonai monai ġasi tu sebona moġo mo kou rikinai. Ema ma ribari maki, Iesu tu ġena mero ġesi mo ġasi ai asi eraġeto, ġena mero tu ġereġari moġo ġeraġeto ema ġevanaġi-iaġoto.

23 Ġasi kotari Tiberia na ma ġeiaġomato, kou rikinai ġema darokauto. Ġia ġedarokauto gabuna moġa tu, Vereġauka na beredi Barau evaġa-namoato murinai, tarimarima evinirito, ġeġanirito gabuna sevinai.

24 Mo tarimarima ġeriba-maoroto, Iesu ma ġena mero ġesi monai tu asiġina, benamo mo ġasi ai ma ġeraġekauto, Kaperanauma ġana ġevanaġi-iaġoto, Iesu ġea vetauato.

Iesu tu maġuri ġaniġanina

25 Tarimarima na Iesu kou tavi ta kefonai ġedoġariato, benamo ġekiraiato, ġekirato, “Vevaġa-riba tarimamu, ġoi tu aitoma mainai boma votu?”

26 Iesu na evaġa-veserito, ekirato, “Au na moġoni akiramini, ġomi na au ġovetauguni korana tu mo beredi ġoġanito, benamo ġoġani-maseto, a dia mo vetoġa boruri ġoġitarito nai, ġovetauguni.

27 Ma beġe rakavani ġaniġaniri ġauveiri asi boġono vei, senaġi ġaniġani roġo betanu-iaġoni, beiaġoni mo, maġuri vanaġivanagi, ġauveina boġono vei. Mo ġaniġani tu Tarimarima Natuna na bevinimini, korana Tamana Barau na ġia ġenai vetoġa ta eveiato, mo tu ġia evaġa-moġoniato vetoġana.”

28 Benamo ġedanagiato, ġekirato, “Ġai Barau ġena ura ġauveiri ġaveini baġa toni tu kara baġana veia?”

29 Iesu na evaġa-veserito, ekirato, “Barau ġena ġauveiri ġomi na boġono veia etoni ġauveina tu maiġa moġo: Etuġuato tarimana boġono vaġa-moġonia.”

30 Ĝia na ma ĝedanaĝiato, ĝekirato, “Ĝoi na ĝai ĝema tu kamara vetoĝa boruna boveiani baĝa ĝitaiani, benamo ĝoi baĝa vaĝa-moĝonimuni? Ĝoi na kara boveiani?”

31 Ĝai senema na tu mana ĝeĝaniato tano fakanai, Buka Veaĝa nuĝanai ekirani kavana, maiĝesi ekirani, ‘Ĝia na beredi guba na evini-riĝorito ĝeĝanito.’”

32 Iesu na evaĝa-veserito, ekirato, “Moĝoni veĝata akiramini, dia Mose na mo beredi guba na evinimito. Asiĝi. Au Tamagu na tu moĝoni beredi korikorina guba na evinimini.

33 Korana Barau ĝena beredi tu guba na emariĝoto tarimana. Ĝia na tanobarai ĝetanuni tarimari maĝuri evinirini.”

34 Benamo ĝia na ĝekiraiato, ĝekirato, “Vereĝauka, mani beredi ĝaro mabarari ai bono vinima.”

35 Iesu na ekirarito, ekirato, “Maĝuri beredina tu au maiĝegu. Au ĝegu ai beiaĝomani tarimana tu asi ma bevitoani, ema au bevaĝa-moĝoniguni tarimana tu, bokana asi ma bekokeni.

36 Senaĝi au na ĝomi tu varau akiramito, ĝoĝitaguni, senaĝi asi ĝovaĝa-moĝoniguni.

37 Tamagu na au eviniguto tarimari mabarari tu, au ĝegu ai beĝe iaĝomani, ema deikara au ĝegu ai beĝe iaĝomani tarimari, au na asi balai-ĝenoĝoirini.

38 Korana au guba na amariĝoto tu, dia au ĝegu ura bana veia ĝana, senaĝina au etuĝuguto Barauna ĝena ura bana veia ĝana.

39 Ema au etuĝuguto Barauna ĝena ura tu, au eviniguto tarimari mabarari ta asi bana vei-rekwa rekwaia, a mabarabarari mase na ma bana vaĝa-variĝisi ĝenoĝoiri ĝaro magonai.

40 Korana au Tamagu ĝena ura tu, Natuna beĝe ĝitaiani ema beĝe vaĝa-moĝoniani tarimari mabarari na maĝuri vanaĝivanaĝi beĝe ĝabiani, ma ĝaro dokonai ma bavaĝa-variĝisi ĝenoĝoirini.”

41 Benamo Iuda tarimari ĝemugu-muguto, korana ĝia ekirato, “Au tu guba na amariĝoto beredina.”

42 Benamo ĝekirato, “Mai tarima tu Iesu, Iosefa natuna, nene? Ĝia tamana e sinana tu ĝita ribara. Ma kamara dabarai ĝia tu ekirani, ‘Au tu guba na amariĝoto?’”

43 Iesu na evaĝa-veserito, ekirato, “Ĝomi tauĝemi fakami ai mugumugu ĝovaĝa-dokoa.

44 Au ĝegu ai ta asi beiaĝoma-kavani, senaĝina Tamagu, au etuĝuguto Barauna, ĝia na deikara au ĝegu ai beinu-kaviani tarimana moĝo. Ema au ĝegu ai beiaĝomani tarimana tu, au na ĝaro dokonai mase na bavaĝa-variĝisi ĝenoĝoiani.

45 Peroveta tarimari na maiĝesi ĝetoreato, ‘Ĝia mabarari Barau na bevaĝa-ribarini.’ Tamagu ĝeseĝaĝi-viniani ema ĝenana riba ĝeĝabini tarimari mabarari tu, au ĝegu ai beĝe iaĝomani.

46 Au tu asi akirani, tarima ta na Tamagu eĝitaiato atoni, senaĝi Barau ĝenana eiaĝomato tarimana ĝereĝana na moĝo Tamagu eĝitaiato.

47 Moĝoni akiramini, au evaĝa-moĝoniguni tarimana na maĝuri vanaĝivanaĝi beĝabiani.

48 Maĝuri beredina tu au maiĝegu.

49 Ĝomi senemi na tano fakanai mana ĝeĝanito-ĝoi, senaĝi ma ĝemaseto.

⁵⁰ A guba na emariḡoni beredina tu maiḡea, ḡia beḡaniani tarimana tu asi bemaseni.

⁵¹ Au tu maḡuri beredina guba na amariḡoto. Tarima ta na mai beredi beḡaniani, ḡia tu bemaḡuri-vanaḡi vanaḡini. Mai beredi au na baviniyani tu au viriḡogu. Au viriḡogu havini-fitogaiani korana tu, tanobarai ḡetanuni tarimari na maḡuri beḡene ḡabia ḡana.”

⁵² Mainana Iuda tarimari tauḡeri fakari ai veḡare-veḡare baregona eḡorato, ḡia ḡekirato, “Mai tarima na tu kamara dabarai ḡia viriḡona bevinirani bita ḡaniani?”

⁵³ Iesu na ekirarito, ekirato, “Moḡoni akiramini, bema ḡomi na Tari-marima Natuna viriḡona asi boḡo ḡaniani ema rarana asi boḡo niuani nai, ḡomi nuḡami ai maḡuri asi betanuni.

⁵⁴ Deikara na au viriḡogu beḡaniani ema raragu beniuani tarimana tu, maḡuri vanaḡivanaḡi beḡabiani, ema au na ḡaro dokonai mase na bavaga-varigiḡi ḡenogoiani.

⁵⁵ Korana au viriḡogu tu ḡaniḡani korikorina, ema au raragu maki niuniu dagarana korikorina.

⁵⁶ Deikara au viriḡogu beḡaniani e raragu beniuani tarimana tu, au nuḡagu ai betanuni, ema au maki ḡia nuḡanai batanuni.

⁵⁷ Tamagu maḡurina na etuḡuguto ema au tu ḡia koranai amaḡurini. Moḡa ilailanai au viriḡogu beḡaniani tarimana maki bemaḡurini, korana au amaḡurini.

⁵⁸ Au tu guba na emariḡoto beredina maiḡegu. Ḳomi senemi tu mana ḡeganito ma ḡemaseto. Senaḡi mai beredi beḡaniani tarimana tu bemaḡuri-vanaḡi vanaḡini.”

⁵⁹ Iesu na maiḡeri guruḡa Iuda tarimari rubu ai ekiraḡirito, Kaperanau-mai evevaḡa-ribato-ḡoi nuḡanai.

Maḡuri vanaḡivanaḡi guruḡari

⁶⁰ Iesu ḡena mero ḡutuma na mai guruḡa ḡeseḡaḡiato nai tu, ḡekirato, “Mai vevaḡa-riba guruḡana tu gwaḡiḡi rakava, dei na beḡabi-raḡeani.”

⁶¹ Iesu ribana ḡena mero na mo guruḡa ḡemugumugu-iaḡiato-ḡoi, benamo ekirarito, ekirato, “Mai guruḡa na bevaḡa-daḡa-raḡemi?”

⁶² Bema ḡomi na Tarimarima Natuna boḡo ḡitaiani, beḡenoḡoi-varaḡeni, etanu-iaḡiato gabuna ḡana tu kamasi?

⁶³ Barau Iaukana na maḡuri evinirani; tauḡani na asi bevaḡa-kavarani. Au na avaḡa-guruḡamini guruḡari tu Iauka, ema ḡia nuḡari ai tu maḡuri etanuni.

⁶⁴ Senaḡi ḡomi kotari na tu asi ḡovaḡa-moḡoniguni.” Iesu ribana tovo-tovona na veḡata, deikara ta na tu asi evaḡa-moḡoniato-ḡoi ema deikara na maki ḡia berevaiani.

⁶⁵ Ma ekirato, “Moḡesina naima au na akiramito, ta au ḡegu ai asi beiaḡoma-kavani, senaḡi Tamagu na bevaḡa-moḡoniani tarimana vau beiaḡomani.”

⁶⁶ Mo guruḡa ḡeseḡaḡiato, monana Iesu ḡena mero ḡutuma ḡia ḡenana ḡeraka-veḡitato, ema ḡia ḡesi asi ma ḡerakao-vegogoto-ḡoi.

⁶⁷ Benamo Iesu na ḡena mero gabanana ruarua (12) edanaḡirito, ekirato, “Ḳomi maki ḡourani boḡono raka-veḡita ba?”

⁶⁸ Simona Petero na evaḡa-veseato, ekirato, “Vereḡauka, ḡai tu deikara ḡenai ma baḡa iaḡoni? Maḡuri vanaḡivanaḡi guruḡari tu ḡoi ḡemu ai.

⁶⁹ Ḳai na ḡavaḡa-moḡonimuni ema ḡariba-korikorini, ḡoi tu Barau ḡena Veaḡa Tarimana.”

⁷⁰ Iesu evaḡa-veseto, ekirato, “Au na ḡomi gabanana ruarua (12) aḡabi-
virigimito nene? Senaḡi sebotu ta tu bodiabololo.”

⁷¹ Gia na tu Iudas, Simona Isakariota natuna, ekiraḡiato. Iudas maki
mo mero gabanana ruarua (12) fakari merona ta, senaḡi ḡia na Iesu vau
berevaiani.

7

Iesu ma tarina merori ḡesi

¹ Moḡa murinai Iesu tu Galileai erakaoto-ḡoi. Ġia asi eurato, Iudea ḡana
bene iaḡo, korana Iuda tarimari monai ḡeri ura tu, ḡia beḡene vaḡia.

² Iuda tarimari ḡeri Fouta Verekona ḡarona ekavinagito. (Mai fouta
verekona ḡeveiato-ḡoi nai tu, fouta ḡeragato-ḡoi, benamo nuḡari ai
ḡetanuto-ḡoi, korana seneri tano fakanai fouta nuḡari ai ḡetanuto-ḡoi, moḡa
beḡene tuḡamaḡi-iaḡia ḡana).

³ Benamo Iesu tarina merori na ḡekiraiato, ḡekirato, “Mai gabu noraga-
kwanea, Iudea ḡana bono iaḡo, benamo oveirini dagarari ḡemu mero na
beḡene ḡitari.

⁴ Korana deikara tauḡena bene vevaḡa-fofori etoni tarimana, beḡene
ribaia uranai tu, kara ta asi bevei-vekuretoḡaiani. Ma ḡoi tu maiḡeri veḡa
oveirini, be tanobara mabarari ai novevaḡa-fofori!”

⁵ Korana Iesu tarina mabarari na maki ḡia tu asi ḡevaḡa-moḡoniato-ḡoi.

⁶ Moḡa lorinai Iesu na ekirarito, ekirato, “Au ḡegu ḡaro tu roḡosi bene
raḡasi. A ḡomi ḡemi ai ḡaro mabarari tu loriri ai moḡo.

⁷ Tanobara na ḡomi tu asi ebaru-vinimini, senaḡi au tu ebaru-viniguni,
korana au tu veḡa rakavari eveirini dagarari akiraḡi-foforirini.

⁸ Ġomi boḡono iaḡo mo vereko ḡana. A au tu asi baiaḡoni, korana au ḡegu
ḡaro korikori tu roḡosi roḡo bene raḡasi.”

⁹ Iesu moḡesi ekirato, benamo Galileai etanuto.

Iesu Ierusalemata ai

¹⁰ Iesu tarina merori ḡeiaḡoto mo vereko ḡana, muriri ai Iesu maki ma
eiaḡoto. Senaḡi asi eraka-foforito, a vekuretoḡai eiaḡoto.

¹¹ Mo vereko gabuna Iuda tarimari na tu mo vereko nuḡanai ḡevetauato-
ḡoi, ḡevedanaḡi-vedanaḡito-ḡoi, ḡekirato-ḡoi, “Ġia tu ainai?”

¹² Mo ḡutuma-bara nuḡanai Iesu kiraḡi-ḡairiḡairina tu ebarego-rakavato.
Tarima kotari ḡekirato-ḡoi, “Ġia tu tarima namona” ḡetato. Ma kotari tu
ḡekirato-ḡoi, “Asiḡi, ḡia na tarimarima eḡorikau-darere darererini.”

¹³ Senaḡi tarima ta na asi eguruḡa-iaḡi foforiato, korana ḡia mabarari Iuda
vereri gariri ḡeveito-ḡoi.

¹⁴ Vereko ḡarori kotari ḡekorito, kotari roḡo moḡeri nuḡanai vau, Iesu
Rubu Veḡai eraka-toḡato, benamo evevaḡa-ribato.

¹⁵ Benamo Iuda tarimari ḡeḡaba-vedaureato, ḡekirato, “Mai tarima ve-
vaḡa-riba guruḡari tu kamas eribato, ḡia vevaḡa-riba gabuna ta ḡana riba-
vetau tu asi eiaḡoto.”

¹⁶ Iesu evaḡa-veseto, ekirato, “Kara au avevaḡa-riba iaḡini tu dia au ḡegu
vevaḡa-riba, senaḡi au etuḡuguto Barauna ḡenana ḡeiaḡomani.

¹⁷ Bema tarima ta euranai Barau ḡena ura bene veiri etoni tarimana na,
au ḡegu vevaḡa-riba guruḡari beribarini. Beribani, au ḡegu vevaḡa-riba
guruḡari Barau ḡenana ḡeiaḡomani, o au tauḡegu ḡeguna moḡo.

18 Tarima ta deikara ġena ura guruġari ekiraġini tu, tauġena arana vaġa-raġena dabarana evetauani. Senaġi au etuġuguto Barauna vaġa-raġena dabarana eveiani tarimana ġenai tu, guruġa moġonina etanuni, a ġia ġenai ġofaġofa ta tu asi etanuni.

19 Mose na ġomi taravatu tu evinimito, ene? Senaġi ġomi ta na mo taravatu tu asi ġokorana-iaġiani. Ma karase nai ġomi na au tu ġovaġigu ġotoni?”

20 Mo tarimarima ġutuma ġevaġa-veseto, ġekirato, “Ġoi tu iauka rakavana ta na eboroġimuto. Deikara na nevaġimu otoni?”

21 Iesu na evaġa-veserito, ekirato, “Au na mainai Ierusalemaj veġa boruna sebona aveiato nai, ġomi mabarabarami nuġami ġefarevaġini.

22 Mose na mero tauġaniri kefi-lamavaġi veġana evinimito, moġa lorinai ġomi na mero keiri Sabadi ai maki kefiri ġolama-vaġirini. Mo kefi-lamavaġi veġana tu dia Mose na esinaiato, senaġi ġomi senemi na ġesinaiato.

23 Bema mero tauġaniri kefiri Sabadi ai ġolama-vaġirini Mose ġena taravatu boġo vanaġiani ġesi, kara dainai au tu ġobaru-viniguni, Sabadi ai tarima ta bavaġa-namo ġinikaua nai, ei?

24 Ġomi na dagara tu murikari vetoġari ai asi boġono ġita-viriġiri, senaġi dagara mabarari veġa roroġotori ai boġono ġita-viriġiri.”

Mai tarima tu Keriso ba?

25 Benamo Ierusalemata tarimari kotari ġekirato, “Mai beġene vaġia ġetoni tarimana tu maġa.

26 Ġoġitaia, ġia tu ma guguraġina ġesi eguruġani, ma ta na ġenai guruġa ta asi ekiraġiani. Ba betaġu kanisoro tarimari beġe riba, Keriso korikorina tu maġa.

27 Senaġi Keriso, (Barau na ekiraġi-toreato vevaġa-maġuri tauna), beiaġomani nai, ta asi beribani ġia tu ainana beiaġomani. A mai tarima ainana eiaġomato ġita tu mabarara ma ribara.”

28 Iesu roġo Rubu Veaġai evevaġa-ribato-ġoi nuġanai, eguruġa-baregoto, ekirato, “Moġoni, ġomi ma ribami au tu deikara e ainana aiaġomato. Senaġi au tu dia tauġegu ġegu urai moġo aiaġomato. Au etuġuguto Barauna tu moġoni. Ma ġomi tu asi ribami ġia.

29 Senaġi au ġia tu ma ribaġu, korana au tu ġia ġenana aiaġomato e ġia na etuġuguto.”

30 Benamo ġeġabi-taria ġetato, senaġi tarima ta ġimana ġia ġenai asi evenabakauto, korana ġena ġaro korikori tu roġosi bere votu bene.

31 Senaġi tarimarima vovoka mai ġutuma nuġanai ġia ġevaġa-moġoniato, ġekirato, “Keriso beiaġomani nai, vetoġa boruri veiveiri ai mai tarima bevanagiani ba?”

Nariġau tarimari ġetuġurito Iesu beġene ġabia ġana

32 Farisea tarimari ġeseġaġito, tarimarima ġutuma na mo guruġa Iesu ġenai ġekiraġi-ġairiġairito-ġoi. Moġa ġaramanai Farisea tarimari e Rubu Veaġa vereri baregori na Rubu Veaġa ġitaġauna tarimari kota ġetuġurito, Iesu beġene ġabia ġana.

33 Iesu ekirato, “Au tu ġaro viravira moġo ġomi ġesi bita tanuni, moġa murinai ma baraka-veġitani, etuġuguto Barauna ġenai baiaġoni.

34 Ġomi na boġo vetaġuni, senaġi asi boġo doġariguni; ema au batanuni gabuna ġana, ġomi tu asi boġo iaġoni riba.”

35 Benamo Iuda tarimari tauġeri ġevedanaġito, ġekirato, “Ġia tu aiġana beiaġoni, be ġita na asi bita doġariani riba etoni? Betaġu ġia tu beiaġoni irau

bese tarimari ġeri tanobara ġana, Iuda tarimari ġutuma maki ġia fakari ai ġetanuni gaburi, monai irau bese tarimari bea vaġa-ribarini.

36 Mai tu kamara guruġa ġia na ekiraġiani, ekirani, 'Boġo vetauguni, senaġi asi boġo doġariguni,' ema, 'Au batanuni gabuna ġana ġomi tu asi boġo iaġoni riba?'

Maġuri eviniani nanuna

37 Vereko magona ġarona, mo tu ġaro barego lelevaġina, Iesu eruġa-vaisito, benamo eguruġa-fouto, ekirato, "Deikara nanu na bokana bekokeni tu, au ġegu ai bene iaġoma, nanu benema niu.

38 Buka Veaġa nuġanai ekirani ilailanai, ekirani, 'Au bevaġa-moġoniguni tarimana nuġana na tu maġuri nanuna beġaru-rocini.'

39 Iesu na Iauka moġesi ekiraġiato-ġoi, kamara tarima Iesu ġevaġa-moġoniani tarimari na vau beġe ġabiani. Mo ġaro ai Iauka Veaġa tu Barau na roġosi bere viniri, korana Iesu na Barau ġena mareva baregona maki roġosi bere ġabia nai.

Tarimarima tauġeri ġevetavito

40 Tarima kota mo ġutuma nuġari ai mo guruġa ġeseġaġiato, benamo ġekirato, "Moġoni, ġita na peroveta tarimana tanariani tarimana tu maiġea."

41 Tarima kotari ġekirato, "Mai tu Keriso." Senaġi kotari ġekirato, "Asiġi, Keriso tu Galilea na asi beiaġomani.

42 Buka Veaġa nuġanai ekirani, Keriso tu Davida besena na beiaġomani, ema Betelehemai, Davida etanuto-ġoi vanuġanai, bemaġurini."

43 Moġesina naima tarima tauġeri fakari ai moġo ġevetore-kirato, korana Iesu ġaramanai.

44 Tarima kota ġeurato beġene ġabia, senaġina ta ġimana ġia ġenai asi evenabakauto.

Iuda vereri na Iesu asi ġevaġa-moġoniato

45 Rubu Veaġa ġitaġauna tarimari ġeġenoġoito, benamo Rubu Veaġa vereri baregori ema Farisea tarimari na ġedanagiritto, ġekirato, "Karase nai ġia tu asi boġo ġori-iaġomaia?"

46 Rubu Veaġa ġitaġauna tarimari ġevaġa-veseto, ġekirato, "Mai tarima eguruġani kavana, ta roġosi bene guruġa."

47 Benamo Farisea tarimari na ġekirarito, ġekirato, "Be, ġomi maki ġia na beġofami?"

48 Veġorikau tarimana ta o Farisea tarimana ta na ġia evaġa-moġoniani ba? Asigina!

49 A mai tarimarima na ġevaġa-moġoniani, ġia tu Mose ġena taravatu asi ribari tarimari. Barau na ġeri rakava voiri bevinirini."

50 Farisea tarimana ta monai arana Nikodemo. Ġia tu boġi ta eiaġoto Iesu ea ġitaiato tarimana. Ġia na ekirarito, ekirato,

51 "Ġita ġera taravatu ekirani, tarima tu ġena guruġa ġeseġaġi-guineani roġo, moġa murinai vau ġena rakava voina metona beġe viniani."

52 Ġia na ġevaġa-veseto, ġekirato, "Goi maki Galilea tarimamu ba? Buka Veaġa nuġana bono vetaua, monana boribani, peroveta tarimana ta Galilea na tu asi beiaġomani."

[53 Benamo tarimarima mabarari ġeri numa ġana ġeiaġoto.

8

Veğura-vanaği vavinena

1 Senaği Iesu tu Olive Ğorona ġana eiağoto.

2 Ma elağanito bogiboği iamoiamo tu ġia ma eġenoġoito Rubu Veaġa ġana. Monai tarimarima mabarari ġeiaġomato ġenai, ġetanu-ġeġeraġiato, benamo etanu-tarito, evaġa-ribarito.

3 Benamo taravatu ġevevaġa-riba iaġirito-ġoi tarimari e Farisea tarimari na vavine ta Iesu ġenai ġeġori-iaġoato. Mo vavine tu eveġura-vanaġito-ġoi nuġanai ġedoġariato, benamo ġeġori-iaġoato mo, Iesu ġesi ġetanu-taġoto-ġoi tarimari mabarari ġoirari ai ġea vaġa-ritoġoato.

4 Iesu ġekiraiato, ġekirato, "Vevaġa-riba tarimamu, mai vavine tu eveġura-vanaġini-ġoi nuġanai beġe ġoitaġoa.

5 Ma Mose ġena taravatu ekirani, moġesi beġe veini vavineri tu, fore na baġana taki-maseri. Ğoi tu kara mani otoni?"

6 Moġesi ġekirato tu, Iesu ġeriba-ġaniato, beġene vaġa-daġaia ġana. Senaği Iesu etutuġu-tarito, tano ai didina ta na etoretoreto.

7 Ğia na roġo Iesu ġedanāġiato-ġoi nai, eruġa-vaisito, benamo ekirarito, ekirato, "Deikara ġomi fakami ai roġosi roġo bene vei-rakava nai tu, ġia na fore bene ġabia, mai vavine bene ġidara-guinea."

8 Benamo Iesu ma etoġa-tarito, tano ai ma etoretoreto.

9 Ğia na mo guruġa ġeseġaġiato nai, ġia tata nuġari ai ġeribato ma ġeri vei-rakava, benamo irau sebori-sebori ġerakaraka-veġitato; tau ġaukari ġeraka-quineto murinai vau ġuru-ġabi ma ġerakato. Iesu ġereġana moġo etanuto, monai roġo eruġa-taġoto-ġoi vavinena ġesi.

10 Ğia eruġa-vaisito nai tu, tarima ta asi eġitaiato, mo vavine moġo, benamo edanaġiato, ekirato, "Ğoi beġe vaġa-daġamu tarimari tu aiġeri? Ta na ġemu rakava voina metona asi bevinimu?"

11 Mo vavine evaġa-veseto, ekirato, "Vereġauka, sebona ta maki asiġina." Benamo Iesu ekirato, "Au na maki ġemu rakava voina metona asi bavini-muni. Noiaġo, senaği asi ma bono vei-rakava ġenoġoi."]

Iesu tanobara mamana

12 Benamo Iesu na tarimarima ma eġobata-vinirito, ekirato, "Au tu tanobara mamana. Deikara au murigu ai berakani tarimana tu, mukunai asi berakani, senaği maġuri mamana beġabiani."

13 Farisea tarimari na ġekiraiato, ġekirato, "Ğoi tu tauġemu ovekirāġini; be ġoi ġemu vekiraġi tu asi moġoni."

14 Iesu evaġa-veseto, ekirato, "Asiġi, au tauġegu avekirāġini, senaġina au na kara akiraġiani tu moġoni. Korana au ribaġu ainana aiaġomato ema aiġana ma baiāġoni. A ġomi tu asi ribami au ainana aiaġomato ema aiġana ma aiaġoni.

15 Ğomi tu tarimarima ġeri vevaġa-maoro dabaranai ġovevaġa-maoroni. Au na ta tu asi avaġa-maoroani.

16 Senaği bema au havevaġa-maoroni nai, ġegu vevaġa-maoro tu moġoni. Korana au tu dia ġereġaġu moġo avevaġa-maoroni, senaġina Tamagu, au etuġuguto Barauna, au ġesi baġa vevaġa-maoroni.

17 Ğomi ġemi taravatu ai maki maiġesi ekirani, tarima ruarua na guruġa sebona moġo ġekiraġiani nai tu moġoni.

18 Au tu tauġegu avekirāġini; ema Tamagu, etuġuguto Barauna, na maki au ekiraġiguni.

19 Benamo ġia na ġedanagiato, ġekirato, “Ġoi tamamu tu ainai?” Iesu evaġa-veseto, ekirato, “Ġomi tu asi ribami au, ma Tamagu maki asi ribami. Bema au boġoro ribagu tu, Tamagu maki ġoro ribaia.”

20 Iesu na mai ġena guruġa tu Rubu Veaġai evevaġa-ribato-ġoi, moni ġevaġa-vegogoto-ġoi mauġana gabunai. Tarima ta asi evenabakauto ġenai, korana ġia ġena ġaro roġosi bere votu.

Au baiaġoni gabuna ġana ġomi tu asi boġo iaġoni riba

21 Iesu na ma evaġa-guruġa ġenogoirito, ekirato, “Au tu araka-veġitani. Ma ġomi na boġo vetauguni, senaġi ġemi vei-rakava nuġanai boġo maseni. Au baiaġoni gabuna ġana, ġomi tu asi boġo iaġoni riba.”

22 Benamo Iuda tarimari ġekirato, “Ġia bekira, ġia beiaġoni gabuna ġana ġita tu asi bita iaġoni. Moġa tauna ġia tu tauġena bevevaġini ba?”

23 Iesu evaġa-veseto, ekirato, “Ġomi tu mai tanobara maiġa mainana eveimito, senaġi au tu tuġuna na amariġoto. Ġomi tu mai tanobara tarimari, senaġi au tu dia mai tanobara tarimagu.

24 Moġa lorinai au na ġomi bakirami, ġemi rakavai boġo maseni. Korana bema au, Keriso, asi boġo vaġa-moġoniguni nai tu, ġemi rakavai boġo maseni.”

25 Benamo ġia na ġedanagiato, ġekirato, “Ġoi tu deikara?” Iesu na ma evaġa-veserito, ekirato, “Tovotovonai veġata ġemi akiraġito-ġoi kavana.

26 Guruġa vovoka bara kiraġiri ema bara vevaġa-maoro vinimi, korana ġemi veiġa lorinai. Senaġina sebona moġo, au etuġuguto Barauna tu moġoni, ma ġia ġenana aseġagito guruġari tanobarai ġetanuni tarimari akira-vararini.”

27 Ġia tu asi ġetuġamaġi-fakato Iesu na mo tu Tamana ekiraġiato-ġoi.

28 Benamo ma ekirarito, ekirato, “Ġomi na Tarimarima Natuna ġau ġesi boġo ġabi-vaisioni murinai vau, boġo ribani au tu Keriso. Benamo boġo ribani, au ġereġagu na kara ta ġegu urai moġo asi aveiani, senaġi Tamagu na au kara evaġa-ribaguni guruġari moġo, au na ġomi akira-varamini.

29 Ema au etuġuguto Barauna tu au ġesi, au asi eraga-kwaneguni; korana au na vanaġi-vanaġi tu ġia na eiaku-iaġirini veiġari moġo aveirini.”

30 Tarima vovoka na Iesu ġevaġa-moġoniato, maiġeri guruġa ekiraġirito-ġoi nai.

Aberhamo natuna

31 Benamo Iesu na mo Iuda tarimari, ġia ġevaġa-moġoniato tarimari, ekirarito, ekirato, “Bema ġomi na au ġegu vevaġa-riba guruġari boġo korana-iaġirini nai, ġomi tu moġoni au ġegu mero korikori.

32 Benamo guruġa moġonina boġo ribaiani, ma mo guruġa moġonina na beruġa-vaġimini, dagara ta na asi ma bebarubarumini.”

33 Ġia ġevaġa-veseto, ġekirato, “Ġai tu Aberhamo garakana ema ġai tu tarima ta ġena tuġu-rakaorakao tarimanai tu asi ġaiġoto. Ma ġoi kamasi nai tu okirani, ‘Guruġa moġonina na beruġa-vaġimini?’”

34 Iesu na evaġa-guruġarito, ekirato, “Akira-korikorimini, deikara rakava eveini, ġia tu vei-rakava ġena tuġu-rakaorakao tarimana.

35 Tuġu-rakaorakao tarimana tu numai asi betanu-vanaġi vanaġini, senaġi numata tarimana natuna tu numai betanu-vanaġi vanaġini.

36 Moġa lorinai bema Barau Natuna na beruġa-vaġimini nai, ġomi tu boġo raka-vaġi korikorini, dagara ta na asi ma bebarubarumini.

37 Au ribagu ġomi tu Aberahamo garakana, senaġi ġomi ġourani, au tu boġono vaġigu, korana ġomi na ġegu vevaġa-riba guruġari tu, asiġina ġinavaġi moġo ġoġabi-raġerini.

38 Au na tu kara Tamagu ġenai aġitarito dagarari ġomi akira-varamini, a ġomi tu tamami ġenana ġoseġaġito dagarari ġomi na ġoveirini.”

39 Ġia na Iesu ma ġevaġa-veseato, ġekirato, “Ġai tamama tu Aberahamo.” Iesu na evaġa-veserito, ekirato, “Bema ġomi moġoni Aberahamo natuna nai, ġia na eveirito veġari ġomi na maki ġoro veiri.

40 Au tu Barau ġenana aseġaġirito guruġari moġoniri mabarari ġomi akira-varamini, senaġi ġomi ġourani tu, au ġovaġigu ġotoni. Aberahamo moġesi asi eveito.

41 Gomi tu tauġemi tamami, (Diabolo), na kara eveini veġana ġoveiani.” Ġia ġevaġa-veseto, ġekirato, “Ġai tu dia kuġa-gara tarimama. Ġai Tamama tu Barau moġo ġereġana.”

Diabolo natuna

42 Iesu na ekirarito, ekirato, “Bema Barau moġoni ġomi Tamami nai tu, au ġoro ura-vinigu. Korana au tu Barau sevina na aiaġomato. Au ġegu urai asi aiaġomato, senaġi ġia na etuġuguto.

43 Karase nai au na kara akiraġiani guruġana asi ġotuġa-maġi-fakani? Korana au ġegu guruġa tu asi ilaila boġo seġaġirini.

44 Ġomi tu tamami Diabolo ġena tarimarima, be ġomi ġourani tu tamami na euravini-rakavarini veġari boġono veiri. Tovotovona na veġata ġia tu vevaġi-deba tarimana ema guruġa moġonina tu asi ekorana-iaġiani, korana ġia nuġanai guruġa moġonina ta tu asi etanuni. Ġia eġofaġofani, moġa tu ġia ġena maġuri korikori. Korana ġia tu ġofaġofa tarimana, ema ġofaġofa mabarari tamari.

45 Senaġi au na ġomi tu guruġa moġonina akira-varamini, nuġanai ġomi na au tu asi ġovaġa-moġoniguni.

46 Ġomi ta na au ġegu ai vei-rakava ta bodoġaria ba? A bema au na guruġa moġonina akiraġiani nai, kara dainai au tu asi ġovaġa-moġoniguni, ei?

47 Barau natuna na Barau ġena guruġa beseġaġiani. A ġomi tu dia Barau natuna, moġa lorinai asi ġoseġaġini.”

Iesu ema Aberahamo

48 Benamo Iuda tarimari na Iesu ġekiraiato, ġekirato, “Ġai tu moġoni ġamaoroni. Ġoi tu Samaria tarimamu ema iauka rakavana na beboroġimu.”

49 Iesu evaġa-veseto, ekirato, “Au tu iauka rakavana na asi beboroġigu. Au tu Tamagu agubakauani, senaġi ġomi na au tu asi ġogubakauguni.

50 Au tauġegu aragu vaġa-raġena dabarana asi avetauani; senaġi tarima ta na evetauani, ma ġia tu Kota eseġaġini tarimana.

51 Moġoni veġata, akiramini, au ġegu guruġa bekorana-iaġirini tarimana tu asi bemaseni.”

52 Iuda tarimari ġekirato, “Ġai toma baġa riba-ginikau, ġoi tu iauka rakavana na eboroġimuto. Aberahamo emaseto, peroveta tarimari maki ġemaseto, a ġoi okirani, deikara na ġoi ġemu guruġa bekorana-iaġirini tarimana tu asi bemaseni.

53 Ġai tamama Aberahamo emaseto. Ġoi na ġia, tamama Aberahamo, ovanagiato, ei? Ġia emaseto ema peroveta tarimari maki ġemase-ġosito. Ġoi otuġamaġini, ġoi tu deikara?”

⁵⁴ Iesu evaḡa-veseto, ekirato, “Bema au tauḡegu bara vevaḡa-raḡe, ḡegu vevaḡa-raḡe tu asi tauna. Senaḡina au tu Tamagu na evaḡa-raḡeguni. Ma ḡia tu ḡomi na ḡokiraḡiani, ḡokirani, ḡomi ḡemi Barau ḡotoni.

⁵⁵ Ḳomi tu asi ribami ḡia, senaḡi au tu ma ribagu ḡia. Bema au bara kira, au asi ribagu ḡia, au tu ḡofaḡofa tarimagu ḡomi kavana, senaḡi au ma ribagu ḡia ema ḡena guruḡa akorana-iaḡirini.

⁵⁶ Ḳomi tamami Aberahamo etuḡa-maḡito, au ḡegu iaḡoma ḡarona beḡitaiani etato, benamo eiakuto. Eḡitaiato, benamo iauna enamoto.”

⁵⁷ Iuda tarimari na Iesu ḡekiraiato, ḡekirato, “Ḳoi ḡemu maḡuri laḡaniri tu gabana imaima (50) maki roḡosi bene doḡaria, ma kamasi tu Aberahamo oḡitaiato otoni?”

⁵⁸ Iesu na evaḡa-veserito, ekirato, “Moḡoni akiramini, Aberahamo roḡosi roḡo bere ḡora veḡata, au tu atanuto-ḡoi.”

⁵⁹ Benamo fore ḡegabito, ḡetakia ḡetato, senaḡi Iesu egumuto, benamo vekaravari na Rubu Veaḡa na eraka-rosito.

9

Iesu na mata-bubu tarimana evaḡa-namoato

¹ Iesu eraka-vanaḡito-ḡoi nuḡanai, tarima ta eḡitaiato. Mo tarima tu mata-bubu emaḡurito.

² Ḳena mero na Iesu ḡedanaḡiato, ḡekirato, “Vevaḡa-riba tarimamu, deikara evei-rakavato, benamo mai tarima matana bubu emaḡurito? Ḳia ba tamana sinana?”

³ Iesu evaḡa-veseto, ekirato, “Dia ḡia ḡena rakava o dia tamana sinana ḡeri rakava dainai, senaḡi maiḡesi evetoreto korana tu, Barau ḡena seḡuka ḡia ḡenana bene fofori ḡana.

⁴ Au etuḡuguto Barauna ḡena ḡauvei tu laḡani nuḡanai bisini veiri. Boḡi mani eiaḡomani, ma ta asi beḡauveini riba.

⁵ Au roḡo tanobarai atanuni nuḡanai, au tu tanobara mamana.”

⁶ Mai guruḡa ekiraḡiato murinai, Iesu tano ai ekanunuto. Kanununa na nigo emoḡeato, benamo mo nigo na mata-bubu tarimana matana eianaiato.

⁷ Ma ekiraiato, ekirato, “Noiaḡo, ḡoiramu Siloam kounai noa gurigia.” Siloam anina tu “Barau na etuḡuato tarimana.” Benamo eiaḡoto, ḡoirana ea ḡurigiato, ma eḡenoḡoito nai, matana tu varau eiaḡaiato.

⁸ Ḳia sevina tarimari e vanaḡi-vanaḡi enoḡinoḡito-ḡoi gabunai ḡeḡitaiato-ḡoi tarimari ḡevedanaḡito, ḡekirato, “Mai tarima tu noḡinoḡi gabunai etanu-taḡoto-ḡoi tarimana ene?”

⁹ Kota ḡekirato, “Tarimana tu maniḡa.” Senaḡi kota ḡekirato, “Asiḡina, mani tu tarima boruna ta, senaḡina ḡitaḡitana mogo ḡia kavana.” Benamo ḡia tauḡena ekirato, “Tarimana tu au maiḡegu.”

¹⁰ Tarimarima ḡekirato, “Be ḡoi matamu tu kamasi boiaḡaia?”

¹¹ Ḳia evaḡa-veseto, ekirato, “Mo tarima arana Iesu, ḡia na nigo bemoḡea, ma au matagu ai beianaia, benamo bekiragu, ‘Siloam kounai noa gurigia.’ Baiḡo, baḡurigia, benamo matagu baiḡaia.”

¹² Ma ḡedanaḡiato, ḡekirato, “Tarimana tu aiḡa?” Ḳia evaḡa-veseto, ekirato, “Au asi ribagu.”

Farisea tarimari na mo enamoto tarimana ḡevedanaḡi-iaḡiato

13 Benamo matana enamoto tarimana Farisea tarimari ġeri ai ġeġori-iaġoato.

14 Mo ġaro Iesu na nigo emoġeato, ma mata-bubu tarimana matana evaġa-namoato tu Sabadi ġarona.

15 Moġa lorinai Farisea tarimari na ma ġedanaġi-ġenoġoiato, kamasi matana eiaġaiato. Ġia na ekirarito, ekirato, “Mo tarima na matagu nigo na eianaiato, benamo ġoiragu aġuriġiato, ma toma tu aboġeboġeni.”

16 Farisea tarimari kotari ġekirato, “Mai tarima tu dia Barau ġenana eiaġomato, korana ġia na Sabadi asi ekorana-iaġiani.” Ma kotari ġekirato, “Vei-rakava tarimari na moġesina veiġari tu kamasi beġe veirini?” Monana ġia tauġeri fakari ai ġevetavi-kirato.

17 Benamo Farisea tarimari na mo tarima ma ġedanaġiato, ġekirato, “Ġoi okirani ġia na matamu bevaġa-iaġaia otoni? Ġoi na ġia tu kamasi oġitaiani?” Ġia evaġa-veseto, ekirato, “Ġia tu peroveta tarimana.”

18 Iuda tarimari na mai tarima ġena guruġa asi ġevaġa-moġoniatu, korana ekirato, “Tovotovonai au matagu tu bubu, a mai vau aboġeboġe-ġinikauni.” Moġa lorinai tamana e sinana ġekea-iaġomarito.

19 Benamo ġia na ġedanaġirito, ġekirato, “Mai tu ġomi natumi ba? Ma moġoni ġia tu mata-bubu emagurito ġotoni? Ma kamasi nai tu vau mai ma eboġe-boġeni?”

20 Benamo tamana e sinana ġevaġa-veseto, ġekirato, “Ġai ribama, ġia tu ġai natuma, ema ġai ribama maki, ġia tu mata-bubu emagurito.

21 Senaġi ġai tu asi ribama, maitoma tu kamara dabarai eboġeboġeni. Ġai maki asi ribama, dei na matana bevaġa-namoa. Ġodanaġia, ġia tu mero barego, be tauġena bevaġa-veseni.”

22 Tamana e sinana moġesi ġekirato, korana Iuda tarimari gariri ġeveito nai. Korana Iuda tarimari na ġevaġa-moġoniatu, tarima ta na Iesu bekiraġiani Keriso betoni tarimana tu, rubu na beġe tore-veġitaiani.

23 Moġesi naima tamana e sinana ġekirato, “Ġia mero barego, be ġodanaġia,” ġetato.

24 Matana enamoto tarimana ma ġekea-ġenoġoiato, benamo ġekiraiato, ġekirato, “Barau novaġa-raġea, be noguruġa-korikori. Ġai ribama, ġoi matamu bevaġa-namoa tarimana tu vei-rakava tarimana.”

25 Matana enamoto tarimana evaġa-veseto, ekirato, “Au asi ribagu, ġia tu vei-rakava tarimana ba asiġi. Dagara sebna moġo ma ribagu: Au matagu tu bubu, senaġi toma tu aboġeboġeni.”

26 Ġia na ġekiraiato, ġekirato, “Mo tarima tu kara eveiato ġoi ġemu ai? Ġoi matamu bubu na tu kamasi evaġa-fafaiaato?”

27 Ġia evaġa-veseto, ekirato, “Au na ġomi tu varau bakira-varami, senaġi ġomi asi ġoseġaġini. Karase nai ġourani ma ġoseġaġi-ġenoġoi ġotoni? Ġomi maki ġia ġena mero ai boġono iaġo ġotoni ba?”

28 Benamo ġia na ġeguruġa-gwaġiġi viniato, ġekirato, “Ġoi neġi ġia ġena mero, ġai tu Mose ġena mero.

29 Ġai ribama Barau na Mose evaġa-guruġaiaato. A mani tarima, ġai asi ribama ġia tu ainana eiaġomato!”

30 Matana enamoto tarimana evaġa-veseto, ekirato, “Ia, ġomi tu kamasi ma ġoguruġani, ma ġokirani ġomi tu asi ribami ġia tu ainana eiaġomato ġotoni? Senaġina ġoġitaia, ġia na tu au matagu bevaġa-namoa.

³¹ Ĝita ma ribara, Barau na vei-rakava tarimari tu asi eseĝaĝi-vinirini, a deikara na ĝia ĝekorana-iaĝiani e ĝena ura veigari ĝeveirini tarimari, ĝia na tu eseĝaĝi-vinirini.

³² Tanobara evesinato na veĝata tarima ta roĝosi tara seĝaĝi, tarima ta mata-bubu eĝorato tarimana matana evaĝa-iaĝaĭato.

³³ Bema mai tarima Barau ĝenana asi bere iaĝoma, ĝia na dagara ta asi bere veia riba.”

³⁴ Ĝia ĝevaĝa-veseto, ĝekirato, “Ĝoi tu omaĝurito veĝata na rakava tarimamu, ma kamasi tu ĝai novaĝa-ribama otoni?” Benamo rubu nuĝana na ĝelai-rosiato.

Farisea tarimari ĝeri mata-bubu

³⁵ Iesu eseĝaĝito, matana enamoto tarimana tu ĝelai-rosiato, benamo tarimana edoĝariato nai tu, ekiraiato, ekirato, “Tarimarima Natuna ovaĝa-moĝoniani ba, ei?”

³⁶ Mo tarima evaĝa-veseto, ekirato, “Vereĝauka, ĝia tu dei? Nokira-varagu, be bana vaĝa-moĝonia.”

³⁷ Iesu na ekiraiato, ekirato, “Tarimana tu varau oĝitaiani maĭga, ĝoi inıtoma ĝia ĝesi ĝoguruĝa-guruĝani.”

³⁸ Benamo matana enamoto tarimana ekirato, “Vereĝauka, avaĝa-moĝonimuni.” Benamo evetui-tarito, Iesu etoma-rakarigo viniato.

³⁹ Iesu ekirato, “Au tu vevaĝa-kota uranai mai tanobara ĝana aiaĝomato, mata-bubu tarimari beĝene boĝeboĝe ĝana, ema ĝeboĝeboĝeni tarimari matari beĝene bubu ĝana.”

⁴⁰ Farisea tarimari kota monai ĝia ĝesi, mai guruĝa ĝeseĝaĝiato, benamo ĝekiraiato, ĝekirato, “Ĝoi okirani, ĝai tu mata-bubu otoni?”

⁴¹ Iesu evaĝa-veseto, ekirato, “Bema ĝomi mata-bubu nai tu, ĝomi asi ĝemi rakava ĝoro tanu, senaĝi ĝomi ĝokirani ‘Ĝai matama tu iaĝataĝo’ ĝotoni, naima ĝomi ĝemi rakava tu roĝo iatami ai.”

10

Mamoe narinariri tarimana

¹ Iesu ekirato, “Moĝoni, au na ĝomi akira-korikorimini, mamoe maĝuna ĝatama bokana na asi beraka-toĝani, senaĝi dabara ta na befaĝa-seĝini tarimana tu lema e verari-verari tarimana.

² A mamoe ĝitaĝauri tarimana tu ĝatama-boka na beraka-toĝani.

³ Ĝatama-boka narinarina tarimana na ĝena ĝatama-boka bekeoani, benamo mamoe na ĝia garona ĝeseĝaĝiani. Ĝia na ĝena mamoe arari evatorini, benamo eĝori-rosirini.

⁴ Ĝena mamoe mabarari eĝori-rosirini, benamo ĝia ĝoirari ai erakani, ma ĝena mamoe ĝia murinai ĝerakakauni, korana mamoe ma ribari ĝia garona.

⁵ A tarima boruna ta murina na tu asi beĝe iaĝoni, asiĝina ĝinavaĝi; tarima boruna ĝenana tu beĝe raga-kwareĝani, korana ĝia garona mamoe tu asi ribari.”

⁶ Iesu na mo barabore ekira-vararito, senaĝi ĝia tu asi ĝetuĝamaĝi-fakato.

Iesu tu mamoe ĝitaĝauri tarimana namona

⁷ Benamo Iesu na ma ekirarito, ekirato, “Au na moĝoni akiramini. Au tu mamoe ĝeri ĝatama-boka.

⁸ Ğeiaġoma-guineto tarimari mabarari tu lema e verari-verari tarimari. A mamoe na garori asi ġeseġaġirito.

⁹ Au tu ġatama-boka. Deikara au ġeguna beraka-toġani tarimana tu bemaġurini. Beraka-toġani, beraka-rosini, ema ġaniġani beġoitagōni.

¹⁰ Lema tarimana tu asi beiaġoma-kavani. Senaġi ġia tu lema beiaġomani, vaġivaġi beiaġomani, vevaġa-rakava kwaikwai beiaġomani. A au aiaġomato tu, maġuri beġene ġabia, ema maġuri na beġene vonuvonu-raġe ġana.

¹¹ Au tu mamoe ġitaġauri tarimagu namona. Mamoe narinariri tarimana namona tu ġena maġuri etore-tariani mamoe urari ai.

¹² Ġauvei tarimana ġevoiani vau mamoe eġitaġauni tarimana, ġia tu dia mamoe ġitaġauri tarimana korikori, ema ġia tu dia mamoe biagunari. Moġa lorinaġ boġa kwaivana rakavana eiaġomani beġitaiani nai, mamoe beiaġuirini ma beraga-kwareġani. Benamo boġa kwaivana rakavana na beġabi-taririni, benamo bevaġa-gari lausirini.

¹³ Ma voina tarimana eraga-kwareġani, korana ġia tu vetuġunaġi tarimana ma voina, ema mamoe maki asi etuġamaġi-kaurini.

¹⁴ Au tu mamoe narinariri tarimagu namona. Ġegu mamoe ribagu e ġegu mamoe maki ma ribari au.

¹⁵ Vaġa-ilailana Tamagu ribana au e au maki ribagu Tamagu kavana. Ema ġegu maġuri maki atore-tariani ġia urari ai.

¹⁶ Au ma ġegu mamoe irauri kotari ġetanuni. Senaġi ġia mai seri nuġanaġi tu asi tauri roġo. Au na ġia maki baġori-iaġomarini. Ġia na au garogu beġe seġaġiani, ema ġia maki mai seri sebonai beġe iaġoni e ġitaġauri tarimana maki sebona.

¹⁷ Tamagu na eura-viniguni, korana ġegu maġuri tu atore-tariani, ema ma baġabi-ġenoġoiani.

¹⁸ Tarima ta na au ġegu maġuri asi beġabi-vaġiani au ġeguna. Au tauġegu ġegu urai atore-tariani. Au tu ma ġegu seġuka batore-tariani, ema ma ġegu seġuka baġabi-ġenoġoiani. Moġa tu au Tamagu na ekiraguto bana veia.”

¹⁹ Mai guruġa ġaramanai Iuda tarimari tauġeri vekaravari ai moġo ma ġevvarekira-ġenoġoito.

²⁰ Tarima vovoka ġekirato, “Ġia tu iauka rakavana na beboroġia, be bebabo. Karase nai ġia ġoseġaġi-viniani?”

²¹ Senaġi tarima kotari ġekirato, “Tarima ta iauka rakavana na beboroġiani nai tu, maiġesi asi beġeruġani. Iauka rakavana na mata-bubu tarimari matari tu kamasi bevaġa-fafarini?”

Iuda tarimari na Iesu ġebaru-viniato

²² Monai Rubu Veaġa Vaġa-veaġana Verekona Ierusalemaj ġarona eġabiato. Mo tu faraka ġueri nuġanaġi.

²³ Ma Iesu tu Rubu Veaġi Solomona ġena touraġe na eraka-iaġoto-ġoi.

²⁴ Benamo Iuda tarimari na ġeruġa-ġeġeraġiato, benamo ġedanaġiato, ġekirato, “Ġai tu roġo ġadaradarani. Aitoma vau bokira-varamani, ġoi tu deikara? Bema ġoi moġoni Keriso, (Barau na ekiraġi-toreato vevaġa-maġuri tauna), nai tu, ġemai novekiraġi-fofori ginikau.”

²⁵ Iesu na evaġa-veserito, ekirato, “Au na tu varau akiramito, senaġina asi ġovaġa-moġoniguni. Au Tamagu aranai aveirini veiġari na tu au ġevaġa-foforiguni.

²⁶ Senaġi ġomi na asi ġovaġa-moġoniguni, korana ġomi tu dia au ġegu mamoe.

27 Au ġegu mamoe na tu au garogu ġeseġaġiani. Ema au ribagu ġia, ema ġia tu au murigu ai ġerakani.

28 Benamo au na maġuri vanaġivanaġi avinirini, ema ġia tu asiġina ġinavaġi beġe maseni; ema ta na au ġeguna asi beġabi-ġerevaġirini.

29 Ġia tu au Tamagu na au eviniguto, e au Tamagu tu iaru-korokoro, ta na asi bevanaġiani. Ema ta na maki asi ilaila ġia ġena veġitaġau seġukana ġenana beġabi-ġerevaġirini.

30 Au ema au Tamagu tu sebona moġo.”

31 Benamo Iuda tarimari fore ma ġeġabito, ġetakia ġetato.

32 Iesu na ekirarito, ekirato, “Veġa namori vovoka ġomi ġoirami ai aveirito. Mo veġa mabarari tu au Tamagu na eviniguto bana veiri etato. Moġeri veġa mabarari fakari ai tu, kamara veġa ġaramanai ġourani au ġotakigu ġotoni?”

33 Iuda tarimari ġekirato, “Veġa namona ta ġaramanai ġoi tu asi ġatakimuni, senaġi ġoi na Barau okira-fitogaiiani nai. Goi tu tarimarima moġo, senaġi taugemu Barau ai ovevaġa-iaġoni.”

34 Iesu na evaġa-veserito, ekirato, “Ġomi ġemi taravatu nuġanai guruġa ta tu maġesi ekirani, ‘Au akirato, ġomi tu barau.’

35 Ġita ma ribara, kara Buka Veaġai ekiraġiani guruġana tu etanu-vanaġi vanagini. Barau na mo tarimarima ekiraġirito ‘barau’, ma Barau na ġena guruġa evinirito tarimari tu ġia.

36 A au tu Tamagu na eġabi-viriġiguto, ema etuġuguto tanobara ġana; ma kamasi nai tu ġokiraguni, ġokirani, au na Barau akira-fitogaiiani, korana au akirani, ‘Au tu Barau Natuna’ atoni ei?

37 Bema au Tamagu ġena veġa asi aveirini nai, asi boġono vaġa-moġonigu.

38 Senaġi ġena veġa aveirini nai, mo veġa boġono vaġa-moġoniri, bema au asi boġono vaġa-moġonigu ġotoni tu. Boġono riba ema boġono vaġa-moġonia, Tamagu tu au nuġagu ai etanuni, ema au maki Tamagu nuġanai atanuni.”

39 Mo guruġa ġaramanai ġeurato, Iesu ma ġeġabi-taria ġetato, senaġina ġimari na moġo ma eveġabi-vaġito, erakato.

40 Benamo monana Iesu ma eġenoġoito. Eraka-iaġoto, Ioridana ġarukana eraka-vanaġito, eiaġoto reke ta kefo, guinenai Ioane ebatisoto-ġoi gabuna ġana; monai ea tanuto.

41 Tarima vovoka ġia ġenai ġeiaġoto, benamo ġekirato, “Ioane na vetoġa boruna ta asi eveiato, senaġi mai tarima guruġana ekiraġirito guruġari mabarari tu moġoni veġata.”

42 Monai tarima vovoka Iesu ġevaġa-moġoniato.

11

Lasaro ġena mase

1 Betania tarimana ta arana Lasaro ekeveto. Betania tu Maria ma tobana ġuiatona Mareta ġeri vanuġa.

2 Mai Maria maġa mainana Vereġauka muramura bonana namo vedau-reana na edioroato, ema Vereġauka kwakuna maki ġuina na edau-kaukauato ġuiatona. Lasaro tu Maria tobana futuana.

3 Benamo mai ġuiato ruarua na Iesu ġena guruġa ġetuġuto, ġekirato, “Vereġauka, ġoi na oura-viniani tarimana tu bekeve.”

4 Iesu na mo vari eseḡaḡiato nai tu, ekirato, “Mani keve na tu asi beveimaseani. Mani tu Barau ḡena seḡuka e mareva baregona bene fofori ḡana. Ema maniḡa ḡenana Barau Natuna beḡene vaḡa-raḡea.”

5 Iesu na Mareta ma tarina ḡuiatona Maria ema Lasaro tu eura-viniritoḡoi.

6 Senaḡi Lasaro ḡena keve varina eseḡaḡiato tu, ḡaro ruarua roḡo ma etanuto, mo etanuto-ḡoi gabunai.

7 Mo ḡaro ruarua muriri ai ḡena mero evaḡa-guruḡarito, ekirato, “Ḡita tu ma siḡenoḡoi-iaḡo Iudea ḡana.”

8 Ḡena mero na ḡekiraiato, ḡekirato, “Vevaḡa-riba tarimamu, ini ḡoraḡani Iuda tarimari na tu fore na ḡetakimu ḡetato, a toma tu siḡenoḡoi-iaḡo ma otoni.”

9 Iesu na evaḡa-veserito, ekirato, “Ḡaro ta nuḡanai horaḡauna mabarana tu 12 ene? Bema tarima ta laḡani mamanai erakani nai tu, asi bevefutu-naḡini, korana ḡia tu mai tanobara laḡani mamanai eboḡeboḡeni.

10 Senaḡi mukunai erakani tarimana tu evekaḡe-kaḡekauni, korana ḡia nuḡanai mama tu asi etanuni.”

11 Iesu maiḡesi evaḡa-guruḡa-ḡosirito murinai, ma ekirarito, ekirato, “Ḡita ḡatara Lasaro tu egenani, senaḡi au tu aiḡoḡoni, ḡena na navaḡo-tataḡaia ḡana.”

12 Benamo ḡena mero ḡekirato, “Vereḡauka, bema egenani nai tu, vau ma benamoni.”

13 Senaḡina Iesu na mo tu emaseto ekiraḡiato-ḡoi. A ḡena mero mataboru ḡekirato-ḡoi tu, eiḡaraḡini nai egena-maseto ekiraḡiani, ḡetato-ḡoi.

14 Benamo Iesu na ekiravara-ḡinikaurito, ekirato, “Lasaro tu bemase.

15 Senaḡi ḡomi ḡemi namo atuḡamaḡiani nai aiakuni, mo ḡaro ai au ḡia ḡesi tu asiḡi, korana maiḡa ḡenana au boḡo vaḡa-moḡoniguni. Be si-iaḡo ḡenai.”

16 Benamo Tomasi, arana ta tu Didimo o Kafa ḡetato-ḡoi, na Iesu ḡena mero kotari ekirarito, ekirato, “Ḡita maki ḡia ḡesi si-iaḡo, be ḡia ḡesi bisini mase-sebona.”

Iesu tu maḡuri korana

17 Iesu ma eraḡasito nai eribato, Lasaro tauḡanina tu ḡaro vasivasi (4) guri ai varau begena.

18 Betania e Ierusalemava vefakari tu kilomita toitoi (3) kavana.

19 Ema Iudea tarimari vovoka Mareta e Maria ḡeri ai ḡeiḡoto, tauri beḡene vaḡa-gwaḡiḡiri ḡana, korana tobari emaseto bene.

20 Mareta eseḡaḡito, Iesu tu eiḡomato-ḡoi nai, eraga-raka toreḡau-iaḡoto Iesu ḡesi ḡea vedoḡarito. A Maria tu numai etanu-gwaḡiḡito.

21 Benamo Mareta na Iesu ekiraiato, ekirato, “Vereḡauka, ḡoi bere mainai kavana tu, au tobagu asi bere mase.

22 Senaḡi au ribagu, initoma maki kara dagara Barau bonoḡiani tu, Barau na bevinimuni.”

23 Iesu na ekiraiato, ekirato, “Ḡoi tobamu tu bevariḡisi-ḡenoḡoini.”

24 Mareta na Iesu evaḡa-veseato, ekirato, “Au ribagu, ḡaro magonai variḡisi-ḡenoḡoi ḡaronai ḡia tu ma bevariḡisi-ḡenoḡoini.”

25 Iesu na Maria ekiraiato, ekirato, “Au tu variḡisi-ḡenoḡoi ema maḡuri. Au bevaḡa-moḡoniguni tarimana tu bemaseni, senaḡina roḡo maḡuri betanuni.

26 Ema deikara maḡuri etanuni nuḡanai, au evaḡa-moḡoniguni tu asiḡina ḡinavaḡi bemaseni. Mai guruḡa ovaḡa-moḡoniani ba?"

27 Mareta na ekiraiato, ekirato, "Oi Vereḡauka, au na avaḡa-moḡoni korikorimuni, ḡoi tu moḡoni Keriso, Barau Natuna, tanobara ḡana boiaḡomani tarimamu."

Iesu etaḡito

28 Mareta moḡesi ekirato murinai eḡenoḡoi-iaḡoto, benamo tarina Maria vekuretoḡai ea kea-ḡairiato, ekirato, "Vevaḡa-riba tarimana tu beiaḡoma ema ḡoi ekeamuni."

29 Maria na mo guruḡa eseḡaḡiato nai, asikauna evarigisito, benamo Iesu ḡenai eiaḡoto.

30 Mo horai Iesu tu vanuḡai roḡosi roḡo bere raka-toḡa, ḡia roḡo Mareta na mo edoḡariato gabunai roḡo.

31 Iuda tarimari, Maria ḡetanu-dukudukuato-ḡoi tarimari, na Maria ḡeḡitaiato, eraga-variḡisito ma eraka-rosito nai tu, murina na ḡerakato. ḡia maboru ḡekirato, Maria tu gara ḡana eiaḡoni, mase tarimana nea taḡi-vinia ḡana.

32 Maria eiaḡoto, Iesu sevinai eraḡasito, ma Iesu eḡitaiato nai tu, kwakuna koranai evetui-tarito, benamo evaḡa-guruḡaiato, ekirato, "Vereḡauka, ḡoi bere mainai kavana tu, au tobagu asi bere mase."

33 Iesu na Maria eḡitaiato etaḡito-ḡoi, ema mo Iuda tarimari, ḡia ḡesi ḡeiaḡomato tarimari, maki ḡetaḡito-ḡoi nai tu, ḡia nuḡana maki tuḡamaḡina eḡabi-rakavaiato, dori etaḡito.

34 Benamo Iesu na edanagirito, ekirato, "Ainai ḡotoreato?" Ḋia na ḡevaḡa-veveato, ḡekirato, "Vereḡauka, noiaḡoma, be noma ḡitaia."

35 Iesu etaḡito.

36 Benamo Iuda tarimari ḡekirato, "Ḋoḡitaia, Lasaro tu euravini-rakavaiani."

37 Senaḡi Iuda tarimari kotari ḡekirato, "Mai tarima na mata-bubu tarimana matana evaḡa-iaḡaiato, be Lasaro maki asi veḡata bere vaḡa-masea, ene?"

Iesu na Lasaro mase na evaḡa-variḡisi ḡenoḡoiato

38 Monana Iesu nuḡana ma evaḡa-vekwaraḡi lelevaḡiato, benamo gara gabuna ḡana eiaḡoto. Mo gara forena kouḡana tu fore ta na ḡetabe-ḡauato.

39 Iesu ekirato, "Fore ḡoḡabi-veḡitaia." Ma Mareta, mo mase tarimana tobana, na Iesu ekiraiato, ekirato, "Vereḡauka, ḡia emaseto ḡarona na beiaḡoma toma tu ḡaro vaḡa-vasivasina (4), be bonana tu rakava kwaikwai banaḡu."

40 Iesu na Mareta ekiraiato, ekirato, "Au na ḡoi tu bakiramu, bema bovaḡa-moḡoniguni nai, Barau marevana baregona boḡitaiani basi, ene?"

41 Benamo mase tarimana ḡetoreato gabuna na fore ḡeḡabi-veḡitaiato. Moḡa murinai Iesu eboḡe-vaisito, benamo ekirato, "Tamagu o, au na ḡoi atanikiumuni, korana ḡoi na varau boseḡaḡigu.

42 Au ribagu, ḡoi na vanaḡivanaḡi oseḡaḡiguni. Senaḡi maḡesi akirani korana tu mai tarimarima ḡeruḡa-taḡoni maḡeri urari ai. Be ḡia na beḡene vaḡa-moḡonia, au tu ḡoi na otuḡuguto."

43 Moḡesi eguruḡato murinai ekea-fararato, ekirato, "Lasaro, noma rakarosi!"

⁴⁴ Benamo mo emaseto tarimana mase dabuğari na ġimana kwakuna viriviri-tari e ġoirana ekumu-iağiato dabuğana ġesi ema raka-rosito. Iesu na ekirarito, ekirato, “Ġoruğaiia, be neraka.”

Iesu vağivağina dabarana ġevetauato

Mataio 26:1-5; Mareko 14:1-2; Luka 22:1-2

⁴⁵ Benamo mo Iuda tarimari vovoka, Maria ġenai ġeiağoto moğeri, Iesu na mo veiğa eveirito ġeğitarito nai, vovoka tu Iesu ġevağa-moğoniato.

⁴⁶ Senaği kotari tu ġeğenoğoi-iağoto Farisea tarimari ġeri ai, benamo Iesu na kara eveirito dagarari ġea kira-vararito.

⁴⁷ Benamo Rubu Veağa vereri baregori ema Farisea tarimari na kanisoro tarimari ġekea-vegogorito, benamo ġekirato, “Ġita tu kara toma taveiani? Mai tarima na vetoğa boruri vovoka eveirini.”

⁴⁸ Bema ġia maiğesi ġita na bita ġita-ğuiragiani moğo nai tu, tarimarima mabarari na ġia beğe vağa-moğoniani. Benamo Roma tarimari beğe iağomani, ġita ġera gabu (o Rubu Veağa) ema ġera tanobara ġita ġerana beğema ġabi-vağiani.”

⁴⁹ Benamo ġia fakari ai tarima ta arana Kaiafas, ġia mo lağani ai tu Rubu Veağa verena baregona, ġia na ekirarito, ekirato, “Ġomi dagara ta tu asi ribami!”

⁵⁰ Ġomi asi ġotuğamaği-fakani, namona tu tarima sebona moğo tarimarima mabarari urari ai bene mase, a mai tanobara mabarana beğe vağaraka vağosiosiani tu asi namo.”

⁵¹ Ġia moğesi ekirato tu, dia ġia tauğena nuğana siga moğo eguruğato; senaği ġia mo lağani ai tu Rubu Veağa verena baregona, moğa lorinai ġia mo tu eperovetato, Iesu tu bene mase Iuda tarimari mabarari urari ai.

⁵² Ema Iesu tu dia Iuda tarimari moğo urari ai bemaseni. Senaği Barau natuna gabu irauirau ai ġetanu-lausilausini tarimari mabarari bene ġabi-vegogori, doğoro sebonai bene vağa-iağori ġana.

⁵³ Moğa lorinai mo ġaro na evesinato eiağoto tu, Iuda tarimari baregori na Iesu kamasi beğe vaği-maseani dabarana ġevetauato.

⁵⁴ Moğesina naima Iuda tarimari ġoirari ai Iesu asi eraka-foforito-ğoi. Mo gabu na eraka-veğitato, eiağoto tano fakana asi tarimarimana gabuna sevina, vanuğa ta arana Efraim ġana. Ġena mero ġesi monai ġea tanuto-ğoi.

⁵⁵ Iuda tarimari ġeri Pasova verekona tu ekavinağito. (Moğa tu Iuda tarimari mase aneruna na evanağirito moğo, asi evağirito verekona). Ma Iuda tarimari vovoka mo tanobarai ġetanuto Ierusalemaj ġema raka-vegogoto. Ġia ġema raka-vegogoto tauna korikori, Barau ġoiranai beğene vearaeva vauro, Pasova verekona bene vesina.

⁵⁶ Ġia na Iesu ġeğita-vetauato-ğoi, ma Rubu Veağa nuğanai ġeruğa-vegogoto nai tu, tauğeri fakari ai moğo ġevedanaği-vedanağito, ġekirato, “Ġomi tu kamasi mani ġotuğamağini? Mai vereko ai toma ema ġoira-refoni ba?”

⁵⁷ Rubu Veağa vereri baregori ema Farisea tarimari na vevağa-naği gुरुğana tu varau Iuda tarimari ġevinirito, ġekirarito, bema ta beseğagini Iesu tu ainai, ġia tu maoromaoro bene iağo, Iuda vereri benea kira-varari, be beğene ġabia.

¹ Pasova o Iuda tarimari mase aneruna na evanağirito moğō verekona tu ġaro imaima sebona (6) roğō ġoirai nuğanai, Iesu Betania ġana eiağoto. Lasaro tu Betaniai etanuto-ğoi, ema monai emaseto, ma Iesu na mase na evağa-varigisiatu.

² Monai Iesu ġabirağena ġaniğanina ġeveiatu. Mareta na ġari ġaniğani edabaraiatu, ma Lasaro maki monai ġaniğani gabunai ġetanu-vegogoto tarimari ġesi ġetanu-vegogoto, ġeğaniğanito.

³ Benamo Maria na muramura bonana namo vedaureana lita kwana kavana eğabiato, benamo Iesu kwakuna fanafanana ediğa-iağiatu, ema ġuina na Iesu kwakuna fanafanana ma edau-kaukauato. Ma numa mabarana tu mo muramura bonana na evaiatu. Mo muramura tu ġauğa arana nad ġokana na ġeveito-ğoi, ema voina tu varağe rakava.

⁴ Senaği Iesu ġena mero ta arana Iudas Isakariota, mai tu Iesu vau ma bea revaiani tarimana, ekirato,

⁵ “Karase mai muramura mabarana tu silva moniri sinau toitoi (300) ai asi bevoivoi-iağia? (Mai tu tarima ta davana lağani ta nuğanai kavana). Bere voivoi-iağia, be voina monina bere ġabia tu, asi ġeri-ğari tarimari bere viniri.”

⁶ Ġia moğesina eguruğato tu, dia asi ġeri-ğari tarimari evetuğa-ğwarito-ğoi lorinai, senaği korana ġia tu lema tarimana naima. Ġia na tu moni fusena eğwa-rakao rakaoato-ğoi, ma mo fuse ai moni elemarito-ğoi, benamo ġena ura dagarari evoi-iağirito-ğoi.

⁷ Benamo Iesu ekiraiatu, ekirato, “Ġoraga-kwanea, mai vavinena tu kara bere veia dagarana beveia, ġia na au tauğanigu muramura na bedau-ğueina, gurigurigu ġana.

⁸ Asi ġeri-ğari tarimari tu vanağivanaği ġomi ġesi boğō tanuni, a au tu vanağivanaği ġomi ġesi asi batanuni.”

Rubu Veağa vereri baregori na Lasaro beğene vağia ġetato

⁹ Iuda tarimari vovoka tabutabu ġeseğağito Iesu tu Betania ai. Benamo moğana ġeiağoto, dia Iesu moğō uranai, senaği Lasaro maki beğene ġitaia ġana. Lasaro tu mase na Iesu na evağa-varigisi ġenogoiato.

¹⁰ Moğesi naima Rubu Veağa vereri baregori tu ġeboioğato, Lasaro maki beğene vaği-masea ġetato.

¹¹ Korana tu ġia dainai Iuda tarimari vovoka ġia ġerina ġeraka-veğitato, benamo Iesu ġevağa-moğoniato.

Iesu ġena rakatoğa Ierusalemaj ġevonevone-rağe viniato

Mataio 21:1-11; Mareko 11:1-11; Luka 19:28-40

¹² Ma elağanito nai, vereko uranai ġeiağomato tarimari vovoka ġeseğağito, Iesu tu Ieruselema ġana varau eraka-iağomato-ğoi.

¹³ Galamo lauri noğa dagarari ġeğabito, benamo Iesu ġenai ġeiağoto, ġeğabato, ġekirato,
“Hosana!

Isaraela ġeri Kini sivağa-namoa,
Vereğauka aranai eiağomani
tarimana sivağa-namoa!”

¹⁴ Ma Iesu na doniki natuna ta edoğariato, benamo iatanai etanukauto, Buka Veağa nuğanai ekirani ilailanai,

¹⁵ “Siona natuna,
(Ieruselema tarimami), asi ġogari,
ğoboğe, ġemi Vere eiağomani,

ġia tu doniki natuna iatanai betanukau.”

¹⁶ Mo ġaro ai ġena mero na maiġeri tu asi ġetuġamaġi-fakarito. Senaġi Barau na Iesu evaġa-raġeato e mareva baregona eviniato murinaġi vau, ġia ġeriba-maoroto, maiġeri mabarari ġetorerito tu, ġia ġekiraġiato. Ema ġeribato, mo veġa mabarari tu ġia ġenai ġeveirito.

¹⁷ Iesu na Lasaro gara forena kouġana na ekea-rosiato, ema mase na evaġa-variġisiato ġaronai, tarimarima tu ġutuma-bara ġia ġesi. Benamo moġeri tarima na mo veġa ġeġitaiato varina tu roġo ġevari-fuato-ġoi.

¹⁸ Tarima ġutuma ġeiaġoto Iesu ġesi vedoġari, korana ġeseġaġito, Iesu na mo vetoġa boruna eveiato dainai.

¹⁹ Moġesina nai Farisea tarimari tauġeri fakari ai ġevedare-mutukato, ġekirato, “Gogitaiani, ġomi tu asi ġokokoreni. Goboġe, mai tanobara tarimana mabarana tu ġia murinaġi ġerakani.”

Grik tarimari kotari na Iesu ġevetauato

²⁰ Vereko ġaronai toma-rakarigo uranaġi Ierusalemna ġana ġevaraġeto tarimari fakari ai tu, Grik o Helene tarimari kotari maki ġerakakauto.

²¹ Ġia ġeiaġoto Filipino ġenai, benamo ġekiraiato, ġekirato, “Verebara, ġai ġaurani tu Iesu ġaġitaia ġatoni.” Filipino tu Galilea tanonai vanuġa arana Betesaida tarimana.

²² Filipino eiaġoto Anduru ea kiraiato, benamo tauri ruarua ġeiaġoto, Iesu ġekiraiato.

²³ Iesu na evaġa-veserito, ekirato, “Ġarona varau bema-raġasi, Tarimarima Natuna mareva baregona beġabiani.

²⁴ Moġoni korikori akiramini, widi ġuena tano nuġanaġi beketo-ġurani ema bemaseni vau, vovokari ġia ġenana beġe ġorani. A widi ġuena tano ai asi beketoni ema asi maki bemaseni nai, ġereġana moġo betanuni.

²⁵ Ġena maġuri eura-viniani tarimana na maġuri vanaġivanaġi tu asi beġabiani, beleaiani. A mai tanobarai ġena maġuri etuġamaġi-fitoġaiani tarimana na, ġena maġuri tu etore-taġoani maġuri vanaġivanaġi ġana.

²⁶ Au vetuġunaġigu eiaġo-vinini tarimana tu au murigu na bene raka; be au ainai, au vetuġunaġigu eiaġo-vinini tarimana maki monai au ġesi. Au vetuġunaġigu eiaġo-vinini tarimana tu, au Tamagu na ġia maki bevaġa-namoani.”

Iesu ġena mase eguruġa-iaġiato

²⁷ “Maitoma au nuġagu tu evekwarāġini, e ġegu tuġamaġi bebarego. Be kara batoni? Nakira, ‘Tama, mai hora na noma vaġa-maġurigu’ nasi? Asiġina, au ġegu iaġoma tauna korikori aoanaġi tu mai bama raġasi maiġea.

²⁸ Tamagu, ġoi aramu novaġa-raġea.” Benamo garo ta guba na emariġoto, ekirato, “Au na aragu tu varau bavaġa-raġea, ema mai maki ma bavaġa-raġe ġenoġoiani.”

²⁹ Tarima ġutuma monai ruġa-vegogo na mo garo ġeseġaġiato, benamo ġekirato, “Guba begurua.” Ma kotari ġekirato, “Aneru ta na bevaġa-guruġaia.”

³⁰ Iesu na evaġa-veserito, ekirato, “Mani garo tu dia au uragu ai nai beiaġoma, senaġi ġomi urami ai nai beiaġoma.

³¹ Maitoma tu tanobarai Barau na vevaġa-maoro eveiani. Maitoma Barau na mai tanobara verena, Satani, evaġa-darereani.

³² Benamo au tano iatana na beġe ġabi-vaisiguni, monana tarimarima mabarari au ġegu ai bainu-kavirini.”

33 Ĝia maiĝesi eguruĝato tu, ĝia ĝena mase ai tu aiĝesi bemaseni moĝa ekiraĝi-rosiato.

34 Tarimarima ĝevaĝa-veseto, ĝekirato, “Ĝai taravatu guruĝari na ĝaseĝaĝito, Keriso tu betanu-vanaĝi vanaĝini, ma ĝoi kamasi nai tu okirani, Tarimarima Natuna tu beĝe ĝabi-vaisiani? Tarimarima Natuna tu deikara ei?”

35 Benamo Iesu na ekirarito, ekirato, “Mama ĝomi ĝesi tu asi betanu-maukani. Mama roĝo ĝomi ĝesi nuĝanai, mamai ĝoraka, mukuna na beĝabimini garina. Mukuna nuĝanai erakani tarimana tu asi ribana, ĝia tu aiĝana eiaĝoni.

36 Mama roĝo ĝomi ĝesi nuĝanai, mama boĝono vaĝa-moĝonia, be mama natunai boĝono iaĝo.”

Maiĝeri guruĝa ekiraĝi-ĝosirito murinai eraga-kwanerito, benamo eiaĝoto, asi beĝe ĝoitaĝoani gabunai etanuto-ĝoi.

Iuda tarimari na Iesu roĝo asi ĝevaĝa-moĝoniato-ĝoi

37 Iesu na Iuda tarimari ĝoirari ai vetoĝa boruri vovoka eveirito, senaĝi roĝo mo asi ĝevaĝa-moĝoniato-ĝoi.

38 Monana peroveta tarimana arana Isaia ĝena guruĝa emoĝonito, Isaia maiĝesi ekirato,

“Vereĝauka, deikara na ĝai ĝema guruĝa bevaĝa-moĝonirini? Deikara ĝenai Vereĝauka ĝena seĝuka befororini?”

39 Ĝia na Iesu asi ĝevaĝa-moĝoniato anina tu, Isaia gabu tai ĝena toretore ai ma ekirato,

40 “Barau na matari evaĝa-tufarito, ema nuĝari evei-mukunarito, korana matari na asi beĝene boĝeboĝe, ema nuĝari ai asi beĝene tuĝamaĝi-faka ĝana. Au ĝegu ai beĝe ĝenoĝoini, benamo bavaĝa-namorini garina.”

41 Isaia moĝesi ekirato, korana ĝia na Iesu marevana e seĝukana baregona eĝita-guineato nai, benamo ĝia eguruĝa-iaĝiato.

42 Iuda ĝorikauna vereri vovoka na maki Iesu ĝevaĝa-moĝoniato, senaĝi Farisea tarimari gariri ĝeveito-ĝoi, be Iesu asi ĝekiraĝi-foforiato-ĝoi. Korana bema beĝe kiraĝi-foforiani nai tu, Farisea tarimari na rubu na beĝe tuĝu-vaĝirini garina.

43 Korana mo Iuda vereri ĝeri ura baregona tu, tarimarima na beĝene vaĝa-raĝeri, a Barau na bene vaĝa-raĝeri tuĝamaĝina tu asi ĝeveiato-ĝoi.

Iesu ĝena guruĝa na tarimarima bekota-vinirini

44 Iesu efararato, ekirato, “Au bevaĝa-moĝoniguni tarimana tu dia au evaĝa-moĝoniguni, senaĝi au etuĝuguto Barauna evaĝa-moĝoniani.

45 Ema au eĝitaĝuni tarimana na tu au etuĝuguto Barauna eĝitaiani.

46 Au tu mama, mai tanobara ĝana aiĝomato, be au bevaĝa-moĝoniguni tarimana tu mukuna nuĝanai asi betanuni.

47 Ma bema tarima ta na au ĝegu guruĝa eseĝaĝiani, senaĝi asi evaĝa-moĝoniani, au na mo tarima tu asi bakota-viniani. Korana au tu dia tanobara kota-vinina ĝana aiaĝomato. Asiĝina. Au tu tanobara vaĝa-maĝurina ĝana aiĝomato.

48 Au eruĝaguni ema au ĝegu guruĝa asi eĝabi-raĝerini tarimana, kota-vinina tarimana ta etanuni. Au na akiraĝirito gurugari, moĝeri guruĝa na ĝia beĝea kota-viniani mo ĝaro magonai.

⁴⁹ Korana au tu dia tauḡegu ḡegu maoro ai aguruḡani. Senaḡi Tamagu, au etuḡuguto Barauna, na evaḡa-naḡiguto au na kara guruḡana bana kiraḡia ema kamasi bana kiraḡia.

⁵⁰ Au ribagu, Tamagu ḡena guruḡa na tarimarima maḡuri vanaḡivanaḡi beḡe ḡabini. Moḡa lorinai au na kara akiraḡirini guruḡari tu, kara dagara Tamagu na ekiraguni bana kiraḡiri etoni guruḡari moḡo.”

13

Iesu na ḡena mero kwakuri eḡuriḡirito

¹ Pasova o Iuda tarimari mase aneruna na evanaḡirito moḡo verekona tu dori eḡabiato-ḡoi, benamo Iesu eribato, mai tanobara beiaḡuiani ma Tamana ḡenai bevaraḡeni ḡarona tu varau beraḡasi. Mai tanobarai ḡena tarimarima ḡetanuto euravini-rakavarito, ma ḡena veuravini ḡeri ai tu asi edokoto, eiaḡoto mo magona.

² Iesu ma ḡena mero ḡesi lavilavi ḡaniḡanina ḡeḡaniato-ḡoi nuḡanai, Diabolo na Iudas Isakariota, Simona natuna, nuḡana eḡaniato, Iesu bene revaia ḡana.

³ Iesu ribana, Tamana na dagara mabarari tu ḡia ḡena seḡuka gaburenai etorerito. Ema ribana maki, ḡia tu Barau ḡenana eiaḡomato, ema ma beḡenoḡoini Barau ḡenai;

⁴ benamo ḡaniḡani gabuna na evariḡisito, ḡena koudi ekoki-vaḡiato, benamo tauḡela eriḡoato.

⁵ Benamo naḡu ai nanu ebubuto, benamo ḡena mero kwakuri eḡuriḡirito, ma eriḡoato tauḡelana na tu edau-kaukaurito.

⁶ Kwakuri eḡuriḡi-iaḡomato mo, Simona Petero ḡenai eraḡasito, benamo Petero na ekiraiato, ekirato, “Vereḡauka, ḡoi tu au kwakugu noḡuriḡia otoni?”

⁷ Iesu na evaḡa-veaseato, ekirato, “Maitoma au na kara aveiani veigana tu asi otuḡamaḡi-fakaiani, senaḡi gabivau boribani.”

⁸ Petero na ekiraiato, ekirato, “Asiḡi, au kwakugu ḡoi na tu asiḡina ḡinavaḡi boḡuriḡiani.” Iesu na evaḡa-veaseato, ekirato, “Bema au na ḡoi kwakumu asi baḡuriḡiani nai, ḡoi tu dia au ḡegu mero.”

⁹ Simona Petero ekirato, “Vereḡauka, dia kwakugu moḡo, senaḡi ḡimagu ema debagu maki.”

¹⁰ Iesu na ekiraiato, ekirato, “Efouni tarimana tauḡanina mabarana tu veiareva, be ḡia tu kwakuna moḡo beḡuriḡiani. Ḡomi mabarami tu veiareva, senaḡi sebona ta moḡo asi veiareva.”

¹¹ Iesu ma ribana deikara na ḡia berevaiani; moḡesina nai ekirato, “Dia mabarami veiareva.”

¹² Kwakuri eḡuriḡi-ḡosito murinai, ḡena dabuḡa baregona ma eveiato, ema eiaḡoto ḡena tanutanu gabunai ea tanu-tarito, benamo ekirarito, ekirato, “Au na ḡomi ḡemi ai kara baveia veigana tauna korikori boḡo tuḡamaḡi-fakaia ba?”

¹³ Ḡomi na au ḡokiraḡiguni, ḡokirani ‘Vevaḡa-riba Tarimana’ ema ‘Vereḡauka’, mo tu moḡoni ḡokiraḡiguni, korana au tu moḡoni Vevaḡa-riba Tarimagu ema Vereḡauka.

¹⁴ Bema au ḡomi ḡemi Vereḡauka ema Vevaḡa-riba tarimagu na ḡomi kwakumi baḡuriḡiri nai, ḡomi maki tauḡemi fakami ai moḡo karomi tari kwakuri boḡono ḡuriḡiri.

¹⁵ Korana au na bavaĝa-ĝitami, be au na kara ĝomi ĝemi ai baveia veigana, ĝomi na maki boĝono veia.

¹⁶ Au na ĝomi moĝoni akiramini, ĝauvei merona na ĝena vere asi bevanaĝiani, e vetuĝunaĝi merona na betuĝua tarimana asi bevanaĝiani.

¹⁷ Toma maĝeri dagara mabarari ĝomi na boĝo ribari, bema boĝo veirini nai tu boĝo iakuni.

Iesu ĝena mase ekiraĝi-foforiato

¹⁸ Au na ĝomi mabarami asi akiraĝimini, au na aĝabi-viriĝirito tarimari tu au ribagu. Senaĝi mai tu Buka Veaĝa nuĝanai ĝetorerito guruĝari beĝene moĝoni ĝana: 'Deikara au ĝesi beredi baĝa ĝani-vegogoani tarimana tu, kwakuna gwadirina beĝabi-vaisiani au ĝegu ai.' (Moĝa anina tu, Iesu ma bekira-fitoĝaiani, benamo vaĝi-masena dabarana beveiani).

¹⁹ Toma au na ĝoirai beĝe ĝorani dagarari akira-varamini, be beĝe ĝorani nai tu boĝono riba-maoro, (Barau na etuĝuato) Tarimana tu Au.

²⁰ Mogoni akiramini, au na atuĝuani tarimana eĝabi-raĝeani tarimana na tu au eĝabi-raĝeguni. Ma au eĝabi-raĝeguni tarimana na au etuĝuguto tarimana, Barau, eĝabi-raĝeani."

Iesu Iudas Isakariota na berevaiani ekiraĝiato

Mataio 26:20-25; Mareko 14:17-21; Luka 22:21-23

²¹ Iesu na maĝeri guruĝa ekiraĝirito murinai, nuĝana evekvaraĝi-baregote, benamo eguruĝa-foforito, ekirato, "Akira-korikorimini, ĝomi ta na tu au borevaguni."

²² Benamo ĝena mero ĝeveĝita-veĝitato, asi ribari deikara ekiraĝiato.

²³ Ĝena mero vekaravari ai Iesu na eura-viniato-ĝoi merona tu ĝia ĝenai evetabekauto.

²⁴ Ma Simona Petero na vetoĝai moĝo Ioane evaĝa-guruĝaĝiato, eurato, Iesu nedanaĝia deikara ekiraĝiani.

²⁵ Benamo (Iesu na eura-viniato-ĝoi merona) Iesu ĝenai ma evetabekauto, benamo edanaĝiato ekirato, "Vereĝauka, mo tu deikara, ei?"

²⁶ Iesu evaĝa-veseto, ekirato, "Au na beredi bafereiani, benamo ĝia baviniani tarimana tu moĝea." Benamo Iesu na beredi efereiato, ma Simona natuna, Iudas Isakariota, eviniato.

²⁷ Iudas na mo beredi eĝabianto, benamo Satani nuĝanai eraka-ĝurato. Benamo Iesu na ekiraĝiato, ekirato, "Kara ourani noveia tu novei-ĝarimoĝia."

²⁸ Senaĝi mo ĝeĝaniĝani-vegoĝoto tarimari tu sebona ta maki asi eribato, karase nai Iesu na moĝesi ekiraĝiato.

²⁹ Moĝa nuĝanai Iudas tu moni mauĝa-mauĝana eĝita-ĝuato-ĝoi. Moĝesina naima ĝia kotari ĝetuĝamaĝito, Iesu na tu bekiraia, vereko ai karakara ĝeura-vinirini dagarari nea voiri, o asi ĝeri-ĝari tarimari dagara tari nea viniri ĝetato.

³⁰ Iudas na mo beredi eĝabi-raĝeato murinai tu, asikauna mo numa na eraka-rosito. Mo tu varau eboĝito.

Iesu Petero na bekira-ĝuniĝauani ekiraĝiato

³¹ Iudas eraka-rosito murinai, Iesu ekirato, "Maitoma Tarimarima Natuna beĝe vaĝa-raĝeani, ema Barau maki Natuna ĝenana beĝe vaĝa-raĝeani.

³² Bema Barau na Iesu bakunai vevaĝa-raĝe e mareva baregona beĝabiani nai tu, Barau tauĝena na maki tauĝena ĝena mareva baregona Tarimarima Natuna beviniani. Ma Barau na asikauna beviniani.

³³ Natugu, au ġomi ġesi tu asi bita tanu-maukani. Benamo ġomi na au ma boġo ġita-vetauguni. Au na Iuda tarimari авага-guruġarito ilailanai, ġomi maki mo guruġa sebona avinimini: Au aiaġoni gabuna ġana, ġomi tu asi boġo iaġoni riba.

³⁴ Taravatu guruġana variguna avinimini. Tarikakami ġesi boġono veuravini. Au na ġomi aura-vinimini ilailanai, ġomi maki tarikakami ġesi boġono veuravini.

³⁵ Bema ġomi tarikakami ġesi boġo veura-vinini nai, tarimarima mabarari beġe ribani, ġomi tu au ġegu mero.”

³⁶ Simona Petero na Iesu edanaġiato, ekirato, “Vereġauka, ġoi tu aigana oiaġoni?” Iesu evaġa-veseto, ekirato, “Au aigana aiaġoni gabuna ġana, maıtoma au murigu na tu asi boġo iaġomani, senaġi gabivau boġo iaġomani murigu na.”

³⁷ Petero na Iesu ekiraiato, ekirato, “Vereġauka, kara dainai toma au ġoi murimu na tu asi baiaġosini riba? Au tu ġoi uramu ai ġegu maġuri batoretariani, bamaseni.”

³⁸ Iesu na Petero evaġa-veseato, ekirato, “Ġoi ġemu maġuri tu au uragu ai botore-tariani otoni? Akira-korikorimuni, kokoroku roġosi roġo bene goġi nuġanai, ġoi na au tu vaġa-toitoi bokira-ġuniġauguni.”

14

Iesu tu dabara

¹ “Nuġami asi beġene raġe, ema asi boġono tuġamaġi-ġutuma. Barau boġono vaġa-moġonia, ema au maki boġono vaġa-moġonigu.

² Au Tamagu ġena numai daiġutu tu asisebo; bema asiġi nai tu, mai guruġa ġomi asi bara kira-varami: Au aiaġoni tu, ġomi ġemi gabu ta arovina-toreani.

³ Benamo aiaġoni, ġomi ġemi gabu barovina-toreani. Barovinatore-ġosiani vau, ma baġenoġoi-iaġomani, benamo ġomi baġori-iaġomini au ġesi bita tanuni. Be au ainai batanuni gabunai, ġomi maki monai au ġesi bita tanuni.

⁴ Au baiaġoni gabuna dabarana tu ġomi ma ribami.”

⁵ Tomasi na ekiraiato, ekirato, “Vereġauka, ġai tu asi ribama ġoi aigana oiaġoni, ma dabara tu kamasi baġa ribaianı?”

⁶ Iesu na ekiraiato, ekirato, “Dabara tu au, e moġonina maki au, ema maġuri maki au. Tarima ta Tamagu ġenai dabara boruna na ta asi beiaġoni. Asiġina ġinavaġi. Au ġeguna moġo.

⁷ Bema moġoni au ġomi na ġoribaguto tu, au Tamagu maki ġoro ribaia. Ma toma vau ġoribaianı ema varau boġo ġitaia.”

⁸ Filippo na Iesu ekiraiato, ekirato, “Vereġauka, Tamara novaġa-ribama, be nuġama beġene genatari.”

⁹ Iesu na ekiraiato, ekirato, “Filipo, au ġoi ġesi tu kai-veġata atanuto, ma ġoi na au tu roġosi roġo boro ribagu? Au eġitaguni tarimana na Tamagu eġitaiani. Ma ġoi tu kamasi nai okirani, ‘Tamara novaġa-ribama otoni?’

¹⁰ Ġoi na asi ovaġa-moġoniani, au tu Tamagu nuġanai, ma Tamagu tu au nuġagu ai, ei? Au na ġomi avaġa-guruġamini guruġari tu dia au tauġegu ġegu maoro ai avaġa-guruġamini. Asiġina. Mai tu Tamagu, ġia tu nuġagu ai etanuni, ġia na ġena ġauvei eveirini.

¹¹ Au akirani, au tu Tamagu nuġanai atanuni ema Tamagu tu au nuġagu ai etanuni atoni nai tu boġono vaġa-moġonigu. Bema asiġina nai, mai veiġa aveirini goġitarini nai boġono vaġa-moġonigu.

¹² Moġoni akiramini, au evaġa-moġoniguni tarimana tu, au na aveirini veiġari, ġia na maki beveirini. Ema ġia na tu veiġa barego lelevaġiri

beveirini, au na aveirini veiġari tu bevanaġirini. Korana au tu Tamagu ġenai ma aiaġoni.

¹³ Ema au aragu ai karakara boġo noġirini tu, au na baveirini. Monana Tamagu beġe vaġa-raġeani Natuna bakunai.

¹⁴ Au aragu ai kara boġo noġi-raġerini dagarari mabarari tu, veiġari au na baveirini.”

Iesu na Iauka Veaġa ekiraġi-toreato

¹⁵ “Bema ġomi na au ġoura-viniguni nai tu, au ġegu taravatu guruġari boġo korana-iaġirini.

¹⁶ Benamo au na Tamagu banoġiani, bena ġia na vevaġa-kava tarimana ta ma bevinimini. Mo vevaġa-kava tarimana tu ġomi ġesi betanu-vanaġi vanaġini.

¹⁷ Ġia tu guruġa moġonina evaġa-foforiani Iaukana. Ġia tu tanobara maġurinai ġetanuni tarimari na asi beġe ġabi-raġeani riba, korana asi ġeġitaiani ema asi ġeribaiani. Senaġi ġia ġomi tu ma ribami, korana ġia tu ġomi ġesi ġotanuni ema ġomi nuġami ai betanuni.

¹⁸ Au na ġomi ġereġami gara noġa asi baiaġuimini. Au ma baġenoġoi-iaġomani ġomi ġemi ai.

¹⁹ Tanobara tarimari na asi ma beġe ġitaguni ġarona tu asi manaġa, senaġi ġomi na tu boġo ġitaguni. Ġomi tu au amaġuri-taġoni bakunai, be boġo maġuri-taġoni.

²⁰ Mo ġaro ai ġomi boġo ribani, au tu Tamagu nuġanai atanuni, ema ġomi au nuġagu ai ġotanuni, ema au ġomi nuġami ai atanuni.

²¹ Au ġegu taravatu guruġari eġabi-raġerini ema ekorana-iaġirini tarimana na tu au eura-viniguni. Ema au eura-viniguni tarimana tu au Tamagu na maki beura-viniani. Au na maki baura-viniani ema au tauġegu ġia ġenai bavevaġa-foforini.”

²² Iudas, dia Iudas Isakariota, na ekiraiato, ekirato, “Vereġauka, kamasi nai ġoi tauġemu ġai ġemai tu bovevaġa-foforini, senaġi tanobara ġenai tu asiġina?”

²³ Iesu na evaġa-veaseato, ekirato, “Au eura-viniguni tarimana na au ġegu vevaġa-riba bekorana-iaġiani. Benamo au Tamagu na mo tarima beura-viniani. Benamo tauma ruarua baġa iaġoni ġia ġenai, bena ġia ġesi baġa tanu-vanaġi vanaġini.

²⁴ Au asi eura-viniguni tarimana tu, au ġegu guruġa asi ekorana-iaġirini. Mai guruġa ġoseġaġirini tu dia au ġegu, senaġi Tamagu ġena; au tu ġia na etuġuguto.

²⁵ Ġomi ġesi roġo atanuni nuġanai, maiġeri guruġa ġomi akira-varamini.

²⁶ A ġomi vaġa-kavami tarimana tu Iauka Veaġa. Ġia tu au aragu ai Tamagu na betuġu-iaġomaiani. Ġia na dagara mabarari bevaġa-ribamini, ema au na kara akiraġirito dagarari, ġemi tuġamaġi ai ma bevaġa-fofori ġenoġoirini.

²⁷ Maino ġomi ġesi mai aiaġuiani. Mai tu au ġegu maino ġomi avinimini. Ema mai maino au na ġomi avinimini tu, dia tanobara tarimari na ġomi ġevinimini kavana avinimini. Nuġami asi beġene raġe e asi boġono tuġamaġi-gutuma ema asi boġono gari.

²⁸ Au baguruġa boġo seġaġia, au bakira, ‘Au tu araka-ġerevaġini, senaġi ma baġenoġoi-iaġomani ġomi ġemi ai.’ Bema au boġoro ura-vinigu nai tu, Tamagu ġenai aiaġoni, be ġoro iaku, korana au Tamagu tu iaru-korokoro, au iata-raġegu ai.

29 Mai veġa tu roġosi roġo bere ġora nuġanai akira-varamini. Be mai veġa befororini nai, boġono vaġa-moġonigu.

30 Au ġomi ġesi asi bita guruġa-guruġa maukani, korana mai tanobara eġori-kauani verena, Satani, tu dori eraġasini. Ġia tu asi kokorena, be au ġegu ai kara ta asi beveiiani.

31 Senaġi mai tanobara tarimari beġene riba, au na Tamagu aura-viniani. Ema au tu Tamagu na ekiraġiato ilailanai aveini.

Be ġovarigisi, mai gabu na siraka-veġita.”

15

Vine ema legana

1 “Au tu vine ġauna korikori, ma au Tamagu tu vine tavoġana ġauvei-iaġina tarimana.

2 Vine legari au ġegu ai kafakau dagarari, asi ġeġwani legari tu, ġia na ebasi-vaġirini; ma lega mabarari ma ġwari tu, ġia na eiarevarini, beġene ġwa-vovoka uranai.

3 Ġomi tu varau boġo iareva-ġosi. Mo guruġa avinimito moġeri na beġe iarevami.

4 Au ġegu ai boġono kafakau, be au maki ġomi ġemi ai kafakau-taġo bana tanu. A vine legana ta ġereġana moġo nai tu asi beġwani, senaġi vine ġauna ġenai bekafakau-taġoni vau beġwani. Gomi maki moġesi, bema au ġesi asi boġo sebonani nai, ġwaġwami ta asi bevetoreni.

5 Au tu vine, a ġomi tu lega. Au ġegu ai bekafakauni, au ġia ġenai bakafakauni kavana, tarimana tu ġwaġwana asisebo bevetoreni. Bema au boġo iaġuiguni nai, dagara ta asi boġo veiani.

6 Au ġegu ai asi ekafakauni tarimana tu, vine ġauna legana noġa beġe ġabiani, ma beġe fitoġaiani, benamo bea kaukauni. Mo ġau legari kakorori tu ġeġabi-vegogorini, benamo karavai ġefiu-raġerini, benamo ġegaburini.

7 Bema ġomi au ġegu ai boġo kafakauni o au ġesi boġo sebonani, ma au ġegu guruġa ġomi ġemi ai betanuni nai tu, kara ġoura-vinirini dagarari boġo noġini tu, ġemi noġinoġi dagarari boġo ġoitaġorini.

8 Bema ġwaġwami asisebo asisebo beġe vetoreni nai tu, tarimarima na au Tamagu ġevaġa-raġeani, ema ġomi maki au ġegu mero korikori ai boġo iaġoni.

9 Tamagu na au eura-viniguni ilailanai, au na ġomi maki aura-vinimini. Vanaġivanaġi au ġegu veuravini nuġanai boġono tanu.

10 Bema au ġegu taravatu guruġari boġo korana-iaġirini nai, ġomi tu au ġegu veuravini nuġanai boġo tanuni, ilailana au Tamagu ġena taravatu guruġari akorana-iaġirini, benamo ġia ġena veuravini nuġanai atanuni kavana.

11 Au na maġeri guruġa ġomi baviniimi anina tu, au ġegu iaku ġomi nuġami ai bene tanu, be ġomi maki nuġami iaku na beġene vonuvonu-raġe.

12 Au ġegu taravatu guruġana tu maġa, tauġemi fakami ai karomi ġesi boġono veuravini, au na ġomi aura-vinimini kavana.

13 Ma ġena veuravini barego lelevaġina tarimana tu, karona urari ai ġena maġuri gwaina asi eġabiani, etore-tariani. Ma ġena veuravini barego tarimana korikori tu moġa, ma boruna ta tu asiġina maia.

14 Bema au na kara akiramini veġari boġo veirini nai, ġomi tu au ġatagu.

15 Au na ġomi tu vetuġunaġi-iaġovini tarimami asi ma bakiraġimini, korana vetuġunaġi-iaġovini tarimana na ġena vere na kara eveiani, ġia tu asi ribana.

A ġomi tu ġata batoni, korana au Tamagu ġenana kara aseġaġirito dagarari mabarari tu, ġomi varau авага-ribamito.

¹⁶ Ġomi na au asi ġoġabi-viriġiguto, senaġi au na ġomi aġabi-hidimito, ema авага-ruġamito boġono iaġo, ġwaġwami boġono вага-ġorari, ma moġeri tu namo moġo beġene tanu-vanaġi vanaġi. Moġesina tu karakara ġoura-vinirini dagarari au aragu ai Tamagu boġo noġiani tu, Tamagu na bevini-mini.

¹⁷ Au ġegu taravatu guruġana ġomi avinimini tu maiġa, karomi ġesi boġono veuravini.”

Tanobara tarimari na Iesu ġena mero ġeiau-rakava vinirito

¹⁸ “Bema tanobara tarimari na beġe iau-rakava vinimini nai, boġono riba, au tu ġeiau-rakava vini-guineguto.

¹⁹ Bema ġomi tanobara ġena tarimarima roġo ġoro tanu tu, tanobara tarimari na beġere ura-vinimi, korana ġomi tu ġia ġeri tarimarima bene. Senaġi ġomi tu dia tanobara ġena tarimarima. Asiġina. Ġomi tu varau aġabi-viriġimito, ma tanobara maġurina nuġana na aġabi-vaġimito. Moġa lorinai tanobara tarimari na ġeiau-rakavamini.

²⁰ Akiramito guruġana boġono tuġamaġi-taġoa: ‘Vetuġunaġi merona na etuġu-naġiani tarimana asi bevanaġiani.’ Bema au ġevaġa-midigu midiguguto, ġomi maki beġe vaġa-midigu midigumini. Bema au ġegu guruġa ġekorana-iaġirito, ġomi ġemi guruġa maki beġe korana-iaġirini.

²¹ Ġia na maiġeri veiġa asi namori mabarari ġomi ġemi ai beġe veirini tauna korikori tu, ġomi na au aragu ġekorana-iaġiani nai; korana au etuġuguto Barauna ġia tu asi ribari.

²² Bere au asi bara iaġoma, ma asi bara guruġa-viniri, ġia tu asi ġeri rakava. Senaġi ġia maitoma ġeri rakava na tu asi ġeri raga-maġuri dabarana.

²³ Au eiau-rakavaguni tarimana na au Tamagu maki eiau-rakavaiani.

²⁴ Bere au na nuġa-farevaġi veiġari, tarima tari na roġosi roġo beġene veiri dagarari, ġia vefakari ai asi bara veiri, ġia tu asi ġeri vei-rakava. Senaġi maitoma ġia na moġeri nuġa-farevaġi veiġari tu beġe ġitari, ma nuġanaġi ġia na au ma Tamagu ġesi tauma ruarua tu ġeiau-rakavamani.

²⁵ Senaġi maiġeri veiġa ġeġorani korana tu, taravatu nuġanaġi ġetoreato guruġana bene moġoni ġana. Mo guruġa tu iniġesi ekirani: ‘Au tu ġeiau-rakava-kavaguto moġo, asi korana tai.’

²⁶ Vevaġa-kava Iaukana tu beiaġomani. Ġia tu guruġa moġoniri kiraġi-kiraġiri Iaukana, Tamagu ġenana beiaġomani. Au na ġomi ġemi ai batuġuani, Tamagu sevinaġi batanuni nai tu. Ġia na au bema kiraġi-foforiguni.

²⁷ Ġomi na maki au roġo boġono kiraġi-foforigu, korana ġomi tu au ġesi tatanuni tovotovona na veġata bene.”

16

¹ “Au na maiġeri guruġa akira-varamini, korana asi aurani ġemi veġabidadama na boġono raka-veġita.

² Juda tarimari ġeri rubu na beġe tore-veġitamini. Aba, ġarona mani eiaġomani, tau ta na bevaġi-masemini nai tu, ġia matoru bekirani, ġia tu Barau vetuġunaġina eiaġo-viniani.

³ Maiġeri veiġa ġomi ġemi ai beġe veirini korana tu ġia na au Tamagu asi ġeribaġato, ema au maki asi ġeribaġato.

⁴ Senaġi au na maiġeri guruġa tu nakiravara-guinemi. Be ġoirai vau tarimarima na veiġari ġemi ai beġea veirini nai, maiġeri guruġa bakiravarami boġono tuġamaġiri.

Iauka Veaġa ġena ġauvei

Tovotovonai au tu roġo ġomi ġesi tatanuto-ġoi naima, maiġeri guruġa ġemi asi akiraġirito.

⁵ Senaġi toma tu etuġu-mariġoguto Barauna ġenai ma aġenoġoi-iaġoni, ma ta na tu asi odanaġiguni, ‘Ġoi tu aiġana oiaġoni?’ asi otoni.

⁶ Ġomi tu maiġeri guruġa bakira-varami nai, nuġami ġevewaraġini e ġetaġitaġini.

⁷ Senaġi moġoni akiramini, mai tu ġomi ġemi namo uranai ġomi vekaravami na araka-ġerevaġini, arakani. Korana tu bema au asi barakani nai, vevaġa-kava Iaukana ġemi ai asi beiaġomani. Senaġi bema au baiaġoni nai tu, ġemi ai batuġu-iaġomaiani.

⁸ Ma ġia beiaġomani nai, mai tanobara tarimari ġeri vei-rakava ma Barau ġena vei-iobukaiobuka ema Barau na tanobara tarimari bekota-vinirini aniri bevaġa-fofori ġinikaurini.

⁹ Ġeri vei-rakava tauna korikori tu, au asi ġevaġa-moġoniguni.

¹⁰ Barau ġena vei-iobukaiobuka tauna korikori tu maiġa, au tu Tamagu ġenai aiāġoni, be asi ma boġo ġita-ġenoġoiguni.

¹¹ Ema Barau na tanobara tarimari bekota-vinirini anina tu maiġea, mai tanobara verena tu varau ekota-viniato.

¹² Dagara vovoka roġo aurani nakira-varami, senaġi mabarari maitoma tu asi ilaila boġo tuġamaġi-fakarini e asi boġo ġabi-raġerini.

¹³ Senaġi guruġa moġoni Iaukana beiaġomani, ġia na vau ġomi beġori-kamuni, benamo guruġa moġoniri boġo ribarini. Korana ġia tu dia tauġena ġena tuġamaġi guruġari bekiraġirini. Asiġina. Ġia tu au ġeguna beseġaġini guruġari moġo bekiraġirini. Ema gabivau beġe ġorani dagarari bekiravara-guinemini.

¹⁴ Ġia na au bevaġa-raġeguni, korana au ġeguna beġabirini guruġari ġomi bekira-varamini.

¹⁵ Au Tamagu ġena dagara mabarari tu au ġegu. Moġesi naima au bakira, ‘Ġia na au ġeguna beġabirini guruġari ġomi bekira-varamini.’ ”

“Ġemi nuġa-midigumidigu tu iaku verere ai beġe iaġoni”

¹⁶ “Ġaro asi manaġa nuġanai, ġomi na au asi ma boġo ġitaguni, ma ġaro asi manaġa murinai tu, ma boġo ġitaguni. [Korana au tu Tamagu ġenai aiāġoni.]”

¹⁷ Benamo ġena mero kotari tauġeri vefakari ai moġo ġeguruġa-guruġato, ġekirato, “Mai ġia na tu kara ekiraġiani, ekirani, ‘Ġaro asi manaġa nuġanai au asi ma boġo ġitaguni, ma ġaro asi manaġa murinai tu ma boġo ġitaguni,’ e ma ekirani, ‘Korana au tu Tamagu ġenai aiāġoni?’ ”

¹⁸ Moġesina naima ġekirato, “Mai ġia na tu kara ekiraġiani, ekirani, ‘Ġaro asi manaġa’ etoni? Gita asi taribani ġia na tu kara ekiraġiani!”

¹⁹ Iesu eribato, ġena mero ġeri ura tu ġedanāġia ġetato-ġoi, naima ġia na evaġa-guruġarito, ekirato, “Ġomi tu tauġemi ġereġami au na kara bakiraġia vedare-mutukana ġoveini ei? Au bakira, ‘Ġaro asi manaġa nuġanai asi ma boġo ġitaguni, ma ġaro asi manaġa murinai tu ma boġo ġitaguni,’ basi anina ġovetauani?”

²⁰ Moĝoni akiramini, ĝomi tu boĝo taĝini e boĝo taĝi-vanoro vanoroni, senaĝi tanobara tarimari tu beĝe iakuni, beĝe verereni. Gomi tu boĝo nuĝa-midigu midiguni, senaĝi ĝemi nuĝa-midigumidigu tu iaku verere ai beĝe iaĝoni.

²¹ Vavine ta mero nevaĝa-maĝuria ĝana tu, emidigumidiguni, korana ĝena ĝabi aoana eraĝasini. Senaĝi mero emagurini nai, ĝenai mo midigumidigu tu etuĝa-rekwaiani, korana mero ta tanobarai varau bevaĝa-maĝuria iakunai.

²² Ĝomi maki moĝesina: Toma tu ĝonuĝa-midigu midiguni, senaĝi au na ma baĝita-ĝenoĝoimini, be ma boĝo iakuni. Ma tarima ta na ĝomi ĝemi mo iaku tu asi ilaila ĝemina ma beĝabi-veĝitaiani.

²³ Ma mo ĝaro ai ĝomi na au dagara ta asi ma boĝo noĝiguni. Moĝoni akiramini, au aragu ai karakara boĝo noĝirini dagarari mabarari, au Tamagu na bevinimini.

²⁴ Beiaĝoma mo inította, ĝomi na au aragu ai dagara ta roĝosi roĝo boĝoro noĝia. Au aragu ai boĝono noĝi-raĝe, be boĝono doĝari; benamo nuĝami iaku na beĝene vonuvonu-raĝe.”

Iesu na tanobara ĝena seĝuka evaĝa-ketoato

²⁵ “Maiĝeri guruĝa au na ĝomi ĝemi tu barabore ai akiraĝirini, senaĝi ĝaro ĝoirai tu barabore ai asi ma bavaĝa-guruĝamini. Ĝoirai vau au Tamagu varina tu ĝemi bakiraĝi-fofori ginikauani.

²⁶ Mo ĝaro beraĝasini nai, ĝomi tu au aragu ai boĝo noĝinoĝini. A au tu asi akirani, au na ĝomi urami ai Tamagu banĝiani;

²⁷ korana Tamagu tauĝena na ĝomi eura-vinimini. Ĝomi eura-vinimini, korana ĝomi na au ĝoura-viniguni, ema ĝovaĝa-moĝoniguni, au tu Barau ĝenana aiaĝomato.

²⁸ Au tu Tamagu sevina na mai tanobara ĝana amariĝoto. Ma toma tu mai tanobara aiaĝuiani, Tamagu ĝenai ma aĝenoĝoi-iaĝoni.”

²⁹ Ĝena mero na ĝevaĝa-guruĝaĭato, ĝekirato, “Oĝitaiani, toma ĝoi tu oguruĝa-fofori ginikauni, asi oguruĝa-baraboreni.

³⁰ Toma ĝai ĝama riba-korikorini, ĝoi tu dagara mabarari ma ribamu. Tarima ta na nedanaĝimu betoni vedanaĝina maki, ĝoi na tu boriba-guineani. Moĝa lorinaĭ ĝavaĝa-moĝonimuni, ĝoi tu moĝoni Barau ĝenana oiaĝomato.”

³¹ Iesu na evaĝa-veserito, ekirato, “Mai vau ĝovaĝa-moĝoniguni, ei?”

³² Moĝoni, ĝarona mani eiaĝomani, varau beraĝasi, ĝomi tu boĝo raga-rovorovoni, tata ĝemi ura ragana boveini, benamo au tu ĝereĝagu boĝo iaĝui-momoragiĝuni. Senaĝi au tu dia ĝereĝagu, korana Tamagu tu au sevigu ai.

³³ Au aurani, au ĝegu ai boĝono kafakau, be au ĝegu ai maino boĝono ĝabi uranaĭ, au na maiĝeri guruĝa ĝomi bakira-varami. Mai tanobarai ĝotanuni nai, midigumidigu boĝo ĝoitagoani. Senaĝi boĝono kokore! Au na tanobara ĝena seĝuka avaga-ketoato.”

17

Iesu ĝena ĝuriĝuri

¹ Iesu moĝesi eguruĝa-ĝosito murinaĭ, egaga-raĝeto, guba eĝitaĭato, benamo ekirato, “Tamagu, horana tu maiĝa. Natumu marevana baregona novaĝa-foforia, be Natumu na ĝoi marevamu baregona maki bene vaĝa-foforia.

² Korana ġoi na maoro ġia oviniato, tarimarima mabarari ġia ġena veġitaġau gaburenai beġene tanu. Be ġoi na ġia oviniato tarimari mabarari maġuri vanaġivanaġi bene viniri.

³ Maġuri vanaġivanaġi tu maiġa: Maġuri vanaġivanaġi beġe ġabiani tarimari mabarari beġene riba, Barau moġonimu tu ġoi sebomu kwarigutu moġo, ema Iesu Keriso beġene ribaia. Iesu Keriso tu ġoi na otuġuato tanobara ġana.

⁴ Au na ġoi tanobarai bavaġa-raġemu. Ġoi na oviniguto bana veia otato ġauveina varau bavaġa-koria.

⁵ Tama, tanobara roġosi bere vesina ema au maki roġo ġoi ġesi atanuto-ġoi nuġanai, au ġegu ai tu mareva baregona etanuto-ġoi. Toma aurani, mo mareva ġoi tauġemu ġoiramu ai ġegu ai novaġa-foforia.”

Iesu ġena mero ġeri eġauġauto

⁶ “Tanobara maġurina nuġana na oġabi-vaġirito, benamo oviniguto tarimari ġeri ai ġoi tu avaġa-foforimuto. Moġeri tu ġoi ġemu tarimarima, ġoi na au oviniguto. Ma ġia na ġoi ġemu guruġa ġekorana-iaġiato.

⁷ Toma ġia beġe riba, ġoi na oviniguto dagarari mabarari tu ġoi ġemuna moġo ġeiaġomato.

⁸ Korana ġoi na oviniguto guruġari mabarari akira-vararito. Ġia na mo guruġa mabarari ġeġabi-raġerito, ma ġeriba-maoroto, au tu ġoi sevimu na aiagomato. Ema ġevaġa-moġoniani, au ġoi na otuġu-iaġomaguto.

⁹ Au tu ġia ġeri aġuriġurini. Au tu dia mai tanobara maġurinai ġetanuni tarimari ġeri aġauġauni. Senaġi au oviniguto tarimari ġeri aġauġauni, korana ġia tu ġoi ġemu tarimarima.

¹⁰ Au ġegu tarimarima mabarari tu ġoi ġemu tarimarima. Ema ġoi ġemu tarimarima mabarari tu au ġegu tarimarima. Ema ġia ġerina au aragu evarageini, korana au ġegu mareva baregona ġevaġa-foforiani.

¹¹ Au tu ġoi ġemu ai aiaġosini, mai tanobarai asi batanu-rovaġini. Senaġi ġia tu tanobarai roġo beġe tanuni. Tamagu Veaġamu, ġoi na au oviniguto tarimari ġoi aramu seġukana na bono ġitaġauri. Be ġia mabarari beġene sebona, ġita taura ruarua kavana.

¹² Au tanobarai roġo ġia ġesi atanuto-ġoi nuġanai, ġoi aramu seġukana na ġia anariġaurito-ġoi. Ġoi na au oviniguto tarimari tu aġitaġau-ginikaurito, be ta asi erekwarekwato; bene rekwarekwa tauna moġo, moġoni erekwarekwato, Buka Veaġai ġetoreato guruġana vaġa-moġonina ġana.

¹³ Senaġi toma au tu ġoi ġemu ai aiaġosini. Au tu roġo tanobarai maiġegu nuġanai, maiġeri guruġa bakiraġiri, au ġegu iaku e verere na ġia nuġari bene vaġa-vonuvonu raġeri ġana.

¹⁴ Ġoi ġemu guruġa au na ġia varau avinirito. Ma tanobara maġurinai ġetanuni tarimari na ġeiau-rakavarini, korana ġia toma tu dia mai tanobara tarimari, au kavana, au tu dia mai tanobara tarimagu.

¹⁵ Au tu dia ġia mai tanobara na bono ġabi-vaġiri ġuriġurina aveini. Senaġi anoġimuni, bono nariġauri, be Tarima Rakavana, Satani, na asi bene ġabiri atoni.

¹⁶ Ġia tu dia mai tanobara tarimari, au kavana, au tu dia mai tanobara tarimagu.

¹⁷ Ġoi ġemu guruġa moġonina na novaġa-veaġari; ġoi ġemu guruġa tu moġoni.

18 Ġoi na tanobara maġurinaġi ġetanuni tarimari fakari ai au otuġu-toġaġuto ilailanaġi, au na ġia maki tanobara maġurinaġi roġo ġetanuni tarimari veġaravari ai batuġu-toġari.

19 Ġia urari ai au tauġegu avevaġa-veaġani, be ġia maki beġene veaġa-korikori.”

Iesu eġuriġurito veġabidadama tarimari mabarari ġeri

20 “Au tu dia ġia ġena mero ġereġari ġeri moġo aġauġauni. Asiġi. Au tu ġia na vari beġea fiuani nai, au beġe vaġa-moġoniguni tarimari mabarari maki ġeri aġuriġurini.

21 Be ġia mabarari sebonai beġene iaġo, Tama, ġoi au nuġagu ai otanuni ema au ġoi nuġamu ai atanuni ilailana. Moġesi kavana au aurani, ġia maki beġene sebona moġo, ma ġita nuġarai beġene tanu, be tanobara maġurinaġi roġo ġetanuni tarimari beġene riba, au tu ġoi na otuġu-mariġogoto.

22 Ġoi na au mareva baregona oviniguto dagarana ġia avinirito, ġia sebonai beġene iaġo uranaġi, be ġita taura ruarua sebona kavana, ġia maki beġene sebona.

23 Au ġia nuġari ai, ma ġoi au nuġagu ai, be ġia maki beġene sebona-kwariguto korikori. Benamo monana tanobara maġurinaġi roġo ġetanuni tarimari beġene riba, au tu ġoi na otuġu-iaġomaġuto, ema beġene riba maki, ġoi na ġia oura-vinirini au oura-viniguni kavana.

24 Tama, au ġegu ura baregona tu, au ainai batanuni, au oviniguto tarimari maki au ġesi, be monai baġana tanu, be au mareva baregona oviniguto marevana beġene ġitaia. Mo mareva oviniguto, korana au ġoi na tu tanobara roġosi roġo boru veia nuġanaġi veġata oura-viniguto.

25 Tamagu o, ġoi tu vei-iobukaiobuka Baraumu, tanobara maġurinaġi ġetanuni tarimari na ġoi asi ġeribamuto. A au na tu ġoi aribamuto, ema au ġegu mero maġeri tu beġe riba, au tu ġoi na otuġu-mariġogoto.

26 Ġoi aramu ġia akira-vararito, e roġo bakiraġi-foforiani. Korana monana au oura-viniguni veuravinina ġia nuġari ai betanuni, ema au maki ġia nuġari ai batanuni.”

18

Iesu tuari tarimari na ġeġabiato

1 Iesu na mo ġauġau ekiraġi-ġosiato murinaġi, ġena mero ġesi ġerakato. Ġeiaġoto, Kidron ġarukana na ġeraka-vanaġito, reke ta ġana. Monai tu vamoka ta, ma ġena mero ġesi mo vamoka nuġana na ġeraka-toġato.

2 Iudas, Iesu erevaiato tarimana, maki mo gabu tu ma ribana, korana Iesu ma ġena mero ġesi monai ġaro vovoka ġetanu-vegogoto-ġoi.

3 Moġesina naima Iudas na Roma vetari tarimari e Rubu Veaġa ġitaġauna tarimari tari eġoririto. Mo Rubu Veaġa ġitaġauna tarimari tu Rubu Veaġa vereri baregori e Farisea tarimari na ġetuġurito. Benamo mo vamoka ġana ġeiaġoto, ma tosiri, ma lamefari, ema ma ġeri vetari farefareri.

4 Iesu tu ribana guine, ġia ġenai kara beġe ġorani dagarari mabarari, naima eiaġoto seviri ġana, benamo edanaġirito, ekirato, “Gomi na tu deikara ġovetauani?”

5 Ġia ġevaġa-veseto, ġekirato, “Iesu, Nasareta tarimana.” Iesu na ekirarito, ekirato, “Tarimana tu au.” Ma Iudas, Iesu erevaiato tarimana, maki ġia ġesi monai ruġataġo.

6 Iesu na ekirarito, ekirato, “Tarimana tu au,” etato nai, ġia mabarari ġeruġa-ġenoġoito, benamo tano ai ġeketo-tarito.

7 Iesu na ma edanaĝi-ĝenoĝoirito, ekirato, “Ĝomi na tu deikara ĝovetauani?” Benamo ĝia ĝekirato, “Iesu, Nasareta Tarimana.”

8 Iesu evaĝa-veseto, ekirato, “Au na bakirami, tarimana tu au. Bema ĝomi tu au moĝo ĝovetauguni nai, maĝeri tarima ĝotuĝuri, ĝeraka.”

9 Moĝesi ekirato, korana ĝia ĝena guruĝa tovotovonai ekiraĝiato guruĝana bene moĝoni ĝana, ekirato, “Au oviniguto tarimari tu sebona ta makŭ asi avei-rekwa-rekwaiato.”

10 Ma nuĝanai Simona Petero ĝimanai tu vetari baĝana ta. Mo vetari baĝana einu-vaĝiato, edaveato, benamo Rubu Veaĝa verena baregona ĝena vetuĝunaĝi-iaĝovini tarimana seĝana aroribana ebasi-vaĝiato. Mo vetuĝunaĝi-iaĝovini tarimana arana tu Malko.

11 Benamo Iesu na Petero ekiraiato, ekirato, “Ĝoi na mani vetari baĝana faosinai noĝura-toĝaia! Au Tamagu na bevinigu midigumidigu bedina tu asi bana niua, ei?”

Iesu Anas ĝenai ĝeĝori-iaĝoato

12 Benamo vetari tarimari ma ĝorikaŭri tarimana ema Iuda tarimari ĝeri Rubu Veaĝa ĝitaĝauna tarimari na Iesu ĝeĝabiato, benamo ĝebarbaruato,

13 benamo Anas ĝenai ĝeĝori-iaĝo guineato, korana Anas tu Kaiafas ĝena taĝama. Kaiafas na Anas natuna vavinena eĝaraĝoato. Kaiafas tu Rubu Veaĝa verena baregona mo laĝani ai.

14 Kaiafas na Iuda tarimari esisiba-vinirito, ekirato, “Namona tu tarima sebona ta moĝo tarimarima mabarari urari ai bene mase.”

Petero na Iesu ekira-ĝuniĝauato

Mataio 26:69-70; Mareko 14:66-68; Luka 22:55-57

15 Simona Petero e Iesu ĝena mero ta na tu Iesu ĝeraka-ĝiuato. Rubu Veaĝa verena baregona tu ma ribana, mo Iesu ĝena mero moĝa. Moĝesi nai ĝia makŭ Iesu ĝesi evaĝa-rakatoĝa sebonaiato, Rubu Veaĝa verena baregona ĝena numa maĝuna nuĝanai Kota gabunai.

16 Senaĝi Petero tu ĝatama-boka murikanai moĝo eruĝato. Ma mo Iesu ĝena mero, Rubu Veaĝa verena baregona na eribaiato merona, ma eĝenoĝoito, benamo ĝatama-boka eĝita-ĝauato ĝuiatona ea vaĝa-guruĝiato, ma Petero eĝori-toĝaiaato.

17 Benamo ĝatama-boka eĝita-ĝauato ĝuiatona na Petero ekiraiato, ekirato, “Ĝoi makŭ mai tarima ĝena mero ta, ene?” Petero evaĝa-veseto, ekirato, “Asiĝina, au tu asiĝi.”

18 Mo gabu faraka na eĝabiato, be vetuĝunaĝi-iaĝovini tarimari ema Rubu Veaĝa ĝitaĝauna tarimari na tu karava ta ĝetutuato. Benamo mo karava ĝeruĝa-ĝeĝeraĝiato, ĝevetunuto-ĝoi. Petero makŭ ĝia seviri ai eruĝato ma evetunuto-ĝoi.

Rubu Veaĝa verena baregona na Iesu edanaĝiato

Mataio 26:59-66; Mareko 14:55-64; Luka 22:66-71

19 Mo horai tu Rubu Veaĝa verena baregona na Iesu edanaĝiato, Iesu ĝena mero e ĝena vevaĝa-riba evedanaĝi-iaĝirito.

20 Iesu na evaĝa-veseato, ekirato, “Au tu tarimarima ĝutuma-bara ĝoirari ai aguruĝa-foforito. Au tu vanaĝivanaĝi Iuda tarimari ĝeri rubu ai ema Rubu Veaĝa nuĝari ai avevaĝa-ribato-ĝoi, ma Iuda tarimari ĝema-raka-vegogoni gaburi ai, au asi aguruĝa-vekuretoĝato.

21 Kara dainai au odanaĝiguni? Mo au aguruĝato ĝeseĝaĝiguto tarimari noa danaĝiri, ĝia ma ribari au na kara akiravara-vinirito.”

22 Iesu moġesi eguruġato nai, Rubu Veaġa ġitaġauna tarimana ta ġia sevinau eruġa-taġoto-ġoi, monana Iesu ġoirana eforo-bubuġauato. Benamo Iesu ekiraiato, ekirato, “Ġoi mai Rubu Veaġa verena baregona tu maniġesi ovaġa-guruġaiani?”

23 Iesu na evaġa-veaseato, ekirato, “Bema au na guruġa rakavana ta bakiraġia nai, nokiraġia, kamara guruġa rakavana! Senaġi bema au tu baguruġa-korikori, kara dainai boforogu.”

24 Benamo Anas na Iesu roġo varo na barubaru Rubu Veaġa verena baregona Kaiafas ġenai etuġu-iaġoato.

Petero na Iesu ma ekira-ġuniġau ġenoġoito

Mataio 26:71-75; Mareko 14:69-72; Luka 22:58-62

25 Simona Petero tu roġo ruġatago karava i evetunuto-ġoi. Benamo karava sevinau ġeruġa-vegogoto tarimari na ġedanagiato, ġekirato, “Ġoi maki ġia ġiena mero ta, ene?” Petero evekira-ġuniġauto, ekirato, “Asiġina, au tu asiġi.”

26 Rubu Veaġa verena baregona ġena vetuġunaġi-iaġovini tarimana ta tu mo Petero na seġana ebasi-vaġiato tarimana garagarana ta, ġia ekirato, “Au atuġamaġini tu, ġoi maki ġia ġesi mo vamoka nuġanai aġitamuto banaġu, ene?”

27 Petero ma evekira-ġuniġau ġenoġoito, ma nuġanai asikauna tu kokoroku egoġito.

Iesu Pilato ġoiranai

Mataio 27:1-2 ema 27:11-14; Mareko 15:1-5; Luka 23:1-5

28 Benamo Iuda tarimari na Iesu Kaiafas sevina na ġeġori-iaġoato Roma ġeri gavana ġena numa barana ġana. Mo tu varau ekini-mama mamato-ġoi. Ma Iuda tarimari tu asi ġeurato, Roma ġeri gavana ġena numai beġene raka-toġa, korana ġekirato, veiareva, asi rakavari, beġene tanu. Ġia ġeri ura tu Pasova o mase aneruna na Isaraela tarimari evanaġirito moġo asi evaġirito verekona beġene ġania veġata.

29 Benamo Pilato ġeri ai eraka-rosito, benamo ekirato, “Mai tarima boġo ġabi-iaġomaia ġena kerere korana tu kara?”

30 Ġia na ġevaġa-veaseato, ġekirato, “Bema ġia veiġa rakavari asi bere vei nai tu, ġoi ġemu ai asi baġara ġabi-iaġomaia.”

31 Benamo Pilato na ekirarito, ekirato, “Ġoġabia, ma ġoġori-iaġoa, benamo ġemi taravatu ekirani ilailanai ġoa vaġa-kotaia.” Moġesi naima Iuda tarimari na Pilato ġekiraiato, ġekirato, “Ġai ġema taravatu na tu maoro asi evinimani, tarima ta baġana vaġi-masea.”

32 Maġa eġorato anina tu, Iesu na ġia aiġesina bemaseni ekiraġiato guruġana bene moġoni ġana.

33 Benamo Pilato numa barana ġana ma erakatoga-ġenoġoito, bema Iesu ekeaiato, ma edanagiato, “Ġoi tu Iuda tarimari ġeri vere ba?”

34 Iesu na evaġa-veaseato, ekirato, “Ġoi maniġesi au okiraġini tu tauġemu nuġamu siga moġo oguruġani ba tarima tari na beġe kira-varamu guruġana.”

35 Pilato evaġa-veseto, ekirato, “Be, au tu Iuda tarimagu, ei? Ġoi tu ġemu tanobara tarimari na ema Rubu Veaġa vereri na beġe ġabi-iaġomamu, au beġema vinigu. Ġoi tu kara kererena oveiato?”

36 Iesu na evaġa-veaseato, ekirato, “Au ġegu Basileia tu dia mai tanobara dagarana. Bere au ġegu Basileia mai tanobara nuġanai bere vetore e

bere ruġa nai tu, au ġegu vetuġunaġi-iaġovini tarimari ġere varigġisi, Iuda tarimari ġesi ġere vevaġi, ma tarima ta maki asi bere ilaila, Iuda tarimari ġimari ai bere toregu. Senaġi au ġegu Basileia tu dia mai tanobara nuġanai eruġani.”

³⁷ Pilato na moġesina naima Iesu edanaġiato, ekirato, “Be ġoi tu vere ba?” Iesu evaġa-veseto, ekirato, “Ġoi okirani au vere otoni tu moġoni oguruġani. Au tanobarai ama maġurito tauna korikori, guruġa moġonina bana vaġa-foforia ġana. Guruġa moġoninai ġetanuni tarimari mabarari na au garogu tu ġeseġaġiani.”

³⁸ Pilato ekirato, “Guruġa moġonina tu kara?”

Iesu bene mase guruġana

Mataio 27:15-31; Mareko 15:6-20; Luka 23:13-25

Moġesi eguruġato murinai, ma eraka-rosito Iuda tarimari ġeri ai, benamo ekirarito, ekirato, “Au na mai tarima ġenai rakava ta tu asi badoġaria.

³⁹ Senaġi ġomi ġemi veġa ta tu inġesi, Pasova verekona ġaronai, dibura tarimana ta bana tuġu-vaġia. Be ġomi ġourani tu, ġemi Iuda tarimari ġeri vere natuġu-vaġia, ba?”

⁴⁰ Benamo ġia mabarari ġekoġoto, ġekirato, “Asiġina! Ġia tu asiġi! Senaġi Barabas.” A Barabas tu elemato-ġoi e evevaġito-ġoi naima ġediburaiato.

19

¹ Moġesi naima Pilato na Iesu eġabiato, vetari tarimari o soldia evinirito, benamo ġekwariato.

² Ema soldia na varovaro ma giniri dagarana ġebito-ġeġeraġiato, korona noġa ġeveiato, benamo Iesu debanai ġetore-kauato. Ema dabuġa maukana kakakakana na ġevaġa-dabuġiato.

³ Benamo ġoirana ġana ġeraka-kavito, benamo ġekiraiato, ġekirato, “Iuda tarimari ġeri Vere, ġaro namona!” Benamo ġoirana ma ġeforoato.

⁴ Pilato ma eraka-rosito Iuda tarimari ġeri ai, benamo ekirarito, ekirato, “Ġoġitaia, au na ġia ġomi ġoirami ai ama ġori-rosiani anina tu nama vaġa-ribami, au na ġia ġenai rakava ta tu asi badoġaria.”

⁵ Benamo Iesu ema raka-rosito, debana tu ma koronana, ġau ma giniginina ġevatoato dagarana, ema dabuġa kakakakana maki roġo etogi-taġoato-ġoi. Benamo Pilato na Iuda tarimari ekirarito, ekirato, “Ġoġitaia, tarimana tu maġa.”

⁶ Moġesi Rubu Veaġa vereri baregori ma ġeri vetuġunaġi-iaġovini tauri na ġeġitaiao nai, ġefararato, ġekirato, “Ġovaġa-satauroa! Ġovaġa-satauroa!” Benamo Pilato na ekirarito, ekirato, “Ġomi tauġemi na ġoġabi-iaġoa, ma ġoa vaġa-satauroa, korana au na ġia ġenai kerere ta asi badoġaria.”

⁷ Ma Iuda tarimari na ġevaġa-veseato, ġekirato, “Ġai tu ma ġema taravatu, ma ġai ġema taravatu ekirani, ġia tu bene mase veġata, korana ġia tu tauġena moġo Barau Natunai bevevaġa-iaġo.”

⁸ Pilato na mo guruġa eseġaġiato nai, egari-rakava rakavato.

⁹ Benamo numa baregonai ma eraka-toġato, benamo Iesu ekiraiato, ekirato, “Ġoi tu ainana oiaġomato, ei?” Senaġi Iesu na asi evaġa-veseato.

¹⁰ Benamo Pilato na ekiraiato, ekirato, “Ġoi tu asi ourani au vaġa-vesegu ei? Ġoi asi ribamu au tu ma ġegu seġuka ġoi bavaġa-satauromuni, e ma ġegu seġuka ġoi batuġu-vaġimuni?”

11 Iesu evaḡa-veseto ekirato, “Bere Barau na guba na ḡoi seḡuka asi bere vinimu nai tu, toma au ḡoi ḡemu seḡuka gaburenai asi bara ritoḡo. Moḡa lorinai, au eḡabiguto ma ḡoi ḡimamu ai etoreguto tarimana, ḡena rakava tu barego lelevaḡi”.

12 Pilato na mo guruḡa eseḡaḡiatio, benamo dabara evetauto-ḡoi, ḡena ura Iesu bene tuḡu-vaḡia. Senaḡi Iuda tarimari roḡo ḡekoḡoto-ḡoi, ḡekirato-ḡoi, “Bema ḡoi na mai tarima botuḡu-vaḡiani nai, ḡoi tu dia Kaisara ḡatana. Kamara tarima tauḡena evekiragini vere etoni, ḡia na tu Kaisara, Roma ḡeri vere, ekira-fitoḡaiani.”

13 Pilato na mo guruḡa eseḡaḡiatio, benamo Iesu ema ḡori-rosiatio, benamo eiagoto, Kota eseḡaḡini tarimana ḡena sea ai ea tanukauto. Mo gabu tu “Fore Touraḡena” ḡetato-ḡoi. Ma Heberu garonai tu “Gabata.”

14 Mo ḡaro tu Pasova o Iuda tarimari mase aneruna na evanaḡirito moḡo verekona ḡana rovinatore ḡarona, ma horaḡauna 12 koloko tu varau eḡabiatio. Benamo Pilato na Iuda tarimari ekirarito, ekirato, “Goboḡe, ḡemi vere iomaḡa!”

15 Senaḡi ḡia tu ḡefararato, ḡekirato, “Ḡoḡabi-veḡitaia! Ḡoḡabi-veḡitaia! Ḡoa vaḡa-satauroa!” Pilato na ma edanaḡirito, ekirato, “Ḡomi ḡemi vere tu navaḡa-satauroa, ei?” Rubu Veaḡa vereri baregori ḡevaḡa-veseto, ḡekirato, “Kaisara ḡereḡana moḡo ḡai ḡema vere, ma vere boruna ta tu asiḡina.”

16 Benamo Pilato na Iesu ḡia ḡimari ai etore-kauato beḡene vaḡa-satauroa ḡana.

Iesu ḡevaḡa-satauroato

Mataio 27:32-44; Mareko 15:21-32; Luka 23:26-43

Benamo vetari tarimari o soldia na Iesu ḡeḡabiatio, ḡeḡori-iaḡoato.

17 Ma Iesu na ḡena satauro efaḡa-vaisiatio, eraka-rosito, eiagoto gabu arana “Deba Ḡavana Gabuna” ḡana. Heberu garonai mo gabu arana tu “Golgota”.

18 Mo gabu ai ḡia na Iesu ḡevaḡa-satauroato tarima ruarua ḡesi; ta tavi tai, ta tavi tai, ma Iesu tu nuḡanai.

19 Ma Pilato na guruḡa tari ḡau lefalefa tai etorerito, benamo satauro tuḡunai ḡeikoko-kafakauato. Etorerito guruḡari tu maḡeri, “IESU, NASARETA TAUNA, IUDA TARIMARI ḠERI VERE.”

20 Mo guruḡa tu Heberu garo ai, e Roma garo ai, ema Grik garo ai etorerito. Iesu ḡevaḡa-satauroato gabuna tu vanuḡa baregona sevinai, be Iuda tarimari vovoka na mo guruḡa debana ḡeiaviatio.

21 Benamo Rubu Veaḡa vereri baregori na Pilato ḡekiraiatio, ḡekirato, “‘Iuda tarimari ḡeri Vere’ tu asi notorea, senaḡi iniḡesi notorea, ‘Ḡia ekirato, au tu Iuda tarimari ḡeri Vere.’”

22 Ma Pilato na evaḡa-veserito, ekirato, “Kara au na batorea guruḡana tu batorea veḡata.”

23 Vetari tarimari na Iesu ḡevaḡa-satauroato murinai, ḡena dabuḡa ḡeḡabirito, ma karava vasivasi ḡeveirito, benamo vetari tarimari na ḡeri sebori sebori ḡeḡabito, ma vei-gabigabi dabuḡana tu ḡeiaguiatio. Korana vei-gabigabi dabuḡana tu dabuḡa sebona na moḡo ḡeturiatio. A ḡia tu dia dabuḡa vesavesari vovoka ḡeturi-kavikavito vau ḡeveiatio dabuḡana.

24 Moḡesina naima tauḡeri fakari ai ḡeguruḡa-vegogoto, ḡekirato, “Asi sidarea, senaḡi laki ḡerena ta siveia, bewinini tarimana na mo dabuḡa bene ḡabia uranai.” Mai veḡa ḡeveiatio tauna korikori tu, Buka Veaḡai ḡetorerito

guruḡari beḡene moḡoni ḡana, maiḡesi ekirani, “Au ḡegu dabuḡa ḡia fakari ai ḡekaravarito, ema au ḡegu dabuḡa uranai laki ḡerena ta ḡeveiato.” Moḡesi naima vetari tarimari na maiḡeri veiḡa ḡeveirito.

²⁵ Iesu ḡena satauro koranai tu vavine vasivasi (4) ḡeruḡa-taḡoto-ḡoi: Iesu sinana, e Iesu sinana tarina vavinena, e Maria, Klopa ḡaraḡona, ema Maria, Magadala vanuḡana vavinena.

²⁶ Iesu na sinana e Iesu na eura-viniato-ḡoi merona monai ruḡataḡo eḡitarito, benamo Iesu na sinana ekiraiato, ekirato, “Natumu merona maniga.”

²⁷ Ema ḡena mero ekiraiato, ekirato, “Sinamu maniḡa.” Mo ḡaro na evesinato, Iesu ḡena mai mero na Iesu sinana ḡena numa ḡana eḡori-iaḡoato, benamo enariato-ḡoi.

Iesu ḡena mase

Mataio 27:45-56; Mareko 15:33-41; Luka 23:44-49

²⁸ Moḡa murinai Iesu eribato, ḡena ḡauvei mabarari tu varau bevaḡa-koriri. Ma Buka Veaḡai ḡetoreato guruḡana bene moḡoni uranai ekirato, “Au bokagu bekoke.”

²⁹ A gwaḡutu ta nuḡanai tu vine nanuna mamakina monai toretaḡo. Nanu erimaiani dagarana mo vine nanuna mamakinai ḡeduḡi-fereiato. Ma vine nanuna mamakina na evonuto, benamo isopo legana dudunai ḡetore-kauato, benamo ḡeduḡi-varaḡeato, Iesu bokanai ḡetore-kauato.

³⁰ Iesu na mo vine nanuna mamakina eniuato, benamo ekirato, “Bemakori.” Ma debana eḡero-riḡoto, benamo tauḡanina na ḡia iaukana erakavaḡito, emaseto.

Soldia ta na Iesu sebina egwanuato

³¹ Mo ḡaro moḡa tu rovinatore ḡarona, korana beboḡini ma belaganini tu Sabadi veaḡana baregona ta mo Pasova o Iuda tarimari mase aneruna na evanaḡirito moḡo verekona ḡarori nuḡari ai. Moḡa lorinai Iuda tarimari asi ḡeurato, mo Sabadi veaḡana baregonai mase tarimari tauḡaniri satauro tuḡunai beḡene tanu. Moḡesi naima Pilato ḡenogiato, Iesu ema mo tarima ruarua kwakuri beḡene kwari-koruri, benamo satauro tuḡuna na beḡene ḡabi-riḡori.

³² Moḡa lorinai vetari tarimari ḡeiaḡomato, benamo ḡevaḡa-satauro debaiato tarimana kwakuna ḡekwari-koruato, ma tarima vaḡa-ruaruana Iesu ḡesi ḡevaḡa-satauroato moḡa maki moḡesi ḡeveiato.

³³ Senaḡi Iesu ḡenai ḡeiaḡomato nai, Iesu tu varau emaseto ḡeḡitaiao, be kwakuna asi ḡekwari-koruato.

³⁴ A vetari tarimana ta na moḡo Iesu sebina garaḡota na egwanuato. Benamo asikauna mo egwanuato gabuna na rara e nanu ḡevebubu-rosito.

³⁵ Maiḡa eḡitaiao tarimana na evari-fiuato, ma ḡia ḡena vevarifu tu moḡoni. ḡia ma ribana, ḡia tu eguruḡa-korikorini, ma ḡia na ekiraḡi-foforiani anina tu, ḡomi na maki boḡono vaḡa-moḡonia ḡana.

³⁶ Maiḡeri veiḡa ḡeveirito korana tu, Buka Veaḡai ḡetorerito guruḡari beḡene moḡoni, ekirani, “ḡia tu turiḡana sebona ta maki asi beḡe lau-kuarani.”

³⁷ Ma Buka Veaḡai etoreato guruḡana ta tu maiḡesi ekirani, “Sebina ḡegwanuato tarimana ḡenai ma beḡe boḡe-raḡeni.”

Iesu ḡeguriato

Mataio 27:57-61; Mareko 15; 42-47; Luka 23:50-56

³⁸ Maīga murinai Iosefa, Arimatea tarimana, na Pilato enoġiato, Iesu tauġanina bene ġabia ġana. Pilato na maoro eviniato, benamo eiaġoto, Iesu tauġanina ea ġabiato. Iosefa tu Iesu ġena mero ta, senaġi Iuda tarimari gariri eveito-ġoi, be eraka-vekuretoġato-ġoi, ġena vegabidadama asi evaġa-foforito-ġoi.

³⁹ Nikodemo, tovotovonai Iesu ġenai boġi eiaġoto tarimana, maki eiaġoto. Ġia na tu muro e aloe ġegiro-sebonarito muramurana kilogram gabana toitoi (30) maki eġabi-kauato. (Mo vedau muramurana bonana tu namo vedaurea).

⁴⁰ Benamo Iesu tauġanina ġeġabiato, ma tauri ruarua na dabuġa kurokurona namona mamuramurana dagarana na ġekumuato, Iuda seneri na mase tarimari ġeveirito-ġoi ilailanai.

⁴¹ Iesu ġevaġa-satauroato gabuna tu ma vamokana. Mo vamoka nuġanai tu gara kouġana ta fore na ġeveiato, ma nuġanai tarima ta tu roġosi beġere tore-toġaia.

⁴² Mo ġaro moġa tu Iuda tarimari ġeri rovinatore ġarona, ema mo gara kouġana maki kavinaġi, be Iesu ġeġabiato, monai ġea tore-toġaiao.

20

Gara kouġana tu korina

Luka 24:1-12

¹ Sabadi ġarona murinai, Sandei boġiboġi iamoiamo, roġo mukunamukunai, Maria, Magadala vavinena, gara ġana eiaġoto. Benamo eboġeto, gara ġatama bokana ġetabe-ġauato forena tu ġeġabi-veġitaiato, be irau ai vetore eġitaiato.

² Benamo eraga-ġenoġoi-iaġomato, Simona Petero e Iesu ġena mero ta, Iesu na eura-viniato-ġoi merona, ġeri ai, benamo ekirarito, ekirato, “Vereġauka tu gara na beġe ġabi-rakaia, ma ġita asi ribara ainai beġe torea.”

³ Benamo Petero ema Iesu ġena mo mero ta moġa ġeraka-rosito, benamo gara ġana ġeiaġoto.

⁴ Ma tauri ruarua ġeraga-vegogo-iaġoto, senaġi Iesu ġena mo mero ta na Petero eraga-kwaneato, ma gara forenai ea raġasi-guineto.

⁵ Etoġa-tarito, benamo eboġe-toġato, Iesu ġekumuato mo dabuġa kurokurona eġitaiato monai toretari. Ġia tu eboġe-toġato moġo, asi eraka-toġato.

⁶ Benamo Simona Petero eraġasito, benamo eraka-toġato gara kouġana nuġanai, ma Iesu ġekumuato dabuġa kurokurona eġitaiato monai toretari,

⁷ ema Iesu debana mabarana ġebaru-ġauato mukona eġitaiato, Iesu tauġanina ġekumu-ġauato mo dabuġa kurokurona ġesi tu asi tore-sebona. Senaġi mo muko tu ġereġana iokuioku, be irau ai.

⁸ Benamo Iesu ġena mo mero ema raġasi-guineto, moġa maki eraka-toġato. Moġeri dagara eġitarito, benamo evaġa-moġoniato.

⁹ Korana ġia na Buka Veaġai evetoreto guruġana tu roġosi roġo beġene riba-korikorria, guruġana tu maīga: Iesu tu mase na ma bevariġisi-ġenoġoini.

¹⁰ Benamo Iesu ġena mero ruarua ma ġeġenoġoito ġeri numa ġana.

Iesu tu Maria, Magadala vavinena, ġenai efoforito

11 Senaġi Maria tu gara kouġana murikanai eruġato vau etaġito-ġoi. Ma etaġito-ġoi nuġanai etoġa-tarito, benamo eboġe-toġato fore kouġana nuġana ġana.

12 Benamo aneru ruarua eġitarito, dabuġa kurokuro ġetogito, Iesu ġevaġa-ġenaiato gabunai tanutaġo. Ta tu debakanai etanuto, ma ta tu gabikanai etanuto.

13 Benamo mo aneru ruarua na ġekiraiato, ġekirato, “Vavine, ġoi tu karase nai otaġini?” Maria na evaġa-veserito, ekirato, “Korana au ġegu Vereġauka tu beġe ġabi-rakaia, ma au asi ribagu ainai ma beġea torea.”

14 Maiġesi eguruġa-ġosito murinai, eboġe-ġeġeraġito tu, Iesu monai ruġataġo eġitaiato. Senaġi Maria tu asi eriba-maoroto, mo tu Iesu eruġa-tagoto-ġoi.

15 Iesu na ekiraiato, ekirato, “Vavine, ġoi tu kara dainai otaġini?” Ġoi tu deikara ovetauani?” Maria etuġamaġito, Iesu tu mo vamokai eġaukarani tarimana, be ekiraiato, ekirato, “Verebara, bema ġoi na boġabi-rakaia nai tu, ainai botorea gabuna nokira-varagu, be naġabia.”

16 Iesu na ekiraiato, ekirato, “Maria!” Maria eruġa-kureto, benamo ekiraiato Heberu garo ai, ekirato, “Raboni!” Mai guruġa tauna tu, “Vevaġa-riba Tauna.”

17 Iesu na ekiraiato, ekirato, “Au asi noġabi-tarigu, korana au tu Tamagu ġenai roġosi roġo bara varage. Senaġi noiaġo au tarikakagu ġeri ai, benamo bono kirari, ‘Au tu au Tamagu e ġomi Tamami, ema au ġegu Barau e ġomi ġemi Barau ġenai avarage.’”

18 Maria, Magadala vavinena, Iesu ġena mero ġeri ai eiaġoto, benamo ekirarito, ekirato, “Au na Vereġauka tu baġitaia.” Benamo Vereġauka na evaġa-guruġaiato guruġari mabarari maki ma ekira-vararito.

Iesu ġena mero ġeri ai eforito

Mataio 28:16-20; Mareko 16:14-18; Luka 24:36-49

19 Mo Sandei boġi ai, mo tu ġaro giniguinena fura ta nuġanai, Iesu ġena mero tu numa tai ġevegogoto. Ġia tu Iuda tarimari gariri ai, be ġeri numa ġatama bokana tu ġebiri-ġauato. Ma Iesu eiaġomato, ġia fakari ai eruġa-tarito, benamo ekirato, “Asi ġogari, nuġami ai maino netanu.”

20 Moġesi eguruġa-ġosito murinai, ġimana ġeikokorito e sebina ġegwanuato moġeri evaġa-ġitarito. Vereġauka ġeġitaiato nai, ġeikukuravato.

21 Benamo Iesu na ġia ma ekirato, “Asi ġogari, nuġami ai maino netanu! Tamagu na au etuġuguto kavana, au na maki ġomi atuġumini.”

22 Moġesina evaġa-guruġa ġosirito murinai, iaġana efururu-iaġoato ġeri ai, benamo ekirarito, ekirato, “Iauka Veaġa ġoġabia.

23 Gomi na ġena rakava boġo tuġamaġi-fitoġaiani tarimana, ġena rakava tu Barau na maki betuġamaġi-fitoġaiani. A ġena rakava asi boġo tuġamaġi-fitoġaiani tarimana tu, ġena rakava Barau na maki asi betuġamaġi-fitoġaiani.”

Iesu Tomasi ġenai eforito

24 Senaġi Tomasi tu Iesu ġena mero ġeri ai eiaġoto ġaronai ġia tu asiġina. Tomas arana ta tu Didimo o Kafa, ema ġia maki Iesu ġena mero ta mo mero gabanana ruarua (12) nuġanai.

25 Moġesina nai Iesu ġena mero na ġekira-varaiato, ġekirato, “Vereġauka tu ġai na baġa ġitaia.” A Tomasi tu ekirato, “Au tu ġimana ġeikokorito gaburi

baġitarini, ema didigu ikoko ġeraka-toġato gaburi na baduġi-toġaiani, e sebina ġegwanuato, monana didigu baduġi-toġaiani vau, bavaġa-moġoniani.”

²⁶ Ġaro imaima toitoi (8) ġekorito murinai, Iesu ġena mero tu numa nuġanai maia, ma mo ġaro ai tu Tomasi maki ġia ġesi. Mo numa ġatama bokana tu biribiri, senaġi Iesu tu eiaġomato, fakari ai eruġa-tarito, benamo ekirato, “Asi ġogari, nuġami ai maino netanu.”

²⁷ Benamo Tomasi ekiraiato ekirato, “Tomasi, ġimagu noġitari, didimu mai ikoko gaburi ai noma duġi-toġaia. E ġimamu notuġu-iaġomaia, be didimu au sebigu ġegwanuato mainai noma duġi-toġaia. Gemu daradara novaġa-dokoa, ma novaġa-moġonigu.”

²⁸ Benamo Tomasi na Iesu evaġa-veseato, ekirato, “Au ġegu Vereġauka ema ġegu Barau.”

²⁹ Iesu na ekiraiato, ekirato, “Tomasi, ġoi tu ovaġa-moġoniguni, korana boġitagu nai. A asi ġeġitaguni, senaġi ġevaġa-moġoniguni tarimari tu beġene iaku.”

Mai buka Ioane na etoreato anina tu kara

³⁰ Iesu na vetoġa boruri ġutuma ġena mero ġoirari ai eveirito. Senaġi moġeri mai bukai tu asi atorero.

³¹ A maiġeri atorero korana tu, ġomi na Iesu boġono vaġa-moġonia, ġia tu moġoni Keriso, Barau Natuna. Ma bema ġomi na ġia boġo vaġa-moġoniani nai, ġia aranai maġuri vanaġivanuġi boġo ġabiani.

Iesu mero imaima ruarua (7) ġeri ai eforito

21

¹ Moġa murinai Tiberia kouna rikinai Iesu ġena mero ġeri ai ma eforito. Monai tu maiġesi eforito:

² Simona Petero; Tomasi, arana ta tu Didimo o Kafa; Natanaela, Kana vanuġa tarimana, Kana tu Galilea tanonai; Sebedaio natuna ruarua; ema Iesu ġena mero ruarua; mabarari monai ġetanu-vegogoto-ġoi.

³ Benamo Simona Petero na ekirarito, ekirato, “Au tu kou ġana maina aiaġoni.” Ma mo kotari ġekirato, “Ġai maki ġoi ġesi taiaġoni.” Benamo tauri imaima ruarua (7) ġeraka-rosito, ġeiaġoto, ġasi ai ġea raġekauto, benamo ġea mainato. Senaġi mo boġi barabara nuġanai tu maġani-kone ta maki asi ġegoitaġoato.

⁴ Boġiboġi iamoiamo Iesu tu kou rikinai eruġa-taġoto-ġoi; senaġi ġena mero tu asi ġeriba-maoroto, mo tu Iesu eruġa-taġoto-ġoi.

⁵ Benamo Iesu na ekirarito ekirato, “Natugu, ġomi ġemi ai maġani-kone tari maniġeri, ba?” Ġia na ġevaġa-veseato, ġekirato, “Asiġina.”

⁶ Benamo Iesu na ekirarito, ekirato, “Reke ġasi aroribana rekena na ġofiu-riġoa, maninai tu maġani-kone tari boġo ġoitaġoni.” Reke ġefiu-riġoato, benamo ma ġeinu-raġea ġetato nai tu ġeinu-kavaiato meto fanifani, korana tu maġani-kone vovoka taġutabu ġevaġa-toġarito bene.

⁷ Iesu ġena mero ta tu Iesu na eura-viniato-ġoi merona. Mai mero na Petero ekiraiato, ekirato, “Vereġauka tu iomoġa.” Simona Petero na mo guruġa eseġaġiato, “Vereġauka tu iomoġa” nai, asikauna ġena dabuġa eraga-veiato, benamo kou ai ebaba-reito. Mo dabuġa tu, eġauveito-ġoi be ekokiato.

⁸ Senaġi Iesu ġena mero kota tu mo bouti na vau ġeleva-iaġoto. Mo reke ma maġani-konena maki ġeinukau-iaġo sebonaiato. Korana ġia na mo reke

gefifu-riḡoato gabuna ema fenu fakari tu asi manaḡa, mita sinau sebona (100) kavana moḡo.

⁹ Fenu ai ḡea darokauto nai, ḡeboḡeto tu karava vaḡa-ḡara ḡeḡitaiato, e maḡani-kone karava torekau ḡeḡitarito, ema beredi tari maki monai toretaḡo.

¹⁰ Ma Iesu na ekirarito, ekirato, “Ḡomi na reke ai boḡo vaḡa-toḡari maḡani-koneri tari ḡoḡabi-iaḡomari.”

¹¹ Simona Petero ḡasi ai eraḡekauto, benamo reke fenu ai einu-raḡeato. Mo reke tu maḡani-kone baregori na evonuto, mo maḡani-kone baregori tu mabarari sinau sebona gabana imaima ma toitoi (153), ḡutuma lelevaḡi, senaḡi reke tu asi evedareto.

¹² Iesu na ekirarito, ekirato, “Ḡoiḡoma, ḡoma ḡaniḡani.” Iesu ḡena mo mero moḡeri ta na Iesu tu iniḡesi asi ma ḡedanāḡiato, “Ḡoi tu dei, ei?” Korana ḡia ribari, mo tu Vereḡauka.

¹³ Iesu eiaḡomato, beredi eḡabiato, benamo evinirito, ma maḡani-kone maki moḡesi eveirito.

¹⁴ Mai tu nega vaḡa-toitoina ḡena mero ḡeri ai efororito, Barau na mase na evaga-variḡisi ḡenoḡoiato murinai.

Iesu na Petero elauḡaiato

¹⁵ Ḡeḡaniḡani-ḡosito murinai, Iesu na Petero ekiraiato, ekirato, “Simona, Ioane natuna, ḡoi na au oura-viniguni veuravinina na maḡeri ḡeri veuravini au ḡegu ai ḡetoreani maki evanāḡiani, ei?” Petero ekirato, “Oi Vereḡauka, ḡoi ma ribamu, au na ḡoi tu aura-vinimuni.” Iesu na ekiraiato, ekirato, “Au ḡegu mamoe naturi bono ḡuburi.”

¹⁶ Iesu na ma edanaḡi-ḡenoḡoiato, ekirato, “Simona, Ioane natuna, au oura-viniguni, ei?” Petero evaḡa-veseto, ekirato, “Oi Vereḡauka, ḡoi ma ribamu, au na ḡoi tu aura-vinimuni.” Iesu ekirato, “Au ḡegu mamoe bono nari-ginikauri.”

¹⁷ Iesu na Petero vaḡa-toitoina ma edanaḡiato, ekirato, “Simona, Ioane natuna, ḡoi na au oura-viniguni, ei?” Petero enuḡa-metoto, korana Iesu na mo tu vaḡa-toitoina edanaḡiato, “Ḡoi au tu oura-viniguni, ei?” Petero ekirato, “Vereḡauka, ḡoi tu dagara mabarari ma ribamu, e ḡoi ma ribamu, au na ḡoi tu aura-vinimuni.” Iesu ekirato, “Au ḡegu mamoe bono ḡuburi.”

¹⁸ Akira-korikorimuni, ḡoi variḡumu ai tu, tauḡemu na gabakamu gabaḡau na obaruato-ḡoi, benamo oura-vinirito-ḡoi gaburi ḡana oiaḡoto-ḡoi. Senaḡi ḡoi boḡaukani nai tu, ḡimamu botuḡu-roroḡotoani, benamo tarima ta na ḡimamu bebaruani, benamo beḡori-kaumuni, ma asi oura-viniani gabuna ḡana beḡori-iaḡomuni.”

¹⁹ Iesu na mai guruḡa ekiraḡiato tu, Petero bemaseni dabarana ema ḡena mase na kamasi Barau bevaḡa-raḡe baregoani, etore-rosiato. Benamo Petero ekiraiato, ekirato, “Au murigu ai noma raka.”

Iesu ma ḡena mero ta

²⁰ Petero eruḡa-kureto tu, Iesu na eura-viniato-ḡoi merona eḡitaiato, muriri na eraka-iaḡoto-ḡoi. Mai mero tu, mo Iesu ḡeḡaniḡani-vegogoto lavilavinai Iesu ḡenai evetabekauto, benamo edanaḡiato, ekirato, “Vereḡauka, ḡoi berevamuni tarimana tu dei, ei?”

²¹ Petero na mo mero (o Ioane) eḡitaiato, benamo Iesu ekiraiato, ekirato, “Senaḡi Vereḡauka, ḡia maḡurina tu aiḡesi ei?”

²² Iesu na evaḡa-veſeato, ekirato, “Bema au baurani, ḡia tu maḡuri bene tanu mo, au ma baḡenoḡoini, ḡoi tu asi ḡemu ḡauvei ta maniḡa ovedanaḡi-iaḡiani. Ḣoi tu au murigu ai noma raka.”

²³ Mai guruḡa dainai, tarikaka veḡabidadama nuḡanai fakari guruḡa leileiri ḡekiraḡirito-ḡoi, ḡekirato, “Iesu ḡena mai mero maiḡa tu asi bemaseni.” Senaḡi Iesu tu asi ekirato, mo mero tu asi bemaseni. Iesu maiḡesi moḡo ekirato, “Bema au baurani, ḡia tu maḡuri bene tanu mo, au ma baḡenoḡoini, ḡoi tu asi ḡemu ḡauvei ta maniḡa ovedanaḡi-iaḡiani.”

²⁴ Mo Iesu ḡena mero dagarana tu maiḡa, maiḡeri guruḡa evari-fiurini ema etorerini maiḡa. Ḣita ribara, ḡia ḡena vevarifu guruḡari tu moḡoni.

²⁵ Iesu na dagara tu vovoka eveirito. Bere mabarari ḡere toreri nai tu, au atuḡamaḡini, mai tanobara ḡabuna mabarana tu bere kei, asi veḡata bere ilaila, moḡeri buka mabarari ḡetore-vegogori ḡana uranai tu-na.

APOSTOLO ĞERI VEIĜA E ĞAUVEI

Apostolo ĝeri ĝauvei e veiĝa vaĝa-foforiri guruĝari

Mai apostolo ĝeri ĝauvei e veiĝa bukana anina baregona tu Iauka Veaĝa Barau ĝenana emariĝoto ema apostolo ĝerina ema ĝauveito variri.

Mai buka maki Luka na Teofilo ĝena ma etoreato. Etoreato laĝanina tu laĝani 63 beiaĝo 68 fakari ai ta kavana, mo tu Iesu emaseto murinai.

Guruĝa baregori Luka na Teofilo mai fefai evaĝa-ribaiato tu maiĝeri: 1) Kamasi ekalesia doĝorori ĝevesinato; 2) ma kamasi tanobara mabarana ekalesia doĝorori na evaiato; 3) kamasi Keriso guba na Iauka Veaĝa ĝenana mai tanobarai ĝena ekalesia doĝorona eragaiani; 4) ekalesia mabarari Iauka Veaĝa na bene vaĝa-vonuri, korana ĝia ĝenana vauro ĝia ĝeri vetuĝunaĝi ĝauveina bevaĝa-tubuani e bevaĝa-taunaiani, ema bevaĝa-kokoreani ema bevaĝa-seĝukaiani (Apostolo 1:8; Sekaraia 4:6).

Luka ĝena toretore tu maiĝesina eboiĝaiato:

1. Petero ĝena ĝauvei Iuda tarimari fakari ai - karoa 1-12
2. Paulo ĝena ĝauvei irau bese tarimari fakari ai - karoa 13-28

¹ Teofilo, ĝoi atore-vinimuni. Ĝegu toretore giniguinena nuĝanai, Iesu ĝena ĝauvei e ĝena vevaĝa-riba guruĝari mabarari atore-foforirito, ĝena ĝauvei esinaiato veĝata,

² eiaĝoto mo, Barau na guba ĝana eĝabi-varaĝeato. Roĝosi roĝo here ĝabi-varaĝea nuĝanai, Iauka Veaĝa ĝenana eĝabi-viriĝirito apostolori evaĝa-ribarito.

³ Ĝena midigumidigu e mase murinai ĝia mai apostolo ĝeri ai efororito ema vetoĝa moĝoniri vovokari ai ĝia tauĝena evevaĝa-moĝonito ĝia tu maĝuri etanuni. Ĝia tu ĝaro gabana vasivasi (40) nuĝanai apostolo ĝeri ai dabara vovokai efororito-ĝoi, ĝeĝitaiato-ĝoi, ema Barau ĝena Basileia, (ĝena veĝitaĝau seĝukana evaĝa-ruĝaiani maiĝa), varina ĝeri ekiraĝiato-ĝoi.

⁴ Ma Iesu ĝesi ĝeraka-vegogoto nai, Iesu na ekirarito, ekirato, "Terusalema asi boĝono iaĝuia, senaĝi au na akira-varamito varevarena roĝo boĝono vaĝa-nogaia, mo tu au Tamagu na ekiraĝi-toreato varevarena.

⁵ Korana Ioane tu moĝoni nanu na ebatisoto-ĝoi, senaĝina ĝomi tu ĝaro viravira beĝe korini murinai tu, Iauka Veaĝa na bebatisomini."

Barau na Iesu guba ĝana eĝabi-varaĝeato

⁶ Apostolo Iesu ĝesi ĝevegogoto nai, Iesu ĝedanaĝiato, ĝekirato, "Vereĝauka, ĝoi na toma mai negai Isaraela tarimama, Roma ĝeri veĝitaĝau na bovaĝa-maĝurimani, benamo Isaraela ĝema veĝitaĝau o basileia ma bovini-ĝenoĝoimani ba?"

⁷ Iesu evaĝa-veseto, ekirato, "Mani tu au Tamagu ĝereĝana ĝena seĝukai ĝarori e negari etorerito, ĝomi na tu asi boĝo ribarini.

⁸ Senaĝi ĝomi tu Iauka Veaĝa iatami ai beraka-riĝoni, benamo seĝuka boĝo ĝabiani, ema au kiraĝi-foforigu tarimami ai boĝo iaĝoni, Ierusalem ai, Iudea ai e Samaria gaburi mabarari ai, beiaĝoni mo, tanobara gaburi mabarari ai."

⁹ Eguruĝa-ĝosito murinai, matari gutuĝuturi ai Barau na guba ĝana eĝabi-varaĝeato. Ĝeĝita-ĝauato mo, magube na ekou-ĝauato, benamo asi ma ĝeĝitaiato.

10 Apostolo na Iesu guba ġana evaraġeto-ġoi roġo ġeġita-raġeato-ġoi nuġanai, tau ruarua dabuġa kurokurori na ġevedabuġato, asikauna ġia seviri ai ġema ruġa-tarito.

11 Benamo ġekirato, “Galilea tarimami, karase maninai boġo ruġa vau guba ġoġita-taġoani? Mai Iesu, ġomi ġemina guba ġana beġabi-varaġea tarimana, tu ma beġenoġoi-iaġomani. ġia tu guba ġana bevaraġe boġo ġitaia kavana, guba na ma bemarkiġoni.”

Apostolo tu Ierusalemata ai ġevegogoto

12 Benamo apostolo Olive Gorona na Ierusalemata ġana ma ġeġenoġoi-iaġoto. Mo gabu ruarua fakari tu kilomita sebona kavana.

13 Ierusalematai ġeraġasito, benamo ġetanuto-ġoi numana tuġuna daiġutuna ġana ġeraġekauto. Mo daiġutu ai apostolo ġevegogoto, arari tu Petero; Ioane; Iakobo (o Iames) e Anduru; Filippo e Tomasi; Batolomeo; Mataio; Iakobo Alfeo; Simona, Selote tauna; ema Iudas, Iakobo natuna.

14 ġia mabarari ma nuġari sebona ġesi ġeġurigiuri-vegogoto-ġoi, vavine tari maki e Maria, Iesu sinana, ema Iesu tarina doġoro.

Iudas gabuna eġabiato tauna

15 Moġeri ġaro ai Iesu ġevaġa-moġoniato-ġoi tarimari mabarari tu sinau sebona ma gabana ruarua (120) ġevegogoto-ġoi. ġia fakari na Petero eruġa-vaisto, benamo ekirato.

16 “Tarikakagu mabarami, toretore veaġana tu bema moġoni, mo tu Iauka Veaġa Davida muruna na kai-veġata ekirato, Iudas na Iesu ġabitarina tarimari beġori-kaurini guruhana.

17 Iudas tu ġai karoma ta, ema ġia maki apostolo ġauveina tarimana, ġai kavana.”

18 ġena vei-rakava voina monina na tano ta evoiato. Monai ġia eketoto, benamo emaseto, ma nuġana eġwa-fakaiato, benamo sinaġena evebuburosito.

19 Ierusalemata tarimari mabarari na varina ġeseġaġiato, benamo mo tano arana ġeri garo ai ġekiraġiato “Akeledama” anina tu “Rara Tanona.”

20 Korana Salamo bukanai varau ġetoreato, ekirani,

‘ġena numa bene karovo,
tarima ta asi bene tanu.’

Ma guruġa ta Salamo nuġanai ekirani,

‘ġena veġitataġo ġauveina maki
ta na bene ġabia.’

21 Moġa lorinai namona tu tau ta siġabi-viriġia. Mo tau tu ġita ġesi vanaġivanagi tarakao-vegogoto-ġoi, Iesu Vereġauka ġita fakarai tarakatoġato-ġoi e tarakaro-sito-ġoi nai,

22 ema Ioane na tarima ebatatorito negana na, beiaġoma mo, Iesu ġai ġemana guba ġana eġabi-varaġeato ġarona tarimana ta. Korana tu ġia maki ġai ġesi Iesu ġena variġisi-ġenoġoi bene kiraġi-foforia.

23 Moġa lorinai ġia na tau ruarua ġeġabirito, Iosefa, arana tu Barasaba ġetato-ġoi, arana ta maki Iusto; ema Matias.

24 Benamo ġeġauġauto, ġekirato, “Vereġauka o, tarimarima mabarari nuġari ġoi na tu oribarini, moġa lorinai novaġa-ġitama, dei tu ġoi na boġabihidia,

25 apostolo ġauveina bene veia Iudas gabunai; a Iudas tu eiaġoto ġena gabu korikorina ġana.”

²⁶ Benamo fore ġerena ġeveiato nuġanai, fore tu Matias aranai eketoto, benamo Matias apostolo gabanana sebna (11) ġesi ġeivi-sebonaiato.

2

Iauka Veaġa eraka-riġoto

¹ Pentekoste ġaronai, Iesu ġevaġa-moġoniato-ġoi tarimari mabarari gabu sebonai ġevegogoto. Pentekoste anina tu gabana imaima (50), mo tu Pasova verekona ġarona na beiaġoma mo, mai ġaro maiġa.

² Benamo asikauna iavara baregona ta guruna noġa guba na emariġoto, ġetanu-vegogoto numana nuġana mabarana evaġa-vonuato.

³ Benamo noġa moġo karava meari kavana ġemariġoto-ġoi ġeġitarito. Mo karava meari ġemariġoto, benamo ġia tata tubuari ai ġemoreto.

⁴ Benamo ġia mabarari Iauka Veaġa na evaġa-vonurito, benamo garo iraurauri ai ġeguruġato, Iauka Veaġa na evinirito ilailanai.

⁵ Moġa ġaronai tu Iuda tarimari, Barau ġarina ġeveito-ġoi tarimari, tu tanobara gaburi mabarari na ġeiaġomato, benamo Ierusalemaj ġetanuto-ġoi.

⁶ Mo guru ġeseġaġiato nai, tarimarima ġutuma ġeġaru-vegogoto. Nuġari ġefarevaġito, korana ġia tata na Iesu ġevaġa-moġoniato-ġoi tarimari ġeseġaġirito tu mo ġeraka-vegogoto tarimari ġeri garo ai ġeguruġato-ġoi.

⁷ Ġia ġeġaba-rakavato e ġedaradarato, ġekirato, “Mai ġeguruġani tarimari tu Galilea tarimari, ene?”

⁸ Kamara dabarai tu ġita tata ġera garo ai ġeguruġani taseġaġirini?

⁹ Ġita tari tu Patia tarimara, tari tu Media tarimara e Elam tarimara. Tari tu Mesopotamia, Iudea e Kapadokia na, ema tari tu Ponto na e Asia na,

¹⁰ Frigia e Pamfilia na, Aigupito e Kurena sevina Libia tanori na, ema tari tu Roma na tiaiġomato,

¹¹ Iuda tarimara, e irau bese tarimari Iuda ġera toma-rakarigo ġeġabirakeato tarimari; ema ġita tari tu Krete e Arabia tarimara. Senaġi ġita mabarara na taseġaġirini ġita tata ġera garo ai Barau na veiaġa baregiori boruri eveirito-ġoi ġekiraġi-foforirini.”

¹² Mabarari ma nuġa-farevaġiri e ma daradarari ġesi tauġeri ġevedanaġi-vedanaġito, ġekirato, “Mai veiaġa anina tu kara?”

¹³ Senaġina tarima tari na tu ġevaseva-vaseva-iaġirito, ġekirato, “Maiġeri tarima tu beġe niu-rakava.”

Petero ġena vevarifu

¹⁴ Benamo Petero ma apostolo gabanana sebna (11) ġesi ġeruġa-vaisto, ma garona evaġa-baregoato, benamo vegogo tarimari eġobata-vinirito, ekirato, “Iuda tarimami e Ierusalemaj ġotanuni tarimami mabarami, boġono seġaġi-ġinikau, mai veiaġa tauna ġemi nakiraġi-maġataia.

¹⁵ Maiġeri tarima tu asi beġe niu-rakava, ġomi ġotuġamaġini kavana. Mai tu roġo boġiboġi horaġauna 9 koloko.

¹⁶ Senaġi maitoma tu Ioel, peroveta tarimana, na ekiraġi-guineato kavana efoforini, ekirato,

¹⁷ ‘Barau ekirani:

Garu dokori ai au Iaukagu babubu-riġoani tarimarima mabarari iatari ai. Benamo natumi merori e ġuiatori beġe perovetani, ġemi maraġa variġu beġe mata-vanaġini, ema ġemi tau ġaukari beġe nuvini.

¹⁸ Oi, moġeri ġaro ai au ġegu vetuġunaġi tauri e vavineri iatari ai au Iaukagu babubu-riġoani,
benamo beġe perovetani.

¹⁹ Benamo nuġa-farevaġi veigari guba tuġunai bavaġa-foforirini,
ema vetoġa dagarari tanobarai;
rara, e karava, ema goġu barukari.

²⁰ Ġaro ma bevettore-kureni bemukunani,
e ġue tu bekakakakani, rara kavanai beiaġoni,
Vereġauka ġena iaġoma ġarona baregona e irau vedaureana bekavinaġini
nai.

²¹ Benamo deikara Vereġauka aranai ekea-raġeni tarimana tu maġuri
beġabiani.'

²² Isaraela tarimami, mai guruġa boġono seġaġiri: Iesu, Nasareta tari-
mana, Barau na eviniato ġauveina tu ġomi ġemi ai evaġa-fofori ginikauato.
Ġia ġenana Barau ġena seġuka veigari e nuġa-farevaġi veigari ema vetoġa
tari eveirito ġomi vefakami ai, be ġomi tu ma ribami.

²³ Barau ġena urai e ribai varau eboioġa-guineato ilailanai, Iesu ġomi
ġimami ai etore-kauato, benamo rakava tarimari na ġevaġa-kavamito,
benamo Iesu satauro ai ġoikoko-kauato nai ġovaġi-maseato.

²⁴ Senaġina Barau na ġia mase na evaġa-variġisi ġenoġoiato, ema mase
midiguna na eġabi-vaġiato, korana mase na ġia tu asi ilaila beġabi-tariani
riba.

²⁵ Davida na ġia ekiraġiato, ekirato,
'Vereġauka tu ġaro mabarari ai ġoiragu ai aġitaiani.
Ġia tu au aroribagu ai,

be dagara ta na asi bevaġa-ġarevaguni.

²⁶ Moġa lorinai nuġagu iaku na bevonu,
ema ġegu guruġa tu iaku na beġe vonu.
Mase garina maki asi aveini,

²⁷ korana au tu mase tarimari ġeri gabu ai asi boraga-kwaneguni,
ema ġemu Tarima Veaġana tu asi beboragani.

²⁸ Maġuri dabarari tu varau ovaġa-ribaguto;
ġoi sevimu ai batanuni,
benamo iaku na bovaġa-vonuguni.'

²⁹ Tarikakagu mabarami, initoma au tu nuġagu ma kokorena ġesi baki-
rani, ġita senera baregona Davida tu emaseto ema ġeguriato, maitoma ġia
gurina tu ġita ġesi maġea.

³⁰ Senaġi ġia tu peroveta tarimana, ema ma ribana Barau na tu varau
ekiraġi-toreato, ekirato: Davida besena ta tu ġia ġena teronai betanukauni
veġata.

³¹ Davida na eriba-guineato, Barau na kara ġoirai beveiani eġitaiato.
Benamo Keriso ġena variġisi-ġenoġoi guruġana ekiraġiato, ekirato, 'Ġia
tu mase tarimari ġeri gabu ai asi eraga-kwaneato, ema tauġanina asi
beboragani.'

³² Barau na mai Iesu, mase na evaġa-variġisi ġenoġoiato, ġai mabarama
ribama.

³³ Barau na eġabi-vaisiato, ġimana aroribanai etoreato, benamo Barau na
ekiraġi-toreato, Iauka Veaġa na Tamana ġenana eġabiato. Benamo ġia na
mo Iauka Veaġa toma bebubu-riġoa, ġomi na ġoġitaiani ema ġoseġaġiani.

³⁴ Korana Davida guba ġana tu asi evaraġeto, senaġi ekirato,
'Barau na au ġegu Vereġauka ekiraiato, ekirato:

Au aroribagu ai noma-tanu,

³⁵ bene iaḡo mo, ḡevetari-vinimuni tarimari bana tore-riḡori, kwakumu vaḡa-ruḡa tarina dagananai bana vaḡa-iaḡori.’

³⁶ Moḡa lorinai Isaraela tarimari mabarari tu beḡene riba-ginikau, mai Iesu, ḡomi na ḡovaḡa-satauroato tu, Barau na Vereḡauka e Keriso ai evaḡa-iaḡoato.”

Tarimarima ḡutuma ḡevetuḡamaḡi-kureto ma ḡeraka-kureto

³⁷ Mai guruḡa ḡeseḡaḡiatio nai, nuḡari ḡeraḡeto, benamo Petero e mo apostolo tari ḡedanagiritito, ḡekirato, “Tarikaka, ḡai tu kamasi toma ḡaveini?”

³⁸ Petero na ekirarito, ekirato, “Ḡomi tata ḡemi rakava ḡerina boḡono vetuḡamaḡi-kure ma boḡono raka-kure, ema Iesu Keriso aranai babatiso boḡono ḡabia, be ḡemi rakava bene tuḡamaḡi-fitoḡari; ema ḡena varevare, Iauka Veaḡa, boḡono ḡabia.

³⁹ Korana Barau ḡena kiraḡitore eveiatio tu ḡomi ḡemi e ḡomi natumi ḡeri, ema manaḡai ḡetanuni tarimari ḡeri. Aba, Vereḡauka ḡera Barau na ekiraḡi-toreato Iauka Veaḡana tu bekearini tarimari mabarari bevinirini.”

⁴⁰ Petero na guruḡa ḡutuma ekiraḡirito, esisiba-vinirito e elau-naḡirito, ekirato, “Mai bese tarimari rakavari ḡerina tauḡemi boḡono raga-maḡuri.”

⁴¹ Tarima ḡutuma na ḡena guruḡa ḡeḡabi-raḡeato, benamo babatiso ḡeḡabiatio. Mo ḡaro sebonai tarimarima mabarana daḡara toitoi (3,000) kavana ḡia ḡeri doḡoro nuḡanai ḡebere-toḡato.

⁴² Benamo vanaḡivanaḡi apostolo tarimari ḡerina riba ḡeḡabito-ḡoi, ḡevegogoto-ḡoi e ḡevevaḡa-kavato-ḡoi, beredi ḡetavi-kirato-ḡoi o anibou ḡeḡanito-ḡoi e ḡeḡauḡau-vegogoto-ḡoi.

Iesu ḡevaḡa-moḡoniatio-ḡoi tarimari ḡeri maḡuri

⁴³ Apostolo ḡerina Barau na nuḡa-farevaḡi veḡari e vetoḡa boruri ḡutuma eveirito-ḡoi, ema tarimarima mabarari ḡeḡari-rakavato.

⁴⁴ Iesu ḡevaḡa-moḡoniatio tarimari mabarari ḡetanu-vegogoto-ḡoi ema ḡeri-ḡari ḡevevarevare-vevinito-ḡoi.

⁴⁵ Ḡeri farefare e tano ḡevoivoi-iaḡirito-ḡoi, benamo moniri tu ḡia mabarari vefakari ai ḡevarerito-ḡoi, tata ḡena rabu ilailanai.

⁴⁶ Ḡaro vanaḡivanaḡi mabarari Rubu Veaḡai ḡevegogoto-ḡoi. Ḡeri numai anibou ḡeḡanito-ḡoi e ḡeḡanigani-vegogoto-ḡoi ma iakuri e ma mainori ḡesi.

⁴⁷ Barau ḡevaḡa-raḡeato-ḡoi, ema tarimarima mabarari ḡeri veiau-namo ḡeverere-iaḡiatio-ḡoi. Benamo ḡaro mabarari ai Vereḡauka na evaḡa-maḡuririto-ḡoi tarimari ḡia ḡesi etore-vegogorito-ḡoi.

3

Kwaku rakava tarimana enamoto

¹ Ḡaro ta lavilavi horaḡauna 3 koloko ai ḡauḡau horanai, Petero e Ioane Rubu Veaḡa ḡana ḡeiaḡoto.

² Monai tarima ta tu emaḡurito kwakuna rakava ḡeḡoitaḡoato. Ḡaro mabarari ai ḡeḡwa-iaḡoato-ḡoi, Rubu Veaḡa ḡatama bokana arana “Namo Vedaurea” koranai ḡevaḡa-tanutariatio-ḡoi, benamo Rubu Veaḡai ḡeraka-toḡato-ḡoi tarimari ḡeri ai moni enoḡito-ḡoi.

³ Ḡia na Petero e Ioane ḡeraka-toḡa ḡana nuḡanai eḡitarito, benamo kara ta ḡevinia uranai enoḡirito.

4 Tauri ruarua na ġeġita-karakaraiato, benamo Petero na ekiraiato, ekirato, “Ġai noġitama!”

5 Mo guruġa eseġaġiato lorinai, tauri ruarua eġitarito, ġia mataboru ekirato tu, kara ta beġe viniani.

6 Senaġi Petero na ekiraiato, ekirato, “Au tu asi ġegu moni, senaġina ġegu ai kara etanuni dagarana avinimuni. Iesu Keriso, Nasareta tauna, aranai akiramuni, novariġisi, noraka!”

7 Benamo Petero na kwaku rakava tarimana ġimana aroribanai eġabito, evaġa-ruġa-vaishiato. Asikauna ġia kwakuna ema kwakuna komukomuri ġetubutubu-kauto.

8 Ġia eburi-vaishito, eruġa-tarito, eraka-iaġoto. Benamo Petero ema Ioane ġesi Rubu Veaġanai ġeraka-toġato, erakato e eburi-vaishito, Barau evaġa-raġeato.

9 Tarimarima mabarari na ġeġitaiato, erakato e Barau evaġa-raġeato-ġoi,

10 ema ġeġita-leaiato, ġia tu “Namo Vedaurea” ġatama-boka koranai etanuto-ġoi vau enoġinoġito-ġoi tarimana nai, ġia mabarari nuġari ġefarevaġito e ġeġaba-rakavato, mo veġa ġia ġenai eġorato nai.

Petero ġena ġobata Rubu Veaġai

11 Mo tau roġo Petero e Ioane ġeri ai eveġabikau-taġoto-ġoi, touraġe baregona arana “Solomona Ġena Touraġe” ai, tarimarima mabarari ġeġaba-rakavato, benamo ġeraga-iaġoto ġeri ai.

12 Petero na mo tarimarima eġitarito, benamo evaġa-guruġarito, ekirato, “Israela tarimami, karase nai mai dagara tu ġoġaba-iaġiani? Karase nai ġai ġoġita-karakaramani? Ġomi ġotuġamaġini mai tu tauġema ġema seġukai e Barau korana-iaġinai naima, mai tarima baġa vaġa-rakaia ġotoni?”

13 Aberahamo, Isako, Iakobo ġeri Barau, ġita senera mabarari ġeri Barau, na ġena vetuġunaġi tarimana Iesu evaġa-raġeato, senaġi ġomi na Roma tarimari ġoviniato beġene vaġia ġana, ma Pilato ġena ura bene tuġu-vaġia asi beġene vaġia etato nai, ġomi tu asi ġourato.

14 Ġia tu Veaġa e Vei-Iobukaiobuka tarimana, senaġi ġomi na tu asi ġoura-viniato, ema Pilato ġonoġiato, vaġivaġi tarimana tu bene tuġu-rosia ġotato.

15 Maġuri eġwa-iaġomaiato tarimana tu ġomi na ġovaġi-maseato. Senaġi Barau na mase na ma evaġa-varigiġi ġenoġoiato. Ġai maġa tu ribama e ġakiraġi-foforiani.

16 Ġai ġema veġabidadama Iesu aranai nai, mai tarima ġomi na ġoġitaiani e ribami bevaġa-namo. Mai tu Iesu aranai ema veġabi-dadama ġia ġenana eiaġomani na, mai tarima bevaġa-namo korikorja, ġomi mabarami na ġoġitaiani maġa.

17 Tarikakagu mabarami, au toma aribani, kara ġemi veġorikau tarimari ġesi ġoveiato tu asi ribami dainai.

18 Senaġina Barau na guinenai ġena peroveta tarimari mabarari mururi na ekirato, ġia ġena Keriso tu midigu roġo beġanini etato. Mo guruġa tu ġomi ġemina ema moġonito.

19 Moġa lorinai ġovetuġamaġi-kure ma ġoraka-kure Barau ġenai, be ġia na ġemi rakava bene ġabi-vaġiri.

20 Bema moġesi boġo veini nai, Iauka ġena kokore Vereġauka ġenana beiaġomani, ema ġia na Iesu Keriso betuġu-iaġomaiani. Ġia tu Barau na ġomi ġemi eġabitore-guineato.

²¹ Ĝia tu gubai roĝo betanuni, beiaĝoni mo, Barau na dagara mabarari bevaĝa-variĝu ĝenoĝoirini. Ĝia na ĝena peroveta tarimari veaĝari mururi na kai-veĝata ekiraĝiato ilailanai.

²² Korana Mose ekirato, 'Vereĝauka ĝemi Barau na ĝomi ĝemi tarimarima fakari na ĝemi peroveta tarimana ta bevaĝa-ruĝaiani au kavana. Ĝia na bevaĝa-guruĝamini guruĝari mabarari tu boĝono seĝaĝiri.

²³ Tarima ta na ĝia ĝena guruĝa asi beseĝaĝi-viniani tarimana tu, Barau na ĝena tarimarima fakari na beĝabi-vaĝiani, benamo bevaĝi-maseani.'

²⁴ Moĝoni, peroveta tarimari mabarari Samuela na beiaĝoma mo toma, ema ĝia murina na ĝeiaĝomato peroveta tarimari maki ĝutuma varau ĝeguruĝato, maĝeri ĝaro ĝekiraĝirito.

²⁵ Ĝomi tu peroveta tarimari naturi, ema Barau ĝena kiraĝitore ĝomi sen-emi ĝeri eveiato maki ĝomi ĝemi. Barau na Aberahamo evaĝa-guruĝaiato nai, ekirato, 'Ĝoi natumu ĝenana tanobara beseri mabarari namo beĝe ĝabiani.'

²⁶ Moĝa lorinai Barau na ĝena vetuĝunaĝi tarimana Iesu evaĝa-ruĝaiato, benamo ĝemi ai etuĝu-iaĝosi guineato, ĝomi bene vaĝa-namomi ĝana. Mo namo anina tu, ĝomi tata ĝemi rakava ĝerina beĝori-kuremini.

4

Petero e Ioane ĝeĝabi-taririto

¹ Petero e Ioane na tarima-rima roĝo ĝevaĝa-guruĝarito-ĝoi nuĝanai, Rubu Veaĝa vereri, e Rubu Veaĝa ĝitaĝauna tarimari ĝeri vere, ema Sadukea tarimari ĝeragasio.

² Ĝia tu ĝebaruto, korana mai apostolo ruarua na tu tarimarima ĝevaĝa-ribarito-ĝoi e ĝeri ĝeĝobatato-ĝoi nai tu ĝekirato-ĝoi, Iesu tu mase na evariĝisi-ĝenoĝoito; moĝa lorinai mase tarimari maki beĝe variĝisi-ĝenoĝoini.

³ Benamo tauri ruarua ĝeĝabi-taririto, benamo dibura numai ĝebiri-ĝaurito; monai beĝene gena mo boĝiboĝi, korana tu ĝaro maki ekofuto.

⁴ Senaĝi Petero e Ioane ĝeri ĝobata tarima vovoka na ĝeseĝaĝiato, benamo tarima ĝutuma na ĝevaĝa-moĝoniato, benamo tau numerana eiaĝoto mabarana tu daĝara imaima (5,000) kavana.

⁵ Elaĝanito nai tu, Iuda vereri, e vanuĝa tarima baregori, ema taravatu ĝevevaĝa-riba iaĝiato-ĝoi tarimari Ierusalemaj ĝevevogoto.

⁶ Anas, Rubu Veaĝa verena baregona, e Kaiafas, e Ioane, e Alesanda, ema Rubu Veaĝa verena baregona ĝena bese maki monai.

⁷ Benamo tauri ruarua ĝeĝori-iaĝorito, benamo ĝoirari ai ĝea vaĝa-ritoĝorito vau ĝedanagirito, ĝekirato, "Kamara seĝukai o deikara aranai mai veĝa ĝoveiato?"

⁸ Benamo Petero, Iauka Veaĝa na evonuto, evaĝa-veseto, ekirato, "Isaraela veremi e veĝitaĝau tarimami!"

⁹ Bema ĝai toma boĝo kea-iaĝomama tu, ĝourani ĝai na ĝakira-varami, mai kwaku rakava tarimana ĝenai veĝa namona baĝa veia ema kamara dabarai ĝia be-namo nai tu,

¹⁰ ĝomi mabarami e Isaraela nuĝanai tarimarima mabarami tu boĝono riba, Iesu Keriso, Nasareta tarimana, ĝomi na ĝovaĝa-satauroato, ma Barau na mase na evaĝa-variĝisi ĝenoĝoioato tarimana, aranai mai tarima benamo-ĝosiĝosi, ĝomi ĝoirami ai eruĝa-taĝoni.

¹¹ Mo Iesu tu,

‘ġomi, numa raga tarimami, na ġoruġaiato forena, ġia tu duġu barana forenai eiaġoto.’

¹² Vevaġa-maġuri tu ġia ġereġana ġenana bita doġarini; tanobara mabarana nuġanai Barau na ara ta tu asi evinirato, ġita bene vaġa-maġurira ġana.”

¹³ Kanisoro tarimari na Petero e Ioane ġeġitarito, asi ġegarito-ġoi ema ġeribarito maki, ġia tu vevaġa-riba gabuna ta ġana asi ġeiaġoto, ma tauri ruarua asi iaunegari. Moġa ġeġitaato nai, ġeġabato e nuġari ġevekeoto, benamo ġeribato, ġia tu Iesu ġesi ġerakao-vekakoto-ġoi tarimari.

¹⁴ Ema mo tarima ġeġitaato namo-ġosigosi Petero e Ioane ġesi ġeruġa-taġoto-ġoi, benamo asi ġeri guruġa dabarana.

¹⁵ Moġa lorinai ġekirarito, mo vegogo gabuna na ġeraka-veġita. Benamo ġeraka-rosito murika ġana, benamo ġia ġereġari moġo ġevedanaġi-vevinito, ġekirato,

¹⁶ “Maiġeri tarima ruarua tu kamasi toma taveirini? Ierusalem! ġetanuni tarimari mabarari ma ribari, ġia tu nuġa-farevaġi veigana ta beġe veia, ema ġita na asi bita kira-ġuniġauani riba.

¹⁷ Senaġi tarimarima na beġe vari-fuani garinai, maiġeri tarima tu tana vaġa-gariri e tana kira-ġoiri, Iesu aranai tarima ta asi ma beġene vaġa-guruġa ġenoġoia.”

¹⁸ Benamo ma ġekea-toġarito, benamo ġekirarito, Iesu aranai asigina ġinavaġi ma beġene ġobata e beġene vevaġa-riba.

¹⁹ Senaġi Petero e Ioane na ġevaġa-veserito, ġekirato, “Ġomi tauġemi ġotuġamaġi-viriġia, aiġa tu roroġoto Barau ġoiranai? Ġomi na kara ġokiraġiani baġana veia, ba Barau na ekiraġiani veigana baġana veia?”

²⁰ Korana ġaġitarito e ġaseġaġirito dagarari tu ġai na asi ilaila baġa kira-ġuniġaurini e muruma maki moġeri kiraġi-kiraġiri ai asi baġa kourini riba.”

²¹ Ma ġevaġa-guruġa gwaġiġirito murinai, ġetuġu-rosirito. Vaġa-rakavari dabarana ta asi ġedoġarito, korana tarima mabarari na Barau ġevaġa-raġeato-ġoi, mo nuġa-farevaġi veigana lorinai.

²² Korana mo nuġa-farevaġi veigana na enamoto tarimana ġena maġuri laġaniri tu gabana vasivasi (40) maki evanaġiato.

Ekalesia ġeġuriġurito

²³ Petero e Ioane ġetuġu-vaġirito murinai, karori ġeri ai ġeġenoġoi-iaġoto. Ma Rubu Vevaġa vereri baregori e Iuda vereri na kara ġekiravara-vinirito dagarari mabarari karori ġeri ġekiraġirito.

²⁴ Benamo karori na moġeri guruġa ġeseġaġirito nai, ġia mabarari Barau ġeġuriġuri-vini vegogoato, ġekirato, “Vereġauka o, guba, tanobara, daġaru-bara, ema nuġari ai ġetanuni dagarari mabarari ġoi na oveirito.

²⁵ Iauka Vevaġa ġenana, ġai senema Davida, ġoi ġemu vetuġunaġi tarimana, muruna na oguruġato nai ekirato,

‘Kara dainai irau bese tarimari tu ġebaru-rakava rakavani?

Ema karase nai tarimarima na tu asi beġe ġauveini boioġari ġeveirini?

²⁶ Tanobara vereri ġeverovinato, ema veġitaġau tarimari baregori ġeġaru-vegogoto, Vereġauka ma ġena Keriso ġesi beġene vetari-viniri ġana.’

²⁷ Moġoni veġata, Heroda e Pontio Pilato, irau bese tarimari e Isaraela tarimari ġesi mai vanuġa baregonai ġevevogoto, ġoi ġemu vetuġunaġi

tarimana veaġana Iesu, ġia tu ġoi na oviriġiato e Keriso ai ovaġa-iaġoato, ġana boioġa ġetogato.

²⁸ Ġia na ġveirito dagarari tu kara ġoi na ġemu seġukai e urai oboioġa-ġuinerito beġene vetore otato dagarari moġo.

²⁹ Moġa lorinai, Vereġauka o, ġeri vevaġa-ġari veigari noġitari, ema ġai ġoi ġemu vetuġunaġi tarimama kokore novinima, be ġemu vari baġana kiraġia ma kokorema ġesi.

³⁰ Ġimamu notuġu-rosia, be keve tarimari bono vaġa-namori, ema vetoġa boruri e nuġa-farevaġi veigari bono veiri, Iesu, ġoi ġemu vetuġunaġi tarimana veaġana aranaġi.”

³¹ Ġeġauġau-ġosito murinai, ġevevogoto numana eġareva-ġarevato. Benamo ġia mabarari lauka Veaġa na ġevonuto, benamo Barau ġena vari ġekiraġiato ma kokoreri ġesi.

Ekalesia guinena ġena maġuri

³² Iesu ġevaġa-moġoniato-ġoi tarimari mabarari ġeri tuġamaġi e nuġari tu sebonai moġo. Ta ġena farefare ġia ġereġana ġena asi etato-ġoi, senaġi ġeri dagara mabarari ġia tata ġevevarevare-vevinito-ġoi.

³³ Seġuka barego ġesi apostolo tarimari na Iesu Vereġauka ġena varigiġi-ġenoġoi ġevari-fiutato-ġoi, ema Barau ġena namo e varevare-bara ġia mabarari iatari ai ebubu-riġoato.

³⁴ Ġia fakari ai ta maki asi erabuto-ġoi. Korana ma ġeri tano o numa tarimari na, moġeri numa e tano ġevoivoi-iaġirito-ġoi, benamo davari moniri tu ġeġwa-iaġorito-ġoi,

³⁵ Apostolo ġoirari ai ġetore-taririto-ġoi. Benamo mabarari ġevini-ilalarito-ġoi, tata ġena rabu ilailanai.

³⁶ Iosefa tu apostolo na arana ġevatoato Banabas, anina tu “Velaunaġi Tarimana”. Ġia tu Levi doġorona, Saipras motumotunai emagurito.

³⁷ Ġia ġena tano evoiato, benamo voina monina tu eġwa-iaġoato, apostolo kwakuri koranai ea tore-tariato.

5

Anania e Safira

¹ A tau ta etanuto-ġoi arana Anania, ġaraġona arana tu Safira. Anania na ġeri tano ta ea voivoi-iaġiato, ġaraġona na maki eġabi-raġeato.

² Senaġina mo tano monina kwana tu eġabi-tariato, ma kwana reke ta moġo eġwa-iaġoato apostolo ġoirari ai ea tore-tariato. Mo veigā eveiato ġaraġona tu ma ribana.

³ Benamo Petero na ekiraiato, ekirato, “Anania, karase nai Satani na beboroġimu, benamo lauka Veaġa boġofaia, tano monina kwana tu ġoi ġemu boġabi-taria?”

⁴ Roġosi boro voia nai tu, tano tu ġoi ġemu, ene? Ma beġe voia murinai maki moni tu ġoi ġemu. Kara botuġamaġia nai, mai veigā bono veia bosì? Goi na tu dia tarimarima boġofari, senaġi Barau boġofaia.”

⁵ Anania na mo guruġa eseġaġiato nai, eketo-tarito, emaseto. Benamo mo veigā eġorato varina ġeseġaġiato tarimari mabarari ġegari-rakavato.

⁶ Benamo tarima variguri ġevarigiġito, Anania tauganina dabuġa na ġeseġoato, ġeġwa-rosiato, benamo ġea ġuriato.

⁷ Hora toitoi kavana murinai, ġaraġona ema raka-toġato, senaġi ġia kara eġorato tu asi ribana.

⁸ Petero na edanaĝiato, ekirato, “Nokira-varagu, ĝomi taumi ruarua na tano monina boĝo ĝabia tu maiĝa moĝo ba?” Ĝia evaĝa-veseto, ekirato, “Oi, voina tu maniĝa moĝo.”

⁹ Benamo Petero na ekiraiato, ekirato, “Karase nai ĝoi ma ĝaraĝomu ĝesi nuĝami ĝovaĝa-sebonarito, Vereĝauka Iaukana ĝoĝofaiato? Noboĝe, ĝoi ĝaraĝomu beĝe guria tarimari tu ĝatama-bokai ĝeruĝa-taĝoni, ĝia na ĝoi maki ma ĝeĝwa-rosimuni.”

¹⁰ Mo horai moĝo ĝia Petero kwakuna koranai eketo-tarito, emaseto. Benamo mo tarima variĝuri ĝeraka-toĝato, ma ĝeĝitaiato mase, benamo tauĝanina ĝeĝwa-rosiato, ĝaraĝona sevinai ĝea guriato.

¹¹ Ekalesia mabarana e varina ĝeseĝaĝiato tarimari mabarari gari baregona na eĝabirito.

Vetoĝa e veiĝa boruri

¹² Vetoĝa e veiĝa boruri ĝutuma apostolo na tarimarima ĝoirari ai ĝeveirito-ĝoi. Ma Iesu ĝevaĝa-moĝoniato-ĝoi tarimari mabarari tu “Solomona Ĝena Touraĝe” ai ĝevegogoto-ĝoi.

¹³ Asi veĝabidadama tarimari na ĝevaĝa-raĝerito-ĝoi, senaĝi ĝegarito-ĝoi, be ĝia ĝesi asi ĝea vegogoto-ĝoi.

¹⁴ Senaĝi tau e vavine tu ĝutuma lelevaĝi na Vereĝauka ĝevaĝa-moĝoniato-ĝoi. Mo ĝevaĝa-moĝonito-ĝoi tauri e vavineri tu mabarari apostolo ĝeri dogoro ai ĝerakaraka-toĝato.

¹⁵ Apostolo na ĝeveirito-ĝoi veiĝari tarimarima na ĝeribarito, benamo keve tarimari ĝeĝwa-rosirito dabara ĝana, benamo genagena fatari ai e gedai ĝetorerito, Petero bene raka-vanaĝi nai, iouiouna na bene iauka-tariri ĝana.

¹⁶ Ema tarimarima ĝutuma-bara Ieruselema sevinu vanuĝari na keve tarimari e iauka rakavari na ĝeboroĝirito tarimari ĝeĝwa-iaĝorito, benamo mabarari ĝenamoto.

Apostolo tarimari ĝevaĝa-midigu midigurito

¹⁷ Benamo Rubu Veaĝa verena baregona ma karonu Sadukea doĝorona ĝesi, apostolo tarimari ĝeri ai ĝemama-rakavato.

¹⁸ Ĝia na apostolo tarimari ĝeĝabi-taririto, benamo dibura numai ĝebiri-ĝaurito.

¹⁹ Senaĝi mo boĝi Vereĝauka ĝena aneru na dibura numa ĝatama bokana erovoato, benamo apostolo eĝori-rosirito, benamo evaĝa-guruĝarito, ekirato,

²⁰ “Ĝoiĝo, Rubu Veaĝanai boĝono ruĝa, benamo mai maĝuri variĝuna mabarana tarimarima ĝeri boĝono kiraĝia.”

²¹ Boĝiboĝi iamu-iamonai Rubu Veaĝai ĝeraka-toĝato, aneru na ĝevaĝa-guruĝarito ilailanai tarimarima ĝevaĝa-ribarito.

Rubu Veaĝa verena baregona ma karonu ĝesi ĝeraĝasito, benamo kanisoro tarimari e Isaraela vereri mabarari ĝekea-vegogorito, benamo dibura numa ĝana ĝevetuĝu-iaĝoto, apostolo tarimari urari na.

²² Senaĝi vetuĝunaĝi tauri dibura numai ĝea raĝasito nai tu, apostolo tarimari asi ĝedoĝaririto. Benamo ĝeĝenoĝoito, ĝea kira-vararito, ĝekirato,

²³ “Dibura numana ĝatama bokana tu biribiri, ema ĝitaĝau tarimari maki ruĝataĝo; senaĝi ĝatama-boka baĝa rovo-fakaia nai tu, apostolo ta tu asi baĝa ĝoitaĝoa.”

24 Rubu Veāga gītataḡona tarimana baregona e Rubu Veāga vereri baregori na mo guruḡa ḡeseḡaḡiati nai tu, ḡeiauvoiauvo-rakavato, asi ribari mo veḡa anina tu kara.

25 Ġedaradarato-ḡoi nuḡanai tu, tarima ta eraka-toḡato, benamo ekirarito, ekirato, “Ḡoseḡaḡi! Dibura numai ḡobiri-ḡaurito tarimari tu Rubu Veāḡai ḡeruḡa-taḡoni, ma tarimarima ḡevaḡa-ribarini.”

26 Benamo Rubu Veāga gītaḡauna tarimana baregona ma ḡena mero ḡesi apostolo tarimari ḡea ḡori-ḡenoḡoirito. Asi ḡevei-guguraḡirito, korana tarimarima na fore na beḡe ḡidararini garina.

27 Ġeḡori-toḡarito, kanisoro ḡoiranai ḡevaḡa-ruḡarito, benamo Rubu Veāga verena baregona na edanaḡirito, ekirato,

28 “Ġai na guruḡa ḡwaḡiḡina ḡavinimito, mai tarima aranai asi boḡono vevaḡa-riba, senaḡi ḡoḡitaia, ḡomi na kara boḡo veia! Ḡomi ḡemi vevaḡa-riba boḡo vaḡa-rega rovorovoa, benamo Ieruselema mabarana varau beḡaua, ema ḡomi ḡourani ḡia ḡena mase tu ḡai baḡana daḡa.”

29 Petero e apostolo kotari ḡevaḡa-veseto, ḡekirato, “Ġai tu Barau ḡena ura baḡa korana-iaḡiani, dia tarimarima ḡeri ura.

30 Iesu tu ḡomi na satauro tuḡunai ḡoikoko-kauato nai, ḡovaḡi-maseato, senaḡi ḡita tamara ḡeri Barau na ma evaḡa-variḡisi ḡenoḡoiato.

31 Barau na eḡabi-vaisiato, ḡia aroribanai evaḡa-ruḡaiato, Veḡitaḡau Verena e Vevaḡa-maḡuri Tarimanai evaḡa-iaḡoato. Isaraela tarimari bene vaḡa-vetuḡamaḡi-kureri, ema ḡeri rakava bene tuḡamaḡi-fitoḡari ḡana.

32 Ġai tu mai dagara kiraḡi-foforiri tarimama. Iauka Veāga na maki maḡeri dagara ekiraḡi-foforirini. Mo Iauka Veāga tu Barau na ḡia ḡeseḡaḡi-viniani tarimari mabarari evinirito.”

33 Kanisoro tarimari na mai guruḡa ḡeseḡaḡiati nai tu ḡebaru-rakavato, ma ḡeri ura mo apostolo tarimari tu ḡevaḡi-maseri moḡo.

34 Senaḡi ḡia fakari ai Farisea tarimana arana Gamaliel, taravatu evevaḡa-riba iaḡiato-ḡoi, ema tarimarima mabarari na ḡegubakauato-ḡoi tarimana, kanisoro nuḡari na eruḡa-vaisito. Benamo ekirato, moḡeri apostolo tarimari ḡeḡori-rosiri roḡo.

35 Benamo ḡia na kanisoro vegogona ekiraiato, ekirato, “Isaraela tarimami, maḡeri tarima kamasi ḡoveiri ḡotoni ḡenai boḡono tuḡamaḡi-ginikau.

36 Garo kotari varau beḡe iaḡo, Teuda eruḡa-vaisito, evekiraḡito, ḡia tu tarima baregona ta, benamo tarima sinau vasivasi (400) kavana ḡia ḡesi ḡekauto. Senaḡi ḡia ḡevaḡi-maseato nai tu, ḡena tarimarima mabarari ḡeraga-rovorovoto; mo doḡoro toma tu asiḡina maia.

37 Moḡa murinai tu Iudas, Galilea tauna, tarimarima arari toretoreri o sensisi ḡabigabina ḡarori ai efororito, ḡia maki ḡutuma-bara eḡori-kaurito, senaḡina ḡia maki ḡevaḡiati nai, ḡena tarimarima tu ḡeraga-rovorovoto.

38 Moḡa lorinai initoma veḡanai, au na akiramini, mai tarima ḡoraga-kwaneri, ema ḡeri ai kara ta asi boḡono veia. Korana bema ḡeri boioḡa e ḡauvei maḡeri tarimarima ḡerina eiaḡomani nai tu berekwa-rekwani.

39 Senaḡi bema mai tu Barau ḡenana eiaḡomani nai tu, ḡomi na maḡeri tarima tu asi ilaila boḡo kourini bene. Asi namo Barau boḡo vetari-viniani!”

Kanisoro na Gamaliel ḡeseḡaḡi-viniato.

40 Benamo apostolo ma ḡekea-toḡarito, ḡekwaririto, benamo ḡekirarito, Iesu aranai asiḡina ḡinavaḡi ma beḡene vevaḡa-riba ḡenoḡoi; benamo ḡetuḡu-rakarito.

41 Apostolo na kanisoro vegogona ġeraga-kwaneato ma iakuri ġesi, korana Barau na eġabi-hidirito, ġia tu ilaila Iesu aranai maiaka beġe ġabiani bene.

42 Benamo ġaro vanaġivanaġi ai Rubu Veaġai e tarimarima ġeri numa nuġari ai Vari Namona ġevevaġa-ribato-ġoi e ġeġobata-iaġiato-ġoi, ġekirato-ġoi, Iesu tu Keriso.

6

Vevaġa-kava tarimari imaima ruarua (7)

1 Moġeri ġaro ai Iesu ġekorana-iaġiato-ġoi tarimari tu ġeġutuma-iaġoto-ġoi. Ma Iuda tarimari, Grik garo ai ġeguruġato-ġoi tarimari, e Heberu garo ai ġeguruġato-ġoi tarimari fakari ai veġareveġare eġorato. Grik garo ai ġeguruġato-ġoi tarimari ġekirato, ġia ġeri vabu tu ġaro tata ġaniġani ġevareto-ġoi nai tu ġevaġa-raburito-ġoi.

2 Moġa lorinai apostolo gabanana ruarua (12) na Iesu ġekorana-iaġiato-ġoi tarimari mabarari ġekea-vegogorito, benamo ġekirato, “Ġai na ġaniġani varevarena uranai, Barau ġena guruġa asi baġa vari-fiuani tu asi maoro.

3 Moġa lorinai, tarikakagu mabarami, ġomi vefakami ai tau imaima ruarua (7) ġoġabi-viriġiri, variri namo tarimari, Iauka Veaġa na e iaunega na ġevonuto tarimari; benamo mai ġauvei ġia baġana vini-vanaġiri.

4 A ġai tauġema ġema taimi mabaranai tu ġauġau e ġobatai baġana torea.”

5 Apostolo tarimari ġeri boioġa ġia mabarari na ġeiku-iaġiato. Benamo ġia na mai tau maġeri ġeġabirito: Stefano, veġabidadama na e Iauka Veaġa na evonuto tarimana; e Filipo; Prokoro; Nikanoro; Timon; Pamena; e Nikolas, Antioka tarimana senaġi Iuda tarimari ġeri toma-rakariġo ekorana-iaġiato-ġoi.

6 Ġia na mai tau maġeri apostolo ġoirari ai ġevaġa-ruġarito, benamo apostolo na ġia iatari ai ġeġuriġurito ema apostolo ġimari ġia iatari ai ġetore-kaurito.

7 Benamo Barau ġena guruġa eraga-rovorovoto. Ema Iesu korana-iaġina tarimari Ierusalemaj ġevovoka-ġarimoġito, ema Rubu Veaġa vereri ġutuma gorogoro na maki Barau ġena guruġa ġeġabi-raġeato, benamo ġeveġabidadamato.

Stefano ġeġabi-tariato

8 Stefano tu Barau ġena varevare-bara e seġuka na evonuto tarimana, ġia na nuġa-farevaġi veġiri boruri baregori tarimarima ġoirari ai eveirito-ġoi.

9 Senaġi vekira-fitoġa barego evariġisito. Iuda tarimari ġeri rubu doġorona ta ġekiraġirito-ġoi “Ruġavaġi tarimari”. Ġia ema Iuda tarimari, Kurene e Alesandria na ema Kilikia e Asia tanobara na ġeiaġomato tarimari, Stefano ġesi ġeveġare-veġareto.

10 Senaġi Stefano ġena guruġa tu asi ġelautariato-ġoi, korana ġia tu Iauka Veaġa na eviniato-ġoi iauneganai eguruġato-ġoi.

11 Benamo ġia na tarima kotari nuġari ġeġanirito beġene kira, “Ġai na Stefano ġaseġaġiato, ġia na Mose e Barau ekira-fitoġarito.”

12 Mo dabaraġi ġia na tarimarima, e Iuda vereri, ema taravatu ġevevaġa-riba iaġiato-ġoi tarimari ġekira-vaisivaisirito. Ġia Stefano ġenai ġeiaġoto, ġea ġabi-tariato, benamo Iuda ġeri kanisoro ġoirana ġana ġeġori-iaġoato.

13 Monai beĝene ĝofaĝofa ĝana vevaĝa-bade tarimari kotari ĝeĝoritoĝarito, benamo ĝekirato, “Mai tarima na tu ĝaro mabarari ai ĝita ĝera Rubu Veaĝana e Mose ĝena taravatu ekira-fitoĝarini.

14 Ĝai na ĝaseĝaĝiatio, ekirato, ‘Iesu, Nasareta tarimana, na mai Rubu Veaĝana bevaĝa-rakavaiani, ema Mose na evinirato veigari mabarari bevaĝa-iraurini.’”

15 Kanisoro ai ĝevegogo-taĝoto-ĝoi tarimari mabarari na Stefano ĝeĝita-karakariatio, ema goirana ĝeĝitaiatio tu noga mogo aneru ta goirana.

7

Stefano ĝena ĝobata

1 Benamo Rubu Veaĝa verena baregona na Stefano edanaĝiatio, ekirato, “Maigeri guruĝa tu mogoni ba?”

2 Stefano na evaĝa-veserito, ekirato, “Tarikakagu e tamagu mabarami, au ĝoseĝaĝigu! Ĝita senera Aberahamo Haran vanuĝanai roĝosi roĝo berea tanu nai, mareva barego Barauna ĝia ĝenai efororito Mesopotamia ai,

3 benamo ĝia ekiraiatio, ekirato, ‘Ĝemu bese e tanobara noiaĝuia, benamo au na bavaĝa-ĝitamuni tanobarana ĝana bono iaĝo.’

4 Benamo ĝia na Kaldea tanobarana eraga-kwaneato, benamo Haran ai ea vanuĝato. Ma tamana emaseto murinai, Barau na etuĝu-iaĝomaiatio inıtoma ĝotanu-iaĝiani tanobarana ĝana.

5 A Barau na Aberahamo tu ĝena tano misina kota maki asi eviniatio. Kwaku vaĝa-ruĝatarina gabuna ilailanai misina kota maki asi eviniatio. Senaĝi Barau eguruĝa-toreto ĝia na tano ta beviniani, ĝia e ĝia murina na beĝe ĝorani tarimari na tano ta beĝe ĝaunaiani ĝia ĝeri. Mo ĝaro ai Aberahamo tu asi natuna.

6 Barau na ma evaĝa-guruĝiatio, ekirato, ‘Ĝoi ĝemuna beĝe ĝorani beseri tu tano boruna tai beĝe tanuni. Ma laĝani sinau vasivasi (400) mo gabu tarimari ĝeri vetuĝunaĝi tarimari ai beĝe vaĝa-iaĝorini e beĝe vaĝa-midigu midigurini.’

7 Barau ma ekirato, ‘Isaraela tarimari na vetuĝunaĝiri ĝeiaĝo-vinini beseri tu au na bavevaĝa-maoro vinirini, moĝa murinai ĝia tu mo tano na beĝe raka-rosini, mai gabu ai au beĝema toma-rakariĝo viniguni.’

8 Benamo Barau na Aberahamo kefi-lamavaĝi veigana eviniatio, mo tu ĝia ĝena kiraĝitore vetogana. Benamo Aberahamo na Isako evaĝa-ĝoraiatio, ma ĝaro vaĝa-imaima toitoina (8) murinai tauĝanina kefina elama-vaĝiatio. Moĝa murinai Isako na Iakobo evaĝa-ĝoraiatio, ma Iakobo na ĝera doĝoro ĝedebardini tarimari gabanana ruarua (12) evaĝa-ĝorarito.

9 Doĝoro debari tarimari Iosefa ĝenai ĝemamato, benamo Aigupito tarimari ĝeri ai ĝeivoivoi-iaĝiatio. Senaĝina Barau tu Iosefa ĝesi,

10 ema ĝena dabara doko mabarari ĝerina evaĝa-maĝuriatio. Barau na Iosefa iaunega eviniatio, ema Pharao, Aigupito verena, nuĝana evaĝa-namoato Iosefa ĝenai, benamo Pharao na eura-viniatio ema seĝuka eviniatio, Aigupito tanona ema ĝia ĝena numa tarimari e farefareri bene ĝita-ĝauri.

11 Benamo Aigupito tanona mabarana ema Kanana tanona mabaranai doĝe ĝeĝorato, monana vito e nanu mase baregona evaĝa-ĝoraiatio, benamo ĝita senera tu asi ĝeri ĝanigani doĝari dabarana.

12 Senaĝina Iakobo eseĝaĝito Aigupito tu ma widina, benamo ĝia na ĝita senera etuĝu-iaĝorito, mo tu ĝia ĝeri iaĝoiaĝo giniginena.

13 Ma ġeri iaġoiāġo vaġa-ruaruanai Iosefa tauġena kakana e tarina ekiravararito ġia tu deikara, benamo Pharao na Iosefa ġena bese eribaiato.

14 Moġa murinai Iosefa evetuġuto, tamana Iakobo ma ġena bese ġeri ai Aigupito ġana beġene iaġoma ġana. Iakobo besena Kananai tu mabarana gabana imaima ma gabana ruarua imaima (75).

15 Benamo Iakobo Aigupito ġana evariġoto, monai ġia e ġita senera ġemaseto.

16 Ġia tauġaniri tu Sekem ġana ġeġwa-ġenoġoi iaġorito, benamo monai ġea guririto. Mo gara gabuna tu Aberahamo na Hamora naturi ġerina moni na evoiato.

17 Barau na ġena kiraġitore Aberahamo ġenai bevaġa-moġoniani ġarona ekavinaġito-ġoi nai tu, ġita ġera tarimarima Aigupito ai ġeġutumagorogoroto.

18 Ma moġa murinai tu vere ta na Aigupito eġita-ġauato. Mo vere moġa tu asi ribana Iosefa.

19 Ġia na ġita senera eġofarito-ġoi e evaġa-midigu midigurito-ġoi, ema ekirarito-ġoi, naturi raraka-rarakari ġeri numa na beġene tore-rosiri, beġene mase ġana.

20 Mo negai Mose emaġurito. Ma Mose eġorato nai, marevana tu namo vedaurea. Ma ġia tu ġue toitoi tamana ġena numai ġenariato,

21 benamo numa na ġetore-rosiato nai tu, Pharao natuna ġuiatona na eġabiato, benamo natunai evaġa-iaġoato.

22 Mose tu Aigupito ġeri riba e iaunega mabarana ġevaġa-ribaiato, ema ġena guruġa e veiġa ma seġukari tarimanai eiaġoto.

23 Ma ġena maġuri laġanina gabana vasivasi (40) eġabiato, benamo karona Isaraela tarimari nea raka-ġitari etato.

24 Ġia na Aigupito tarimana ta eġitaiato, Isaraela tarimana ekwariato-ġoi, benamo ġia eiaġoto gogobana eragato, benamo mo Aigupito tarimana evaġi-maseato.

25 Mose mataborur ekirato tu ġena tarimarima beġe tuġamaġi-fakani, ġia ġenana Barau na Isaraela tarimari bevaġa-maġuririni, senaġi moġa Isaraela tarimari na tu asi ġeriba-maoroato.

26 Ma elaġanito nai, ġia na Isaraela tarimari ruarua eġitarito ġevevaġito-ġoi, benamo nevaġa-mainori ġana ekirarito, ekirato, 'Ġomi tau ruarua, ġoseġaġi, ġomi tu tarikaka moġo ruarua, ma kara dainai tu taumi ruarua ġovevaġini?'

27 Senaġi vevaġi ekoraiato tarimana na Mose edori-veġitaiato, benamo ekirato, 'Goi tu deikara na ġai ġema vere ema toto-iobukaiobuka tarimanai evaġa-iaġomuto?'

28 Goi ourani tu ġoraġani Aigupito tarimana ovaġi-maseato kavana au novaġi-masegu otoni?'

29 Mose na mo guruġa eseġaġiato, benamo eraga-kwareġato, Midian ġana egari-rakato. Monai etanuto-ġoi nuġanai natuna ruarua ġemaġurito.

30 Laġani gabana vasivasi (40) ġekorito murinai, aneru ta tano fakanai Sinai Ġorona sevina Mose ġenai efoforito. Mo aneru tu ġau ruguruguna ġenai karava morenai eiaġoto, benamo Mose ġenai efoforito.

31 Mose na moġa eġitaiato nai, eġabato; benamo nea ġita-ginikaua ġana eraka-kavinaġi iaġoto-ġoi nuġanai, Vereġauka garona eseġaġiato, maiġesi ekirato,

32 'Au tu ġoi senemu Aberahamo, Isako, e Iakobo ġeri Barau.' Mose egari-rakavato, benamo asi eurato ma bene boġe-iaġo ġenoġoi.

³³ Barau na evaḡa-guruḡaiato, ekirato, ‘Ķemu tamaka kwakumu na novei-vaḡiri, korana manī oruḡa-taḡoni gabuna tu tano veaḡana.

³⁴ Moḡoni, au ḡegu tarimarima Aigupito ai ḡevaḡa-midigu midigurini tu baḡitari ema ḡeri midigumidigu ḡabana guruna baseḡaḡiri nai, au bamariḡo tu navaḡa-maḡuriri ḡana. Toma noiaḡoma, au na ḡoi tu Aigupito ḡana atuḡu-ḡenoḡoimuni.’

³⁵ Mai Mose tu Isaraela tarimari na ḡeruḡaiato tarimana. Maiḡesi ḡekirato, ‘Ḷoi tu deikara na ḡai ḡema vere e toto-iobukaiobuka tarimanai evaḡa-iaḡomuto?’ Mai tarima sebona moḡo tu Barau na etuḡuato bene vere e bene vevaḡa-maḡuri. Ema ḡia na maki ḡau rugurugunai karava moreri ai eforito aneruna ḡenana evaḡa-kavaiato.

³⁶ Ḷia na Isaraela tarimari Aigupito na eḡori-rosirito nai, nuḡa-farevaḡi veigari e vetoga boruri eveirito-ḡoi, Aigupito nuḡanai e Davara Kakakanai ema tanobara fakanai laḡani gabana vasivasi (40).

³⁷ Mai Mose sebona na Isaraela tarimari ekirarito, ekirato, ‘Barau na ḡemi peroveta tarimana ta betuḡuani, au etuḡuguto kavana. Mo peroveta tu ḡomi ḡemi tarimarima ta.’

³⁸ Ḷia tu Isaraela tarimari ḡeri vegogo nuḡanai tano fakanai ḡita senera ema Sinai Goronai evaḡa-guruḡaiato aneruna ḡesi monai. Ḷia na Barau ḡena maḡuri guruḡana Barau ḡenana eḡabiato, ḡita ma bene vaḡa-ribara ḡana.

³⁹ Senaḡina ḡita senera asi ḡeurato ḡena guruḡa beḡene ḡabi-raḡea, ema ḡia ḡekira-fitoḡaiato ema nuḡari ai ḡeri ura tu Aigupito ḡana ma ḡeḡenoḡoi.

⁴⁰ Ḷia na Arona ḡekiraiato, ḡekirato, ‘Ḷita ḡera barau tari noveiri, ḡita ḡoirarai beḡene raka ḡana. Korana mai Mose ḡita Aigupito na eḡori-rosirato tarimana tu ḡita asi ribara kamasi ta bevei bene.’

⁴¹ Mo ḡaro ai ḡia na boromakau natuna kavana kwaivakukuna ḡeveiato. Benamo mo kwaivakuku ḡoiranai ginitaḡo dagarari ḡea toreto ema ḡeḡani-verekoto. Tauḡeri ḡimari na ḡeveiato dagarana ḡeverere-viniato.

⁴² Benamo Barau eraka-veḡitato, ma Isaraela tarimari evini-iaḡorito, guba visiḡuri beḡene toma-rakariḡo viniri ḡana. Mo tu peroveta tarimari ḡeri bukaḡi ḡetoreato ilailanai, ekirani, ‘Isaraela tarimami! Laḡani gabana vasivasi (40) tano fakanai ḡovaḡirito-ḡoi mamoeiri, boromakauri, e ginitaḡo dagarari tu dia au ḡegu.

⁴³ Mo tu kwaivakuku barauna Molok ḡena farai rubuna, ema ḡemi barau Refan ḡena visiḡu iouiouna ḡoḡwaiato-ḡoi; moḡeri kwaivakuku tu ḡomi na ḡoveirito, boḡono toma-rakariḡo viniri ḡana.

Moḡa lorinai au na ḡomi batuḡu-rakamini Babulona mo rekena ḡana.’

⁴⁴ Ḷita senera tanobara fakanai ḡetanuto-ḡoi nai tu, farai rubuna maki ḡia ḡesi. Mo farai rubuna Barau na ḡena guruḡa moḡoniri evaḡa-foforirito-ḡoi. Mo farai rubuna ḡeraḡaiato tu Barau na Mose ekira-varaiato lorinai, ema Mose na farai rubuna vetoḡana eḡitaiato ilailanai moḡo ḡeveiato.

⁴⁵ Moḡa murinai ḡita senera na mo farai rubuna tamari ḡerina ḡeḡabiato, benamo Iosefa ḡena veḡorikau neganai ḡeḡwakau-iaḡoato irau bese tarimari tu ḡita senera ḡoirari ai Barau na ḡeri tano na elai-veḡitarito. Mo farai rubuna monai etanuto mo, Davida ḡena nega.

⁴⁶ Davida na Barau ḡena vevaḡa-namo eḡabiato, ema enoḡinoḡito, monai Iakobo ḡena Barau ḡena tanu numana bene ragaia etato.

⁴⁷ Senaḡina Solomona na vau ḡena numa eragaiato.

48 Senaġi Iaru-korokoro Barauna tu tarimarima ġimari na ġeragarini numari ai tu asi etanuni, peroveta tarimana ekirani kavana,

49 “Vereġauka ekirani,

“Guba tu au ġegu terona,

ema tanobara tu au kwakugu vaġa-ruġatarina gabuna.

Be, au ġegu numa tu kamasi-kamasi na boġo ragaiani?

Au ġegu iaġaraġi gabuna tu aiġa?

50 Maġeri dagara mabarari

au ġimagu na asi aveirito, ei?” ’

51 Stefano ma eguruġato, ekirato, “Kira-ġuiragi tarimami! Ġomi nuġami e seġami tu Barau asi ġeura-viniani tarimari kavari. Ġomi tu senemi ġeveito-ġoi kavari ġoveini, vanagivanaġi Iauka Veaġa ġolai-veġitaiani!

52 Kamara peroveta tu ġomi senemi na asi ġevaġa-midigu midiguato? Ġia na tu Vei-iobukaiobuka Tarimana ġena iaġoma ġekiraġi-fofori guineato tarimari tu ġevaġi-maserito. Ma toma ġomi na tu Iesu boġo revaia e boġo vaġi-debaia.

53 Barau ġena taravatu aneru na ġeġwa-mariġoato tu ġomi na ġoġabiato, senaġina asi ġokorana-iaġiato.”

Stefano forena ġeġidara-maseato

54 Ġia na mo guruġa ġeseġaġiato nai, ġebaru-rakavato, gadikari maki ġeġara-taririto Stefano ġenai.

55 Senaġi Stefano tu Iauka Veaġa na evaġa-vonuato, egaga-raġeto guba ġana, benamo gubai Barau marevana baregona eġitaiao, ema Iesu eġitaiao Barau aroribana i ruġataġo.

56 Benamo ekirato, “Ġoboġe! Guba bevekeo-faka aġitaiani, ema Tarimarima Natuna tu Barau aroribana i eruġa-taġoni!”

57 Mo guruġa ġeseġaġiato nai tu, ġimari na seġari ġekou-ġaurito vau ġefararato. Benamo mabarari vaġa-sebo ġia ġeraga-viniato,

58 ġeġabiato, benamo siti murina ġana ġeinu-rosiato, benamo fore na ġeġidaraiato. Ma vaġa-moġoni tarimari ġeri dabuġa tu futua ta arana Saulo, ġia kwakuna korana i ġetorerito.

59 Ġeġidaraiato-ġoi nuġana i, Stefano eġuriġurito, ekirato, “Iesu Vereġauka o, au ia ukagu noġabi-raġea.”

60 Evetui-tarito, benamo ma taġina ġesi ekea-raġeto, ekirato, “Vereġauka o, ġeri veiġa rakavana maiġa voina asi bono viniri.” Moġesi eguruġato, benamo emaseto.

8

1 Saulo na Stefano vaġimasena tu eġabi-raġeato.

Ekalesia vaġa-midigumidiguna e lai-lautilausina evesinato

Mo ġaro ai Ierusalemna nuġana i ekalesia vaġa-midigumidiguna e lai-lautilausina baregona evesinato. Veġabidadama tarimari mabarari ġeragarovorovoto, Iudea e Samaria tanori mabarari ġana ġeiaġoto, senaġi apostolo tarimari ġereġari moġo ġeraga-kwanerito.

2 Barau korana-iaġina tarimari kotari na Stefano taġina ġevei-rakavato e ma taġiri ġesi ġekeuato, benamo ġea guriato.

3 Senaġina Saulo na tu ekalesia nevaġa-rakava korikoria etato. Numa tata nuġari ai eraka-toġato-ġoi, benamo veġabidadama tauri e vavineri einu-rosirito-ġoi, ma eġabi-iaġorito-ġoi dibura numai ea biri-ġaurito.

Filipo Samaria ai eġobato

⁴ Ġevaġa-karovorito tarimari tu ġeiaġoto gaburi ai Barau ġena guruġa ġea ġobata-iaġiato.

⁵ Filipo tu Samaria vanuġana baregona ġana eiaġoto, monai Keriso varina ea fiuato.

⁶ Ġutuma na Filipo ġena guruġa ġeseġaġiato ema nuġa-farevaġi veġari eveirito ġeġitarito nai, ġia mabarari na ġeseġaġi-vini magomagoato.

⁷ Iauka rakavari tarimarima ġutuma ġerina ma ġabari ġesi ġeraka-vaġito, ema tauġaniri tavi tari ġemaseto tarimari e kwaku rakava tarimari ġutuma ġenamoto.

⁸ Moġa lorinai mo Samaria vanuġana nuġanai iaku baregona eġorato.

⁹ Mo vanuġai tarima ta etanuto-ġoi arana tu Simona. Guinenai ġena meġameġa e ġora veġari na Samaria tarimari evaġa-ġaba rakavarito-ġoi. Tauġena evekiragito-ġoi, ġia tu varaġe rakava,

¹⁰ ema tarimarima mabarari mo vanuġa nuġanai misina na beiaġo mo baregona na ġeseġaġi-viniato-ġoi, ema ġekirato-ġoi, “Mai tarima tu mo Barau ġenana eiaġomato seġukana ġekiraġiani ‘Seġuka Baregona’.”

¹¹ Ġia ġeseġaġi-viniato, korana ġaro barego vedaurea ġia ġena meġameġa veġari na evaġa-ġabarito.

¹² Senaġi Filipo na Barau ġena Basileia, (ġena veġitaġau seġukana evaġa-ruġaiani maiġa), Varina Namona e Iesu Keriso arana varina eġobata-vinirito nai, tau e vavine na ġevaġa-moġoniato, benamo ebatatorito.

¹³ Simona na maki evaġa-moġoniato, benamo babatiso eġabiato. Moġa murinai Simona na Filipo ekaferi-kaferiato, ma Filipo na seġuka veġari baregori e vetoġa boruri eveirito-ġoi nai, eġaba-rakavato.

¹⁴ Apostolo tarimari Ierusalemaj ġetanuto-ġoi ġeseġaġito, Samaria tarimari na tu varau Barau ġena guruġa ġeġabi-raġeato, benamo Petero e Ioane ġetuġu-iaġorito Samaria ġana.

¹⁵ Tauri ruarua ġeraġasito nai tu, veġabidadama tarimari iatari ai ġeġauġauto, Iauka Veaġa beġene ġabia ġana.

¹⁶ Korana Iauka Veaġa ġia ta iatari ai tu roġosi roġo bere raka-riġo. Ġia tu Iesu Vereġauka aranai moġo babatiso ġeġabiato.

¹⁷ Petero e Ioane ġimari ġia iatari ai ġeveġabikauto, benamo ġia na Iauka Veaġa ġeġabiato.

¹⁸ Simona na apostolo tarimari eġitarito, ġimari ġetore-kaurito vau Iauka Veaġa ġeġabiato, benamo ġia na moni Petero e Ioane eduġi-vinirito, ekirato,

¹⁹ “Au maki mani seġuka ġovinigu, be ġimagu ta iatanai bana tore-kaua nai, Iauka Veaġa bene ġabia.”

²⁰ Senaġi Petero na ekiraiato, ekirato, “Ġoi ma ġemu moni ġesi karava gabuna ġana ġoiġo, korana otuġamaġini Barau ġena varevare tu moni na bovoiani!

²¹ Mai ġauvei ai ġoi tu asi ġemu gabu, korana nuġamu tu asi roroġoto Barau ġoiranai.

²² Mai ġemu ura rakavana ġenana novetuġamaġi-kure, benamo Vereġauka nonoġia, betaġu ġia na maniġesi tuġamaġi ġeġevana oġabiani nuġamu ai maniġa betuġamaġi-fitoġaiani.

²³ Korana aġitamuni, ġoi tu nuġa-ġirimaġirima na ovonuto, ema rakava na ebaru-bubuġaumuto.”

²⁴ Benamo Simona na Petero evaĝa-veseato, ekirato, “Mani ĝemi veĝa, au iatagu ai Vereĝauka nonoĝia, be mani bokiraĝiri dagarari ta au ĝegu ai asi bene ĝora.”

²⁵ Petero e Ioane na Vereĝauka ĝena guruĝa ĝekiraĝi-foforiato e ĝevari-fuato murinai, Ieruselema ĝana ĝeĝenoĝoito. Ĝeri ĝenoĝoi ai Samaria vanuĝari vovokari Vari Namona ĝeĝobata-iaĝiato.

Filipo e Itiopia tarimana baregona

²⁶ Vereĝauka ĝena aneru ta na Filipo evaĝa-guruĝaiato, ekirato, “No-variĝisi, gabina (o south) rekena ĝana noiaĝo, bono iaĝo mo, Ieruselema na Gasa ĝana ĝeiaĝoni dabarana ĝana. Mo tu tano fakana dabarana, tarima ta asi etanuni.”

²⁷ Benamo evariĝisito, eiaĝoto. Eiaĝoto-ĝoi nuĝanai, Itiopia tarimana ta, dagi baregona tarimana, tu ĝena vanuĝa ĝana eĝenoĝoito-ĝoi. Ĝia tu Itiopia ĝitaĝauna vavinena baregona ĝena farefare eĝitaĝaurito-ĝoi tarimana baregona. Ĝia tu eunuko, (seuri ĝefararito tarimana). Ĝia Ieruselema ĝana eiaĝoto tu, Barau benea toma-rakarigo vinia ĝana.

²⁸ Ĝena ĝenoĝoi ai kariota iatanai etanukauto vau, Isaia peroveta tarimana ĝena buka eiavi-iaĝoato-ĝoi.

²⁹ Benamo Iauka Veaĝa na Filipo evaĝa-guruĝaiato, ekirato, “Noiaĝo, mo kariota sevinaĝi bonoa raka.”

³⁰ Benamo Filipo kariota sevina ĝana eraga-iaĝoto, benamo mo tarima eseĝaĝiato, Isaia peroveta tarimana ĝena buka eiaviato-ĝoi. Benamo ekirato, “Mani guruĝa oiaviani anina ma ribamu ba?”

³¹ Ĝia evaĝa-veseto, ekirato, “Au tu kamasi baribani. Mai tu tarima ta na bekira-varaguni vau bariba-maoroni.” Benamo Filipo ekiraiato, ekirato, “Kariotai noma raĝekau, be sevigu ai noma tanu.”

³² Ĝia na buka nuĝanai eiaviato-ĝoi toretorena tu maĝa,
“Ĝia tu mamoe kavana ĝeĝori-iaĝoato, beĝene vaĝi-masea ĝana;
ema ĝia tu mamoe natuna kavana ĝuiri ĝefakosi-vaĝirini nai tu, mururi asi
ĝekeorini,
moĝesina kavana ĝia maki muruna asi ekeoato.

³³ Ĝetore-riĝoato e ĝena Kota dabarana ĝekouato.

Ĝena bese tarimari tu
dei na bekiraĝirini?

Korana ĝena maĝuri tanobarai tu bema kori.”

³⁴ Eunuko tauna na Filipo enoĝiato, ekirato, “Nokira-varagu, mai peroveta tarimana na tu deikara moĝesi ekiraĝiato? Ĝia tauĝena evekiraĝito ba ta ekiraĝiato?”

³⁵ Benamo Filipo na mo toretore ĝenana ĝena guruĝa esinaiato, ema Iesu Varina Namona evaĝa-ribaiao.

³⁶ Mo dabara na ĝeiaĝoto nuĝanai, nanu gabuna tai ĝeraĝasito. Benamo mo eunuko tauna na Filipo ekiraiato, ekirato, “Noboĝe, nanu tu maĝa, kara na au babatisogu elau-ĝaui?” [³⁷ Benamo Filipo ekirato, “Bema nuĝamu mabarana ĝesi ovaĝa-moĝoniani nai tu ba-babatisomuni.” Ĝia evaĝa-veseto, ekirato, “Oi, nuĝagu mabarana ĝesi avaĝa-moĝoniani Iesu Keriso tu Barau Natuna.”]

³⁸ Benamo ĝena draiva ekiraiato, kariota nevaĝa-ruĝataria, benamo kariota eruĝa-tarito. Filipo e eunuko tauri ruarua nanu ai ĝeraka-riĝoto, benamo Filipo na eunuko tarimana ebabatisoato.

³⁹ Tauri ruarua nanu na ġeraġekauto-ġoi nai, Vereġauka Iaukana na Filipino tu eġabi-veġitaiao. Eunuko tarimana na asi ma eġitaiao, senaġi ġena iaġoiāgo dabara na eiaġoto-ġoi roġo ma iakuna ġesi.

⁴⁰ Filipino tu Asoto ai ma ea foroforo. Monai vanuġa mabarari ġari eiaġoto, Vari Namona ea ġobata-iaġiato-ġoi, eiaġoto mo Kaisarea ai eraġasito.

9

Saulo evetuġamaġi-kureto

¹ Saulo roġo Vereġauka ġekorana-iaġiato-ġoi tarimari vaġa-rakavari e vaġi-maseri guruġari evei-gwadato-ġoi ma baruna ġesi. Benamo eiaġoto Rubu Veaġa verena baregona ġenai,

² enoġiato, vevaġa-riba fefana bene torea, Damaseko ai Iuda tarimari ġeri rubu bene viniri ġana. Be, Iesu ġekorana-iaġiani tauri e vavineri monai bene doġariri nai tu bene barubaruri, benamo Ierusalemata ġana bene ġori-ġenoġoi iaġomari.

³ Benamo Saulo na Ierusalemata eiaġuiato ma Damaseko ġana eiaġoto. Damaseko vanuġa ekavināġiato nuġanai, asikauna mama ta guba na emoreto, ġia enanāġi-tariato.

⁴ Benamo ġia tano ai eketo-tarito, ma garo ta eseġaġiato, ekirato, “Saulo, Saulo! Kara dainai au ovaġa-midigu midiguguni e olaiguni?”

⁵ Ġia evedanaġito, ekirato, “Vereġauka, ġoi tu deikara ei?”

Mo garo evaġa-veseto, ekirato, “Au tu Iesu, ġoi na au ovaġa-rakavaguni tarimagu.

⁶ Senaġi novariġisi, vanuġa baregonai noa raka-toġa, monai vau tarima ta na bekiramuni kara ma bono vei.”

⁷ Ġia ġekavaiato tarimari mabarari ġeruġa-tarito, asi ġeguruġato, korana garo tu ġeseġaġiato, a tarimana tu asi ġeġitaiao.

⁸ Saulo tano na evariġisito, matana eiaġaiato nai tu, dagara ta asi eġitaiao. Benamo karona na ġimantai ġeġabito, Damaseko ġana ġeġori-iaġoato.

⁹ Ġaro toitoi veġata matana ebubuto asi eboġeboġeto, ema asi eġaniganito e nanu o dagara ta asi eniuato.

¹⁰ Damaseko ai Iesu ekorana-iaġiato-ġoi tarimana ta arana Anania, mata-vanaġi ai Vereġauka na evaġa-guruġaiato, ekirato, “Anania!” Ġia evaġa-veseto, ekirato, “Ou! Vereġauka, au maieġeu.”

¹¹ Vereġauka na evaġa-guruġaiato, ekirato, “Novariġisi, be dabara ta arana Roroġoto Dabarana na noiaġo. Bono iaġo Iudas ġena numa nuġanai, Taso tarimana ta arana Saulo bonoa vedanaġi-iaġia, korana ġia tu monai moġa eġuri-ġurini.

¹² Ġia na mata-vanaġi ai tarima ta arana Anania beġitaia, beraka-toġa, ġimana ġia iatanai betore-kauri, matana bene fafa ġana.”

¹³ Anania evaġa-veseto, ekirato, “Vereġauka, tarima ġutuma na ġegu ġekiraġito, mai tau na Ierusalematai ġoi ġemu tarimarima veaġari tu veiaġa rakava kwaikwairi evei-vinirini.

¹⁴ Ema Damaseko ġana beiaġoma tu Rubu Veaġa vereri baregori na maoro ġeviniato, ġoi aramu ġevaġa-raġeani tarimari mabarari bene barubaruri e dibura numai bene toreri ġana.”

¹⁵ Senaġina Vereġauka na ekiraiato, ekirato, “Noiaġo, korana mai tau tu au na varau aġabi-viriġiato, bese irauirau tarimari e tanobara vereri baregori ema Isaraela tarimari ġoirari ai au aragu bene kiraġia ġana.

16 Ema au na bavaḡa-ḡitaiani, ḡia au aragu bakunai tu midigumidigu vovoka roḡo beḡabini.”

17 Benamo Anania eiaḡoto, numai eraka-toḡato, ema ḡimana Saulo iatanai etore-kauato. Benamo ekirato, “Saulo tarikakagu, Vereḡauka Iesu, ḡia tu maiḡana oiaḡomato-ḡoi nai dabara tumanai ḡemu ai eforito tarimana. ḡia na betuḡuḡu, korana matamu ma bene fafa ema Iauka Veaḡa na ḡoi bene vaḡa-vonumu ḡana.”

18 Asikauna dagara ta maḡani-kone ḡunari noḡa matana na eketo-vaḡito, benamo ma eboḡoḡe-ḡenoḡoito. Moḡa murinai evaisi-raḡeto, benamo babatiso eḡabiato.

19 Eḡaniḡanito murinai, tauna ma ekokore-ḡenoḡoito.

Saulo Damaseko ai eḡobatato

Ma Saulo Damaseko ai tu ḡaro kotari roḡo ma etanuto, Iesu ḡekorana-iaḡiato-ḡoi tarimari ḡesi.

20 ḡia asikauna rubu ḡana eiaḡoto, Iesu ea ḡobata-iaḡiato, ekirato, “Iesu tu Barau Natuna.”

21 Saulo ḡeseḡaḡiato tarimari mabarari nuḡari ḡefarevaḡito, benamo ḡekirato, “Mai tarima tu Iesu arana ḡekiraḡiani tarimari Ierusalemāi evaḡirin tarimana ene? Ema maiḡana beiaḡoma tu mai veḡa sebona uranai bene ḡabiri, be Rubu Veaḡa vereri ḡeri ai bene ḡori-ḡenoḡoi-iaḡori ḡana ene?”

22 Senaḡi Saulo ḡena ḡobata seḡukana tu ebareḡoto-ḡoi. Ḗena guruḡai Iesu evaḡa-moḡoniato-ḡoi, moḡoni Iesu tu Keriso, (Barau na ekiraḡi-toreato vevaḡa-maḡuri tauna). Mo guruḡa Iuda tarimari Damaseko ai ḡetanuto-ḡoi tarimari tu asi ḡeri vaḡa-vese dabarana.

23 Ḗaro ḡutuma ḡekorito murinai, Iuda tarimari ḡeveḡogoto, Saulo vaḡi-masena dabarana ḡeboioḡaiato;

24 senaḡi kara ḡeboioḡaiato dagarana tu tarima tari na Saulo ḡekira-varaiato, be eribaiato. Boḡi-laḡani vanuḡa barana ḡatama bokari ḡeḡita-ḡaurito-ḡoi, ḡia beḡene vaḡia uranai.

25 Senaḡi boḡi ta Iesu ḡekorana-iaḡiato-ḡoi tarimari na ḡeḡabiato, boseḡai ḡeḡuraiato, benamo vanuḡa maḡuna murikana na ḡetuḡu-rigoato.

Saulo Ierusalemāi ai

26 Saulo Ierusalemāi ea votuto nai tu, ḡena ura Iesu ḡekorana-iaḡiato-ḡoi tarimari ḡesi beḡene tanu-vegogo, senaḡi ḡia mabarari na ḡeḡari-viniato, korana asi ḡevaḡa-moḡoniato-ḡoi, ḡia tu moḡoni korikori Iesu ḡena mero.

27 Senaḡi Banabas na ea ḡoriato, apostolo tarimari ḡeri ai eḡori-iaḡoato. Ḗia na vau ḡeri ekiraḡito, Saulo na Vereḡauka dabarai kamasi eḡitaiato, ema Vereḡauka na eguruḡa-viniato. Ema ekira-vararito, kamasi Saulo tu Damaseko ai ma kokorena ḡesi, asi egarito, Iesu aranai eḡobatato nai.

28 Moḡa lorinai Saulo ḡia ḡesi ḡetanuto-ḡoi ema Ierusalemāi mabarana eḡobatato-ḡoi Vereḡauka aranai ma kokorena ḡesi.

29 Grik ḡaro ai ḡeguruḡato-ḡoi Iuda tarimari ḡesi ḡeguruḡato-ḡoi e ḡeveḡare veḡareto-ḡoi, senaḡi ḡia na tu beḡene vaḡi-masea dabarana ḡevetauato-ḡoi.

30 Tarikaka na mai boioḡa ḡeribaiato nai tu, Saulo Kaisarea ḡana ḡeḡori-varigoato, ma monana Taso ḡana ḡetuḡu-rakaiato.

³¹ Moġa lorinai ekalesia mabarana Iudea, Galilea, e Samaria tanori ai maino eġorato. Ekalesia ġena kokore ebaregato e Vereġauka garina ġeveito-ġoi ema Iauka Veaġa na evaġa-kavarito.

Petero Lida e Iopa ai

³² Petero gabu mabarari ġari eiagoto, nuġanai tu Lida ġana maki evarigoto, Barau ġena tarimarima veaġari rakaġitari.

³³ Monai tarima ta arana Aenea edogariato. Ġia kwakuna tu mase ema laġani imaima toitoi (8) veġata ġena genagena bedina na asi evarigisito.

³⁴ Benamo Petero na evaġa-guruġaiato, ekirato, “Aenea, Iesu Keriso na evaġa-namomuni. Novariġisi, ġemu genagena noiokua.” Asikauna Aenea evarigisito.

³⁵ Monai ġetanuto-ġoi Lida e Saron tarimari mabarari na ġeġitaiato, benamo Vereġauka ġenai ġeraka-kureto.

³⁶ Iopai Iesu ekorana-iaġiato-ġoi vavinena ta arana Tabita etanuto-ġoi. Grik garo ai arana tu Doreka, anina tu “deer”. Ġia tu veiġa namori ġutuma eveito-ġoi, ema asi ġeri-ġari tarimari evaġa-kavarito-ġoi.

³⁷ Mo negai ġia tu ekeveto, benamo emaseto. Tauġanina ġeguriato, benamo numa tuġunai daiġutu tai ġea toreato.

³⁸ Iopa e Lida fakari tu asi manaġa. Be Iesu ġekorana-iaġiato-ġoi tarimari Iopai ġeseġaġito Petero tu Lidai nai, tarima ruarua ġetuġu-iaġorito ġia ġenai, beġene noġia, beġene kira, “Ġai ġesi si-iaġo, asi nokwaibo!”

³⁹ Moġa lorinai Petero evarigisito, benamo ġia ġesi ġeiaġoto. Eraġasito nai tu, tuġuna daiġutuna ġana ġeġori-varaġeato. Monai vabu mabarari na ġeruġa-ġegeraġiato, benamo koudi e dabuġa kotari, Doreka na maġurinai eturirito-ġoi dagarari, ġia ġevaġa-ġita-iaġiato ma taġiri ġesi.

⁴⁰ Petero na ġia mabarari daiġutu na etuġu-rosirito, benamo evetui-tarito, eġuri-ġurito. Moġa murinai eboġe-tarito, mase vavinena eġitaiato, benamo ekirato, “Tabita, novariġisi!” Tabita na matana eiagariato, ma Petero eġitaiato, benamo etanu-vaisito.

⁴¹ Petero na ġimanai eġabito, evaġa-ruġa-vaisiato. Benamo veġabidadama tarimari e vabu ekea-toġarito. Ġia ġema raka-toġato nuġanai, Tabita tu maġuri eruġa-taġoto-ġoi. Benamo Petero na ġeri ai etuġu-iaġoato.

⁴² Mai veiġa varina Iopa mabaranai eraga-rovorovoto, benamo tarima ġutuma na Vereġauka ġevaġa-moġoniato.

⁴³ Petero ġaro vovoka Iopai etanuto, boromakau kefiru eġauvei-iaġirito-ġoi tarimana arana Simona ġesi.

10

Petero e Korenelio

¹ Tarima ta arana Korenelio, ġia tu Kaisarea vanuġanai etanuto-ġoi. Ma ġia tu Roma ġeri vetari tarimari sinau sebna (100) eġorikauro-ġoi tarimana. Ġia na vetari doġorona arana ġekiraġiato-ġoi tu “Itali ġeri Vetari Doġorona” eġita-ġaurito-ġoi.

² Ġia e ġena numa tarimari mabarari ġesi tu Barau ġekorana-iaġiato-ġoi ema Barau garina ġeveito-ġoi. Ġia na asi ġeri-ġari Iuda tarimari evaġa-kava baregorito-ġoi, ema vanaġivanagi eġauġauto-ġoi Barau ġenai.

³ Lavilavi ta, horaġauna 3 koloko rekenai ġia emata-vanaġito, Barau ġena aneru ta eġita-korikoriatu, ema raka-toġato, benamo ġia evaġa-guruġaiato, ekirato, “Korenelio!”

4 Benamo ma garina ġesi Korenelio na mo aneru eġita-karakaraiato, benamo ekirato, “Vereġauka, kara?”

Aneru na evaġa-veseato, ekirato, “Ġemu ġuriġuri e ġemu vevaġa-kava asi ġeri-ġari tarimari ġeri ai tu Barau na eġabi-raġerito, ema ġia na etuġamaġirini.

5 Toma, tau kotari Iopa ġana notuġu-iaġori, be tau ta arana Simona, ġia arana ta tu Petero, beġenea ġoria.

6 Ġia tu Simona, boromakau kefiru eġauvei-iaġirini tarimana ġesi etanuni; ġena numa tu kone rikinai.”

7 Mo evaġa-guruġaiato aneruna na eraga-kwaneato, benamo Korenelio na ġena vetuġunaġi tarimari ruarua ema ġena vetari tarimana ta ekea-iaġomarito. Ġena vetari tarimana moġa tu Barau ekorana-iaġiato-ġoi tarimana e ġia tu vanaġivanaġi Korenelio sevina ġia vetuġunaġina ġeiaġo-iviniato-ġoi tarimana ta.

8 Kara eġorato dagarari mabarari Korenelio na ekira-vararito, benamo Iopa ġana etuġu-iaġorito.

Petero ġena mata-vanaġi

9 Ma elaġanito, ġia tu dabara na roġo ġeiaġoto-ġoi, Iopa ġekavi-naġiato, ġaroġotai Petero tu numa tuġunai eraġekauto, nea ġuriġuri ġana.

10 Ġia varau evitoato, benamo ġena ura tu neġaniġani. Ma ġaniġani tu roġo ġerovinarito-ġoi nuġanai, ġia emata-vanaġito.

11 Ġia na guba evekeoto eġitaġato, ema dagara ta dabuġa baregona kavana, daigunina vasivasi emariġoto-ġoi ġia ġenai, noġa moġo ġetuġu-mariġoato-ġoi tanobara ġana.

12 Ġia emariġoto-ġoi nuġanai tu maġuri dagarari irauirau mabarari, kwakuri vasivasi ġerakani dagarari, e ġedarani dagarari, ema guba na ġerovoni manuri.

13 Benamo garo ta na ekiraiato, ekirato “Petero, novariġisi, be novaġiri, noġaniri!”

14 Senaġi Petero evaġa-veseto, ekirato, “Vereġauka, asiġina ġinavaġi! Rakava e asi veiareva dagarari ta au na roġosi roġo bara ġania.”

15 Mo garo na ma evaġa-guruġa ġenoġoiato ekirato, “Barau na eiarevarito dagarari ta rakavana asi bono kiragi.”

16 Vaġa-toitoi moġesi eġorato, benamo mo dabuġa asikauna tu guba ġana ma eġabi-varaġeato.

17 Petero na mo ġena mata-vanaġi ai eġitarito dagarari anina roġo etuġamaġi-vetaurito-ġoi nuġanai, Korenelio ġena vetuġunaġi tarimari tu ġevotuto, ma ġeribato Simona ġena numa tu ainai. Benamo ġeiaġoto mo numa ġatama bokana korana ġoiranai ġea ritogto-tarito.

18 Benamo ġekeato e ġevedanaġito, ġekirato, “Simona, arana ta ġekiraġiani Petero, tu mainai etanuni ba?”

19 Petero na tu roġo mo mata-vanaġi anina etuġamaġi-vetauato-ġoi nuġanai, Iauka Veaġa na evaġa-guruġaiato, ekirato, “Noseġaġi, ġoi tu tarima toitoi na ġevetaumuni.

20 Be novariġisi, noraka-riġo, ġia ġesi boġono iaġo. Asi bono ġoiagi, korana au na atuġurito bene.”

21 Petero eraka-riġoto mo tarima ġeri ai, benamo ekirato, “Ġovetauani tauna tu au maiġegu. Kara dainai boġo iaġoma?”

22 Ĝia ĝevaĝa-veseto, ĝekirato, “Ĝai tu vetari tarimari sinau sebona (100) eĝori-kaurini tarimana arana Korenelio na betuĝuma. Ĝia tu vei-iobuka-iobuka e Barau garina eveini tarimana, ema Iuda tarimari mabarari na maki ĝegubakau-baregoani. Ĝia tu Barau ĝena aneru ta na ekiraiato, ĝoi bene keakaumu, ĝena numa ĝana bono iaĝo, ema ĝoi na kara bokiraĝirini bene seĝaĝiri.”

23 Benamo Petero na mo tarima eĝabi-raĝerito ĝena numai, monai ĝegenato.

Petero tu Korenelio ĝena numa ĝana eiaĝoto

Boĝibogĝi ai ĝevariĝisito, benamo Petero ĝia ĝesi ĝeiaĝoto, ema tarikaka kotari Iopa na maki ĝia ĝesi ĝeiaĝo-sebonato.

24 Ĝia ĝeiaĝoto, dabara tumanai ĝea genato, ma elaĝanito vau Kaisareai ĝevotuto. Korenelio na tu ĝia enari-taĝorito-ĝoi, garagarana e ĝatana maki ekea-vegogorito ĝena numai.

25 Petero eraka-toĝato nuĝanai, Korenelio na edoĝariato, benamo kwakuna koranai evetui-tarito ma etutuĝutari-viniato.

26 Senaĝi Petero na evaĝa-ruĝa-vaisiato, ekirato, “Novariĝisi, au maki tarimarima moĝo.”

27 Numa nuĝanai ĝeraka-toĝato-ĝoi nai, Petero na Korenelio evaĝa-guruĝaiato-ĝoi. Ma numa nuĝanai tu tarimarima ĝutuma vegogotaĝo edoĝaririto.

28 Benamo ĝia na evaĝa-guruĝarito, ekirato, “Ĝomi tauĝemi maki ma ribami ginikau, ĝai ĝema taravatu ekirani, Iuda tarimana ta irau bese tarimana ta ĝesi asi bene tanu-vegogo o asi bene raka-ĝitaia maki, taravatu. Senaĝi Barau na bevaĝa-ĝitagu, au na tarima ta asi bana kiragiĝia ĝia tu rakava o asi veiareva.

29 Moĝa lorinai boĝo keakaugu nai, baiaĝoma moĝo, asi bakira-sirivaĝi. Be nadanaĝimi, au tu kara dainai boĝo keakaugu?”

30 Korenelio ekirato, “Ĝaro vasivasi varau beĝe iaĝo, au tu ĝegu numai aĝauĝauto-ĝoi horaĝauna 3 koloko lavilavi rekenai, maitoma horaĝauna kavana. Benamo asikauna dabuĝa kurokuro lelevaĝina na evedabuĝato tarimana ta ĝoiragu ai eruĝa-tarito,

31 benamo ekirato, ‘Korenelio! Barau na ĝemu ĝauĝau beseĝaĝia e vevaĝa-kava veiĝari asi ĝeri-ĝari tarimari ĝeri ai etuĝa-maĝirito.

32 Iopa ĝana novetuĝu-iaĝo, Simona, ĝia arana ĝekiraĝiani Petero ĝetoni, beĝena kiraia, be bene iaĝoma. Ĝia tu Simona, boromakau kefiru eĝauvei-iaĝirini tarimana ĝena numai etanuni kone rikinai.’

33 Moĝa lorinai asikauna vetuĝumu araga-veito, ema bovei-nauĝa, veiĝa namo taumu, korana boiaĝoma bene. Toma ĝai mabarama tu Barau ĝoiranai maiĝema, ma Vereĝauka na bevaĝa-naĝimu guruĝari mabarari baĝana seĝaĝiri ĝana.”

Petero ĝena ĝobata

34 Benamo Petero ĝena guruĝa esinaiato, ekirato, “Au toma bama riba-maoro, Barau na tarimarima mabarari tu eĝabiraĝe-ilailarini.

35 Bese mabarari nuĝari ai tu deikara na ĝia garina eveini, ema veiĝa iobukari eveini tarimana moĝo ĝia na eĝabi-raĝeani.

36 Barau na Isaraela tarimari ĝeri ai etuĝu-iaĝomaiato varina tu maiĝa, mo tu maino varina Iesu Keriso ĝenana maino varina namona efiuato-ĝoi. Iesu Keriso tu tarima mabarari ĝeri Vereĝauka.

³⁷ Ĝomi ma ribami Iudea nuĝanai kara eĝorato, Galilea na evesinato. Mo tu Ioane na babatiso eĝobata-iaĝiato murinai.

³⁸ Iesu, Nasareta tarimana varina, ĝomi ma ribami, kamasi Barau na Iauka Veaĝa e seĝuka ĝia iatanai ebubu-riĝoato. Ĝia tu gabu mabarari ĝari eiaĝoto, veiaĝa namori eveirito-ĝoi, ema Diabolo ĝena seĝuka na eĝabirito tarimari mabarari evaĝa-maĝuririto-ĝoi, korana Barau tu ĝia ĝesi.

³⁹ Ĝai tu ĝia na Iuda e Ierusalemata tanori ai eveirito-ĝoi dagarari mabarari ĝavaĝa-moĝonirini tarimama. Ĝia tu satauro ai ĝeikoko-kauato nai ĝevaĝa-maseato.

⁴⁰ Senaĝina Barau na ĝaro vaĝa-toitoinai (3) evaĝa-variĝisi ĝenoĝoiato ema evaĝa-foforiato beĝene ĝitaia ĝana.

⁴¹ Ĝia tu tarimarima mabarari na asi ĝeĝitaiai, senaĝi ĝevaĝa-moĝoniani tarimari, mo tu Barau na eviriĝi-guinerito tarimari na moĝo ĝeĝitaiao. Ma moĝeri tarimari tu ĝai maigema. Ĝia evariĝisi-ĝenoĝoito murinai, ĝai tu ĝia ĝesi ĝaĝaniĝani-vegogoto e ĝaniuniu-vegogoto.

⁴² Ĝia na evaĝa-naĝimato, tarimarima ĝeri baĝana ĝobata e baĝana kiraĝi-foforia, ĝia tu Barau na eĝabi-hidiato, maĝuri tarimari e mase tarimari ĝeri vevaĝa-maoro tarimanai evaĝa-iaĝoato.

⁴³ Peroveta tarimari mabarari na ĝia ĝekiraĝi-foforiato-ĝoi, ĝekirato-ĝoi, ĝia beĝe vaĝa-moĝoniani tarimari mabarari tu ĝia arana seĝukanai Barau na ĝeri rakava betuĝamaĝi-fitoĝarini.”

Irau bese tarimari Iauka Veaĝa ĝeĝabiato

⁴⁴ Petero roĝo eguruĝato-ĝoi nuĝanai, Barau ĝena guruĝa ĝeseĝaĝiato-ĝoi tarimari mabarari iatari ai Iauka Veaĝa eraka-riĝoto.

⁴⁵ Iuda tarimari Iesu ĝevaĝa-moĝoniato-ĝoi ema Petero ĝesi Iopa na ĝeiaĝomato tarimari tu ĝeĝaba-rakavato, korana Barau na Iauka Veaĝa irau bese tarimari maki evinirito iatari ai ebubu-riĝoato.

⁴⁶ Korana ĝeseĝaĝirito garo irauri ai ĝeguruĝato-ĝoi, ema Barau ĝevaĝa-raĝeato. Benamo Petero ekirato,

⁴⁷ mai tarimarima na tu Iauka Veaĝa varau beĝe ĝabia, ĝita na taĝabiato kavana. Be, nanu nuĝanai babatiso beĝene ĝabia ĝana tu deikara na bekira-ĝoiani?

⁴⁸ Moĝa lorinai ĝia na ekirarito, Iesu Keriso aranai beĝene babatisori. Benamo ĝia na Petero ĝenoĝiato, ĝaro kotari ĝia ĝesi roĝo ma beĝene tanu.

11

Petero ĝena guruĝa-fofori Ierusalemata ai

¹ Apostolo e tarikaka Iudea tanonai mabarari ĝeseĝaĝito, irau bese tarimari na maki Barau ĝena guruĝa varau ĝeĝabi-raĝeato.

² Benamo Petero Ierusalemata ĝana evarageato nai tu, Iesu ĝevaĝa-moĝoniato-ĝoi tarimari, senaĝi tauĝaniri kefiri tu ĝelama-vaĝirito, moĝeri na ĝeĝau-fitoĝaiao,

³ ĝekirato, “Ĝoi tu kefiri asi ĝelama-vaĝirini irau bese tarimari ĝeri numai oa raka-toĝato, ema ĝia ĝesi oa ĝaniĝani-vegogoto!”

⁴ Benamo Petero na vari mabarana ĝeri ekiraĝito, kamasi evesinato mo magona. Ekirato,

⁵ “Au tu Iopa vanuĝana baregonai aĝuriĝurito-ĝoi, nuĝanai amata-vanaĝito. Aboĝeto, dagara ta dabuĝa baregona kavana, daigunina tu

vasivasi (4), guba na emariĝoto-ĝoi, noĝa moĝo ĝetuĝu-mariĝoato-ĝoi, ĝoiragu ai ema vetore-tarito.

⁶ Aboge-ĝurato nai tu, maĝuri dagarari iraurau, tanobarai kwakuri vasi-vasi na ĝerakani bureĝari, e boĝai ĝetanuni bureĝari, e ĝedarani dagarari, ema guba na ĝerovoni manuri aĝitarito.

⁷ Benamo garo ta aseĝaĝiato, ekirato, 'Petero, novariĝisi, be novaĝiri e noĝaniri!'

⁸ Senaĝi au akirato, 'Vereĝauka, asiĝina ĝinavaĝi, rakava e asi veiareva dagarari ta au murugu na roĝosi beĝere raka-toĝa.'

⁹ Mo garo guba na ma eguruĝa-ĝenoĝoito, ekirato, 'Barau na eiarevarito dagarari tu rakavari asi bono kiragiri.'

¹⁰ Vaĝa-toitoina moĝesi eĝorato, benamo dagara mabarari guba ĝana ma eĝabi-varaĝerito.

¹¹ Mo horaĝauna sebonai tarima toitoi au atanuto-ĝoi numanai ĝeraĝasito. Ĝia tu Kaisarea na ĝetuĝurito au ĝegu ai.

¹² Benamo Iauka Veaĝa na ekiraguto, ĝia ĝesi bana iaĝo, asi bana ĝoiagi. Mai tarikaka imaima sebona (6) maki au ĝesi Kaisarea ĝana ĝaiaĝoto, ema mabarama Korenelio ĝena numai ĝaraka-toĝato.

¹³ Ĝia na ĝema ekiraĝiato, kamasi aneru ta, ĝia ĝena numai efororito eĝitaiato, ema ekiraiato, ekirato, 'Iopa ĝana novetuĝu-iaĝo, Simona, ĝia arana ta tu Petero, beĝenea kiraia, bene iaĝoma.'

¹⁴ Ĝia na guruĝa tari ĝemu bekiraĝirini, benamo mo guruĝa ĝerina Barau na ĝoi ema ĝemu numa tarimari mabarari bevaĝa-maĝurimiri.'

¹⁵ Au na guruĝa vau asinaiato nuĝanai, Iauka Veaĝa emariĝoto ĝia iatari ai, Pentekoste ĝaronai ĝita iatarai emariĝoto kavana.

¹⁶ Benamo Vereĝauka na kara ekiraĝiato dagarana atuĝamaĝi-doĝariato, ekirato, 'Ioane tu nanu na ebatisoto-ĝoi, senaĝina ĝomi tu Iauka Veaĝa na bebatisomini.'

¹⁷ Bema Barau na mo varevare sebona moĝo, ĝita Vereĝauka Iesu Keriso tavaĝa-moĝoniato nai evinirato varevarena, irau bese tarimari maki evinirito nai tu, au tu deikara, be au na Barau bakira-ĝoiani?'

¹⁸ Ĝia na mo guruĝa ĝeseĝaĝiato nai, ĝeri guruĝa barubaru ĝevaĝa-magoato, benamo Barau ĝevaĝa-raĝeato, ĝekirato, "O kato, irau bese tarimari maki Barau na vetuĝamaĝi-kure dabarana bevaĝa-ĝitari, maĝuri beĝene ĝabia ĝana."

Eklesia evesinato Antioka ai

¹⁹ Stefano emaseto nai, eklesia vaĝa-midigumidiguna e lai-lautilusina eĝorato, benamo veĝabidadama tarimari ĝevaĝa-raga rovorovorito. Ĝia kotari ĝeiaĝoto mo Foenikia, Saipras e Antioka ai ĝea raĝasito. Monai Iuda tarimari ĝeri ai moĝo Iesu varina ĝeĝobata-iaĝiato-ĝoi.

²⁰ Senaĝi veĝabidadama tarimari kotari, Saipras e Kurene tarimari tu Antioka ĝana ĝeiaĝoto, Grik tarimari ĝeri ai maki vari ĝea fiuato, Iesu Vereĝauka Varina Namona ĝeĝobata-iaĝiato-ĝoi.

²¹ Vereĝauka seĝukana tu ĝia ĝesi, be tarimarima ĝutuma-bara Vereĝauka ĝevaĝa-moĝoniato ema ĝevetuĝamaĝi-kureto.

²² Jerusalema ekalesiari na mai vari ĝeseĝaĝiato, benamo ĝia na Banabas Antioka ĝana ĝetuĝu-iaĝoato.

²³ Ĝia Antiokai eraĝasito, benamo Barau ĝena varevare-bara tarimarima ĝeri ai eĝitaiato nai, eiaku-rakavato. Ma mabarari elaunaĝirito, moĝoni ai Vereĝauka beĝene korana-iaĝia ma nuĝari mabarari ĝesi.

²⁴ Banabas tu tarima namona, Iauka Veaĝa e veĝabidadama na evonuto. Ema tarimarima ĝutuma-bara Vereĝauka ĝena tarimarimai ĝeiaĝoto.

²⁵ Benamo Banabas Taso ĝana eiaĝoto, Saulo vetau-vetauna.

²⁶ Edoĝariato, benamo Antioka ĝena eĝori-iaĝoato. Monai mo laĝani sebona, tauri ruarua ekalesia ĝesi ĝevegogoto-ĝoi e tarimarima ĝutuma-bara ĝevaĝa-ribarito-ĝoi. Iesu ĝekorana-iaĝiato-ĝoi tarimari tu Antioka vanuĝanai vau ĝekiraĝirito “Christian”.

²⁷ Mo ĝaro ai peroveta tarimari kotari Ierusalemna na Antioka ĝana ĝevariĝoto.

²⁸ Ta ĝia fakari ai arana tu Agabo. Agabo evariĝisito, Iauka na evaĝa-ribaĭato ilailanai tanobara mabaranaĭ doĝe baregona beĝorani varina efiu-guineato. Mo doĝe baregona tu Klaudio ĝena veĝitaĝau ĝarori ai eĝorato.

²⁹ Iesu ĝekorana-iaĝiato-ĝoi tarimari na ĝeura-iaĝiato, ĝia tata ĝeri doĝari ilailari ai tarikakari Iudeai ĝeri ai ĝeri varevare dagarari kotari beĝene tuĝu-iaĝo, beĝene vaĝa-kavari ĝana.

³⁰ Mo veĝa tu ĝeveiato, Banabas e Saulo ĝeri ai ĝeri moni ĝetuĝukauto, rubu ĝitatagona tarimari beĝene viniri ĝana.

12

Ekalesia vaĝa-midigumidiguna e lai-lausilausina ebaregoto-ĝoi

¹ Moĝeri ĝaro ai Kini Heroda na ekalesia tarimari kotari eĝabi-taririto, bene vaĝa-midigu midiguri ĝana.

² Iakobo (o Iames), Ioane kakana, tu baĝa na debana ebasi-ĝutuato.

³ Heroda na Iuda tarimari eĝitarito, mo veĝa ĝeiau-iaĝiato nai tu, Petero maki ma ea ĝabi-tariato. Mo tu asi etubuni faraona verekona ĝarori ai eĝorato.

⁴ Petero eĝabi-tariato, benamo dibura numai etoreato. Monai vetari tarimari gabanana imaima sebona (16) etorerito, vasiri vasiri ai evaĝa-ruĝarito vauro, Petero ĝeĝita-ĝuato. Heroda ĝena ura tu Pasova murinai vauro, tarimarima ĝoirari ai bene ĝori-rosia ema bene vaĝa-kotaia.

⁵ Moĝa lorinai Petero tu dibura numai ĝeĝita-ĝuato-ĝoi, a ekalesia tu Barau ĝenai ĝeĝauĝau-kokore kokoreto-ĝoi Petero ĝena.

Aneru na Petero evaĝa-maĝuriato

⁶ Boĝi, ma belaĝanini tu Heroda na tarimarima ĝoirari ai Petero beĝori-rosiani, Petero tu seini na ĝebarubaruato, benamo vetari tarimari ruarua vekaravari ai egenato, ema ĝatama-boka ĝitaĝauna vetari tarimari na maki ĝatama-boka ĝenari-taĝoato-ĝoi.

⁷ Benamo Vereĝauka ĝena aneru ta eforito, Petero sevinai eruĝa-tarito, ema mama ta dibura numa nuĝanai enanagi-tariato. Mo aneru na Petero ĝabana ebota-karaiato, benamo evaĝo-tataĝaiato, ma ekiraiato, ekirato, “Ragavei, novariĝisi!” Benamo seini Petero ĝimana na ĝeketo-vagiato.

⁸ Benamo aneru na evaĝa-guruĝaiato, ekirato, “Ĝemu gabaĝau nobarutaria, ema ĝemu tamaka noveiri.” Benamo Petero na eveirito. Aneru ma ekirato, “Ĝemu koudi na noveseĝo, be au murigu na noiaĝoma.”

⁹ Petero ĝia murinai erakato mo, dibura numa na eraka-rosito. Senaĝi ĝia tu asi ribana, mo aneru na kara eveiato-ĝoi tu moĝoni. Ĝia mataboru ekirato tu, emata-vanaĝini etato-ĝoi.

¹⁰ Ĝatama-boka ĝitagauna tarimari ĝeruĝato gabuna ta ĝeraka-vanaĝiato, ma vaĝa-ruaruana ma ĝeraka-vanaĝiato, ĝeiaĝoto mo, auri ĝatama-bokanai ĝea raĝasito. Moĝa tu vanuĝa barana rakarosina ĝatama-bokana. Mo ĝatama-boka tu tauĝena moĝo ĝia ĝeri evekeoto, benamo ĝeraka-rosito. Dabara na ĝeraka-variĝoto-ĝoi nuĝanai, asikauna aneru na Petero eraga-kwaneato.

¹¹ Monai vau Petero eribato ĝia ĝenai kara eĝorato, benamo ekirato, “Au toma moĝoni bama riba, Vereĝauka na ĝena aneru betuĝua tu, Heroda ĝimana na, ema Iuda tarimari na au ĝegu ai kara ta beĝene veia ĝetato-ĝoi ĝenana bema vaĝa-maĝurigu.

¹² Mo veiĝa etuĝamaĝi-fakaiato, benamo Maria ĝena numa ĝana eiaĝoto. Maria tu Ioane Mareko sinana. Monai numa nuĝanai tu tarimarima ĝutuma ĝevegogoto, ĝeĝauĝauto-ĝoi.

¹³ Petero numa murikana ĝatama bokanai esekeseketo, benamo vetuĝunaĝi ĝuiatona ta arana Roda eiaĝoto, nea ĝitaia ĝana.

¹⁴ Senaĝi ĝia na Petero garona eseĝaĝi-leaiato, benamo iaku na evaĝa-vonuato, benamo ĝatama-boka tu asi ekeo-fakaiato, a ĝia tu eraga-ĝenoĝoito, ea kirarito, Petero tu murikai eruĝa-taĝoni.

¹⁵ Ĝia na ĝekiraiato, ĝekirato, “Ĝoi tu behabomu ba!” Senaĝi ĝia eĝiĝiraĝeto-ĝoi, ekirato, “Moĝoni, Petero tu murikai eruĝa-taĝoni.” Benamo ĝekirato, “Mani tu ĝia ĝena aneru!”

¹⁶ Senaĝina Petero tu roĝo esekeseke-ĝiĝiraĝeto-ĝoi. Benamo ĝeiaĝoto, ĝatama-boka ĝea keo-fakaiato nai tu, Petero ĝeĝitaiato, ĝeĝaba-rakavato.

¹⁷ Petero ĝimana na ekira-ĝoirito asi beĝene guruĝa, benamo Vereĝauka na kamasi dibura numa na eĝori-rosiato ĝeri ekiraĝito. Ĝia na evaĝa-guruĝarito, ekirato, “Iakobo (o Iames) e tarikaka mabarari ĝeri mai vari boĝono kiraĝia.” Benamo ĝia tu erakato, gabu ta ĝana ma eiaĝoto.

¹⁸ Boĝiboĝi, vetari tarimari fakari ai tu daradara baregona eĝorato; ĝevedanaĝi-vedanaĝito, ĝekirato, “Petero tu kamasi bevei?”

¹⁹ Heroda na gabu mabarana evetau-ginikauato, senaĝi Petero asi eĝoitaĝoato. Benamo Petero ĝeĝita-ĝauato tarimari evaĝa-kotarito murinai, ĝena vetari tarimari o soldia ekirarito beĝenea vaĝi-maseri. Moĝa murinai Heroda na Iudea eraga-kwaneato, ma Kaisareai ĝaro tari ea tanuto.

Heroda emaseto

²⁰ Heroda tu Taia e Sidono tarimari ebaruvini-rakavarito; moĝa lorinai Taia e Sidono tarimari ĝeveĝabi-vegogoto, ma Heroda ĝea ĝitaiato. Senaĝi ĝuine, Blasto, Heroda ĝena ĝena-daiĝutuna ĝitataĝona tarimana ĝesi roĝo ĝeveĝatato, ĝevaĝa-maranaĝiato, ema ĝia rekeri ai roĝo ekauto. Moĝa murinai vauro ĝeiaĝoto, Heroda ĝenai maino ĝea noĝiato, korana ĝia ĝeri tanobara ĝaniĝanina tu Heroda ĝena tanobarai ĝeĝabito-ĝoi.

²¹ Benamo ekiraĝi-toreato ĝaronai, Heroda na ĝena vere dabuĝana eveiato, benamo ĝena teronai ea tanukauto vau, tarimarima eguruĝa-vinirito.

²² Benamo tarimarima ĝeĝabato, ĝekirato, “Mai tu barau ta garona, dia tarimarima garona.”

²³ Mo horai Veregauka ġena aneru ta na Heroda ekwariato, korana ġia na mo guruġa eseġaġiato nai, Barau tu asi evaġa-raġeato. Ġia tu ġuiogġiu na ġeġaniato, emaseto.

²⁴ Senaġi Barau ġena guruġa tu ebaregato e eraga-rovorovoto.

²⁵ Banabas e Saulo tu ġeri ġauvei ġevaġa-koriatu, benamo Ierusalemna na ġeġenoġoito; Ioane Mareko maki ġeġori-kauato.

13

Banabas e Saulo ġeġabi-viriġirito e ġetuġurito

¹ Antioka ekalesiana nuġanai tu peroveta e vevaġa-riba tarimari kotari. Arari tu Banabas; Simeona, arana ta tu Niga; Lukio, Kurene tarimana; Manaen, ġia tu Gavana Heroda ġesi ġevaġa-baregorito; e Saulo.

² Ġia na Veregauka ġetoma-rakarigo viniato-ġoi e ġeġani-veaġato-ġoi nuġanai, Iauka Veaġa na ekirarito, ekirato, “Banabas e Saulo tu au ġegu boġono ġabi-ġerevaġiri, korana au na bakeari, ġegu ġauvei ta beġene veia ġana.”

³ Benamo ġia ġeġani-veaġato e ġeġuriġurito murinai, ġimari ġia iatari ai ġetore-kaurito, benamo ġetuġu-rakarito.

Saipras ai

⁴ Iauka Veaġa na Banabas e Saulo etuġurito, benamo tauri ruarua kone vanuġana Seleukia ġana ġevariġoto. Seleukia na tauri ruarua bouti ai ġeraġeto, benamo Saipras motumotu ġana ġevanaġito.

⁵ Banabas ma Saulo Salami ai ġevotuto nai, Barau ġena guruġa Iuda tarimari ġeri rubu tari ai ġea ġobata-iaġiato. Ioane Mareko maki ġia ġesi, ġia tauri ruarua evaġa-kavarito-ġoi.

⁶ Tauri ruarua na Saipras motumotu mabarana ġeraka-vanaġiato, ġeiaġoto Pafo vanuġanai ġea raġasito. Monai Iuda ġeri ġora e peroveta ġofaġofa tarimana ta arana Bar-Iesu ġea doġariato.

⁷ Ma Bar-Iesu tu motumotu verena, ma iaunega rakavarakava tarimana arana Seregio Paulo ġatana. Mo vere na Banabas e Saulo ekea-iaġorito ġia ġoirana ġana, korana ġena ura tu Barau ġena guruġa bene seġaġia.

⁸ Senaġi mo ġora tarimana Elima, (Bar-Iesu arana ta tu Elima), na ġeri guruġa ekira-fitoġarito, ġena ura vere na Iesu asi bene vaġa-moġonia.

⁹ Benamo Saulo, arana ta tu Paulo, Iauka Veaġa na evaġa-vonuato, benamo Elima eġita-karakaraiato.

¹⁰ Benamo ekirato, “Ġoi tu Diabolo natuna, ema veiġa iobukaiobukari mabarari tu ġoi na ovetari-vinirini! Ġoi tu ġofaġofa e rakava mabarari na ovonuto. Veregauka ġena veiġa iobukaiobukari ġofaġofai bono vaġa-iaġori uranai ovededegwani. Mo veiġa tu aitoma vau bovaġa-dokoani?”

¹¹ Noseġaġi! Toma Veregauka ġena seġuka ġoi ġemu ai befoforini, matamu bebubuni, ma laġani mamana asi boġitaiani, beiaġoni mo, ġaro ta.”

Asikauna Elima tu mukuna na matana eġabi-ġauato, benamo eraka-ġeġeraġi ġeġeraġito, ġena ura ta na ġimanai bene ġabi, ma bene ġori-kaua.

¹² Mo vere na kara eġorato dagarana eġitaiato nai, Veregauka evaġa-moġoniato. Ema eġaba-rakavato Veregauka ġena vevaġa-riba guruġari ai.

Antioka vanuġana Pisidia ai

13 Paulo ma karona ġesi Pafo ġeraga-kwaneato, bouti na Pega ġana ġeiaġoto. Pega tu Pamfilia nuġanai. Pegai benamo Ioane Mareko na Paulo e Banabas eraga-kwanerito, ġia tu Ierusalemna ġana ma eġenoġoi-iaġoto.

14 Pega na kwakuri na Antioka ġana ġeiaġoto. Antioka tu Pisidia tanonai. Sabadi ai tu Iuda tarimari ġeri rubu ai ġeraka-toġato, bena ġetanu-tarito.

15 Mose ġena taravatu e peroveta tarimari ġeri toretore ġeivirito murinai, rubu ġitaġauna tarimari na noġinoġi ġetuġu-iaġoato ġia tauri ruarua ġeri ai, ġekirato, “Tarikaka, bema ma ġemi vevaġa-gwaġiġi guruġari mai tarimarima ġeri ai nai tu, ġai ġaurani, ġeri ġokiraġi.”

16 Paulo evarigisito, ġimana na eiave-taririto, benamo ekirato, “Isaraela taumi e irau bese tarimari fakari ai Barau garina ġoveini tarimami, ġoseġaġi!

17 Mai Isaraela tarimari ġeri Barau na ġai senema eġabi-virigirito, ema ġia na evaġa-ġutumarito, Aigupito tanonai ġetanuto-ġoi nai. Ma Barau ġena seġuka baregona na Aigupito tanona na eġori-rosirito,

18 ema laġani gabana vasivasi (40) kavana tano fakanai ġia ġeri ai evevaġa-gwaġiġito.

19 ġia na Kanana tanonai bese imaima ruarua (7) tarimarimari evaġa-mou-taririto. Ma ġeri tano tu eġabiato, Isaraela tarimari evinirito e ġeri tanobarai evaġa-iaġoato.

20 Mo dagara mabarari tu laġani sinau vasivasi ma gabana imaima (450) kavana nuġanai ġeġorato. Moga murinai ġia na vevaġa-roroġoto tarimari evinirito, eiaġoto mo peroveta tarimana Samuela ġena vevaġa laġanina.

21 Ma ġeri vere o kini ta beġene ġabia noġinoġina ġeveito nai, Barau na Saulo evinirito. Ġia tu Kisa natuna, mo tu Beniamina ġena doġoro tarimana. Saulo na laġani gabana vasivasi (40) eġita-ġaurito.

22 Saulo kini dagina na eġabi-vaġiato murinai, Barau na Davida eġabiato, Isaraela ġeri kini ai evaġa-iaġoato. Barau na Davida tu maiġesina ekiraġi-foforiato, ekirato, ‘Au na Davida, Iese natuna, badoġaria, ġia tu au nuġagu na euravini-rakavaiani tarimana. Ġia na au ġegu ura veiġari mabarari beveirini.’

23 Barau na ġena guruġatore ilailanai, Davida besena na, Isaraela tarimari ġeri vevaġa-maġuri tarimana etuġu-mariġoato. Mo vevaġa-maġuri tarimana tu Iesu.

24 Iesu roġosi roġo bere ġauvei nuġanai, Ioane na Isaraela tarimari mabarari eġobata-vinirito, ekirarito, ġeri rakava ġerina beġene vetuġamaġi-kure, benamo babatiso beġene ġabia.

25 Ioane na ġena ġauvei dori evaġa-koriatu nuġanai, tarimarima ekirarito, ekirato, ‘Ġomi ġotuġa-maġini au tu dei? Au tu dia ġomi na ġovaġa-nogaiani tarimana. Senaġi ġoboġe! Ġia tu au murigu na mani eiaġomani, ma au tu asi ilaila ġia kwakuna tamakari bakoki-vaġirini.’

26 Tarikakagu, Aberahamo besena, ema ġomi irau bese fakari ai Barau garina ġoveini tarimami: Mai vevaġa-maġuri guruġana tu ġita ġera etuġu-iaġomaiato.

27 Ierusalemna tarimari ma ġeri vere ġesi Iesu asi ġeġita-leaiato, ema Iesu, peroveta tarimari ġeri guruġa Sabadi mabarari ai ġeivirito-ġoi, tu asi ġetuġamaġi-fakarito. Moġesina naima ġia na Iesu vaġi-masena guruġana ġekiraġito nai, peroveta tarimari ġeri guruġa ġevaġa-moġonirito.

28 Oba, vaġi-masena korana ta tu asi ġedoġariato, senaġina Pilato ġenoġiato, bene vaġi-masea ġetato.

29 Buka Veāgai ġia ġekiraġiatio guruġari mabarari ġeveirito murinai, satauro tuġuna na ġeġabi-riġoato, benamo fore ġekwaiatio kouġana garanai ġea toreato.

30 Senaġi Barau na mase na ma evaġa-variġisi ġenoġoiatio,

31 ġia ġesi Galilea na Ieruselema ġana ġeiaġoto-ġoi tarimari na ġaro vovoka ġeġitaiatio. Ma ġia toma tu Isaraela tarimari ġeri ai Iesu ġekiraġi-foforiani.

32 Ema Barau na ġita senera kara ekiraġitore-vinirito Varina Namona ġomi ġakira-varamini.

33 Mo kiragitore tu Barau na ġita, ġia tuburi, ġera evaġa-moġoniatio, mo tu ġia na Iesu mase na ma evaġa-variġisi ġenoġoiatio nai. Salamo vaġa-ruaruanai etoreato ilailana, ekirani, 'Ġoi tu au Natugu; toma au tu ġoi Tamamu ai baiāġo.'

34 Barau na moġoni mase na evaġa-variġisi ġenoġoiatio e asi ma beġenoġoini gara ġana, benamo beborāġani. Barau na tu maiġesi ekiraġiatio, ekiratio, 'Davida ġena akiraġi-torerito, vevaġa-namo veaġari e moġoniri tu ġomi bavinimini.'

35 Ema Salamo ta nuġanai ma ekirani,

'Ġoi ġemu tarima veaġana tu asi beborāġani, korana tu asi bene ġora otato.'

36 Davida ġena ġuru ai Barau ġena vetuġunaġi eiaġo-vinito-ġoi nai emaseto, benamo senena seviri ai ġeġuriatio, ma tauġanina tu eborāġato.

37 Senaġi Iesu, Barau na mase na evaġa-variġisi ġenoġoiatio tarimana, tu tauġanina asi eborāġato.

38 Moġa lorinai, tarikakagu mabarami, au aurani boġono riba, ġai tu Iesu bakunai rakava tuġamaġi-fitoġari varina ġomi ġemi ġavari-fiuani.

39 Mose ġena taravatu na ġomi ġemi rakava tu asi beruġa-vaġirini riba, a Iesu na ġia ġevaġa-moġoniani tarimari mabarari ġeri rakava tu eruġa-vaġirini, vei-iobukaibuka tarimari ai evaġa-iaġorini.

40 Rorimi boġono vetore, be peroveta tarimari na ġekiraġirito dagarari, ġemi ai asi beġene ġora; ġekiratio,

41 'Ġomi veġabi-varaġevaraġe tarimami ġobogeboġe!

Nuġami ġefarevaġi, benamo ġomase!

Korana ġemi maġuri ġarori ai

au na veġa ta haveiani,

enabe ta na ġemi bekiraġi-ginikauani,

senāġi asi boġo vaġa-moġoniani!' "

42 Paulo e Banabas rubu na ġeraka-riġoto-ġoi nuġanai, tarimarima na ġenoġirito, ġoira Sabadi ai ma beġene ġenoġoi, be mo guruġa kotari ma ġeri beġene kiraġi.

43 Tarimarima vegogo na ġeġwa-lausiatio murinai, Iuda tarimari ġutuma, ema irau bese tarimari, Barau ġekorana-iaġiatio-ġoi tarimari, ġutuma maki Paulo e Banabas muriri na ġeiaġoto. Tauri ruarua na ġevaġa-guruġarito e ġelaunaġirito, Barau ġena varevare-bara nuġanai beġene ruġa-gwaġiġi.

44 Sabadi vaġa-ruaruanai, dori moġo mo vanuġa baregona tarimari mabarari na Vereġauka ġena guruġa seġaġi-seġaġina ġeraka-vegogoto.

⁴⁵ Iuda tarimari na mo ġutuma ġeġitarito nai, ġemama-rakavato; benamo Paulo na kara ekiraġirito-ġoi guruġari, ġia na ġekira-fitoġarito e ġeveiveġare veġareato.

⁴⁶ Senaġi Paulo e Banabas tu ma kokoreri ġesi ġevaġa-veserito, ġekirato, “Barau ġena ura lorinai tu ġia ġena guruġa ġai na ġomi baġana kiravara-guinemi. Senaġi ġomi na asi ġoġabi-raġeani, monana tu ġomi tauġemi na ġovaġa-moġoniani, ġomi tu asi ilaila maġuri vanaġivanaġi boġo ġabiani. Moġa lorinai, ġai na ġomi ġaraga-kwanemini, ma irau bese tarimari ġeri ai ġaiaġoni.

⁴⁷ Korana Vereġauka na tu maġesi evaġa-naġimato, ekirato,

‘Au na ġomi atoremito tu,

irau bese tarimari ġeri mamai

boġono iaġo,

be vevaġa-maġuri boġono ġabi-rosia tanobarai ġetanuni tarimari mabarari ġeri ai.’”

⁴⁸ Irau bese tarimari na mo guruġa ġeseġaġiato nai, ġeikuto e Vereġauka ġena guruġa ġevaġa-raġeato; ema Barau na eġabi-viriġirito maġuri vanaġivanaġi beġe ġabiani tarimari mabarari ġeveġabidadamato.

⁴⁹ Vereġauka ġena guruġa mo gabu mabarana nuġanai eraga-rovorovoto.

⁵⁰ Senaġi Iuda tarimari na irau bese vavineri, daġi baregori ġeġabi-taġorito-ġoi ma Barau ġekorana-iaġiato-ġoi vavineri, e vanuġa baregonai veġitaġau tauri, nuġari ġeġanirito. Benamo ġia na vevaġa-midigumidigu veġaġa-ġoraiato Paulo e Banabas ġeri ai, ema ġeri gabu na ġelai-rosirito.

⁵¹ Tauri ruarua na kwakuri kauri ġekwari-ketoketorito, ġia ġeri kira-sirivaġi vaġa-moġoniri ġana, benamo Ikonja ġana ġeiaġoto.

⁵² Iesu ġekorana-iaġiato-ġoi tarimari Antiokai tu iaku e Iauka Veaġa na ġevonuvonu-raġeto.

14

Ikonja ai

¹ Ikonjai Paulo e Banabas tauri ruarua Iuda tarimari ġeri rubu ai ġeveito-ġoi kavana ġeraka-toġato, benamo ġeġobatato. Ġeri ġobata na Iuda e Griktarimari ġutuma lelevaġi ġeveġabidadamato.

² Senaġi Iuda tarimari asi ġeurato Iesu beġene vaġa-moġonia, tarima kotari na irau bese tarimari ġelaunaġi-naġirito, benamo tarikaka veġabidadama nuġanai tarimari ġeiau-rakava vinirito.

³ Paulo e Banabas monai ġetanu-maukato. Ma kokoreri ġesi Vereġauka ġena varevare-bara guruġana ġekiraġiato-ġoi. Vereġauka na ġeri guruġa evaġa-moġonirito tu seġuka evinirito, vetoġa boruri e nuġa-farevaġi veġari ġeveito.

⁴ Senaġi mo vanuġa baregona tarimari tu ġeveware-kirato, reke-ta Iuda tarimari ġesi ġekauto, reke-ta tu apostolo tarimari ġesi.

⁵ Benamo irau bese tarimari e Iuda tarimari ma ġeri veguine-iaġi tauri ġesi ġeverori-vegogoto, ġeurato apostolo beġene vaġa-midigu midiguri e fore na beġene ġidara-maseri.

⁶ Senaġi Paulo e Banabas na mo boioġa ġeribaiato, benamo Likaonia tanonai vanuġa baregori ruarua Listera e Derebe, ema seviri tanori ġana ġegari-iaġoto e seviri vanuġari tari ġari.

⁷ Monai Vari Namona ġeġobata-iaġiato-ġoi.

Listera e Derebe ai

⁸ Listerai tarima ta etanuto-ḡoi; ḡia tu kwakuna rakava emagurito, be asi erakato-ḡoi.

⁹ Mo tarima tu eseḡaḡi-taḡoto-ḡoi Paulo eḡobatato-ḡoi nuḡanai. Paulo na eḡita-karakaraiato, benamo eribato ḡia tu ḡena veḡabidadama na bevaḡa-namoani riba,

¹⁰ benamo eguruḡa-fararato, ekirato, “Novariḡisi, noruḡa-tari. Benamo eburi-vaisito, erakato.

¹¹ Tarimarima ḡutuma na kara Paulo na eveiato ḡeḡitaiao nai, ḡeri Likaonia garonai ḡekoḡoto, ḡekirato, “Barau tu tarimarimai beḡe iaḡo, beḡe raka-riḡo ḡita ḡerai!”

¹² Ḡia na Banabas arana tu Dios ḡetato, ema Paulo arana tu Hemes ḡetato, korana Paulo tu eguruḡa-vovokato-ḡoi.

¹³ Dios ḡena Rubu Veaḡa verena ḡena rubu tu vanuḡa barana murikanai. Ḡia na boromakau e veravera vanuḡa maḡuna ḡatama bokana ḡana eḡwa-iaḡorito, korana tarimarima ḡutuma ḡesi ḡeurato, apostolo ḡeri ai ginitaḡo veḡari beḡene vei ḡana.

¹⁴ Senaḡina apostolo ruarua Banabas e Paulo na ḡeseḡaḡirito, kara ḡeveia ḡetato nai, ḡeri dabuḡa ḡedarerito, benamo ḡutuma nuḡari ai ḡeraga-ḡabaḡaba-toḡato.

¹⁵ Ḡekirato, “Karase ḡomi tau tu maḡesi ḡoveini? Ḡai maki tarimarima moḡo ḡomi kavana! Ḡai na tu Vari Namona ḡomi ḡemi ai ḡaḡabi-iaḡomaiani, ḡomi ḡakiramini, mai asi tauri dagarari boḡono raga-kwaneri, benamo Barau maḡurina ḡenai boḡono raka-ḡenoḡoi ḡatoni. Ḡia na guba, tanobara, daḡaru-bara, e ḡetanu-iaḡirini dagarari mabarari eveirito.

¹⁶ Guinenai ḡia na bese mabarari etao-fitoḡarito, tauḡeri ḡeri ura dabarari ai beḡene raka ḡana.

¹⁷ Senaḡi dagara namori eveirini ḡerina, ḡia tauḡena vanaḡivanaḡi eve-vaḡa-moḡonini: Ḡia na ḡura guba na evinimini e varovaro dagarari ḡeri ḡaro korikoriri ai evinimini. Ḡia na ḡanigani asisebo evinimini e nuḡami iaku na evaḡa-vonurini.”

¹⁸ Moḡesi ḡevaḡa-guruḡarito, senaḡina mo tarimarima ḡutuma-bara tu ḡia tauri ruarua ḡeri ai ginitaḡo ḡauveina ḡeveia rogo ḡetato-ḡoi, kiraḡoiri tu tauri ruarua ḡeri ai tu egwaḡiḡito.

¹⁹ A Iuda tarimari kotari Antioka e Ikonía na ḡeiaḡomato, ma moḡeri tarimari ḡia rekeri ai ḡeḡabi-vanaḡirito. Benamo Paulo fore na ḡeḡidaraiato ma ḡeinu-rosiato vanuḡa murina ḡana. Ḡia ḡetuḡamaḡito tu varau emaseto.

²⁰ Senaḡi Iesu ḡekorana-iaḡiato-ḡoi tarimari na ḡeruḡa-ḡeḡeraḡiato nai tu eruḡa-vaisito, benamo vanuḡa barana ḡana ma erakatoḡa-ḡenoḡoito. Bogibogi tu Banabas ḡesi Derebe ḡana ḡeiaḡoto.

Siria Antiokana ḡana ḡeḡenoḡoito

²¹ Paulo e Banabas na Derebe ai Vari Namona ḡeḡobata-iaḡiato, benamo tarimarima ḡutuma Iesu korana-iaḡina tarimari ai ḡeḡabi-toḡarito. Benamo ma ḡeḡenoḡoi-iaḡoto Listera, e Ikonía, ema Pisidia Antiokana ḡana.

²² Ḡia na Iesu ḡekorana-iaḡiato-ḡoi tarimari ḡevaḡa-kokorerito e ḡelaunaḡirito, ḡeri veḡabidadama beḡene ḡabi-gigitariri. Ema ḡekirato, “Ḡita tu midigumidigu vovoka bita ḡabirini vau Barau ḡena Basileiai bita raka-toḡani.”

²³ Tauri ruarua na rubu tatai veġorikau tarimari ġevaġa-ruġarito. Ma tauri ruarua ġeġani-veaġato e ġeġauġauto murinai, Vereġauka ġimanai ġetore-kaurito. Mo tu ġia na ġeġabidadama-viniato-ġoi Vereġaukana ġenai.

²⁴ Pisidia tanona na ġeraka-vanaġito murinai tu, Pamfilia tanonai ġeraġasito.

²⁵ Pega vanuġanai Vereġauka ġena guruġa ġeġobata-iaġiato murinai tu, Atalia vanuġana ġana ġeiaġoto.

²⁶ Atalia na tu bouti na ġeġenoġoi-iaġoto Antioka ġana. Monai tu, ġeri evanelia iaġoiagona roġosi roġo beġene sinaia nai, tarikaka na Barau ġena namo e varevare-bara nuġanai ġetore-kaurito, mai ġauvei beġene veia ġana. Ġauveina tu toma beġe vaġa-koria.

²⁷ Antiokai ġeraġasito nai tu, ekalesia tarimari ġevaġa-vegogorito, benamo Barau na ġia ġerina kara eveirito dagarari mabarari, e kamasi ġia na irau bese tarimari ġeri veġabidadama ġatama bokana ekeoato variri, ġeri ekiraġito.

²⁸ Monai Iesu ġekorana-iaġiato-ġoi tarimari ġesi tauri ruarua ġetanu-maukato.

15

Ekalesia vegogona baregona Ierusalemaj

¹ Tau kotari Iudea na Antioka ġana ġevariġoto, benamo tarikaka veġabidadama nuġanai tarimari ġevaġa-ribarito, ġekirato, “Ġomi tu vevaġa-maġuri asi ilaila boġo ġabiani riba, bema mero tauġaniri kefi-lamavaġi veġana Mose ġena taravatu ai ekiraġiani dagarana asi boġo korana-iaġiani nai.”

² Mo guruġa ġaramanai, Paulo e Banabas ġia ġesi veġare-veġare baregona ġevaiato. Moġa lorinai Paulo e Banabas ema Antioka ekalesia tarimari kotari ġeviriġirito, Ieruselema ġana beġene varaġe, be apostolo e ekalesia ġeġori-kauato-ġoi tarimari ġeri ai mo guruġa beġenea vedanaġi-iaġia.

³ Ġia tu rubu na ġetuġu-iaġorito. Ma Foenikia e Samaria tanori nuġari na ġeraka-vanaġito nai tu, monai tarikaka ġeri ġekiraġito, kamasi irau bese tarimari Barau ġenai ġevetuġamaġi-kureto. Tarikaka mabarari na mo vari ġeseġaġiato nai, mabarari ġeiau-rakavato.

⁴ Ierusalemaj ġeraġasito nai, ekalesia tarimari, e apostolo tauri, ema ekalesia ġeġita-taġoato-ġoi tarimari na ġeġabi-raġerito. Benamo Barau na ġia ġerina kara eveito dagarari mabarari ġeri ġekiraġito.

⁵ Senaġi Farisea doġoro na Iesu ġeġabidadama-viniato-ġoi tarimari kotari ġeruġa-vaisito, benamo ġekirato, “Irau bese tarimari maki tauġaniri kefirri beġene lama-vaġiri, ema boġono kirari, Mose ġena taravatu beġene korana-iaġia.”

⁶ Benamo apostolo e ekalesia ġeġita-taġoato-ġoi tarimari ġetanu-vegogoto, ma mo vedanaġi ġetuġa-maġiato.

⁷ Ġeguruġa-iaġi maukaiato murinai, Petero evariġisito, benamo ekirato, “Tarikakagu mabarami, ġomi ma ribami, kai-vegata ġomi vefakami ai Barau na au eġabi-hidiguto, irau bese tarimari ġeri Vari Namona bana kiraġia, be ġia maki beġene seġaġi e beġene veġabidadama.

⁸ Ema tarimarima nuġari eribarini Barauna na irau bese tarimari Iauka Veaġa evinirito, ġita evinirato kavana. Mo veġa ġenana evaġa-ġitarani, ġia maki eġabi-raġerito.

⁹ Ĝita e ĝia fakarai vaĝa-iraura vetoĝana ta tu asi eveiato, korana tu ĝeri veĝabidadama lorinai, Barau na nuĝari eiarevarito.

¹⁰ Ma toma tu kara dainai Barau ĝotovo-naĝiani, Iesu ĝekorana-iaĝiani tarimari iatari ai meto ĝotorerini. Mo tu ĝita tauĝera na e ĝita senera na maki mo maruna ĝwaĝwana asi ĝeilailato dagarana.

¹¹ Asiĝina! Gita taribani, ĝita tu Iesu Vereĝauka ĝena namo e varevarebara lorinai, Barau na evaĝa-maĝurirani, ĝia maki moĝesina.”

¹² Petero moĝesi ekirato nai, vegogo tarimari mabarari asi ĝeguruĝato. Benamo Banabas e Paulo ĝeseĝaĝi-vinirito, Barau ĝia ĝerina vetoĝa boruri e nuĝa-farevaĝi veiĝari, Grik tarimari fakari ai eveirito dagarari, mabarari ĝekiraĝirito.

¹³ Ĝia ĝeguruĝa-ĝosito vau, Iakobo (o Iames) eguruĝato, ekirato, “Tarikakagu mabarami, ĝoseĝaĝigu!

¹⁴ Simona na inivau bekiraĝi-ginikaua, kamasi tovotovonai Barau na irau bese tarimari etuĝamaĝirito, benamo ĝia fakari na bese ta eĝabi-viriĝiato, ĝia arana beĝene ĝabia ĝana.

¹⁵ Mai tu peroveta tarimari ĝeri guruĝa ĝesi beĝe ilaila-ginikau, korana maiĝesi ĝetoreato,

¹⁶ Vereĝauka ekirani:

Maiĝa murinai au ma baĝenoĝoi-iaĝomani,
benamo Davida ĝena numa,
eĝwa-kafuato dagarana,
ma baraga-ĝenoĝoiani.

Ĝefuki-rovorovoato dagarana,
au na ma baraga-ĝenoĝoiani,
ema bavaĝa-ruĝavaisi-ĝenoĝoiani.

¹⁷ Korana tu tarimarima kotari maki mabarari na, ema au aragu ĝeĝabi-rakaoani tarimari irau bese tarimari mabarari na, au, Vereĝauka, beĝene vetaugu ĝana.

¹⁸ Vereĝauka na maĝeri dagara mabarari bevaĝa-ĝorarani.
Ma irau laĝani ai veĝata maĝeri veiĝa evaĝa-foforirito.’

¹⁹ Moĝa lorinai au atuĝamaĝini, irau bese tarimari ĝevetuĝamaĝi-kureni Barau ĝenai nai tu, ĝeri ai asi bitana vaĝa-gwaĝiĝia.

²⁰ Senaĝi fefa ta bitana torea, bitana kirari, kwaivakuku ĝevarevarevinirini ĝaniganiri tu asi beĝene ĝaniri, korana mo tu ĝofaĝofa barauro ĝevinirini dagarari; mata-boraĝa veiĝari asi beĝene veiri, ema ĝaiĝori na ĝebito-maserini bureĝari asi beĝene ĝaniri e rara asi beĝene ĝani.

²¹ Korana Mose ĝena taravatu tu kai-veĝata vanuĝa baregori mabarari ai ĝeĝobata-iaĝirini ema Sabadi ĝarori mabarari ai Iuda tarimari ĝeri rubu ai ĝelavirini.”

Irau bese veĝabidadama tarimari ĝeri fefa

²² Benamo apostolo e ekalesia ĝeĝori-kauato-ĝoi tarimari ema ekalesia mabarari ĝeurato, ĝia fakari na tau kotari beĝene ĝabi-virigiri, benamo Paulo e Banabas ĝesi Antioka ĝana beĝene tuĝu-iaĝori. Ĝia na Iudas, arana ta tu Barasaba ĝetato-ĝoi, e Silas ĝeĝabi-virigirito. Ĝia tu tarikaka na ĝeĝubakau-baregorito-ĝoi tarimari.

²³ Mai fefa tu ĝia ĝesi ĝetuĝu-iaĝoato:

“Ĝai ĝomi tarikakami veĝabidadama nuĝanai, apostolo tarimama e ekalesia ĝeĝita-taĝoani tarimama na ĝema vevaĝa-namo ĝatuĝu-iaĝosiani, ĝomi

tarikaka veġabidadama nuġanai irau bese tarimami, Antioka ai, Siria ai, e Kilikia ai ġotanuni tarimami mabarami ġemi ai.

²⁴ Gai baġama seġaġi, mainana tau kotari ġeiāġosito, benamo ġeri guruġa na ġemi tuġamaġi ġevaġa-veġonurito e ġevaġa-daradaramito. Korana tu ġekiramito, tauġanimi kefiru boġono lama-vaġiri ema taravatu boġono korana-iaġia. Senaġi mani tu dia ġai ġemana ġeġabito guruġari.

²⁵ Moġa lorinai, ġema vegogo ai ġai mabarama na ġavaġa-moġoniato, tau kotari baġana ġabi-hidiri, be baġana tuġu-iaġosiri, ġema tuġamaġikau tarimari Banabas e Paulo ġesi beġene iaġosi.

²⁶ Ġia tu ġeri maġuri gwairi asi ġeġabirito, ġetore-taririto, ġera Vereġauka Iesu Keriso arana dainai.

²⁷ Moġa lorinai, Iudas e Silas baġa tuġuri, kara baġa toreri dagarari ġia tauġeri mururi na guruġai ġomi ġemi ai beġene vaġa-moġoniri ġana.

²⁸ Iauka Veaġa e ġai ġakirato, namona tu ġomi iatami ai meto ta asi baġana tore-kaua. Senaġina maiġesi veġari moġo boġono korana-iaġiri:

²⁹ Ġofaġofa barauri o kwaivakuku ġevinirini ġaniġaniri asi boġono ġani; rara asi boġono ġani; ġaiġori na ġebito-maserini bureġari asi boġono ġaniri; e mata-boraġa veġari asi boġono veiri. Mo dagara ġerina boġo raka-veġitani nai, ġomi tu boġo iaġo-ġinikauni. Boġono gena.”

³⁰ Ġeviriġirito tarimari ġetuġurito, benamo Antioka ġana ġevariġoto. Monai veġabidadama tarimari mabarari ġevaġa-vegogorito vau, ġeri fefa ġevinirito.

³¹ Ġia na mo fefa ġeiaviato nai, ġeiku-rakavato, korana vevaġa-kava guruġana ġeseġaġiato nai.

³² Iudas e Silas, ġia tauġeri tu peroveta tarimari. Ġia tauri ruarua na tarikaka ġeri guruġa ġutuma ġekiraġirito, ġelaunaġirito e ġevaġa-gwaġiġirito.

³³ Ġaro kotari monai ġetanuto murinai, ma mainori ġesi tarikaka na ġetuġu-ġenoġorito, ġetuġurito tarimari ġeri ai. [³⁴ Senaġi Silas tu eurato Antiokai roġo bene tanu.]

³⁵ Paulo e Banabas tu Antiokai ġetanu-maukato, ma tarima ġutuma ġesi Vereġauka ġena guruġa ġevevaġa-riba iaġiato-ġoi, e ġeġobata-iaġiato-ġoi.

Paulo e Banabas ġeveraġa-kwaneto

³⁶ Ġaro kotari ġevanaġito murinai, Paulo na Banabas evaġa-guruġaiato, ekirato, “Taura ruarua ma siġenoġoi-iaġo, Vereġauka ġena guruġa taġobata-iaġiato-ġoi vanuġari mabarari ġari, tarikakara bitana ġitari, ġeri veġabidadama maġurina tu aiġesina.”

³⁷ Banabas ġena ura tu Ioane Mareko maki neġori-kaua, be ġia ġesi beġene iaġo.

³⁸ Senaġi Paulo asi ġena ura ġia beġene ġori-kaua, korana ġia na Pamfilia ai tu eraga-kwanerito, ema ġia ġesi asi ġeġauveito mo ġeri ġauvei magona.

³⁹ Moġa ġaramanai ġia tauri ruarua veġareveġare baregona ġeveiato. Benamo tauri ruarua ġeveraġa-kwaneto. Banabas na Mareko eġoriatu, bouti ai ġeraġeto, benamo Saipras ġana ġeiāġoto.

⁴⁰ A Paulo na tu Silas eġabi-viriġiato. Tarikaka na Vereġauka ġena varevare-bara vevaġa-namona ġevinirito murinai ġerakato.

⁴¹ Siria e Kilikia tanori na ġeraka-vanaġito, benamo ekalesia doġorori monai ġevaġa-gwaġiġirito-ġoi.

16

Timoteo tu Paulo e Silas ġesi ġeiaġoto

¹ Paulo monana evanaġi-iaġoto Derebe ai ea votuto, ma monana tu eiaġoto Listera ai ea raġasito. Listerai tu Iesu ekorana-iaġiato-ġoi tarimana ta etanuto-ġoi, arana tu Timoteo. Timoteo sinana tu Iuda vavinena, ġia maki eveġabi-dadamato-ġoi vavinena, senaġi tamana tu Grik tarimana.

² Tarikaka mabarari Listerai e Ikoniai na Timoteo tu tarima namonai ġekiraġiato-ġoi.

³ Paulo eurato Timoteo tu bene ġori-kaua, be ġia ġesi beġene iaġo, moġa lorinai, ġia tauġanina kefina elama-vaġiato. Moġesi ġeveiato, korana monai ġetanuto-ġoi Iuda tarimari mabarari ribari, Timoteo tamana tu Grik tarimana.

⁴ Vanuġa loriri na ġevanaġi-iaġoto-ġoi nai tu, Ierusalemaj ġetanuni apostolori e ekalesia ġorikauri tarimari na ġevaġa-moġonirito guruġari veġabidadama tarimari ġeri ġekiraġito-ġoi, ġia na beġene korana-iaġiri ġana.

⁵ Benamo ekalesia tarimari ġeri veġabidadama ġevaġa-kokorerito, e ġaro mabarari ai ekalesia ġeġutumato-ġoi.

Troas ai - Paulo ġena mata-vanaġi

⁶ Paulo ma karonna ġesi Frigia e Galatia tanori nuġari na ġeraka-vanaġito moġo, korana Iauka Veaġa na ekira-ġoirito, Asia tanori ai Barau ġena guruġa asi beġene vari-fiua.

⁷ Misia tano vetoġanai ġeraġasito, benamo Bitinia tanonai ġeraka-toġa ġetato, senaġi Iesu laukana asi eurato ġia mo ġana beġene iaġo.

⁸ Moġa lorinai Misia na ġevanaġito, Troas vanuġanai ġea votuto.

⁹ Mo boġi Paulo emata-vanaġito. Ġia na Makedonia tarimana ta ruġataġo eġitaiato, ġia enoġiato-ġoi, ekirato, “Makedonia ġana noiaġoma, noma vaġa-kavama.”

¹⁰ Paulo na mo mata-vanaġi eġitaiato murinai, ġaraga-ġabikavito, Makedonia ġana baġana iaġo ġana. Korana ġaribato, mo tu Barau na ekeamato, mo tarimarima ġeri ai Vari Namona baġana fiua ġana.

Filipi ai - Lidia ġena vetuġamaġi-kure

¹¹ Moġa lorinai Troas ai bouti ai ġaraġeto, benamo maoromaoro Samotrake motumotu ġana ġaiaġoto. Monai ġagenato, elaġanito vau Neapoli ġana ġaiaġoto.

¹² Monana gunika ġana ġaiaġoto mo, Filipi ai ġaraġasito. Filipi tu Makedonia tanonai vanuġa baregona eruġa-guineto vanuġana, e Roma ġeri gabu. Monai ġaro kotari ġatanuto.

¹³ Sabadi ai, vanuġa maġuna ġatama bokana na ġaraka-rosito, ġaruka rekena ġana ġaiaġoto, ġai ġatuġamaġito, Iuda tarimari ġeri ġauġau gabuna ta tu monai. Ġai ġatanu-tarito, benamo mo ġaruka rikinai ġevevogoto vavineri ġavaġa-guruġarito.

¹⁴ Monai eseġaġimato-ġoi vavinena ta arana Lidia, Taiatira vavinena. Ġia tu voiri barego dabuġari evoivoi-iaġirito-ġoi. Ġia tu Barau etoma-rakarigo viniato-ġoi vavinena. Ġia Vereġauka na nuġana ekeoato, benamo Paulo na kara ekiraġiato-ġoi eseġaġiato ma eġabi-raġeato.

¹⁵ Ġia ma ġena numa tarimari ġesi babatiso ġeġabiato murinai, ġia na enoġimato, ekirato, “Bema ġovetuġamaġini au tu Vereġauka ġenai moġoni aveġabidadamani nai tu, si-iaġo, be au ġegu numai bitana tanu.” Benamo ġia na nuġama eġanirito, benamo ġia ġesi ġaiaġoto.

Filipi dibura numanai

16 Ğaro ta ġauġau gabuna ġana ġaiġoto-ġoi nuġanai, vetuġunaġi ġuiatona ta na edoġarimato. Ğia tu iauka rakavana ta na eboroġiato, ma ġoirai kara beġe ġorani dagarari ekiraġi-foforirito-ġoi. Ğoirai beġe ġorani dagarari ekiraġi-foforirito-ġoi nai tu, ġitaġauna tarimari ġeri moni ġutumama evaġa-ġorarito-ġoi.

17 Mo ġuiato na Paulo e ġai mabarama murima na eiaġomato, ekoġoto-ġoi, maiġesi ekirato-ġoi, “Maiġeri tarima tu Iaru-korokoro Barauna ġena vetuġunaġi tarimari! Vevaġa-maġuri kamasi boġo ġabiani dabarana varina ġefuani.”

18 Ğaro vovoka moġesi eveito-ġoi, eiaġoto mo, Paulo ebaruto, benamo eruġa-kureto, mo iauka rakavana ekiraiato, ekirato, “Tesu Keriso aranai au na akiramuni, mani kekeni ġenana noraka-vaġi!” Benamo mo horai moġo iauka rakavana mo ġuiato ġenana eraka-vaġito.

19 Mo ġuiato ġitaġauna tarimari ġeribato, ġia ġeri moni doġari dabarana ekorito, benamo ġia na Paulo e Silas ġeġabi-taririto, taravatu tauri ġeri ai maketi gabuna ġana ġeinu-iaġorito.

20 Kota ġeseġaġini tarimari ġoirari ai ġevaġa-ruġarito vau ġekirato, “Mai tu Iuda tarimari. Ğia na ġita ġera vanuġa baregonai rakava ġevaġa-ġoraiani.

21 Ema ġia na ġevaġa-riba iaġirini veiġari ġita ġera taravatu na tu asi eġabi-raġerini. Ğita tu Roma tarimara, ġia ġeri veiġa tu asi bita ġabi-raġerini e asi bita veirini riba.”

22 Tarimarima ġutumama-bara ġia ġesi ġekauto, Paulo e Silas ġeġuru-vinirito. Benamo Kota ġeseġaġini tarimari na Paulo e Silas ġeri dabuġa ġedarerito, benamo mo ġutumama-bara ġekirarito, beġene kwariri.

23 Ğekwari-biruġa biruġarito murinai, dibura numai ġefiu-toġarito, ema dibura numa ġitaġauna tarimana ġekiraiato, bene ġitaġau-ginikauri.

24 Ğia na mo vevaġa-naġi guruġana eseġaġiato, benamo dibura numana nuġana buroburonai efu-toġarito. Kwakuri tu ġau duduri baregori ma metori vekaravari ai ebaru-taririto.

25 Boġi nuġanai Paulo e Silas tu ġeġurigurito-ġoi e Barau vaġa-raġena mariri ġeġabirito-ġoi, ma dibura numa tarimari kotari na tu ġeseġaġi-taġorito-ġoi.

26 Asikauna tano-iaga baregona eraġasito, dibura numana korana duġari maki eġareva-ġareva vinubato. Vaġa-sebo ġatama-boka mabarari ġevekeoto, e dibura tarimari ġebarurito seiniri mabarari ġeketoketo-vaġito.

27 Dibura numana ġitaġauna tarimana etataġato, mo ġatama-boka mabarari eġitarito tu vekeo. Ğena tuġamaġi dibura tarimari mabarari tu ġeraga-lemato etato, benamo ġena vetari baġana einu-vaġiato, ma tauġena nevevaġi-mase etato.

28 Senaġi Paulo na eġaba-viniato, ekirato, “Tauġemu asi novevaġa-rakava! Ğai mabarama tu maiġema!”

29 Dibura numa ġitaġauna tarimana kere keari eveito, eraga-toġato, benamo ma ġoġo-ġoġona ġesi Paulo e Silas kwakuri korari ai ea keto-tarito.

30 Benamo monana eġori-rosirito ma edanaġirito, ekirato, “Vere tari-mami, au tu kamasi baveini vau maġuri badoġariani?”

31 Ğia na ġevaġa-veseato, ġekirato, “Iesu Vereġauka bono ġabidadama-vinia, benamo maġuri boġabiani, ġoi e ġemu numa tarimari mabarari.”

32 Benamo ġia na Vereġauka ġena guruġa, ġia ma ġena numa tarimari mabarari ġesi, ġeri ġekiraġito.

33 Mo boġi horanai moġo, dibura numa ġitaġauna tarimana na tauri ruarua eġori-iaġorito, manuġari ea ġurigiġito, ema ġia ma ġena numa tarimari mabarari ġesi mo boġi sebonai ġebabatorito.

34 Moġa murinai ġia na Paulo e Silas ġena numa nuġanai eġori-toġarito, benamo ġaniġani evinirito, ġeġanito. Ma ġia ma ġena numa tarimari ġesi tu iaku na ġevonuto, korana ġia toma tu Barau ġenai ġeveġabidadamani.

35 Boġiboġi, Kota ġeseġaġini tarimari na vetuġunaġi-iaġovini tarimari ġetuġurito, ġekirato, “Mani dibura numai tarimari ruarua ġoa tuġu-vaġiri.”

36 Benamo dibura numa ġitaġauna tauna na Paulo ekira-varaiato, ekirato, “Kota ġeseġaġini tarimari na guruġa beġe tuġua, ġoi e Silas tu baġana tuġu-rosimi beġesi. Moġa lorinai ġoraka-rosi ma mainomi ġesi.”

37 Senaġi Paulo na vetuġunaġi-iaġovini tarimari ekirarito, ekirato, “Ġai tu Roma tarimama, senaġi ġia na tarimarima ġutuma-bara ġoirari ai ġai ġekwari-kavamato moġo, a ġema rakava tu asi ġevetauato, senaġi dibura numai ġefiu-toġamato. Ma initoma tu vekuretoġai ma ġetuġu-rosima ġetoni? Asiġina ġinavaġi! Ġia tauġeri maiġana beġene iaġoma, benamo ġai beġenema ġori-rosima.”

38 Benamo vetuġunaġi-iaġovini tarimari na mo guruġa Kota ġeseġaġini tarimari ġekira-vararito. Ġia ġeseġaġito Paulo e Silas tu Roma tarimari ai ġeiaġoto nai tu ġegarito.

39 Benamo ġeiaġoto, Paulo e Silas ġenoġirito, ġeri rakava beġene tuġamaġi-fitoġari. Benamo ġia tauri ruarua dibura numa na ġetuġu-rosirito, e ġenoġirito, mo vanuġa barana beġene raga-kwanea.

40 Paulo e Silas na dibura numana ġeraga-kwaneato, Lidia ġena numa ġana ġeiaġoto. Monai tarikaka ġesi ġevedoġarito, benamo vevaġa-gwaġiġi guruġari na ġevaġa-kokorerito, benamo ġerakato.

17

Tesalonika ai

1 Paulo e Silas na Amfipoli e Apolonia ġeraka-vanaġiato, ġeiaġoto mo Tesalonikai ġeragaſito. Iuda tarimari ġeri rubu ta tu monai.

2 Paulo tu eveito-ġoi kavana rubu ai eraka-toġato. Ema Sabadi ġarori toitoi nuġari ai, ġia tu tarimarima ġesi Buka Veaġa guruġari ġeguruga-guruġa-iaġirito.

3 Ġia ġeri ekiraġi-ġinikauto-ġoi, e evaġa-moġoniato-ġoi, Keriso tu bemidigu-midiguni e mase na ma bevariġisi-ġenoġoini. Ema ekirato, “Mai Iesu, varina ġomi ġemi afuani tarimana, tu Keriso, (Barau na ekiraġi-toreato vevaġa-maġuri tauna).”

4 Iuda tarimari kotari na mo guruġa ġevaġa-moġoniato, benamo Paulo e Silas ġesi ġesebonato. Ema Barau ġetoma-rakariġo viniato-ġoi Grik tarimari ġutuma lelevaġi e vanuġai ġeri dagi barego vavineri ġutuma maki ġia ġesi ġesebonato.

5 Senaġi Iuda tarimari tu ġemamato, benamo voivoi gabunai seġafore lelevaġi tarimari kotari ġeġabi-vegogorito, seġafore doġorona ta ġesinaiato. Benamo ġia na gururaġe e vevaġi baregona vanuġa barana nuġanai ġeveiato. Ma Iason ġena numa ġeraġeato, Paulo e Silas beġene doġariri, be tarimarima ġoirari ai beġene ġori-rosiri ġana.

⁶ Senaĝi asi ĝedog̃aririto, benamo Iason e tarikaka kotari ĝeinu-iaĝorito, vanuĝa ĝitaĝauna tauri ĝoirari ĝana, ma koĝori ĝesi ĝekirato, “Tanobara mabarari ai mai tarima na rakava ĝevaĝa-ĝoraiani, ma toma tu mai ĝana beĝe iaĝoma,

⁷ benamo Iason na ĝena numai eĝita-ĝaurini. Ĝia na Kaisara ĝena taravatu ĝekiraĝi-fitogaiani, korana tu ĝekirani, vere barana ta ma ĝetoni. Ĝekirani, mo vere arana tu Iesu.”

⁸ Vanuĝa tarimari e ĝitataĝona tarimari na mo guruĝa ĝeseĝaĝiato nai, ĝeri daradara ebaregote.

⁹ Benamo ĝia na Iason ma karona ĝesi ĝevaĝa-fainirito moĝo, benamo ĝetuĝu-rakarito.

Berea ai

¹⁰ Eboĝito nai tu asikauna tarikaka na Paulo e Silas Berea ĝana ĝeraga-tuĝu-rakarito. Bereai ĝea raĝasito nai tu ĝeiaĝoto, Iuda tarimari ĝeri rubu ĝana.

¹¹ Bereai tarimarima tu tarima namori, dia Tesalonika tarimari kavari. Ĝia na Barau ĝena guruĝa ĝeseĝaĝiato-ĝoi nai, ĝeura-iaĝi baregoato-ĝoi. Ema ĝaro mabarari ai Buka Veaĝa nuĝanai kara Paulo na ekiraĝiato-ĝoi ĝevetauato-ĝoi. Korana tu ĝeurato-ĝoi beĝene riba, Paulo na kara ekiraĝiato-ĝoi guruĝari tu moĝoni ba, beĝene vaĝa-moĝoniri ĝana.

¹² Iuda tarimari ĝutuma Iesu Keriso ĝevaĝa-moĝoniato; ema Grik vavineri barego-baregori kotari na e Grik tauri ĝutuma maki Iesu Keriso ĝevaĝa-moĝoniato.

¹³ Senaĝi Iuda tarimari Tesalonikai ĝeseĝaĝito, Paulo tu Bereai Barau ĝena guruĝa eĝobata-iaĝiato-ĝoi. Benamo ĝeiaĝoto, vanuĝa tarimari nuĝari ĝea ĝanirito e ĝekira-vaisi vaisirito.

¹⁴ Benamo Paulo tu asikauna tarikaka na kone ĝana ĝetuĝu-rakaiato; a Silas ema Timoteo tu Bereai ĝetanuto.

¹⁵ Paulo ĝekava-iaĝoato tauri na ĝeĝori-iaĝoato mo Atena. Monana ma ĝeĝenoĝoito Berea ĝana. Ĝia ĝeĝenoĝoito nai tu, Paulo ĝena keakau gurugana ta maki ĝeĝwaiato, ekirato, Silas e Timoteo ĝia ĝenai beĝene iaĝo-ĝarimoĝi etato.

Atena ai

¹⁶ Atenai, Paulo na Silas e Timoteo evaĝa-nogarito-ĝoi nuĝanai, mo vanuĝa baregona eĝitaiato tu kwaivakuku na ĝevaĝa-vonuato. Benamo ĝia nuĝana emeto-rakavato.

¹⁷ Moĝa lorinai eiaĝoto Iuda tarimari ĝeri rubu ĝana, Iuda tarimari e irau bese tarimari Barau ĝetoma-rakariĝo viniato-ĝoi tarimari ĝesi ĝeguruĝa-guruĝato. Ema ĝaro mabarari ai maketi ai ĝeraka-refoto-ĝoi tarimari evaĝa-guruĝarito-ĝoi.

¹⁸ Vevaĝa-riba tauri irauri, ĝeri oreo ĝekiraĝirito-ĝoi tu Epikurea ema Stoiki, na Paulo ĝeĝoitaĝoato, benamo ĝevaĝa-veĝare veĝareato. Ĝia kotari ĝevedanaĝito, ĝekirato, “Mai muru-babo tu kara ekiraĝiani?” Ma kotari ĝevaĝa-veseto, ĝekirato, “Ĝia mai tu noĝa moĝo barau irauri ekiraĝirini.” Ĝia moĝesi ĝekirato, korana Paulo tu Iesu e ĝena variĝisi-ĝenoĝoi varina eĝobata-iaĝiato-ĝoi.

¹⁹ Benamo ĝia na Paulo ĝeĝabiato, Areopago ĝorona ĝana ĝeĝori-iaĝoato, kanisoro ĝevegogoto-ĝoi gabuna ĝana. Benamo monai ĝekiraiato, ĝekirato, “Ĝai ĝaurani tu ĝariba, mai vevaĝa-riba variĝuna oveiani tu kara okiraĝiani?”

20 Ġoi na guruġa tari okiraġirini tu ġai na asi ġaseġaġirini dagarari, naima ġai ġaurani tu aniri baġana ribari.”

21 Korana Atena tarimari mabarari e irau gabu tarimari monai ġetanuni tu, ġauvei ta asi ġeveiato-ġoi, senaġi ġia ġeri veiġa sebna tu ġaro mabarari ai mo guruġa variguri moġo ġekiraġi-taġorito-ġoi e ġeseġaġi-taġorito-ġoi.

22 Benamo Paulo tu Arepago vegogona nuġana na eruġa-vaesito, benamo ekirato, “Atena tarimami! Au na ġomi aġitamini, ġomi tu ġemi barau ġeri ai ġovetuġamaġikau-barego korikorini.

23 Korana ġemi vanuġai arakaorakaoni e ġemi toma-rakarigo gaburi aġitarito nai tu, au na fata veaġana ta aġitaiato, iatanai tu mai guruġa ġetoreato, ‘ASI RIBAMA BARAUNA ĠENA.’ Moġa lorinai mo asi ribami Barauna, ġomi na ġotoma-rakarigo viniani tu, toma au na akira-varamini.

24 Tanobara e tanobara nuġanai ġetanuni dagarari mabarari eveirito Barauna tu guba e tanobara verena. Ġia tu tarimarima ġimari na ġeragarito rubu veaġari ai tu asi etanuni.

25 Ġia tu dagara tai asi erabuto, be tarimarima ġimari na ġia ġena tu asi beġe veiani riba. Ġia tauġena na tarimarima mabarari maġuri evinirini, iaġari ema dagara mabarari evinirini.

26 Tarima sebna ġenana ġia na tarimarima beseri mabarari evaġa-ġorarito, ema tanobara mabarana beġene tanu-iaġia etato. Ġia tauġena na ġeri maġuri laġaniri ema ġeri tanu gaburi korikori eboioġa-guinerito.

27 Barau na moġesi eveiato, korana ġia beġene ġita-vetaua ġana; ema beġene vetau-kokore kokorea, benamo beġene doġaria. Oba, Barau e ġita tata vefakara tu asi managa.

28 ‘Korana ġita tu, ġia koranai tamaġurini, taġareva-ġarevani e roġo tamaġuri-taġoni.’ Ġemi mari ġegarani e ġesisiba-iaġirini tauri na ġekiraġiato kavana, ġekirato, ‘Ġita maki ġia natuna.’

29 Ġita tu Barau natuna lorinai, asi bitana tuġamaġi, Barau tu golo, silva, o fore, tarimarima ġena boioġai ema ribai ekororito dagarari kavana.

30 Guinenai tarimarima tu asi ġeri ribamaoro nai, Barau na moġeri tu eġita-ragakwanerito. Senaġi toma tu, ġia na tarimarima mabarari gabu mabarari ai ekirarini, beġene vetuġamaġi-kure.

31 Korana ġia na ġaro ta ekiraġi-toreato, mo ġaro ai ġena ġabiviriġi tarimana na tanobarai vevaġa-maoro beveiani ma iobukaibukana ġesi. Barau na mo tau evaġa-moġoniato tarimarima mabarari ġoirari ai, vetoġana tu mase na evaġa-variġisi ġenoġoiato.”

32 Mase na variġisi-ġenoġoina guruġana ġeseġaġito nai, kotari na tu Paulo ġerikiriki-iaġiato. Ma kotari tu ġekirato, “Ġai ġaurani tu, mo vari ġema ma nokiraġi-ġenoġoia.”

33 Benamo Paulo na mo vegogo eraga-kwaneato.

34 Senaġi tau lakouna tu ġia ġesi ġerakakauto e Barau ġenai ġeveġabidadamato. Ġia fakari ai tu Dionisio, ġia tu Arepago ġoro ai ġeveġogoto-ġoi tarimana ta, e vavine ta arana Damari, ema tarima kotari maki.

18

Korinto ai

¹ Moġa murinai Paulo na Atena eraga-kwaneato, Korinto ġana eiaġoto.

² Monai ġia na Iuda tarimana arana Akwila eġoitaġoato. Akwila tu Ponto ai emagurito. Ġia tu ġaraġona Priskila ġesi Itali na vau ġeraġasito. Ġia Itali na ġeiaiġomato, korana tu Klaudio na Iuda tarimari mabarari ekirarito, Roma beġene raga-kwanea. Paulo eiaġoto ġia ġeri ai, ea ġitarito.

³ Ġia maki Akwila ma ġaraġona ġesi kavana farai numari eturito-ġoi. Moġa lorinai Paulo monai tu ġia tauri ruarua ġesi etanuto-ġoi ema ġeġauvei-vegogoto-ġoi.

⁴ Sabadi mabarari ai tu Iuda tarimari ġeri rubu ai eġobatato-ġoi, Iuda e Grik tarimari nuġari neġabiri uranai.

Silas e Timoteo ġeraġasito

⁵ Silas e Timoteo Makedonia na ġeraġasito nai, Paulo tu Barau ġena guruġa eġobata-iaġiato-ġoi ġaro mabarana, Iuda tarimari ġeri ai ekiraġi-foforiato-ġoi, Iesu tu moġoni Keriso, (Barau na ekiraġi-toreato vevaġa-maġuri tauna).

⁶ Senaġi Iuda tarimari na Paulo ġena guruġa ġevaġa-ġenoġoiato, e guruġa asi namori ġenai ġekira-veġare veġareato nai, Paulo na ġena dabuġa ekorakoraiato ġia ġoirari ai vauro evaġa-guruġa gwaġiġi-vinirito, ekirato, “Gomi rarami verebana tu tauġemi iatami ai! Au ġegu ai vereba ta asiġina. Toma au tu aiagoni irau bese tarimari ġeri ai.”

⁷ Benamo mo rubu na eraka-rosito, eiaġoto, irau bese tarimana arana Titio Iusto ġena numa ġana. Titio tu Barau etoma-rakariġo viniato-ġoi tarimana, ma ġena numa tu rubu sebinai moġo.

⁸ Krispo, rubu ġorikauna tarimana e ġena numa tarimari mabarari ġesi tu Vereġauka ġeġabadadama-viniato-ġoi. Ema Korinto tarimari ġutuma na maki vari ġeseġaġiato, benamo ġevaġa-moġoniato ema babatiso ġeġabito.

⁹ Boġi tai Vereġauka na Paulo mata-vanaġi ai evaġa-guruġaiato, ekirato, “Asi bono gari, murumu asi bene kafu, bono guruġa!”

¹⁰ Korana au tu ġoi ġesi bene; ta na asi beiaġo-vinimuni e asi bevaġa-rakavamuni riba, korana au ġegu tarimarima tu ġutuma mai vanuġa baregonai.”

¹¹ Moġa lorinai Paulo monai etanuto laġani ta e ġue imaima sebna (6); Barau ġena guruġa tarimarima evaġa-riba iaġirito-ġoi.

¹² Galio tu Akaia tanona ġeri gavana ġauveina eveito-ġoi nuġanai, Iuda tarimari ġeġaru-vegogoto, Paulo ġeġabi-tariato, Kota gabuna ġana ġeġori-iaġoato.

¹³ Ġekirato, “Mai tarima na tarimarima nuġari eġanirini, ma taravatu na asi ekiraġiani maġurinai Barau beġene toma-rakariġo vinia etoni.”

¹⁴ Paulo neguruġa etato nuġanai, Galio na Iuda tarimari ekirarito, ekirato, “Gomi Iuda tarimami, bema veġa rakavana tai o kerere baregona tai boġoro samani nai tu, bara seġaġi-vinimi riba.

¹⁵ Senaġi mani veġareveġare tu vevaġa-riba, e ara, ema tauġemi ġemi taravatu veġareveġareri, naima tauġemi na boġono vei-rorogotori. Au na maniġesina dagarari Kotai tu asi baseġaġirini!”

¹⁶ Benamo ġia na Kota gabuna na elai-rosirito.

¹⁷ Ġia mabarari na rubu ġorikauna tarimana, Sostene, ġeġabi-tariato, Kota gabuna ġoiranai benamo ġekwari-korukoruato. Ma Galio tu eġitarito senaġi eboġe-ġuiragiato moġo.

Paulo Antioka ġana eġenoġito

¹⁸ Paulo Korinto ai tarikaka veġabidadama nuġanai tarimari ġesi tu ġaro kota vovoka roġo ma ġetanuto. Moġa murinai eraga-kwanerito, benamo Priskila e Akwila ġesi bouti ta Siria ġana ġeiaġoto. Kenkrea na roġosi beġere raka nuġanai, ġia tu debana ġeraroato, korana ġena kiraġitore gwaġiġina ta Barau ġenai eveiato nai.

¹⁹ Efeso ai ġeraġasito, benamo Paulo na Priskila e Akwila monai eraga-kwanerito. Ġia tu Iuda tarimari ġeri rubu ai eraka-toġato benamo Iuda tarimari ġesi ġea guruġa-guruġato.

²⁰ Ġia na ġenoġiato, monai Iuda tarimari ġesi roġo bene tanu, senaġi ġeri noġinoġi asi eġabi-raġeato.

²¹ Senaġi ġena rakai tu iniġesi evaġa-guruġarito, ekirato, “Bema Barau beurani nai, gomi ġemi ai ma baġenoġoi-iaġomani.” Benamo bouti ai ea raġekauto, ma Efeso eraga-kwaneato.

²² Kaisareai eraġasito nai, kwakuna na Ierusalemna ġana evaraġeto, ekalesia ġesi ġea veġoitaġoto vauro, Antioka ġana evariġo-iaġoto.

²³ Ġaro kotari monai etanuto murinai, Galatia e Frigia tanori ġana eiaġoto, Iesu ġekorana-iaġiato-ġoi tarimari mabarari gabu tatai ġetanuto-ġoi tarimari ea vaġa-kokorerito.

²⁴ Mo horai Iuda tarimana ta arana Apolos, Alesandria ai emaġurito tarimana, Efeso ġana eiaġoto. Ġia ġena riba tu varaġe lelevaġi, guruġai namo vedaurea e Buka Veaġa maki eriba-ginikau-raġeato.

²⁵ Ġia tu Vereġauka ġena dabara ġevaġa-ribaiato, benamo nuġana mabarana ġesi Iesu varina efiuato, e evaġa-riba-iaġi ginikauato. Dagara sebona, ġia tu Ioane ġena babatiso moġo eribaiato.

²⁶ Rubu nuġanai eġobatato-ġoi ma kokorena ġesi. Monai Priskila e Akwila na ġeseġaġiato, benamo ġeġori-kauato, ġia ġetanuni numana ġana ġeġori-iaġoato, monai vauro Barau ġena dabara moġonina ġevaġa-riba ginikauato.

²⁷ Benamo Apolos eurato, Akaia ġana bene iaġo. Moġa lorinai tarikaka Efeso ai ġetanuni na ġevaġa-kavaiato, e fefa ta ġetoreato Akaiai Iesu ġekorana-iaġiato-ġoi tarimari ġeri, ġenoġirito, Apolos eiaġoni nai beġene ġabi-raġea. Apolos ea raġasito nai tu, Barau ġena varevare-bara ġenana Barau ġevaġa-moġoniatu tarimari tu vevaġa-kava barego Apolos ġenana ġedoġariato.

²⁸ Korana ġena guruġa kokoreri ġerina Iuda tarimari evaġa-ketorito tari-marima ġutumna goirari ai, Apolos na Buka Veaġa na ġeri evaġa-moġoniatu-ġoi Iesu tu Keriso, (Barau na ekiraġi-toreato vevaġa-maġuri tauna).

19

Paulo Efeso ai

¹ Apolos tu Korinto ai etanuto-ġoi nai, Paulo gunika rekena na eiaġoto mo Efeso ai ea raġasito. Monai Iesu ġekorana-iaġiato-ġoi tarimari tari edoġaririto,

² benamo edanaġirito, ekirato, “Iesu ġenai goveġabidadamato nai, Iauka Veaġa goġabiato ba?” Ġia ġevaġa-veseto, ġekirato, “Asiġina, ġai tu Iauka Veaġa maki etanuni guruġana ta tu roġosi maki baġana seġaġia.”

³ Benamo Paulo na ma edanaġirito, ekirato, “Be ġomi na tu kamara babatiso goġabiato?” Ġia ġevaġa-veseto, ġekirato, “Ioane ġena babatiso.”

⁴ Benamo Paulo ekirato, “Ioane tu rakava ġerina ġevetuġamaġi-kureto tarimari ebatisorito, ema Isaraela tarimari ekirarito, ġia murina na beiaġomani tarimana beġene ġabidadama-vinia, mo tu Iesu.”

⁵ Mo guruġa ġeseġaiato nai, Vereġauka Iesu aranai babatiso ġeġabiato.

⁶ Paulo ġimana ġia iatari ai etore-kaurito nai tu, Iauka Veaġa emariġoto ġia iatari ai. Benamo ġaro iraurai ai ġeguruġato, e Barau na ġia ġeri ai evaġa-foforirito guruġari ġevari-fiurito.

⁷ Tauri mabarari tu gabanana ruarua (12) kavana.

⁸ Paulo monai ġue toitoi etanuto. Ma vanaġivanaġi rubu ai eraka-toġato-ġoi, Barau ġena Basileia, (ġena veġitaġau seġukana evaġa-ruġaiani maiġa), eġobata-iaġiato-ġoi ma kokorena ġesi, ema tarimarima ġesi ġeguruġa-iaġiato-ġoi e nuġari eġanirito-ġoi.

⁹ Senaġi tari nuġari tu bubu, be asi ġeseġaġi-viniato, ema tarimarima ġutuma ġoirari ai Vereġauka ġena dabara iatanai guruġa tu rakavari ġekiraġito. Moġa lorinai Paulo na eraga-kwanerito, Iesu ġekorana-iaġiato-ġoi tarimari moġo eġori-kaurito, benamo ġaro mabarari ai Tirano ġena vevaġa-riba numanai evaġa-ribarito-ġoi.

¹⁰ Laġani ruarua moġesina eveito, moġesina naima Asia tanonai ġetanuto-ġoi Iuda tarimari e Grik tarimari mabarari na Barau ġena guruġa ġeseġaġiato.

Skeva natuna

¹¹ Barau na Paulo ġenana veiġa boruri irauri eveirito.

¹² Ġia na eġauvei-iaġirito-ġoi mukori e eriġorito-ġoi dabuġari keve tari-mari ġeri ai ġeġabi-iaġorito-ġoi nai tu, ġeri keve ġenamoto-ġoi, e iauka rakavari ġia ġerina ġeraka-vaġito-ġoi.

¹³ Iuda tarimari kotari monai ġerakaoto-ġoi ma iauka rakavari ġelai-vaġirito-ġoi tauri na maki Vereġauka Iesu arana ġevatoato iauka rakavari na ġeboroġirito tarimari iatari ai. Iauka rakavari ġekirarito, ġekirato-ġoi, “Paulo na eġobata-iaġiani tarimana Iesu aranai akiramini, ġoraka-vaġi.”

¹⁴ Skeva, Iuda ġeri Rubu Veaġa verena baregona ta, natuna merori imaima ruarua (7) tu moġesina ġevaito-ġoi.

¹⁵ Benamo ġaro ta iauka rakavana na ekirarito, ekirato, “Iesu tu au ribagu, ema Paulo maki ma ribagu, a ġomi tu deikara?”

¹⁶ Benamo iauka rakavana na eboroġiato tarimana na tauri imaima ruarua (7) na eguru-vinirito, ebota-korukorurito. Evaġa-vevaġi rakavarito, be mo numa na ġema raga-rosito tu kefiru kori e ma rarari.

¹⁷ Efeso ai ġetanuto-ġoi tarimari, Iuda e Grik tarimari mabarari, na mo vari ġeseġaġiato nai, ġegari-rakava rakavato, ema Iesu Vereġauka arana ġevaġa-raġe baregoato.

¹⁸ Iesu ġevaġa-moġoniato tarimari vovoka ġeiaġomato, benamo ġutuma ġoirari ai ġeri veiġa rakavari ġekiraġi-foforirito.

¹⁹ Meġameġa tarimari ġutuma ġeri meġa bukari ġeġwa-vegogorito, benamo tarimarima mabarari ġoirari ai ġegaburito. Mo buka voiri ġevaġa-vegogorito tu silva moniri 50,000.

²⁰ Mai veiġa seġukari ġeġorato ġerina Vereġauka ġena guruġa eraga-rovorovoto, e ebaregotu ma seġukana ġesi.

Efeso ai gururaġe baregona eġorato

21 Moĝeri muriri ai Paulo nuĝanai etuĝamaĝito, Makedonia e Akaia tanori na bene vanaĝi-iaĝo Ieruselema ĝana. Ekirato, “Mo ĝana bana iaĝo murinai, Roma maki bana ĝitaia.”

22 Benamo Timoteo e Erasto, ĝia ĝevaĝa-kavaiato-ĝoi tarimari ruarua, Makedonia ĝana etuĝu-iaĝorito, a ĝia tu Asia tanonai kota roĝo etanu-maukato.

23 Mo ĝaro sebonai Efeso ai gururaĝe baregona eĝorato, korana Vereĝauka ĝena Dabara dainai.

24 Monai silva eĝauvei-iaĝirito-ĝoi tarimana ta arana Demetrio, ĝia na barau vavinena arana Diana ĝena rubu baregona ĝitaĝitana ilailanai rubu misimisiri silva na eveiritu-ĝoi. Monana ĝena ĝauvei tarimari moni boruri barego vedaurea ĝedoĝarito.

25 Benamo Demetrio na ĝia mabarari, e ĝia ĝeri ĝauvei kavana tarimari ekea-vegogorito, ma ekirarito, ekirato, “Tau, ĝomi tau mabarami ribami ĝita ĝera moni tu mai ĝauvei na eiāĝomani.

26 Toma ĝomi tauĝemi na ĝoĝitaiani e ĝoseĝaĝiani, mai tarima Paulo na kara eveiani. Ĝia ekirani, tarimarima ĝimari na ĝeveirini barauri tu dia barau, ema ĝia na tarimarima ĝutuma-bara nuĝari eĝanirini, e eĝori-veĝitarini, dia Efeso ai moĝo, senaĝi Asia tanona mabarana maki.

27 Mai tu dia ĝita ĝera ĝauvei namona arana moĝo evaĝa-rakavaiani, senaĝi barau vavinena baregona, Diana, ĝena rubu maki asi aninai beĝe vaĝa-iaĝoani, e Diana iaru-korokorona asi ma beĝe vevato-iaĝiani; aba, mai barau vavinena tu Asia tarimari mabarari e tanobara mabarana na ĝetomarakarigo viniani.”

28 Mo guruĝa ĝeseĝaĝiato nai, ĝebaru-rakava rakavato, e ĝekoĝoto, ĝekirato, “Efeso barauna Diana tu iaru-korokoro!”

29 Benamo mo guru baregona eraĝeto na mo vanuĝa barana mabarana tu iauvoiauvo e daradara na eĝauato. Ma Paulo ĝesi ĝerakao-vegogoto-ĝoi Makedonia tarimari ruarua, Gaius e Aristako, tu ĝeĝabi-taririto, benamo marere gabuna ĝana ĝeĝori-ragaraga-iaĝorito.

30 Paulo ĝena ura tu tarimarima ĝutuma-bara ĝoirari ai bene raka-rosi, senaĝi Iesu ĝekorana-iaĝiato-ĝoi tarimari asi ĝeurato, ma ĝeruĝa-ĝauato.

31 Asia vereri kotari Paulo ĝatana. Ĝia na maki ĝena guruĝa ĝetuĝuto, ĝenoĝiato, marere gabunai asi bene fofori.

32 Mo vegogo nuĝanai daradara asikeikeina eĝorato, korana tarimarima mabarari irau ĝabaĝabana keakeana ĝeiaĝoto. Ĝeĝabato-ĝoi e ĝekeato-ĝoi nai, tari tu guruĝa ta ĝekiraĝiato-ĝoi, ma kotari tu guruĝa boruri tari ĝekiraĝirito-ĝoi, korana tarima ĝutuma tu asi ribari kara dainai ĝea ĝaru-vegogoto.

33 Iuda tarimari na Alesanda mo ĝutuma-bara nuĝana na ĝetuĝu-rosiato, tarimarima ĝoirari ai ea ruĝato, Iuda tarimari iatari ai bene guruĝa ĝana. Benamo Alesanda ĝimana na tarimarima elau-taririto asi beĝene gururaĝe ĝana.

34 Senaĝi ĝeĝita-leaiato, ĝia tu Iuda tarimana nai, mabarari vaĝa-sebo mai guruĝa sebona moĝo ĝekoĝo-iaĝi ĝenoĝoi-ĝenoĝoiato-ĝoi, ĝekirato-ĝoi, “Efeso barauna, Diana, tu iaru-korokoro!”

35 Vanuĝa ĝena toretore tauna o klak mo tarimarima ĝutuma evaĝa-maĝorito, benamo ekirato, “Efeso tarimami, tarimarima mabarari ma ribari, Efeso tu Diana barau vavinena baregona ĝena rubu ĝitaĝauna

vanuġana, e guba na fore veaġana Diana ilailanai dagarana eketo-firiġoto ġitaġauna vanuġana maki.

³⁶ Tarima ta na maiġeri dagara asi bekira-ġuniġaurini riba. Moġa lorinai asi ġoguru-raġe, asi ġovei-taġuitaġui.

³⁷ Mai tarimarima na rubu dagarana ta tu asi beġe lemaia, e ġera barau vavinena ġenai maki guruġa rakavana ta asi beġe kiraġi, senaġi ġomi na maiġana boġo ġori-iaġoma-kavari.

³⁸ Bema Demetrio ma ġena ġauvei tauri ġesi ma ġeri baru tarima ta ġenai nai tu, ġita tu ma ġera gavana, ġera Kota ġarori tu vekeo. Monai vauro beġene vei-roroġotori.

³⁹ Bema ġourani dagara ta ma boġono kiraġia nai tu, taravatu na evaġa-moġoniato vegogonai vauro beġene guruġa-iaġia.

⁴⁰ Toma kara beġora korana beġe danaġirani nai, ġita tu bita kerereni. Korana mai gururaġe baregona bita veia tu asi tauna ta, e ġera ġaru-vegogo kava anina tu asi bita kiraġiani riba.”

⁴¹ Eguruġa-ġosito murinai, ġevegogoto tarimari etuġu-rovorovorito.

20

Paulo tu Makedonia e Grik ġana eiaġoto

¹ Mo daradara nuġanai ġekoġoto-ġoi, ġeġabato-ġoi, moġa emeġomeġo-tarito murinai, Paulo na Iesu ġekorana-iaġiato-ġoi tarimari ekea-vegogorito; benamo elaunaġirito murinai, eġabi-tuġurito. Benamo ġia tu ma erakato Makedonia ġana.

² Mo gabu nuġari na eraka-vanaġito-ġoi nai, guruġa ġutuma ekiraġito, tarimarima evaġa-kokorerito-ġoi. Monana eiaġoto mo, Grik ai evotuto.

³ Monai ġue toitoi etanuto. Bouti na Siria ġana bene iaġo ġana eġabi-kavito-ġoi nuġanai tu eseġaġito, Iuda tarimari na tu ġia beġene vaġia boioġana ġetogaiato-ġoi. Moġa lorinai Makedonia na dabarai bene ġenoġoi-vanaġi etato.

⁴ Tarima kotari na ġia ġekavaiato, tarimari tu maiġeri: Sopata Piro, Berea tarimana; Aristako e Sekundo, Tesalonika tauri; Gaius, Derebe tarimana; Tikiko e Trofimo, Asia tauri; e Timoteo. Moġeri na ġekavaiato, Asia ġana ġeiaġoto.

⁵ ġia tu ġeraka-guineto, Troas ai vau ġai ġea vaġa-nogamato.

⁶ Senaġi ġai tu Asi Etubuni Faraona Verekona ekorito murinai vau, Filipi ġaraga-kwaneato. Ġaro imaima (5) ġekorito vau, ġia ġeri ai Troas ai ġavotuto, ġavedoġarito. Monai tu ġaro imaima ruarua (7) ġatanuto.

Paulo ġena iaġoiaġo magona Troas ai

⁷ Fura sebona ġena ġaro giniguenai o Sandei ai ġaraka-vegogoto anibou baġana ġani ġana. Benamo Paulo na mo lavilavi tu tarimarima eġobata-vinirito, eiaġoto mo, bogi nuġana, korana belaganini ġia tu berakani nai.

⁸ Mo numa tuġuna daiġutunai ġai ġavegogoto, moġa lamefa na tu asisebo ġevaġa-ġararito.

⁹ Mero futuana ta arana Eutiko tu windoa nuġanai etanuto. Paulo ġena guruġa emauka-iaġoto-ġoi nuġanai, Eutiko matana tu egenagenato-ġoi mo ea gena-vetuġa-rekwato. Benamo mo numa tuġuna na stori vaġa-toitoina (o third story) na ea keto-firiġoto mo tano ai. Ġea ġabi-vaisiato nai tu mase.

¹⁰ Senaġi Paulo eraka-riġoto, Eutiko iatanai evefiukauto, eregoato, benamo ekirato, “Nuġami asi ġeraġe, ġia tu maġuri!”

11 Moĝa murinai numa tuĝuna ĝana ma evaraĝeto, ma farao ebukiĝutuato, ĝeĝanito. Ĝena guruĝa ma esiriĝuato, eiaĝoto mo elaĝanito, benamo erakato.

12 Vegogo tarimari na mo futua ĝeĝoriatu, benamo ma verereri ĝesi ĝerakato.

Paulo Troas na eiaĝoto mo Mileto

13 Ĝai tu bouti na Aso ĝana ĝaiaĝo-guinetu, a Paulo tu monai vau ma baĝa ĝura-kauani. Paulo na tu moĝesina ekiramato, korana ĝia tu kwakuna na beraka-vanaĝini etato.

14 Aso ai ema doĝarimato, benamo ĝaĝura-kauato, Mitilene ĝana ĝaiaĝoto.

15 Monana bouti na ma ĝaiaĝoto mo elaĝanito vau, Kioso iata-raĝenai ĝadarokauto. Mo ĝaro murinai tu Samo ai ma ĝavotuto, ma ĝaro ta ma evanaĝiatu vauro, Mileto ai ĝaraĝasito.

16 Paulo eurato, Efeso tu beĝene raga-vanaĝia, Asia tanonai ĝaro kotari beĝe vaĝa-koririni garina, korana ĝia nuĝana eĝarigarito-ĝoi. Ĝena ura bema ma dabarana nai tu, Ierusalemaj beĝene votu vauro, Pentekoste ĝarona bene raĝasi, mo tu Pasova ĝaro gabana imaima (50) murinai.

Paulo ĝena veĝabituĝu guruĝari Efeso ekalesia ĝorikauna tauri ĝeri ai

17 Paulo tu Mileto vanuĝana na Efeso ekalesia ĝorikauna tauri ĝeri guruĝa etuĝu-iaĝoto, ekirarito, beĝene iaĝoma, ĝia ĝesi beĝenema vedogari.

18 Ĝia ĝema votuto nai, evaĝa-guruĝarito, ekirato, "Ĝomi ma ribami au ĝaro mabarari ai ĝomi ĝesi tatanuto-ĝoi nai, aiĝesina atanuto, ĝaro tovotovona na Asia tanonai ama raĝasito veĝata.

19 Ĝaro vovoka Iuda tarimari ĝeurato-ĝoi au beĝene kougu, veĝa rakavari ĝutuma au ĝegu ai ĝeveirito-ĝoi. Senaĝi nuĝagu ma maranana ĝesi moĝo e ma taĝigu ĝesi Vereĝauka vetuĝunaĝina aiaĝo-vinito-ĝoi.

20 Ĝomi ribami, vaĝa-kava-iaĝimi guruĝari mabarari avaĝa-ribamito, ta asi akure-toĝaiato, ĝemi numai e ĝutuma ĝoirari ai avevaĝa-ribato-ĝoi nai.

21 Iuda tarimari e Grik tarimari ĝoirari ai aguruĝa-foforito-ĝoi, ĝeri rakava ĝerina beĝene vetuĝamaĝi-kure, Barau ĝenai beĝene ĝenoĝoi, ema ĝera Vereĝauka Iesu Keriso beĝene ĝabidadama-vinia.

22 Au toma tu Ieruselema ĝana aiaĝoni, korana Iauka Veaĝa na evaĝa-naĝiguni nai, ma asi ribagu monai tu kara ĝegu ai beĝorani.

23 Dagara sebona moĝo au ribagu tu Iauka Veaĝa na vanuĝa baregori mabarari ai evaĝa-ribaguni, au ĝoiragu ai tu dibura numa e midigumidigu evaĝa-noga taĝoguni.

24 Senaĝi au ĝegu ai, au ĝegu maĝuri tu asi atuĝamaĝi-baregoani, kara ĝana atoni, ĝegu ura sebona tu ĝegu raga-iruiru moĝo bana vaĝa-ĝuĝuru, ema mo ĝauvei Vereĝauka Iesu na eviniguto, bana veia etato ĝauveina, bana vaĝa-koria. Mo ĝauvei tu: Barau ĝena varevare-bara Varina Namona bana kiragi-foforia.

25 Au tu ĝomi mabarami fakami ai arakao-rakaoto, Barau ĝena Basileia, (ĝena veĝitaĝau seĝukana evaĝa-ruĝaiani maiĝa), ĝemi aĝobata-iaĝiatu. A toma au ribagu, ta na asi ma boĝita-ĝenoĝoiguni.

26 Moĝa lorinai toma ĝaro ĝomi ĝoirami ai au aguruĝa-foforini, bema ĝomi ta Barau ĝenana beraka-rekwarekwani nai, verebana tu dia au ĝegu ai.

27 Korana Barau ĝena ura mabarana avaĝa-ribamito, misina ta maki asi akira-ĝuniĝuato.

²⁸ Tauḡemi lorimi boḡono vetore, ema mamoe serina lorina boḡono toreri. Mani mamoe serina tu Iauka Veaḡa na evinimito boḡono ḡitaḡauri ḡana. Barau ḡena ekalesia boḡono ḡita-ḡaua e boḡono ḡori-kaua. Mani tu ḡia Natuna rarana na evoiato.

²⁹ Au ribagu, au barakani murigu ai tu boḡa kwaivari rakavari ḡomi fakami ai beḡe raka-toḡani, benamo mani mamoe serina beḡe vaḡa-rakavaiani.

³⁰ ḡomi tauḡemi fakami na maki tau kotari beḡe varigisini, benamo ḡofaḡofa guruḡari beḡe kiraḡini, Iesu ḡekorana-iaḡiani tarimari ḡia na beḡene ḡori-ḡevevaḡiri ḡana.

³¹ Moḡa lorinai lorimi boḡono vetore! Boḡono vetuḡamaḡi-taḡo, au na tu laḡani toitoi veḡata matagu ma taḡina ḡesi, ḡomi asisiba-vini boḡimito-ḡoi e asisiba-vini laḡanimito-ḡoi.

³² Toma Barau ḡimanai e ḡena varevare-bara guruḡana nuḡanai atoremimi, ḡia na tu bevaḡa-ruḡa-iobukamini ilaila, ema voimi bevinimimi evaḡa-veaḡarito tarimari mabarari ḡesi.

³³ Au na ta ḡena silva, o golo, o dabuḡa urana asi aveito.

³⁴ ḡomi tauḡemi ma ribami, au ḡegu rabu e karogu ḡeri rabu dagarari mabarari tu, mai ḡimagu ruarua ḡeri ḡauvei ḡerina aḡabito-ḡoi.

³⁵ Dagara mabarari nuḡari ai au na avaḡa-ḡita iaḡimito-ḡoi, au moḡesi ḡauvei kokorekokore ḡerina vauro moira-moira tarimari bitana vaḡa-kavari. Iesu Vereḡauka ḡena guruḡa boḡono tuḡamaḡi-taḡoa, ekirato, 'Varevare iakuna tu barego, a ḡevinirani nai taḡoitaḡoni iakuna tu kei.' "

³⁶ Paulo eguruḡa-ḡosito vau, ḡia ḡesi ḡevetui-tarito, benamo mabarari ḡesi ḡeḡuriguḡurito.

³⁷ ḡia mabarari ḡetaḡi-rakavato, ḡevefaḡato, ma ḡeverauato.

³⁸ ḡia nuḡari ḡevekwarḡi-rakavato tu maiḡesina evaḡa-guruḡarito nai, ekirato, ḡia na ḡoirana asi ma beḡe ḡita-ḡenoḡoiani. Benamo bouti ḡana ḡeḡori-iaḡoato.

21

Paulo Ierusalemia ḡana eiḡoto

¹ ḡia ḡesi ḡaveḡabi-tuḡuto, benamo ḡarakato. Davara na ḡaiḡoto, maoromaoro mo Koso ai ḡavotuto; ma elāḡanito vau Rodes ḡana ḡaiḡoto, monana ma ḡaiḡoto Patara.

² Foenikia ḡana beiḡoni boutina monai ḡadoḡariato, ma ḡaraḡeto, benamo ḡaragato.

³ ḡaboḡe-iaḡoto Saipras ḡaḡitaiato, benamo gabina (o south) rekena na ḡavanaḡito, ḡaiḡoto mo Siria ai ḡaraḡasito. Taia vafuna na vau ḡaraka-rigoto, korana mo bouti farefarena tu monai beḡe tore-rigorini nai.

⁴ Iesu ḡekorana-iaḡiato-ḡoi tarimari kotari monai ḡadoḡaririto, ḡia ḡesi fura o wiki sebona ḡatanuto. Iauka seḡukana ḡenana ḡia na Paulo ḡekiraiato, Ierusalemia ḡana asi bene iaḡo.

⁵ Senaḡi ḡema raka ḡarona eḡabiato, benamo ḡarakato. ḡia mabarari ma ḡaraḡori e ma naturi ḡesi vanuḡa baregona na ḡeḡori-rosimato kone ai. Benamo ḡai mabarama ḡavetuitui-tarito, ḡaḡuriguḡurito.

⁶ ḡia tata ḡesi ḡaveḡabi-tuḡuto, benamo ḡai tu bouti baregonai ḡaraḡeto, a ḡia tu monana ḡeḡenoḡoito ḡeri numa ḡari.

7 Taia na ġaiagoto Tolemais. Ġema davara iaġoiagħona dokona moġa. Monai tarikaka tari ġesi ġavedoġarito, ma ġavaġa-namorito, ġia ġesi ġaro sebona ġatanuto.

8 Elaġanito, benamo kwakuma na ġarakato, ġaiagoto, Kaisarea ai ġaraġasito. Monai evanelia tarimana arana Filipo ġena numa ġana ġaiagoto, ġia ġesi ġatanuto. Ġia tu Ierusalemaj tarima imaima ruarua (7) ġeġabi-viriġirito tarimana ta.

9 Ġia natuna ġuiatori vasivasi tu Barau na peroveta varevarena evinirito.

10 Ġaro vovoka monai ġatanuto murinai, peroveta tarimana ta arana Agabo, Iudea na ema raġasito.

11 Ġia tu ġai ġemai eiagħomato, ma Paulo ġena gabaġau eġabi-vaisiato, benamo ġia tauġena kwakuna e ġimana ebarubarurito, benamo ekirato, "Iauka Veaġa tu maiġesi ekirani, 'Mai gabaġau tarimana tu Iuda tarimari na Ierusalemaj maiġesina beġe barubaruani, benamo irau bese tarimari ġimari ai beġe tore-kauani.' "

12 Mai guruġa ġaseġaġiato nai, ġai ema monai tarima kotari ġesi Paulo ġanoġiato, Ierusalemaj ġana asi bene iaġo.

13 Senaġi ġia evaġa-veseto, ekirato, "Kara taġina ġoveini e au nuġagu ġovaġa-moiraiani? Au tu rovinatore, dia Ierusalemaj beġe barubaruguni moġo, senaġi Vereġauka Iesu arana bakunai bamaseni maki."

14 Ġai tu asi ilaila ġia nuġana baġa ġaniani nai, ma ġia noġinoġina ġavaġa-dokoato, benamo ġakirato, "Vereġauka ġena ura moġo bene vetore."

15 Ġaro kotari ġekorito murinai, ġema farefare ġaġabi-kavirito, benamo Ierusalemaj ġana ġaiagoto.

16 Kaisarea ai ġetanuto-ġoi Iesu ġekorana-iaġiato-ġoi tarimari kotari maki ġai ġesi ġaiagoto. Ġia na ġeġori-iaġomato, Nason, Saipras tarimana, ġena numa ġana. Nason tu kai-veġata na Iesu ekorana-iaġiato-ġoi tarimana.

Paulo na Iakobo (o Iames) eraka-ġitaiato

17 Ierusalemaj ġaraġasito nai tu, tarikaka na ma iakuri ġesi ġeġabi-raġemato.

18 Elaġanito, benamo Paulo tu ġai ġesi ġaiagoto Iakobo ġitaġitana; ma rubu ġorikauna tarimari mabarari tu monai vegogotaġo.

19 Paulo na evaġa-namorito murinai, ġia ġena ġauvei ġenana Barau na irau bese tarimari kamasi eveirito-ġoi variri mabarari ġeri ekiraġito.

20 Ġia na ġeseġaġiato nai, mabarari na Barau ġevaġa-raġeato. Benamo ġia na Paulo ġekiraiato, ġekirato, "Tarikakama, oġitaiani Iuda tarimari vira-tausen varau Iesu ġeġabidadama-viniani, ema taravatu maki ġekorana-iaġi ġigitariani.

21 Ġoi varimu tu ġia ġekira-vararito. Ġekirarito, ġoi na irau tano ai ġetanuni Iuda tarimari mabarari ovaġa-ribarini, okirani, Mose ġena taravatu beġene raga-kwaneana, naturi merori tauġaniri kefiru asi beġene lama-vagi, ema Iuda seneri ġeri veġa asi beġene korana-iaġiri.

22 Be, ġai tu kamasi toma ġaveini? Ġoi boma raġasi varina tu beġe seġaġiani veġata.

23 Moġa lorinai kara baġa kiravara-vinimuni veġana bono veia. Tauri vasivasi (4) maiġeri, ġia tu kiragitore gwaġiġina ta ġeveiato Barau ġenai.

24 Ġia ġesi boġono iaġo, e ġoi maki ġia ġesi boġono veiareva, ema beġe ġwa-iaġoni dagarari voiri bono vei, be ġia debari beġe rarorini. Maiġesi

boveini vau, tarimarima mabarari beġe ribani, ġoi iatamu ai ġekiraġirito-ġoi guruġari mabarari tu asi moġoni, a ġoi tauġemu maki Mose ġena taravatu ilailanai otanuni.

²⁵ Irau bese ġeveġabidadamani tarimari tu ġeri fefa varau ġatuġuto, ġakirarito, kwaivakuku ġevinirito ġaniġaniri tu asi beġene ġaniri, rara e ġaiġori na ġebora-maserini bureġari viriġori tu asi beġene ġani, ema asi beġene mata-boraġa.”

²⁶ Benamo Paulo na mo tarima vasivasi evaġa-ġabirito, benamo elaġanito nai, mabarari veiareva ġauveina ġea veiato. Moġa murinai Rubu Veaġai eraka-toġato, ma aitoma veiareva bemagoni ġarona, ema aitoma varevare dagarari ġia tata arari ai betoreni ekiraġi-foforirito.

Iuda tarimari na Paulo Rubu Veaġai ġeġabi-tariato

²⁷ Ġeri veiareva ġauveina tu ġaro imaima ruarua (7); dori ġekorito nuġanai, Iuda tarimari kotari Asia tanona na ġeaiġomato, ġia na Paulo Rubu Veaġai ġeġitaiato. Ġia na tarimarima mabarari nuġari ġeġanirito, benamo Paulo ġeġabi-tariato,

²⁸ ġekoġoto, ġekirato, “Isaraela taumi, ġai ġovaġa-kavama! Mai tarima maġa tu gabu mabarari ġari eiagoni, tarimarima mabarari evaġa-ribarini; Isaraela tarimari, e Mose ġena taravatu, ema mai Rubu Veaġa asi beġene korana-iaġia etoni. Toma maki, ġia na Grik tarimari mai Rubu Veaġa nuġanai beġori-toġari, mai gabu veaġana bevaġa-rakavaia.”

²⁹ Moġesina ġekirato, korana ġia na Efeso tarimana arana Trofimo, Paulo ġesi mo vanuġa baregonai ġeġitarito, ema ġetuġamaġito, ġia tu Paulo na Rubu Veaġai eġori-toġaiato.

³⁰ Vanuġa mabarana iauvoiauvo e daradara na eġabiato, ema tarimarima mabarari monai ġema ġaru-vegogoto, benamo Paulo ġeġabi-tariato, Rubu Veaġa na ġeinu-rosiato. Asikauna Rubu Veaġa ġatama-bokari ġebiririto.

³¹ Ġia na Paulo ġevaġi-masea ġetato-ġoi nuġanai, tarima ta eraga-varaġeto, Roma vetari verena baregona ea kira-varaiato, Ierusalem mabarana tu gururaġe baregona ġeveiani.

³² Ġia tu asikauna ġena vetari ġitaġauna tarimari e vetari tarimari eġoririto, benamo ġeraga-riġoto mo ġutuma-bara ġeri ai. Tarimarima na vetari verena baregona ma ġena vetari tauri o soldia ġesi ġeġitarito nai, ġia na Paulo kwarikwarina ġevaġa-dokoato.

³³ Benamo vetari verena baregona Paulo ġenai eiāġoto, eġabiato, ġena mero ekirarito, seini ruarua na beġene baru-taria. Benamo evedanaġito, ekirato, “Mai tu kamara tau, e ġia tu kara beveia?”

³⁴ Mo ġutuma-bara nuġanai tari ġefararato-ġoi; guruġa ta ġekiraġiato-ġoi, ma kotari na tu guruġa ta, be vetari verena baregona na maki guruġa roroġotona ta asi eġabiato. Moġa lorinai ġena mero ekirarito, Paulo tu vetari tarimari ġeri gabu ġana beġene ġori-iaġoa.

³⁵ Raġekau ai ġeġori-votuato nai tu, vetari tarimari na ġefaġa-vaisiato, ġeġwa-raġeato, korana mo tarimarima mabarari tu ġeniara-lelevaġito nai.

³⁶ Mo tarimarima mabarari ġia murina na ġeraka-iaġoto tu, ġefararato-ġoi, ġekirato, “Ġovaġi-masea!”

Paulo tauġena evelauġau-tovoto

³⁷ Dori moġo vetari tarimari ġeri numai ġeġori-toġaiato nuġanai, Paulo na vetari verena baregona evaġa-guruġaiato, ekirato, “Bavaġa-guruġamuni lorinai ba?” Ġia na evaġa-veiseato, ekirato, “Goi Grik ġeri garo ma ribamu?”

38 Be ġoi tu dia mo Aigupito tarimana, ġaro kotari varau beġe iaġo, ġia na gavamani vevaġi-vinina esinaiato, ema vaġideba tarimari daġara vasivasi (4,000), ma ġeri vevaġi farefareri ġesi, tano fakana ġana eġori-iaġorito tarimamu?”

39 Paulo na evaġa-veaseato, ekirato, “Au tu Iuda tarimagu, amaġurito vanuġana baregona arana tu Taso, ma arana vanuġana, ġia Kilikia tanonai. Anoġimuni, mani ġemu veġa, mai tarimarima navaġa-guruġari.”

40 Vetari verena baregona na maoro eviniato, benamo Paulo raġekau ai eruġato, ġimana na tarimarima elau-taririto. Gururage emagoto, benamo Paulo na Heberu garo ai evaġa-guruġarito.

22

1 “Tarikakagu e tamagu mabarami, ġoirami ai navekiraġi-faka, be boġono seġaġi.”

2 Ġia ġeseġaġiato, Heberu garo ai evaġa-guruġarito nai, asi gurugururi ai ġeiaġoto, mabarari ġeseġaġi-magomagoto; benamo Paulo ekirato:

3 “Au tu Iuda tarimagu, Taso vanuġana Kilikia tanona nuġana amaġurito, senaġi mai Ierusalemā vanuġa barana abaregote. Gamaliel ġena vevaġa-riba nuġana atanuto-ġoi, ġia na ġita senera ġeri taravatu veġari gwaġiġiri evaġa-ribaguto-ġoi, ema Barau ġena ġauvei aveiato-ġoi ma kokoregu ġesi, toma ġomi na ġokokore-iaġiani ilailana.

4 Au na mai dabara ġekorana-iaġiato-ġoi tarimari tu avaġa-midigu midigurito-ġoi mo ġea maseto-ġoi. Tau e vavine aġabirito-ġoi, dibura numari ai abubu-toġarito-ġoi.

5 Rubu Veaġa verena baregona e kanisoro tarimari mabarari na maki beġe vaġa-moġoniguni, au tu moġoni akirani. Au tu ġia na maki fefa ġeviniguto, tarikaka Iuda tarimari Damaseko ai ġeri bana viniri ġana. Benamo au mo ġana aiaġoto, mai tarimarima bana ġabiri, seini na bana barubaruri ma Ierusalemā ġana bana ġori-iaġori, ġeri rakava voiri beġene ġabiri ġana.”

Paulo ġena vetuġamaġi-kure ekiraġiato

6 “Au roġo dabara na aiaġoto-ġoi, ma Damaseko akavinaġiato, ġaro tu tubuagu ai mama baregona ta guba na emariġoto, asikauna ema nanagi-tariguto.

7 Au tano ai aketo-tarito, ema garo ta aseġaġiato, au evaġa-guruġaguto, ekirato, ‘Saulo! Saulo! Karase nai au ovaġa-rakavaguni?’

8 Benamo au avedanāġito, akirato, ‘Vereġauka, ġoi tu deikara?’ Ġia evaġa-veseto, ekirato, ‘Au tu Iesu, Nasareta tarimagu, ġoi na ovaġa-rakavaguni tarimagu.’

9 Au karogu maki na mama ġeġitaġiato, benamo ġegarito, senaġi au eguruġa-viniguto garona tu asi ġeseġaġiato.

10 Benamo avedanāġito, akirato, ‘Vereġauka, au tu kara toma aveiani?’ Vereġauka evaġa-veseto, ekirato, ‘Novariġisi, Damaseko ai noa raka-toġa, monai vau ta na bevaġa-ribamuni, ġoi tu kara boveini.’

11 Mo mama baregona na matagu evei-bubuato, benamo karogu na ġimagu ai ġeġabito, Damaseko ġana ġeġori-iaġoguto.

12 Monai tau ta arana Anania, ġia tu Barau garina eveito-ġoi e taravatu ekorana-iaġiato-ġoi tarimana, ema Iuda tarimari mabarari Damaseko ai ġetanuto-ġoi na ġegubakau-baregoato-ġoi.

13 Ĝia eiaĝomato sevigu ai ema ruĝa-tarito, benamo ekirato, ‘Saulo tarikakagu, matamu ma nefafa.’ Asikauna moĝo matagu ĝefafato, ĝia aĝitaiato.

14 Moĝa murinai Anania na ekiraguto, ekirato, ‘Ĝita senera ĝeri Barau na varau beĝabi- viriĝimu, ĝia ĝena ura kara bono veia, bono ribaia. Ema vei iobukaiobuka tarimana bono ĝitaia, e ĝia tauĝena muruna na beguruĝani garona bono seĝaĝia.

15 Korana ĝoi tu ĝia bovaĝa-moĝoniani tarimamu, kara boĝita e boseĝaĝi maĝeri, tarima mabarari bokira-vararini.

16 Kara ma ovaĝa-nogaiani? Novariĝisi, babatiso noĝabia. Ĝia arana nokea-raĝea, benamo ĝemu rakava neĝurigi-vaĝiri.’ ”

Paulo ĝena kea irau bese tarimari bene ĝobata-viniri ĝana

17 “Monana Ierusalemna ĝana aĝenoĝoito, benamo Rubu Veaĝai aĝuriguĝurito-ĝoi nuĝanai, amata-vanaĝito.

18 Monai au na Vereĝauka aĝitaiato, au evaĝa-guruĝaguto, ekirato, ‘Noraga-vei, Ierusalemna noragakwane-ĝarimoĝia, korana mainai au varigu bokiraĝiani, senaĝi mai tarimarima na asi beĝe vaĝa-moĝonimuni.’

19 Au na avaĝa-veŝeato, akirato, ‘Vereĝauka, ĝia tu ma ribari ginikau, au rubu mabarari ĝana aiaĝoto-ĝoi, ĝevaĝa-moĝonimuni tarimari aĝabirito-ĝoi, dibura numanai abiri-ĝaurito-ĝoi e akwaririto-ĝoi.

20 Ema ĝoi evaĝa-moĝonimuto-ĝoi tarimana Stefano rarana ĝevaĝa-riĝoato ĝaronai au tu monai, ĝevaĝi-maseato avaĝa-moĝoniato, ema ĝevaĝiatio-ĝoi tarimari ĝeri dabuĝa anaririto.’

21 Senaĝi Vereĝauka na ekiraguto, ekirato, ‘Noiaĝo, korana au na batuĝumuni, irau bese tarimari gabu manaĝai ĝetanuni tarimari ĝeri ai.’ ”

22 Tarimarima na Paulo ĝeseĝaĝi-taĝoato-ĝoi, eiaĝoto mo, ĝia moĝesi eguruĝato. Benamo ĝefararato, ĝekirato, “Ĝoĝabi-fitoĝaia! Ĝovaĝi-masea! Ĝia tu asi ĝena namo ta emaĝuri-taĝoni mai tanobarai.”

23 Ĝeĝabato-ĝoi, ĝeri dabuĝa ĝeave-iaverito-ĝoi, e forara ĝefiu-vaisito-ĝoi.

24 Roma ĝeri vetari verena baregona na ĝena mero ekirarito, Paulo beĝene ĝori-iaĝoa, vetari tarimari ĝeri tanu gabuna ĝana. Ema ekirarito beĝene kwaria, e beĝene danaĝia kara ĝaramanai ĝia moĝesi ĝeĝabaĝaba-viniani, bene kira-varari.

25 Senaĝi ĝebarubaruato-ĝoi beĝene kwaria ĝana nuĝanai Paulo na vetari ĝitaĝauna tarimana ekiraiato, ekirato, “Mai moĝoni taravatu nuĝanai ekiraĝiani, ĝoi na Roma tarimana bokwari-guinea; a ĝia na kara bevei-leaia Kota na tu roĝosi bere kira-varaia, senaĝi?”

26 Mo vetari ĝitaĝauna tarimana na mo guruĝa eseĝagiato, benamo eraga-iaĝoto vetari verena baregona ĝenai, ekiraiato, ekirato, “Goi tu kara toma oveiani? Mo tarima tu Roma tarimana!”

27 Moĝa lorinai vetari verena baregona eiaĝoto Paulo ĝenai, benamo ea danaĝiatio, ekirato, “Nokira-varagu, ĝoi tu Roma tarimamu ba?” Paulo evaĝa-veseto, ekirato, “Oi.”

28 Benamo vetari verena baregona ekirato, “Au Roma tarimagu ai aiaĝoto tu moni baregona gavamani avinirito.” Paulo evaĝa-veseto, ekirato, “Senaĝi au tu Roma beseri ĝerina aĝorato Roma tarimagu.”

29 Asikauna Paulo beĝe danaĝiani tarimari ĝeruĝa-ĝenoĝoito, ema vetari verena baregona maki egarito, korana eriba-maoroto, Paulo tu Roma tarimana, ĝia na ebarubaruato ĝekwaria ĝana.

Paulo kanisoro ĝoiranai

³⁰ Ma elaĝanito, vetari verena baregona ĝena ura bene riba-maoro, kara dainai Iuda tarimari na Paulo ĝevaĝa-daĝaiato. Moĝa lorinai ĝia na Paulo ĝebaruato varori ĝeruĝarito, benamo Rubu Veaĝa vereri baregori e kanisoro mabarana ekirarito beĝene vegogo. Benamo ĝia na Paulo eĝori-iaĝoato, ĝia ĝoirari ai ea vaĝa-ruĝaiato.

Paulo Iuda ĝeri kanisoro tarimari ĝoirari ai

23

¹ Paulo na kanisoro tarimari eĝita-karakararito, benamo ekirato, “Tarikakagu mabarami! Au tu ma nuĝa iobukaiobukagu ĝesi Barau ĝoiranai atanuni, beiaĝoma mo initoma.”

² Paulo moĝesina eguruĝato nai tu, Rubu Veaĝa verena baregona Anania na Paulo sevinai ĝeruĝa-taĝoto-ĝoi tauri ekirarito, Paulo bokana beĝene foro-ĝaau.

³ Benamo Paulo na ekiraiato, ekirato, “Ĝoi tu Barau na beforomuni, ĝoi kobe ĝevaĝa-kurokuroato kavana, rakava asi beĝene ĝitaia ĝana, ĝofaĝofa tarimamu! Ĝoi maninai botanu tu taravatu ilailanai au okota-viniguni, senaĝi ĝoi tauĝemu na taravatu boleiaia, tarima bokirari, au ĝeforogu bosil!”

⁴ Paulo sevina tauri na ĝekiraiato, ĝekirato, “Ĝoi tu Barau ĝena Rubu Veaĝa verena baregona ĝenai guruĝa rakavari okiraĝini!”

⁵ Paulo evaĝa-veseto, ekirato, “Tarikakagu, au tu asi bariba-maoro ĝia tu Rubu Veaĝa verena baregona. Korana ribagu Buka Veaĝai tu ekirani, ‘Gomi ĝemi vere tu asi boĝono guruĝa-rakava vinia.’”

⁶ Paulo na ĝia tari eĝitarito tu Sadukea tarimari, ma kotari tu Farisea tarimari, benamo kanisoro ĝoiranai ekoĝoto, ekirato, “Tari-kakagu, Isaraela tarimami, au tu Farisea tarimagu, Farisea tarimana natuna. Au tu vevaĝa-kota gabunai maiĝegu, korana au ĝegu tuĝamaĝikau, mase tarimari tu ma beĝe varigisi-ĝenoĝoini!”

⁷ Moĝesi ekirato, benamo Farisea tarimari ema Sadukea tarimari ĝeveĝare-veĝareto, ema ĝeri vegogo maki evetavi-kirato.

⁸ Korana Sadukea tarimari ĝekirani, tarimarima mase na tu asi ma beĝe varigisi-ĝenoĝoini, ema aneru e iauka tu asi ĝetanuni; a Farisea tarimari na moĝeri mabarari tu ĝevaĝa-moĝonirini.

⁹ Moĝesina naima fararafarara guruna ebaregoto-ĝoi, nuĝanai taravatu ĝevevaĝa-riba iaĝiato-ĝoi Farisea tarimari ĝeruĝa-vaisto, ma kokoreri ĝesi geguruĝato, ĝekirato, “Mai tarima ĝenai rakava ta tu asi bita doĝaria! Bema ĝia tu iauka na o aneru ta na moĝoni bevaĝa-guruĝaia nai tu, Barau asi sivaĝa-vevaĝia!”

¹⁰ Veĝareveĝare eseĝuka-ĝaraĝarato nai, vetari ĝitaĝauna tarimana baregona egarito, Paulo beĝe inu-vedare vedareani garina. Moĝa lorinai ĝena vetari tauri ekirarito, beĝene rakariĝo-iaĝo, Paulo beĝene ĝabi-veĝitaia Iuda tarimari fakari na, benamo vetari tauri ĝeri numa ĝana beĝene ĝori-iaĝoa.

¹¹ Ma elaĝanito boĝinai, Vereĝauka Paulo sevinai ema ruĝa-tarito, benamo ekirato, “Ĝoi na mai Ierusalemaj au okiraĝi-foforiguto ilailanai, Romaj maki moĝesi bonoa kiragi-foforigu.”

Paulo vaĝivaĝina boioĝana ĝetogato

12 Ma elagānito boḡiboginai, Iuda tarimari kotari ḡevegogoto, ma boioḡa ta ḡetogaiato. Ġia na kiraḡitore guruḡana gwaḡiḡina ḡekiraḡiato, ḡekirato kara ta asi beḡe ḡaniani e asi beḡe niuani, beiaḡoni mo, Paulo beḡe vaḡiani.

13 Mo boioḡa ḡetoga-vegogoto tauri mabarari tu gabana vasivasi (40) maki evanaḡiato.

14 Benamo ḡeiaḡoto Rubu Veaḡa vereri baregori e Iuda vereri ḡeri ai, ma ḡea kirato, ḡekirato “Ġai tu kiraḡitore guruḡana gwaḡiḡina baḡa kiraḡia, asi baḡa ḡaniḡanini, beiaḡoni mo, Paulo baḡa vaḡi-maseani.

15 Maitoma ḡoi ma kanisoro ḡesi noḡinoḡi guruḡana ḡotuḡu-iaḡoa, Roma ḡeri vetari verena baregona ḡenai, be Paulo ḡomi ḡemi ai bene tuḡu-mariḡoa, boḡono ḡofa-ḡaua, boḡono kira, ḡomi na Paulo ḡoura-viniani, korana ḡia ḡenana guruḡa iobukana boḡono ḡabia ḡana. Senaḡi ḡai tu baḡa vaḡa-noga-taḡoni, mainai roḡosi berema raḡasi, a ḡai na tu baḡa vaḡi-maseani.”

16 Senaḡi Paulo tobana natuna merona na mo boioḡa eseḡaḡi-kauato, benamo eiaḡoto, vetari tauri ḡeri numai eraka-toḡato, ma Paulo ekiravaraiato.

17 Benamo Paulo na vetari ḡorikauna tarimana ta ekeaiato, benamo ekiraiato, ekirato, “Mai mero variḡuna vetari verena baregona ḡenai noḡori-iaḡoa. Korana ḡia na ḡena guruḡa ta beḡwa-iaḡomaia, bene kira-varaia.”

18 Ma vetari ḡorikauna tarimana na eḡori-iaḡoato vetari verena baregona ḡenai, ekirato, “Dibura numanai tarimana, Paulo na bekeagu e benoḡigu, mai mero variḡuna ḡoi ḡemu ai bana ḡori-iaḡomaia, korana ḡia na ḡemu guruḡa ta beḡwa-iaḡomaia, bene kira-varamu ḡana.”

19 Vetari verena baregona na ḡimanai eḡabito, eḡori-ḡerevaḡiato vauro, edanaḡiato, ekirato, “Kara ourani ḡegu nokiraḡia?”

20 Ġia ekirato, “Iuda tarimari na guruḡa ta beḡe vaḡa-moḡonia, boinani beḡene vei-ḡofakau, benamo ḡoi beḡene noḡimu, be Paulo bono tuḡu-variḡoa kanisoro ḡoirana ḡana. Ġeri veḡofaḡau guruḡana ḡoi beḡene kiramu tu, ḡia ḡeri ura Paulo varina korikori kotari ma beḡene ḡabi.

21 Senaḡi asi bono seḡaḡi-viniri, korana tau mabarari gabana vasivasi (40) bevanaḡia tu beḡe gumuni, ḡia beḡe vaḡa-nogaiani. Ġia tu kiraḡitore guruḡana gwaḡiḡina ḡekiraḡiato, asi beḡe ḡaniḡanini e dagara ta asi beḡe niuani, beiaḡoni mo, Paulo beḡe vaḡi-maseani. Mo veiḡa beḡene veia ḡana, ḡia toma tu beḡe veikavi, ḡoi ḡemu vaḡa-veḡe moḡo ḡevaḡa-noga taḡoani.”

22 Vetari verena baregona na ekiraiato, ekirato, “Au ḡegu bokiraḡi guruḡana maiḡa, tarima ta asi ma bonoa kira-varaia.” Benamo ḡia na mero variḡuna etuḡu-rakaiato.

Paulo Gavana Feliki ḡenai etuḡu-iaḡoato

23 Benamo vetari verena baregona na ḡena vetari ḡorikauna tauri ruarua ma ekearito, benamo ekirarito, ekirato, “Vetari tauri sinau ruarua (200), e hosi ai raḡe tarimari gabana imaima ma gabana ruarua (70), ema auri fiu tauri sinau ruarua (200) boḡono ḡabi-toreri, toma boḡi horaḡauna 9 koloko Kaisarea ḡana boḡono iaḡo ḡana.

24 Paulo bene raḡe hosiri tari maki boḡono rovina-toreri, be Gavana Feliki ḡenai maḡuri boḡono ḡori-iaḡoa ḡana.”

25 Benamo vetari verena baregona na fefa ta maiḡesina etoreato:

26 “Au Klaudia Lisia na ḡoi Feliki, gavana tarimamu namo vedaureamu, atore-vinimuni: Avaḡa-namomuni!

²⁷ Iuda tarimari na mai tau ġeġabiato, ma dori moġo ġevaġi-maseato. Senaġi au aribato, ġia tu Roma tarimana naima ġegu vetari tauri ġesi ġiaġato, ġavaġa-maġuriato.

²⁸ Au aurato tu bana riba, kara koranai ġevaġa-daġaiato-ġoi, moġa lorinai aġori-varigoato, ġeri kanisoro ġoirana ġana.

²⁹ Au na adoġariato tu ġia ġeri taravatu ġaramanai ġevaġa-daġaiani, senaġi ġia beġene vaġi-masea o dibura numanai beġene torea korana ta tu asi adoġariato.

³⁰ Iuda tauri na beġene vaġi-masea ġana, boioġana ġetogato varina ġegu ġekiraġito nai, atuġamaġito, ġoi ġemu ai bana tuġu-iaġosia. Ġia ġevaġa-daġaiani tarimari maki akirarito, ġoi ġoiramu ai ġeri vevaġa-daġa guruġari beġene kiraġiri.”

³¹ Vetari tauri na ġekirarito veigana ġeveiato. Mo boġi, ġia na Paulo ġeġabi-iaġoato mo Antipatri.

³² Elaġanito vau, vetari tauri kwakuri na ġerakani tauri ġeri tanu gabuna ġana ġeġenoġito. Hosi tauri moġo Paulo ġesi ġeiaġoto.

³³ Kaisareai ġea raġasito, benamo fefa ġeġabiato, gavana ġeviniato, ema Paulo maki ġevini-vanaġiato.

³⁴ Gavana na fefa eiaviato, benamo Paulo edanaġiato, ġia tu kamara gabu tarimana. Ġia eribato Paulo tu Kilikia tarimana nai,

³⁵ ekirato, “Ġevaġa-daġamuni tarimari beġema raġasini vauro, kara oveileaiato guruġana au na baseġaġimuni.” Benamo gavana ekirato, Paulo beġene ġabi-iaġoa, Kota numanai beġenea ġita-ġaua. Mo Kota numana tu Heroda na maġurinai eraiato.

24

Iuda tarimari na Paulo ġevaġa-daġaiato

¹ Ġaro imaima ġekorito murinai, Rubu Veaġa verena baregona, Anania, Kaisarea ġana evariġoto, Iuda vereri kotari e taravatu ma ribana tarimana ta arana Teretulo ġesi. Mabarari ġevariġoto, Gavana Feliki ġoiranai vauro Paulo ġevaġa-daġaiato guruġana ġea kiraġiato.

² Paulo ekea-toġaiato, benamo Teretulo na Paulo ġevaġa-daġaiato guruġana ġoiranai ekiraġirito, ekirato, “Namo vedaurea veremu Feliki! Goi ġemu veġitaġau gaburenai tu maino ai baġa tanu-mauka kenene, e ġema bese bene namo ġana, dagara namori vovoka bovaġa-varigu ġenoġoiri.

³ Mai tu gabu mabarari ai e ġaro mabarari ai ġai na ġaġabi-raġeani, moġa lorinai ġoi tu ġavaġa-namo baregomuni.

⁴ Au asi aurani, ġoi ġemu taimi bana vaġa-kori-kavaia, senaġi anoġimuni, novetuġa-ġwama, asi bono baru, be ġema guruġa kubina tu noseġaġia.

⁵ Ġai na mai tau ġadoġariato tu, rakava vaġa-ġorana tarimana, ġia na gururaġe barego evaġa-ġorarini, Iuda tarimari tano mabarari ai ġetanuni fakari ai. Ġia tu Nasareta doġorona ġeri veġorikau tarimana ta.

⁶ Ġia na tu Rubu Veaġa maki nevaġa-rakavaia etato, senaġi ġai na ġaġabitarato, [ġema taravatu ilailanai baġana vaġa-kotaia ġatato.

⁷ Senaġi vetari verena baregona, Lisia, ema raka-toġato, benamo ma ġaramana ġesi Paulo ġai ġimama na ema ġabi-veġitaiato.

⁸ Benamo Lisia ġena guruġa ilailanai, ġia vaġa-daġana tarimari tu ġoi ġoiramu ġana beġe iaġoma.] Goi tauġemu na ġia bodanaġi-ginikauani vauro, ġia ġavaġa-daġaiani dagarari mabarari tauġena na bekira-varamuni.”

⁹ Iuda tarimari maki ġia ġesi ġekauto, ġekirato mai bekiraġiri dagarari mabarari tu moġoni.

Paulo ġena vetoreġau guruġana Feliki ġoiranai

¹⁰ Gavana na Paulo vetoġa ta evei-viniato Paulo ma bene guruġa ġana, benamo Paulo eguruġato, ekirato, “Au ribagu, laġani ġutuma varau beġe iaġo, ġoi tu mai bese tarimari ġeri Kota ġitaġauna ġauveina oveiani. Moġa lorinai au tu ma iakugu ġesi ġegu vetoreġau guruġana ġoi ġoiramu ai akiraġiani.

¹¹ Ġoi tauġemu na maki asikauna boraga-doġariani, ġaro gabanana ruarua (12) maki roġosi bene vanaġia nuġanai, au tu Ierusalemata ġana toma-rakariġo avaraġeto.

¹² Ma mai au ġevaġa-daġaġuni tarimari na ta ġesi Rubu Veaġai ġaveġare-veġareto-ġoi nuġanai asi ġedoġariguto, ema asi ġedoġariguto tarimarima avaġa-vegogorito rubu nuġanai o gabu tai vanuġa baregona nuġanai.

¹³ Ema mai ġevaġa-daġaġuni dagarari maki ġoi ġoiramu ai asi beġe vaġa-moġonirini riba.

¹⁴ A mai tu moġoni akirani, au na tu ġai senema ġeri Barau atoma-rakariġo viniani e mo Dabara Variguna akorana-iaġiani, ma mai dabara ġia tauġeri na tu dabara ġofaġofana ġetoni. Mose ġena taravatu ema peroveta tarimari na ġetorerito guruġari mabarari tu avaġa-moġonirini.

¹⁵ Au ġegu tuġamaġikau Barau ġenai e mai tau ġeri tuġamaġikau tu sebona moġo, moġa tu maigesi: Vei-iobukaiobuka tarimari e vei-rakava tarimari mabarari mase na ma beġe variġisi-ġenoġoini.

¹⁶ Moġa lorinai au tu vanaġivanaġi nuġagu bene iobukaiobuka vededeg-wana aveini Barau ġoiranai e tarimarima ġoirari ai.

¹⁷ Laġani kota vovoka varau ġeiaġoto, au na Ierusalemata araga-kwaneato. Moġa murinai au ma baġenoġoi-iaġo ġegu tarimarima ġeri ai, asi ġeri-ġari tarimari ġeri moni baġabi-iaġo e varevare dagarari Barau bana vinia ġana.

¹⁸ Ma au tu taravatu na ekiraġiani ilailanai veiareva veiġana avaġa-koriatu nuġanai, Asia tanona na ġeiaġomato Iuda tauri kotari na Rubu Veaġa nuġanai ġedoġariguto. Moġa nuġanai au sevigu ai tu ġutuma-barana ta asigi, e ta ġesi maki asi aveġare-veġareto-ġoi.

¹⁹ Moġeri Iuda tarimari Asia tanona na ġeiaġomato beġere iaġoma, be ġoi ġoiramu ai au beġerema vaġa-daġagu, beġere kira-varamu, au na tu kamara rakava aveiato.

²⁰ A mai tarima maigeri na ġekiraġi-foforia, au kanisoro ġoiranai aruġato ġaronai, au ġegu ai tu kamara rakava ġedoġariato.

²¹ Senaġi dagara sebona moġo tu, ġia ġoirari ai aruġato, afararato, akirato, ‘Mase tarimari ma beġe variġisi-ġenoġoini atoni naima, ġomi na au toma ġovaġa-kotaġu ġotoni.’”

²² Mo Dabara, (mai tu Iesu Keriso ġabidadama-vinina dabarana), Feliki tu ma eriba-ginikauato. Ġia na Kota ma etuġu-naġiato, ekirato, “Vetari verena baregona, Lisia, beraġasini vau, au na ġomi ġemi guruġa bavei-roroġotoni.”

²³ Benamo ġia na vetari ġitaġauna tarimana ekiraiato, Paulo dibura numanai beġene ġita-ġaua, senaġi ġitaġauna asi beġene vei-gwaġiġia. Ġatana kotari na ġevaġa-kavaia beġe toni nai tu beġene ġabi-raġeri.

²⁴ Ĝaro kotari ĝeiaĝoto muriri ai, Feliki ma ĝaraĝona Drusila ĝesi ĝeraĝasito. Drusila tu Īuda vavinena. Feliki na Paulo vetuĝuna eveito, benamo Paulo eiaĝomato, Iesu Keriso gabidadama-vinina guruĝari ekiraĝirito eseĝaĝiato.

²⁵ Senaĝi Paulo ĝena sisibai tu vei-iobukaiobuka e vevaĝa-gwaĝiĝi ema Barau ĝena Kota baregona beiaĝomani guruĝari ekiraĝirito nai, Feliki egarito, benamo ekirato, “Benamo, toma tu noraka roĝo, ĝaro namona tai vauro ma bana kea-iaĝomamu.”

²⁶ Feliki ĝena tuĝamaĝi ta maki, Paulo na moni kota bene vinia. Moĝa lorinai ma ekea-ĝenoĝoi ĝenoĝoiato-ĝoi, ĝia ĝesi beĝene guruĝa-guruĝa ĝana.

²⁷ Laĝani ruarua murinai, Porokio Festo na Feliki ĝena gavana ĝauveina gabuna eĝabiato. Senaĝi Īuda tarimari na beĝene ura-vinia ĝana, Paulo tu dibura numanai eraga-kwaneato.

25

Paulo Festo ĝoiranai

¹ Festo beveĝitaĝauni tanonai eraĝasito, ma ĝaro toitoi ĝekorito murinai, Kaisarea na Īerusalemna ĝana evaraĝeto.

² Monai Rubu Veaĝa vereri baregori e Īuda ĝitaĝauna tauri na Paulo ĝevaĝa-daĝaiato guruĝari ĝea kiraĝirito, ma Festo ĝenoĝiato,

³ ĝia bene vaĝa-kavari, be Paulo Īerusalemna ĝana bene tuĝu-iaĝoa. Korana Paulo dabara tumanai beĝene gana-torea ma beĝene vaĝi-masea bioĝana tu varau ĝetogaĝiato-ĝoi.

⁴ A Festo evaĝa-veseto, ekirato, “Paulo tu Kaisareai moĝea, dibura numanai ĝeĝita-ĝauani, ma au tu mo ĝana dori ma aĝenoĝoi-iaĝoni.

⁵ Be ĝemi veĝitaĝau tarimari neĝi au ĝesi Kaisarea ĝana baĝana iaĝo, be monai kara evei-leaiato beĝene kiraĝia, bema ĝia na rakava ta eveiato nai tu.”

⁶ Festo ĝaro imaima toitoi (8) o gabanana (10) ĝia ĝesi monai ĝetanuto vauro, Kaisarea ĝana ma evariĝoto. Elaĝanito vau Kota gabunai ea tanutarito, benamo evetuĝuto, Paulo ĝoirana ĝana beĝene ĝori-iaĝomaia ĝana.

⁷ Paulo ema raĝasito nai tu, Īerusalemna na ĝeiaĝomato Īuda tarimari na ĝeruĝa-ĝeĝeraĝiato, benamo ĝevaĝa-daĝaiato guruĝari gwaĝiĝiri ĝutuma ĝekiraĝirito, senaĝina ĝeri guruĝa tu asi vaĝa-moĝoniri gaburi.

⁸ Benamo Paulo ma evaĝa-veseto, ekirato, “Īuda tarimari ĝeri taravatu, e Rubu Veaĝa, ema Roma verena vaĝa-rakavari ĝana, veĝa rakavana ta asi aveiato.”

⁹ Senaĝi Festo na Īuda tarimari bene vaĝa-iaĝuri ĝana Paulo edanaĝiato, ekirato, “Ĝoi ourani Īerusalemna ĝana bono varaĝe, be mai ĝevaĝa-daĝamuni ruĝari tu monai vau bana seĝaĝiri ba?”

¹⁰ Paulo evaĝa-veseto, ekirato, “Au tu Kaisara, Roma ĝeri vere, ĝena Kota gabuna ĝoiranai aruĝani, be mainai Kota na vevaĝa-iobuka veĝana au ĝegu ai bene veia. Au na Īuda tarimari vaĝa-rakavari veĝana ta tu asi aveiato, ĝoi taugemu maki ribamu ĝinikau.

¹¹ Bema taravatu asi akorana-iaĝiato o mase veĝana rakavana ta aveiato, voina tu bana mase neganai, au tu asi akira-sirivaĝini bana mase ĝana tuna. Senaĝi bema mai Īuda tarimari ĝeri vevaĝa-daĝa guruĝari au iatagu ai ĝekiraĝirini tu asi moĝoni nai, tarima ta asi ĝena seĝuka au bevini-vanaĝiguni ĝia ĝeri ai. Au aurani tu Kaisara na bene seĝaĝigu!”

12 Benamo Festo ma ġena kanisoro ġesi ġeguruġa-guruġato murinai, Paulo evaġa-veſeato, ekirato, “Kaisara ġenai bonoġinoġi lorinai, Kaisara ġenai boiaġoni!”

Paulo Agripa e Berenike ġoirari ai

13 Ġaro kotari ġevanaġito murinai, vere Agripa e tobana Berenike, Festo rakagitana e beġene vaġa-namoġa ġana, Kaisarea ai ġeraġasito.

14 Monai ġaro kota vovoka ġetanuto murinai, Festo na Paulo guruġana vere ġena ekiraġi-ginikauto, ekirato, “Tarima ta tu mainai maiġa. Ġia tu Feliki na dibura numai eraga-kwaneato.

15 Au Ierusalemata ġana aiaġoto nai tu, Iuda ġeri Rubu Veaġa vereri baregori e Iuda vereri na Paulo ġevaġa-daġaiato guruġari ġegu ai ġeġwa-iaġorito, e au ġenoġiguto, ġekirato, ġia ġenai vevaġa-iobuka veiġana bana veia.

16 Senaġi au na avavaġa-veserito, akirato, ‘Ġita Roma tarimara ġera maġuri nuġanai ġevaġa-daġaiani tarimana tu asi roġo bita vaġi-mase guineani. Ġia tu ġevaġa-daġaiani tauri ġesi beġe raka-vegogoni, ema ġevaġa-daġaiani tarimari ġoirari ai ġevaġa-daġaiani guruġari bevaġa-veſe ġuinerini roġo.’

17 Moġa lorinai ġia ema au mainai ġaraġasito nai tu, au tu asi ma avavaġa-nogato. Senaġi elaġanito nai, Kota gabunai atanu-tarito, benamo akirato, Paulo ġeġori-iaġomaia atato.

18 Vevaġa-daġa tauri ġeruġa-vaisito nai, au mataboru atuġamaġito tu, veia rakavari vevaġa-daġari beġe veini atato, senaġi asiġina.

19 Ġia ġeri ġuruġa mabarari tu, tauġeri ġeri toma-rakarigo dabarari veġare-veġareri kotari, ema tarima ta arana Iesu guruġana moġo. Iesu tu emase to, senaġi Paulo ekirani, ġia tu maġuri.

20 Mo dagara dabarari vetauvetauri au ġegu ai tu egwaġigito. Moġa lorinai au na Paulo adanaġiato, eurani Ierusalemata ġana bene iaġo ba, monai vau ġia ġevaġa-daġaiani guruġari bana vaġa-iobuka iobukari.

21 Senaġi Paulo enoġinoġito, dibura numanai moġo beġene ġita-ġaua, bene iaġo mo, Kaisara na vau bene seġaġia. Moġa lorinai akirarito, dibura numanai beġene ġita-ġaua, bene iaġo mo, Kaisara ġenai bana tuġu-iaġoa.”

22 Benamo Agripa na Festo ekiraiato, ekirato, “Au aurani mai tarima tauġegu na bana seġaġia.” Festo evaġa-veſeto, ekirato, “Boinani vau boseġaġiani.”

23 Elaġanito, benamo Agripa e Berenike tu ġeveġabi-raġeto, dabuġa marevari maki barego lelevaġiri ġeveirito, benamo ma marevari ġesi Kota numanai ġema raka-toġato, vetari ġorikauna tarimari baregori e vanuġa barana tarima baregori ġesi. Festo eguruġato, benamo Paulo ġema ġori-toġaiato.

24 Benamo Festo ekirato, “Kini Agripa e ġai ġesi boġoma fofori tarimami mabarami! Mai tau maiġa ġoġitaiani. Ġia tu Iuda tarimari Ierusalemata e mainai Kaisareai maiġeri na ġevaġa-daġaiato guruġana au ġegu ai ġeġwa-iaġoato. Ġia ġekoġoto, ġekirato, ġia tu asi ma bene maġuri-iaġo.

25 Senaġi ġia ġenai veia ta asi adoġariato bene mase ġana. Ma ġia tauġena, Kaisara arana enoġinoġito. Moġa lorinai, ġia tu Kaisara ġenai bana tuġu-iaġoa atato.

26 Senaġi au tu asi ariba-ginikauni, ġita ġera vere barana ġenai feſa tu kamasi batoreani. Moġa lorinai ġomi ġoirami ġana baġori-iaġomaia, e namo barana tu, ġoi ġoiramu ġana, Kini Agripa. Be mainai sidanaġi-ginikaua, be

mai vetauvetauna kara bitana doġaria guruġana tu Kaisara ġena bana tore-iaġoa.

²⁷ Korana au atuġamaġini tu asi roroġoto, mai dibura tarimana au na batuġu-iaġoani, a vaġa-daġana guruġana tauna korikori tu asi batuġu-kauani.”

26

Paulo tauġena vetoreġau guruġari ekiraġirito Agripa ġoiranai

¹ Agripa na Paulo ekiraiato, ekirato, “Maoro avinimuni, tauġemu nove-varifu.” Benamo Paulo ġimana eġabi-vaisiato, benamo ġena vetoreġau guruġari esinaiato, ekirato:

² “Kini Agripa! Au tu aiakuni, korana Iuda tarimari na ġevaġa-daġaguni dagarari mabarari tu, toma ġoi ġoiramu ai avaġa-veserini.

³ Korana tu Iuda seneri na veġata ġeri veġa e veġareveġare mabarari ġoi tu ma ribamu ginikau. Moġa lorinai anoġimuni, bono vevaġa-gwaġiġi, be ġegu guruġa bono seġaġiri.

⁴ Au aiġesi atanuto, misigu na veġata eiaġomato mo toma, ġegu tanobarai e Ierusalem, Iuda tarimari mabarari tu ma ribari.

⁵ Au tu tovotovona na veġata ġeribaguto, ġeguruġa-fofori bema ġeurani nai tu. Ġegu maġuri evesinato na veġata au tu Farisea doġorona tarimagu. Toma-rakarigo korana-iaġina ġevaġa-gwaġiġiani doġorona.

⁶ Ma toma au Kota gabunai bama ruġa, korana tu Barau na ġai senema ekira-torerito guruġana atuġamaġi-kauani nai.

⁷ Ġai ġema doġoro gabanana ruarua (12) na mo guruġa-tore ġevaġa-moġoniani, ma ġenari-taġoani bemoġonini naima, ġia na Barau ġetoma-rakarigoani boġi-laġani ma kokoreri ġesi. Vere o, au tu mo tuġamaġikau ġaramanai Iuda tarimari na ġevaġa-daġaguni.

⁸ Karase nai ġomi Iuda tarimami tari tu ġokirani, Barau na mase tarimana tu asi ilaila ma bevaġa-variġisiani?

⁹ Au maki atuġamaġito, dagara ġutuma gorogoro bana veiri, Iesu Nasareta tarimana arana bana lau-ġaua ġana.

¹⁰ Ierusalem, au tu moġesi aveito-ġoi. Rubu Veaġa vereri baregori na seġka ġeviniguto, benamo Barau ġena tarimarima veaġari ġutuma dibura numanai atorerito-ġoi, ema beġene vaġi-maseri ġetato-ġoi nai tu, au maki beġene mase guruġana avaġa-moġoniato-ġoi.

¹¹ Ġaro vovoka Iuda tarimari ġeri rubu tatai araka-toġato-ġoi, benamo akwari-korukorurito-ġoi, ema Iesu beġene kiraġi-rakavaia ġana avaġa-ururito-ġoi. Au na abaruvini-rakava rakavarito-ġoi, naima vanuġa baregori boruri ġari maki aiagoto-ġoi, bana vaġa-midigu midiguri e bana lai-lausilaisiri ġana.”

Paulo evetūamaġi-kureto varina

¹² “Mo veġa uranai Rubu Veaġa vereri baregori na maoro ġeviniguto ema ġetuġuguto, Damaseko ġana aiagoto.

¹³ Benamo, Verebara, au tu dabara na roġo aiagoto-ġoi, a ġaro tu tubuam, benamo ġaro mamana maki evanaġiato mamana, guba na emariġoto, aġitaiato, ma au ġesi ġaiagoto tarimari e au enanagi-tarimato.

¹⁴ Ġai mabarama tano ai ġaketo-tarito. Benamo au na garo ta aseġaġiato, Heberu garo ai au evaġa-guruġaguto, ekirato, ‘Saulo, Saulo! Karase nai au ovaġa-rakavaguni. Mani ġoi na tu ġau masikona matana ofudiani, naima ġemu ai tu gwaġiġi ema tauġemu ovevaġa-rakavani.’

15 Benamo au akirato, ‘Veregāuka, ġoi tu deikara?’ Veregāuka evaġa-veseto, ekirato, ‘Au tu Iesu, ġoi na ovaġa-rakavaguni tarimagu.

16 Senaġi novariġisi, ema noruġa-tari. Au ġoi ġemu ai bafofori korana tu navaġa-ruġamu, be au ġegu vetuġunaġi tarimamu ai bono iaġo ġana. Ema toma kara boġita dagarari e ġoirai kara bavaġa-ġitamuni dagarari maki tarima tari ġeri bonoa kirāġi-foforiri gana.

17 Au na Isaraela tarimari e irau bese tarimari ġerina bavaġa-maġurimuni. Ġoi tu au na atuġumuni,

18 matari bono vaġa-fafari, ema mukuna na bono ġori-kureri, be mamai beġene ruġa, ema Satani ġena seġuka na bono ġabi-vaġiri, be Barau rekenai beġene ruġa. Benamo Barau na ġeri rakava bene tuġamaġi-fitoġari ema Barau na eġabi-viriġirito ma evaġa-veaġarito tarimari ġesi gabu beġene ġauna, korana au ġegu ai ġeveġabidamani nai.’

Paulo na ġena ġauvei ekiraġiani

19 Moġa lorinai, Kini Agripa, au tu mo mata-vanaġi guba na ema foroforo dagarana ġenai tu asi akira-sirivaġito.

20 Guine tu Damaseko ai e Ierusalemaj aġobatato, moġa murinai Iudea tanona mabarani e irau bese fakari ai maki. Au aġobatato-ġoi nai tu, akirarito-ġoi, ġeri rakava ġerina beġene vetuġamaġi-kure, Barau ġenai beġene iaġo. Benamo ġeri vetuġamaġi-kure tu ġeri veiġa na beġene vaġa-moġoniri.

21 Mo tu moġa ġaramanai Iuda tarimari na Rubu Veaġa nuġanai ġeġabitariguto, ġevaġi-masegu ġetato.

22 Senaġi mo ġaro na beiaġoma mo maitoma, au tu Barau na evaġa-kavaguni. Moġa lorinai mai bama ruġa-tari, tarima mabarari misina na beiaġo baregona ġoirari ai ama guruġa-foforini. Au na kara boruna ta tu asi akiraġiani, senaġina peroveta tarimari na e Mose na kara ġekiraġiato beġorani dagarana moġo.

23 Dagarana maiġa, Keriso tu bene midigumidigu, ma tau giniginena mase na ma bene variġisi-ġenoġoi, benamo Barau ġena mama varina Iuda tarimari e irau bese tarimari ġeri ai bene vari-fua.”

24 Paulo moġesi evetoreġauto nuġanai tu, Festo na efarara-viniato, ekirato, “Paulo, ġoi tu bobabo! Ġemu riba baregona na evaġa-babomuni.”

25 Paulo evaġa-veseto, ekirato, “Verebara Festo, au tu asi bababo. Au na kara akiraġirini guruġari tu moġoni e maġata.

26 Kini Agripa! Au tu ma kokoregu ema asi garigu ġesi ġoi bavaġa-guruġamuni, korana mai dagara maiġeri mabarari ġoi tu ma ribamu. Au ribagu, mai bakiraġiri dagarari mabarari ġoi ġemu ai ta tu asi bevekuretoġa, korana maiġeri dagara tu vekuretoġa gabunai ta asi eġorato.

27 Kini Agripa, ġoi na mai peroveta tarimari ġeri guruġa ovaġa-moġonirini ba? Au ribagu ġoi na ovaġa-moġonirini.”

28 Agripa na Paulo ekiraiato, ekirato, “Mai horaġauna kotunai, dori moġo nuġagu bovaġa-moiriaia, benamo dori moġo Keriso bavaġa-moġonia.”

29 Paulo evaġa-veseto, ekirato, “Horaġauna kubinai ba maukanai, senaġi au na Barau anoġiani, ġoi e initoma au ġeseġaġi-taġoguni tarimami mabarami au kavana boġoro vei, senaġina mai ġebarubaruguto kavana moġo asiġi.”

30 Paulo moġesina eguruġa-ġosito, benamo kini, e gavana, e Berenike, ema ġia ġesi ġetanuto tarimari mabarari ġevariġisito.

³¹ Ĝeraka-rosito murika ĝana, benamo ĝeguruĝa-guruĝato nai tu ĝekirato, “Mai tau tu veiĝa rakavana ta voina tu bere mase o dibura numai bere tanu veiĝana ta tu asi eveiatio.”

³² Benamo Agripa na Festo ekiraiato, ekirato, “Bema asi bere kira, Kaisara na ĝena guruĝa benea seĝaĝia asi beresi nai, mai tau tu tara ruĝa-vaĝia.”

27

Paulo Roma ĝana eiaĝoto

¹ Itali ĝana baĝana iaĝo guruĝana emoĝonito nai tu, Paulo e dibura tarimari kotari tu vetari ĝitaĝauna tarimana arana Iulio ĝimanai ĝetorerito. Ĝia tu Kaisara ĝena vetari doĝorona nuĝanai.

² Ĝai tu Adramitio boutina tai ĝaraĝeto. Mo bouti tu Asia tanona koneri ĝari beiaĝoni boutinai. Benamo mo bouti na ĝadauto. Makedonia tarimana ta arana Aristako maki ĝai ĝesi ĝaiaĝoto. Ĝia tu Tesalonika na eiaĝomato.

³ Ma elaĝanito vau Sidono ai ĝaraĝasito. Iulio na Paulo evetuĝa-ĝwaiato, benamo maoro eviniato, karona ĝeri ai bene iaĝo, be ĝena ura dagarari beĝene vinia.

⁴ Mo gabu ĝaraga-kwaneato nai, Saipras motumotu ravaravana rekena na ĝaiaĝoto, korana iavara tu goirama na eiaĝomato-ĝoi.

⁵ Kilikia e Pamfilia iatari na ĝaraga-vanaĝito, ĝaiaĝoto, Mira ai ĝadaro-kauto. Mira tu Likia tanonai.

⁶ Monai vetari ĝitaĝauna tarimana na Alesandria boutina, Itali ĝana beiaĝoni boutina, edoĝariato, benamo monai evaĝa-raĝe vanaĝimato.

⁷ Ĝaro vovoka tuĝama tuĝama moĝo ĝadau-iaĝoto-ĝoi, e ma vekwaraĝima ĝesi Kenido sevinai ĝaraĝasito. Monai iavara na eraga-ĝaumato lorinai, Krete motumotu ravaravana rekena na ĝaiaĝoto. Mo tu Salmone duduna reke ta kefona na.

⁸ Ma vekwaraĝima ĝesi fenu rikiri na ĝaiaĝoto mo, gabu ta arana Darokau Gaburi Namori ai ĝaraĝasito. Mo gabu e Lasea vanuĝana vefakari tu asi manaĝa.

⁹⁻¹⁰ Ĝaro vovoka monai varau ĝekorito, e bouti na monana rei-iaĝo tu gwaĝiĝi e ma garina, korana ĝaniveaĝa ĝarona maki varau ekorito. Moĝa lorinai Paulo na ekira-toreĝaurito, ekirato, “Tau mabarami, au aribani ĝita ĝera iaĝoiaĝo tu berakavani. Ĝera farefare mabarari beĝe rekwarekwani ema bouti maki berakava-moĝovaĝini. Dia maiĝeri dagara moĝo, senaĝi ĝita ĝera maĝuri maki bita fitoĝarini.”

¹¹ Senaĝi vetari ĝitaĝauna tarimana na tu bouti taritarina tarimana baregona e bouti tarimana garori eseĝaĝirito, a Paulo ĝena guruĝa tu asi egabi-raĝeato.

¹² Mo darokau gabuna faraka e iavara ĝueri ai tu asi namo. Moĝa lorinai ĝutuma na tu ĝeurato baĝana dau-tovo, be Foeniki ai vau faraka e iavara ĝueri baĝana ĝabiri. Foeniki tu Krete ai darokau gabuna ta. Reke ta tu iavaraĝere (o south-west) eĝoiraiani, o reke ta tu buibara (o north-west) eĝoiraiani.

Iavara na davara evaĝa-rakavaiato

¹³ Iavaraĝere evesinato, tuĝana moĝo eĝauto-ĝoi nai, ĝia ĝetuĝa-maĝito tu ĝeri ĝaro namona beĝe doĝaria. Moĝa lorinai dogo ĝeinu-raĝeato, benamo Krete fenu rikiri na moĝo ĝedau-iaĝoto.

14 Asikauna tu iavara baregona arana koiviru, motumotu iatarāgena na emariġoto.

15 Bouti ai ema kwari-kauato, benamo ġai tu asi ġema daunaġi dabarana. Ġoira ġana iaġo uradikana asi ġaveito, senaġi iavara ġena urai moġo ġadauto.

16 Motumotu misina arana Kauda gabigabina rekenai ġadau-toġato vau, ravaravana na ġadau-iaġoto. Monai vauro bouti misina ġobina ġatorea ġatato, vaġa-maġurina uranai ġavekwarāġi-rakavato.

17 Ġia na bouti misina ġeinu-raġeato bouti tuġuna ġana, benamo bouti ġesi ġebaru-kafaiato bene ġabi-taria ġana. Ema ġegarito, be bouti faraina maki ġeinu-riġoato, benamo ġareito moġo. Ġia ġeri gari korana tu iavara na bouti beġwa-iaġoani mo Sirtis ai Afrika rekenai davara sefana mirina tai bea tanukauni garina.

18 Mo iavara baregona ema ureure baregori ġesebonato nai, bouti maki dori moġo ġevei-buruato-ġoi. Moġa lorinai elaġanito nai tu, bouti ai ġeġurarito farefareri mabarari davarai ġebubu-reirito, bouti bene meraġa ġana.

19 Ġaro vaġa-toitoinai tauġeri ġimari na bouti farefarena ma ġefiu-riġorito.

20 Ġaro ġutuma varau ġeiaġoto, ma ġaro e visiġu asi ġefofoforito, ema iavara maki ebarego-sirivaġito. Benamo ġema tuġamaġikau mabarari ġekorito, korana ġatuga maġito, ġai tu asi ġema maġuri dabarana.

21 Ġaro ġutuma asi ġeġanigaġanito murinai, Paulo ġoirari ai eruġato, benamo ekirato, “Ġomi tau, ġomi tu au garogu ġoro seġaġia, be Krete na asi tara daurosi; be mai farefare maġesi asi tara bubu-fitogaġi.

22 Senaġi toma au na alaunaġimini, akirani, boġono kokore! Korana tu ta asi bomaseni. Senaġi bouti ġereġana moġo moġoni berakava-moġovaġini.

23 Au tu Barau ġena tarima ta ema au tu ġia vetuġunaġina aiāġo-vinini. Ġoraġani boġi, ġia ġena aneru ta sevigu ai ema ruġa-tarito,

24 benamo ekirato, ‘Paulo, asi bono gari. Ġoi tu Kaisara ġoiranai roġo boa ruġani, ema Barau ġena namo ġoi ġemu ai ġenana, ġoi ġesi boġo iaġoma tarimari mabarari maġuri beġe doġariani.’

25 Moġa lorinai, ġomi tau, au na akiramini, boġono kokore. Korana au na Barau tu avāġa-moġoniani, kara aneru na bekira-varagu tu bekiraġiri ilailanai beġe ġorani.

26 Senaġi ġita tu iavara na motumotu tai bea kwari-kaurani.”

27 Boġi vaġa-gabanana vasivasi (14) ġai tu Adria Davaranai iavara na ekwari-rakao rakaomato-ġoi. Boġi nuġanai bouti ġwaragana tauri ġevemami-raġito, ġai tu tano varau ġakavinagaġiato.

28 Moġa lorinai varo dudunai dagara metona ta ġebaru-kauato, benamo davarai ġefiu-reiato. Moġa nuġanai ġeribato, davara ġena variġo tu 37 mita kavana. Asi luana ma ġeġitaġiato, monai davara ġena variġo tu 27 mita moġo.

29 Bouti fore ġeri ai beverarakauni garinai, bouti murina rekenai dogo vasivasi ġefiu-reirito. Benamo ġeġauġauto bene raga-laġani ġana.

30 Bouti ġwaragana tauri ġeri ura tu beġene raga-lemma. Moġesina naima ġia na bouti misina dobu ai ġetore-reiato, ġevei-ġofakauto bouti ġoiranai dogo kotari moġeri ġeiaġoto, ġea tore-riġori ġetato.

³¹ Senaġi Paulo na vetari ġitaġauna tarimana e vetari tauri ekirarito, ekirato, “Bema bouti ġwaragana tauri bouti ai asi beġe tanuni nai tu, ġomi maki asi boġo maġurini.”

³² Moġa lorinai vetari tauri na bouti misina varori ġekari-ġuturito, benamo ġevaġa-rei kwareġaiato.

³³ Dori elaġanito-ġoi nai, Paulo na ġia mabarari enoġirito, ġaniġani kota beġene ġani. Ġia ekirato, “Ġomi tu ġaro gabanana vasivasi (14) boġo vaġa-noga-iaġia, kara ta roġosi ġoro ġania.

³⁴ Moġa lorinai boġono kokore e maġuri tuġamaġinai anoġimini, ġaniġani kota ġoġani. Korana ġomi debami ġuiri tu sebona ta maki asi berekwa-rewani bene.

³⁵ Moġesi ekirato murinai, ġia na beredi ta eġabiato, benamo ġia mabarari ġoirari ai Barau evaġa-namoato, ma edudu-ġutuato, benamo eġaniato.

³⁶ Ġia mabarari maki nuġari ġevaġa-gwaġiġirito, benamo ġeġaniġanito.

³⁷ Bouti nuġanai ġai mabarama tu 276.

³⁸ Ġia mabarari ġeġani-maseto, benamo bouti bene meraġa uranai, widi tu davarai ġefiu-reirito.

Geta o ureure na bouti ebota-kirakiraiato

³⁹ Elaġanito nai, bouti ġwaragana tauri na tanobara vetoġana tu asi ġeġita-ġinikauato. Senaġi ġaruka tanobara na davara ġana eraka-rosini, ma fenuna koutoġana ġesi moġo ġeġita-iaġoato. Benamo ġetuġamaġito, bema ma dabara nai tu, monai bouti beġere vaġa-raġa-raġea ġetato.

⁴⁰ Benamo dogo varori ġekari-ġuturito, davarai ġeraga-kwanerito. Mo hora sebonai leva o bara ġebaru-taririto varori maki ġeruġarito. Benamo ġoira rekenai farai ġediuato, iavara na ġoira fenuna ġana bene kwari-iaġori uranai.

⁴¹ Senaġi bouti tu semure ġenai everarato, benamo etanukauto. Bouti ġoirana tu evedaġi-nunuto, a murina rekena tu ureure na ebota-kirakiraiato, e eveluki-rovorovoto.

⁴² Vetari tauri ġeboioġato, dibura tarimari tu beġene vaġi-maseri, korana beġe nau-rakani, benamo beġe raġa-lemani garina.

⁴³ Senaġi vetari ġitaġauna tarimana ġena ura tu Paulo bene vaġa-maġuria, moġa lorinai ġia na ekira-ġoirito, mo veiġa asi beġene veia. Benamo ma nau ribari tauri ekirarito, davarai ġeburi-rei, benamo beġene nau-ġuine-iaġo fenu ġana.

⁴⁴ A tarima mabarari tu ġau tubiri o bouti taviri tari beġene ġabiri vau, ġia muriri na beġene rei-iaġo. Mo dabarai mabarari tanobara ġea doġariato, ta asi erekwa-rekwato.

28

Malta motumotunai

¹ Ta davarai kamasi ta asi eveito, mabarama namo moġo kone ai ġaraġekauto. Benamo monai vauro ġaribato, mo motumotu arana tu Malta.

² Mo motumotu tarimari na ġai ġemai tu veiġa namo vedaureana ġeveiato. Korana mo ġura e nagure nuġanai ġema karava bara ta ġegasiato ġai bene tunu-seġuseġuma ġana.

³ Paulo eiaġoto lako degona ta ea ġabiato, benamo karavai ema tore-raġeato. Mota ta mo lako degonai karava gugurana na eġabiato, benamo ema nene-rosito, ma Paulo ġimanai ekafukauto.

4 Mo motumotu tauri na mo mota Paulo ġimanai ġerokautaġo ġeġitaiato, benamo tauġeri ġevemugu-vinito, ġekirato, “Asi ġofaġofa, mai tarima tu vevaġideba tarimana. Korana davara na tu benau-maġuri, senaġina godio vavinena Dike tu asi veġata eurani ġia bene maġuri.”

5 Senaġi Paulo na mo mota tu karavai ekora-fiuraġeato, ma Paulo tu rakava ta asi eġoitaġoato.

6 Tarima ġetuġamaġito, Paulo tauġanina tu toma egoba-vaisi-raġeni, ba toma eketo-tarini, benamo emaseni. Ġevaġa-noga manaġato, senaġi Paulo ġenai kara rakavana ta tu asi eġorato. Benamo ġia ma ġevetuġamaġi-kureto, benamo ġekirato, “Ġia maki barau ta!”

7 Mo gabu e motumotu tauna baregona arana Publio. Ġia ġena gabu tu asi manaġa. Ġia na eġabi-raġemato, e ġaro toitoi veġata ġia ġena varivari tarimamai evaġa-iaġomato.

8 Publio tamana tu keve e efurito-ġoi, be genagenai egenataġoto-ġoi. Paulo ġenai eraka-toġato, ma eġuriġurito, ema ġimana iatanai etore-kaurito, benamo ġena keve enamoto.

9 Mo veiġa eġorato, benamo mo motumotu ai keve tarimari mabarari Paulo ġenai ġeiaġoto, benamo ġia na ġeri keve ġerina evaġa-namorito.

10 Ġeri varevare dagarari vovoka ġevinimato. Ma ġadau ġana bakunai tu ġema iaġoiaġo ai baġa ura-vinirini dagarari ma ġevinimato.

Romai ġaraġasito

11 Ġue toitoi murinai Alesandria boutina tai ġaraġeto. Mo bouti ai tu barau arana Dios natuna kafa merori ruarua vetoġari o fikisari ġeberarito. Mo bouti maki faraka e iavara ġueri tu mo motumotu ai edoġaririto.

12 Ġaraġato mo Sirakuse ai ġaraġasito. Monai ġaro toitoi ġatanuto.

13 Monana ġadau-ġeġeraġi-iaġoto mo Regio. Ġaro ta evanaġiato murinai, gabina iavarana etoġato, ma ġaro vaġa-ruaruanai vauro Puteoli ai ġaraġasito.

14 Monai tarikaka kotari ġadoġaririto. Ma ġaro imaima ruarua (7) tu ġia na monai ġeġabi-tarimato. Monana vau ġaraka-iaġoto Romai ġaraġasito.

15 Monai tarikaka kotari varima ġeseġaġiato, benamo ġai ġemai ġeiaġomato mo, vanuġa keiri arari Apia-Foru e Taven-Toi ġana. Paulo na eġitarito, benamo Barau evaġa-namoato, e tauna egwaġiġito.

Roma nuġanai

16 Romai ġaraġasito nai, Paulo tu maoro ġeviniato, ġereġana bene tanu. Senaġi vetari tauna ta na moġo bene ġita-ġaua.

17 Ġaro toitoi ġevanaġirito murinai, Paulo na Iuda ġedebaiato-ġoi tauri ekea-vegogorito. Ġema raka-vegogoto, benamo ġia na evaġa-guruġarito, ekirato, “Tarikakagu, au na ġera tarima ta asi avaġa-rakavaiato, ema senera ġeri veiġa maki asi avaġa-rakavarito. Senaġi au tu Ierusalemaj ġeġabiguto dibura tarimana ta noġa, benamo Roma ġeri gavamani ġimari ai ġetore-kauguto.

18 Ġia na ġedanaġiguto, ma ġegu guruġa ġeseġaġiato nuġanai tu ġeriba-maoroto, au tu asi ġegu vei-rakava ema beġene vaġi-masegu korana ta maki asi ġedoġariato. Moġa lorinai ġeurato beġene tuġu-vaġigu.

19 Senaġi Iuda tarimari na mo ura tu asi ġeġabi-raġeato. Moġa lorinai au tu asi ġegu dabara ta, naima anoġi-noġito Kaisara na ġegu guruġa bene seġaġia. Dia au tu ġegu tarimarima navevaġa-maoro-viniri ġana atato. Asiġi.

²⁰ Moġa lorinai bakea-iaġomami, au ġesi sima guruġaguruġa ġana. Korana Isaraela ġena tuġamaġikau lorinai au maġgesi ġebarubaruguto.”

²¹ Ġia na ġevaġa-veaseato, ġekirato, “Goi guruġamu fefana ta Iudea na asi ġadogariato. Tarikakara monana ġeiaġomato tauri na maki varimu rakavana ta asi ġekiraġiato, be asi ġaseġaġiato.

²² Senaġi ġai ġaurani tu ġoi ġemu tuġamaġi guruġana baġana seġaġia. Korana gabu mabarari ai tarimarima na goi na mai dogoro tu ġerori-toreani.”

²³ Moġa lorinai ġia na ġaro ta ġeġabi-viriġiato. Mo ġaro ai tarima-rima ġutuma-bara Paulo ġena tanu gabuna ġana ġeiaġoto. Boġiboġi na veġata evesinato eiaġoto mo lavilavi, Paulo na Barau ġena Basileia eġobata-iaġiato. Ema Mose ġena taravatu na e peroveta tauri ġeri buka na Iesu varina ġia ġeri ekiraġi-ġinikauto, Iesu beġene vaġa-moġonia uranai.

²⁴ Tarima kotari na tu ġena guruġa ġeġabi-raġeato, a kotari na tu asi ġevaġa-moġoniato.

²⁵ Ġia nuġari tu dia sebona, moġa lorinai ġeraka-rovorovoto. Senaġi roġosi roġo beġene raka nuġanai, Paulo na guruġa ta ekiraġiato, maġgesi ekirato, “Iauka Veaġa peroveta tarimana Isaia ġenana ġomi senemi tu guruġa moġonina ekira-vararito.

²⁶ Korana iniġesi ekirato,
 ‘Noiaġo maġeri tarima ġeri ai,
 benamo bono kira:
 Seġaġi tu boġo seġaġini,
 senaġi asi boġo riba-maoroni.
 Ġita tu boġo ġitani,
 senaġi asi boġo ġita-fakani.

²⁷ Korana maġeri tarima
 nuġari tu mukuna,
 seġari tu vekodobeġau,
 ema matari maki bubu.
 Irau matari na beġe ġitani
 e seġari na beġe seġaġini
 e beġe tuġamaġi-fakani,
 benamo beġe vetuġamaġi-kureni
 ema bavaġa-namorini ġarina.
 (Barau tu moġesi ekirani).’

²⁸ Moġa lorinai au aurani ġomi boġono riba, Barau ġena vevaġa-maġuri varina tu irau bese tarimari ġeri ai etuġu-iaġoato, be ġia na beġe seġaġiani!”
 [²⁹ Paulo moġesi eguruġato murinai, Iuda tarimari ġerakato, ma tauġeri fakari ai moġo veġareveġare baregona ta ġeveiato.]

³⁰ Laġani ruarua tauġena na edavaiato-ġoi numanai etanuto. Ma ġia ġenai ġeiaġomato-ġoi tarimari mabarari eġabi-raġerito-ġoi.

³¹ Barau ġena Basileia, (ġena veġitaġau seġukana evaġa-ruġaiiani maġa), guruġana eġobata-iaġi vinirito-ġoi, ema Vereġauka Iesu Keriso varina evaġa-ribarito-ġoi ma kokorena ġesi. Ma tarima ta na tu asi ma ekiraġoiato-ġoi.

PAULO ĜENA TORETORE ROMA EKALESIARI ĜERI

Roma vaĝa-foforina guruĝari

Paulo na mai fefa Roma ekalesiari ĝeri tu laĝani 56 ema 57 fakari nuĝari ta etoreato, mo tu Korinto ekalesiari vaĝa-toitoina ma evarivaririto nuĝanai etore-vinirito; mai tu Iesu emaseto murinai etoreato.

Paulo ĝena ura baregona Roma ĝana bene iaĝo, senaĝi Ierusalema ĝana eiaĝoto roĝo (Apostolo 19:21). Monai Iuda tarimari tari na ĝeĝabi-tariato, ma ĝevaĝia ĝetato. Senaĝina Barau na enari-ĝauato, ma Roma ĝana bene iaĝo dabarana ekeoato. Moĝa lorinai Paulo tu Roma ĝana eiaĝoto laĝani 59 nuĝanai kavana.

Paulo Roma ĝana tu roĝosi bere iaĝo nuĝanai, mai fefa etore-vinirito. Paulo ĝena ura baregona tu, Barau ĝena Vari Namona ĝeri bene vaĝa-fofori ginikaua, ema Roma ekalesiari bene vaĝa-kokokeri ĝana (Roma 1:1 ema 11).

Roma bukana nuĝanai siri baregori tu karoa 1:16-17.

Mai fefa nuĝanai Paulo na Roma ekalesiari ĝeri dagara tari ekiraĝi-ginikaurito tu maiĝeri: 1) Iuda tarimari ema irau bese tarimari tu Keriso ĝena Vari Namona ĝenana vauro Barau ĝoiranai vei-iobukaiobuka tarimari beĝe ruĝa-tarini, a dia taravatu ĝenana. 2) Tanobara tarimari mabarari, Iuda tarimari ema irau bese tarimari, tu vei-rakava nuĝanai ĝetanuni (karoa 1-3). 3) Karoa 3-8 nuĝanai tu vevaĝa-oroĝoto varina e vevaĝa-veaĝa varina, ema Barau marevana mamana baregona befoforini varina. 4) Karoa 9-11 tu ĝabiviriĝi varina; Barau na Iuda tarimari asi beĝabi-raĝeri, Keriso asi ĝevaĝa-moĝoniani nai; ema Iuda tarimari Barau na ma beĝabiraĝe-ĝenoĝoirini, korana Keriso ĝenai ma beĝe veĝabidadamani. 5) Karoa 12-16 tu ekalesia doĝorona kamasi beĝene tanu Barau ĝoiranai.

Paulo na apostolo ĝauveina eveiato, korana Barau na ekeaiato nai

¹ Au Paulo, Keriso Iesu ĝena vetuĝunaĝi taugu; ĝeguna mai fefa eiaĝosini. Au tu ekeaguto, ĝena apostolo tarimagu ai aiaĝoto, ema eviriĝiguto, Barau ĝena Vari Namona bana vari-fiua ĝana.

² Mai Vari Namona tu guinenai Barau na peroveta tarimari mururi na ekiraĝi-toreato, benamo Buka Veaĝa nuĝanai ĝetoreato.

³ Mai tu Barau Natuna, ĝita ĝera Vereĝauka Iesu Keriso, varina. Ĝia tu tanobarai ema maĝurito, ema Kini Davida garakana.

⁴ Ĝia mase ĝenana evariĝisi-ĝenoĝoito, monana Iauka Veaĝa na ma seĝukana ĝesi ĝita ĝerai evaĝa-foforiato ĝia tu Barau tuĝutuĝu Natuna.

⁵ Iesu ĝenana ema ĝia arana bakunai, ĝai varevare-bara e apostolo dagina ĝaĝabiato, bese irairau tarimari baĝana vetauri, Barau beĝene vaĝa-moĝonia e beĝene seĝaĝi-vinia.

⁶ Ma ĝomi maki, Roma nuĝanai ĝotanuni tarimami, ĝia ĝesi Barau na ekeasebonamito, Iesu Keriso ĝena tarimarimai bogono iaĝo ĝana.

⁷ Ĝomi Roma nuĝanai ĝotanuni tarimami mabarami, Barau na eura-vinimini e ekeamito, ĝena veaĝa tarimari ai ĝoiaĝoto, ĝomi avaaĝa-namomini: Barau ĝita Tamara ema ĝera Vereĝauka Iesu Keriso ĝerina varevare-bara ema maino ĝemi ai bene tanu.

Paulo ĝena ura baregona Romai bene varivari

⁸ Ğegu guruġa giniginena, au ġegu Barau atanikiu-viniani Iesu Keriso aranai ġomi mabarami iatami ai, korana ġemi veġabidadama variri tanobara mabarana nuġanai ġekiraġi-foforirini.

⁹ Natuna Varina Namona aġobata-iaġiani, ma iaukagu mabarana ġesi vetuġunaġina aiaġo-vinini Barauna ġoiranai, ġomi tu ġegu ġurigiuri mabarari nuġari ai asi atuġa-rewwamini.

¹⁰ Ema maki ġegu ġurigiuri nuġari ai anoġinoġi-bukani, akirani, bema initoma Barau eurani nai, ġegu dabara ta bene vei-roroġotoa, be ġemi ai bana iaġosi.

¹¹ Korana au ġegu ura baregona tu bara ġitami, be Iauka Veaġa varevareri kotari ma bara vinimi, boġono kokore ġana.

¹² Mo tu ġomi e au tara velaunagi-vevini ġera veġabidadama nuġanai.

¹³ Tarikakagu mabarami, boġono riba-maoro, nega ġutuma aurato ġomi ġemi ai bana iaġosi atato, senaġi ġegu iaġosi lairi tu ġevetoutou-kauni beiaġoma mo toma. Ğegu ura, irau bese tari na ġegu ġauvei ġenana vevaġa-kava ġeġoitaġoato ema Iesu Keriso ġena doġoro tarimari ai ġeiaġoto kavana, ġomi maki fakami ai bana vevaġa-kava.

¹⁴ Barau na ġauvei eviniguto, Griki tarimari e asi Griki tarimari, iaunega tarimari e vei-babobabo tarimari bana vaġa-kavari ġana.

¹⁵ Moġa lorinai au ġegu ura baregona tu, mai Vari Namona ġomi Romai ġotanuni tarimami mabarami ġemi ai maki bana ġobata-iaġia.

Vari Namona tu ma ġena seġuka

¹⁶ Barau ġena Vari Namona maiakana asi aveini, korana mai Vari Namona nuġanai Barau seġukana eġauveini, ġia ġevaġa-moġoniani tarimari vaġa-maġuriri ġana: Iuda tarimari ġeri ai guine, gabi ai vau bese irauirau tarimari.

¹⁷ Korana Vari Namona nuġanai tu Barau na tarimarima kamasi vei-iobukaiobuka tarimari bekiraġirini efoforini. Vei-iobukaiobuka tu veġabidadama nuġanai moġo korana na beiaġo mo magona, Buka Veaġai ekirani kavana: "Barau beġabidadama-viniani tarimana tu Barau na vei-iobukaiobuka tarimanai bekiraġiani, benamo bemaġurini."

Barau ġena baru tarimarima ġeri ai

¹⁸ Barau ġena baru guba na efoforini, korana tarimarima na Barau asi ġekorana-iaġiani e veġa iobukaiobukari asi ġeveirini. Ma ġeri veġa rakavari ġerina guruġa moġonina ġelaulau-ġauani.

¹⁹ Barau beġe ribaiani maġuriri mabarari ġia ġeri ai tu fofori, Barau tauġena na evaġa-fofori ginikaurito.

²⁰ Barau asi taġitaiani, senaġi guba e tanobara eveirito, monana beiaġoma mo toma, Barau vetoġana vekuretoġana tu taġita-ginikaurini. Ġia tu moġoni Barau tuġutuġu ema ġena tanu-vanaġivanaġi seġukana tu ġimana ġauveiri dagarari na maki ġevaġa-foforiani, be taribaiani. Moġa lorinai tarimarima tu asi ġena vetoreġau laina.

²¹ Oba, ġia moġoni ma ribari Barau, be ġere vaġa-raġea, senaġi asi ġevaġa-raġeani ema asi maki ġetanikiu-viniani. A ġeri tuġamaġi tu vei-taġuitaġui na moġo ġevaġa-vonurini. Moġa lorinai ġeri tuġamaġi babobabori na nuġari ġevaġa-mukunarini.

²² Ġia tauġeri ġekirani, ġia tu ma iaunegari ġetoni, senaġi ġia tu ġebaboto.

²³ Be maḡuri vanaḡivanaḡi Barauna beḡere vaḡa-raḡea, senaḡi ḡima vevei dagarari vaḡa-ilailana ma beḡe maseni tarimari iouiouri o laulauri, e boḡa bairi, manu, ema tano ai ḡedarani dagarari iouiouri ḡevaḡa-moḡonirini.

²⁴ Moḡa lorinai Barau na veiḡa mirori beḡene vei ḡana etao-fitoḡarito, be beḡene mata-boraḡa nuḡari ai ḡeverere-iaḡirini ilailanai, e tauḡeri fakari ai vevaḡa-maiaka veiḡari irauirauri na tauḡaniri beḡene vaḡa-rakavari.

²⁵ Ḡia na Barau ḡena guruḡa moḡoniri gaburi ai tu ḡofaḡofa veiḡari ḡeveirini, ema Barau na eveirito dagarari ḡetoma-rakarigo vinirini e vetuḡunaḡiri ḡeiaḡo-vinini, a moḡeri eveirito Barauna tu asiḡi. Ḡia moḡo ḡereḡana sivevato-iaḡia, asi dokona, asi magona. Amen.

²⁶ Tarimarima moḡesi ḡeveito nai, Barau na etao-fitoḡarito, maiaka veiḡari beḡene uravini-lelevaḡiri ḡana. Ḡeri vavine maki veḡaraḡo maḡuriri roroḡotori ḡeiaḡuirini, ma karori ḡesi ḡevakima-vevinini.

²⁷ Tauri maki ḡia kavana, vavine ḡesi kima maḡuriri korikori tu ḡeiaḡuirini, ma tau karori ḡemata-ḡaniḡani-iaḡirini. Mo tu tau tauḡeri karori ḡesi moḡo boru ḡeravani. Maiḡeri veiḡa rakavari voiri metori tu ḡia tauḡeri na ḡegabirini.

²⁸ Ma iatanai, ḡia tu asi ḡeurato, Barau beḡene riba-ginikaua e tuḡamaḡi-faka ḡia nuḡari iaḡasiri ai beḡene tanu, naima etao-fitoḡarito ḡeri tuḡamaḡi babobabori ḡeri ai, be asi beḡere veiri veiḡari beḡene veiri ḡana.

²⁹ Ḡia tu rakava mabarari na ḡevonuvonu-raḡeto, veiḡa rakavari, mata-ḡaniḡani, tuḡamaḡi barubaru, mama, vaḡideba, veḡareveḡare, veribaḡani e tarimarima vaḡa-ketori veiḡari, veroritore,

³⁰ guruḡa vemuriḡoi, Barau ḡeiau-rakavaiani, seḡafore rakavarakava, kira-sirivaḡi, e veiavi; vekiraḡi-vaḡevarage, rakava vei dabarari variguri ḡevaḡa-reforini, sina-tama garori asi ḡeseḡagirini;

³¹ asi ḡetuḡamaḡi-fakani, asi tuḡamaḡi-kauri tarimari, veuravini asi ribari tarimari, vevetuḡaḡwa asi ribari tarimari.

³² Oba, ḡia tu ma ribari, Barau ḡena veḡausina o sisiba tu ekirani, vei rakava tarimari tu beḡe maseni. Senaḡi ḡia na tu ḡeveirini, ma dia ḡia na moḡo ḡeveini, senaḡi tarimarima kotari na ḡeveirini maki ḡeiau-namorini e ḡeḡabi-raḡerini.

2

Barau ḡena vevaḡa-maoro

¹ A ḡoi tarima tari ovaḡa-maororini ma kerereri ai oragani tarimamu, ḡoi tu asi ḡemu vekira-ḡuniḡau laina. Ḡoi na tarima ta ovaḡa-maoroani, ma ḡena veiḡa rakavari okiraḡirini nai tu, ḡoi tauḡemu moḡo ovevaḡa-metoni e ovevaḡa-kotani. Korana tu tarima ta ḡena veiḡa rakavari okiraḡirini veiḡari tu, ḡoi tauḡemu na maki oveirini.

² Gita tu ribara, Barau na moḡesi veiḡa rakavari ḡeveirini tarimari bevaḡa-maoro vinirini, ma meto bevinirini tu roroḡoto.

³ Kamasi ḡotuḡamaḡini, ḡomi, tarimarima kika moḡo, na tarimarima kotari govevaḡa-maoro vinirini, ma nuḡanai tu ḡomi tauḡemi na maki mo veiḡa rakavari tu ḡoveirini. Ḡomi ḡotuḡamaḡini Barau ḡena vevaḡa-maoro ḡenana tu boḡo raga-maḡurini?

⁴ Ba Barau ḡena namo baregona, e nuḡana eḡabi-tariani, e vevaḡa-gwaḡiḡi iatari ai tu asi tauri ḡotoni? Ba asi ḡoribani Barau ḡena namo baregona anina tu, ḡomi boḡono vetuḡamaḡi-kure ma boḡono raka-kure ḡana?

⁵ Senaġina ġomi nuġami tu ġovaġa-gwaġiġirini, ma asi ġovetuġamaġi-kureni. Maġesi ġoveini tu tauġemi iatami ai ġemi meto iatai-iatai ġolabulabu-kaurini. Ma Barau ġena Kota baranai ġena vevaġa-maoro roroġotona beveiani mo ġaro ai vau ġena baru bevaġa-foforiani, benamo ġemi veiġa metori boġo ġabirini.

⁶ Barau na “tata karakara ġoveito ilailari ai tauri ma bevinimini.”

⁷ Tarima kotari tu ġobiri ġevetoreni veiġa namori ġeveini, Barau marevana, e ġabiraġena, ema asi bedokoni maġurina ġevetauani. Barau na ġia tu maġuri vanaġivanaġi bevinirini.

⁸ A tarima kotari tu tauġeri ġeri namo moġo ġevetaurini, ema guruġa e maġuri moġonina tu ġeruġarini, ma rakava veiġari ġekorana-iaġirini. Ġia tu Barau na beiau-rakavarini ma baruna ġesi.

⁹ Beġe vei-rakavani tarimari mabarari tu rakava metona baregona ema midigumidigu baregona beġe ġabiani. Mo tu Iuda tarimarima ġeri ai beġe ġora-guineni, ma murinai tu irau bese tarimari ġeri ai maki beġe ġorani.

¹⁰ Senaġi veiġa namori beġe veini tarimari mabarari ġeri tu, Barau na mareva baregona e vemataurai ġarana ema maino bevinirini: Iuda tarimari ġeri ai ġuine, ma murinai tu irau bese tarimari ġeri ai maki.

¹¹ Korana Barau na tarimarima mabarari maġuri sebonai moġo eġabi-raġerini, ġeri veiġa loriri ai voiri evinirini.

Barau na Iuda tarimari e irau bese tarimari bevevaġa-maoro vinirini

¹² Irau bese tarimari tu Mose ġena taravatu asi ribari, nuġanai ġevei-rakavani, moġeri mabarari beġe mase-buġani, (Barau na bekota-vinirini), taravatu murikanai enabe asi ribari; ema Iuda tarimari tu taravatu ma ribari, senaġina ġevei-rakavani tarimari mabarari tu taravatu na bevaġa-maoro vinirini.

¹³ Korana taravatu ġeseġaġiani moġo tarimari, Barau ġoiranai tu dia vei-iobukaiobuka tarimari, senaġi taravatu ġekorana-iaġiani tarimari vau, Barau na ekiraġirini vei-iobukaiobuka tarimari.

¹⁴ Oba, irau bese tarimari tu asi ġeri taravatu, senaġi ġeri maġuri nuġari ai taravatu na ekiraġirini veiġari tu ġeveirini. Moġeri mabarari tu ġeri taravatu ai ġeiaġoni, a ġia tu asi ġeri taravatu senaġi.

¹⁵ Ġia ġeri veiġa na evaġa-foforiani, Barau ġena taravatu na eura-vinirini veiġari tu ġia loruri ġuturi ai etorerito. Maġa tu nuġari iaġasiri na maki evaġa-moġonirini, korana tu ġaro tari ai ġeri tuġamaġi na evaġa-daġa-raġerini, ma ġaro tari ai tu gogobari eragani.

¹⁶ Au na Vari Namona aġobata-iaġiani tu, Barau na tarimarima ġena veiġa e tuġamaġi vekuretoġari Iesu Keriso ġenana bevevaġa-maoro vinirini ġaronai vau beġe foforini.

Iuda tarimari e taravatu

¹⁷ A ġoi Iuda tarimamu tu kamasi otuġamaġini? Oba, ġoi tu ovekiragini Iuda tarimamu. Ma ġoi tu taravatu ġenai ovetabekauni, e oveiavini, okirani, ġoi tu Barau ġena bese tarimamu.

¹⁸ Ma okirani, Barau tu ma ribamu e ġena ura veiġa namo vedaureari e rakavari oġita-learini, korana taravatu na evaġa-ribamuni nai.

¹⁹ Ġoi okirani, moġoni ġoi na mata-bubu tarimari boġori-kaurini, ema ġoi tu mukunai ġetanuni tarimari ġeri kere mamana;

²⁰ Ema vei-babobabo tarimari kira-roġori tarimamu, e mero keikeiri ġeri vevaġa-riba tarimamu, korana tu taravatu nuġanai iaunega ema guruġa moġoniri ġetanuni dagarari tu ma ribamu.

²¹ Ğoi na karomu tu ovaġa-ribarini, a ġoi tauġemu tu asi ovevaġa-ribani. Tarimarima oġobata-vinirini nai tu okirani, “Asi boġono lema,” otoni, a ġoi tu olemani.

²² Tarimarima asi beġene veġura-vanaġi otorini, ma ġoi tu oveġura-vanaġini. Kwaivakuku oiaiu-rakava-vinirini, senaġi ġeri rubu nuġari farefari tu olemarini.

²³ Taravatu ovaġa-raġe lelevaġirini nuġanai tu, Barau ġoi na tu asi ogubakauani, ġena taravatu tu oseġafore-vinirini.

²⁴ Buka Veaġai tu inġesi ekirani, “Barau arana irau bese tarimari na vekaravari ai ġekira-fitoġaiani, korana tu ġomi ġemi kira-sirivaġi lorinai.”

²⁵ Mero tauġani kefiri lamavaġi veiġana tu ma tauna, bema taravatu bokorana-iaġirini nai. Senaġi bema taravatu okira-sirivaġi vinirini nai, ġemu kefi-lamavaġi veiġana tu asi taunai beiaġoni, ema ġoi tu kefina asi ġelama-vaġiato tarimana kavanai.

²⁶ Irau bese tarimari tu kefiri asi ġelama-vaġito. Senaġi bema taravatu maġuriri korikori ġeveini nai tu, Barau ġoiranai ġia tu kefiri ġelama-vaġirito tarimari kavana, ene?

²⁷ Oba, taravatu bukana tu ġemu ai, ema kefimu tu ġelama-vaġiato. Senaġina bema ġoi na taravatu okira-sirivaġiani nai tu, taravatu ekorana-iaġiani tarimana, mai tu irau bese tarimana, Kota seanai betanuni, benamo ġoi bevaġa-kotamuni. Aba, tauġani rekenai tu kefina asi ġelama-vaġiato, senaġi.

²⁸ Bema tarima ta tu arana korina moġo Iuda tarimana ema kefi-lamavaġi maki murika ema tauġani kefina vetoġana korina moġo nai tu, ġia tu dia Iuda tarimana korikori.

²⁹ Asigina ġinavaġi. Iuda tarimana o Barau ġena bese tarimana korikorina tu deikara nuġana iaġasina na ema ġena tuġamaġi na evaġa-foforiani, ġia tu Iuda tarimana. Ema kefi-lamavaġi veiġana maki tarimarima loruna ġutunai bene forori. Ġia tu dia taravatu guruġari ġetorerito moġeri korana-iaġiri ai beġorani. Asigina. Ġia tu Barau Iaukana na tarimarima nuġana iaġasinai beveiani dagarana. Mo tarima moġa tu dia tarimarima na bevaġa-raġeani, senaġi Barau na bevaġa-raġeani.

3

¹ Iuda tarimari na irau bese tarimari ġevanaġirito? Mero tauġaniri kefiri ġelama-vaġirini ġenana tu kara namona ġedoġariato?

² Aba, dagara namori ġutuma ġedoġaririto! Tovotovonai tu Barau na ġia muruna guruġari korikori evaġa-ġauna-iaġirito.

³ Ma bema Iuda tarimari kotari Barau ġenana ġeraka-veġitato, asi ġeri veġabidadama nai tu aiġesi? Moġoni, Iuda tarimari kotari tu asi ġeri veġabidadama; senaġi ġia asi ġeri veġabidadama lorinai, Barau ġena kiraġitore maki asi taunai beiaġoni ba?

⁴ Asigina ġinavaġi! Barau tu moġoni veġata, ġena kiraġitore asi eketoni, ma tarimarima tu ġeġofaġofani. Buka Veaġai ekirani kavana,

“Barau, ġoi boguruġani nai tu, beġe vaġa-moġonimuni,

ema Kotai beġe ġofaġofa-iaġimuni nai maki bovaġa-darererini.”

⁵ Tarima kotari na ġeri vefafauġau guruġari beġe kiraġirini, beġe kirani: Bema ġita ġera veiġa asi roroġotori na tu Barau ġena vei-iobukaiobuka

etore-fofori ginikauani nai, ġita tu kara bita toni? Bita kirani, Barau na ġena baru veġari ġita iatarai ema-torerini nai tu maoro ba?

⁶ Asigina, Barau ma ġena maoro. Bema Barau tu asi roroġoto nai tu, ġia na tanobara mabarana tu kamasi bevevaġa-maoro viniani?

⁷ Tarima ta ma bevefafau-ġauni, bekirani, “Bema au ġegu ġofaġofa na Barau ġena guruġa moġoniri evaġa-fofori ginikaurini ema ġia marevana evaġa-baregoani nai tu, kara dainai au tu roġo mo evaġa-daġaguni rakava tarimagu etoni?”

⁸ Mo guruġa tu babo, noġa moġo ini guruġa kavana, “Rakava sivei, be namo bene fofori.” Tarima kotari na ġai ġevaġa-rakavamani, ġeġofaġofa-iaġimani, ġekirani, ġai tu maiġesi ġakirani ġetoni. Maiġesi ġai ġeġofaġofa-iaġimani tarimari Barau na voiri metona bevinirini tu asi vetoukauna, korana ġeri ġofaġofa lorinai.

Tarima ta asi iobukaiobuka

⁹ Benamo kara ma bita toni? Ġita Iuda tarimara moġo namo, a irau bese tarimari tu asiġi? Asigina ġinavaġi! Varau bita kiraġia, Iuda tarimari e irau bese bese tarimari vekaravari ai ta tu asi ġena rakava asi bita toni.

¹⁰ Buka Veġai tu maiġesi ġetoreato:

“Tarima ta asi iobukaiobuka,
sebona kwarikwari ta maki asiġina;

¹¹ tarima ta asi etuġamaġi-roroġotoni,
ta na maki Barau asi evetauani.

¹² Mabarari ġeraka-doge-muriġito,
ġia mabarari veġa iobukaiobukana tu asi ġeveiani,
mabarari asi ġevei-roroġotoni,
ta veġa namo asi ribana,
sebona kwarikwari ta maki asiġi.

¹³ Ġia godokari mase guriri kouġari kavana;
meari na ġofaġofa rakavari ġekiraġirini.

Ġeri guruġa na mase ġevaġa-ġorarani,
noġa moġo mota foisiniri
ġia bibiġari ai ġetanuni.

¹⁴ Mururi ai tu vevane e vekira-barubaru na ġevonu-fokafokato.

¹⁵ Ġia tu ġeġarimoġi-rakavani vevaġi ema vevaġideba veġari ai;

¹⁶ ġeri iaġoiago gaburi ai tu vei-rovorovo e rakava ġeiaġuini.

¹⁷ Maino maġuriri tu asi ribari.

¹⁸ Asi ġeri vegubakau ta Barau ġenai.”

¹⁹ Ġita ribara, maiġeri taravatu guruġari na kara dagara ġekiraġiani tu, mo deikara taravatu gaburenai ġetanuni tarimari ekirarini. Moġa tauna tu, taravatu gaburenai ġetanuni tarimari ema tarimarima mabarari maki mururi na kara ta asi beġene kiraġia, ema mai tanobarai tarimarima mabarari Barau ġoiranai beġene ruġa-tari ma ġeri vei-rakava.

²⁰ Moġa lorinai taravatu korana-iaġina maġurinai tarima ta asiġina ġinavaġi Barau ġoiranai Barau na bekiraġi-foforiani, ġia tu vei-iobukaiobuka tarimana. Asigina, taravatu ġenana ġita na vei-rakava taribaiani.

Vei-iobukaiobuka tu veġabadadama ġenana eiaġomani

²¹ Senaġi initoma kamara dabarai Barau na tarimarima ekiraġirini vei-iobukaiobuka tarimari etoni dabarana tu bema fofori-ginikau. Mo tu dia taravatu korana-iaġina maġurinai. Asigina. Mai tu Mose ġena taravatu na ema peroveta tarimari ġeri guruġa-fofori ai ġekiraġiato dabarana na.

²² Mai vei-iobukaiobuka Barau ġenana eiaġomani tu Iesu Keriso beġe ġabidadama-viniani tarimari mabarari na beġe ġabiani. Ta tu asi irau.

²³ Korana tarimarima mabarara tu rakava tarimara moġo, be mabarara Barau marevana namona ġenana taveġitato.

²⁴ Senaġi Barau ġena varevare-bara nuġanai asi ġera kerere etorani, korana Keriso Iesu ġenana ġera rakava ġerina evaġa-maġurirato.

²⁵ Barau na Iesu tu ginitaġo varevarenai evaġa-iaġoato, korana tarimarima ġia ġenana bene ġabi-raġeri ġana. Moġa maġurina tu iniġesi: Deikara ġia raranai beveġabi-dadamani tu, Barau na ġena rakava betuġamaġi-fitogarinini. Barau na mo maġuri eveiato anina tu, ġia ġena iobukaiobuka bene vaġa-foforia ġana. Guinenai rakava ġeveito-ġoi nai tu, eġita-daġaseġirito-ġoi, rakava voiri asi eveito-ġoi.

²⁶ Ma maitoma Iesu tu ginitaġo varevarenai evaġa-iaġoato korana ġena vei-iobukaiobuka bene vevaġa-ġita-iaġiri inította ġana, be ġia ġena iobukaiobuka bene fofori, e ġia na Iesu Keriso ġeġabidadama-viniani tarimari maorori bene kiraġiri.

²⁷ Be ġita tu kara bita veiavi-iaġiani? Vekokoroku tu asi ġena gabu ta. Kara dainai? Taravatu takorana-iaġiani nai? Asiġi, maġuri tu veġabidadama maġurinai moġo bita dogariani.

²⁸ Korana bitana riba-maoro, tarimarima tu veġabidadama lorinai Barau na eġabi-raġerani, a dia taravatu bita korana-iaġiani nai.

²⁹ Be Barau tu Iuda tarimari moġo ġeri? Ġia tu dia irau bese tarimari maki ġeri Barau? Aba, ġia tu irau bese tarimari maki ġeri Barau,

³⁰ korana Barau tu sebona moġo. Ġia na tauġaniri kefirini ġelama-vaġito tarimari veġabidadamai maorori bekiraġini, ema kefirini asi ġelama-vaġirito tarimari maki maorori bekiraġini mo veġabidadama sebona na.

³¹ Moġa nuġanai veġabidadama na taravatu seġukana tavaġiani? Asiġina ġinavaġi! Senaġi taravatu tavaġa-ruġa gigitariani.

4

Aberahamo ġena veġabidadama

¹ Ġita tu kara ma bita kiraġiani, senera Aberahamo na mai maġuri maiġa ema ġoitagoato iatanai?

² Bere moġoni, Aberahamo ġena ġauvei e veiġa bakunai Barau ġoiranai vei-iobukaiobuka tarimanai bere iaġo tu, tauġena bere vekiraġi, ġia tu kwalimu-koru na bere vekiraġi. Senaġi ġia Barau ġoiranai tu asi ġena vekokoroku gabuna ta.

³ Buka Veaġa nuġanai tu kara etoni? Buka Veaġa nuġanai tu ekirani, “Aberahamo na Barau ġena guruġa evaġa-moġoniatu nai, Barau ekirato, ġia tu vei-iobukaiobuka tarimana etato.”

⁴ Tarima ta eġauveini, benamo voina beġabiani. Ġia mo eġauveini nai, voina eġabiani moġa tu, ġevarevare-viniani dagarana asi bita toni. Asiġina ġinavaġi. Mo tu ġia ġena ġauvei voina veġata.

⁵ Senaġi tarima ta, ġia tu ġauvei o veiġa ta asi eveiani, senaġi ġia tu Barau, rakava tarimari vei-iobukaiobuka tarimari ai evaġa-iaġorini Barauna, ġenai eveġabidadamani. Mai tarima maiġa tu ġena veġabidadama lorinai, Barau na ekiraġiani, ġia tu vei-iobukaiobuka tarimana etoni.

⁶ Davida na maki mo guruġa sebona ekiraġiato. Maġesi tarimari tu ekirarito, beġe iakuni etato. Mo tu ġauvei o veiġa tari asi ġeveirini, senaġi

Barau, rakava tarimari asi ġeri vei-rakava etorini Barauna, na ġia tu ekirarini, vei-iobukaiobuka tarimari etorini. Davida ekirato,

7 “Ġeri kira-sirivagi etuġamaġi-ftoġarini,

e ġeri rakava eġabi-vaġirito tarimari tu beġe iakuni.

8 Vereġauka na ġena rakava iatanai asi ma beiavi-kaurini tarimana tu beiakuni.”

9 Vevaġa-namo ema iaku maġesiri tu tauġaniri kefirri ġelama-vaġirito tauri moġo ġeri, ba tauġaniri kefirri asi ġelama-vaġirito tauri maki ġeri? Varau bita kira, Aberahamo tu ġena veġabidadama lorinai, Barau ekirato, ġia tu vei-iobukaiobuka tarimana etato.

10 Aitoma ġia vei-iobukaiobuka tarimanai eiaġoto? Tauġanina kefirri ġelama-vaġiato murinai, ba tauġanina kefirri roġosi roġo beġene lama-vaġia nuġanai. Ġia tu dia tauġanina kefirri ġelama-vaġiato murinai vauro Barau ekirato, ġia tu vei-iobukaiobuka tarimana etato. Asigina. Ġia tu tauġanina kefirri roġosi roġo beġene lama-vaġia nuġanai, vei-iobukaiobuka tarimanai eiaġoto.

11 Ġia tauġanina kefirri tu ġabi vauro ġelama-vaġiato. Mo tauġanina vauro ma ġelama-vaġiato moġa tu, ġia tauġanina roġosi roġo beġere lama-vaġia nuġanai vei-iobukaiobuka tarimanai eiaġoto, moġa vetoġana moġo ma evaġa-moġoniato. Monana Aberahamo tu Barau ġevaġa-moġoniani tarimari tamari ai eiaġoto, enabe tauġaniri kefirri asi ġelama-vaġirito senaġi. Koruna Barau ġevaġa-moġoniani tarimari tu, Barau na eġabi-raġerini vei-iobukaiobuka tarimari.

12 Ema ġia tu tauġaniri kefirri ġelama-vaġirito tarimari maki tamari. Au na dia tauġaniri kefirri ġelama-vaġi-kavarito tarimari akiraġirini. Asigina. Senaġi tamara Aberahamo tauġanina kefirri roġosi beġere lama-vaġia nuġanai, Barau eġabidadama-viniato kavana, ġia na maki Barau moġesina ġeġabi-dadama-viniani tarimari akiraġirini.

Taravatu e veġabidadama

13 Barau na Aberahamo ekira-toreato, ekirato, ġia ma garakana ġesi na mai tanobara beġe ġaunaiani. Mai kiraġitore guruġana Barau na ekiraġiato tu, dia Aberahamo na taravatu ekorana-iaġiato nai, senaġi Barau eġabidadama-viniato nai, benamo vei-iobukaiobuka tarimanai eiaġoto.

14 Bema taravatu ġekorana-iaġiani tarimari na tanobara beġere ġaunaia nai, veġabidadama tu asi ġena namo ta, ema kiraġitore guruġana maki guruġa korina moġo.

15 Aba, taravatu na tu Barau ġena baru baregona evaġa-ġoraiani. Senaġi bema taravatu asigina tu, tarima ta na taravatu ta asi beleaiani.

16 Moġa lorinai, guruġatore tu veġabidadama ġenana eiaġomani, be Barau ġena namo e varevare-bara nuġanai guruġatore tauri moġoniri Aberahamo ma garakana ġesi ġeri ai beġe ġorani. A dia taravatu gaburenai ġetanuni tarimari moġo ġeri ai, senaġi Aberahamo ġena veġabidadama nuġanai ġetanuni tauri maki ġeri. Aberahamo tu ġita mabarara tamara.

17 Buka Vevaġi evetoreto kavana: “Au na ġoi tu tanobara ġutuma tamari ai avaġa-iaġomuto.” Mai Aberahamo na evaġa-moġoniato Barauna ġoiranai Aberahamo tu ġita tamara. Mai Barau na mase tarimari ma evaġa-maġuri ġenoġoirini ema tanobarai asi ġeġorato dagarari evaġa-ġorarini.

18 Aberahamo ġena tuġamaġikau noġa asi vaġa-tubukauna dagarana ta, senaġi Barau ġena guruġai evetuġa-maġi-kauto, ma evaġa-moġoniato

lorinai, tanobara ġutuma tamari ai eiaġoto. Barau na ekira-toreato ilailanai: “Ġoi garakamu tu beġe vovokani visiġu kavana.”

¹⁹ Aberahamo mo negai ġena laġani tu dori sinau sebona (100), ma tauġanina maki emoirato, ma mase tauġaniri ilailari ai varau eiaġoto, e Sara maki asi ilaila ġia mero ta beġabiani riba. Ġia na maġeri tu eġitarito, senaġi maġeri na ġia ġena veġabidadama asi veġata ġevaġa-moiraiato.

²⁰ Moġa nuġanai ġia asi etuġamaġi-iauvoiauvoto, asi edaradarato, ema asi eġareva-ġarevato maki Barau ġena guruġatore iatanai. A ġia tu ġena veġabidadama moġo evaġa-gwaġiġiato, benamo Barau moġo evaġa-raġeato.

²¹ Korana ġia tu nuġana mabarana ġesi eribato, Barau ma seġukana, kara ekiraġi-toreato dagarana tu bevaġa-ġoraiani.

²² Moġesina naima Barau na ekiraiato, “Ġia tu vei-iobukaiobuka tarimana,” etato.

²³ Mai guruġa maġeri, “Ġia tu vei-iobukaiobuka tarimana,” tu dia Aberahamo ġereġana ġena moġo ekiraġiato,

²⁴ senaġi ġita ġeraġi maki ekiraġiato. Ġita ġera Vereġauka Iesu Keriso mase na evaġa-varigisi ġenoġoiato Barauna tavaġa-moġoniani tarimara maki Barau na bekirarani, vei-iobukaiobuka tarimara, betoni.

²⁵ Barau na Iesu etuġu-iaġomaiato, tanobarai emaseto, ġita ġera rakava benema voi-vaġiri ġana. Ma ġita Barau na vei-iobukaiobuka tarimaraġi bene kiraġira ġana uranai, mase na ma evaġa-varigisi ġenoġoiato.

5

Barau na ġita vei-iobukaiobuka tarimara etato

¹ Moġa lorinai ġita tu ġera veġabidadama lorinai, Barau ekirato, ġita tu vei-iobukaiobuka tarimara etato, ma ġera Vereġauka Iesu Keriso ġenana Barau ġesi maino taġabiato.

² Ġita tu Iesu Keriso bakunai veġabidadama ġenana Barau ġena namo e varevare-bara nuġanai bita bere-toga, benamo nuġanai taruġa-taġoni. Ema taiakuni, korana tavetuġamaġikauni, Barau na vau ġia marevana baregona bevinirani.

³ Dia moġa moġo, senaġi ġera midigumidigu ai maki bitana verere, korana ma ribara, midigumidigu na vevaġa-gwaġiġi evaġa-ġoraiani

⁴ Vevaġa-gwaġiġi na veribaġani bita vaġa-darererini, ma veribaġani bita vaġa-darererini tu, Barau marevana baregona bita tuġamaġi-kauani.

⁵ Mai tuġamaġikau na tu asi bevaġa-dabara doktorani, korana tu Barau na Iauka Veaġa evinirato, maiġa ġenana ġita lorura ġuturi ai Barau na ġena veuravini ebubu-ġurairato.

⁶ Ġoseġaġi, ġita tu roġo asi kokorera nuġanai, Barau na eġabi-toreato ġaronai varau Keriso emaseto, ġita, Barau tatuġamaġi-fitoġaiani tarimara, bene voi-ġenoġoira ġana.

⁷ Tarima namona uranai ta bemaseni ba? Gwaġiġi! Senaġi tarima namo vedaureana uranai tu, betaġu ta bevetuġamaġi-kwalimuni, benamo bemaseni riba.

⁸ Senaġi toma mainai tu Barau ġena veuravini ema vaġa-foforiani: Ġita roġo rakava tarimara nuġanai, Iesu tu varau emaseto ġita dairai.

⁹ Ribara, Iesu rarana na bema iarevara, benamo asi ġera rakava besi. Moġa lorinai ġia bakunai, Barau ġena baru baregona bevaġa-foforiani ġaronai bevaġa-maġurirani.

¹⁰ Ĝita roĝo Barau tavetari-viniato-ĝoi nuĝanai, Barau Natuna ĝena mase na Barau ĝesi ma evaĝa-veĝata ĝenoĝoirato. Toma ĝita tu Barau ĝatanai ma tiaiĝo-ĝenoĝoito, moĝa lorinai Iesu emaguri-ĝenoĝoito ĝenana, vevaĝa-maguri maki bita ĝoitaĝoani.

¹¹ Dia moĝa moĝo, senaĝi ĝera Vereĝauka Iesu Keriso bakunai Barau ĝenai bitana verere, korana Iesu Keriso ĝenana ĝita Barau ĝesi maino bitama ĝabia ema bitama veĝata.

Adamu tu mase evaĝa-ĝoraiato, Keriso na tu maĝuri evaĝa-ĝoraiato

¹² Ĝita ribara, tarima sebona evei-rakavato, benamo ĝia ĝenana rakava tanobarai ema bere-toĝato. Ma rakava na mase eĝabi-iaĝomaiato. Moĝesina naima mase na tarimarima mabarari eguguvirito, korana tarimarima mabarari ĝevei-rakavato.

¹³ Moĝa anina tu, vei-rakava tanobarai tu eĝora-guineto, a Mose ĝenana taravatu tu gabi vauro eiaĝomato. Senaĝi bema taravatu asigina nai, Barau na vei-rakava, o sikira taravatu ĝedaĝa-seĝiani rakavana, tarima ta ĝenai asi bekiraĝiani.

¹⁴ Senaĝi ribara, Adamu ĝena nega na beiaĝoma mo Mose ĝena negai, tarimarima tu mase ĝena seĝuka gaburenai ĝetanuto-ĝoi. Oba, Barau ĝena vevaĝa-naĝi guruĝana ta tu asi ĝekira-sirivaĝi viniato Adamu na eveiato kavana, senaĝina ĝia mabarari maki mase ĝena seĝuka gaburenai ĝetanuto-ĝoi.

Adamu na ĝoirai vau beiaĝomani tarimana moĝo ema vaĝa-foforiato. (Mo tu Keriso).

¹⁵ Senaĝi mai varevare dagarana asi voina maĝa tu irau, dia mo Adamu ĝena vei-rakava ĝesi ilaila. Mai tarima sebona ĝena vei-rakava dainai, tarima ĝutuma ĝemaseto. Senaĝi Barau ĝena namo e varevare-bara ema varevare dagarana mo vei-rakava ĝena seĝuka evanaĝiato: Barau ĝena mai namo baregona ema varevare dagarana tu tarima sebona, Iesu Keriso, ĝenana eiaĝomato, ma tarimarima ĝutuma ĝeri ai evebubu-riĝoto.

¹⁶ Barau ĝena varevare dagarana tu irau, dia mo tarima sebona, Adamu, ĝena vei-rakava kavana: Vei-rakava sebona moĝo eĝorato ĝenana, Barau na tarimarima e tanobara mabarana ekota-viniato, ma rakava voina metona baregona iatarai etoreato. Senaĝi Barau ĝena varevare dagarana rakava vovoka muriri na ema bere-rosito, monana tarimarima tu vei-iobukaiobuka tarimari ai evaĝa-iaĝorito.

¹⁷ Moĝoni, mo tarima sebona na mo vei-rakava eveiato, monana tanobara mabarana mase ĝena seĝuka gaburenai etanuni. Mase tu mai vei-rakava eveiato tarimana ĝenana eiaĝomato tanobara ĝana. Senaĝina tarima sebona, Iesu Keriso, ĝia na eveiato dagarana na mo vei-rakava eveiato tarimana ĝena veĝa seĝukana na evanaĝiato. Tarimarima mabarari, Barau ĝena namo ma varevare-bara barego lelevaĝina ema vei-iobukaiobuka varevarena beĝe ĝabiani tarimari tu, Iesu Keriso ĝenana maguri beĝe ĝabiani, benamo kini kavana beĝe vereni.

¹⁸ Mo Adamu ĝena vei-rakava sebona dainai, Barau ekirato, tarimarima mabarari tu vei-rakava tarimari ema rakava voina beĝe ĝabiani etato. A Keriso ĝena veĝa iobukaiobukana sebona ĝenana, tarimarima mabarari vei-iobukaiobuka tarimari ai beĝe iaĝoni ma maguri beĝe ĝabiani riba.

¹⁹ Ema tau sebona ĝena kira-sirivaĝi na tarimarima vovoka vei-rakava tarimari ai ĝeiaĝoto. Moĝa ilailana, tau sebona ĝena seĝaĝi na tarima ĝutuma iobukaiobuka tarimari ai bevaĝa-iaĝorini.

²⁰ Betaġu taravatu etore-kauato tu rakava bene barego ġana. (O sikira, taravatu ġenana tarimarima ġeri rakava mabarari beġene fofori-ginikau). Senaġi vei-rakava ebaregoni gabunai tu, Barau ġena namo e varevare-bara maki ebarego-lelevaġini.

²¹ Guinena tarimarima tu vei-rakava ġena veġitaġau seġukana gaburenai ġetanuto, monana mase eġorato. Moġesina kavana, Barau ġena namo e varevare-bara na tu vei-iobukaiobuka evaġa-foforiani, ma maġuri vanaġivanaġi ġera Vereġauka Iesu Keriso ġenana eġabi-iaġomaiani ġita ġerai.

6

Rakava ġenai tamaseto, Keriso ġena maġuri nuġanai ġita tu maġuri

¹ Be kara bita toni? Ba sikira, rakava veiġari sivei-ġenoġoi ġenoġoiri, be Barau na ġena namo e varevare-bara ġerai bene vaġa-fofori barego-lelevaġiri?

² Asiġina ġinavaġi! Ġita veġabidadama tarimara tu varau tamaseto rakava ġenai, (mai tu rakava maġurina ġenana taveġitato); ma kamara dabarai tu rakava maġurina nuġanai roġo ma bita tanuni?

³ Ġita babatisto taġabiato anina tu maġa: Ġita na mo babatisto taġabiato tu Keriso Iesu ġena maġuri nuġanai tabere-toġato, ma mo babatisto taġabiato nuġanai, ġita tu ġia ġesi tamase-sebonato. Ba ġomi maġa tu asi ribami?

⁴ Babatisto taġabiato anina tu, ġita maki Keriso ġesi tamase-vegogoto, ma Barau na Keriso ġesi eguri-sebonarato. Benamo Tamara marevana ema seġukana baregona na Keriso mase na ma evaġa-varigiġi ġenoġoiato kavana, ġita maki maġuri variġu gerageranai bitana tanu.

⁵ Bema ġita Keriso ġesi tasebonato, benamo ġia emaseto kavana ġita maki tamaseto nai, moġoni, ġia Barau na mase na evaġa-maġuri ġenoġoiato kavana, ġita maki moġesi Barau na bevaġa-maġuri ġenoġoirani veġata.

⁶ Korana ġita ribara, ġita ġerai tarima guinena moġa tu Keriso ġesi vaġa-sebo satauro ai ġeraġeto. Mo veġa eġorato tauna tu, rakava eveito-ġoi tauġanina ma ġena ura rakavari ġita ġerana bene koki-fitoġa moġovaġia, be ġita veġa rakavari ġeri tuġu-rakaorakao tarimarai asi ma bitana iaġo ġana.

⁷ Korana mase tarimana na veġa rakavana ta asiġina ġinavaġi ma bevei-ġenoġoiani.

⁸ Bema ġita Keriso ġesi tamase-vegogoto nai, moġoni veġata taribani, Keriso ġesi maki bita tanu-vegogoni.

⁹ Korana ma ribara, Keriso mase na tu varau evariġiġi-ġenoġoito, be asi ma bemase-ġenoġoini; mase asi seġukana ġia ġenai.

¹⁰ Keriso mo emaseto nai tu, rakava ġena seġuka evaġa-keto-moġovaġiato. A toma mai maġuri ġia na etanu-iaġiani maġa tu, Barau ġena moġo etanuni.

¹¹ Mo dabara sebonai ġomi maki tauġemi iniġesi boġono vekiraġi: Gomi tu veġa rakavari ġeri ai tu varau ġomaseto, ma Keriso Iesu ġena maġuri nuġanai ġomi tu maġuri ġotanuni Barau ġena.

¹² Moġa lorinai rakava na mani ma berakavani tauġanina maniġa ġenana ġomi asiġina ġinavaġi bene ġori-kaumi. Korana bema mani ma berakavani tauġanina maniġa rakava na beġori-kauani nai, ġomi tu ġia ġena ura rakavari boġo korana-iaġirini.

¹³ Tauġanimi legana ta rakava asi boġono vinia, be veġa rakavari veiveiri farefarenai asi bene vaġa-iaġoa. A ġomi tu mase na ma evaġa-maġuri ġenoġoimito lorinai, tauġanimi mabarari Barau boġono vinia. Tauġanimi legari mabarari maki Barau boġono vinia, veġa maorori beġene vei ġana.

14 Be rakava na ġomi asi ma bene ġori-kaumi, korana ġomi tu dia taravatu ġena seġuka gaburenai ġotanuni. Asiġina. Ġomi tu Barau ġena namo ema varevare-bara nuġanai ġotanuni.

Vei-iobukaiobuka ġena vetuġunaġi tarimara

15 Be kara maia? Veiġa rakavari roġo bitana vei, korana ġita tu dia taravatu gaburenai tatanuni, ne Barau ġena namo e varevare-bara nuġanai tatanuni, be bisini vei-rakava ba? Asiġina ġinavaġi!

16 Ġomi asi ribami, bema tauġemu tarima ta ġena tuġu-rakaorakao tarimamu ai ovevaġa-iaġoni, garona bono seġaġia otoni nai, ġoi tu mo tarima ġena tuġu-rakaorakao tarimamu ai varau oiaġoni. Mo tu rakava ġena vetuġunaġi tarimamu ai boiaġoni, benamo dokonai tu boa maseni. O Barau ġena guruġa bokorana-iaġiani, benamo vei-iobukaiobuka tarimamu ai boiaġoni.

17 Barau sitanikiu-vinia, korana ġomi tovtovonai tu rakava ġena tuġu-rakaorakao tarimami, senaġi toma tu Barau ġena guruġa moġonina ma nuġami mabarari ġesi ġokorana-iaġiani, ġevaġa-ribamito-ġoi ilailanai.

18 Benamo Barau na rakava ġenana eruġa-vaġimito, ma vei-iobukaiobuka ġena vetuġunaġi tarimami ai ġoiġoto.

19 Au na mai maġuri maġeri tu tuġu-rakaorakao tarimari ġeri maġuri ai ama kiraġirini boġono tuġamaġi-fakari ġana, korana ġomi tauġani rekenai tu roġo asi kokoremi. Ġomi guinenai mani tauġanimi legari maniġeri tu veiġa mirori ema veiġa rakava kwaikwairi ġeri tuġu-rakao-rakao dagarari ai ġovaġa-iaġorito. A inította mani tauġanimi taviri maniġeri tu guinenai rakava ġenai ġoveirito ilailanai, vei-iobukaiobuka ġena vetuġunaġi dagarari ai boġono vaġa-iaġori, be beġene veaġa-tanu.

20 Ġomi rakava ġena tuġu-rakaorakao tarimami ai roġo ġotanuto-ġoi neganai, vei-iobukaiobuka tu asi ġena gabu ta ġomi ġemi maġuri nuġanai.

21 Ġomi mo veiġa ġoveirito moġeri ġerina tu kara namona ġoġoitaġoato, ei? Moġeri veiġa toma ġotuġamaġi-ġenoġoirini nai, ġemaiakamini. Moġeri veiġa magonai tu mase boġo ġoitaġoani.

22 Senaġi ġomi toma tu rakava nuġana na eġabi-vaġimito, ma Barau ġena tuġu-rakaorakao tarimami ai ġoiġoto. Barau ġena tuġu-rakaorakao tarimami ai boġo iaġoni, monana namo boġo doġariani dagarana na tu veaġa-bara tarimami ai boġo iaġoni. Benamo monana ġomi maġuri vanaġivanaġi boġo ġabiani.

23 Korana rakava voina tu mase, a Barau ġena varevare ġera Vereġauka Keriso Iesu ġenana bita ġabiani dagarana tu maġuri vanaġivanaġi.

7

Ġita tu dia taravatu ġena seġuka gaburenai tatanuni

1 Tarikaka-ġore, ġomi tu moġoni asi ġoriba-maoroni? Ġomi tu taravatu ma ribami tarimami au na avaġa-guruġamini. Ribami, tarima roġo maġuri etanuni nai, ġia tu taravatu ġena seġuka gaburenai etanuni, a emaseni nai, taravatu tu asi ġena seġuka ġia ġenai.

2 Vaġa-ilailana, veġaraġo vavinena, bema ġaraġona roġo maġuri etanuni nai, ġia tu veġaraġo taravatuna gaburenai roġo betanuni. A ġaraġona bemaseni murinai, mo veġaraġo taravatuna moġa, seġukana gaburenai asi ma betanuni, befakani.

³ Bema ġia ġaraġona roġo maġuri nuġanai, ma bere veġaraġo-sirivaġi nai, ġia tu veġura-vanaġi vavinenai bitara kiraġia. Senaġi bema ġaraġona bere mase, ġia veġaraġo taravatuna ġena seġuka na tu bere raka-vaġi lorinai, asi bere veġura-vanaġi. Aba, tau fakana ta ma bere ġaraġo maki, mo tu asi bere veġura-vanaġi.

⁴ Tarikakagu, ġomi maki moġesina, Keriso tauġanina emaseto, monai tu ġomi maki taravatu ġenai ġomaseto, (mai tu, ġomi tu dia taravatu ġena seġuka gaburenai ġotanuni). Mo veġa eġorato anina tu, ġomi Keriso ġena tarimarimai boġono iaġo ġana. Ġomi Keriso ġena tarimarimai goiaġoto korana tu, ġita mabarara ġwaġwara namori beġene vetore Barau ġenai ġana. Mai Keriso maġa tu Barau na mase na ma evaġa-varigisi ġenogoiato tarimana.

⁵ Ġita na tauġanira ġeri ura veġari roġo takorana-iaġirito-ġoi neganai tu, taravatu na ura rakavari evaġa-bere rosirito-ġoi. Moġeri ura rakavari ġita tauġanirai ġeġauveito-ġoi lorinai, ġita na mase beġe vaġa-ġorarini veġari taveirito-ġoi.

⁶ Senaġi ġita toma taravatu ġenana eġabi-vaġirato, korana mo ebaru-barurato-ġoi dagarana ġenai varau tamaseto. Be ġita toma tu Iauka Veaġa ġena dabara variġunai Barau vetuġunaġina bita iaġo-vininai, a dia Buka Veaġi ġetorerito taravaturi koranaiaġi-gigitariri dabaranai.

Taravatu ġenana tu kara namona bita ġabiani?

⁷ Ini tu kara ma bita toni? Taravatu tu rakava dagarana bita toni ba? Asiġina ġinavaġi! Moġoni, au vei-rakava tu asi bara ribaia, senaġi taravatu ġenana, naima aribaiato. Ilailana, au asi bara riba, tarima tari ġeri farefare mata-ġaniġaniri tu rakava veġana, bere taravatu iniġesi asi bere kira, "Tarima tari ġeri farefare mata-ġaniġaniri asi bono vei."

⁸ Senaġi vei-rakava na Barau ġena mo taravatu guruġana ġenai dabara ta eġita-doġariato, benamo mo dabara na eġauveito, benamo au nuġagu ai tarima tari ġeri farefare mata-ġaniġaniri tuġamaġiri e veġari irauirauri ema vaġa-berebere rosirito. Korana bema taravatu asiġina nai, vei-rakava tu mase au ġegu ai, be asi ġena seġuka ta, (korana ġena seġuka nuġagu ai eġauveini moġa asi ribagu bene).

⁹ Taravatu roġosi roġo bara ribaia neganai, au tu maġuri atanuto-ġoi. Senaġi taravatu eiaġomato neganai, vei-rakava au ġegu ai eġuru-varigisito, emagurito.

¹⁰ Benamo au tu amaseto, korana vei-rakava ġegu ai maġuri bene. Monana au ama ribato, maġuri bere ġabi-iaġomaia taravatuna na tu mase moġo eġwa-iaġomaiato.

¹¹ Korana vei-rakava na taravatu guruġana ġenai dabara ta eġita-doġariato, benamo mo dabara na eġauveito, benamo au eġofa-darereguto. Be vei-rakava na au tu taravatu ġenana evaġi-maseguto.

¹² Moġa lorinai taravatu tu veaġa, taravatu guruġari maki veaġa, maoro ema namo.

¹³ Be, au tu mo dagara namona na ema vaġi-maseguto? Asiġina! Au tu vei-rakava na evaġi-maseguto. Mo dagara namona eiaġomato anina tu, vei-rakava vetoġana korikori nema vaġa-bererosia, be bitana riba, vei-rakava tu rakava kwaikwai. Senaġi vei-rakava tu mo dagara namona ġenana eġauveito, benamo au evaġa-maseguto. Be Barau ġena taravatu guruġana evaġa-foforiani, vei-rakava tu dagara rakava kwaikwaina.

Rakava na ġera maġuri eguine-iaġirini

14 Āta ribara, taravatu tu Barau Iaukana ġenana eiaġomato dagarana, a au tu tarimarima moġo, tauġani ai atanuni. Ma au tu vei-rakava na evoiguto, benamo ġena tuġu-rakaorakao tarimagu ai evaġa-iaġogoto.

15 Au na kara aveiani tu asi maki atuġamaġi-fakaiani. Korana mo veġa, aurani bana veiri veġata atoni veġari, tu asi aveirini, senaġi asi auravirinini veġari tu aveirini.

16 Bema asi auravirinini veġari aveirini nai, taravatu tu ama vaġa-moġoniani, ġia tu moġoni namo.

17 Mo veġa nuġanai, mo tu dia au tauġegu nuġagu sigai mo vei-rakava aveiani. Asiġina! Mo tu mo vei-rakava au ġegu ai etanuni monana eveiani.

18 Au ma ribagu, au ġegu ai mai tauġanina ma ġena veġa e ura rakavari nuġanai namo ta asiġina-ġinavaġi etanuni. Moġoni, aura-baregoni namo veġari bana veiri atoni, senaġi ġauvei-iaġiri ġegu ai tu asi ilaila.

19 Ġegu ura tu veġa namori bana veiri veġata atoni, senaġi asi akokoreni, veġa rakavari moġo aveirini. Moġoni, asi veġata aurani veġa rakavari bana veiri, senaġina roġo aveirini.

20 Moġa lorinai, bema au na kara aveiani tu asi veġata aurani bana veia atoni veġana aveiani nai, mo tu dia au tauġegu nuġagu sigai aveiani. Asiġina! Mo tu vei-rakava au nuġagu ai etanuni, monana eveiani.

21 Be au ġegu maġuri ai dagara ta noġa moġo taravatu ta kavana na eguine-iaġiguni, maiġesi eġauveini ama ġoitaġoani: Au namo veġari navei atoni nai, rakava tu moġa nuġagu ai eġauveini.

22 Au iaukagu ai Barau ġena taravatu tu aiaku-iaġiani.

23 Senaġi au na taravatu o seġuka ta maia ama ġitaiani au tauġanigu legari tari nuġari ai ġeġauveini, au ġegu tuġamaġi na evaġa-moġoniani taravatuna ġevetari-viniani. Mai taravatu ta tu vei-rakava ġena taravatu o seġuka, ġia au tauġanigu legari ai eġauveini, ma au eġabiguni, benamo vei-rakava ġena dibura tarimanai evaġa-iaġoguni.

24 Au tu moġoni rakava kwaikwai tarimagu! Deikara na au bevaġa-maġuriguni mai mase tauġanina nuġana na?

25 Barau sitanikiua, korana ġita ġera Vereġauka Iesu Keriso ġenana evaġa-maġuriguto.

Moġa lorinai au tauġegu ġegu tuġamaġi na tu Barau ġena taravatu vetuġunaġina aveini, senaġi tauġanigu na tu vei-rakava ġena taravatu o seġuka vetuġunaġina ai-aġo-vinini.

8

Barau Iaukana nuġanai bitana maġuri

1 Tauna moġa, initoma Keriso Iesu ġena maġuri nuġanai ġetanuni tarimari tu, Barau na vei-rakava tarimari asi bekiraġirinini ema asi bekota-vinirinini.

2 Korana au tu Keriso Iesu ġena maġuri nuġanai maġuri Iaukana ġena taravatu seġukana na vei-rakava ema mase ġeri taravatu seġukari na varau eruġa-vaġiguto.

3 Taravatu tu tauġani, ma ġena ura rakavari tauġanina, na varau evaġa-moiraiato, be asi ġena seġukai eiaġoto, asi ilaila bevaġa-kavarani. Moġa lorinai taravatu na asi ilaila beveiani ġauveina tu Barau na eveiato. Mo tu Barau tauġena na Natuna korikori vei-rakava tarimari ilailari ai etuġa-iaġomaiato, rakava benema vaġa-darerea ġana. Benamo Keriso ġenana Barau na vei-rakava ġena seġuka tauġani ġenai ekiraġi-fitoġaiato, kerere ma evaġi-maseato.

⁴ Barau na mo veigā eveiato anina tu, taravatu na vei-iobukaiobuka veigāna, eura-viniani veigāna, ġita ġerai beġene fofori-ginikau ġana. Korana toma tu tauġani ġena urai asi tarakani, ne Iauka Veaġa ġena urai tarakani.

⁵ Tauġani ġena ura lorinai ġetanuni tarimari tu, tauġani na eura-vinirini dagarari moġo ġetuġamaġi-taġorini; a Iauka Veaġa ġena ura loriri ai ġetanuni tarimari tu, Iauka Veaġa na eura-vinirini dagarari moġo ġetuġamaġi-taġorini.

⁶ Tarima ta tauġani ġena ura na eġori-kauani tarimana ġena tuġamaġi tu mase evaġa-ġoraiani; a Iauka Veaġa ġena ura na eġori-kauani tarimana ġenai maġuri e maino etanuni.

⁷ Tauġani dagarari etuġamaġirini tarimana ġena tuġamaġi na tu Barau evetari-viniani. Korana ġia ġena mo tuġamaġi na tu Barau ġena taravatu asi ekorana-iaġiani, ema asiġina-ġinavaġi maki bea korana-iaġiani riba.

⁸ Moġesina naima tauġani ġena urai ġerakani tarimari na, Barau tu asiġina-ġinavaġi beġe vaġa-iakuani.

⁹ Senaġi ġomi tu dia tauġanimi ġeri ura na ġeġori-kaumini tarimami. Ġomi tu Iauka Veaġa na ġemi maġuri eġori-kaurini, korana Barau Iaukana tu ġomi nuġami ai etanuni. Boġono riba, deikara ġenai Keriso Iaukana asi etanuni, ġia tu dia Keriso ġena tarima.

¹⁰ Bema Keriso ġomi tata nuġami ai etanuni nai tu, enabe tauġanimi beġe maseni vei-rakava dainai, senaġina Iaukani tu maġuri ġetanuni, korana vei-iobukaiobuka tarimami ai varau ġoiġoto bene.

¹¹ Iesu tu Barau Iaukana na mase na ma evaġa-varigġisi ġenoġoiato. Ma bema Barau Iaukana ġomi nuġami ai etanuni nai, mani Iauka ġenana Barau na mani ma berakavani tauġanina, ġomi ġemi ai maniġa, maki maġuri beviniani.

¹² Moġa lorinai, tarikaka-ġore, ġita ġera ġauvei toma tu dia tauġani rekenai bitana tanu, ma tauġani ġena rakava veigari ma bitana vei-tanu.

¹³ Korana bema tauġani ġena vei-rakava maġurinai boġo tanuni nai, boġo maseni; senaġi Iauka Veaġa ġena ura dabaranai boġo tanuni nai, tauġani ġena veigā rakavari boġo vaġi-maserini, benamo ġomi tu boġo maġurini.

¹⁴ Barau Iaukana na eġori-kaurini tarimari tu Barau natuna.

¹⁵ Korana ġomi na Iauka Veaġa ġoġabiato, maninana tu dia tuġu-rakaorakao tarimami ai ma bevaġa-iaġomini, be ma boġo garini maia. Asiġina. Mani tu venatu-vanaġi Iaukana ġoġabiato. Ġita tu ġia ġenana tataġi-ġaba-raġeni, takirani, "Tama, Tamagai o," taton.

¹⁶ Iauka Veaġa tauġena ġita Iaukara ġesi ġeguruġa-vegogoni, ġekirani, ġita tu Barau natuna.

¹⁷ Bema ġita Barau natuna nai, ġita maki ma bakura, be Barau na ekiraġi-torerito dagarari bita ġaunarini. Mai tu Keriso na varau eġaunarito dagarari Keriso ġesi bita ġauna-sebonarini. Mo tu dabara sebonai moġo: Keriso emidigu-midiguto moġesi bita midigu-midiguni nai, ġia na marevana baregona eġabiato moġa, ġita na maki bita ġabiani.

Barau marevana baregona ġoirai bita ġabiani

¹⁸ Ġoirai Barau marevana baregona ġita ġerai bea foforini, monana, au atuġamaġini, inította mai tamidigumidiguni maġeri tu bea vanaġirini.

¹⁹ Barau ġimana veiveiri dagarari mabarari ġevenari-taġoni ma vetuġa-maġikauri ġesi, Barau na ġia natuna bevaġa-foforirini ema ġena mareva na mamana baregona bevinirini ġarona ġetanu-vaġa-nogaiani.

²⁰ Korana tu Barau ġimana veiveiri dagarari mabarari tu benamo asi ġeri namo tai ġeiaġoto. Mai tu dia ġia tauġeri ġeurato asi ġeri namo ai beġene iaġo ġetato nai. Asiġina. Mai tu Barau tauġena ġena urai moġesina eveirito. Senaġina ġoirai dagara namona ġeri ai bevaġa-ġoraiani, moġa ma ġenari-taġoani.

²¹ Korana Barau na eveirito dagarari mabarari mase ema boraġa ġena dibura nuġanai ġetanuni roġo. Senaġi ġaro ta maiġeri dagara mabarari Barau na mo mase ema boraġa ġena dibura na bea ġabi-veġitarini, benamo Barau natuna ġeri gabu fakanai, ma mareva baregona gabunai, ma betorerini.

²² Ġita ma ribara, Barau ġimana veiveiri dagarari mabarari tu, vavine ġeġabi ġana nuġari ġemidiguni kavana, ġia midigu ġeġanini. Mabarari ġeloduni, ġeġabani, beiaġoma mo toma.

²³ Senaġi mai tu dia ġia moġo ġeloduni, ġeġabani. Asiġi. Ġita Iauka Veaġa ġwaġwana guinena taġabiato maiġera maki nuġarai taloduni, taġabani, Barau na bene natu-vanaġira ġarona tanari-taġoani nuġanai. Mo tu ġita tauġanira bevaġa-maġuririni negana tanari-taġoani.

²⁴ Ġita tu mai tuġamaġikau bakunai Barau na ġita evaġa-maġurirato. Senaġi tatuġamaġi-kauani dagarana taġita-ġoitagoani nai, asi ma bita tuġamaġi-kauani. Moġa lorinai kamara deikara na varau eġoitagoato dagarana roġo etuġamaġi-kauani, ei?

²⁵ A bema roġosi roġo bitara ġabia dagarana tatuġamaġi-kauani nai tu, ma vevaġa-gwaġġira ġesi bita nari vaġa-noga taġoani.

²⁶ Moġa nuġanai, Iauka Veaġa na maki ġita ġera moira gaburi ai evaġa-kavarani. Ma ġita asi ribara kara bita ġauġau-iaġirini, senaġi Iauka Veaġa tauġena ġita iatarai eġauġauni. Ġia eġurigurini nai tu, etaġi-ġabarage ni. Mo etaġi-ġabarage ni gurugari tu tarimarima na asi ilaila beġe kiraġirini gurugari.

²⁷ Barau ma ribana ginikau ġita nuġara iaġasiri ai kara ġetanuni, ma Iauka Veaġa ġena tuġamaġi maki ġia tu ma ribana. Korana Iauka Veaġa tu Barau ġena ura loriri ai ġena doġoro tarimari veaġari iatarai ai eġurigurini.

²⁸ Ġita ribara, deikara Barau ġeura-viniani tarimari na ġeri ai karakara ġeġorani dagarari mabarari ġerina namo beġe ġoitagorini. Korana moġeri tarima tu ġia na ġena ura lorinai ekearito, maġuri beġene ġabia ġana.

²⁹ Barau na deideiri eriba-guinerito ġia ġeura-viniani tarimari tu ġia na eviriġirito, ġia Natuna ilailanai bene vaġa-iaġori ġana. Korana mo dabarai ġia Natuna tu maġuri guine meronai beiaġoni tarikaka ġutuma vefakari ai.

³⁰ Mo eġabi-hidirito tarimari tu ġia na ekearito tarimari; ma mo ekearito tarimari tu ġia na vei-iobuka-iobuka tarimari ai ekiraġirito; ma mai vei-maoromaoro tarimari ai ekiraġirito tarimari tu, ġia marevana baregona evinirito.

Barau ġena veuravini tu barego vedaurea

³¹ Be Barau na maiġeri veġa eveirito iatarai ai ġita tu kara bita kiraġiani? Bema Barau ġita ġesi, ġita evaġa-kavarani nai, dei na ġita beiaġoma-vinirani? Ta asiġina, korana

³² Natuna korikori maki gwaina asi eġabiato, senaġi etao-fitogaġiato ġita bitana maġuri ġana. Ma kamara dabarai tu Iesu Keriso ġesi dagara mabarari asi bevarevare-vini sebonarani?

³³ Be, Barau na eviriġirito tarimari tu deikara na bevaġa-daġarini Barau ġoirani? Ta asiġina, korana Barau tauġena na maorori ekiraġirini!

³⁴ Ma deikara na rakava voina metona bevinirini, ei? Ta asiġina, korana Keriso Iesu tu emaseto, benamo Barau na ma evaġa-maġuri ġenoġoiato. Ġia toma tu Barau ġimana aroribanai etanu-tagōni, ma ġita iatarai eġurigurini.

³⁵ Ġita tu deikara na Keriso ġena veuravini nuġana na beġabi-ġerevaġirani? Meto ġerai ġeraġasini moġerina ba? Maġuri gwaġigiri ġerai ġeraġasini moġerina ba? Gevaġa-midigu midigurani e ġelai-rovo-rovorani moġerina ba? Vito nanu mase taġoitagōrini moġerina ba? Asi kefiru dabuġari tatanuni moġerina ba? Vevaġa-gari dagarari taġoirarini moġerina ba? Vetari baġari na beġe vaġirani monana, ei? Asiġina veġata!

³⁶ Buka Veaġai ekirani kavana,

“Ġai tu ġoi daimu ai vanaġivanaġi ġevaġi-masema veġata ġetoni.

Ġai tu beġene vaġi-maseri ġetoni mamōeri kavana ġeheimani.”

³⁷ Senaġi euravini-baregorani Kerisona ġenana maġeri meto mabarari nuġari ai takokoreni veġata, be tavaġa-darererini.

³⁸ Korana au ama riba-maoroni, ġita tu dagara ta na asi ilaila veġata Barau ġena veuravini ġenana beġabi-ġerevaġirani: Mase o maġuri, aneru o iauka rakavari, initoma taġitarini dagarari na o ġoirai vau mani beġe ġorani dagarari na, o seġuka kotari,

³⁹ guba tuġunai dagara ta o tanobara gaburenai mase gabuna dagarana ta, o Barau ġimana veiveiri dagarana ta na asiġina-ġinavaġi Barau ġena veuravini na beġabi-veġitarani, mo veuravini tu Barau na ġita evinirato, korana ġita tu ġera Vereġauka Keriso Iesu nuġanai tatanuni.

9

Isaraela, Barau na eġabi-hidiato besena

¹ Au tu Keriso ġena maġuri nuġanai atanuni, naima asi aġofaġofani, guruġa moġoniri akiraġirini, Iauka Veaġa na au nuġagu ai evaġa-fofori ġinikauani, ma au nuġagu iaġasina na evaġa-moġoniani.

² Au tu nuġagu taġitaġi asikei, ma ġegu nuġa-vekwaraġi Isaraela tarimari iatarai ai maki asi ekorini.

³ Ġegu ura baregona tu maġa moġo: Bere namo, au tarikakagu ema ġegu doġoro korikoriri maġuri beġene ġabia uranai tu, Barau na au moġo iatagu ai rakava meto lelevaġina bere tore-kaua, ema Keriso ġenana bere torefitoġagu, be rekwarkwa tarimagu ai bara iaġo, a ġia tu au gabugu ai maġuri beġere ġabia.

⁴ Mai tu Isaraela tarimari akiraġirini. Ġia tu Barau na enatu-vanaġirito e Barau na marevana e mamana baregona evaġa-fofori vinirito; ema ġena kiraġitore guruġari baregori evinirito, taravatu maki evinirito; e Barau beġene toma-rakariġoa maġuriri ekira-vararito, ema guruġa-tore tu ġia ġeri ai eveirito.

⁵ Aberahamo, Isako, Iakobo tu ġia seseri doġori, ema tauġani rekenai bita ġitaiani nai, Keriso tu ġia ġeri bese tauna. Keriso tu Barau, ma dagara mabarari debari tu ġia. Ġia tu vanaġivanaġi bitana vaġa-raġea. Amen.

⁶ Au asi akirani, Barau ġena guruġa (Isaraela tarimari ġeri ai) tu benamo asi tauri ai beġe iaġo atoni. Asiġina. Au akirani tu, (Barau ġena guruġa tu Isaraela besena mabarana ġeri senaġi) dia Isaraela besena mabarana tu Isaraela tarimari korikori.

⁷ Ema maġesi maki asi bakirani: Ġia tu Aberahamo besena, be ġia mabarari Aberahamo natuna batoni. Asiġina. Korana Barau ekirato tu, “Ġoi besemu tu Isako ġenana moġo vau beġea maġurini.”

8 Moġa anina tu: Tauġani rekenai ġemaġurini tarimari tu dia Barau natuna. Asiġina. Ġia tu Barau ġena kiraġitore maġuriri korikoriri ai ġemaġurini tarimari moġo tu Aberahamo besena.

9 Korana Barau ġena kiraġitore guruġana tu iniġesi ekirani, “Au na baġabi-torea ġaronai ma baġenoġoi-iaġġomani, benamo Sara na natumi merona ta beġabiani.”

10 Dia moġa moġo, senaġi boġono ġitaia, Rebeka natuna kafa ruarua maki tamari tu sebona moġo, mo tu ġita tamara Isako.

11-12 Senaġi kafa roġosi beġere maġuri e veiġa namona ta o rakavana ta maki roġosi beġere vei-karaia nuġanai, Barau na Rebeka ekiraiato, ekirato, “Tau-guina na tau-muriseina ġena vetuġunaġi beiaġo-vinini.” Tovotovonai veġata Barau moġesina eguruġato, korana ġia ġena boioġa ilailanai eġabi-hidiato merona tu gabunai betanuni veġata. Tarima Barau na tu dia ġeri ġauvei e veiġa namori bakuri ai ekearini, senaġi Barau tauġena ġena ribai moġo ekearini.

13 Buka Veaġai etoreato kavana, ekirani, “Iakobo tu au na aura-viniani, senaġi Esau tu aiau-rakavaiani.”

14 Be kara bita toni? Sikira, Barau tu dia vei-iobukaiobuka Barauna sisi? Asiġina ġinavaġi veġata.

15 Korana Barau na Mose tu ekiraiato, ekirato, “Au na deikara bavetuġa-ġwaiiani tarimana, ġia tu bavetuġa-ġwaiiani, ema au na matari vetuġari baġwani tarimari tu, bavaġa-kavarini korana bavetuġa-ġwari kekei.”

16 Moġa lorinai, dagara baregona tu dia tarimarima ġeri ura o vekwaraġi, senaġi Barau ġena vetvetuġaġwa.

17 Korana Buka Veaġai ekirani, Barau na Pharao, Aigupito ġeri vere, tu maġesina ekiraiato, ekirato, “Au na ġoi kini ai atoremuto korana tu maġa, ġoi ġemu kira-sirivaġi ai au ġegu seġuka bana vaġa-rakarosia, be au aragu tanobara mabarana beġene kiraġi-foforia.”

18 Moġesina naima bema Barau eurani tarima ta nevetuġa-ġwaia etoni nai tu, evetuġa-ġwaiiani, ma eurani ta nuġana nevaġa-gwaġiġi foroforoa etoni nai, nuġana evaġa-gwaġiġi foroforoani, benamo Barau ekira-sirivaġi viniani.

19 Ma ta na au bokiraguni, bokirani, “O kara dainai ġita Barau na tu roġo evaġa-daġaranai, ekirarani, ġita tu vei-rakava tarimara veġata etoni, ei? Be deikara tu ma kokorena Barau na neveia veġata betoni veġana ġia na bekira-ġoiani, ei?”

20 Ġoi tauġemu novetuġamaġi, ġoi tu deikara, be Barau garona ġoi na oġareani? Be, ġimana na ġeveiato dagarana ta na eveiato tarimana bekiraiani, ‘Ġoi tu kara dainai au maġesina oveiguto,’ betoni ba?”

21 Ribara, ġuro eveini tarimana tu ma ġena maoro veġata, mo tano tavi baregona sebona eġabiani, monana ġuro ruarua beveirini. Ġuro ta tu namo vedaurea beveiani, mo tu vereko baregona ġana, ma ġuro ta tu beveikavaiani moġo, vanaġivanaġi daridari ġana. Mai ġuro vei tarimana maġa tu moġoni ma ġena maoro ba asiġina mo veġa beveiani nai tu, ei?

22 Barau maki moġoni moġesina eveito. Ġia eurato, ġia ġena baru baregona nevaġa-foforia, ema ġena seġuka nevaġa-bererosia, be tarimarima na beġene ribaia etato. Senaġi ebaruvini-rakava rakavarito ma bene vaġi-ġosiġosiri etato tarimari ġeri ai, nuġana eġabi-tariato e evevaġa-gwaġiġito.

23 Barau na mo veġa eveiato korana tu ġia eurato, ġia marevana barego lelevaġina moġa beġene ribaia etato. Ġita tu ġia na evetuġa-ġwarato,

ema ġita tu Barau na tovtovonai veġata erovina-torerato, ġia marevana baregona bitana ġabia ġana.

²⁴ Ġita tu ġia na ekearato tarimara. Barau na tu dia Iuda tarimama moġo ekeamato, asiġina, irau bese tarimami maki ekeamito.

²⁵ Hosea nuġanai eguruġato kavana, ekirato,

“Ġia tu dia au ġegu tarimarima,

senagi ‘au ġegu tarimarimai’ bakiraġirini,

ema asi aura-vinirini doġorona bakiraġirini, bakirani, ‘ġegu uravini doġorona’ batoni,

²⁶ ema,

‘Ġomi tu dia au ġegu tarimarima’ atato gabunai,

mo gabu sebonai ġia bakiraġirini, ‘Maġuri Barauna natuna doġorori.’ ”

²⁷ Isaia na Isaraela tarimari ekiraġirini nai tu ekirato, “Mo tu moġoni, Isaraela tarimari asisebo kone-mirina noġa moġo, senagi tarima viravira moġo beġe maġurini.

²⁸ Korana tu Vereġauka na tanobara tarimari ġeri rakava voiri tu beragavini-vaġirini, asi bekwaiboni.”

²⁹ Mai tu Isaia tovtovonai eguruġato kavana, “Bere seġuka rakava-rakava Vereġaukana na ġita besera tari asi bere goru-tariri nai, ġita tu Sodoma e Gomora kavari bitara vei.”

Isaraela tarimari asi ġeri veġabidadama

³⁰ Be ġita tu kara ma bita toni? Inġesina sikira: Irau bese tarimari tu vei-iobukaiobuka tarimari ai beġene iaġo vekwaraġina tu asi ġeveito (Isaraela tarimari kavana), senagi ġeri veġabidadama Iesu Keriso ġenai ġetoreani ġenana, vei-iobukaiobuka tarimari ai ġeiaġoto.

³¹ A Isaraela tarimari na tu taravatu ġekorana-iaġi ginikauato Barau na vei-iobukaiobuka tarimari bene kiraġiri ġana nuġanai tu, vei-iobukaiobuka tarimari ai asi ġeiaġoto.

³² Kara dainai? Korana ġia tu dia veġabidadama ġenana vei-iobukaiobuka tarimari ai beġe iaġoni ġetato. Asiġina. Ġia ġekirato tu, ġeri ġauvei e veiġa ġerina vauro vei-iobukaiobuka tarimari ai beġe iaġoni ġetato. Moġa lorinai Keriso tu ġia ġeri vedaġaraġe forenai eiaġoto, benamo ġeketo-tarito.

³³ Buka Veagai etoreato ekirani kavana,

“Ġoġitaia, au na Sionai

(o Ierusalem) fore ta atoreato,

tarima bene vaġa-vedaġa-raġeri ġana,

ema mo fore barana atoreato,

bene vei-ketori uranai.

Senagi ġia bevaġa-moġoniani tarimana tu, asiġina-ġinavaġi moġo bemaika-iani.”

10

¹ Tarikakagu mabarami, au nuġagu ġena ura baregona korikori, ma ġegu noġinoġi Barau ġenai aveiani tu, Isaraela tarimari Barau na bene vaġa-maġurini.

² Korana au na maki ġia avaġa-moġonirini, ġia na Barau ġena ura veiġari beġene korana-iaġi ginikauri veġata, senagi dagara sebona tu, Barau uravinina maġurina korikori ġia tu asi ribari.

³ Korana Barau ġenana vei-iobukaiobuka eiagħomani, moġa ġia tu asi ribari, be ġia tauġeri na ġeri vei-iobukaiobuka veiġari boruri ma ġevaġa-ruġarini. Moġesina naima Barau na tarimarima etore-roroġotorini lairi korikori ġia na tu asi ġeġabi-raġerini.

⁴ Taravatu tu eiagħomato mo Keriso ġenai ema magoto. Toma tu Keriso beġe vaġa-moġoniani tarimari mabarari tu vei-iobukaiobuka tarimari ai beġe iaġoni.

⁵ Mose na taravatu korana-iaġina ġenana vau Barau ġoiranai vei-iobukaiobuka tarimari ai beġe iaġoni lairi ekirarito nai, maiġesina ekirato, “Mai taravatu maiġeri beġe korana-iaġirini tarimari tu mai taravatu ġenana maguri beġe ġabiani.”

⁶ Senaġi veġabidadama ġenana vei-iobukaiobuka taġoitaġoani guruġana Buka Veaġai tu maiġesina ekirani, “Nuġamu ai asi bono kira, ‘Guba ġana deikara bevaraġeni?’ ” Be Keriso guba na bene ġori-mariġoa ġana.

⁷ “Ema asi bono kira maki, ‘Deikara tano gaburena ġana bevariġoni?’ ” Be Keriso mase na bene ġori-maraġea ġana.

⁸ A mai guruġa korana korikori tu maiġesi ekirani, “Guruġa tu ġoi sevisevimu ai maniġa; ġoi murumu ai ma ġoi lorumu ġutunai etanuni.” Gai na veġabi-dadama guruġana ġomi ġemi ai tu maiġa ġakiraġiani.

⁹ Mo tu bema murumu na boguruġa-foforini, bokirani, “Iesu tu Vereġauka,” botoni, ma lorumu ġutuna bovaġa-moġoniani, ġia tu Barau na mase na ma evaġa-varigisi ġenoġoiato nai, Barau na bevaġa-maġurimuni.

¹⁰ Korana loruna ġutuna na evaġa-moġoniani tarimana tu, Barau ġoiranai vei-iobukaiobuka tarimanai eiagħoni; ema muruna na eguruġa-iaġi foforini tu, maġuri edoġariani.

¹¹ Korana Buka Veaġai maiġesina ekirani, “Ġia evaġa-moġoniani tarimana tu asi bemaiaikaiani.”

¹² Anina tu, Iuda tarimari e irau bese tarimari fakari ai vetoġa boruna ta asi betanuni, korana tu ġita mabarara ġera Vereġauka tu sebona kwariġutu, Barau ġereġana moġo, ma ġia ġenai ġekea-raġeni tarimarimari mabarari tu ġena vevaġa-namo barego vedaureana evinirini.

¹³ Korana, “Barau arana beġe vatoani tarimari mabarari tu Barau na bevaġa-maġuririni.”

¹⁴ Senaġina, kamara dabarai Barau asi ġevaġa-moġoniani tarimari ġia ġenai beġe kea-raġeni? Ema kamara lai ai Barau varina asi ġeseġaġiato tauri na ġia beġe vaġa-moġoniani? Ema kamara dabarai ġia varina beġe seġaġiani, bema ta na asi beġobata-vinirini nai?

¹⁵ E deikara na beġobata-vinirini, bema Barau na ta asi betuġuani nai? Buka Veaġai ekirani kavana, “Vari Namona eġwa-iaġomaiani tarimana kwakuna tu namo vedaureana veġata, (korana namo baregona evaġa-foforiani).”

¹⁶ Senaġi dia tarimarima mabarari na Vari Namona ġeġabi-raġeani, nai Isaia maiġesi ekirani, “Vereġauka, deikara na ġaina guruġa evaġa-moġoniani?”

¹⁷ Ġita ribara, veġabidadama tu Vari Namona ġeġobata-iaġiani taseġaġiani, monana eiagħomani; ema taseġaġiani varina tu Keriso ġena guruġa.

¹⁸ Senaġi Isaraela tarimari tu kamasi? Barau ġena guruġa moġoni ġia na asi ġeseġaġiato? Asiġina, ġeseġaġiato. Korana Buka Veaġai ekirani, “Tarima kotari na tanobara mabaranaġi ġea vari-fuato,

ema ġeri guruġa maki tanobara dokona-dokona ġea ġoitaġoato.”

¹⁹ Avedanaġini: Isaraela tarimari na mo guruġa tauna asi ġedoġariato? Asiġina, ġia ma ribari. Korana Mose varau maiġesi ekirato,

“Au na ġomi tu asi arana besena ta ġerina ġomi bavaġa-maiakamini.

Ema au na ġomi tu asi ġetuġamaġi-fakani besena ġenana bavaġa-barumini.”

²⁰ Ema Isaia maki asi eguruġa-garito, ekirato,

“Au tu asi ġevetauguto tarimari na ġeġoitaġoguto,

ema asi ġevedanaġi-vetauguto tarimari ġeri ai avevaġa-foforito.”

²¹ Senaġi Isaraela tarimari tu ekirarito, ekirato,

“Boġiboġi na eiagōni mo ea lavini,

au ġimga tu seġafore ema kira-sirivagi tarimari ġeri ai atuġu-rosiani.”

11

Isaraela besena lakouna Barau na evetuġarito

¹ Moġa lorinai ma avedanaġini: Barau na ġena Isaraela tarimari tu eruġa-doġe-muriġirito ba? Asiġina ġinavaġi! Au maki Isaraela tarimagu, Aberahamo besena, Beniamina ġena doġoro taugu.

² Barau na ġena tarimarima, tovtovona na veġata eġabi-hidirito tarimari, kamasi beruġa-doġe-muriġirini? Gomi Buka Veaġai Elia varina ġetoreato tu moġoni veġata asi ribami? Ġia Isaraela tarimari na beġe vaġi-maseani ġetato nai, Barau ġenai eġauġauto, maiġesi ekirato:

³ Vereġauka, ġemu peroveta tarimari tu beġe vaġi-ġosiri, ma ġoi ġevarevare-vinimuni dagarari ġetore-kaurini e ġegaburini fata veaġari maki beġe rovoru. Mai tu au moġo ġereġagu roġo maiġegu nuġanai, au maki ġevaġi-masegu ġetoni.

⁴ Ma Barau na ġia tu kamasi evaġa-veaseato, ei? Barau ekirato, “Au ġegu tarimarima mabarari daġara imaima ruarua (7,000) atore-ġerevaġirito, roġo maġuri manigēri. Ġia na ġofaġofa barauna Bal asi ġetoma-rakarigo viniato.”

⁵ Maitoma maki, Barau na ġena namo e varevare-barai Isaraela tarimari lakouna eġabi-viriġirito.

⁶ Bema ġena vevetuġaġwa e varevare-barai eveġabi-hidito nai, dia kara ta ġeveiato bakunai eġabi-viriġirito. Korana bema ġeri ġauvei ta dainai Barau na bere ġabi-hidiri nai, ġena ġabihidi veigana tu dia ġena vevetuġaġwa e varevare-bara dainai, vevetuġaġwa maki asi anina.

⁷ Be kara bita kiraġiani? Isaraela tarimari na beġene ġabia ġana ġevetau-gwadagwadiato dagarana tu ġia na asi ġeġabiato, senaġi Barau na eġabi-hidirito tarimari kotari na moġo ġeġabiato. A mabarari na tu Barau ġena keakea asi ġeseġaġi-viniato.

⁸ Buka Veaġai ekirani kavana,

“Barau na ġia nuġari e ġeri tuġamaġi tu evei-veġonurito, be tovtovona na veġata mo inította ġia tu asi ġeboġe-fakani, ema garo maki asi ġeseġaġini.”

⁹ Davida ġena guruġa maki maiġesi ekirani,

“Bere namo ġari ġaniġani fatana maki ġeri konagi e ġeri ganai bene iaġo, e ġeri vekakenaġi dagarana bene iaġo,

ema ġeri vei-rakava voina ġabigabina gabunai bene iaġo.

¹⁰ Bere namo matari bene vei-mukunari,

be asi beġene boġeboġe, ma doġeri beġene ġeġeva,

be beġene raka-dorudoru vanaġivanaġi.”

Barau na boġa oliveri legari vamoka oliveri legari ġeri ai ekafa-kaurito

¹¹ Ma avedanaġini, Isaraela tarimari ġevəkakenaġito nai tu, beġene keto-moġovaġi ġana ba? Asiġina, dia moġesina! Senaġi ġeri kira-sirivaġi dainai, vevaġa-maġuri tu irau bese tarimari ġeri ai evotuto, korana Isaraela tarimari beġene launaġiri, Barau ġena vevaġa-maġuri beġene vetaua ġana.

¹² Situġamaġia, Isaraela ġeri kira-sirivaġi na vevaġa-namo barego tano-barai ema raka-toġato, ema iauka maġuriri ai ġerabu-iaġirini gaburi ai irau bese tarimari ġeri ai namo-bara ema foroforini, a Isaraela tarimari mabarari beġe ġenoġoini Barau ġenai nai tu, Barau ġena vevaġa-namo tu ma barego lelevaġina bebubu-riġoani.

¹³ Mai tu ġomi irau bese tarimami, avaġa-guruġamini, korana au tu ġomi irau bese tarimami ġemi apostolo taugu. Au ġegu iaku tu barego mai ġauvei aveiani nai.

¹⁴ Korana au aurani ġegu tarimarima korikori bana vaġa-vetuġamaġi daradarari, be kotari na maġuri beġene doġariri.

¹⁵ Korana Iuda tarimari Barau na eruġarito nai tu, tanobara boruri tarimari eġabi-kavirito, a Barau na Isaraela tarimari ma beġabi-raġerini tu, kamasi beġea vetoreni? Namu baregona beġorani! Mo tu mase na maġuri-ġenoġoi vevaġa-ġoraiani kavana.

¹⁶ Bema ġebaki-guineani beredina Barau ġeviniani nai tu, mo beredi mabarana tu ġia ġena, ema bema ġau ġokana Barau ġeviniani nai, legana maki ġia ġena.

¹⁷ Isaraela tu noġa moġo olive ġauna namona ta. Barau na mo olive legana tari etau-korurito, ma ġomi, boġa olivena legari, eġabimito, mo etau-korurito moġeri gaburi ai evaġa-kafakafa-kaumito, benamo toma tu mo olive namona ġokana na ġaniġani namori ġevaraġeni, moġeri ġoġanirini.

¹⁸ Moġa lorinai asi boġono veiavi ġia vekaravari ai. Bema boġo veiaivini nai, boġono riba: Dia ġomi na ġau ġokana ġovaġa-kavaiani, asiġina, ġau ġokana na ġomi evaġa-kavamini.

¹⁹ Betaġu boġo kirani, “Olive legari tu etau-korurito, au ġia gaburi ai bene vaġa-kafakauġu ġana.”

²⁰ Oba, mani tu moġoni. Senaġi ġia tu asi ġeri veġabidadama naima etau-korurito, ma ġomi tu ġemi veġabidadama lorinai, ġia gaburi ai ġoruġani. Moġesina naima asi boġono vetuġamaġi-varaġe varaġe, senaġi boġono gari moġo.

²¹ Korana bema Barau na olive legana korikoriri maki gwairi asi eġabirito senaġi etau-korurito nai, ġomi maki gwaimi asi beġabirini.

²² Moġeri na Barau ġena veiauo-namo veiġana namona ma ġena veiauo-rakava veiġana metona boġono ġitaia. Barau ġabidadamanai ġeketoni tarimari tu eiauo-rakavarini, ma ġeri ai veiġa metona eveirini. Senaġi ġomi tu eiauo-namomini. Barau na roġo beiauo-namo-iaġomini, bema ġia ġena veiauo-namo nuġanai moġo boġo tanu-iaġoni nai. Asiġina nai tu, ġomi maki bebaſi-ġutumini.

²³ Iuda tarimari maki, bema Barau asi ġevaġa-moġoniani veiġari beġe iaġuirini, benamo Barau beġe vaġa-moġoniani nai tu, Barau na ma bekaſakau-ġenoġoirini. Korana Barau na ma bekaſakau-ġenoġoirini riba.

²⁴ Ġomi tu boġa olivena ġauna legana, a dia varovaro olivena, senaġi eġabimito, ma vamoka olivena ġaunai ekafa-kaumito. Bema ġomi boġa

olivena legari moĝesina eveimito nai, vamoka olivena legana etau-koruato, moĝea maki etau-koruato olivena ĝaunai ma bekafa-kauani riba.

Isaraela tarimari mabarari Barau na bevaĝa-maĝuririni

²⁵ Tarikakagu mabarami, au aurani mai guruĝa vekuretoĝana maiĝa boĝono ribaia, korana tauĝemi boĝo vekiraĝi-varaĝe varaĝeni garina: Isaraela tarimari nuĝari tu moĝesi gwaĝigi mogo asi beĝe tanu-iaĝoni. Asiĝina. Ĝia nuĝari e ĝeri tuĝamaĝi moĝesi beĝe tanu-iaĝoni, beiaĝoni mo, irau bese tarimari mabarari, (Barau na eĝabi-hidirito tarimari), beĝema bere-toĝani Barau ĝena maĝuri nuanai.

²⁶ Moĝa murinai vau Isaraela besena mabarari Barau na bevaĝa-maĝuririni. Buka Veaĝai etoreato ilailanai, ekirato, “Siona (o Ierusalem) na vevaĝa-maĝuri tauna beiaĝomani, ĝia na Iakobo besena ĝenana Barau asi ĝetoma-rakarigoani maĝurina betore-veĝitaiani.

²⁷ Benamo au na ĝia ĝeri rakava baĝabi-veĝitaiani nai, au na ĝia ĝeri ai mai kiraĝitore gwaĝiĝina baveiani.”

²⁸ Juda tarimari gutuma na Vari Namona ĝekira-fitogaiani nai, Barau ĝena vetari tarimari ai ĝeiaĝoto. Senaĝi moĝesi ĝeveito dainai, ĝemi maĝuri dabarana evekeoto. A ĝia tu Barau na eĝabi-hidirito besena lorinai, seneri (Aberahamo, Isako, Iakobo) bakuri ai Barau na eura-vinirini.

²⁹ Korana Barau ĝena varevare ema ĝena keakea tarimarima ĝeri ai tu beĝe tanu-vanaĝi vanaĝini, asi ma beĝe vekoki-fitogaiani dagarari.

³⁰ Vaĝa-ilailana ĝomi tovtovonai tu Barau ĝokira-sirivaĝi viniato-ĝoi, senaĝi toma tu Barau ĝena vevetuĝaĝwa boĝo ĝoitaĝoa. Gomi tu Isaraela tarimari ĝeri kira-sirivaĝi dainai, Barau ĝena vevetuĝaĝwa boĝo ĝabia.

³¹ Isaraela maki toma tu ĝekira-sirivaĝini, korana Barau na ĝomi evetuĝa-ĝwamini dainai, ĝia maki ma bene vetuĝa-ĝwari ĝana.

³² Korana Barau na tarimarima mabarari kira-sirivaĝi maĝurina etoretogarito, korana ĝia ĝena vevetuĝaĝwa ĝia mabarari na beĝene ĝabia.

Barau bitana vaĝa-raĝea

³³ Barau ĝena iaunega ema riba tu barego, ma barego lelevaĝi veĝata! Ĝia ĝena vevaĝa-maoro dabarana maki vetau-kavana beĝorani! Ĝena dabara maki deikara na betuĝamaĝi-dogaiani?

³⁴ Buka Veaĝa ekirani kavana, “Vereĝauka ĝena tuĝamaĝi tu dei na beribaiani? O deikara na ĝia besisiba-viniani?”

³⁵ Dei na Barau evini-farefareato, be Barau na ĝia ma bevini vaĝa-voiani?”

³⁶ Korana dagara mabarari korari tu ĝia, ema ĝia ĝenana ĝeĝorato e ĝefoforito, ema ĝia ĝena moĝo. Ĝia moĝo bitana vaĝa-raĝea mo vanaĝivanaĝi. Amen.

12

Tauĝanimu Barau ĝena

¹ Tarikakagu mabarami, Barau ĝena vevetuĝaĝwa tu barego aĝitaiani ĝita iatarai. Tauna moĝa au na ĝomi alaunaĝimini, akirani, tauĝanimi mabarari varevare dagarari maĝuriri e veaĝari ai boĝono vaĝa-iaĝori, ema Barau na beiaĝu-iaĝi-baregorini tauĝaniri Barau boĝono vini-raĝea, ginitaĝo

varevareri kavana. Moġesina boġo veini tu, Barau boġo toma-rakarigo vini-korikoriani.

² Mai tanobara ġena maġuri ema veiġa irauirauri asi boġono ġabi-raġeri ema asi boġono veiri. A ġomi tu ġemi tuġamaġi boġono vaġa-variġuri, be ġemi maġuri beġene vekurevo. Monana vau Barau ġena ura korikori boġo riba-ginikaurini. Boġo ribani maki, aiġa tu namo vedaurea, Barau na eiaku-iaġiani dagarana.

³ Barau na ġena namo e varevare-bara lorinai ekeaguto, ġena apostolo ġauveina eviniguto nai, au na ġomi mabarami avaġa-guruġamini: Tauġemi asi boġono vetuġamaġi, ġomi ġemi riba ema veiġa tu varaġe lelevaġi. Asiġina. Namona tu boġono vetuġa-maġi-ginikau, Barau na vegabidadama aiġa baregona evinimito, moġa ilailanai moġo boġono tuġamaġi e guruġa.

⁴ Vaġa-ilailana ġita tauġanira tu sebona moġo, a legana tu ġutuma gorogoro, ma mai tauġanira legari ġeri ġauvei tu dia sebona.

⁵ Ġita ekalesia maki moġesi, ġita asisebo, senaġi Keriso ġena maġuri nuġanai ġita tu tauġani sebana taiaġoto. Ma ġita tata tu karora tata ġeri, (dia mabarara tata ġera-ura ġera-urai bita rakani).

⁶ Barau ġena namo ema varevare-barai evinirato ilailanai, varevare dagarari irauirau ġerai ġetanuni. Bema ta peroveta varevarena o seġukana eviniato nai, bene peroveta ġena vegabidadama ilailanai.

⁷ Bema ekalesia vetuġunaġi iaġoviniri eviniato nai, bene vaġa-kavari. Bema vevaġa-riba varevarena eviniato nai, bene vevaġa-riba.

⁸ Bema kotari ġeri vegabidadama vaġa-kokoreri varevarena eviniato nai, bene vaġa-kokoreri; bema rabu tarimari vaġa-kavari varevarena eviniato nai, bene vini-ginikauri; bema tarimarima ġorikauri varevarena eviniato nai, ma nuġana mabarana ġesi bene veġorikau; bema tarimarima vetuġaġwari varevarena eviniato nai, bene vetuġaġwari e bene vaġa-kavari ma iakuna ġesi.

Veuravini

⁹ Nuġami mabarari ema ma moġoniri ġesi boġono veuravini. Rakava veiġari asi boġono ura-viniri, a veiġa namori boġono ġabi-gigitariri.

¹⁰ Vetarikaka veuravinina boġono korana-iaġi gwadaia, karomi tata ġesi boġono vegubakau, a dia tata tauġemi arami boġono tore-varaġe varaġeri.

¹¹ Boġono ġauvei-kokore kokore, asi beġene ġubulefimi; Iauka Veaġa na nuġami bene vaġa-variġisiri, Vereġauka vetuġunaġina boġono iaġo-vini.

¹² Ġotuġamaġi-kauani dagarana bakunai boġono iaku; meto ġoġoitaġorini nuġari ai boġono vevaġa-gwaġiġi; ġauġau asi boġono vaġa-moiriaia.

¹³ Barau ġena tarimarima ġeri rabu ma vetau-vetau gaburi ai boġono vaġa-kavari. Tarimarima boruri ġemi ai beġe iaġosini nai, boġono ġabi-raġeri, ema boġono nari-ginikauri.

¹⁴ Ġevaġa-rakavamini tarimari boġono vaġa-namori, iatari ai boġono ġauġau, asi boġono vaġa-rakavari, asi boġono tovoġari.

¹⁵ Ġeverereni tarimari ġesi boġono verere-vegogo, ma ġemidigu-midiguni tarimari ġesi maki boġono midigu-midigu sebana.

¹⁶ Karomi ġesi nuġa sebana boġono tanu, asi boġono vekokoroku, ne ma nuġami mabarari ġesi gaburemi tarimari ġesi boġono vetore-sebana. Tauġemi asi boġono vetore-varaġe varaġe, asi boġono kira, ġomi moġo ma iaunġami.

17 Veiga rakavari evei-vinimini tarimana gena veiga rakavari voina tu veiga rakavari na asi ma bogono vaga-voia. Bogono gauvei-gitagita, be tarimarima mabarari goirari ai veiga iobukaiobukari mo go bogono veiri.

18 Maino tanutanuna tu gomi mabarami gimami ai mo go manigea, be ma dabarana nai tu, tarimarima mabarari gesi maino ai bogono tanu.

19 Garagaragu namomi, gevaiga-rakavamini tarimari geri vei-rakava voiri asi bogono vei-viniri, a Barau faka bogono vinia, be gena baru vauro iatari ai bene vaga-foforia. Korana Buka Veagai tu maigesina ekirani, "Veregauka ekirani, 'Au na vauro bavaiga-voirini.' "

20 Senagi, "Bema ebaru-vinimuni tarimana evitoani nai, bono gubua; bema bokana ekokeni nai, nanu bono vinia bene niu. Maigesina boveini nai tu, karava memevari gia debanai bolabu-kaurini," bemaiaakaiani.

21 Rakava na goi asi bene vaga-dareremu, ne goi na rakava veiga namori na bono vaga-darereri.

13

Taravatu tauri garori bitana segaigiri

1 Tarimarima mabarari gavamani geri veikorikau maorona gaburenai be gene tanu ema be gene segaigi-viniri. Korana gavamani boruna ta tu asi etanuni, senagi Barau na evaga-ru garito ema maoro baregona evinirito gavamaniri mo go getanuni.

2 Mo gesina naima gavamani geri guruiga egarerini ma ekira-fito garini tarimana na tu Barau na evaga-ru garini tarimari egarerini ma ekira-fito garini. Ma mo veiga beveiani tarimana tu tau gena mo go vei-rakava tarimani evevaga-ia goni, ma evevaga-metoni.

3 Vegita gau o gavamani tarimari na vei-iobukaiobuka tarimari tu asi gevaiga-garirini, ne gia tu veiga geleaiani tarimari gevaiga-garirini. Bema gomi gourani, bogono tanu-rekoreko mo go, gavamani tarimari gariri asi bogono vei gotoni nai, veiga iobukaiobukari mo go bogono vei. Mo gesi bo go veirini tu, gia na bevaga-ragemini.

4 Gavamani tarimari tu Barau gena vetuguna gi geia go-vinini, gomi namo bogono goita go gana ge gauveini. Senagi bema gomi na veiga bo go leaiani nai tu, bogono gari korana ma ribami, gavamani gimanai tu vevaga-maoro bagana egabi-ta goani. Barau na asi evini-kava iato, senagi gia vetuguna gina eia go-vinini, kerere tarimari geri rakava voiri bene viniri gana.

5 Mo ga lorinai gavamani geri vegita gau gaburenai bitana tanu ema garori bitana segaigiri. Dia kerere voiri be ge vinirani mo go gariri ai, senagi nu garai maki taribani, veiga namori bitana veiri.

6 Gomi tu mo gesina naima gotakesini. Gavamani takesi goviniani, korana gavamani tu Barau gena vetuguna gi geia go-vinini tarimari. Gia geri taimi mabarana tu vegita gau gauveina geveiani.

7 Ma gemi gabitore nai, voiri bogono vei. Bema takesi ro gosi bogono vini nai, bogono vini, ma moni kotari ro gosi bogono vini nai, bogono vini; vegubakau nai, bogono vegubakau; vemataurai nai, bogono vemataurai.

Bo gono veuravini, korana garo bevotu

8 Karomi ta genai gemi gabitore ta asi bene tanu, senagi gabitore sebona mo go bene tanu tu maiga: Karomi bogono uravini-vanagi vanagiri. Korana korana eura-viniani tarimana na Barau gena taravatu mabarana ekorana-ia giani veigana eveiani.

⁹ Mai taravatu maiġeri: Asi bono veġura-vanaġi; asi bono vevaġi-deba; asi bono lema; tarima tari ġeri dagara mata-ġaniġaniri asi bono vei; ma taravatu kotari maki, moġeri mabarari tu mai taravatu sebona na eġabi-vegogoani: “Sevimu tarimana bono ura-vinia, ġoi tauġemu oveura-vinini kavana.”

¹⁰ Veuravini na sevina tarimana asi evaġa-rakavaiani. Moġa lorinai dagara barego vedaureana Barau ġena taravatu nuġanai tu veuravini, korana taveura-vinini nai, taravatu mabarana takorana-iaġiani.

¹¹ Mai veiġa boġono veia, korana mai nega vetoġana tu ma ribami. Nega varau beraġasi, be ġotataġa gena na. Korana ġita vaġa-maġurira ġarona tu varau bekavinai-*rakava*, dia mo guinenai, Keriso taġabi-raġeato ġarona gabunai kavana.

¹² Boġi tu dori ekorini, ġaro tu ġena raġe bakunai. Moġa lorinai mukuna veiġari sitore-tariri, ma mama dabuġari siriġo-kauri, vetari tarimari na vetari dabuġari ġeriġo-kaurini kavana.

¹³ Veiġa namori moġo sivei, laġani erakani tarimana kavana. A asi sivereko-lauvaġi lauvaġi e niuniu moġo asi sivaġa-kokorea, kima mata-ġaniġaniri asi sivei e asi simata-boraġa, asi sivevaġi-vevaġi ema asi simama.

¹⁴ Senaġi ġita tu Vereġauka Iesu Keriso moġo siriġoa, dabuġa tariġo-kaurini ilailanai. Ma tauġani ġena ura veiġari rakavari veiveiri tuġamaġiri tu asi siġabi-raġeri.

14

Moiramoira ema kokore

¹ Veġabidadamai emoiramoirani tarimana boġono ġabi-raġea, enabe ġena tuġamaġi tari ġomi ġemi tuġamaġi ġesi asi ilaila, senaġi asi boġono vaġa-veġareveġarea e asi boġono ġau-fitoġaia.

² Tarima ta ġena veġabidadama kokore nai, eġani-taġuitaġuini, ma ta tu ġena veġabidadama moira lorinai, ġaniġani koriri, asi bureġari, moġo eġanini.

³ Eġani-taġuitaġuini tarimana na vamoka ġaniġaniri moġo eġanini tarimana asi bene kira-fitoġaia, ema vamoka ġaniġaniri moġo eġanini tarimana na maki dagara mabarari eġani-taġuitaġuirini tarimana asi bene vaġa-rakavaia, korana ġia tu Barau na varau eġabi-raġeato.

⁴ Goi tu dei, be tarima ta ġena vetuġunaġi tauna bono vevaġa-maoro vinia? Ġia ġena veġabidadamai eruġa-gigitarini o eketoni moġa tu ġena baregona na vauro bekiraġiani. Senaġi ġia tu beruġa-gigitarini, korana Vereġauka na kokore beviniani bene.

⁵ Tarima ta na tu ġaro tari evaġa-veaġa baregorini, ma ta na tu ġaro mabarari ilaila moġo etoni. Namona tu, ġia tata nuġari e ġeri tuġamaġi ai beġene riba ġeri tuġamaġi tu maoro.

⁶ Tarima ta na ġaro ta eġabi-hidiani, benamo ekirani, mai tu ġaro veaġana etoni nai, mo tarima na mo veiġa tu Vereġauka ġenai eveiani. Eġani-taġuitaġuini tarimana maki Vereġauka etuġamaġiani vauro eġaniganini, korana ġia na Barau etanikiu-viniani. Ema asi e bureġani tarimana maki Vereġauka etuġamaġiani vauro eġani-ġanini. Ġia maki Barau etanikiuani.

⁷ Korana ġita tamaġurini nuġanai dia tauġera ġera maġuri moġo, ma bita maseni maki dia ġita tauġera ġereġara ġera bita maseni moġo. Asiġina ġinavaġi.

⁸ Mağuri tatanuni nai, Vereğauka ġena tamağurini, ema bita maseni maki, Vereğauka ġena moğo bita maseni. Moğa lorinai, tamağurini o bita maseni, ġita tu Vereğauka ġena veğata.

⁹ Keriso emaseto ma emaguri-ğenoğuito korana tu, mase tarimari ema gemagurini tarimari ġeri Vere ai bene iağo ġana.

¹⁰ Moğa lorinai karase ġoi tarikakamu ovevağa-maoro viniani? Ma kara dainai tarikakamu okira-fitoğaiiani? Bono tuğamaği, ġita mabarabarara tu Barau ġena vevağa-maoro seana ġoiranai bita ruğa-tarini, vevağa-maoro bita ġabini.

¹¹ Isaia na etoreato kavana, ekirani,

“Vereğauka ekirani,

‘Moğoni veğata, amağuri-tağoni dainai, tui mabarabarari au ġoiragu ai beğe vetuitui-tarini, mea mabarabarari na Barau beğe kiraği-foforiani.’ ”

¹² Moğesi naima ġita tata ġera mağuri Barau ġoiranai bita kiraği-fofori foforirini.

Tarikakamu ġena veğabidadama asi bono vağa-rakavaia

¹³ Moğa lorinai karora ġesi tauğera asi bitana vevağa-maoro vevini. A namona ġita tu ġera tuğamaği sivağa-maorori, be tarikakara ġoirari asi sifatafata-ğauri, ġeri veğabidadama na beğe ketoni garina.

¹⁴ Iesu Vereğauka nuğanai amağurini nai, ma nuğagu mabarana ġesi ariba-maoroni, ġaniğani dagarana ta tu asi rakava o ma mirona Barau ġoiranai. Senaği bema tarima ta na ġaniğani dagarana ta etuğamaği-rakavaiani nai, mo ġaniğani dagarana tu ġia ġereğana ġenai moğoni moğoni rakava o ma mirona.

¹⁵ Bema tarikakamu asi eiakuni, ġoi na ġoiranai kara oğaniani eğitaiani nai, bono riba, mo tu dia veuravini veiğana ġoi na oveiani. Gemu ġaniğani na tarikakamu ġena mağuri asi bono vağa-rakavaia. Keriso tu ġia maki uranai emaseto.

¹⁶ Moğa lorinai ġemi veiğa ġobiri boğono toreri, tarimarima maoro asi boğono viniri, ġemi veğabidadama namori rakavari beğene kirağiri.

¹⁷ Korana dagara baregona tu Barau ġena Basileia, a dia ġaniğani o niuniu dagarari, senağina vei-iobukaiobuka, maino, ema iaku-verere Iauka Veğa ġena mağuri nuğanai.

¹⁸ Deikara mağeri veiğa nuğari ai Keriso vetuğunağina beiağo-vinini tarimana tu, Barau na beiaku-iağiani, ema tarimarima na maki beğe vağa-moğoniani.

¹⁹ Moğa lorinai mabarara sikokore, maino vağa-ğorana ema ġera veğabidadama vağa-tubuna ġauveiri siveiri.

²⁰ Ġaniğani ġaramari ai Barau ġena ġauvei asi boğono vağa-rakavaia. Moğoni, ġaniğani mabarari tu namo ema veiareva Barau ġoiranai, senaği bema ġoi na ġaniğani ta oğaniani nai, tarima ta nuğana ovağa-metoani, benamo ġena veğabidadama na beketoni, moğa neği asi namo.

²¹ Moğa lorinai namona tu, asi bono bureğa, e vine nanuna asi bono niu, ema tarikakamu vağa-dağarağena veiğana ta tu asi bono veia. Korana tarikakamu ta bovağa-dağarağeani, benamo bevei-rakavani garina.

²² Kara dagara ovağa-moğoniani, maniğa tu ġoi ema Barau fakami ai moğoni bene tanu. (Senaği tarikaka tari asi bono launağiri, ġoi na kara ovağa-moğoniani dagarana beğene ġabi-rağea, korana) nuğanai kara eğabi-rağeani dagarana na nuğana asi evağa-meto ġenoğoiiani tarimana tu beiakuni.

²³ Bema tarima ta tu mo kara eḡabi-raḡeani dagarana ma daradarana ḡesi beḡaniani nai, ḡia tu tauḡena bevevaḡa-metoni, korana ḡia tu asi vegabidadamana ḡesi eḡaniani. Ema asi vegabidadama ḡenana ḡeiaḡomani dagarari mabarari tu vei-rakava dagarari moḡo.

15

Keriso ḡena maḡuri bitana tovotovoo

¹ Ġita ma kokorera tarimara na moira tarimari ḡeri keto ai bisini vaḡa-kavari, a dia tauḡera ḡereḡara moḡo lorira bitana toreri.

² Ġita tata karora loriri bisini toreri, be namo beḡene ḡabia, ema ḡeri vegabidadama bitana vaḡa-tuburi.

³ Korana Keriso maki tauḡena lorina asi etoreato, senaḡi Buka Veaḡai etoreato ilailanai, ekirani, “Vanevane guruḡari metori ḡoi, Barau, iatamu ai ḡekiraḡirito tu, au iatagu ai beḡema ketokau.”

⁴ Guinena guruḡa mabarari Barau ḡena Bukai ḡetorerito moḡeri tu, ḡita beḡene vaḡa-riba-iaḡira ḡana ḡetorerito. Korana ḡita mo ḡetorerito guruḡari ḡerina vevaḡa-gwaḡiḡi ema vevaḡa-naḡi bisini ḡabia, benamo ḡoirarai Barau ḡena Basileia moḡa bisini tuḡamaḡi-kaua.

⁵ Vevaḡa-gwaḡiḡi ema velaunaḡi tu Barau evinini. Ġia na ḡomi vekaravami ai nuḡa-sebona bene vaḡa-ḡoraia Keriso Iesu ḡotovotovoani nuḡanai.

⁶ Be nuḡa-sebonai ema garo sebonai ḡera Vereḡauka Iesu Keriso Tamana Barau boḡono vevato-iaḡia.

⁷ Tata karomi ḡesi boḡono veiau-namo ema boḡono veḡabi-raḡe, Keriso na eiau-namomito ema eḡabi-raḡemito kavana. Moḡesina boḡo veini tu, Barau boḡo vaḡa-raḡe ḡitakauani.

⁸ Boḡono tuḡamaḡi: Keriso tu Iuda tarimari ḡeri vetuḡunaḡi taunai eiaḡoto, Barau ḡena vetuḡamaḡikau vaḡa-moḡonina, ema Barau ḡena kiraḡitore guruḡari, senera (Aberahamo, Isako, ema Iakobo) eguruḡa-tore vinirito guruḡari vaḡa-taunari ḡana.

⁹ Ema irau bese tarimari na maki Barau beḡene vaḡa-raḡea ḡena vevetuḡaḡwa bakunai. Buka Veaḡa etoreato ilailanai,

“Moḡa lorinai irau bese tarimari vekaravari ai au na ḡoi bavaḡa-raḡemuni; ḡuriḡuri mariri baḡabini, ḡoi aramu bavaḡa-namoani.”

¹⁰ Ma ekirani,

“Irau bese tarimami o, ḡia ḡena bese tarimari ḡesi ḡoiaku-vegogo.”

¹¹ Ma ekirani,

“Ḡomi irau bese tarimami, Vereḡauka ḡovaḡa-raḡea, ema ḡomi tarimarima mabarabarami, mari ai ḡia ḡovaḡa-raḡea.”

¹² Ema Isaia ma ekirani,

“Iese natuna ta betubu-vaisini, ḡena bese tarimana ta bevaisi-raḡeni, tanobara mabarana beḡita-ḡauani; irau bese tarimari ḡia ḡenai beḡe vetuḡamaḡikauni.”

¹³ Vetuḡamaḡikau tu Barau ḡenana eiaḡomani. Ġia na iaku verere ema maino na bene vaḡa-vonuvonu raḡemi ḡenai ḡoveḡabidadamani nuḡanai. Be

monana Iauka Veāga ġena seġuka na ġemi vetuġamaġikau bene vaġa-barego lelevaġia.

Paulo, irau bese tarimari ġeri haroro tauna

14 Tarikakagu mabarami, au bama riba-maoro, ġomi maniġemi tu namo na ġovonuvonu-raġeto, ġoriba-ġinikauto, ema karomi tata ġesi boġo vevaġa-riba-vevinini maki ilaila.

15 Senaġi guruġa matari tari ġomi batore-vinimi nai, kota bakiraġi-metori, mo tu ġomi noġa ma bakiravara-ġenoġoimi maia. Moġesi aveini, korana Barau na ġena namo e varevare-bara dabaranai mai ġauvei eviniguto.

16 Ekeaguto, Keriso Iesu ġena vetuġunaġi tarimanai bana iaġo, ma irau bese tarimari vekaravari ai Rubu Veāga vereri ġeri ġauvei bana veia, Barau ġena Vari Namona bana ġobata-iaġia. Benamo monana irau bese tarimari maki Barau na begabi-raġerini varevare dagarari ai beġene iaġo. Ema Iauka Veāga na bene vaġa-veaġari.

17 Moġa lorinai Keriso Iesu ġena maġuri nuġanai aveiavini, Barau ġena vetuġunaġi aiāġo-vinini nuġanai.

18 Kara boruna ta guruġana au asi haveini, senaġi kara au na akiraġiato ema aveiato ġerina, kara Keriso na au ġeguna eveiato, benamo irau bese tarimari na Barau ġema-seġaġi-viniato, moġa moġo bakiraġiani.

19 Ġegu ġobata ema ġauvei tu Iauka Veāga ġena seġuka na vetoġa boruri ema nuġa-farevaġi veigari na evaġa-foforirito-ġoi. Moġesina nai Ierusalemna na aġeġeraġito, aiāġoto mo Iliriko tanona, Keriso ġena Vari Namona mabarana akiraġi-fofori ġinikauato.

20 Au ġegu ura baregona vanaġivanaġi tu, Keriso roġosi roġo beġere ribaia gaburi ġana bana iaġo, Vari Namona bana ġobata-iaġia. Korana asi aurato, tarima ta na ġauvei evaġa-ruġaiato gabunai ma bana ġauvei-iaġo.

21 Senaġi ġegu ura tu, Buka Veāġi etoreato kavana bana vei, ekirani, “Ġia varina asi ġekira-vararito tarimari na beġene ġitaia, ema varina asi ġeseġaġiato tarimari na beġene ribaia.”

22 Moġesi nai nega ġutuma naiāġosi atoni, senaġi ama vedaġa-raġeni.

Paulo na Roma benea ġitaia boioġana etogato

23 Senaġi toma mainai au tu asi ġegu ġauvei gabuna ta maia, ema laġani ġutuma varau beġe iaġo nuġari ai, au ġegu ura baregona tu banasi raka-ġitami,

24 nai atuġamaġini, Spein ġana baiāġoni nai tu, basi ġitamini roġo. Maninana bavanaġini nai, atuġamaġini, basi raka-ġitamini, ma ġomi ġesi bita tanu-kotunani roġo. Moġa murinai aurani, ġomi na boġono vaġa-kavagu ġegu iaġoiaġo bana iaġo-vinia ġana.

25 Initoma tu roġo Ierusalemna ġana aiāġoni, Barau ġena tarimarima veaġari navaġa-kavari ġana.

26 Korana Makedonia ema Akaia tanori ai tu nuġari ma verereri ġesi Ierusalemni asi ġeri-ġari tarimari Barau ġena tarimarima veaġari vekaravari ai ġetanuni moġeri ġeri moni ġevaġa-vegogoto.

27 Ġia tu ma iakuri ġesi ġeri moni ġevaġa-vegogoto, ma mo tu Iuda tarimari ġeri ġabitore ġia ġeri ai ġevaġa-voiani. Korana bema irau bese tarimari Iuda tarimari ġeri namo iauka rekenai dagarari ġeġabirini nai tu, ġia tauġaniri rekenai farefarena maki Iuda tarimari ġesi beġe varebarabararini. Korana ma ġeri ġabitore Iuda tarimari ġeri ai dainai.

²⁸ Be mai ǵauvei maiǵa bavaǵa-koriani, ema bana riba-maoro mai moni tarimari korikori na beǵene ǵoitǵoa murinai vau, Spein ǵana baiǵoni, ema ǵomi maki basi raka-ǵitamini ǵegu iaǵoiǵo nuǵanai.

²⁹ Au ma ribagu ǵomi ǵemi ai baiǵosini nai, Keriso ǵena vevaǵa-namo barego lelevaǵina baǵabi-iaǵosiani ǵomi ǵemi ai.

³⁰ Tarikaka-ǵore, ǵera Vereǵauka Iesu Keriso aranai ema Iauka Veǵa ǵena veuravini, ǵita iatarai etoreani veuravinina, bakunai, au ǵomi alaunaǵimini: Au ǵegu vekwaraǵi ai boǵono vaǵa-kavaǵu, iatagu ai Barau ǵenai boǵono ǵauǵau.

³¹ Boǵono ǵurigu, be Barau na Iudea nuǵanai Keriso asi ǵevaǵa-moǵoniani tarimari ǵimari na bene vaǵa-maǵurigu, ema mo varevare dagarana Ierusalemai Barau ǵena tarimarima veaǵari na beǵene ǵabi-raǵea ma iakuri ǵesi.

³² Be Barau ǵena ura ilailanai ǵomi ǵemi ai ma iakugu ǵesi bana iaǵosi, ema mabarara bisini vevaǵa-kokore.

³³ Maino Barauna ǵomi mabarami sevimi ai bene tanu. Amen.

16

Paulo ǵena vevaǵa-namo guruǵari

¹ Avaǵa-ribamini, ǵita tobara Foibe tu beiǵosini. Ǵia tu ekalesia ǵena vetuǵunaǵi vavinena ta Kenkrea rubuna nuǵanai.

² Anoǵimini, Vereǵauka aranai boǵono ǵabi-raǵea, ekalesia o veaǵa tarimari ǵoǵabi-raǵerini dabarari korikoriri ai. Ema ma ǵena ura dagarari ǵomi ǵemi ai nai, boǵono vinia. Korana ǵia ǵena vevaǵa-kava maki barego lelevaǵi tarimarima ǵutuma ǵeri ai. Au maki evaǵa-kava barego-lelevaǵiguto.

³ Priskila ema Akwila au ǵegu vevaǵa-namo boǵono viniri. Ǵia tauri ruarua tu au ǵesi ǵauvei sebona moǵo ǵaveiani Keriso Iesu ǵena ǵauvei nuǵanai.

⁴ Ǵia tauri ruarua tu au uragu ai be dori ǵevaǵi-maserito. Au ema tanobara iraurau ai ǵetanuni ekalesiari ǵema iaku tu asikei ǵia tauri ruarua ǵeri ai.

⁵ Ǵia ǵeri numai ǵeraka-vegogoni ekalesiana maki boǵono vaǵa-namori.

Au ǵatagu namona Epeneto au ǵegu vevaǵa-namo boǵono vinia. Ǵia tu Keriso murinai eraka-ǵuineto Asia tanobarana nuǵanai.

⁶ Maria au ǵegu vevaǵa-namo boǵono vinia. Ǵia tu ǵomi urami ai evekwaraǵi-baregote.

⁷ Au garagaragu Androniko ema Iunia au ǵegu vevaǵa-namo boǵono viniri. Ǵia tu au ǵesi dibura numai ǵatanu-vegogoto. Apostolo mabarari vekaravari ai ǵia tauri ruarua tu ǵerevaǵi, ema ǵia tu Keriso ǵena maǵuri nuǵanai ǵeberetoǵa-ǵuineto, muriri ai vau au ama bere-toǵato.

⁸ Ampliato au ǵegu vevaǵa-namo boǵono vinia. Vereǵauka ǵena maǵuri nuǵanai ǵia tu au ǵatagu korikori.

⁹ Urebano au ǵegu vevaǵa-namo boǵono vinia. Ǵia tu ǵita ǵesi taǵauvei-vegogoni tarimana Keriso ǵena maǵuri nuǵanai. Au ǵatagu namona Stakis au ǵegu vevaǵa-namo boǵono vinia.

¹⁰ Apele au ǵegu vevaǵa-namo boǵono vinia. Ǵia tu moǵoni veǵata Keriso ǵena maǵuri nuǵanai eruǵa-gwaǵigini.

Aristobulo ǵena numa tarimari mabarari ǵegu vevaǵa-namo boǵono viniri.

11 Au garagaragu Herodion ġegu vevaġa-namo boġono vinia.

Narakiso ġena numa tarimari deidei Vereġauka ġena doġoro tarimari ġegu vevaġa-namo boġono viniri.

12 Trifena ema Trifosa au ġegu vevaġa-namo boġono viniri. Maniġeri vavine Vereġauka ġena ġeġauvei-vekwaraġini.

Au tobagu namona Peresi ġegu vevaġa-namo boġono vinia. Mani vavine maki Vereġauka ġena eġauvei-vekwaraġini.

13 Rufo ma sinana ġesi au ġegu vevaġa-namo boġono viniri. Rufo tu Vereġauka na eġabi-virigiato ġena vetuġunaġi taunai bene iago, ma sinana tu au sinagu ai eiaġoto.

14 Asinikrito, Flegon, Hemes, Patroba, Hemas ema tarikaka tari ġia ġesi ġetanuni maniġeri ġegu vevaġa-namo boġono viniri.

15 Filologo, Iulia, Nereus ma tobana, e Olimpasi, ema Barau ġena tarima veaġari ġia ġesi ġetanuni mabarari ġegu vevaġa-namo boġono viniri.

16 Karomi tata vetarikaka verauna na boġono vaġa-namori

Keriso ġena ekalesia mabarabarari na ġemi vevaġa-namo beġe tuġu.

Velaunaġi tari

17 Tarikakagu mabarami, alau-naġimini, boġono boġe-ġotoġoto, vetavikirakira veiġari ġeveirini tarimari ema ġomi ġemi veġabidadama ġefatafata-ġaurini, dia ġomi na ġoġabirito vevaġa-ribari na. Maniġeri tarima seviri ġana asi boġono raka-kavi.

18 Korana maniġeri tarima tu dia ġita ġera Vereġauka Keriso ġena vetuġunaġi ġeiaġo-viniani, a ġia tauganiri ġeri ura veiġari ġeveirini. Ġia tu ġeri guruġa meriġa-meriġari na ema ġeri guruġa ginikau-ginikau na asi iaunegari tarimari ġeri tuġamaġi ġeġofa-darererini.

19 Tarimarima ġutuma na ġomi ġemi seġaġi varina varau ġeseġaġiatio. Moġa lorinai au ġegu verere asikei ġomi ġemi ai. Senaġi au aurani, veiġa namori boġono riba-ginikauri, ma veiġa rakavari asiġina ġinavaġi boġono veiri.

20 Maino Barauna na nega kotuna moġo benamo Satani ġomi kwakumi fanafana na gaburenai befana-fatafataiani.

Ġita ġera Vereġauka Iesu ġena namo ema varevare-bara ġomi iatami ai bene tanu.

21 Timoteo, au ġauvei karogu, ema au garagaragu Lukio, Iason ema Sosipata na ġemi vevaġa-namo guruġari beġe tuġu.

22 Au, Teretio, Paulo ġena guruġa mai fefai batorea taugu, na maki Vereġauka aranai ġegu vevaġa-namo atuġu-iaġosiani.

23 Gaius na ġemi vevaġa-namo guruġari betuġu. Au tu ġia na ġena numai enariguni, ema ekalesia tarimari mabarari tu mainai ġeraka-vegogoni.

Erasto, mai siti ġena moni eġita-ġauani tarimana, ema ġita tarikakara Kwatas na ġemi vevaġa-namo beġe tuġu.

[24 Ġita ġera Vereġauka Iesu Keriso ġena namo ema varevare-bara ġomi iatami ai bene tanu.]

Barau vaġa-raġena guruġari

25 Barau sivaġa-namoa, korana ġia na ġomi ġemi veġabidadama bevaġa-kokore-iaġirini au ġegu Vari Namona, Iesu Keriso aġobata-iaġiani varina, ġenana. Mai vari tu guineri laġaniri na veġata vekuretoġa etanuto-ġoi dagnarana bema fofori.

26 Maitoma moġeri tu tanu-vanaġivanaġi Barauna ġena guruġa ilailanai peroveta tauri ġeri toretore na ġema vaġa-foforirini, ma tama ribarini.

Mai veĩḡa ema vetoreto anina tu, tanobara mabarari na ġia beḡene vaḡa-
moḡonia ema beḡene seḡaḡi-vinia ḡana.

²⁷ Iaunega Barauna sebona kwarikwari sivaḡa-raḡea Iesu Keriso bakunai.
Ġia marevana baregona bene tanu vanagivanaḡi. Amen.

PAULO ĜENA TORETORE GINIGUINENA KORINTO EKALESIARI ĜERI

1 Korinto vaĝa-foforina guruĝari

Korinto ekalesiana doĝorona tu Paulo ĝenana eĝorato (Apostolo 18). Ma mai fefa giniguinena Paulo na etoreato korana tu, Korinto ekalesiari fakari ai tu meto kota ĝeĝorato-ĝoi. Ma ĝia na Paulo ĝetore-viniato, ĝedanagiato, kamasi beĝene vei ĝetato. Moĝesi naima Paulo na mai fefai ĝeri vedanaĝi evaĝa-veseato (7:1; 8:1; 12:1; 16:1), ema mo deideiri ĝevei-rakavato-ĝoi moĝeri evaĝa-guruĝa-gwĝigirito ema ekalesia maĝurina korikorina tu aigesina ekira-vararito.

Paulo na mai fefa tu Efeso vanuĝa na etore-vinirito, mo tu Efeso ekalesiari vaĝa-toitoina evarivaririto taiminai. Mai fefa tu laĝani 53 ma 55 fakari nuĝanai ta etoreato, mo tu Iesu emaseto murinai.

Mai fefai siri baregori tu karoa 1:30-31. Ma ĝena vevaĝa-riba guruĝari baregori ekiraĝirito tu maiĝeri: 1) Ekalesia doĝorona korikori vetoĝana boĝitaiani, ĝia tu Iesu Keriso ĝena vere o veĝitaĝau gaburenai ĝetanuni. 2) Barau ĝena ekalesia doĝorona korikori tu dia tarima o tanobara ĝena iaunegai ekalesia doĝorona beĝe ĝori-kauani, senaĝi Barau ĝena iaunegai ema seĝukai. 3) Ekalesia doĝorona korikori tu Barau na eboioĝaiato dabaranai moĝo beĝe tanuni. 4) Ekalesia doĝorona korikori tu Barau ĝena guruĝa beĝe korana-iaĝiani, ema Barau ĝena veuravini ai moĝo beĝe tanuni.

Paulo na mai fefa tu maiĝesina eboioĝaiato:

1. Ekalesia nuĝanai vevare-kirakira eĝorato - karoa 1-4
2. Veĝa rakavari ekalesia nuĝanai - karoa 5-7
3. Kwaivakuku ĝevinirini bureĝari - karoa 8-10
4. Tomaraka-riĝo dabarana - karoa 11
5. Iauka Veaĝa ĝena varevare - karoa 12-14
6. Variĝisi-ĝenoĝoi - karoa 15
7. Guruĝa dokona - karoa 16

¹ Au Paulo, Barau ĝena urai ekeaguto, Keriso Iesu ĝena apostolo tarimagu ai bana iaĝo, ema ĝita tarikakara Sostene ĝesi tauma ruarua ĝemana mai fefa eiaĝosini,

² Barau ĝena ekalesia tarimami Korinto nuĝanai ĝotanuni ĝemi. Ĝomi tu Barau ĝena tarimarima, be Keriso Iesu nuĝanai varau evaĝa-veaĝamito, ma ĝomi Barau na ekeamito tu boĝono veaĝa uranai. Tarimarima mabarari gabu mabarari ai ĝetanuni ĝera Vereĝauka Iesu Keriso aranai ĝeĝauĝauni tarimari maki, Barau na ĝomi ĝesi ekea-sebonamito, boĝono veaĝa uranai. Iesu Vereĝauka tu ĝia e ĝita mabarara ĝera Vereĝauka.

³ Ĝita Tamara Barau ema Vereĝauka Iesu Keriso ĝerina varevare-bara ema maino ĝemi ai bene tanu.

Paulo na Barau etanikiu-viniato

⁴ Au na ĝegu Barau vanaĝivanaĝi atanikiu-viniani ĝomi iatami ai, korana ĝia ĝena varevare-bara ĝomi Keriso Iesu nuĝanai ĝotanuni tarimami evinim-ito nai.

⁵ Iesu Keriso ĝesi ĝosebonani nai, Barau na ĝomi dagara mabarari ai varau bevaĝa-taĝami, guruĝa kiraĝikiragi iaunegari mabarana ema tuĝamaĝi-faka mabarana maki evinimito.

⁶ Keriso varina maki ġomi nuġami ai tu varau emoġonito e ġemi veġabidadamai ġoruġa-gwaġiġini.

⁷ Moġesina naima ġita ġera Vereġauka Iesu Keriso ġena iaġoma roġo ġovaġa-noga-taġoani nuġanai tu, Iauka Veaġa ġena varevare tai tu asi ġorabuni.

⁸ E Barau na ġomi bevaġa-ruġa gwaġiġimini beiaġoni mo magona. Be ġera Vereġauka Iesu Keriso ġena vevaġa-kota ġaronai ġomi tu asi ġemi vei-rakava bene doġarimi.

⁹ Barau tu ma ġena vetuġamaġikau. Ġia na ġomi ekeamito, ġia Natuna Iesu Keriso ġita ġera Vereġauka ġesi boġono sebona moġo ġana.

Ekalesia nuġanai vevare-kirakira eġorato

¹⁰ Tarikakagu mabarami, au na ġita ġera Vereġauka Iesu Keriso aranai anoġimini, auranai mabarabarami tu dagara sebona moġo boġono kiragġia, be tauġemi fakami ai asi boġono vevare-kirakira. Ġomi mabarami ġemi tuġamaġi ema ura sebna moġo boġono tanu.

¹¹ Korana tarikakagu, ġomi varimi tu Kloe ġena numa tarimari na ġema-kiravaraguto, ġekirato, ġomi tu tauġemi moġo ġoveġare-veġareni fakami ai.

¹² Au na akiraġiani gabuna tu iniġa. Ta tu okirani, "Au tu Paulo murinai arakani." Ta tu okirani, "Au tu Apolos murinai arakani." Ma ta ma okirani, "Au tu Kefas, (mai tu Petero), murinai arakani." Ma ta maki ma okirani, "Au tu Keriso murinai arakani."

¹³ Keriso tu bevevare-kirakira, be doġoro ġutumai beiaġo ba? Mo tu Paulo ġomi urami ai ġevaġa-satauroato ba? O Paulo aranai ġomi ġebabatisomito?

¹⁴ Au na Barau atanikiu-viniani, korana au na ġomi ta asi ababatisomito, a Krispo ema Gaius moġo ababatisorito.

¹⁵ Asi namo ġomi ta bokirani, "Ġai tu Paulo na ebabatisomato nai ġena mero ai ġaiagoto," botoni.

¹⁶ Moġoni, Stefanas ma ġena numa tarimari ġesi maki au na ababatisorito. Ma asi aribani, au na tarima kotari maki ma ababatisorito ba asiġina.

¹⁷ Au Keriso na etuġuguto tu, dia bana babatiso ġana, senaġi Vari Namona bana ġobata-iaġia ġana. Ma dia iaunega lelevaġi tarimari ġeri guruġa maġurinai bana ġobata-iaġia, korana Keriso ġena satauro asi seġukanai beiaġoni garina.

Satauro Varina

¹⁸ Moġoni, satauro varina mase dabaranai ġerakani tarimari na tu asi ġevaġa-moġoniani, ġekirani tu vari babona ġetoni. Senaġi maġuri dabaranai tarakani tarimara ġerai tu Barau ġena seġuka satauro varina nuġanai efoforini.

¹⁹ Buka Veaġa nuġanai Barau tu maiġesi ekirani, "Au na iaunega lelevaġi tarimari ġeri iaunega tu asi tauri ai bavaġa-iaġorini, ema ġeriba-venaġito tarimari ġeri riba lelevaġina bavaġa-rakavarini."

²⁰ Be iaunega lelevaġi tarimari tu ainai? Vevaġa-riba e toretore tarimari tu ainai? Ribavanaġi tarimari guruġa ġevaġa-vevaġirini tauri tu ainai? Barau na evaġa-foforiato, mai tanobara ġena iaunega tu babo veġata.

²¹ Moġoni, Barau ġena iaunega tu fofori, korana Barau na guba ema tanobara eveiritto mabarari na ġena iaunega tu ġevaġa-foforiani, senaġina tarimarima tauġeri ġeri iaunega na Barau asi ġeribaiaato. Moġesina nai Barau ekirato, namona tu, satauro varina, tarimarima na ġekira-baboani varina, ġevaġa-moġoniani tarimari Barau na bene vaġa-maġuriri.

²² Juda tarimari ġeri ura baregona tu vetoġa boruri beġene ġita, a Grik tarimari tu iaunega ġeġita-vetauni.

²³ Senaġi ġai na tu Keriso, ġevaġa-satauroato tarimana, ġaġobata-iaġiani, ġia tu vevaġa-maġuri tauna. Ma mai vari Juda tarimari ġeri ai tu guruġa rakavana e Grik tarimari ġeri ai tu vari babona.

²⁴ Senaġi Barau na ekearito tarimari, Juda tarimari e Grik tarimari, ġita mabarara ġerai Keriso tu Barau ġena seġuka ema Barau ġena iaunega.

²⁵ Barau ġena veiġa tarimarima na ġekira-babobaborini, moġeri veiġa na tarima ġeri iaunega evanaġirini. Ema Barau ġena veiġa tarimarima na moira-moirai ġekiraġirini, moġeri na tarima ġeri kokore evanaġirini.

²⁶ Tarikakagu mabarami, ġovetuġamaġi-ġenoġoi, ġomi tu aiġesi tarimami Barau na ekeamito. Ġomi tanobara iaunegana ġesi bita vaġa-vetovomini nai, ġomi viravira moġo ma iaunegami, e ġomi viravira moġo ġoseġukato, ema ġomi viravira moġo ġemi bese tu vere.

²⁷ Senaġi Barau na tu mai tanobarai babo tarimari eviriġirito, benamo ġia ġerina mai tanobara ġena iaunega tarimari evaġa-maiakarito. Ema Barau na mai tanobarai moira tarimari eviriġirito, benamo ġia ġerina tanobarai kwalimu tarimari evaġa-maiakarito.

²⁸ Ema Barau na mai tanobarai tarima tari, asi ġeiavirini, ġeġita-fitoġarini e ġekirani, namo ta asi beġe vaġa-ġoraiani ġetoni tarimari, eviriġirito, benamo ġia ġerina tanobarai ġevaġa-raġerini tarimari asi tauri ai evaġa-iaġorito.

²⁹ Mo veiġa eveiato korana tu, tarima ta ġia ġoirnani asi bene vetore-varaġevaraġe ġana.

³⁰ Gomi ġemi maġuri tu Barau na Keriso Iesu ġesi evaġa-sebonaiato. Keriso Iesu tu Barau na eġabiato ġita ġera iaunegai evaġa-iaġoato. Keriso ġenana ġita tu Barau ġena vei-iobukaiobuka tarimara e Barau ġena veaġa tarimara, ema Barau na rakava nuġana na evoi-vagiato, ma rakava toma tu asi seġukana ġita ġerai.

³¹ Moġa lorinai Buka Veaġai ekirani ilailana bitana tanu, ekirani, “Tarima ta eurani bene veiavi nai tu, Vereġauka na kara ġita iatarai eveiato veiavina moġo bene veiavi-iaġia.”

2

¹ Tarikakagu mabarami, au ġomi ġemi ai aiaġosito, Barau ġena guruġa vekuretoġana ġemi aġobata-iaġiato tu, dia guruġa gwaġiġiri ai e ġegu iaunegai ġomi avaġa-guruġamito.

² Au ġomi ġesi roġo tatanuto-ġoi nai, au ġegu ura baregona aveiato tu, dagara ta tu asi bana kiragiya, senaġi Iesu Keriso moġo, o sikira, Iesu Keriso, ġevaġa-satauroato tarimana moġo bana ġobata-iaġia.

³ Au ġomi ġesi tatanuto-ġoi tu asi kokoregu, ma garigu ġesi, ema tauġanigu maki eġoġo-ġoġoato-ġoi.

⁴ Ema au ġegu guruġa e ġobata maki dia tarimarima ġeri iaunega guruġari na, senaġi au ġegu guruġa ema ġobata tu Iauka Veaġa seġukana avaġa-foforiato-ġoi.

⁵ Moġesi naima ġomi ġemi veġabidadama tu tarimarima ġeri iaunegai asi boġono vaġa-ruġari, senaġi Barau ġena seġukai boġono vaġa-ruġari.

Iauka ġenana eiaġomani iaunegana

⁶ Moġoni, Iauka rekenai ġefakirato tarimari tu, guruġa iaunegari avinirini. A maiġeri guruġa iaunegari tu dia mai tanobara ġena iaunegai

o mai tanobara ġorikaury tarimari ġeri iaunegai; ġia ġeri iaunega tu mai ekorini.

⁷ Au na akiraġiani iaunegana tu Barau ġena iaunega vekuretoġana. Tarimarima ġerina tu ekure-toġaiato, senaġi ġia na mai tanobara roġosi roġo bere veia nuġanai, eġabi-toreato, ġita na mareva baregona bitana ġabia uranai.

⁸ Mai iaunega vekuretoġana tanobara ġeġori-kauani tarimari na ta maki asi ġeribaiao. Korana bema beġere ribaia nai tu, mareva baregona Vereġaukana tu asi ġere vaġa-satauroa.

⁹ Senaġi Buka Veaġai ekirani ilailanai,

“Ta matana na asi eġitaiato,

ta seġana na asi eseġaġiato,

ta ġena tuġamaġi asi etuġamaġi-fakaiato,

moġa tu Barau na erovina-toreato,

ġia beġe ura-viniani tarimari ġeri.”

¹⁰ Mai tu vekuretoġa dagarari, senaġi Barau na ġita ġerai tu evaġa-foforirito ġia Iaukana ġenana. Iauka tu dagara mabarari eragaġirini, Barau ġenai dagara dobu-masemaseri maki eragaġirini.

¹¹ Vaġa-ilailana tarima ta na tarima boruna ġena tuġamaġi asi eribaiani. Asigina. Mo tarima tauġena iaukana na vau ġia nuġanai tuġamaġi vekuretoġari eribarini. Barau maki moġesina, tarima ta na ġia ġena tuġamaġi asi eribaiani, senaġi Barau Iaukana na moġo eribaiani.

¹² Ġita na tu dia mai tanobara iaukana taġabiato. Asigina. Ġita tu Barau na etuġuato Iaukana taġabiato, Barau na varevare evini-kavarato, dagarari bitana riba-maorori ġana.

¹³ Maġeri dagara tu dia tarimarima ġeri iaunegai ġevaġa-ribamani guruġari loriri ai ġakiraġirini. Senaġi mai tu Iauka Veaġa na evaġa-ribamani guruġari ilailari ai ġaguruġani. Iauka rekenaġi dagarari o guruġari tu Iauka Veaġa na evaġa-ribamani ilailanai ġakiraġirini.

¹⁴ Tanobara tarimana na Barau Iaukana ġenana dagara ta tu asi bedoġariani, korana ġia tanobara tarimana ġenai mo tu babo dagarari, ema asi maki beribarini, korana moġeri dagara mo tu Iauka Veaġa nuġanai ġetanuni tarimari na vau beġe ribarini.

¹⁵ Iauka Veaġa ġia nuġanai etanuni tarimana na, dagara mabarari beġita-ginikaurini e betuġamaġi-fakarini, senaġi ġia tauġena tu ta na asi beġita-ginikauani e asi beriba-maoroani.

¹⁶ Korana Buka Veaġa nuġanai maiġesi ekirani,

“Deikara na Vereġauka nuġana eribaiani?

Deikara na ġia besisiba-viniani?

A Keriso ġena tuġamaġi tu ġita ġerai etanuni.”

3

Barau ġena vetuġunaġi tarimari

¹ Tarikakagu mabarami, au na ġomi avaġa-guruġamito-ġoi tu dia Iauka Veaġa na eguine-iaġirini tarimari kavana. Senaġi au na ġomi tu tanobara maġurinai ġetanuni tarimari kavana avaġa-guruġamito-ġoi. Mo negai ġomi Keriso ġena veġa e maġuri nuġanai tu roġo raraka-raraka.

² Moġesi naima au na ġomi tu lata gorari ai aġubumito, a dia ġaniġani gwaġiġiri ai. Korana mo negai ġomi iauka ġaniġaniri gwaġiġiri ġaniġaniri

ġana tu roġosi roġo boġoro barego-ginikau. Aba, initoma maki ġomi tu roġosi roġo boġoro barego-ginikau, roġo raraka-raraka iaukai;

³ korana ġomi tu roġo tauġanimi ġeri ura rakavari na ġeguine-iaġimini. Ġomi fakami ai mama e vevane tu roġo ġetanuni, mainana moġo evaġa-moġoniani ġomi tu mai tanobara tarimari ġeri maġuri ai roġo ġotanuni.

⁴ Gomi tu roġo tanobara maġurini ġotanuni, korana ġomi ta okirani, “Au tu Paulo ġena,” ma ta tu ma okirani, “Au tu Apolos ġena.”

⁵ Be Apolos tu dei? Ema Paulo tu dei? Ġia tauri ruarua tu vetuġunaġi tarimari koriri moġo, ġia ġerina ġomi Iesu ġovaġa-moġoniato. Ġai tauma ruarua tu Vereġauka na ġauvei tata evinimato.

⁶ Au tu avaroto, a Apolos na tu nanu na edairiato, senaġi Barau na tu evaġa-garaiato.

⁷ Moġesi naima evaroto tarimana e nanu na edairirito tarimana tauri ruarua tu asi arari, senaġi Barau ġereġana moġo, korana ġia na dagara evaġa-gararini.

⁸ Evaroni tarimana ema nanu na edairini tarimana tu ilaila moġo. Ġia tata ġeri ġauvei ilailari ai Barau na voiri bevinirini.

⁹ Ġai tu Barau ġesi ġaġauvei-sebonani tarimama, a ġomi tu Barau ġena vamoka; ġomi maki Barau ġena numa.

Barau ġena ġauvei tu numa ragaragana kavana

¹⁰ Barau na ġena namo e varevare-bara eviniguto ilailanai, au tu numa raga tarimagu namonai aiagoto. Numa vaġa-ruġavaisina duġuna forena aragaiato (o kwakuri avaġa-ruġa ginikaurito), ma ta na tu iatanai numa eragaiani. Senaġi numa beġe ragaiani tarimari tata tu beġene venari, kamasi numa beġe ragaiani tu.

¹¹ Barau na Iesu Keriso tu numa vaġa-ruġavaisina duġuna forenai evaġa-iaġoato. Ma ta na numa vaġa-ruġavaisina duġuna boruna ta tu asi ma beragaiani veġata.

¹² Tarima tari na mai numa vaġa-ruġavaisina duġuna forena (o numa kwakuri) iatanai tu golo, silva o galasi foreri beġe ġauvei-iaġirini numa beġe ragani nai, a tarima tari na ġau, reġi o biri beġe ġauvei-iaġirini.

¹³ Ġia tata ġeri ġauvei vetoġari tu Vereġauka ġena Kota baregona ġaronai vau bevaġa-foforirini. Korana mo ġauvei tu karava na bevaġa-foforiani ema karava na tarima tata ġeri ġauvei betovo-naġirini, moġeri ġauvei tu namori ba rakavari.

¹⁴ Bema tarima ta na mo numa vaġa-ruġavaisina duġuna forenai eragaiato numana tu karava na asi begaraiani nai, ġia tu voina namona begabiani.

¹⁵ Bema ġena numa karava na begaraiani tarimana tu, ġena ġauvei mabarari tu beġe rekwa-rekwani, ġia ġereġana moġo bemagurini. Senaġi ġia tu noġa moġo karava na beraga-magurini.

Ġomi tu Barau ġena Rubu Veaġa

¹⁶ Ġomi asi ribami, ġomi tu Barau ġena Rubu Veaġa ema Barau Iaukana tu ġomi nuġami ai etanuni, ei?

¹⁷ Bema tarima ta na Barau ġena Rubu Veaġa bevaġa-rakavaiani nai, ġia maki Barau na bevaġa-rakava kwaikwaiani, korana Barau ġena Rubu tu veaġa, ema ġomi tu ġia ġena Rubu Veaġa.

Tarimarima asi boġono vaġa-veiaviri

18 Tarima ta ġena tuġamaġi na asi bene ġofaia. Bema tarima ta ġomi fakami ai etuġamaġini, ġia tu ma iaunegana mai tanobarai, ġia tu babo tarimanai bene iaġo, be bene iaunega.

19 Korana mai tanobara iaunegana Barau ġoiranai tu iaunega babona. Buka Veaġai ekirani kavana, ekirani, “Barau na iaunega tarimari tauġeri ġeri iaunega rakavari nuġari ai eġabi-taririni.”

20 Ema Buka Veaġai maki ma ekirani, “Vereġauka ribana, iaunega tarimari ġeri tuġamaġi tu asi tauri, koriri moġo.”

21 Moġesi naima, tarima ta na tarimarima tu asi bene vaġa-veiaviri. Korana dagara mabarari tu ġomi ġemi.

22 Paulo e Apolos ema Petero; mai tanobara mabarana tu ġomi ġemi, maġuri e mase, maitoma ġefoforini dagarari ema ġoirai vau beġe iaġomani dagarari; mabarari tu ġomi ġemi.

23 A ġomi tu Keriso ġena, ema Keriso tu Barau ġena.

Vereġauka tauġena na ġena vetuġunaġi tarimari ġeri maġuri evetau-ginikaurini

4

1 Moġesi naima ġomi na ġai boġono tuġamaġima, ġai tu Keriso ġena vetuġunaġi-iaġovinina tarimama, ema Barau ġena vekuretoġa dagarari ġitaġauri tarimama.

2 Farefare ġeviniani bene ġita-ġauri ġetoni tarimana ġena biaguna ġena ura baregona, ġia tu ma vetuġa-maġikauna ġesi farefare bene nariri.

3 Au tu kamasi ġotoni? Au tu asi atuġamaġini, ġomi na au boġo vetau-ginikauguni o tarimarima ġeri Kota maġurinai beġe vetau-ginikauguni ba asiġina. Au tu tauġegu maki asi avevaġa-maoroni.

4 Au tauġegu avetuġamaġini, ġegu rakava ta asi atuġamaġi-doġariani. Senaġi asi akirani, au tu asi ġegu vei-rakava. Vereġauka na moġo au eġita-ginikauguni.

5 Moġesina naima Vereġauka roġosi bene iaġoma e ġena vevaġa-kota ġarona roġosi bene ġabia nuġanai, maitoma tu tarima ta asi boġono vetau-vinia. Vereġauka na mukuna furufuru ai vekuretoġa dagarari mabarari mamai betore-rosirini, ema tarimarima ġeri tuġamaġi loruri ġutunai ġetanu-vekuretoġani maki bevaġa-foforirini. Mo ġaro ai Barau na tata bevaġa-raġerini ġeri veigā loriri ai.

6 Tarikakagu mabarami, maiġeri guruġa au tauġegu ema Apolos ġema bavaġa-vetovori, korana tu ġomi namo boġono doġari uranai. Be, ġai ġemana maiġa bogono ribaia, “Buka Veaġai ġetoreato guruġana asi bogono vanaġia.” Monana tarima sebna ta moġo asi boġo vaġa-veiaviani e ta asi boġo kira-fitoġaiani.

7 A ġoi tu deikara na tarima baregomu ai etoremuto tarimarima mabarari fakari ai? Ġoi ġemu dagara mabarari tu dia Barau na evinimuto? Bema ġoi na Barau ġenana odoġarito nai tu, kara dainai ovekokorokuni, noġa dia Barau ġenana oġoitaġoato dagarana oveini?

8 Ġomi tu ġoura-vinirini dagarari na varau boġo vonuvonu-raġe. Ġomi tu varau boġo taġa-ġosi. Ġai tu ġomi na boġo vanaġima, korana ġomi tu varau boġo kini, be ġoveġitaġauni. (Ġomi tu noġa moġo Keriso varau bere iaġoma-ġenoġoi kavana ġoveini). Au ġegu ura barana sebna, ġomi tu moġoni boġoro

kini, be ġai maki ġomi ġesi bitara kini-sebona. (Korana boġono riba, Keriso ma beġenoġoi-iaġomani nai, ġai maki ġomi ġesi bita kinini).

⁹ Senaġi au atuġamaġini tu maġesi: Barau na ġai apostolo tu gabi tari-mamai etoremato, mai tanobarai asi beġene ġita-leama e asi beġene iavima gabunai etoremato. Ġai tu noġa tarima kotari, Kota na evaġa-moġonirini beġene vaġi-maseri etoni, benamo ġeġabirini, ġutuma-bara ġoirari ai ġevaġa-ruġa-rosirini, beġene ġitari vau beġene vaġiri ġetoni kavana. Ġai maki Barau na mai tanobara mabarana nuġanai etore-rosimato, aneru e tarimarima ġoirari ai.

¹⁰ Ġai tu babo Keriso ġaramanai bene, a Keriso nuġanai ġomi tu iaunega. Ġai tu asi kokorema, a ġomi tu ma kokoremi. Ġomi tu ġeguba-kaumini, a ġai tu asi ġegubakaumani.

¹¹ Ġai ġatanu-iaġomani mo toma tu ġavito-maseni e ġananu-maseni; dabuġa rakavari na ġavedabuġani; ġekwarimani; ema asi ġema tanutaġo numari.

¹² Ġai tu tauġema ġimama na ġaġauveini. Tarima na ġekira-fitoġamani nai, ġai na tu ġavaġa-namorini; ġevaġa-midigu midigumani e ġelai-lausilausimani, senaġi ġaruġa-gwaġiġini moġo, voiri asi ġaveirini.

¹³ Ġai arama tu ġevaġa-rakavarini, a ġai na tu ġavaġa-guruġa ginikaurini. Ġai tu tanobara ġena momo ai ġaiġoġo, e tanobara na eruġamani asi eġabi-raġemani beiaġoma mo toma.

¹⁴ Au na maġeri mabarari atorerini tu, dia ġomi navaġa-maiakami ġana, senaġi ġomi tu au natugu, aura-vinimini tarimami, naima akiravarato-reaumini.

¹⁵ Aba, Keriso nuġanai ġevaġa-ribamini e ġeġori-kaumini tarimari tu betaġu 10,000, senaġi tama tu asi vovoka ġomi fakami ai, sebona moġo. Korana Vari Namona ġenana au tu ġomi tamamni ai aiġoġo Keriso Iesu nuġanai.

¹⁶ Moġesi naima au na ġomi alaunaġimini, au boġono tovtovovu.

¹⁷ Moġa lorinai maki au na Timoteo ġomi ġemi ai atuġu-iaġosiato. Ġia Vereġauka nuġanai tu au natugu e auravini-rakavaiani, ema ġia tu Vereġauka ġena ġauvei evei-ġitakauani ma vetuġamaġikauna ġesi. Ġia na au Keriso Iesu nuġanai aiġesi atanuni maġurina ma bekira-varamini, gabu e rubu mabarari ai avevaġa-riba iaġirini ilailari ai.

¹⁸ Ġomi tari tu ġovekokorokuni, noġa moġo au ġomi ġemi ai tu asi baiġosini noġa ġoveini. Ġomi garimi aveini ġotoni.

¹⁹ Senaġi bema Vereġauka ġena ura nai tu, ġemi ai baiġosi-ġarimoġini. Benamo au baiġosini vauro, maniġeri tarima ġeri vekokoroku guruġari ema ġeri seġuka basi ribarini.

²⁰ Korana ainai Barau na ġena Basileia o veġitaġau evaġa-ruġaiani, monai tu dia guruġa korina ġesi moġo efoforini. Asigi. Barau ġena veġitaġau tu ma seġkana ġesi efoforini.

²¹ Ġomi na tu aiġa ġoura-viniani? Au ġomi ġemi ai tu ma kwarigu ġesi bana iaġosi, ba veuravini ai ema manau ai, ei?

5

Veġa rakavari Korinto ai

¹ Ma aseġaġini, ġekirani, ġomi fakami ai mata-boraġa maġurina eġorani. Mai mata-boraġa maġurina ġomi fakami ai eġorani tu Barau asi ribari

beseri fakari ai maki asi eġorani veigana. Au ġekiraguni, tau ta na sinana raġetaġona eġabiani, benamo ġaraġonai evaġa-iaġoani, eġena-viniani.

² Ma nuġanai ġomi tu ġovekokorokuni. Ġomi tu nuġami taġi na beġere vonu, be moġesi eveini tarimana tu ġomi fakami na boġoro tuġu-veġitaia.

³ Aba, au tauġanigu ġomi vekaravami ai tu asiġina, senaġi iaukai au tu ġomi vekaravami ai maniġegu. Be mai veigā eveiani tarimana tu au na varau bavaġa-maoroa, au tauġani ai ġomi ġesi maninai mani ġegu bara vaġa-maoroa ilailanai.

⁴ Ġomi ġera Vereġauka Iesu Keriso aranai ġoraka-vegogoni, ema au iaukagu maki ġomi vekaravami ai nuġanai, ġera Vereġauka Iesu Keriso ġena seġukai,

⁵ ġomi na maniġesi eveini tarimana tu Satani boġono vinia, tauġanina bene vaġa-rakavaia uranai bene. Moġesina boġono veia, be Iesu Vereġauka ġena ġenoġoi ġaronai ġia iaukana tu bene maġuri.

⁶ Ġomi ġoveiavini tu asi namo. Ġomi asi ribami farao evaġa-tubuani muramurana misina na farao mabarana evaġa-tubuani?

⁷ Moġesina naima farao evaġa-tubuani muramurana guinena mabarana ġemina boġono tore-veġitaia, be ġomi tu beredi variġuna asi farao evaġa-tubuani muramurana beredinai boġono iaġo. Au ribagu, ġomi tu moġoni beredi variġuna, dia farao evaġa-tubuani muramurana ġesi ġevei-sebonamito beredina. Korana Keriso tu moġoni ġita ġera mamoe natuna ginitaġo ġana. Ġia tu ġita urarai ginitaġo ġana ġevaġiato.

⁸ Moġa lorinai Rubu Veaġa verekona bitana ġabi-gwaġiġia, senaġi dia farao evaġa-tubuani muramurana guinena ġesi. Mai veigā tari ilailana tarima vaġa-rakavari tuġamaġiri e veigā rakavari tu farao evaġa-tubuani muramurana kavana, be maiġeri maki bitana tore-veġitari Rubu Veaġa verekona bita ġabi-gwaġiġiani nai. Ġita na Rubu Veaġa verekona bita ġabi-gwaġiġiani nai tu, dia farao evaġa-tubuani muramurana ġesi ġevei-sebonaiani beredina ġesi. Moġa tauna tu, ma moġonira ġesi ema moġoni ai bitana ġabia.

⁹ Fefa tai au na ġomi atore-vinimito nuġanai akiramito, mata-boraġa tarimari ġesi tu asi boġono vekako.

¹⁰ Moġesi atore-vinimito nai, au na tu dia ekalesia murikanai ġetanuni tarimari akiraġirito, au iniġesi tu asi akirato, ġekima-rakaoni, o ġemata-ġaniġanini, o ġofaġofa veigari ai ġeverarini, o kwaivakuku ġetoma-rakarigo vinirini tarimari ġerina tu boġono rakaveġita-moġovaġi. Korana bema maiġeri tarima ġerina ġoveġita-moġovaġi boġo toni nai tu, mai tanobara boġo iaguiani.

¹¹ Senaġi toma au na atore-vinimini tu, akirani, deikara ekirani, ġia tu tarikaka veġabidadama nuġanai, senaġi ġia tu ekimani o emata-ġaniġanini, o babarau etoma-rakarigo vinirini, o tarimarima ġeri maġuri ekiraġi-rakava rakavarini, o niuniu tarimana, o ġofaġofa veigari eveirini tarimana ġesi asi boġono vekako. Maiġesi tarimari ġesi tu asi maki boġono ġani-vegogo.

¹²⁻¹³ Au tu asi ġegu ġauvei ta ekalesia murikanai ġetanuni tarimari au na bavaġa-maororini. Barau na vau bekota-vinirini. Senaġi ġomi tu ma ġemi maoro ekalesia nuġanai ġetanuni tarimari boġo vaġa-maororini. Buka Veāġa ekirani ilailanai, “Vei-rakava tarimana ġomi fakami na boġono tore-veġitaia!”

6

Vekotavini ekalesia karomi ġesi

1 Bema ġomi ta ekalesia karomu ta ġesi ġoveġare-veġareni nai, kara dainai tu Barau asi ġekorana-iaġiani Kota seġaġi tarimari ġeri ai oa samaniani, ġia beġene vevaġa-maoro ġana, a Barau ġena tarimarima veaġari ġeri ai mo meto tu asi ġoġabi-iaġoani vei-maorona, ei?

2 Ġomi asi ribami, tanobara maġurinai ġetanuni tarimari tu Barau ġena tarimarima na beġe vaġa-maororini? Karase nai ġomi na mai dagara misiri tu asi ilaila tauġemi na ġemi vegogo ai boġo vaġa-maororini?

3 Ġomi asi ribami, ġita na tu aneru bita kota-vinirini? Bema moġesi bita veini nai tu, atuġamaġini, mai vanaġivanaġi tatanu-iaġiani maġurina dagarari maki bita vetau-ġinikaurini riba.

4 Ġoġitaiani, bema mai vanaġivanaġi tatanu-iaġiani maġurina dagarari ġita na bita vetau-ġinikaurini, karase nai tu Barau asi ġekorana-iaġiani Kota tarimari ġeri ai goiaġoni, ġemi beġene vevaġa-maoro ġotoni.

5 Maiġesi akirani tu ġomi beġene maiakami ġana. Moġoni korikori, ġomi fakami ai iaunega tarimana sebona ta maki asiġina ġinavaġi moġo, be ġia na tarikakana vekaravari ai mani meto misina asi bevaġa-maoroani, ei?

6 A ġomi tu ekalesia karona ta na karona ta eġori-kotaiani, ma tauri ruarua tu ġeiaġoni, Iesu asi ġevaġa-moġoniani tarimari ġoirari ai ġea ruġa-tarini, ġekota ġana.

7 Moġoni, ġomi tauġemi moġo vekaravami ai ġoveġori-kotani tauna korikori tu, ġomi ġemi veġabidadama maġurina na tu moġoni boġo keto-korikori. Karase nai tarikakami tari na ġevaġa-rakavamini nai tu, asi moġo ġoġabi-raġerini? Kara dainai ġofaġofai ġemi farefare ġeverarimi ġetoni nai tu, asi moġo ġoġabi-raġerini, ei?

8 A ġomi tu tarikakami ġesi tauġemi moġo ġofaġofai ġoveverarini e ġovevaġa-rakavani.

9 Ġomi asi ribami, veġa iobukaibukari asi ġeveini tarimari na Barau ġena Basileia tu asi beġe ġaunaiani. Tauġemi nuġami na asi beġene ġofami. Korana tu ġekimani tarimari, kwaivakuku ġetoma-rakarigorini tarimari, veġura-vanaġi tarimari, tau tu tau karori ġesi ġekimani, ema ġeġigiraġeni tauġeri karori ġesi maiaka veġari beġene vei ġetoni tarimari,

10 ġelemani tarimari, ġemata-ġaniġanini tarimari, niuniu tarimari, ġofaġofa veġari ai ġeveverarini tarimari, ema tarimarima ġeri maġuri ġekiraġi-rakava rakavarini tarimari na Barau ġena Basileia tu asi beġe ġaunaiani.

11 Ma ġomi kotari ġuinenai tu moġesi ġoveito-ġoi tarimami. Senaġi ġomi tu ġita ġera Barau Iaukana na Iesu Vereġauka aranaġi varau eġuriġimito, evaġa-veaġamito, ema asi ġemi vei-rakava etato.

Ġita tauġanira tu Iauka Veaġa ġena tanu numana

12 Ta bekirani, “Dagara mabarari au ġegu ai tu asi naravatu,” betoni. Ġomaoroni, senaġi dia mo dagara mabarari ġerina ġomi namo boġo doġarini. Dagara mabarari au ġegu ai tu asi taravatu, senaġi asi namo au dagara ta na beġori-kauguni, benamo ġena tuġu-rakaorakao tarimanai baiaġoni.

13 Ma ta bekirani, “Ġaniġani tu sinaġe ai bene tanu ġana e sinaġe tu ġaniġani ġana.” Mai tu moġoni! Senaġi ġaniġani e sinaġe tu Barau na tauri ruarua bevaġa-rakavarini. Ġita tauġanira Barau na eveiato tu dia

tarimarima na bitana kima-iaġia ġana. Asiġina. Barau na tauġani tu Vereġauka ġena eveiato, ma Vereġauka maki tauġani ġena Vere.

¹⁴ Barau na Vereġauka mase na evaġa-varigġisi ġenoġoiato, ema ġita maki mase na bevaġa-varigġisi ġenoġoirani, Barau tauġena ġena seġuka na.

¹⁵ Ġomi asi ribami, tata tauġanimi tu Keriso tauġanina koturikoturi, ei? Ma Keriso tauġanina koturikoturi moġeri tu naġabiri, be mata-boraġa tarimari tauġaniri ai navaġa-iaġori? Asiġina ġinavaġi!

¹⁶ Ba ġomi tu asi ribami, mata-boraġa vavinena ġesi evekafani tarimana tu mo mata-boraġa vavinena ġesi sebonai ġeiaġoni? Korana Buka Veaġa nuġanai Barau ekirato, “Mo tarima ruarua tu tauġani sebonai moġo beġe iaġoni.”

¹⁷ Senaġi Vereġauka ġenai bekaơakauni tarimana tu Vereġauka ġesi iauka sebonai beġe iaġoni.

¹⁸ Mata-boraġa maġurina ġenana boġono raka-veġita. Veġa rakava mabarari tarimarima na ġeveirini tu tauġani murikana moġo rakavana, senaġi ekimani tarimana tu tauġena tauġanina nuġanai evei-rakava viniani.

¹⁹ Ba ġomi tu asi ribami, ġomi tauġanimi tu Iauka Veaġa ġena Rubu Veaġa, ma Iauka Veaġa tu ġomi tauġanimi nuġanai etanuni, ei? Mani Iauka Veaġa tu Barau na evinimito, moġa lorinai ġomi tu dia tauġemi ġemi, senaġi ġomi tu Barau ġena.

²⁰ Ġomi tu Barau na voimi varau eveirito, evoi-ġenoġoimito, be tauġanimi tu Barau ġena. Moġa lorinai tauġanimi na Barau boġono vaġa-raġea.

7

Veġaraġo guruġari

¹ Maitoma tu ġemi fefai au ġotore-viniguto guruġari ma navaġa-voiri. Tau ta asi eveġaraġoni tu namo.

² Senaġi kima veġana eġorani lorinai, namona tu tau tata tauġeri ġaraġori sebori sebori beġene ġaraġo, e vavine tata maki tauġeri ġaraġori sebori sebori beġene ġaraġo.

³ Tau tauġanina tu ġaraġona ġena, be tauġanina ġaraġona ġenai asi bene koua, a ġaraġona ġena ura bene veiri. Vavine maki moġesi, tauġanina tu ġaraġona ġena, be tauġanina ġaraġona ġenai tu asi bene kou-ġaua, a ġaraġona ġena ura bene veiri.

⁴ Veġaraġo vavinena tu asi ġena maoro ġia tauġena tauġanina ġenai, a ġaraġona tauna moġo ma ġena maoro ġia tauġanina ġenai. Veġaraġo tauna maki moġesina, ġia tu asi ġena maoro ġia tauġena tauġanina ġenai, a ġaraġona vavinena moġo ma ġena maoro ġia tauġanina ġenai.

⁵ Goveġaraġoto tarimami tu ġaraġomi ġeri ai tauġanimi asi boġono kouri. Senaġi taumi ruarua nuġa sebonai bogo kirani, ġoġaniveaġa e ġoġauġau boġo toni, moġa uranai vauro mo negai boġono tanu-faka. Senaġi moġa bekorini murinai tu, ma boġono gena-vegogo maia. Moġesi boġono vei, be Satani na asi ġovevaġa-gwaġiġi-iaġiani gabunai asi bene riba-ġanimi.

⁶ Maiġesi aguruġani tu, ġomi navaġa-kavami ġana moġo, dia taravatu atoreani, akirani, boġono veia veġata atoni.

⁷ Korana au ġegu ura baregona ġomi tau mabarami tu au kavana boġoro vei, asi boġoro veġaraġo. Senaġi Barau na tau tata varevare eviniato, tau ta ġena varevare tu bene veġaraġo, ma ta ġena tu asi bene veġaraġo.

⁸ Au na asi ġaraġori tarimari ema ġaraġori ġemaseto tarimari tu akirarini: Ġia tu gora, asi beġene veġaraġo, beġene tanu moġo au kavana.

⁹ Senaĝi bema ĝia asi ilaila beĝe vevaĝa-gwaĝiĝini nai tu, benamo beĝene veĝaraĝo. Korana beĝe veĝaraĝoni tu namo, a asi namo kima veĝari nuĝari ai karava noĝa beĝene ĝara.

¹⁰ A Veĝaraĝo tarimami tu mai taravatu avinimimi. Senaĝi mai tu asi au ĝegu taravatu. Asiĝina. Mai tu Iesu Vereĝauka ĝena taravatu ĝomi ĝemi: Veĝaraĝo vavinena na ĝaraĝona asiĝina ĝinavaĝi bene dobi-kwaneana.

¹¹ Senaĝi irau ĝaraĝona bedobi-kwaneani nai tu, bene tanu-gora moĝo, a asiĝina tu, ĝaraĝona ĝesi ma beĝene veĝaraĝo-ĝenoĝoi. Ema veĝaraĝo tauna na maki ĝaraĝona asiĝina ĝinavaĝi bene dobi-kwaneana.

¹² Tarima kotari ĝeri ai tu nakira, -mai tu au moĝo ĝegu guruĝa dia Vereĝauka ĝena guruĝa, -bema veĝabidadama nuĝanai tarikaka ta ĝaraĝona vavinena tu Iesu asi evaĝa-moĝoniani vavinena, senaĝi ĝena ura ĝaraĝona tauna ĝesi beĝene tanu-vegogo nai, mo tau na ĝaraĝona vavinena asi bene dobi-kwaneana.

¹³ Ema bema vavine ta ĝaraĝona na Iesu tu asi evaĝa-moĝoniani, senaĝi eurani ĝaraĝona vavinena ĝesi beĝene tanu-vegogo, mo vavine na ĝaraĝona asi bene dobi-kwaneana.

¹⁴ Korana Iesu asi evaĝa-moĝoniani tauna tu ĝaraĝona vavinena ĝenana moĝo veiareva etanuni, ema Iesu asi evaĝa-moĝoniani vavinena tu ĝaraĝona tauna ĝenana moĝo veiareva etanuni. Bema asiĝina nai tu, toma ĝomi natumi Barau ĝoiranai tu asi veiareva, senaĝi ĝia toma tu veaĝa.

¹⁵ Senaĝi bema Iesu asi evaĝa-moĝoniani tauna o vavinena ĝaraĝona ĝenana bedobini nai tu, namo bene dobi, bene raka. Mo Iesu evaĝa-moĝoniani tauna o vavinena mai dabarai tu befakani, meto ta asi beĝwaiani. Barau na ĝomi ekeamito maino ai boĝono tanu.

¹⁶ Ĝoi veĝabidadama vavinemu tu kamasi ĝoi oribani, ĝoi na ĝaraĝomu veirakava nuĝana na bovaĝa-maĝuriani? O ĝoi veĝabidadama taumu tu kamasi ĝoi oribani, ĝoi na ĝaraĝomu veirakava nuĝana na bovaĝa-maĝuriani?

Barau na ekeamito ilailanai boĝono tanu

¹⁷ Ĝomi tata Iesu Vereĝauka na evinimito ilailari ai ema Barau na tata ekeamito ilailari ai moĝo boĝono tanu. Au na tu mai taravatau misina ekalesia mabarari avaaĝa-ribarini.

¹⁸ Bema tau ta tauĝanina kefina ĝelama-vaĝiato murinai vau, Barau na ekeaiato nai tu, kefina asi ma bene inu-ĝaua, benamo ĝelamaiato fauna bene kure-toĝaia. Ema bema tau tauĝanina kefina roĝosi beĝene lama-vaĝia nuĝanai, Barau na ekeaiati nai tu, kefina asi beĝene lama-vaĝia maia.

¹⁹ Korana tu kefi-lamavaĝi tu asi anina ta, ema kefi asi lamavaĝi maki asi anina ta. Dagara baregona tu Barau ĝena taravatau guruĝari boĝabigitaririni.

²⁰ Tarimarima mabarari aĝesina ĝetanuto-ĝoi nuĝanai, Barau na ekearito, moĝesi moĝo beĝene tanu.

²¹ Ĝoi Barau na ekeamuto neganai, ĝoi tu tuĝu-rakaorakao tarimamu asi voimu otanuto-ĝoi, ei? Asi ĝena rakava, namo moĝo. Moĝa tuĝamaĝi vekwaraĝina asi bono vei, senaĝi mani tuĝu-rakaorakao maĝurina beĝe tuĝu-vaĝimuni nai tu, bono ĝabi-raĝea.

²² Korana tarima ta roĝo tuĝu-rakaorakao tarimana nuĝanai, Barau na ekeaiato Vereĝauka ĝesi beĝene sebona, ĝia tu varau fakai etanuni, korana ĝia tu Vereĝauka ĝena tarima. Aba, tauĝani ai ĝia tu roĝo tuĝu-rakaorakao tarimana senaĝi. Moĝa ilailanai, asi tuĝu-rakaorakao tarimana o fakai

etanuni tarimana Barau na ekeaiani tu Veregāuka ġena tuġu-rakaorakao tarimana.

²³ Ġomi tu Barau na voimi varau eveito, evoi-ġenoġoimito. Be tarimarima ġeri tuġu-rakaorakao tarimami ai asi boġono iaġo.

²⁴ Tarikakagu mabarami, ġita tata aiġesi tatanuto-ġoi nuġanai, Barau na ekearato, bena moġesi moġo Barau ġesi bitana tanu.

Sisiba guruġari gora ema vabu ġeri ai

²⁵ Ma roġosi beġene veġaraġo ġuiatori e futuari ġeri taravatu ta Veregāuka na au tu asi eviniguto. Senaġi au ġegu tuġamaġi ai aġitaiani guruġana nakiraġia, korana au tu Veregāuka ġena vevetuġaġwai moġo etoreguto, guruġa moġoniri moġo bana kiraġiri ġana.

²⁶ Mai nega rakavari maiġeri meto baregori ġeġorani dainai, au atuġamaġini, tau tu toma ġotanuni kavana moġo boġono tanu-iaġo.

²⁷ Ġoi oveġaraġoto taumu tu, ġaraġomu dobi-kwanena tuġamaġina asi bono vei. A asi ġaraġomu meromu tu, ġuiato asi bono vetau, ta noġaraġoa uranai.

²⁸ Senaġi bema ġoi boa veġaraġoni maki namo, ġoi na vei-rakava ta asi boveiiani. Ma ġuiato beveġaraġoni maki namo, ġia na vei-rakava ta asi beveiani. Senaġi beġe veġaraġoni tarimari tu ġeri maġuri nuġanai meto vovoka beġe doġaririni. Ma au na tu mo meto ġerina navaga-maġurimi atoni.

²⁹ Tarikakagu mabarami, au na kara akiraġiani tauna tu inia: Nega tu bekubi-rakava. Be, maitoma na besinaia beiaġoni tu, veġaraġo tauri tu asi ġaraġori noġa beġene tanu.

³⁰ Ema ġetaġini tarimari noġa moġo asi ġetaġini tarimari kavana beġene tanu, e ġeverereni tarimari noġa moġo asi ġeverereni tarimari, e farefare ġevoini tarimari tu farefare ta asi ġeġaunaiani tarimari noġa moġo,

³¹ ema tarima na mai tanobara dagarari ġeġauvei-iaġirini nai, moġeri dagara tu asi beġene ġabiri dagara baregori ġia ġeri maġuri nuġari ai. Korana mai tanobara vetoġana korikori tu varau ekori-iaġoni.

³² Au asi aurani, mai tanobara dagarari na ġemi tuġamaġi beġene vaġa-vonuri. Asi eveġaraġoto tarimana tu Veregāuka ġena dagara etuġamaġi-ġutumarini, aiġesi Veregāuka iauna bevaġa-namoani etoni.

³³ Veġaraġo tauna tu mai tanobara dagarari etuġamaġi-ġutumarini, aiġesi ġaraġona iauna bevaġa-iakuani etoni.

³⁴ Moġesina naima ġia tu egabi-daġadaġani, tavi ta tavi ta na ġeinuani. Veġaraġo vavinena ema asi kota maki ekima-karato ġuiatona tu ma ġeri irau. Asi ġaraġona vavinena tu Veregāuka ġena dagara betuġamaġi-ġutumarini. Ġia ġena ura tu tauġanina ema iaukana beġene veaġa Veregāuka ġena. Senaġi veġaraġo vavinena tu tanobara dagarari betuġamaġi-ġutumarini, aiġesi ġaraġona iauna bevaġa-iakuani etoni.

³⁵ Mai tu ġomi bana vaġa-kavami ġana maiġeri akiraġirini, dia ġomi akirakira-ġaumini. Senaġi mai tu au ġegu ura ġomi boġono tanu-ġinikau moġo, e kara ta na asi bene kokuu-ġaumi Veregāuka vetuġunaġina boġo iaġo-vinini nai.

³⁶ Bema tau ta etuġamaġini, kirakauna ġuiatona, asi kota maki ekima-karato ġuiatona, ġenai ġena veiaġa tu asi roroġoto, ema ġena ura kirakauna ġenai ebarego-lelevaġini, ma eġitaiani asi ilalla bevevaġa-gwaġiġini nai tu, tauri ruarua beġene veġaraġo ġena ura lorinai. Mo tu vei-rakava asi beveini.

³⁷ Senaġi bema tarima ta nuġana evaġa-gwaġiġiani, ma dagara ta na nuġana asi maki evaġa-ġariġariani, e tauġena tauġanina ġena ura

etuġamaġi-fitoġaiani, e tauġena nuġanai ekirato kirakauna, asi kota maki ekimato ġuiatona, tu asi beġaraġoani, tarimana maki namo. Ġia na maki veiġa namona beveiani.

³⁸ Moġesina naima tarima ta na kirakauna, asi kota maki ekima-karato ġuiatona, beġaraġoani tu, veiġa namona beveiani; senaġi kirakauna asi beġaraġoani tarimana na tu, veiġa namo lelevaġina beveiani.

³⁹ Veġaraġo vavinena ġaraġona roġo maġuri etanuni nai, ġia tu veġaraġo taravatuna na eġabiani, be ġaraġona ġesi moġo beġene tanu-vanaġi vanaġi. Ġia tu ġaraġona bemaseni, monai vauro ġia befakani. Be ġia beurani, tau ta ġesi ma ġeveġaraġo betoni nai, beġene veġaraġo asi taravatuna. Senaġi Vereġauka evaġa-moġoniani tauna moġo bene ġaraġoa.

⁴⁰ Senaġi au ġegu tuġamaġi ai aġitaiani, ġia moġesi ġora moġo betanuni asi ġaraġona nai tu beiaġu-lelevaġini. Ema au aribani, au na maki Barau Iaukana aġabiato.

8

Kwaivakuku ġevarevare-vinirini bureġari bitana ġaniri ba asiġina?

¹ Mai tu kwaivakuku ġevarevare-vinirini bureġari guruġari ma aveini. Gomi kotari ġokirani, “Ġita mabarara tu ma ġera riba.” Oba, mai tu moġoni. Senaġi ġita ġera riba na tu vekokoroku evaġa-ġoraiani, a veuravini na tu tarimarima evaġa-kokoreani.

² Bema tarima ta etuġamaġini, ġia na dagara ta eribaiato, mai tarima na kara bere ribaia dagarana korikorina tu roġosi roġo bere ribaia.

³ Senaġi Barau eura-viniani tarimana tu, Barau ma ribana ġia.

⁴ Moġa lorinai kwaivakuku ġevarevare-vinirini bureġari ġeri ai, au ġegu guruġa tu maiġa: Ġita ribara, mai tanobara nuġanai kwaivakuku tu asi dagara ta e asi aniri. Ema Barau tu sebna kwariġutu moġo, ma ta tu asiġina maia.

⁵ Aba, mai ġekira-baraurini dagarari ġetanuni gubai o mai tanobarai, korana initoma maiġeri barau e vere tu asisebo,

⁶ senaġi ġita ġerai tu, Tamara Barau tu sebna kwariġutu moġo, dagara mabarari tu ġia na evaġa-ġorarito, ema ġita maki ġia ġena tatanuni. Ema Vereġauka Iesu Keriso maki sebna kwariġutu moġo, ġia ġenana dagara mabarari ġeġorato, ema ġita maki ġia na maġuri evinirani nai, tamaġuritanuni.

⁷ Senaġi tarimarima mabarari maiġa tu asi ġeribaiani. Korana tarima kotari tu kwaivakuku ġemarana-iaġirito, be maitoma maki bureġa ġeġanirini nai, ġia tu roġo ġetuġa-maġini, mo bureġa tu kwaivakuku ġevarevare-vinirito bureġari. Moġa lorinai moġesi bureġari ġeġanirini nai, ġenuġa-vekwaraġini, ġetuġamaġini, veiġa rakavana ġeveiani.

⁸ Ġita dia ġaniġani na Barau sevina ġana beġabi-kavirani. Bema asi bita ġaniani nai tu, Barau ġoiranai rakava kwaikwai tarimara? Asiġina! O bema bita ġaniani nai tu, Barau ġoiranai tarimarima namora? Asiġina!

⁹ Senaġi boġono ġita-ġinikaua, mo veiġa ġomi na maki boġo veiani riba, maninana ġeri veġabidadama moiramaira tarimari boġo vaġa-vedaġaraġerini.

¹⁰ Korana bema nuġa moira tarimana na ġoi ma ġemu riba mai gabu ai beġitamuni, kwaivakuku rubunai oġaniġanini nai, ġia tu bolaunaġiani noġa, be beiaġoni, kwaivakuku ġevarevare-vinirito bureġari bea ġanirini.

11 Benamo mo veḡabidadama moiramaira tarimana, mo tu ḡoi tarikakamu veḡabidadama nuḡanai, ema Keriso tu ḡia maki uranai emaseto, senaḡi ḡoi ḡemu riba dainai mo tarima tu berekwa-rekwani.

12 Moḡesina naima, mai maḡuri ai tarikakamu bovei-rakava viniani, benamo ḡia nuḡa moira moḡa bovaḡa-rakavaiani nai, ḡoi tu Keriso bovei-rakava viniani.

13 Moḡa lorinai, bema au na kwaivakuku ḡevarevare-vinirini bureḡana ta baḡaniani nuḡanai, au tarikakagu ta rakava beveini tu, au bureḡa asi ma baḡani-ḡenogoini. Moḡesi aveini anina tu, tarikakagu ta bavaḡa-vedaḡa-raḡeani, benamo rakava beveini ḡesi.

9

Apostolo tarimari ḡeri ḡauvei voina ema ḡeri maoro

1 Au tu fakai atanuni tarimagu, dagara ta na asi ebarubaruguni. Au tu apostolo, ema ḡita ḡera Vereḡauka Iesu maki aḡitaiato. Ḳomi tu au ḡegu ḡauvei Vereḡauka nuḡanai ḡwaḡwari.

2 Bema tarima boruri ḡoirari ai au tu dia apostolo tarimagu, moḡa tu asi kara ta, korana ḡomi ma ribami, au tu apostolo. Ema ḡomi mani ḡemi tu vetoḡa ta, au ḡegu apostolo ḡauveina vaḡa-moḡonina ḡana, korana Vereḡauka ḡoḡabi-raḡeato nai.

3 Au ḡeriba-korikorigu ḡetoni, ḡedanāḡiguni nai, au na tu maiḡesi avaḡa-veserini:

4 Ba ḡai apostolo tu asi ḡema maoro, ḡama ḡaniḡani e niuniu dagarari baḡa doḡarini, ei?

5 Ba ḡai apostolo tu asi ḡema maoro, ekalesia vavineri baḡa ḡaraḡorini, benamo baḡa ḡori-rakao rakaorini ḡema iaḡoiāḡo ai, apostolo kotari, e Vereḡauka tarina merori, e Kefas, (mai tu Petero), ḡeveini kavana, ei?

6 Ba mai tu au ema Banabas moḡo tauma ruarua tauḡema ḡema ḡauvei ḡenana ḡema-ḡama baḡana ḡoitāḡo?

7 Kamara vetari tarimana tu tauḡena ḡena kokore ai eveḡubuto-ḡoi vetari ḡauveina eveiāto-ḡoi nuḡanai tu, ei? Ma deikara na vine tavoḡana tu eveiāto moḡo, ma vine ḡeḡwato nai tu, ḡwaḡwari asi eḡanirito, ei? Ma dei tu mamoe serina enarito moḡo, a ḡia ḡerina lata tu asi eḡabito, eniuto, ei?

8 Ḳomi ḡotuḡamaḡini, mai tu tarimarima moḡo ḡeri tuḡamaḡi guruḡari akiraḡirini, a Barau ḡena taravatu maiḡesi tu asi ekirani ḡotoni, ei?

9 Mose ḡena taravatu nuḡanai tu iniḡesi ekirani, “Boromakau muruna dagara ta na asi bono kou-ḡaua, widi momori nekokiri uranai efanafanataririni neganai.” Ḳomi ḡotuḡamaḡini, Barau na boromakau tu etuḡamaḡi-baregorini naima moḡesi eguruḡato? Asiḡina!

10 Barau na mai tu ḡita etuḡamaḡirato nai maiḡesi eguruḡato. Moḡoni, Barau na mai guruḡa tu ḡita urarai ekiraḡiāto. Korana Barau eurato tu, tano efokaiani tarimana e widi tauri ekwari-vaḡirini tarimana, tauri ruarua ḡeḡauvei-iaḡiani dagarana ḡenana eiāḡomani ḡaniḡanina ḡia maki beḡene ḡani.

11 Ḳomi fakami ai iauka dagarari namori ḡavaroto. Ma ḡomi ḡemina, ḡai tauḡanima vaḡa-kavari ḡana, farefare tu asi veḡata baḡana ḡabi, ei?

12 Bema ḡomi na apostolo kotari ḡovaḡa-kavarini tauḡanina vaḡa-kavari farefareri e moniri ai, au atuḡamaḡini, ḡai ma ḡema maoro ḡomi ḡemi na farefare e moni barego lelevaḡi baḡara doḡari.

Senāgi ǵai mo maoro moǵa tu asi ǵaǵauvei-iaǵiatio. A ǵai tu ǵavito-maseto e ǵananu-maseto moǵo, korana asi ǵaurato, Keriso varina namona bene raga-rovorovo dabarana baǵana koukou-ǵaua.

13 Gomi asi ribami, Rubu Veaǵai veaǵa dagarari ǵeǵauvei-iaǵirini tarimari tu Rubu Veaǵa na ǵari ǵaniǵani ǵeǵabirini? Ema fata veaǵanaǵi ǵeǵauveini tarimari tu, fata veaǵanaǵi varevare dagarari ǵeǵauvei-iaǵirini kwari ǵari ǵeǵabirini.

14 Moǵa ilailanai, Vereǵauka na taravatu etoreato, ekirato, deikara Vari Namona beǵe ǵobata-iaǵiani tarimari tu, Vari Namona ǵevari-fiuani voina beǵene ǵabia veǵata.

15 Senāgi au Vereǵauka na mai maoro eviniguto, maǵa tu asi aǵauvei-iaǵiani. Ema au na maǵeri guruǵa atore-vinimini tu akirani, maǵeri veǵa au ǵegu ai boǵono veiri atoni? Asigina! Initoma maki au tu maǵesi moǵo bana fanu mo bana mase tu namo vedaurea, ǵegu ǵauvei voina ǵomi ǵemi ai asigina ǵinavaǵi bana vetau. Maǵesi atanuni tu aiakuni e avekokorokuni, ma asi aurani au ǵegu vekokoroku tu guruǵa koriri moǵo benesi.

16 A Vari Namona baǵobata-iaǵiani nai, au tu asi havekokorokuni, korana Vereǵauka ekirato, bana vari-fiuva veǵata etato. Bema Vari Namona asi bavari-fiuani nai, au tu vetuǵagu kekei, asi ǵegu namo ta moǵo.

17 Bema au nuǵagu siga moǵo baurani, mai ǵauvei naveia veǵata batoni nai tu, ma voigu. Senāgi bema dia au ǵegu urai aveiani, moǵa anina tu, Barau na eviniguto ǵauveina, naima aǵauvei-iaǵiani.

18 Be, moǵesina nai, au voigu tu kara baǵabiani? Maǵa moǵo: Mo tu Vari Namona avari-fiuani nai tu, bavarifiu-kavaiani asi voina. Au tu ma ǵegu maoro ǵegu-ǵagu bana ǵabia, senāgi ǵegu maoro tu asi aǵauvei-iaǵiani.

Paulo tu tarimarima mabarari ǵeri vetuǵunaǵi tarimanai eiaǵoto

19 Aba, au fakai atanuni tarimagu, dia tarima ta ǵena tuǵu-rakaorakao tarimagu, senāgi au tauǵegu moǵo tarima mabarari ǵeri vetuǵunaǵi tarimagu ai avevaǵa-iaǵoto. Korana mai maǵuri ai tu tarima ǵutuma baǵabi-iaǵomarini Keriso ǵenai.

20 Iuda tarimari ǵesi ǵatanuni tu, Iuda tarimagu ai aiāǵoni, korana Iuda tarimari bana ǵabi-iaǵori Keriso ǵenai uranai. Au tauǵegu tu dia Mose ǵena taravatu gaburenai atanuni, senāgi taravatu gaburenai ǵetanuni tarimari ǵesi ǵatanuni tu, au maki taravatu gaburenai atanuni, korana taravatu gaburenai ǵetanuni tarimari bana ǵabi-iaǵori Keriso ǵenai uranai.

21 A asi ǵeri taravatu tarimari ǵesi ǵatanuni tu, ǵia kavana dia taravatu gaburenai atanuni. Moǵa anina tu, au Barau ǵena taravatu ǵenana aveǵitato? Asigina! Au monai tu Keriso ǵena taravatau gaburenai atanuni. Moǵesi aveini korana tu, asi ǵeri taravatu tarimari Keriso ǵenai bana ǵabi-iaǵori uranai.

22 Veǵabidadamai moiramoira tarimari ǵesi ǵatanuni tu, ǵia kavana atanuni. Veǵabidadamai moiramoira atanuni korana tu, veǵabidadamai moiramoira tarimari Keriso ǵenai bana ǵori-iaǵori uranai. Au tu tarimarima mabarari ǵeri maǵuri irauirauri atovotovorini, bena ǵia ǵesi ǵatanu-sebona sebonani. Korana aurani, dabara irauirauri mabarari bana ǵauvei-iaǵiri, be moǵeri na tarima kotari bana vaǵa-maǵuriri.

23 Au maǵesi aveini tu, Vari Namona bene raga-rovorovo ǵana. Korana aurani, Vari Namona ǵena namo ǵomi ǵesi bana ǵabi-vegogoa ǵana.

²⁴ Ĝomi asi ribami, raga-iruiru ai tu raga-iruiru ai beĝe ruĝani tarimari mabarari beĝe raga-vaĝa-seboni, senaĝi tarima sebona na moĝo kokore voina beĝabiani? Gomi maki moĝesi boĝono raga-gwada, be kokore voina bogono ĝabia.

²⁵ Ĝere nuĝanai ĝeraka-toĝani tarimari mabarari tu tauĝeri ĝerovina-ginikauni tereinini ai. Ĝia moĝesina ĝeveini tu, dia betanu-vanaĝi vanaĝini koronana beĝene ĝabia uranai. Senaĝi ĝita betanu-vanaĝi vanaĝini koronana bitana ĝabia uranai taraga-iruiruni.

²⁶ Moĝesi naima, au tu eraga-taĝuitaĝuini tarimana kavana asi aragani. Senaĝi au tu voigu bana ĝabia uranai araga-gwadani. Ema au vefaisi ai evefaisi-ginikauni tarimana kavana aveini, ĝegu fais iavara korinai moĝo asi etubuni.

²⁷ Asiĝina, au tauĝanigu tu afaisiani, au ĝegu tuĝu-rakaorakao dagaranai avaĝa-iaĝoani, ĝena ura rakavari asi aveini. Korana asi namo, tarima kotari aĝobata-vinirini, senaĝi au tauĝegu na voigu ĝoirai asi baĝabiani.

10

Isaraela ĝerina bisini matakani

¹ Tarikakagu mabarami, au aurani, ĝita tubura ĝeri ai kara eĝorato moĝa asi boĝono tuĝarekwaia. Ĝita tubura tu, Barau na magube etuĝuato dabara bene kira-varari ĝana, moĝa gaburenai ĝerakato, ema ĝia tu Davara Kakakakana nuĝana na ĝeraka-vanaĝito.

² Ĝia mabarari tu magube ai ema daĝaru-bara nuĝanai Barau na ebabati-sorito, ma Mose ĝena tarimarimai ĝeiaĝoto.

³ Ĝia mabarari iauka ĝaniĝanina sebona ĝeĝaniato.

⁴ Ema mabarari iauka nanuna sebona ĝeniuato. Korana ĝia tu iauka forena, ĝia muriri na erakato forena, ĝenana nanu ĝeniuto. Mo fore moĝa tu Keriso.

⁵ Senaĝi Barau nuĝana tu asi eiakuto ĝutuma ĝeri ai, moĝesi nai tano fakanai tauĝaniri ĝemase-fitari fitarito.

⁶ Maiĝeri dagara ĝeĝorato tu, ĝita matara vaĝa-kaniri ĝana. Be ĝita na moĝeri bisini ĝitari, benamo ĝita dagara rakavari asi bitana mata-ĝaniĝani iaĝiri, ĝia ĝemata-ĝaniĝanito kavana.

⁷ Ema kwaivakuku asi bisini toma-rakarigo viniri, ĝia kotari ĝeveito kavana. Buka Veagai ekirani kavana, "Tarimarima ĝetanu-tarito, ma ĝeĝani-verekoto, moĝa murinai tu ĝevarigisito, ĝeĝereto e ĝebarato, (mata-boraĝai ĝedau-toĝato)."

⁸ Ema ĝita maki asi bisini kima e mataboraĝa-taĝuitaĝui, korana ĝia kotari tano fakanai ĝekimato e ĝemata-boraĝato nai tu, tarimarima mabarari 23,000 veĝata ĝemaseto.

⁹ Vereĝauka ĝita na asi bisini tovo-naĝia, korana ĝia kotari na ĝetovonagiato tarimari tu, mota na ĝekafurito, benamo ĝemaseto.

¹⁰ Asi bisini guruĝa-vemuriĝoi, korana ĝia kotari ĝeguruĝa-vemuriĝoito nai tu, mase aneruna na evaĝi-mase maserifo.

¹¹ Maiĝeri veĝa ĝeĝorato anina tu, ĝita na bisini ĝitari, benamo matara beĝene kani uranai, ĝita maitoma tatanuni tarimara ĝerai. Korana ini horai mai tanobara tu magonai varau beraĝasi.

¹² Moĝesi naima, bema ĝomi ĝotuĝamaĝini, ĝemi veĝabidadamai ĝoruĝa-gigitarini ĝotoni nai tu, lorimi boĝono vetore, boĝo ketoni ĝesi.

13 Mani veribağani ġoğoi tağorini tu, dia veribağani boruri. Asiğì. Mani tu tarima tata ġeri ai vanağivanagi eğorani dagarari. Barau tu vetuğamağikau Barauna, be beğitamuni, asi bovağa-darereani veribağanina tu ġemu ai asi bevağa-foforiani. A ġoi veribağani boraka-ğoi tağoni nai, Barau na tu ġemu raga-mağuri dabarana ta maki betore-rosiani, korana mo veribağani nuğani bono ruğa-gwağigi ġana.

Barau e iauka rakavari asi boğono korana-iaği sebonari

14 Moğa lorinai, tarikakagu, kwaivakuku toma-rakarigo viniri ġerina boğono veğita-moğovaği.

15 Au na tu iaunega tarimami avağa-guruğamini, be tauğemi na au kara akirağirini mağeri boğono tuğamaği-ginikauri.

16 Anibou tağaniani neganai, vevağa-namo kapusina tağabiani, ma Barau tavağa-namoani, benamo taniuani. Mo tu Keriso rarana mabarara na taniu-seboniani, Keriso rarana ġesi ġia ema ġita tasebonani, ene? Ema beredi tatavi-kiraiani nai maki, mabarara Keriso tauğanina tağani-vegogoani, Keriso tauğanina ġesi ġia ema ġita tasebonani, ene?

17 Ġita tu vovoka, senaği mabarara beredi sebonai ema tauğani sebonai taiağoni. Tauna korikori, ġita tu mo beredi sebona moğoi tağani-vegogoani.

18 Isaraela tarimari situğamaği-iağori. Ginitağoi dagarari fata veağanai ġegaburito-ğoi, kwari ġeğanirito-ğoi tu, mo fata veağana ġesi sebonai ġeiağoto-ğoi.

19 Au na mai guruğa akirağirini tauri tu kara? Au akirani, kwaivakuku ġevarevare-vinirini dagarari tu ma aniri atoni ba? O kwaivakuku tu dagara korikorina atoni ba?

20 Asiğì. Au tu iniğesi akirani: Barau asi ribari beseri ginitağoi dagarari ġevinini tu, iauka rakavari ġevarevare-vinirini, a dia Barau ġevarevare-viniani. Moğesi nai au tu asi aurani, ġomi iauka rakavari ġesi sebonai boğono iago.

21 Ġomi asiğina ġinavaği Barau ġena kapusi e iauka rakavari ġeri kapusi boğoi ġabi-vegogorini, benamo Barau ġena kapusi ai boğoi niuni ema iauka rakavari ġeri kapusi ai maki boğoi niuni. Asiğina. Gomi asiğina ġinavaği Barau ġena teibolo boğoi ġaniğanini e vağa-sebo iauka rakavari ġeri teibolo maki boğoi ġaniğanini.

22 Ġita tu mağesi sivei, be Barau sivağa-uraia tatonì, ei? Be ġita ġera kokore tu Barau ġena kokore evanağiato ba?

Vanağivanagi Barau bisini vağa-rağea

23 Dagara mabarari tu asi taravaturi, senaği dia dagara mabarari ġerina namo bita doğarini. Dagara mabarari tu asi taravaturi, senaği dia dagara mabarari ġerina vevağa-kava bita doğarini.

24 Tarima ta tauğena ġereğana ġena namo moğoi asi bene vetaua, senaği tarima tari ġeri namo beğene ġabia uranai bene ġauvei e bene tanu.

25 Bureğa ġevoivoi-iağirini gabunai bureğa ġetorerini, moğeri tu boğono ġaniri, mo tu asi taravaturi. Asi boğono vedanaği-rakaorakao, nuğami boğoi tore-metorini garina.

26 Korana, Buka Veağai ekirani kavana, "Tanobara tu Barau ġena, ema tanobara nuğanai ġetanuni dagarari mabarari maki Barau ġena."

27 Bema Iesu asi evağa-moğoniani tarimana na ta beğori-iağomuni ġena numai ġaniğani, benamo ġoi bourani noiağoi botoni nai, kara ġoiramu ai etore-taririni tu bono ġaniri moğoi. Asi bono vedanaği, nuğami botore-metoani garina.

²⁸ Senaĝi bema tarima ta na bekiramuni, bekirani, “Mai tu kwaivakuku ĝevarevare-viniato bureĝana,” betoni, moĝa vauro asi bono ĝania. Korana mo bekira-varamu tarimana uranai e nuĝana bevekwaragini garina.

²⁹ Au na nuĝa mainai akiraĝirini tu, dia ĝoi nuĝamu akiraĝiani, senaĝi mo bekira-varamuni tarimana nuĝana akiraĝiani.

Betaĝu ta ekirani: Kara dainai au, maĝuri fakanai e namonai atanuni tarimagu, tarima ta na nuĝanai au bekota-viniguni.

³⁰ Bema au na Barau atanikiu-viniani vau aĝaniĝanini, kara dainai Barau batanikiuani ĝaniĝanina aĝaniani nai tu, guruĝa rakavari ĝegu ai ekiraĝini?

³¹ Moĝesi naima, ĝoĝaniĝanini o ĝoniuniuni o kara ĝoveiani nai, dagara mabarari ai Barau boĝono vaĝa-raĝea.

³² Tarima ta asi boĝono vaĝa-vedaĝa-raĝea. Iuda tarimana o irau bese tarimana o Barau ĝena ekalesia asi boĝono vaĝa-daĝa-raĝeri, beĝe ketoni garina.

³³ Au maki avededegwani, tarimarima mabarari nuĝari navaĝa-namori ĝana. A dia au tauĝegu ĝegu namo avetauani, senaĝi tarima vovoka ĝeri namo avetaurini, Barau na bene vaĝa-maĝuriri ĝana.

11

¹ Au ĝegu maĝuri boĝono tovtotova, korana au Keriso ĝena maĝuri atovotovoani bene.

Deba kumuĝauna veiĝana

² Au na ĝomi tu avaĝa-raĝemini, korana dagara mabarari ai au ĝotuĝamaĝiguni, ema vevaĝa-riba guruĝari aĝabirito, ĝemi avaĝa-riba-iaĝirito, moĝeri ĝokorana-iaĝirini.

³ Senaĝi au aurani toma ĝomi boĝono riba, tau mabarari ĝeri deba tu Keriso, ema vavine ĝeri deba tu tau; ema Keriso ĝena deba tu Barau.

⁴ A tau mabarari debari beĝe kumu-ĝaurini vauro, beĝe ĝauĝauni o beĝe perovetani nai tu, ĝeri deba tauna Keriso asi beĝe gubakauani.

⁵ Ema vavine mabarari debari asi kumu-ĝau beĝe ĝauĝauni o beĝe perovetani nai tu, ĝeri deba, (mo tu ĝia ĝaraĝori), asi beĝe mataurairini. Korana moĝa tu noĝa debari ĝerarorini kavana.

⁶ Bema vavine ta debana asi ekumu-ĝauani nai tu, debana ĝwina beĝene fakosi-vagi, (mata-boraĝa vavineri kavana). Ma bema vavine ta ĝwina fakosi-vagina o raro-vagina bemaikaiani nai tu, debana bene kumu-ĝaua.

⁷ A tau tu debana asi bene kumu-ĝaua, korana ĝia tu Barau ĝitaĝitana kavana, ema ĝia na tu Barau marevana baregona evaĝa-foforiani. A vavine tu tau marevana.

⁸ Korana dia tau o Adamu tu vavine ĝenana eiaĝomato, senaĝi vavine o Eva tu tau ĝenana eiaĝomato.

⁹ Ema Barau na tau eveiato tu dia vavine ĝena, senaĝi vavine ĝia tu tau ĝena eveiato.

¹⁰ Moĝesi naima vavine na debari beĝene kumu-ĝauri, korana mo vetoĝa na ĝia bevaĝa-foforiani, ĝia tu ma ĝeri maoro Barau ĝena ĝauvei beĝe veiani, ema aneru na beĝene ĝita-vetoĝari ĝana.

¹¹ Senaĝi Vereĝauka ĝena maĝuri dabaranai tau tu dia ĝereĝari moĝo ĝetanuni, ma vavine maki dia ĝereĝari moĝo ĝetanuni. Asiĝina. Vavine tu tau ĝesi beĝe sebonani, ma tau tu vavine ĝesi beĝe sebonani.

¹² Korana tu vavine tau ĝenana eiaĝomato kavana, tau maki vavine ĝerina ĝeĝorani. Senaĝi dagara mabarari tu Barau ĝenana ĝeiaĝomani.

13 Ĝomi tauĝemi na ĝotuĝamaĝi-ginikaua. Vavine ta debana asi ku-muĝauna neganai, Barau ĝenai beĝuriĝurini tu namo ba?

14 Mai tanobara mabarana nuĝanai tau e vavine vetoĝara marevari na evaĝa-foforiani, tau ta ĝwina bevaĝa-gara maukaiani tu maiaka veiĝana beveiani tauĝena ĝenai.

15 Senaĝi bema vavine ĝwina bevaĝa-gara maukaiani nai, mo tu ĝia marevana bevaĝa-baregoani. Korana Barau na vavine ĝwina eviniato tu debana bene kumu-ĝaua ĝana.

16 Bema tarima ta beurani, mai guruĝa neĝarea betoni nai, au tu asi ĝegu guruĝa ta maia. Senaĝi ĝegu guruĝa sebona tu maiĝa: Ĝai ĝemai ema Barau ĝena ekalesia mabarabarari nuĝari ai veiĝa boruna ta tu asiĝina maia.

Vereĝauka ĝena anibou

17 Mai tu veiĝa tari ĝomi na boĝono korana-iaĝiri veiĝari ma nakira-varami. Senaĝi au na ĝomi tu asi avaĝa-raĝemini, ĝomi ĝemi raka-vegogo nuĝari ai tu vevaĝa-rakava tu barego ĝoveiani, a namo ta tu asi ĝovaĝa-ĝoraiani.

18 Tovotovonai tu iniĝesi nakirami. Au aseĝaĝini, ĝomi ĝemi ekalesia raka-vegogori nuĝari ai tu dia nuĝa sebonai ĝoĝabini, a ĝomi tu ĝovevare-kirakirani, benamo tauĝemi ĝoveĝare-veĝareni. Au na mai guruĝa maiĝa tu kota avaĝa-moĝoniani.

19 Aba, ĝomi vefakami ai vevare-kirakira tu kote vetore veĝata, be Barau na deidei evaĝa-moĝonimito tarimami tu boĝono fofori.

20 Ĝomi ĝoraka-vegogoni nai tu, dia Vereĝauka ĝena lavi ĝaniĝanina dokona o anibou ĝoĝani-vegogoani. Asiĝina.

21 Ĝomi ĝoĝaniĝanini nai, dei eguineni, dei egabini ĝotoni, ĝoveraĝa-veraĝaiani, a karomi asi ĝovaĝa-nogarini. Ta tu vito etanuni, ma ta tu eniubaboboni.

22 Ĝomi tu asi ĝemi numa, be ĝemi numai asi boĝo ĝanini e boĝo niuni ĝotoni, ei? Ma Barau ĝena rubu tu dagara misina ĝotoni, ĝoĝita-ĝuiragiiani, ema asi ĝeri-ĝari tarimari ĝovaĝa-maiaĝarini, ei? Au ĝomi ĝemi ai tu kara nakiraĝia, navaĝa-raĝemi ba? Asiĝina ĝinavaĝi, au na ĝomi tu asi bavaĝa-raĝemini.

23 Ĝomi mai avinimini guruĝana maiĝa tu Vereĝauka ĝenana aĝabiato guruĝana: Iesu Vereĝauka ĝerevaiato boĝinai beredi eĝabi-vaisiato,

24 benamo Barau evaĝa-namoato murinai, etavi-kiraiato, benamo ekirato, “Ĝoĝabia, ĝoĝania, mai tu au tauĝanigu, ĝomi urami ai ginitaĝo dagananai eiaĝoto. Mai veiĝa boĝono veia-ĝoi, au tuĝamaĝi-iaĝigu ĝana.”

25 Mo lavi ĝaniĝanina o anibou murinai, Iesu na beredi eveiato ilailanai kapusi ma eĝabi-vaisiato, benamo ekirato, “Mai kapusi tu Barau ĝena Ginitaĝo Variĝuna, au raragu na bevaĝa-moĝoniani. Mai kapusi ai boĝo niuani nai, au tuĝamaĝi-iaĝigu ĝana boĝono niu.”

26 Korana mai beredi boĝo ĝaniani e mai kapusi ai vine nanuna boĝo niuani nai tu, vanaĝivanaĝi Vereĝauka ĝena mase boĝo vari-fiuani mo, ĝia ma beĝenogoini.

27 Moĝesina naima deikara na Vereĝauka asi begubakauani vau, mai beredi beĝaniani e Vereĝauka ĝena kapusi ai beniuni nai, mo tarima na Vereĝauka tauĝanina ema Vereĝauka rarana ĝenai vei-rakava beveini.

28 Tarima ta ĝia nuĝana bene ragaĝi-guinea vauro, mo beredi bene ĝania, ema mo kapusi vine nanuna bene niua.

²⁹ Korana deikara na Vereḡauka asi begubakauani vau beḡanini ema beniuni nai, mo beredi beḡaniani e mo kapusi ai vine nanuna beniuni nuḡanai tu, ḡia tauḡena mogo bevekota-vinini e rakava metona ḡenai betorekauani. Korana ḡia na Iesu tauḡanina tu asi etuḡamaḡi-doḡariani.

³⁰ Moḡesi naima ḡomi fakami ai ḡutuma tu tauḡanimi ḡemoirani e ḡokeveni, kotari maki varau ḡemaseto.

³¹ A bema ḡita tauḡera nuḡara bita vetau-guinerini nai tu, Barau na ḡita asi bekota-vinirani.

³² Senaḡi Vereḡauka na ḡita ḡera kerere bekiraḡirini nai tu, ḡia na bevaḡa-matakanirani. Vereḡauka ḡita moḡesina beveirani tarimara tu, tanobara maḡurinaḡi ḡetanuni tarimari ḡesi asi bene vaḡa-rakava sebonara ḡana.

³³ Moḡesi naima, tarikakagu, anibou uranai boḡo raka-vegogoni nai, asi boḡono veḡari-veḡari, karomi tari maki boḡono vaḡa-nogari.

³⁴ Bema ta bevitoani nai tu, ḡena numai bene ḡaniḡani. Asi namo ḡemi raka-vegogo na tu ḡomi kota-vinimi dabarana maki bevaḡa-ḡoraiani. Guruḡa kotari tu roḡo bana iaḡosi vauro, ma bana kira-varami.

12

Iauka Veaḡa ḡena varevare

¹ Tarikakagu mabarami, toma tu aurani, Iauka Veaḡa na ḡomi tata evinimini varevareri nakira-varami. Korana au aurani maḡeri varevare ḡomi na bogono ribari.

² Ḗomi ma ribami, Barau roḡosi roḡo boḡoro ribaia neganai, dagara kotari na asi ḡeguruḡani babarauri ḡeri ai ḡeḡori-iaḡomito-ḡoi e ḡeḡori-taḡuitaḡuimito-ḡoi.

³ Moḡesi naima avaḡa-ribamini, Barau Iaukana na eḡori-kauani tarimana tu asi bekirani, “Iesu iatanai rakava barana bene tanu.” Ema tarima ta maki maḡesi asi bekira-kavani, “Iesu tu Vereḡauka,” senaḡi Iauka Veaḡa na beboroḡiani tarimana tu moḡa.

⁴ Iauka ḡena varevare tu irauirauri, senaḡi Iauka sebona moḡo ḡenana ḡeiaḡomani.

⁵ Vetuḡunaḡi-iaḡovini dabarari tu irauirau, senaḡi Vereḡauka tu sebona moḡo ḡenana ḡeiaḡomani.

⁶ Ḗauvei veiveiri seḡukari maki irauirau, senaḡi Barau tu sebona na moḡo ḡena tarimarima mabarari nuḡari ai evaḡa-ḡorarani.

⁷ Iauka Veaḡa tu tarima tata ḡeri ai efoforini, korana ekalesia mabarana vevaḡa-kava beḡene doḡari uranai.

⁸ Tarima ta tu Iauka Veaḡa na guruḡa iaunegari eviniani, ma tarima ta tu mo Iauka Veaḡa sebona na Barau ḡena guruḡa tauna korikori evaḡa-ribaiani.

⁹ Ma mo Iauka Veaḡa sebona na tarima ta tu veḡabidadama eviniani, ma mo Iauka sebona na tarima ta tu keve tarimari vaḡa-namori varevarena o seḡukana eviniani.

¹⁰ Ma tarima ta tu nuḡa-farevaḡi veḡari boruri bene veiri varevarena o seḡukana eviniani, ma tarima ta tu bene peroveta ḡana seḡuka eviniani, ma tarima ta tu Barau Iaukana o iauka rakavari boruri bene ribari varevarena o ribana eviniani, ma tarima ta tu garo irauirauri ai bene guruḡa varevarena o ribana eviniani, ma tarima ta tu garo irauirauri ai beḡe guruḡani nai, guruḡa aniri bene vaḡa-vanaḡiri varevarena o ribana eviniani.

11 Maiġeri mabarari tu Iauka Veaġa sebona kwarigutu moġo ġena ġauvei. Ema mai Iauka Veaġa na ġena ura ilailanai varevare tarima tata evinirini.

Tauġani tu sebona, ma legana ġutuma gorogoro

12 Tarima tauġanina tu sebona moġo, senaġi legana tu ġutuma gorogoro; ma mo tauġani legana tu asisebo, senaġi ġia mabarari na tu tauġani sebona kwarigutu ai moġo ġeiaġoto. Keriso maki moġesina.

13 Ġita kotari tu Iuda tarimara e tari tu irau bese tarimara, kotari tu tuġurakaorakao tarimara e tari tu fakai tatanuni tarimara, senaġi ġita mabarara tu Iauka Veaġa sebona na ebabatorato, benamo tauġani sebonai taiaġoto. Ema Barau na ġita mabarara ġerai Iauka Veaġa sebona evinirato, ġia na bene vaġa-vonura ġana.

14 Tauġani maki dia legana sebona na moġo eveiato, senaġi lega ġutuma gorogoro na.

15 Bema kwaku bere kira, “Au tu dia ġima, be au tu dia tauġani legana ta.” Asiġina, ġia tu roġo tauġani legana ta veġata.

16 Ma seġa ma bere kira, “Au tu dia mata, be au tu dia tauġani legana ta.” Asiġina, ġia tu tauġani legana ta veġata.

17 Bema tauġani mabarana tu bere mata moġo nai tu, kamasi vau bere seġaġi. Ma bema tauġani mabarana bere seġa moġo nai, dagara bonari tu kamasi vau bere noġori.

18 Senaġi Barau na lega tata tauġani ai etorerito. Barau na ġena ura gaburi tatai etorerito.

19 Bema tavi sebona moġo tauġani ai bere iaġo nai tu, tauġani mabarana tu kamasi?

20 Senaġi tauġani moġesina tu asiġina. Tauġani legana tu ġutuma, senaġi tauġani tu sebona moġo.

21 Moġesi naima mata na ġima maiġesi asi bekiraiani, “Au na ġoi asi aura-vinimuni,” o deba na kwaku asi bekiraiani, “Au na ġoi asi aura-vinimuni.”

22 Ma tavi ta reke ai bita ġitaiani tu, mo tauġani legari tari taġitarini asi kokoreri tatoni, senaġi bema moġeri lega asiġina nai tu, tauġani asi bere ġauvei-ginikau.

23 Ema tauġani legari tari tatuġamaġi-keirini, takirani, moġeri lega gubakauri tu kei tatoni, senaġi moġeri ġeri ai ġita ġera vegubakau tu barego tatoreani. Ma tauġani legari kotari ġitaġitari tu asi marevari, senaġi moġeri ġita na tu nuġara mabarari ġesi tanari-ginikaurini.

24 Ma tauġani legari kotari ma marevari dagarari tu asi tatuġamaġi-baregorini. Senaġi Barau na tu tauġani legari irauirauri mabarari etore-sebonarito, benamo ġia na asi ġegubakaurini legari tu vegubakau barego iatari ai etore-kauato.

25 Barau na moġesi eveiato korana tauġani legari kotari moġo asi bisini vaġa-namori ġana. Senaġi tauġani legari mabarari bisini ġitaġau-ilailari ġana.

26 Bema lega sebona ta bemidigu-midiguni nai, lega mabarari ġia ġesi beġe midigumidigu sebonani. Ema lega ta beġe matauraiani nai tu, lega mabarari mo lega ġesi beġe iaku-vegogoni.

27 Gomi tata maniġemi tu Keriso tauġanina legari tata ġia tauġanina nuġana. Ma ġomi mabarami tu Keriso tauġanina sebonai ġoiaġoto.

28 Benamo ekalesia nuġana Barau na mabarari ġeri ġauvei tata evinirito. Eto-re-guinerito tarimari tu apostolo tarimari, ġia muriri ai vaġa-ruaruana tu peroveta tarimari etorerito, ma ġia muriri ai vaġa-toitoina tu vevaġariba tarimari etorerito. Ma muriri ai tu nuġa-farevaġi veġari beġene vei

tarimari, ma muriri ai tu keve tarimari beġene vaġa-namori varevarena o seġukana ġeġabiato tarimari, e beġene vevaġa-kava tarimari, e ġauvei tari beġene ġori-kauri tarimari, ema garo irauirau ai beġene guruġa tarimari.

²⁹ Tarimarima mabarari tu apostolo tarimari moġo ba? Tarimarima mabarari tu peroveta tarimari moġo ba? Tarimarima mabarari tu vevaġa-riba tarimari moġo ba? Tarimarima mabarari tu nuġa-farevaġi veġari ġeveirini tarimari moġo ba?

³⁰ Tarimarima mabarari keve tarimari ġevaġa-namorini varevarena o seġukana ġeġabiato tarimari ba? Tarimarima mabarari garo irauirau ai ġeguruġani ba? Tarimarima mabarari garo irauirau ai ġeguruġani guruġari tauri ġekiraġi-foforirini tarimari ba?

³¹ Vavevare baregona korikori boġono ura-dikadika-iaġia.

Veuravini

Maitoma dabara namo vedaureana au na ġomi ġemi avaġa-foforiani.

13

¹ Bema au tarimarima ġeri garo irauirauri ai bara guruġa ema aneru garori ai maki bara guruġa, senaġi au asi ġegu veuravini, au ġegu guruġa tu auri ġekwariani o funu ruarua ġevaġa-vesekerini gururi ġeraġeni kavana.

² Bema peroveta varevarena o seġukana ġegu ai bere tanu, ema riba mabarari e vekuretoġa dagarari mabarari bara ribari. Ema ġegu veġabidadama barego bere tanu, be ġoro baregori maki bara vaġa-veraġa-raġeri, ma gabu boruri ai ma beġerea ruġa. Senaġi au asi ġegu veuravini nai, au tu asi ġegu namo ta.

³ Ema ġegu farefare mabarari asi ġeri-ġari tarimari bara viniri, e tauġanigu tarimarima ġimari ai bara tore-kaua, benamo beġere gabua, senaġi au asi ġegu veuravini nai, au na dagara namona ta asi bara doġaria.

⁴ Ma ġena veuravini tarimana tu evevaġa-gwaġġini. Veuravini tu vevetuġaġwa e vevaġa-kava na evonuto. Veuravini nuġanai mama asi etanuni. Veuravini nuġanai veiavi e vekiraġi-varaġevaraġe asi etanuni.

⁵ Veuravini na tarimarima vaġa-rakavari veġari asi eveirini, tauġena ġena namo moġo asi evetauani, asi ebaru-ġarigarini, ta ġena rakava asi etuġamaġi-taġorini.

⁶ Vei-rakava asi eiaku-iaġirini, senaġi Barau ġena guruġa ema maġuri moġoniri moġo eiaku-iaġirini.

⁷ Veuravini tu ma manauna ġesi dagara mabarari nuġari ai eruġa-tarini, dagara mabarari nuġari ai Barau tu bevaġa-moġoniani, ema ġena vetuġamaġikau maki Barau ġenai roġo betoreani, meto mabarari ai bekokoren.

⁸ Veuravini tu asi veġata ekorini, beruġa-taġo vanaġi-vanaġini. Peroveta guruġari mabarari neġi beġea korini, garo irauirau mabarari maki beġea magoni, riba mabarari beġea korini.

⁹ Korana ġita ġera riba tu koturi moġo e ġera peroveta maki koturi koturi moġo.

¹⁰ Senaġi mo dagara namo vedaureana beiaġomani nai, mo kotuna moġo namo taribarito dagarari tu beġe rekwa-rekwani.

¹¹ Au roġo mero misigu ai tu, mero misiri ġeri guruġa na aiaġoto-ġoi, mero misiri ġeri tuġamaġi na aiaġoto-ġoi, ema mero misiri ġeri tuġamaġi na atuġamaġito-ġoi. Senaġi au ama tau-doġadoġato nai tu, mero misimisiri ġeri tuġamaġi mabarari atore-veġitarito.

¹² Toma Barau ġena dagara tu veġia ai noġa taġita-vaguna vagunarini. A Barau ġoirana ema ġita ġoirara bita veġita-veġita karakarani, monai vauro Barau ġena dagara vetogari korikoriri bita ġita-ġinikaurini. Toma au na tu koturi moġo aribarini. Senaġi mo ġaro ai vau bariba-ġinikaurini, au Barau na eriba-ġinikauguto kavana.

¹³ Mai dagara toitoi tu beġe tanu-vanaġi vanaġini: Veġabidadama, ve-tuġamaġikau, ema veuravini. Senaġi mai dagara toitoi vekaravari ai tu veuravini moġo barego lelevaġi.

14

Iauka Veaġa ġena varevare dagarari tari ġauvei-iaġiri

¹ Veuravini maġurina boġono vetau-guinea! Ema Iauka Veaġa ġena varevare boġono uravini barego-iaġiri; a Iauka Veaġa ġena peroveta varevarena o seġukana tu boġono uravini barego-lelevaġia.

² Korana garo boruri ai eguruġani tarimana tu dia tarimarima evaġa-guruġaiani, senaġi ġia tu Barau moġo evaġa-guruġaiani. Moġoni, tarimarima na ġia kara bekiraġiani tu asi beġe tuġamaġi-doġariani, korana ġia tu Barau Iaukana na vekuretoġa dagarari ekiraġirini.

³ A eperovetani tarimana tu tarimarima evaġa-guruġarini. Ma ġia ġena peroveta guruġari na tu tarimarima evaġa-kokorerini, elaunaġirini, ema tarimarima nugari evaġa-gwaġiġirini.

⁴ Garo boruri ai eguruġani tarimana tu tauġena ġena veġabidadama moġo evaġa-tubuani, a eperovetani tarimana na tu ekalesia mabarari ġeri veġabidadama evaġa-kokorerini.

⁵ Au ġegu ura tu ġomi mabarami garo boruri ai boġono guruġa. Senaġi au aura-baregoni ġomi tu Barau ġenana ġeiaġomani guruġari boġono peroveta-iaġiri. Korana Barau ġenana ġeiaġomani guruġari eperoveta-iaġirini tarimana na garo irauri ai eguruġani tarimana evanagiani; senaġi garo irauri ai beguruġani tarimana beguruġani guruġari ma beġe vaġa-vanaġirini e beġe kiraġi-fakarini tu lorinai. Korana beġe vaġa-vanaġirini e beġe kiraġi-foforirini nai tu, ekalesia ġeri veġabidadamai kokore beġe ġabini.

⁶ Tarikakagu mabarami, bema au baiaġosini ġomi ġemi ai ġaronai tu, garo boruri ai basi vaġa-guruġamini, senaġi guruġa tauri tu asi bakiraġi-foforirini; monana au ġeguna namo ta boġo ġabiani ba? Asigina! Moġoni, Barau na au evaġa-riboġuni guruġari ġomi ġemi ai bakiraġi-foforirini o riba bavinimini, o baperovetani, o Barau ġena guruġa ġemi ai bavevaġa-riba iaġiani, monai vauro au ġeguna namo boġo ġoitaġoni.

⁷ Miusiki vaġa-ġereri dagarari boġono tuġamaġiri, ilailana ivirikou o hap (ġita kavana). Bema gururi asi beġe raġe-ġinikauni nai tu, kamasi tarima na kamara mari ġeġere-iaġiani bita seġaġi-leaiani? Ġia tu mo ivirikou o hap gururi beġe raġe-ġinikauni vauro, kamara mari ġeġere-iaġiani bita ribaiani.

⁸ Ema bema vetari kibina asi beġe fururu-ġinikauni nai tu, ta na tuari uranai asi berovina-toreni.

⁹ Ġomi maki moġesina kavana, bema garo boruri ai boġo guruġani nai, tarimarima tu kamara dabarai ġomi na kara ġokiraġiani beġe tuġamaġi-doġariani? Gomi ġemi guruġa mo tu tano korinai boġo kiraġirini noġa iavara boġo vaġa-guruġaiani.

¹⁰ Mai tanobarai garo irauri tu asisebo, ma ġia mabarari ma tauri moġo.

11 Senaĝi bema garo ta anina asi ribagu, moĝa tauna tu, au tu dia mo garo borunai eguruĝani tarimana ĝena vanuĝa tarimagu, ema ĝia maki moĝesina, ĝia tu dia au ĝegu vanuĝa tarimana.

12 Gomi ĝemi ai maki moĝesina. Gomi tu Iauka Veaĝa ĝena varevare ĝouravini-barego iaĝirini; ma toma tu ekalesia ĝeri veĝabidadama vaĝa-kokorena varevarena ĝabiĝabina uranai boĝono kokore, be mo varevare ai tu boĝono tubu.

13 Moĝesi naima, garo boruri ai eguruĝani tarimana tu, ĝauĝau ai Barau bene noĝia, be kara bekiraĝirini guruĝari maki bene vaĝa-vanaĝiri e bene kiraĝi-foforiri.

14 Korana bema au garo boruri ai aguruĝani tu, au iaukagu moĝo eĝuriguĝirini, a au ĝegu tuĝamaĝi ai tu asi atuĝamaĝi-dogaĝirini au tu kara akiraĝirini.

15 Be kara toma aveiani? Au tu iaukagu ĝenana bana ĝauĝau, ema batuĝamaĝi-fakaiani garonai maki bana ĝuriguĝiri. Au iaukagu ĝenana bana mari, ema batuĝamaĝi-fakaiani garonai maki bana mari.

16 Bema ĝoi iaukamu na Barau mari ai ovaĝa-raĝeani nai tu, kamara dabarai mo garo asi ribana tarimana “Amen” betoni, ĝoi Barau ovaĝa-namoani nuĝanai, ei? Ĝia tu “Amen” asi bekiraĝiani, korana ĝia asi beribani ĝoi kara okiraĝiani.

17 Moĝoni, ĝoi na Barau tu otanikiu-ginikauani, senaĝi mo sevimu tarimari ĝeri veĝabidadama tu asi ovaĝa-kokorerini.

18 Au na Barau atanikiuani, korana au garo boruri ai tu aguruĝa-iakuni, ĝomi mabarami avanaĝimini.

19 Senaĝi ekalesia ĝuriguĝiri ĝeraka-vegogoni nai, namona tu beĝe tuĝamaĝi-fakaiani garonai guruĝa imaima moĝo bana kiraĝiri, tarimarima tari bana vaĝa-ribari. Moĝesina tu namo, a garo boruri ai guruĝa 10,000 bakiraĝirini tu asi ĝena namo ta.

20 Tarikakagu mabarami, mero misimisiri ĝeri tuĝamaĝi kavana asi boĝono tuĝamaĝi. A vei-rakava ĝeri reke ai tu mero raraka-rarakari ilailari ai boĝono iaĝo. Senaĝi tuĝamaĝi-fakai tu tau-doĝadoĝa kavana boĝono vei.

21 Buka Veaĝa nuĝanai tu maiĝesi etoreato,

“Vereĝauka ekirani,

‘Tarima garori boruri na

ema gabu boru tarimari mururi na

au na maiĝeri tarima bavaĝa-guruĝarini.

Senaĝi moĝesi maki asi veĝata beĝe seĝaĝi-viniguni.’”

22 Moĝesi naima garo boruri ai ĝeguruĝani tu, Iesu asi ĝevaĝa-moĝoniani tarimari moĝo ĝeri ai tu vetoĝa ta, a dia Iesu ĝevaĝa-moĝoniani tarimari ĝeri vetoĝa. Senaĝi Barau ĝena guruĝa ĝeperoveta-iaĝirini tu, Iesu ĝevaĝa-moĝoniani tarimari moĝo ĝeri, a dia Iesu asi ĝevaĝa-moĝoniani tarimari ĝeri. (Mai tu, garo boruri ai ĝeguruĝani tu, Iesu asi ĝevaĝa-moĝoniani tarimari na vevaĝa-kava ta asi beĝe ĝoitaĝoani. Senaĝi Barau ĝena guruĝa ĝeperoveta-iaĝirini tu, Iesu asi ĝevaĝa-moĝoniani tarimari na vevaĝa-kava beĝe ĝoitaĝoani).

23 Bema ekalesia mabarami gabu sebonai ĝoraka-vegogoni, benamo mabarabarami garo boruri boĝo guruĝani, ma nuĝanai tu gomi fakami ai asi ribana tarimana ta o Iesu asi evaĝa-moĝoniani tarimana ta bema raka-toĝani nai, bekirani, “Gomi tu debami beĝe rakava, boĝo babo!” betoni.

24 Senaġi bema mabarami boġo perovetani nuġanai, ġomi fakami ai Keriso asi evaġa-moġoniani tarimana ta o asi etuġamaġi-fakani tarimana ta bema raka-toġani nai tu, ġomi mabarami na Barau ġena guruġa ġoperoveta-iaġġiani guruġari na mai tarima loruna begwanuani, benamo beribani, ġia tu vei-rakava tarimana, ema mabarami na boġo ġita-virigiani.

25 Mo tarima ġena tuġamaġi vekuretoġari mabarari boġo kiraġi-foforirini, benamo bevetui-tarini, Barau betoma-rakariġo viniani, bekirani, “Moġoni, Barau tu ġomi ġesi etanuni.”

Toma-rakariġo veiġari roroġotori

26 Moġesina naima, tarikakagu, ġuriġuri boġo raka-vegogoni nai, ġomi mabarami tata ma ġemi ġauvei. Tari tu mari beġe ġabini, tari tu beġe vevaġa-ribani, tari tu garo boruri ai beġe guruġani, tari tu Barau ġena guruġa beġe vaġa-foforirini tarimari, tari garo boruri ai beġe guruġani guruġari beġe vaġa-vanaġirini e beġe kiraġi-foforirini. Dagara mabarari tu ekalesia ġeri veġabidadama vaġa-tubuna ġana moġo boġono veiri.

27 Bema tarima ta garo boruri ai eguruġani nai, tarima ruarua o toitoi ma beġene guruġa. Namona tu tarima toitoi na beġene guruġa-karua, senaġi tauri toitoi vaġa-sebo asi beġene guruġa. Ta bene guruġa-ġosi murinai vauro ta ma bene guruġa, ma ta maia. Benamo garo boruri ai beġe guruġa-ġosini murinai tu, ekalesia ta na moġesi guruġa bene vaġa-vanaġiri, bene kiraġi-foforiri.

28 Senaġi bema vaġa-vanaġi tarimana ta asiġina nai tu, mo garo boruri ai eguruġani tarimana tu rubu nuġanai asi bene guruġa. Ġereġana tauġena vau bene guruġa-vevini, ema Barau bene vaġa-guruġaia.

29 Barau ġena guruġa ġeperoveta-iaġġirini tarimari ruarua o toitoi beġene peroveta, ma kotari na tu moġeri guruġa beġene vetau-ginikauri.

30 Bema Barau ġena guruġai etanu-tarini tarimana ġenai efoforini, bene kiraġi-foforia ġana nai, eguruġa-guineni tarimana ġena guruġa tu bene vaġa-magoa.

31 Namona tu ġomi sebomi sebomi boġono peroveta, be kara ġokiraġġiani mabarari beġene riba ema mabarari beġene launaġiri.

32 Barau ġenana peroveta guruġari edoġaririni tarimana tu, moġeri guruġa ġena urai vau bekiraġirini.

33 Barau tu dia vei-veġonu veġonu evaġa-ġoraiani Barauna, senaġi ġia na tu maino evaġa-ġoraiani Barauna.

Ekalesia doġorori mabarari ġeveini kavana,

34 ġomi ġemi vavine maki ekalesia vegogori ai asi beġene guruġa, korana ġia tu asi ġeri maoro ġia beġe guruġani. Senaġi ġia tu Mose ġena taravatu na ekiraġġiani ilailanai beġene tanu tau gabureri ai.

35 Bema dagara tari ġeribari beġe toni nai tu, ġaraġori numai vauro beġenea danaġiri. Korana vavine ekalesia vegogori ai beġe guruġani tu ma maikana.

36 Ġomi na mai guruġa asi ġoġabi-raġeani? Barau ġena guruġa tu ġomi ġemina erefoto ba? Ba Barau ġena guruġa na tu ġomi moġo ema ġoitaġomito, ei?

37 Bema tarima ta tauġena evetuġamaġini ġia tu peroveta ema ġia tu Iauka Veaġa na evonuvonu-raġeto etoni tarimana tu, ġomi mai atore-vinimini guruġari bene ġabi-raġeri, bene kira, mai tu moġoni Vereġauka ġena taravatu guruġari.

³⁸ Bema tarima ta maiġeri guruġa betuġamaġi-fitoġarini, Barau na ġia maki betuġamaġi-fitoġaiani.

³⁹ Moġesi naima, tarikakagu, peroveta uradikadikana tu boġono vei, ma garo boruri ai guruġa-iaġiri ai tu asi boġono vekiraġoi.

⁴⁰ Senaġi dagara mabarari boġono ġauvei-iaġi ginikauri, ema dabara korikoriri ai boġono veiri.

15

Iesu ġena variġisi-ġenoġoi

¹ Tarikakagu mabarami, au aurani, mo Vari Namona, ġomi ġemi aġobata-iaġiato moġa, ġemi tuġamaġi ai ma navaga-varigu ġenoġoia. Mai Vari Namona ġomi na tu ġogabi-raġeato, ema ġomi tu mai Vari Namonai ġoruġa-gwaġiġini.

² Bema au na mo aġobata-vinimito guruġana moġa roġo boġo ġabi-gwaġiġiani nai, ġomi tu mo Vari Namona ġenana Barau na bevaġa-maġurimini. A bema asiġina nai tu, ġomi na ġovaġa-moġoni-kavaiato.

³ Vereġauka ġenana au na kara adoġariato guruġana tu, ġomi ma akira-varamito. Mo guruġa moġa tu guruġa giniguinena e guruġa baregona. Mo guruġa tu Buka Veaġai ġetoreato guruġana ilailanai, ekirani: Keriso ġita ġera rakava bene ġabi-vaġiri uranai emaseto;

⁴ ma ġeguriato, ma ġaro vaġa-toitoinai mase na ma evariġisi-ġenoġoito, Buka Veaġai ġetoreato ilailanai.

⁵ Benamo Petero ġenai evevaġa-foforito, ma murinai tu ġena mero gabanana ruarua (12) ġeri ai maki.

⁶ Moġa murinai tu veġabi-dadama nuġanai tarikaka mabarari sinau imaima (500) ġevegogoto nuġanai ġeri ai efoforito; tari varau ġemaseto, a ġutuma tu roġo maġuri.

⁷ Ma murinai tu Iakobo (o Iames) ġenai efoforito, ma murinai tu apostolo mabarari ġeri ai maki.

⁸ Ma magona korikorinai tu, au, noġa moġo amaġuri-rakavato tarimagu, ġegu ai ema foforito.

⁹ Korana au tu apostolo mabarari ġeri dokona korikori tarimagu, ma au tu asi ġegu namo ta moġo, tarimarima na au apostolo tarimagu ai beġe kiraġiġuni. Korana au na Barau ġena ekalesia avaġa-midigu midigurito-ġoi, e alai-lausilausirito-ġoi.

¹⁰ Senaġi Barau ġena namo e varevare-barai, au tu mai ġegu apostolo tarimagu ai ama iaġoto. Ema Barau ġena namo e varevare-bara au ġegu ai tu asi etore-kavaiato. Moġoni, au na ġauvei tu barego lelevaġi aveiato, a apostolo kotari tu asiġina. Senaġi mo tu dia au tauġegu ġegu kokore ai moġeri ġauvei aveirito. Asiġina. Mo tu Barau ġena namo e varevare-barai kokore eviniguto, benamo mo ġauvei aveirito.

¹¹ Moġesina naima au aġobatato o apostolo tari ġeġobatato, asi ġena irau ta, korana vari tu sebona moġo ġaġobata-iaġiato, ma ġomi na maki mo vari sebona, moġa moġo ġovaġa-moġoniato.

Ġita ġera variġisi-ġenoġoi

¹² Senaġi bema Keriso ġaġobata-iaġiani nai, ġakirani, Keriso tu Barau na mase na ma evaġa-variġisi ġenoġoiato ġatoni, kamasi nai ġomi fakami ai ġomi kotari tu ġokirani, mase tarimari tu asi ma beġe variġisi-ġenoġoini?

¹³ Bema mase na variġisi-ġenoġoi tu asiġi, moġa tauna tu, Keriso mase na tu asi ma evariġisi-ġenoġoito.

14 Ema bema Keriso mase na asi evariġisi-ġenoġoito, moġa anina, ġai ġema ġobata tu asi tauri, ema ġomi ġemi veġabidadama maki asi tauri.

15 Moġesi tu ġai beġere ribama, Barau na asi eveiato dagnarana ġai na tu ġakiragi-moġoni moġoni-kavaiani, ġaġofaġofani. Korana ġai na Barau varina ġafuani, ġakirani, Barau na Keriso mase na ma evaġa-varigiġi ġenoġoiato ġatoni nuġanai, Barau na Keriso mase na tu asi evaġa-varigiġi ġenoġoiato. Ma guruga moġonina tu, mase tarimari mase na tu asi ma ġevariġisi-ġenoġoini.

16 Aba, bema mase tarimari mase na asi ma ġevariġisi-ġenoġoini, moġa anina tu Barau na Keriso tu mase na asi ma evaġa-varigiġi ġenoġoiato.

17 Ema bema Barau na Keriso mase na tu asi ma evaġa-varigiġi ġenoġoiato, ġomi ġemi veġabidadama tu asi aniri e ġomi tu roġo rakava nuġanai ġotanuni.

18 Ema mo deikara Keriso ġevaġa-moġoniato tarimari ġemaseto tu, rakava voina beġe ġabiani.

19 Ma bema mai tamaġuri-taġoni maġurina ġena namo moġo uranai Keriso ġenai tavetuġamaġikauni nai tu, tarimarima mabarabarari vefakari ai ġita kika vetuġara tu barego lelevaġi.

20 Senaġi Keriso tu moġoni mase na evariġisi-ġenoġoito, ema ġia tu ġemaseto tarimari mabarari fakari ai ġia tu evariġisi-ġenoġoi guineto, ilailana ġau ġwaġwari ġeġora-guineni kavana.

21 Mase tu tarima sebona, Adamu, ġenana evesinato. Moġa ilallanai variġisi-ġenoġoi maki tarima sebona, Keriso, ġenana evesinani.

22 Vaġa-ilailana, tarimarima mabara-barari tu Adamu ġenana ġeiaġomani, moġa lorinai beġe maseni veġata; senaġi Iesu Keriso ġesi beġe sebonani neganai, Barau na ma bevaġa-maġuri ġenoġoirini.

23 Senaġi ġita mabarara tata ġera ġaro korikori loriri ai bita variġisi-ġenoġoini: Ġiniguine tu Keriso, ġia tu evariġisi-ġenoġoi guineto. Ma ġia ma beiaġomani ġaronai tu, ġia ġena tarimarima mabarari ma beġe variġisi-ġenoġoini.

24 Maġa murinai Keriso na Barau ġevetari-viniani iaukari ġeri veġitaġau e maoro ema seġuka mabarari asi ġeri kokore ai bevaġa-iaġorini e bevaġa-rakavarini, benamo Barau ġena Basileia o veġitaġau seġukana Tamana Barau ġimanai betore-kauani. Benamo tanobara dokona beiaġomani.

25 Korana Keriso tu roġo bevereni, ġena veġitaġau tu betanuni roġo, beiaġoni mo, ġia ġevetari-viniani iaukari e tarimari mabarari ġia kwakuna fanafana gaburenai befana-taririni.

26 Keriso na evetari-viniani dagnarana ta, magona korikori ai vauro bevaġa-keto-moġovaġiani, tu mase.

27 Korana Buka Veaġai tu inigesi ekirani, “Barau na dagara mabarari ġia kwakuna gaburenai etorerito, mai tu ġena veġitaġau gaburenai etorerito.” Senaġi ekirato, “dagara mabarari ġia kwakuna gaburenai etorerito,” etato nai, Barau tu asi eiavi-kauato, korana tu Barau na dagara mabarari Keriso kwakuna gaburenai etore-toġarito.

28 Dagara mabarari Keriso ġena veġitaġau gaburenai Barau na betorerini, moġa murinai tu Barau Natuna tauġena maia Barau ġena veġitaġau gaburenai bevetore-toġani. Moġo tauna tu, Barau na dagara mabarabarari bedebbarini.

29 Bema variġisi-ġenoġoi asiġina, mai tarima kotari ġemase-guineto tarimari urari ai babatiso ġeġabini tu kamasi beġe veini, ei? Ġia tu kara dainai ġemase-guineto tarimari urari ai babatiso ġeġabini? Betaġu ġia na variġisi-ġenoġoi ġevaġa-moġoniani nai, mo veġa ġeveiani.

30 Ema ġai maki, kara dainai tu hora mabarari ai dori moġo ġevaġi-masemani senaġi roġo ġaġiġirageni, bema varigisi-ġenoġoi asigina nai tu?

31 Tarikakagu mabarami, moġoni, ġaro vanaġivanagaġi au ġegu mase ġekiraġiani. Senaġi maġa maki moġoni, ġomi na Iesu ġoġabi-raġeato nai, ġera Vereġauka Keriso Iesu ġoiranai au tu averere-baregoni.

32 Bema au vaġa-ilailana mai tarimarima ġeri tuġamaġi babobabori noġa moġo Efeso ai boġa bairi rakavari kavana bara vaġa-vevaġiri, au tu kara dagara namona ġegu ai bere ġora? Bema varigisi-ġenoġoi asigina nai, au tu moġesi asi bara vei, asigina ġinavaġi. Bema Barau na mase na asi ma bevaġa-varigisi ġenoġoirani nai tu, maġesi tara kira, “Siġaniġani ema sininiu, korana boinani tu bita maseni bene.”

33 Tarima ta na asi bene ġofami! “Tarima rakavari bita kakorini nai tu, ġera maġuri namori beġe rakava-kwaikwaini.”

34 Ġotataġa, veġa iobukaiobukari ġoveiri, vei-rakava ġovaġa-dokoa. Korana ġomi kotari Barau tu asi ribami roġo. Mai tu ġomi beġene maiakami ġana aguruġani.

Varigisi-ġenoġoi tauġanina tu irauna

35 Senaġi kotari tu beġe vedanaġini, beġe kirani, “Mase tarimari tu kamasi ma beġe varigisi-ġenoġoini? Ma beġe varigisini nai, tauġaniri tu aiġesina?”

36 Babo! Ġoi na kara tano ai ovaroani tu, asi roġo etubuni mo, ovaroani dagarana bemaseni vau.

37 Widi o dagara ta novaroa otoni nai tu, dia tauġani oġabiani, benamo ovaroani. Asigina, ġoi na mo widi o kara novaroa otoni dagarana tu ġutuna ġuena oġabiani, ma ovaroani.

38 Ma Barau tauġena na ġena ura ilailanai mo widi o kara ġovaroani, moġeri tata tauġaniri korikori evinirini.

39 Tauġani mabarari viriġori tu irairau. Tarimarima viriġori irau, kwakuri vasivasi ġemaġurini dagarari vaġa-ilailana bai, boromakau, mamoe, e kotari viriġori irau, maġani-kone viriġori irau ema manu maki viriġori irau.

40 Guba dagarari tauġaniri tu ta, ma tanobara ġetanuni tarimari e dagarari maki irau. Guba tauġanina marevana ta ema mai tanobara tauġanina marevana maki ta.

41 Ġaro marevana ta ema ġue marevana ta, ema visiġu marevari maki irauri. Visiġu tata maki marevari irairau.

42 Mase na varigisi-ġenoġoi maki moġesi. Beġe guriani tauġanina tu beboragaġani, a Barau na ma bevaġa-varigisi ġenoġoiani tauġanina tu asi ma beboraga-ġenoġoini.

43 Beġe guriani tauġanina tu vetoġana asi namo, ema tarimarima na asi beġe urani ġitaġitana, a Barau na ma bevaġa-varigisi ġenoġoiani tauġanina tu ma marevana. Beġe guriani nai tu, moiramoiira asi kokorena, a Barau na mo tauġanina ma bevaġa-varigisi ġenoġoiani nai tu, ma seġukana.

44 Ġeġuriani nai tu, tanobara tauġanina, a Barau na evaġa-varigisi ġenoġoiani nai tu, iauka tauġanina. Tanobara tauġanina tu ta etanuni, moġa lorinai iauka tauġanina maki ta etanuni.

45 Buka Veaġa nuġanai ekirani, “Tarima guinena, Adamu, Barau na eveiati tu maġuri tarimanai evaġa-iaġoato.” A Adamu magona, Keriso, tu maġuri bevinini Iaukanai evaġa-iaġoato.

46 Tanobara tauġanina tu eġuineto, a dia iauka tauġanina. Tanobara tauġanina murina na vauro, iauka tauġanina eiaġomato.

⁴⁷ Tarima guinena, Adamu, tu tanobara ġenana eiaġomato, Barau na tano kauna na eveiato, a tarima vaġa-ruaruana tu Keriso, guba na emariġoto tarimana.

⁴⁸ Barau na tano kauna na eveirito tarimari tauġaniri tu Adamu tauġanina kavana, mo tu ma tano kauna na eveiato tarimana tauġanina kavana, ema guba tauġanina beġe ġabiani tarimari maki Keriso tauġanina kavana, mo tu guba na eiaġomato tarimana tauġanina kavana.

⁴⁹ Initoma ġita tu Barau na mo tano kauna na eveiato tarimana vetoġana kavana. A gabi vau mai guba na eiaġomato tarimana vetoġana ilailanai bita iāġoni.

⁵⁰ Tarikakagu mabarami, au na kara akiraġiani tauna tu maiġa, tari-marima, mai tanobarai ġetanuni kavana, ma tauġaniri, ma viriġori, ema ma rarari tu, Barau ġena Basileia nuġanai asi beġe raka-toġani. Ema ma beboraġani dagarana tu tanu-vanaġi vanaġi Basileiana nuġanai asi betanuni riba.

⁵¹ Goseġaġi, vekuretoġa guruġana ta akira-varamini: Ġita mabarara tu asi bita maseni, senaġi ġita mabarabarara tauġanira tu Barau na bekurevorini.

⁵² Mo tu asikauna moġo beġorani, noġa matara iaġataġo nunaġa ta vaġa-kafurina mo ma taraga-keorini kavana, asi kwaibona. Kibi dokona guruna beraġeni, benamo ġemaseto tarimari ma beġe variġisi-ġenoġoini, benamo tauġani asi ma beġe rakava-ġenoġoini. Ma ġita roġosi bitana mase tarimara maki tauġanira beġe vekurevoni, mo tu tauġani variguri bita ġabirini.

⁵³ Korana mai ma beboraġani tauġanina tu bene vekurevo, benamo asi ma beboraġani tauġanina bene vetore-fofori, ema mai ma bemaseni tauġanina tu bene vekurevo, benamo asi bemaseni tauġanina ma bene vetore-rosi.

⁵⁴ Aba, mai ma beboraġani tauġanina tu bene vekurevo, benamo asi ma beboraġani tauġanina bene vetore-rosi, ema mai ma bemaseni tauġanina tu bene vekurevo, ma asi ma bemaseni tauġanina ma bene vetore-rosi. Mai dabarai Buka Veāġi evetoreto guruġana bemoġonini, “Mase tu Barau ġena kokore na varau evaġa-darereato.

⁵⁵ Mase o, ġoi ġemu kokore tu aiġea?

Mase o, ġoi na tarimarima ogwanurini garaġotana tu ainai?”

⁵⁶ Mase egwanurini garaġotana tu vei-rakava ema vei-rakava ġena seġuka tu taravatu ġenana eiaġomani.

⁵⁷ Senaġi Barau tatanikiuani, korana ġia na ġita ġera Vereġauka Iesu Keriso ġenana kokore evinirani.

⁵⁸ Moġa lorinai, tarikakagu, au na aura-vinimini tarimami, ġemi veġabadadamai boġono ruġa-gigitari, tarima ta o dagara ta na asi bene vei-ġareva ġarevami, vanaġivanaġi Vereġauka ġena ġauvei boġono veia ma kokoremi ġesi. Korana boġono riba, ġomi ġemi ġauvei Vereġauka nuġanai tu asi ġovei-taġuiani, senaġi ma voimi.

16

Ierusalem a ekalesia tarimari vaġa-kavari ġana moni vaġa-vegogo

¹ Maitoma tu Ierusalem veāġa o ekalesia tarimari vaġa-kavari uranai moni boġono vaġa-vegogo guruġari akiraġini. Mai guruġa tu Galatia ekalesia mabarari akirarito, beġene veia atato guruġana, ġomi akira-varamini. Au aurani tu ġomi maki mai veiġa boġono veia.

² Fura ġarona giniguinenai o Sandei vanaġivanaġi ġomi tata tu ġemi doġari ilailari ai moni ta boġono tore-toġaia. Moġeri moni tu boġono tore-vegogo

vegogori, be au baiāgosini ġaronai tu, moni mabarana bene rovinatore, asi ma bisini vaġa-vegogo.

³ Ema au basi votuni nai tu, ġomi na boġo vaġa-moġonirini tarimari bavinirini, benamo Ieruselema ġana beġe ġabi-iaġorini. Beġe iaġoni nai tu, au na guruġa-fofori fefana ta maki batoreani, be beġe ġwa-kauani.

⁴ Bema baġitaiani au tauġegu baiāġoni tu namo nai tu, au ġesi baġa iaġoni.

Paulo ġena ura Korinto ġana bene iaġo

⁵ Au baiāgosini basi-ġitamini, Makedonia tanona na nuġana na baraka-vanaġini nai, korana au tu Makedonia tanona nuġana na baraka-vanaġini bene. (Makedonia ekalesiari bana raka-ġitari, senaġi monai asi batanuni, baraka-vanaġini moġo).

⁶ A au baiāgosini nai tu, atuġamaġini, ġomi ġesi kota roġo bita tanuni banagu. Betaġu faraka e iavara ġueri maki maninai bita ġabiani ġomi ġesi. Bere namo, ġegu iaġoiaġo ai baura-vinirini dagarari tu ġomi na boġono vaġa-kavaġu.

⁷ Au tu asi aurani taimi misina moġo ġomi ġesi bana tanu, benamo ma bana iaġuimi maia. Au ġegu tuġamaġi ai tu aurani, ġomi ġesi bitana tanu-mauka, senaġi mo tu bema Barau na maoro beviniguni vauro.

⁸ A au tu Efeso ai batanuni mo Pentekoste ġarona,

⁹ korana Barau ġena ġauvei bana veia dabarana tu varau bekeoa, be toma ġegu ġauvei tu barego lelevaġi. Senaġi tarimarima vovoka na maki ġekouguni, ġauvei asi bana veia ġetoni.

¹⁰ Bema Timoteo beiaġosini nai tu, boġono nari-ginikaua, be ġomi ġesi betanuni nai, asi bene tanu-garigari. Ġia maki au kavana Vereġauka ġena ġauvei eveiani.

¹¹ Moġa lorinai tarima ta na asi bene ġita-ġuirāġia. Senaġi boġono vaġa-kavaia e maino ai boġono tuġua, au ġegu ai ma bene ġenoġoi-iaġoma. Korana au tu tarikaka kotari ġesi ġia ġanariani.

¹² Ma tarikakara Apolos tu au na alaunaġiato, tarikakara tari ġesi be ġomi ġemi ai bene iaġosi atato. Senaġi ekirato, maitoma tu asi ilaila beiaġosini, a ġaro namona tai vauro beiaġosini.

Guruġa dokona

¹³ Tauġemi boġono venari-ginikau, ġemi veġabidadamai boġono ruġa-gwaġiġi, nuġami beġene gwaġiġi, boġono kokore.

¹⁴ Dagara mabarari boġo veirini nai tu, veuravini ai moġo boġono veiri.

¹⁵ Tarikakagu mabarami, ġomi Stefanas ġena numa tarimari mabarari tu ma ribami. Ġomi ma ribami, ġia na Iesu Keriso ġeġabi-raġeato nai tu, ta maki roġosi roġo bere ekalesia Akaia nuġanai. Ma ġia tu veaġa o ekalesia tarimari ġeri ġauvei ai ġevekiraġikauto, ġevaġa-kavarito. Moġa lorinai anoġimini,

¹⁶ ġomi maki moġesi tarimari garori boġono seġaġi-viniri, ema ġai ġesi ġeġauveini e ġevekwarāġini tarimari mabarari maki.

¹⁷ Aiakuni, korana Stefanas e Fotunato ema Akaiko au ġegu ai ġeiaġomato nai. Asi ilaila baiāgosini, ġomi ġesi bita tanuni nuġanai, mai tauri toitoi na ġomi gabumi ġeġabirito, moġesi nai au nuġagu egena-tarito.

¹⁸ Ema ġia na au nuġagu ġevaġa-iaku ġenoġoiato, ema ġomi maki nuġami ġevaġa-iaku ġenoġoirito. Moġesi naima ġia tu boġono ġabi-raġeri.

¹⁹ Asia ruburi na ġomi ġemi vevaġa-namo ġetuġuni. Akwila e Priskila na ema ekalesia ġia ġeri numai ġetanuni mabarari na nuġari mabarari ġesi ġevaġa-namomini Vereġauka aranai.

²⁰ Tarikaka mabarari na ġevaġa-namomini. Ġomi maki karomi tata vetarikaka verauna na boġono vaġa-namori.

²¹ Au Paulo ġimagu na mai vevaġa-namo guruġari atorerini.

²² Bema tarima ta na Vereġauka asi eura-viniani tu, ġia iatanai rakava baregona bene tanu mo vanaġivanaġi. Ġera Vereġauka o, noiaġoma.

²³ Ġera Vereġauka Iesu Keriso ġena namo e varevare-bara ġomi ġemi ai bene tanu.

²⁴ Au ġegu veuravini ġomi ġesi bene tanu. Keriso Iesu ġenana ġita tu doġoro sebona tarimara.

PAULO ĜENA TORETORE VAĜA-RUARUANA KORINTO EKALESIARI ĜERI

2 Korinto vaĝa-foforina guruĝari

Mai fefa vaĝa-ruaruana tu vevaĝa-gwaĝiĝi fefana Paulo na etoreato. Paulo na mai fefa tu Makedonia na Korinto ekalesiari etore-vinirito. Mai fefa tu laĝani 55 ema 57 fakari ai etoreato, mo tu Iesu maki emaseto murinai vau.

Mai fefa nuĝanai siri baregori tu karoa 1:3-4 ema 5:18.

Paulo na mai fefa etoreato korana tari tu maĝeri: 1) Gofaĝofa tarimari na ĝia ĝena apostolo ĝauveina ĝevaĝa-rakavaia ĝetato-ĝoi moĝeri guruĝari eveito. 2) Ierusalemaj Barau ĝena tarima veaĝari ĝetanuni moĝeri ĝeri moni tari beĝene tore-vegogo etato (9:1-5). 3) Mo ĝena fefa giniginena monai mo vei-rakava tarimana ma beĝene ĝabi-raĝea e beĝene ura-vinia etato (2:5-11). Paulo na mai fefa tu maĝesina eboioĝaiato:

1. Ma veĝabi-sebona ĝenoĝoi guruĝari - karoa 1-7
2. Ieruselema ekalesiari varevare viniri guruĝari - karoa 8-9
3. Korinto nuĝanai apostolo tarimari ĝofaĝofari na Paulo ĝena apostolo ĝauveina ĝekira-rakavaiato nai, Paulo tauĝena evekiraĝi-maĝatato guruĝari - karoa 10-13

¹ Au Paulo, Barau ĝena ura lorinai Keriso Iesu ĝena apostolo ai evaĝa-iaĝoguto, ema ĝita tarikakara veĝabidadama nuĝanai Timoteo ĝesi ĝemana mai fefa eiaĝosini.

Gomi Barau ĝena ekalesia Korinto nuĝanai, ema veaĝa tarimami mabarabarami, Akaia tanona mabarana nuĝanai ĝotanuni tarimami, ĝemi atore-vinimini.

² Barau ĝita Tamara ema Vereĝauka Iesu Keriso ĝerina varevare-bara ema maino ĝemi ai bene tanu.

Paulo na Barau etanikiuato

³ Barau sivaĝa-namoa, ĝia tu ĝita ĝera Vereĝauka Iesu Keriso Tamana. Ĝia tu vevetuĝaĝwa Tamana e vevaĝa-kava Barauna korikori.

⁴ Barau na ĝai ĝema midigumidigu e dabara doko nuĝari ai evaĝa-kavamani. Moĝesi naima ĝai na maki tarima kotari ĝeri meto ai baĝa vaĝa-kavarini riba, Barau na ĝai evaĝa-kavamani ilailanai.

⁵ Mogoni, Keriso na egabiato midiguna ĝai ĝemai tu barego-lelevaĝi; ma ĝai ĝema vevaĝa-kava Keriso ĝenana maki barego lelevaĝi.

⁶ Ĝai baĝa midigu-midiguni tu ĝomi vevaĝa-kava ema vevaĝa-maĝuri boĝono ĝabia ĝana. Ĝai Barau na evaĝa-kavamani tu ĝomi vevaĝa-kava boĝono ĝabi ĝana. Ma mai vevaĝa-kava boĝo ĝabiani mainana ĝomi nuĝami bevaĝa-gwaĝiĝirini, benamo ĝai ĝamidigu-midiguni kavana midigumidiguri boĝo ĝabirini nai tu, boĝo kokoreni.

⁷ Ĝai ĝema vetuĝamaĝikau ĝomi ĝemi ai tu barego ĝatoreani, korana tu ĝaribani, ĝomi tu ĝai ĝesi tamidigumidigu-sebonani, ema vevaĝa-kava maki ĝai ĝesi taĝabi-sebonaiani.

⁸ Tarikaka mabarami, ĝai Asia tanonai aiĝesi meto ĝaĝoitaĝoto maki ĝaurani baĝana vaĝa-ribami. Ĝai Asia ai tu meto barego lelevaĝi

g̃adoḡariato, g̃ema gwada e riba mabarari maki g̃ekorito, be g̃ema tuḡamaḡi tu benamo, asi baḡa maḡurini, baḡa maseni.

⁹ Moḡoni, ḡai g̃ema vemamiraḡi tu, ḡai beḡene vaḡi-masema dabarana tu varau ḡevaḡa-moḡoniatu. Senaḡi asiḡina. Gai ḡemai moḡeri veiḡa ḡeḡorato tauna tu, ḡai tauḡema ḡema kokore ai asi baḡana veḡabidadama, senaḡi mase na maki evaḡa-vaishi-raḡerini Barauna ḡenai moḡo baḡana veḡabidadama.

¹⁰ Ġia na mase nuḡari na evaḡa-maḡurimato, ma roḡo ma bevaḡa-maḡurimani. Ġai ḡema vetuḡamaḡikau tu Barau ḡenai ḡatore-kauani, ḡoirai maki ḡia na ma bene vaḡa-maḡurima ḡana.

¹¹ Mo tu ḡomi na maki ḡauḡau ai roḡo boḡo vaḡa-kavamani nai. Benamo Barau na tarimarima vovoka ḡemi ḡauḡau dainai, ḡai bevaḡa-kavamani. Mo vevaḡa-kava tarimarima vovoka na beḡe ḡitaiani, benamo ḡai na mo namo ḡadoḡariani bakunai, mabarari na Barau beḡe tanikiuani.

Paulo ḡena boioḡa ekefoato

¹² Ġai ḡema vekokoroku anina tu maiḡa: Ġai nuḡamai ḡamamiraḡiani, ḡai ḡema maḡuri e veiḡa mai tanobarai, o sikira, ḡema vegaragara ḡomi ḡesi tu dabara veaḡanai ema moḡoninai. Maiḡeri veiḡa veaḡari ema moḡoniri tu Barau ḡena varevare-bara ḡenana ḡeiaḡomani, a dia tanobara tarimari ḡeri iauneganai ḡeveiritu-ḡoi.

¹³ Ġai na ḡomi fefa ḡatore-vinimini tu dia fefa gwagaḡiri ḡatore-vinimini. Asiḡina. Ġai ḡema fefai kara ḡakiraḡirini guruḡari tu ḡomi na boḡo iavirini ema fefa tauri maki boḡo tuḡamaḡi-doḡaririni fefari moḡo.

¹⁴ Moḡoni, kotuna varau ḡotuḡamaḡi-doḡarimato. Ema atuḡa-maḡini, gabi vau boḡo tuḡamaḡi-doḡari korikorimani. Benamo Iesu Vereḡauka beḡenoḡoini ḡaronai, ḡomi na ḡai boḡo vaḡa-raḡemani, ḡai na ḡomi baḡa vaḡa-raḡemini kavana.

¹⁵ Au ariba-maoroto, ḡai boḡo riba-ginikaumani ema ḡemai boḡo tuḡamaḡikauni naima, au na boioḡa aveiato tu banasi rakaḡita-guinemi, be vaḡa-ruarua ḡomi bana vaḡa-kavami.

¹⁶ Au ḡegu boioḡa guinena tu Makedonia ḡana baiaḡoni nai, banasi rakaḡitami ema Makedonia na ma baḡenoḡoini nuḡanai maki, ma banasi rakaḡitami atato. Ma manina na vau Iudea ḡana baiaḡoni nai, au ḡegu iaḡoiaḡo ai beḡene vaḡa-kavagu farefareri tari boḡono vinigu vauro boḡono tuḡugu.

¹⁷ Ḡomi ḡotuḡa-maḡini, au tu dia nuḡaḡu mabarana ḡesi maiḡesi aboioḡato ei? Ba ḡomi ḡotuḡamaḡini, au tu mai tanobara maḡurinai roḡo ḡetanuni tarimari ḡeri veiḡa na aiḡoni, be murugu na tu, “Oi, oi” atato, a nuḡagu gabigabinai tu “Asiḡina, asi baiaḡoni,” atato.

¹⁸ Barau guruḡa moḡoninai moḡo etanuni kavana, ḡai maki moḡesina; ḡomi ḡemi ai vari ḡaḡobata-iaḡiani nai, dia murumai tu “Oi” ḡatoni, ma nuḡamai tu “Asiḡi” ḡatoni.

¹⁹ Korana Barau Natuna, Iesu Keriso, ḡomi fakami ai au, e Silas, ema Timoteo, na ḡaḡobata-iaḡiato-ḡoi tu dia muruma na moḡo ḡakirato-ḡoi, “Iesu varina tu Oi, moḡoni,” ma nuḡama gabigabiri na tu “Asiḡi, ḡofaḡofa” ḡatato-ḡoi. Asiḡina. Ġia ḡena maḡuri nuḡanai tu “Oi, moḡoni” moḡo etanuni vanaḡivanaḡi.

²⁰ Barau ḡena kiragaḡitore mabarari eveiritu tu “Oi moḡoni” moḡo, Keriso ḡena maḡuri nuḡanai ḡemoḡonito. Moḡesi nai ḡai na Keriso ḡenana Barau ḡavaḡa-raḡe-baregoani, ḡakirani, “Oi, mo tu moḡoni” ḡatoni.

21 Ġomi ema ġai tu Barau tauġena na evaġa-kokorerani e evaġa-ruġa gwaġiġirani Keriso ġena maġuri nuġanai. Ġia na eġabirato, evaġa-veaġarato,

22 ema evaġa-moġonirato, ġita tu ġia ġena tarimarima, ġena vetoġa o maka maki ġita ġerai etoreato, ema ġita lorura ġutunai ġia laukana etore-toġaiato, mo lauka ġenana ġita evaġa-riba ginikaurato, ġia ġena vevaġa-namo mabarana maki vauro bita ġabiani veġata.

23 Barau ma ribana mai kara akiraġirini tu mabarari moġoni, e au nuġagu o lorugu ġutuna maki ġia ma ribana; au mo Korinto ġana asi aiagosito tauna korikori tu maġa: Au asi aurato, ġomi ġemi vei-rakava banasi kiraġi-fofori foforiri, benamo monana ġomi nuġami bana vaġa-metori.

24 Au tu dia ġomi ġemi vere, be ġomi ġemi mani veġabidadama nuġanai tu ġai na kara baġa kiraġirini veġari moġo boġono veiri. Asiġina. Mai tu ġomi ema ġai taġauvei-sebonani, ġomi boġono iaku tuġamaġinai. Korana ġomi mani tu tauġemi ġemi veġabidadamai lorinai ġoruġa-gigitarini.

2

1 Moġesi naima nuġagu aroriatu akirato, asi ma banasi raka-ġitami, korana bavaġa-guruġa gwaġiġimini, benamo nuġami beġe metoni garina.

2 Korana bema au ġegu guruġa na ġomi nuġami beġere vaġa-metori nai, au tu dei na ma beġere vaġa-iakuġu? Korana au boġoro vaġa-iakuġu tarimami tu varau nuġami bavaġa-metori.

3 Moġesi naima au na mo fefa gwaġiġina moġa atore-vinimito. Au asi aurato, au bana iaġosi tu, boġo vaġa-iakuguni tarimami na au boġono vaġa-nuġa midigumidigu, korana au ma ribagu au aiakuni gabunai tu ġomi maki au ġesi, be taiaku-sebonani.

4 Moġoni, au nuġagu tu ma metona ġesi ema ġegu vetuġamaġi maki ebarego-rakavato e ataġito maki, mo fefa ġomi ġemi atoreato-ġoi nai. Mo fefa gwaġiġina atore-vinimito tu dia ġomi nuġami bana vaġa-metori ġana. Asiġina. Au na mo fefa moġesina atore-vinimito anina tu, au aurato ġomi boġono riba, au na ġomi tu auravini-rakavamini.

Vei-rakava tarimana ġena rakava boġono tuġamaġi-fitoġaia

5 Bema ġomi ta na nuġa-midigumidigu evaġa-ġoraiani nai, au mo gabu ai tu asi ġegu nuġameto. Aba, gabu tari tu asi aiaku-iaġirito, senaġi ġomi mabarani tu nuġameto barego evinimito, o sikira, ġomi ġutuma, korana au asi aurani, ġomi ġemi ai mo veġa guruġana bana kiraġi-meto lelevaġia.

6 Ġomi ġutuma na mani tarima na mo veġa eveiato voina metona baregona ġoviniato, ma mo tu ġenai ilaila be benamo, meto asi ma boġono vini-lelevaġia.

7 Ma toma tu ġena rakava boġono tuġamaġi-fitoġaia ema boġono launaġia kekei. Asi namo tuġamaġi midigumidiguna na mai tarima bevaġa-ketoani ġena veġabidadama ġenana.

8 Moġesina naima, au na ġomi anoġimini, mai tarima boġono kiravara-ginikaua, ġia tu moġoni ġoura-viniani.

9 Au na mo fefai atore-vinimito korana aurato, ġomi bana riba-ginikaumi, moġoni au na avaġa-ribamito dagarari mabarari ġokorana-iaġi korikoririni ba?

10 Bema ġomi na tarima ta ġena rakava ġotuġamaġi-fitoġaiani tu, au na mo tarima ġena vei-rakava maki atuġamaġi-fitoġaiani. Ma bema rakava ta

au na atuġamaġiato, mo rakava tu Keriso ġoiranai au na varau atuġamaġi-fitoġaiato ġomi ġemi namo uranai.

¹¹ Moġesi aveito anina tu, Satani na ġita beġofarani, benamo mo meto misina bevaġa-barego lelevaġiani garina. Korana Satani eġauveini dabarari ġita tu ma ribara.

Paulo ġena ura baregona Tito bene doġaria

¹² Troas vanuġana ġana aiaġoto, Keriso Varina Namona bana vari-fiuva ġana. Au Troas vanuġanai araġasito, benamo ariba-maoroto, Vereġauka na mo vanuġai Vari Namona bana fiua ġatama-bokana tu ġegu ekeoato.

¹³ Senaġi au nuġagu ai maino tu asi aġabiato-ġoi, nuġagu evekwaraġito-ġoi, korana au tarigu Tito Troas ai tu asi adoġariato. Moġesi naima Troas tarimari aġabi-tuġurito moġo, benamo Makedonia ġana ma aiaġoto.

Keriso ekokoreto lorinai ġita takokoreni

¹⁴ Barau atanikiu-viniani, korana vanaġivanagi ġia na ġena seġuka kokorenai Iesu Keriso ġena maġuri nuġanai ġai eġori-kaumani. Benamo ġai ġemana Keriso varina tu noġamo muramura bonana namona na tanobara mabarana ġeġabiani, benamo ġeribaiani.

¹⁵ Moġoni, Barau ġoiranai ġai tu Keriso varina bonana namona, Barau na rakava ġenana evaġa-maġuririto tarimari fakari na ema vei-rakava tarimari mase dabaranai ġerakani tarimari fakari ai.

¹⁶ Mase dabaranai ġerakani tarimari ġeri, ġai tu mase boragari bonari, mase bevaġa-ġoraiiani dagarana. A Barau na evaġa-maġuririto tarimari ġeri ai, ġai tu maġuri muramura bonana namona, maġuri evaġa-ġoraiiani dagarana. Senaġi dei na mai ġauvei baregona beveiani riba?

¹⁷ Ġai dia tarima tari kavana, be Barau ġena guruġa ġeġobata-iaġiani tu moni beġene doġari ġana; a ġai tu dia Barau ġena guruġa ġaġobata-iaġiani tu moni na beġene voima ġana. Asigina. Ġai tu Barau na etuġumato, mai ġauvei baġana veia etato. Ġai tu Keriso ġesi ġasebonato, ma Barau ġoiranai ġai tu nuġama maoro e moġoni ai Barau ġena guruġa ġakiraġiani.

3

Taravatu e Iauka

¹ Ġai mai guruġa ġakiraġirini tu, ġai tauġema moġo ma ġavevaġa-raġe ġenoġoini, ġakirani, “Ġai tu moġoni vei-iobukaiobuka tarimama korikori,” ġatoni ba? Ba tarima kotari ġeveini kavana ġaurani tarimarima na ġema vevaġa-moġoni fefana ta ġomi ġemi beġene torea, beġene kira, “Ġai tu tarima namoma, be boġono ġabi-raġema.” O ġomi na ġai boġono ġabi-raġema uranai ġema vevaġa-moġoni fefana ta boġono torea ġatoni?

² Ġomi maniġemi tu ġai ġema fefa, ġai vaġa-moġonima fefami, ġai lorumai Keriso na eberarito, ma tarimarima mabarari na ġeribamini ema ġeivimini.

³ Ġomi ġemi maġuri na evaġa-fofori ginikauani, ġomi tu Keriso ġena fefa, ġai ġema ġauvei ġenana eberamini o etoremimi, (ma tarimarima na ġeiviani). Ġomi tu Keriso ġena fefa, dia bairo na eberamito fefami, senaġi maġuri vanaġivanaġi Barauna Iaukana na eberamito fefami. Ma ġomi Keriso na tu dia fore lefalefari iatari ai ebera-kaumito, senaġi ġomi tu tarimarima loruri ai ebera-toġaiato.

⁴ Āi na maiġeri guruġa ġakiraġirini, korana ġai tu Keriso ġenana ma ġema tuġamaġikau Barau ġenai. (Korana ġia na evaġa-kavamani ġena ġauvei veiveinai).

⁵ Aba, ġai tauġema ġereġama na maiġeri veġa tu asi ilaila baġa veirini. Moġesi naima ġai na dagara ta ġavaġa-ġoraiato tu asi ġatoni. Asiġina. Āi tu Barau na ġereġana na moġo kokore ema riba ġai evinimani nai mai ġauvei ġaveirini.

⁶ Barau na kokore ema riba evinimani nai, ġia ġena kiraġitore o ginitaġo variġuna ġavarifuani. Mo tu dia taravatu bukanai ġetorerito dagarari ġavari-fiurini, asiġina, ġai tu Iauka Veaġa na tarimarima ġeri maġuri ai kara eveiani ġavari-fiurini. Korana taravatu bukanai etorerito vevaġa-naġiri na tu tarima vevaġi-maserini, bema asi ġekorana-iaġiani nai; senaġi Barau Iaukana na tu tarimarima maġuri evinirini.

Barau ġena ginitaġo variġuna marevana baregona

⁷ Ġoseġaġi, Mose na Barau ġena taravatu tu Isaraela tarimari evaġa-ribarito-ġoi, moġeri na tu mase maki ġevaġa-ġoraiato-ġoi. Mo taravatu moġeri tu Barau na fore iatanai eberarito, ma marevari mamari tu barego rakava. Moġeri taravatu Barau na fore ai eberarito dagarari Mose na eġabi-iaġomarito-ġoi nai, Mose tu ġoirana maki emamoto-ġoi, be Isaraela tarimari Mose ġoiranai maki asi ġeboġekau-maukato-ġoi, korana mo mareva mamana na matari efai-fitoġarito-ġoi nai. Senaġina mo taravatu mamari marevana baregona moġa tu asikauna ma erekwarekwato-ġoi.

⁸ Bema taravatu mamana marevana baregona tu moġesi neganai, Barau Iaukana ġena ġauvei mamana marevana ema seġukana tu barego lelevaġi.

⁹ Bema mase maki evaġa-ġoraiani ġauveina mamana marevana tu barego, vei-iobuka-iobuka evaġa-ġoraiani ġauveina mamana marevana ema seġukana tu barego lelevaġi.

¹⁰ Toma taravatu mamana marevana baregona moġa tu asi marevana, korana Barau Iaukana mamana marevana ema seġukana tu barego lelevaġi.

¹¹ Ma bema Mose na mo asi betanu-maukani taravatuna moġa eġabi-iaġomaiato, mamana marevana tu barego nai tu, betanu-vanaġi vanaġini dabarana mamana marevana ema seġukana tu barego lelevaġi veġata.

¹² Āi tu mai dabara variġuna o ginitaġo variġuna ġenai ġavetuġa-maġikauni, naima asi ġagarini, ma kokorema ġesi ġakiraġiani.

¹³ Āi tu dia Mose kavana, be ġoirama ġakou-ġaurini. Mose tu ġoira kouġau dabuġana na ġoirana ekou-ġauato, korana Isaraela tarimari na ġia ġoirana na mo mama marevana erekwa-rekwato-ġoi moġa asi beġene ġeġitaia ġana.

¹⁴ Senaġi Isaraela tarimari nuġari e ġeri tuġamaġi Barau na evaġa-mukunarito. Korana tu mo ġaro na beiaġoma mo maitoma, mo kouġau dabuġana ġia nuġari e ġeri tuġamaġi evaġa-mukunarito dabuġana tu roġo etanuni, be ginitaġo ġuinena bukana ġeiviani nai, asi ġetuġamaġi-doġariani. Mo ġia nuġari ema ġeri tuġamaġi ekou-ġaurini dabuġana tu Keriso ġesi beġe sebonani vauro bevekeo-fakani.

¹⁵ Iasi maki Mose ġena Taravatu guruġari ġeivirini nai, ġia nuġari tu kouġau dabuġana na ekou-ġauani.

¹⁶ Senaġi tarima ta betuġamaġi-kureni, benamo Vereġauka ġenai ma beiaġoni tarimana ġenana mo kouġau dabuġana tu bekoki-fitoġaiani.

17 Ma mai Veregāuka tu Iauka Veāga ekiraġiani. Be Veregāuka Iaukana ainai eġauveini gabuna, ġeġabi-raġeani tarimari tu dagara ta na asi ebarubarurini. Asiġina, ġia tu fakai ġetanuni.

18 Ma ġita ġoirara tu kouġau dabuġana na asi kouġau, be Veregāuka mamana e marevana baregona ġita ġerana veġiana noġa efororini, tarimarima na ġeġitaiani. Veregāuka tu Iauka Veāga, ma ġia ġenai mo mama e marevana baregona eiaġomani. Monana esenisirani Veregāuka kavanai tiaiġoni, ema ġia mamana e marevana barego lelevaġina ġita maki evini-vanaġi vanaġirani.

4

Iauka farefarena gwaġutu nuġanai

1 Barau ġena vetutuġaġwai moġo mai ġauvei ġai evinimato. Moġa lorinai ġai tu asi ġatuġamaġi-moirani mai ġauvei veiveinai.

2 Ġai tu maiaka veiġari vekuretoġari, tarimarima na asi ġeġita-learini veiġari, tu ġaiġuirito. Ema ġai tu asi ġaġofaġofani e Barau ġena guruġa anina maki ġai na tu asi ġakefoani. Asiġina. Ġai na Barau ġena vari moġonina tu tauna korikori moġo ġakiraġi-fofori ġinikauani. Monana tarimarima beġene riba, ġai tu ma moġonima ġesi Barau ġena ġauvei ġaveiani ġia ġoiranai.

3 Senaġi bema ġai na mai Vari Namona ġavari-fiurani maiġa vekuretoġa nai tu, mai vari maiġa tu mase koufanai ġerakani tarimari moġo ġeri ai vekuretoġa.

4 Maiġeri tarima, Keriso asi ġevaġa-moġoniani tarimari, tu mai tanobara barauna arana Satani na ġeri tuġamaġi evei-mukunarito, naima mai Vari Namona mamana emamani tu asi ġeġitaiani. Mai Vari Namona mamana maiġa tu Keriso mamana marevana baregona emamani. Ma mai Keriso maiġa tu Barau vetoġana korikori.

5 Ġai tu dia ġai tauġema varima ġafiurini. Asiġina. Ġai na tu Iesu Keriso ġaġobata-iaġiani, ġakirani, Keriso tu Veregāuka korikori. Ma ġai tu ġomi ġemi vetuġunaġi tarimamai ġavevaġa-iaġoni Iesu ġaġubakauani lorinai.

6 Korana Barau tovotovonai ekirato, “Mukuna furufuru nuġana na nemama-rovorovo,” etato. Ma mo Barau sebona na ġai nuġamai ema vaġa-mama rovorovoato korana tu, Barau mamana baregona Iesu Keriso ġoiranai emamoto moġa bene vaġa-foforia, benamo baġana ribaia e baġana tuġamaġi-fakaia ġana.

7 Senaġi mai farefare namo vedaureana tu ġai tauġanima nuġanai maiġea, mai tauġanima tu noġa tano na ġeveirini gwaġuturi, ma beġe korini, monana tarimarima mabarari na beġene ġitaia, ma beġene riba maki, mai seġuka barego lelevaġina ġai ġemai maiġa tu Barau ġenana eiaġomani, ma dia ġai ġemana.

8 Ġai tu reketa-reketa na ġeġaru-ġeġeraġimani, ġevaġa-midigu midigumani e meto maki barego ġevinimani, senaġi ġema kokore tu asi ekorini. Ġaro kotari tu ġadaradarani, asi ribama kara ma baġa veiani, korana maġuri tu gwaġiġi, senaġi ġema tuġamaġikau Barau ġenai tu asi emoirani veġata.

9 Tarimarima na asi ġeura-vinimani, ġevaġa-midigumidigu baregomani, senaġi Barau tu ġai sevisevimai moġo etanuni, asi eiaġumani; semo na ġekwari-ketomani, senaġi asi ġamaseni.

10 Iesu emaseto, mo mase moġa tu vanaġivanaġi ġai tauġanimai ġaġwarakao-rakaoani. Ġaribani, ġai maki, Iesu ġevaġi-maseato kavana,

beĝe vaĝi-masemani. Moĝesi eĝorani korana tu, Iesu ĝena maĝuri maki vanaĝivanaĝi ĝai tauĝanima na bene fofori, be tarimarima na beĝene ĝitaia.

¹¹ Ĝai roĝo maĝuri ĝatanuni apostoloma tu, vanaĝivanaĝi beĝene vaĝi-masema ĝetoni, Iesu varina ĝakiragiani ĝaramanai. Mai veĝa eĝorani tauna korikori tu, Iesu ĝena maĝuri, (mo tu Iesu emaguri-ĝenogoiito mo maĝuri moĝa), seĝukana ĝai tauĝanima na bene fofori, be tarimarima na beĝene ĝitaia ĝana.

¹² Moĝesi naima mase ĝena ĝauvei tu ĝai (apostolo) ĝemai eveiani, senaĝi maĝuri tu ĝomi ĝemi maĝuri nuĝanai eĝauveini.

¹³ Buka Veaĝai ekirani, “Au na Barau avaaĝa-moĝoniato, moĝesina naima aguruĝato.” Ĝai maki mo veĝabadadama sebona moĝa nuĝanai naima ĝakirani, Barau ĝavaĝa-moĝoniani nai ĝaguruĝani.

¹⁴ Korana ĝai ribama, Iesu Vereĝauka mase na evaaĝa-variĝisi ĝenogoiato Barauna na ĝai maki ma bevaĝa-variĝisi ĝenogoiimani Iesu kavana, benamo ĝai ema ĝomi, mabarara beĝabi-iaĝomarani ĝia ĝoiranai bea vaĝa-ruĝa-tarirani.

¹⁵ Ĝai na midigumidigu e meto ĝaĝabirini tu, ĝomi na namona boĝono doĝaria ĝana, ema monana tarimarima ĝutuma gorogoro na Barau ĝena namo ema varevare-bara beĝene doĝaria. Benamo mai Barau ĝena namo ema varevare-bara dainai, tarimarima ĝutuma na Barau beĝene tanikiu-vini-baregoa e ĝia marevana e mamana baregona beĝene vaĝa-raĝea.

Veĝabadadamai moĝo bitana tanu

¹⁶ Moĝa lorinai ĝai tu asi kota maki ĝatugaĝi-moirani. Aba, tauĝanima tu eĝaukani, bemoira-iaĝoni, senaĝi iaukama tu ĝaro loriri ai evaaĝa-variĝurini.

¹⁷ Ema maiĝeri midigumidigu e meto misiri asikauna na beĝe raga-korini dagarari voiri beĝe foforini tu barego lelevaĝi. Barau na maiĝeri voiri tu marevana barego lelevaĝina, betanu-vanaĝi vanaĝini dagarana, bevinimani.

¹⁸ Moĝesi naima ĝai matama na tu dia toma ĝeĝorani matara na taĝitarini dagarari ĝaĝita-karakararini. Asiĝina. Ĝai matama na tu, toma matara na asi taĝitarini dagarari, ĝaĝita-karakararini. Korana toma matara na taĝitarini dagarari tu asikauna ma beĝe korini, senaĝi kara toma asi taĝitaiani dagarana tu betanu-vanaĝi vanaĝini, asi bekorini dagarana.

5

Guba tauĝanina e mai tanobarai tatanuni tauĝanina

¹ Ĝai ribama, mai tanobarai ĝatanu-iaĝiani foutana o tauĝanina berakavani mase ai nai, gubai asi ĝima veiveina numana ta Barau ĝenana baĝa ĝabiani, tanu-vanaĝivanaĝi numana.

² Mai tanobara tauĝani numanai ĝatanuni tu ĝataĝitaĝini ĝaĝabaĝabani, korana midigumidigu e meto barego ĝaĝoiĝaĝoni dainai. Be ĝai ĝema ura baregona tu, Barau na guba na beiaĝomani tauĝanina na nevaĝa-dabuĝama.

³ Korana guba tauĝanina na bedabuĝa-ĝaumani tarimarima kavana nai, ĝai tu dia iauka moĝo baĝa rakao-rakaoni ĝia ĝoiranai gubai, senaĝi ĝai iaukama tu kouĝau initoma kavana.

⁴ Korana ĝai roĝo mai tanobara tauĝanina numanai ĝatanuni tu, ĝaĝabaĝabani e meto barego ĝevinimani. Maiĝa tauna tu, asi ĝaurani mai tanobara tauĝanina maiĝa ĝakoki-vaĝia o ĝamase ĝatoni. Asiĝina. Ĝai ĝema

ura tu Barau na guba tauḡanina numana variḡuna na bene vaḡa-dabuḡa-ḡauma, be maḡuri tauḡanina na ma beḡe maseni tauḡanima moḡo gabuna bere borog̃ia ḡatoni.

⁵ Barau tauḡena na ḡita tu mai maḡuri variḡuna maiḡa bitana ḡabia ḡana erovina-torerato. Moḡesi naima ḡia na Iauka Veaḡa tu evini-guinerato. Barau na mai Iauka Veaḡa evini-guinerato anina tu, ḡita bitana riba-ginikau, tauḡani variḡuri maki bevinirani.

⁶ Moḡesi naima vanaḡivanaḡi ḡai nuḡama tu gwaḡiḡi, asi ḡatuḡamaḡi-iauvoiauveni. Ma ḡai ribama, mai tanobara tauḡanina numanai roḡo ḡatanuni nai tu, ḡai Vereḡauka ḡesi vanuḡa korikori gubai tu asi ḡatanu-vegogoni.

⁷ ḡai veḡabidadamai moḡo ḡatanuni, dia matama na ḡaḡitarini dagarari na ḡeḡori-kaumani.

⁸ Au mo bakira kavana, ḡai tu asi ḡagarini, ma tuḡamaḡikauma ḡesi ḡaurani, mai tauḡani ḡenana baḡana veḡita, benamo Vereḡauka ḡesi baḡana tanu, Vereḡauka etanuni vanuḡanai.

⁹ Moḡesi naima ḡai ḡema ura barego sebona moḡo ḡoiramai ḡatoreani tu, ḡia iauna moḡo baḡana vaḡa-namoa. Mo tu mai tanobara tauḡanina nuḡanai baḡa tanuni, o mai tanobara tauḡanina numana na baḡa raka-vaḡini, benamo Vereḡauka ḡesi gubai baḡa tanuni, ḡai ḡema ura tu, ḡia iauna moḡo baḡana vaḡa-namoa.

¹⁰ Korana ḡita mabarara Keriso ḡena Kota seana ḡoiranai tu bita ruḡa-rosini veḡata. Monai ḡita mabarara tata mai tanobara tauḡaninai tatanuni nai, veḡiḡa namori o rakavari taveirini, maiḡeri voiri ilailari bita ḡabirini.

Keriso na Barau ḡatanai evaḡa-iaḡorato

¹¹ ḡai ma ribama, Vereḡauka tu ma garina, korana tu ḡoiranai bita ruḡa-tarini. Moḡesi naima ḡai na tarimarima ḡasisiba-vinirini, beḡene tuḡamaḡi-vekefo ḡana. ḡai nuḡama e ḡema tuḡamaḡi kamasi tu Barau ma ribana ginikau, ema au atuḡamaḡini, ḡomi maki ḡai nuḡami ai ḡoribamani.

¹² Maiḡesi ḡaḡurugani tu, dia ḡai tauḡema ḡomi ḡoirami ai ḡakirani, ḡai tu moḡoni vei-iobukaiobuka tarimama korikori. Asiḡina. Maiḡeri guruḡa ḡakira-varamini tauna korikori tu, ḡai boḡono veiavi-iaḡima, be tanobara iaunegari e ribari ḡevekokoroku-iaḡirini tarimari boḡono vaḡa-veseri ḡana. Maniḡeri tarimarima tu matari na ḡeḡitarini dagarari ḡevekokoroku-iaḡirini, a tarimarima nuḡari ai ḡetanuni dagarari tu asi ḡeḡitarini.

¹³ Bema ḡai tu ḡababo-rakaoni ḡotoni nai, mo tu Barau ḡena ḡauvei ḡaveiani dainai; o bema ḡema tuḡamaḡi maoro nai, mo tu ḡomi namo boḡono ḡabia ḡana.

¹⁴ ḡai tu Keriso ḡena veuravini na elaunaḡi-naḡimani, ema ḡai moḡoni ḡariba-ginikauni, Keriso tu tarimarima mabarara ḡera vei-rakava dainai emaseto. Moḡesi naima, tarimarima mabarara maki ḡia ḡena mase ai tamase-vegogoto.

¹⁵ Keriso tu ḡita tarimarima mabarara ḡera vei-rakava lorinai emaseto naima, ḡita initoma tamaḡuri-tanuni tarimara mabarara tu, dia ḡita tata tauḡera ḡera ura loriri ai moḡo bitana tanu. Asiḡina. ḡita mabarara tu Keriso ḡenai moḡo bisini tanu, korana tu ḡia ḡita urarai emaseto, ma Barau na mase na ma evaḡa-variḡisi ḡenogoiato.

¹⁶ Moḡesina naima ḡai na maitoma tarimarima tu dia tauḡanina rekenai ḡena maḡuri ḡaḡitaiani. Aba, moitovonai tu Keriso maki tauḡanina rekenai ḡatuḡamaḡiato-ḡoi, senaḡi toma moḡesi tu asi ḡatuḡamaḡiani.

¹⁷ Moġesi naima bema tarima ta Keriso ġena maġuri nuġanai etanuni, mo tarima tu tarimarima variġu geragerana. Mo maġuri guinena etanu-iaġiato-ġoi moġa tu ekorito, ġia tu maġuri variġu geragerana eġabiato, ma mai maġuri variġunai etanuni.

¹⁸ Maiġeri dagara mabarari tu Barau na ġita ġera evinirani. Barau tavetari-viniato-ġoi, senaġi Keriso ġena mase ġenana ġia na ma eġabirage-ġenoġoirani. Ema ġai maki Barau na mai ġauvei evinimato, mo tu tarimarima baġana kira-varari, Barau na maino ġabigabina dabarana tu varau eveiato, be ġia ema Barau maino beġe ġabiani riba.

¹⁹ Mai guruġa anina tu: Barau na Keriso tanobara ġana etuġu-iaġomaiato, benamo ema maseto. Keriso ġena mase ġenana Barau tu tanobara tarimari mabarari ġesi maino ġeġabiato: Tarimarima ġeri rakava asi ma etuġamaġi-taġorini, senaġi etuġamaġi-fitoġarini. Barau na mai ġauvei ġai evinimato, maino guruġana maiġa baġana ġobata-iaġia.

²⁰ Moġesi naima ġai tu Keriso ġaruġa-boroġiani mai tanobarai. Ma Keriso ġena vari ġavari-fiuanai nai tu, noġa Barau tauġena ġai ġemana tarimarima eura-maġirini, ġia ġesi maino beġene ġabia. Ġai na Keriso aranai ġomi ġanoġimini, “Barau ġesi maino boġono ġabia.”

²¹ Korana Keriso tu enabe asi ġena rakava, senaġi ġita ġera vei-rakava lorinai, Barau na ġia noġa moġo vei-rakava tarimanai evaġa-iaġoato. Barau na mo veiġa eveiato korana tu, Keriso ġesi bita seboṇani ġenana, ġita mabarabarara tu vei-iobukaiobuka tarimari ai bitana iaġo ġana Barau ġoiranai.

6

¹ Ġai tu Barau ġesi ġaġauvei-vegogoni, moġesina naima ġalaunaġimini, Barau ġena namo e varevare baregona ġoġabi-raġeato maniġa tu boġono ġabi-gigitaria, asi boġono vaġa-rakavaia.

² Korana Barau tu maiġesi ekirani ġena bukai,

“Au na baiiau-namomini ma baġabi-raġemini ġarona beġabiani nai tu, ġemi noġinoġi baġabi-raġerini, ema vevaġa-maġuri ġaronai tu, au na bavaġa-kavamini.”

Au na avaġa-guruġamini, maitoma ġarona tu Barau na tarimarima beiau-namorini ema beġabi-raġerini. Ma maitoma ġarona tu Barau na tarimarima bevaġa-maġuririni ġarona!

³ Ġai tu asi ġaurani, tarima ta na ġai ġema ġauvei nuġanai kerere ta bene ġoitaġoa ma beġene vaġa-daġama, moġa lorinai ġai na tarima ta vaġa-vedaġa-raġena veiġana ta asi ġaveiani.

⁴ Moġesi naima ġema veiġa e guruġa mabarari ai ġavevaġa-foforini, ġai tu moġoni Barau ġena vetuġunaġi-iaġovinina tarimama. Meto nuġari ai ġavevaġa-gwaġiġini; tarimarima na ġevaġa-midigu midigumani; ġema ġauvei nuġanai maġuri gwaġiġiri ġadoġaririni; tarimarima na ġevaġa-dabara dokomani;

⁵ ġekwarimani, ġediburamani, ġutuma-bara na ġeġaru-ġeġeraġimani ġefarara-farara vinimani; ġauvei ai ġavekwarai-ġaravani, asi ġagenani, asi ġaġaniġanini.

⁶ Ġema maġuri e veiġa tarimarima e Barau ġoirari ai ġenamo-vedaureani; Barau ġena maġuri e ġena vari ġaribaiani; maġuri metori ġaġoitaġorini,

senagi ġatugamaġi-gwaġiġini; ġevaġa-rakavamani tarimari asi ġabaru-vinirini, senagi ġaiu-namorini; Iauka Veaġa na evaġa-kavamani dabara mabarari ai, ma nuġama mabarari ġesi tarimarima ġaura-vinirini.

⁷ Barau ġena guruġa moġonina moġo ġaġobata-iaġiani Barau ġena seġukai; vei-iobukaiobuka farefareri tu ġimama aroribamai ema ġimama kaurimai ġerina ġavetarini.

⁸ Ġai tu ġaruġa-gwaġiġini, tarimarima na ġevaġa-raġemani o ġevaġa-rakavamani nuġari ai, varima ġevaġa-rakavarini o ġevaġa-namorini nuġari ai; ġekiramani, ġai na tarimarima ġaġofa-taġui-taġuirini ġetoni, senagi ġai tu guruġa moġoniri moġo ġakiraġirini.

⁹ Ġekirani, ġia tu asi ribari ġai ġetoni, senagi ġai tu ġeġita-leamani, ġia ma ribari ġinikau ġai tu dei. Ġevaġimani, be ġamaseni, senagi roġo ma ġamaġurini. Ġebotamani, senagi asi ġamaseni.

¹⁰ Ġevaġa-nuġa midigu-midigumani, senagi vanaġivanaġi ġaiakuni ġavererini. Asi ġema asi ġama, senagi tarimarima vovoka ġavaġa-taġarini. Dagara ta asi ġaġwa-tanuani, senagi Barau na ġena tarimarima evinirito dagarari mabarari tu ġai ġema.

¹¹ Korinto tarimami, ġai ġomi ġemi ai tu ġaguruġa-fiu-iaġoni moġo, asi ġagarini, ema nuġama maki ġakeorini, ġaura-vinimini nai.

¹² Ġai na ġomi tu ġaura-vinimini, senagi ġomi na neġi ġai asi ġoura-vinimani.

¹³ Au na ġomi tu natugu kavana avaġa-guruġamini: Ġomi nuġami asi boġono kouri, nuġami boġono keori, be ġai na ġomi ġaura-vinimini kavana, ġomi na maki ġai moġesi boġono ura-vinima.

Keriso asi ġevaġa-moġoniani tarimari ġesi asi boġono vekako

¹⁴ Keriso asi ġevaġa-moġoniani tarimari ġesi asiġina ġinavaġi boġono veġata e asi boġono vekako. Korana kamara dabarai vei-iobukaiobuka e vei-rakava veigari beġe veġatani ema beġe sebonani, ei? Asi ilaila! Ema kamara dabarai mama ema mukuna furufuru beġe veġatani ema beġe sebonani, ei? Asi ilaila!

¹⁵ Keriso ema Satani tu kamara dabarai beġe nuġa-sebonani, ei? Ema veġabadadama tarimana ema asi eveġabadadamani tarimana tu kamara dabarai ġia tauri ruarua ġeri tuġamaġi beġe sebonani?

¹⁶ O Barau ġena Rubu Veaġa e babarau ġeri rubu tu kamara dabarai Rubu Veaġa sebonai moġo beġe iaġoni, ma Barau sebona moġo beġe toma-rakariġoani? Ġita mabarara tu Barau ġena Rubu Veaġa. Ma Barau ekirato, “Au tu ġia nuġari ai batanuni, ma ġia vekaravari ai barakaorakaoni. Au tu ġia ġeri Barau ai baiaġoni, ma ġia tu au ġegu tarimari ai beġe iaġoni.”

¹⁷ Moġa lorinai Vereġauka ma ekirato, “Vei-rakava tarimari vekaravari na ġoma-rakarosi, ma ġia seviri na ġoraka-veġita. Asi iareva dagarari asi boġono ġabi-karari, moġesi tu baġabi-raġemini.”

¹⁸ Iaru-korokoro Vereġaukana tu maiġesi ekirani, “Au tu ġomi Tamami ai baiaġoni, ma ġomi tu au natugu taumi ema vavinemi ai bavaġa-iaġomini.”

7

¹ Ġatagu mabarami, ġoseġaġi, Barau na mai guruġatore maġeri tu ġita ġera ekiraġirito. Moġa lorinai tauġanira ema iaukara ġevaġa-rakavarini dagarari mabarari ġita ġerana si-iaeva-fitoġari. Be Barau ġenai ma veg-bakaura ġesi tatanuni nuġanai, ġera maġuri tu namo ema veaġa korikori.

Paulo ġena iaku tu asikei, korana Korinto tarimari ġevetuġamaġi-kureto

² Nuġami ai ġai ġema faka kota boġono veia. Ġai tu tarima ta ġenai veiġa rakavana ta asi ġaveiato. Ġai na tarima ta ġena maġuri asi ġevaġa-rakavaiato. Ġai na tarima ta ġofaġofa dabaranai ġena dagara ta asi ġaġabiato.

³ Au maġesi akirani tu, dia ġomi ġemi ai meto atore-kauani. Asiġina. Au varau baguruġa-guine, ġomi tu ġai loruma ġuturi ai ġotanuni, ġauravini-rakavamini. Be ġomi ġesi bita tanuni o bita maseni, ġai ġema veuravini ġomi ġemi ai tu asi bedokoni, roġo betanuni.

⁴ Au ġegu tuġamaġikau tu barego lelevaġi etanuni ġomi ġemi ai, korana ġemi veġabidadamai ġoruġa-gwaġiġini. Moġesi naima au na ġomi avaġa-veivimini tarimarima ġoirari ai, ma au maki ġolaunaġi-baregoġuni. Meto baregori ġaġoitaġorini mabarari nuġari ai maki, au ġegu iaku tu roġo etanuni, asi kota edokoni o ekeini.

⁵ Makedonia tanobaranai ġaraka-toġato nai, ġai tauġanima tu asi kota maki ġeiaġaraġito meto e midigumidigu ġerina. Gabu mabarari ġana ġaiagoto-ġoi tu, meto e midigumidigu ġaġoitaġoto-ġoi, tarimarima na ġevaġa-veġare veġaremato-ġoi e ġekoumato-ġoi. Ema nuġama ġeraġeto-ġoi.

⁶ Senaġina Barau na tu meto e midigumidigu na nuġari ġevaġa-moirarini tarimari evaġa-kavarini. Ġia na nuġama evaġa-gwaġiġirito, Tito etuġu-iaġomaġiato nai.

⁷ Ma ġai tu dia ġia eiaġomato nai moġo, nuġama ġegwaġiġito. Senaġi ġomi na aiġesi ġovaġa-kavaiato moġeri variri ġema ema kiraġito, moġeri na maki ġelaunaġi-baregomato. Evaġa-ribaguto, ġomi ġemi ura baregona au boġonoasi ġitagu. Ema ġemi nuġa-midigumidigu e au ġoura-viniguni e ġourani au gogobagu boġono raga, ema au ġegu guruġa ġokorana-iaġirini variri mabarari ema kiraġirito. Moġa lorinai au ġegu iaku ebarego-lelevaġito.

⁸ Ribagu, au na fefa atore-iaġoato, monana evaġa-nuġa midigumidigu-mito, senaġi au tu asi adaradarato. Aba, tovoovonai tu adaradarato, korana ariba-maoroto, au na fefa na nuġami evaġa-meteorito, senaġi mo tu ġemi nuġameto tu asi etanu-maukato.

⁹ Ma inította au tu averereni, dia ġomi nuġami avaġa-meteorito nai, senaġi mo ġemi nuġa-midigumidigu ġenana ġovetuġamaġi-kureto, benamo Barau ġenai ġoġenoġoito. Ġai na ġomi ġemi ai rakava metona ta asi ġaveiato, senaġi Barau ġena ura veġata ġomi boġono nuġa-midigumidigu, korana ġemi veiġa ġekerereto nai.

¹⁰ Barau ġenana eiaġomani nuġa-midigumidiguna tu asi tuġamaġi vevaġa-ġwana. Korana tu mo nuġa-midigumidigu ema vetuġamaġina tu vetuġamaġi-kure evaġa-ġoraiani. Mai dabarai vetuġamaġi-kure eġorani vau Barau na tarimarima evaġa-maġuririni. A mai tanobara maġurina ġenana eiaġomani nuġa-midigumidigu e vetuġamaġina na tu mase evaġa-ġoraiani.

¹¹ Mai Barau ġenana eiaġomani nuġa-midigumidigu e vetuġamaġina na kara ġomi ġemi ai bevaġa-ġorari ġotuġamaġi-ginikaua. Maniġa ġenana ġomi

toma ġemi tu ġamaġi beġe maoro, ma ġoura-rakavani veiġa namori moġo fakami ai boġono veiri. Ema ġemi ura baregona tauġemi boġono veiareva-faka meto tari ġerina. Ma mo kerere eveito tarimana ġenai asi ġoiakuto, ma au garigu goveito, ma ġemi ura baregona ġemi ai ma bana iaġosi, ma ġemi ura baregona maki mo kerere eveito tarimana ġena maġuri bene maoro veġata, ma ġemi ura ġia tu ġena veiġa rakavana voina metona bene ġabia veġata. Ġomi na maiġeri veiġa mabarari ġoveirini ġerina ġovevaġa-moġonini, ġomi tu mo veiġa rakavana ġenana boġo veġabi-vaġi, ma asi ġemi kerere ta.

¹² Au na mo fefa ġomi ġemi atoreato-ġoi nuġanai tu, dia mo kerere eveito tarimana ġena maġuri totomaorona tuġamaġina aveito-ġoi, o mai tarima na nuġari evaġa-meteorito tarimari atuġamaġirito-ġoi. Asiġina. Au na mo fefa atore-iaġosiatu anina tu, Barau ġoiranai ġomi tauġemi boġono riba-maoro, ġomi na ġai tu moġoni nuġami mabarari ġesi ġai ġoġabi-raġemani e ġogubakaumani.

¹³ Ġai tu ġomi ġemi veiġa mai bakiraġiri veiġeri na ġelaunaġi-baregomani.

Senaiġi mo ġemi veiġa na ġelaunaġimato, ma kokore barego ġaġabiatu-ġoi, moġa iakunai tu ma ġaiaku-rakavato maia, korana Tito ekirato, maninai ġomi na ġia tu ġoġabiraġe-ginikauato, ema nuġana egenagena-tarito.

¹⁴ Au na ġomi ġia ġoiranai tu avaġa-veiavimito, ma tauġemi ġemi veiġa na ġovevaġa-foforito ġoiranai, be eġitamito, moġesi naima aiakuni, korana asi ġovaġa-maiakaguto. Ema mo ġemi veiġa na ġovevaġa-foforito, ġai na Tito ġoiranai ġomi ġavaġa-veiavimito guruġari tu moġoni veġata, asi ġofaġofa.

¹⁵ Ma Tito na ġomi ġemi seġaġi etuġamaġirini, ema ġomi na ġia ma nuġa-raġemi e nuga-ġoġoġoġomi ġesi ġoġabi-raġeato, moġeri ma etuġamaġi-iaġosirini nai, ġia ġena veuravini ġomi ġemi ai tu ebarego-lelevaġini moġo.

¹⁶ Au tu averereni, korana moġoni ama ribani asi adaradarani, ġomi na tu veiġa namori ema iobukaiobukari moġo ġoveirini bene.

8

Ekalesia na moni ġevaġa-vegogorito Ieruselema ekalesiari ġeri

¹ Tarikaka mabarami, maitoma ġai ġema ura tu, Barau ġena namo e varevare-bara Makedonia ai ekalesia doġorori iatari ai etoreato boġono ribaia.

² Ġia ġeri ai tu meto e midigumidigu barego eraġasito, senaiġi ġia nuġari tu iaku e verere na ġevonuvonu-raġeto. Ġia tu moġoni ogoġami, asi ġeri-ġari, senaiġi ġia ġeri varevare tu barego rakava ġeveiato.

³ Au na ġomi ġemi ai akiraġi-fofori korikoriani, ġia ġeri ġoitaġo tu kei, a ġeri vini tu barego-rakava tarikakari tari vaġa-kavari ai; ma ġia ġeri ai doġaridoġariri maki gwaġiġi, a farefareri e moniri maki benamo ġevini-fitoġarito moġo. Ma mo veiġa tauġeri ġeri urai moġo ġeveiato.

⁴ Ġia tauġeri na ġeri-ġari na ġai ġenoġi-ginikaumato, ġeurato, ġia maki ġai beġene ruġa-karoma, be mai ġauvei mainai tarima veaġari beġene vaġa-kavari.

⁵ Ġai ġema tuġamaġi, ġia ġeri varevare monina tu misina moġo beġe vinini. Senaiġi ġia ġeri vini ġaġitaiato tu barego vedaurea, ġai na kara tovotovonai ġatuġamaġiato, moġa maki ġevanaġiato. Ġia tovotovonai tu tauġeri roġo Vereġauka ġenai ġevevinito, ma moġa murinai tu Barau ġena ura ġekorana-iaġiato, be ġai ġemai maki tauġeri ġevevinito.

⁶ Moġesina naima ġai na Tito ġanogġiato, ġakirato, ġomi ġemi veuravini varevarena moniri egororito kwari, moġeri tu tauġena na bene gogo-vaġiri. Korana tovotovonai maninai moni-gogo ġauveina tu ġia na esinaiato.

⁷ Ġomi Korinto ekalesiana dagara mabarari ai ġomi tu moġoni ġoiaruto: Ġemi veġabidadama e ġemi guruġai, ġemi riba iauka maġurinai, ġemi ura barego lelevaġina Barau ġena ġauvei nuġanai boġono vevaġa-kava, ema ġemi veuravini ġai ġemai tu barego lelevaġi. Ġai ġema velaunaġi ġomi ġemi ai tu, mai veuravini varevareri vini maki boġono vaġa-baregoa.

⁸ Mai veuravini varevareri boġono vini atoni maiġa tu, dia akirani, boġono veia veġata atoni. Senaġi maiġesi akiramini tauna tu maiġa: Tarikaka kotari tu ġeiaġo-ġinikauni karori tari vaġa-kavari ai. Moġesi naima au na ġomi atovo-naġimini, ġomi ġemi veuravini tarikaka tari ġeri ai tu aiġesina naribaia atoni.

⁹ Gita ġera Vereġauka Iesu Keriso ġena namo e varevare-bara ġomi tu ma ribami. Ġia tu taġa verena, senaġi ġomi urami ai asi ġena farefare tarimanai ema vevaġa-iaġoto. Iesu asi ġena farefare ai ema iaġoto anina tu, ġomi farefare vovoka tarimami ai boġono iaġo ġana.

¹⁰ Ġemi vini au na maki ġomi na boġono doġaria ġana, au ġegu vevaġa-gwada guruġana tu maiġa: Ġoraġani laġaninai ġomi na tu dia moni vaġa-vegogo moġo ġosinaiato, senaġi ġomi tu ġourato, mai veġa maki boġono veia veġata.

¹¹ Moġesi naima ġosinaiato ġauveina boġono vaġa-kori ġinikaua. Moġesina tu mai boġono veia veġata ġotato ġauveina tu boġo vaġa-kori ġinikauani, monana bevaġa-moġoni korikoriani. Boġo vinini nai tu, ġemi ai kara maniġeri ilailari ai moġo boġono vini.

¹² Bema nuġami mabarari ġesi ġemi ai kara ġetanuni maniġeri ilailari ai boġo vinini dagarari tu, Barau na beiaku-iaġirini e beġabi-raġerini. A ġemi ai asi ġetanuni dagarari asi boġo vinini, moġeri Barau na tu asi benuġameto-iaġirini, ema ġomi maki asi bebaru-vinimini.

¹³ Ġai asi ġaurani, tari ġovaġa-kavari uranai, ġomi tauġemi iatami ai meto baregona boġono tore-kaua, asi ġemi-ġami ai boġono vevaġa-iaġo. Asiġina. Ġai ġaurani tu, ġomi ema ġovaġa-kavarini tarimari boġono ilaila moni e farefare rekenai ġatoni.

¹⁴ Mai taimi ai tu ġomi na ġia ġeri ura dagarari boġo vinirini, korana ġomi ġemi-ġami tu vovoka tabutabu. Be ġomi na ġia ġeri rabu ai ġovinirini kavana, ġomi ġemi rabu ai maki ma beġe vinimini. Mo dabarai ta asi berabuni.

¹⁵ Buka Veġai ekirani kavana, “Ġutuma egogo-vegogoto tarimana ġana tu dia eġutuma-lelevaġito, ma kotuna moġo egogo-vegogoato tarimana ġana tu dia misina korokoro, senaġi taunai.”

Paulo na Tito Korinto ġana etuġuato

¹⁶ Au na Barau atanikiu-viniani, korana tu au ġegu nuġa-vekwaraġi ġomi ġemi ai etanuni, mai nuġa-vekwaraġi sebona maiġa tu Barau na Tito nuġanai maki etoreato.

¹⁷ Korana ġia tu dia ġai na ġanogġiato dainai moġo easi raka-ġitamini. Asiġina. Ġia tauġena maki nuġana mabarabarana eura-rakavani veġata bene iaġosi, ġomi bene raka-ġitami.

¹⁸ Ġai tarikakama ta maki Tito ġesi ġatuġu-iaġosiani. Mai tarikaka maiġa tu ekalesia doġorori mabarari na ġavaġa-raġeani, korana ġia na Vari Namona eġobata-iaġiani na nuġana mabarana ġesi.

¹⁹ Ema mai tarikaka maiġa tu ekalesia doġorori mabarari na ġeġabi-viriġiato, ġai bene kavama mai varevare moniri baġa ġwa-iaġorini nai getato. Mai ġauvei ġaveiani korana tu, tarimarima mabarari na Vereġauka beġene vaġa-raġe baregoa ġana, ema ġai ġaurani tarimarima baġana vaġa-kavari ġatoni maġurina baġana vaġa-foforia ġana.

²⁰ Ġai asi ġaurani, tarima na ġai beġene rori-torema ma beġene vaġa-rakavama. Moġesina naima mai veuravini ai ġevinito monina maiġa tu dabara namonai ġaġauvei-iaġiani.

²¹ Korana ġai ġema ura baregona tu, veġa roroġotona baġana veia, dia Barau ġoiranai moġo, senaġi tarimarima maki ġoirari ai.

²² Ma ġita tarikakara ta maki ġia ġesi ġatuġu-iaġosiani, ġia bekavarini. Mai tarikaka maiġa tu ġai na ġaġitaiani, ġia tu moġoni eura-baregoni, Barau vetuġunaġina bene iaġo-vini etoni. Ema ġia tu moġoni ma ġena vetuġamaġikau ġomi ġemi ai maki.

²³ Tito maniġa maki apostolo au kavana, ma ġai tauma ruarua tu ġomi vekaravami ai ġaġauvei-vegogoni. A mani ġita tarikakara ruarua maniġeri tu ekalesia doġorori tata arari ai beġe iaġosi, ma ġia tauri ruarua tu ġeri ġauvei ema veġai Keriso ġevaġa-raġe baregoani.

²⁴ Moġesina naima, ġemi veuravini vetoġana korikori ema ġai na ġomi ġavaġa-raġemini tauna korikori, ġia ġoirari ai boġono vaġa-fofori korikoria, be ekalesia doġorori mabarari na beġene ġitaia ema beġene vaġa-moġonimi.

9

¹ Au na aġitaiani tu, asi korana ta moġo ġomi na Barau ġena tarima veaġari moni ġovarevare-vinirini guruġari au na ma bakiraġirini.

² Korana ġomi ġemi ura boġono vaġa-kavari veġata ġotato moġa tu ribaġu, be moġa tu Makedonia tarimari ġoirari ai maki ġomi aveiavi-iaġimito. Au na ġia avaġa-guruġarito, akirato, ġomi Akaia ai ġotanuni tarimami tu, ġoraġani laġanina na veġata beiaġoma mo toma ġorovina-toreto boġono vini ġana. Ma ġomi na tarimarima boġono vaġa-kavari nuġa-vekwaraġina ġoveini guruġana mani ġeseġaġiato, benamo Makedonia tarimari kotari maki ġeura-dikadikato, ġia maki beġene vevaġa-kava veġata ġetato.

³ A au na mai tarikakara maiġeri atuġu-iaġosirini tauna korikori tu, beġene riba, ġai na ġavaġa-veiavimini guruġari tu dia guruġa koriri moġo. Be au aurani, ġomi ġemi varevare moniri tu boġono gogo-toreri vauro boġono venari-taġo, au na ġia akira-vararito ilailanai.

⁴ Asi namo Makedonia tarimari kotari au ġesi beġe rakakauni, benamo ġomi beġe ġitamini tu, dia ġai na ġaveiavi-iaġimimi gabunai beġe ġoitaġomini, ġomi ġemi varevare moniri tu asi gogotore. Gomi tu asi bakiraġimi, senaġi ġai tu beġe maiaka-korukorumani, korana ġai ġomi ġemi ai tu ġatuġamaġi-dadamaġi-baregoni nai.

⁵ Moġesina naima au batuġamaġi, mai tarikakara maiġeri namona tu nanoġiri, be beġene iaġosi-guine; be ġomi ġemi veuravini varevarena moniri, mo ġokiraġi-torerito moniri tu beġene kirami, ma boġono tore-vegogo guineri vauro, ġai boġono nari-taġoma. Benamo ġai baġana votu nai, ġemi veuravini varevarena moniri tu toretaġo. Monana bevaġa-foforiani ġomi ma ġemi veuravini ġesi ġia ġeri ġovinini, a dia nuġami asi iakuri ġesi ġovarevareni.

Vovoka bevaroni tarimana

⁶ Mai guruġa akiraġiani maiġa tu boġono tuġamaġi-taġoa: Ġaniġani ġueri asi vovoka bevaroni tarimana tu, kwakwaġi maki ġaniġani asi vovoka

bedoğarini. A ġaniğani ġueri ġutum gorogoro bevaroni tarimana tu, kwakwai maki ġaniğani ġutuma lelevaği bedoğarini.

⁷ Tarima ta nuğanai evağa-moğoniani ilailanai bene vini. A dia nuğana ma daradarana ġesi bene vini, o dia tarimarima ġekirani beğene tore veğata ġetoni naima beğene vini. Korana nuğana faka ema ma iakuna ġesi evinini tarimana tu Barau na eura-viniani.

⁸ Ma Barau ġena namo e varevare-bara lelevağina ġomi iatami ai betorerini. Benamo monana ġaro mabarari ai ġemi ura dagarari mabarabarari boğo ġoitağorini, ema dia ġoura-vinirini dagarari moğo, senaği dagara kotari maki. Ema monana ġauvei namori maki barego lelevaği boğo veirini.

⁹ Buka Veağai ekirani kavana,
 “Barau na ġena varevare tu
 asi-ğeri e asi-ğari tarimari
 barego lelevaği evinirini,
 ġena vei-iobukaiobuka tu
 betanu-vanaği vanağini.”

¹⁰ Barau na ġaniğani ġueri vamoka vei tarimari evinirini beğene varori ġana, ema tarimarima ġaniğani evinirini beğene ġaniri ġana. Mai Barau sebona mainana ġemi ġaniğani ġueri ġovarorito moğeri bevağa-vovoka tabutaburini, ema ġemi veiğa namori ġwağwari beğe ġutuma-gorogoroni.

¹¹ Ma dabara mabarari ai ġomi bevağa-tağamini, ma monana nuğami sebonai e ma veuravinimi ġesi varevare mabarari boğo vinini. Benamo ġai ġemana boğo tuğurini varevareri tarimarima na beğe ġoitağorini nai, mabarari na Barau ma beğe tanikiu-viniani.

¹² Korana mai ġauvei ġomi na ġoveiani maiğa tu, dia Barau ġena tarimarima veağari na ġeura-vinirini dagarari moğo ġovinirini, senaği mai ġomi ġemi varevare bakuri ai, tarimarima vovoka na Barau ġetanikiu-vini baregoani.

¹³ Korana mai tarimarima ġovağa-kavarini ġauveiri, mainana ġomi ġemi veiğa namori bevağa-fofori ginikaurini. Ma tarimarima beğe ribani, ġomi na Vari Namona tu dia murumi korina na moğo ġokirağiani, senaği ġokorana-iağiani maki. Ema ġomi ġemi farefare e moni maki ma veuravinimi ġesi ġia e tarimarima mabarari ġesi ġovare-barabararini beğe ġitarini. Ma iğeri veiğa namori loriri ai tarimarima na Barau beğe vonevone-rağeani.

¹⁴ Benamo ġia na ġomi beğe tuğamaği-baregomini, ma iatami ai beğe ġauğauani. Moğesi beğe veini anina tu, Barau ġena namo e varevare barego lelevağina ġomi iatami ai etanuni dainai.

¹⁵ Barau sitanikiu-vinia, korana ġia ġena varevare barego lelevağina ġita evinirato bene.

10

Paulo na ġena ġauvei ġevağa-rakavaia ġetato tarimari guruğari eveito

¹ Maitoma au Paulo tauğegu na nuğagu ma manauna e maranana ġesi ġomi anoğimini. Mai nuğa manau e marana tu Keriso ġenana ġeiagağmani dagarari. Ġomi fakami ai tarima kotari na tu maiğesina ġeğofağofa-iağiguni, ġekirani, au ġomi ġoirami ai tu manau e agarini, a ġomi sevimi na araka-ğerevağini, irau ai atanuni, ġomi tu guruğa gwağigiri e metori atorevinimini, ġetoni.

² Au na ġomi anoğimini, mani ġofağofa guruğari asi boğono ġabi-rağeri, be ġomi asi bana vağa-guruğa gwağigimi au baiağosini nai. Korana au baiağosini nai tu, au atuğamağini, ġai ġeğofağofa-iağimani tarimari tu basi

vaġa-guruġa gwaġiġi-vinirini. Maġeri tarima na ġai ġeġofaġofa-iaġimani tu ġekirani, ġai tu roġo tanobara maġurinai ġatanuni tarimari ġeri veġai ġaiaġoni.

³ Oba, ġai tu moġoni roġo tanobarai ġatanuni, senaġi ġai tu dia mai tanobara tarimari ġevetarini kavana ġavetarini.

⁴ Ġai ġema vetari farefareri tu dia tarimarima ġimari na ġeveirini dagarari. Asigina. Ġai ġema vetari farefareri tu kokore e seġuka baregori, Barau ġenana ġeiaġomani dagarari. Maġeri na ġavetari-vinirini seġukari ema iaunegari baġa vaġa-rakavarini riba.

⁵ Ma maġeri vetari farefareri na Barau ema ġena riba ġekoukou-ġaurini veġare-veġareri e veġari mabarari ġavaġa-rakavarini. Ema tarimarima ġeri tuġamaġi irauirauri mabarari ġakira-fitoġarini. Ma tarimarima ġakirarini, ġeri tuġamaġi tu Keriso moġo beġene korana-iaġia.

⁶ Ma ġomi mabarani na Keriso moġoni boġo korana-iaġi korikoriani, moġa murinai vauro ġai na mani ġeseġafore-foreni tarimari ġeri rakava voiri metori baġa vinirini riba.

⁷ Ġomi tarimarima tu tauġanina vetoġana ġereġana moġo ġoġitaiani. Bema tarima ta tauġena evekiragini, ġia tu moġoni Keriso ġena tarima korikori nai tu, bene riba, ġai maki Keriso ġena tarimarima ġia kavana.

⁸ Au tu Vereġauka na maoro e seġuka eviniguto, ġomi ġemi maġuri e veġabadadama bana vaġa-ruġa gwaġiġiri ġana, a dia bana vaġa-rakavari ġana. Ma au mai ġauvei aveiani nuġanai, havekokorokuni tu asi bemaiaak-agnuni.

⁹ Au tu asi aurani ġomi iniġesi boġono tuġamaġi, au na ġomi tu vevaġa-gari fefari moġo atore-vinimini.

¹⁰ Au moġesi akirani, korana tarima kotari ġekirani, “Paulo na fefa etorerini nai, guruġa tu baregori e ma seġukari etorerini, senaġi ġia tauġena ema fororini ġita ġerai, ġia ġitaġitana tu asi garina e ġena guruġa maki asi guguraġiri, ema asi mamiraġiri maki.”

¹¹ Maniġesina ġeguruġani tarimari tu beġene riba-maoro, ġai irau gabu na fefa kamasi ġatore-iaġosini vetoġari ema mami-raġiri aiġesi, ġai baġasi fororini tauġanima korikoriri ai, ġema veġa o ġauvei seġukari ema guruġari maki moġesi moġo ilaila, fefai ġomami-raġirini kavana.

¹² Ġai mani tauġeri moġo ġevevaġa-raġeni tarimari ġesi tu asi baġa vevaġa-vetovoni, ema ġai ġema ġauvei maki ġia na kara ġeveiani ġauveina ġesi asi ilaila ġauvei sebonai baġa kiraġiani. Asigina ġinavaġi. Maniġeri tarima tu tauġeri moġo ma ġevevaġa-vetovoni, karori tari ġeri riba e veġa ġesi. Ema ġia tu tauġeri moġo ta evariġisini, tauġena ġena veġa karona ta ġenai evaġa-ilailaiani. Ġia maniġesi ġeveini tauna korikori, ġia tu moġoni asi iaunegari.

¹³ Senaġi ġai tu Barau na evinimato maorori e gaburi makari, moġeri nuġari ai moġo baġa vekokoroku-iaġirini. Ma ġomi mani ġotanuni tanona maki Barau na ġai evinimato tanona makana nuġanai.

¹⁴ Barau na ġai maoro evinimato, ġomi mani ġotanuni tanona maninai, Vari Namona baġa vari-fuani e baġa vevaġa-riba-iaġiani. Moġesi naima maninai ġaġauveini vekokorokuna ġaveini tu ġamaoroni, korana ġai tu ġomi ġemi ai ġasi-raġasito. Moġa lorinai ġomi mani ġotanuni maniġa tu, ġai ġema ġauvei tanona nuġanai, korana tu ġai na Keriso ġena Vari Namona maninai ġasi-ġwa-raġasiato.

¹⁵ Ĝai tu Barau na evinimato tanori e maorori asi ĝavanaĝirini. Ema ĝai tu dia tarima boruri na ĝauvei ĝeveiato vekokorokuri ĝaveirini. Asiĝina. Ĝomi tu Keriso Varina Namona tu ĝai na ĝavaĝa-ribamito. Ma ĝai ĝema tuĝamaĝi baregona tu, ĝomi ĝemi veĝabidadama bebarego-iaĝoni, benamo ĝai ĝema ĝauvei ĝomi vekaravami ai maki bebarego-lelevaĝini.

¹⁶ Moĝa murinana tu mani gabu maninana, tanobara kotari ĝana ma baĝa iaĝoni, monai Vari Namona ma baĝa ĝobata-iaĝiani. Korana ĝai tu asi ĝaurani, tarima tari na varau ĝeĝauvei-iaĝirito gaburi, ĝai na baĝana vekokoroku-iaĝiri.

¹⁷ Buka Veaĝa ekirani, “Bema tarima ta eurani bene vekokoroku nai tu, Vereĝauka moĝo bene veiavi-iaĝia.”

¹⁸ Korana dia tauĝeri ĝevekiraĝi-varaĝe varaĝeni tarimari Barau na evaĝa-moĝoniani. Asiĝina. Vereĝauka na evaĝa-raĝeani tarimana moĝo, Barau na evaĝa-moĝoniani.

11

Paulo ema apostolo ĝofaĝofari

¹ Au ĝegu ura sebona tu, au ĝegu guruĝa babori kota roĝo boĝoro seĝaĝiri e boĝoro ĝabi-raĝeri. Mani ĝemi veĝa ĝoĝabi-raĝegu.

² Au ĝegu ura barego vedaureana ĝomi tu Keriso nuĝanai moĝo boĝono tanu, ma Barau ĝena ura baregona ĝomi ĝemi ai maki moĝesi. Au tu moĝa dainai ĝomi ĝemi ai amamani, mai tu Barau na eĝabi-raĝeani mamana. Au na ĝomi tu tau sebona moĝo ĝana akira-kaumito, mo tu Keriso. Moĝesi naima au na ĝomi anari-ginikaumini. Korana au ĝegu ura tu, Keriso ema ekalesia ĝeri veĝaraĝo ĝaronai, ĝomi tu noĝa ĝuiato ta futua ta ĝesi asi ekimakarato ĝuiatona kavana, namo vedaurea e vinuba, ĝaraĝori Keriso ĝoirana ĝana bana tuĝu-kavimi.

³ Senaĝi au tu agarini, korana mota na ĝena ĝofaĝofa iaunegari na Eva eĝofaiato, benamo Barau ĝena guruĝa asi ekorana-iaĝiato kavana, boĝo veini garina. Ĝomi maki ĝofaĝofa guruĝari na ĝemi tuĝamaĝi beĝe vei-veĝonurini, benamo Keriso ĝokorana-iaĝi korikoriani maĝurina na boĝo raka-veĝitani.

⁴ Au na ĝomi agari-vinimini anina tu maiĝa, bema tarima ta eiaĝosini, benamo ĝomi ĝemi ai Keriso boruna ta eĝobata-iaĝiani, dia ĝai na ĝagobata-iaĝiato Kerisona; o iauka boruna ta ma ĝoĝabia ĝetomini, dia ĝai na ĝomi iatami ai ĝimama ĝatore-kaurito, benamo ĝoĝoitaĝoato Iauka Veaĝana; o Vari Namona boruna ĝemi ĝeĝobata-iaĝiani, dia ĝai ĝemana ĝoseĝaĝiato ma ĝoĝabi-raĝeato Vari Namona neganai, ĝomi na moĝeri tarima tu ĝoseĝaĝirini, ma ĝeri guruĝai ĝoĝabi-raĝerini moĝo.

⁵ Senaĝi au atuĝamaĝini, mani ĝevekiraĝini apostolo irauri veĝata barego lelevaĝiri ĝetoni tarimari na, au tu asi ĝevanaĝiguto.

⁶ Aba, au guruĝa-ĝitaĝita dabarana tu asi aribaiato, senaĝi riba au ĝegu ai tu etanuni. Ma maiĝa tu dabara mabarari nuĝari ai ĝemi ai ĝavaĝa-fofori ginikaaurito.

⁷ Ĝomi ma ribami, au na ĝomi ĝemi ai Barau ĝena Vari Namona aĝobata-iaĝiato tu asi voina, be mo ĝauvei voina ĝomi na tu asi ĝoviniguto. Ma mo maĝuri aveiato tu, au tauĝegu avetore-variĝoto, ĝomi bana tore-varaĝemi uranai. Ma ĝomi ĝotuĝamaĝini, mo veĝa au na aveiato tu avei-rakavato, ei?

⁸ Ĝomi Vari Namona avaĝa-ribamito-ĝoi ĝauveina voina tu, ekalesia doĝorori tari na ĝeviniguto-ĝoi, noĝa moĝo alemarito-ĝoi.

⁹ Ma au ġomi ġesi tatanuto-ġoi nuġanai, dagara kotari aurato-ġoi nai, au na ġomi tu asi авага-доге ганиганимито-ġoi. Korana tu tarikaka tari, Makedonia na ġeiaġomato tarimari, ġia na aura-vinirini dagarari ġemavinigoto. Au tu ġomi вага-доге-ганиганими маġурина ta asi aveiato. Moġesi moġo bavei-iaġoni, asi bavaġa-доге ганиганимини.

¹⁰ Keriso ġena guruġa moġonina tu aribaiato, ma nuġagu ai etanuni. Moġesi naima au baveiavini nai tu, mai Akaia tanona nuġanai etanuni tarimana ta asi bekira-ġoiguni riba.

¹¹ Au na mai veiġa aveiani tu, ġomi asi aura-vinimini nai ba? Moġoni, Barau ma ribana au na ġomi tu auravini-baregomini.

¹² Ma ġomi na au moni e farefare na asi boġono вага-kavagu atoni veiġana tu, roġo bavei-iaġoani-ġoi. Mai veiġa aveiani korana tu, mani apostolo ġofaġofari manġeri beġene fofori-ginikau ġana. Mai tu noġa ġia kwakuri ai ġeruġa-taġoni tanona gaburena akwaiiani, beġene fana-kafua, benamo beġene keto-ġura, ma monana ġomi boġono riba-korikori, ġia tu moġoni dia ġai ġesi ġauvei sebona ġaveiani. Korana ġia na kara ġeveiani tu ġeveiavi-iaġiani, ġeri ura ġomi na boġono вага-moġoniri, boġono kira, ġia tu moġoni ġai ġesi ġauvei sebona moġo ġaveiani boġonosi ġana.

¹³ Manġeri tarima tu apostolo ġofaġofari, ġauvei ġofaġofari ġeveirini. Ġia manġeri tu tauġeri moġo ġevekiragini, Keriso ġena apostolo ġetoni, senaġi mani tu ġeġofaġofani, ġia tu dia Keriso ġena apostolo korikoriri.

¹⁴ Mani veiġa maninana au nuġagu tu asi efarevaġini, korana Satani tauġena maki vetoġana ekefoani, noġa Barau ġena mama aneruna noġa moġo eveini, benamo tarimarima eġofarini.

¹⁵ Moġesina naima Satani ġena vetuġunaġi ġeiaġo-vinini tarimari maki tauġeri moġo tarimarima ġoirari ai beġe vekiragini, ġia tu Barau ġena vetuġunaġi tarimari. Ġia tu Barau na vau ġeri veiġa voiri bevinirini.

Paulo na ġena apostolo ġauveina ġaramanai midigumidigu barego eġabiato-ġoi

¹⁶ Mo guruġa ma akiraġi-ġoiani. Tarima ta asi bene kira au tu babo. Senaġi bema ġomi na au boġo kira-baboguni nai tu, babo tarimari ġoġabi-raġerini e ġoseġaġi-vinirini kavana, au maki boġono ġabi-raġegu e boġono seġaġi-vinigu, be au maki kota bana vekokoroku.

¹⁷ Mai kara akiraġiani tu, dia Vereġauka na maoro eviniguni nai, maiġesi ġena guruġa na aiāġoni. Asiġina. Mai tu naveiavi uranai, babo tarimari ġeri veiġa na aiāġoni.

¹⁸ Korana tarima ġutuma tu tanobara maġurinai ġetanuni tarimari ġeri vekokoroku na ġeiaġoni. Moġesi naima au maki baveiavini.

¹⁹ Ġomi na mani babo tarimari ġeri vevaġa-riba ġoġabi-raġerini e ġoseġaġirini, korana ġomi tauġemi moġo ġoveġita-tarini, benamo ġokirani, "Ġomi tu moġoni ma iaunegami," ġotoni.

²⁰ Moġoni, ġomi tu tarima ta ġomi ġemi ai eiaġosini, benamo ġena tuġu-rakaorakao tarimami ai evaġa-iaġomini, o ġemi-ġami everari-verari vaġirini, o kara eura-vinirini dagarari tu ġomi ġemina eġabini moġo, e tauġena moġo evetore-varaġe varaġeni, ema ġoirami eforo-bubuġaurini, mo tu ġena veiġa na e guruġa na, tarimana tu ġoġabi-raġeani ema ġoseġaġiani maki.

²¹ Au tu nakira emaiakaguni, korana ġai nuġama tu asi gwaġiġi, be maiġeri veiġa ġomi ġemi ai tu asi ġaveirito-ġoi.

Bema tarima ta ġia na eveirito veġġari eveiavi-iaġiani nai tu, au maki au na aveirito veġġari bavekokoroku-iaġiani riba. Au maiġesi aguruġani tu, babo ġeri guruġa na aiagioni.

²² Ġia tu Heberu tarimari ġetoni, ei? Au maki Heberu tarimagu. Ġia Isaraela besena ġetoni, ei? Au maki Isaraela besena. Ġia Aberahamo tubuna ġatana ġetoni, ei? Au maki Aberahamo tubuna ġatana.

²³ Ġia Keriso ġena vetuġunaġi ġeiaġo-vinini tarimari ġetoni, ei? Au na Keriso vetuġunaġina tu nuġagu e tauġanigu mabarabarana ġesi Keriso vetuġunaġina aiagio-viniani. Au tu ababoni, maiġeri guruġa akiraġirini, senaġi ġomi na roġo ġolaunaġi-naġiguni naima maiġesi aguruġani. Au tu avekwaragi-lelevaġito, a ġia tu asiġi; ġaro vovoka ġediburaguto, ġekwari-rakava rakavaguto, ema ġaro ġutuma dori amaseto-ġoi.

²⁴ Iuda tarimari na vaġa-40 ġevekwari-iaġiani varona na tauġanigu ai vaġa-39 veġata ġekwariato.

²⁵ Vaġa-toitoi oro kwarina na ġeribiguto, vaġa-sebona fore na ġetakiguto, vaġa-toitoi davara nuġanai au araġeto boutina eġwa-kirakiraiato, be dori amaseto, ma ġaro ta tu davara boġi vinubana ta e ġaro vinubana ta arei-iaġiato tuba ta iatanai.

²⁶ Au tu gabu sebonai moġo asi atanuni, vanaġivanaġi gabu boruri na arakanaġi-rakanaġini, Keriso Varina Namona avari-fiuani. Ġaro tari ai tu ġarukai dori areini, ma ġaro tari ai tu seġafore tarimari na vefakari ai araka-ġurani, ma ġaro tari ai tu ġegu tanobara tarimari korikori na dori ġevaġiguni e ġevaġa-rakavaguni, ġaro tari irau bese tarimari na dori ġevaġiguni; ma ġaro tari vanuġa barari ai meto barego araka-ġoitaġorini, ma ġaro tari tu tano fakana nuġanai meto barego aġoitaġoni, ma ġaro tari tu davara nuġari ai dori amaseni; ma ġaro tari tu ġevetarikaka-ġofaġofani tarimari na ġevaġa-rakavagu ġetoni.

²⁷ Ġauvei metori aveini e avekwaragi-rakavani, boġi ġutuma asi agenani; avito-maseni, ananu-maseni; ġaro vovoka tu ġaniġani aruġarini, korana aġani-veaġani bene, ma ġaro tari asi ġegu dabuġa, kefigu kori moġo, be enaġureguni.

²⁸ Ma maiġeri dagara ġutuma ma bakiraġirini riba; senaġi iniġa moġo nakiraġia: Ġaro vanaġivanaġi rubu mabarari gabu tatai ġetanuni anuġa-vekwaraġi iaġi-baregorini.

²⁹ Ekalesia ta Iauka rekenai emoirani nai tu, au maki ġia ġesi amoirasebonani. Ma ekalesia ta tarima ta na eġori-veġonuani, benamo rakava eveini nai, au tu abaru-rakavani.

³⁰ Bema au asi ġegu dabara ta, ma navekokoroku batoni nai, au tu ġegu moira ġevaġa-ġorarini gaburi moġeri moġo bavaġa-veiavirini.

³¹ Ġita ġera Vereġauka Iesu Keriso Tamana Barau ma ribana au tu asi aġofaġofani. Barau bitana vaġa-raġea mo vanaġivanaġi.

³² Damaseko ai atanuto-ġoi nai tu, Kini Areta ġena gavana na vetari tarimari ekirarito, vanuġa barana maġuna mabarana beġene nari-ġaua, au beġene ġabi-tarigu ġana.

³³ Senaġi au tu tarikaka tari na boseġa baregonai ġevaġa-tanu-ġuraguto, benamo vanuġa maġuna windoana na varoseina ġetuġu-rigoguto, benamo mo gavana ġimana na araga-maġurito.

1 Vekokoroku ai tu kara namona ta asi badoġariani, senaġi baveiavini roġo. Mata-vanaġi ai Vereġauka na evaġa-foforirito dagarari aġitarito ema aseġaġirito guruġari roġo nakiraġiri.

2 Au tarima ta Keriso nuġanai ma ribagu; ġia tu Barau na eġabi-varaġeato guba vaġa-toitoina ġana. Mo veġa eġorato negana na beiaġoma mo inıtoma tu laġani gabanana vasivasi (14). Mo tau guba vaġa-toitoina ġana tu iaukana roġo tauġanina nuġanai, o iaukana tauġanina na eveġitato, ma iaukana ġereġana moġo eġabi-varaġeato, moġa tu au asi ribagu, a Barau ġereġana moġo ma ribana.

3 Mo tarima au tu ma ribagu. A mo tarima tu iaukana roġo tauġanina nuġanai o iaukana tauġanina na eraka-veġitato vau mo maġuri eġorato, moġa au tu asi ribagu, senaġi Barau ġereġana moġa ma ribana.

4 Mai tarima akiraġiani maġa tu, paradaiso ġana eġabi-varaġeato. Benamo monai dagara tari ġita na asi ilaila bita kiraġi-fofori ginikaurini, ema dagara ta ġesi maki asi bita vaġa-vetovorini dagarari, Vereġauka na ekiraġirito, eseġaġirito. Moġeri dagara tu tarima ta na asi ilaila bekiraġi-foforirini dagarari.

5 Au na tu moġesina tarimana ġereġana moġo bavaġa-veiaviani. A au tauġegu tu asi bavekokorokuni, au tu ġegu moiramoiira gaburi moġeri baveiavi-iaġirini, (korana tu moġeri dairi ai tarima na asi ġevaġa-raġeguni).

6 Au navekokoroku barasi maki, au tu dia babo ġeri veġa na bara iaġo, korana au tu guruġa moġoniri moġo bara kiraġiri bene. Senaġi au tu asi veġata aurani moġeri bana kiraġi-rosiri, korana asi ġegu ura moġeri dairi ai, au tarimarima na beġene tuġamaġi-varaġe varaġegu. A au aurani tu, kara aveiani maġa, tarimarima na beġene ġitaia vauro beġene riba-maoro, au tu tarima kamasigu.

7 Au tu Vereġauka na dagara iaru-korokorori evaġa-foforirito, benamo aġitarito e aseġaġirito, senaġi moġeri bakuri ai au tauġegu bavekiraġi-varaġe varaġeni garinati tu, Barau na midigumidigu ta au tauġanigu ai etoretoġaiato. Moġa tu noġa ġini masikona ta au viriġogu nuġanai etanuni. Mo ġini masikona moġa tu iauka rakavana ta. Ġia tu Satani ġena vetuġunaġi eiāġo-vinini iaukana, au bene vaġa-midigu midigugu, benamo au asi bana vekiraġi-varaġe varaġe ġana au ġegu ai etanuni.

8 Vereġauka tu vaġa-toitoina veġata anoġiato, mai Satani ġena vetuġunaġi-iaġovini iaukana au ġeguna bene koki-vaġia ġana.

9 Senaġina Vereġauka na maġesina ekiraguto, “Au ġegu namo e varevare-barana ġereġana moġo dagara baregona ġoi na oura-viniani, korana au ġegu seġuka tu moiramoiira tarimana ġenana vauro efofori-korikorini.” Moġesina naima au na tu ġegu moiramoiira gaburi moġeri moġo baveiavi-iaġirini, Keriso ġena seġuka au ġegu ai bene tanu ġana.

10 Moġesi naima Keriso bakunai ġegu ġavei nuġanai amoiramoirani, o tarima na guruġa e veġa rakavari ġegu ai ġeveirini, o avekvaraġini nai, o ġevaġa-midigu midiguguni nai, o ġegu dabara doko ġarori ai, au tu aiakuni averereni moġo, korana amoirani negari ai tu, kokore barego vedaureana ma aġoitaġoni.

Paulo ġena ura sebna tu Korinto ekalesiana doġorona bene vaġa-kavaia

11 Au tu tauġegu babo ai bavevaġa-iaġo, maġesi aguruġani, senaġi mai dia au tauġegu nuġagu siga moġo maġesi aveini, au ġomi na ġotuġunaġinaġiguni naima, babo ai avevaġa-iaġoni. Au tu ġomi na namogu boġoro kiraġi, senaġi ġomi na au tu ġokure-toġaguni. Aba, au tu moġoni asi aragu, senaġi mani ġemi “apostolo iaru-korokorori” na au tu asi beġe vanaġiguni.

¹² Apostolo korikoriri vetogari tu vevaġa-gwaġiġi ai, vetoga boruri ai, nuġa-farevaġi veigari ai, ema seġuka veigari boruri ai ġevaġa-foforirito ġomi goirami ai, be ġogitarito maniġeri.

¹³ Ġomi tu kamara veigai au na ġomi asi atuġamaġikau-baregomini, ekalesia doġorori kotari atuġamaġikau-baregorini kavana, ei? Asi veigai tai. Asiġina. Au na ġomi tu moġoni, ġomi ġesi tatanuto-ġoi, monai moġo asi aurato-ġoi, au uragu ai boġono vekwaraġi. Benamo moġa moġo. Ma bema mai veigai maigai ġomi na ġoġitaiani asi namo nai tu, benamo anoġimini, ġegu mai vei-rakava boġono tuġamaġi-fitoġaia.

¹⁴ Au toma tu havei-kavi, naiġosi atoni. Mai ma baiaġosini maigai tu ġomi rakaġitami avaġa-toitoiani maigai. Mai ma baiaġosini mainai maki, asi ma bavaġa-vekwaraġimini, korana au tu dia ġomi ġemi farefare e moni urari na baiaġosini, asiġina, au tu ġomi moġo urami na baiaġosini. Au na ġomi maigesi aveimini tauna korikori tu maigai, dia natu na tama sina ġeri farefare e moni etore-ġerevaġirini. Asiġina. Tama sina na naturi ġeri farefare e moni ġetore-ġerevaġirini.

¹⁵ Moġesina naima au baiaġosini nai, ma iakugu ġesi, kara ġegu ai maigari mabarari ġomi bavinimini, ema au maki nuġagu mabarana ġesi bavinimini, ġomi bana vaġa-kavami ġana. Bema au na ġomi tu auravini-baregomini, karase nai ġomi na au tu asi ġouravini-baregoġuni?

¹⁶ Kotari na maki ġevaġa-moġoniguni, au ġomi tu asi avaġa-vekwariġimito-ġoi, senaġi maigesi ma ġekiraġuni. Au tu iaunega rakavarakava, be au na ġomi ġemi ai moni tu ġoġaġofa dabarari tari na aġabirito-ġoi ġetoni.

¹⁷ Be mo tarima tari ġomi ġemi ai atuġu-iaġosirito, moġeri tu akirarito, ġomi ġemi ai au ġegu moni maki beġene gogo atato ba?

¹⁸ Au na Tito anoġiato, ġomi beneasi raka-ġitami atato nai tu, ġita tarikakara ta maki atuġuato, be Tito ekavaiato, ġeiaġosito. Ma Tito eiaġosito nai tu, ġomi ġemi moni easi ġoġaġofa-iaġirito, ei? Tito ema au tu iauka sebona nuġanai moġo ġaġauveini, ema dabara sebona na moġo ġaraka-iaġoni.

¹⁹ Ba ġomi vanaġivanaġi ġotuġa-maġini, ġai tu bakuma ġabiġauri guruġari ġomi ġemi ai ġakiraġini ġotoni, ei? Moġoni, ġai tu Keriso nuġanai ema ġai kara ġakiraġirini tu Barau ġoiranai ġaguruġani. Au na aura-vinimini tarimami, ġoseġaġi, ġai na mai kara ġaveirini dagarari mabarari maigari tu ġomi boġono kokore uranai ġaveirini.

²⁰ Au tu agarini, korana au basi-raġasini nai, ġomi tu dia au na auravirinini veigari ġovei-tanurini basi-ġoitaġomini, benamo ġomi na ġouraviniani veigana au ġegu ai asi boġo doġariani garina. Au agarini, ġomi tu roġo ġovevaneni, ġomamani, ġovebaru-vini rakava-rakavani, ġomata-ġaniġanini, karomi guruġa asi namori ġovinirini, ġoverori-toreni, ġoveiavini, nuġami e ġemi tuġamaġi dia gabu sebonai, senaġi irauirau.

²¹ Ma au agarini, au basi-votuni nai tu, au ġegu Barau na au bevaġa-maikaguni ġomi goirami ai, benamo matagu gorari beġe riġoni, korana ġevei-rakavato tarimari tu asi ġevetuġamaġi-kureto veigai rakavari ġerina, kima maġurina na ema mata-boraġa veigari na. Maigari veigai ġerina ġia ġevemiro-fatafatani.

¹ Mai tu vaġa-toitoina au ġomi ġemi ai mai aiaġosini. Ma Buka Veġai ekirani kavana, “Tarima ruarua o toitoi na beġe vaġa-moġonirini guruġari tu moġoni korikori.”

² Au vaġa-ruaruana ġomi asi-raka-ġitamito nai tu, ġevei-rakavani tarimari e tarima kotari maki au na akira-toreġaurito, au na kara baveiani au baiāgosini nai. Ma maitoma tu au manāġai roġo mai-ġegu nuġanai, ma avaġa-guruġamito kavana ma akira-toreġaurini. Bema au ma baiāgosi-genogoini nai, deikara roġo rakava veġari evei-tanuni tarimana tu, gwaina asi basi-ġabiani, ġena vei-rakava voina metona baviniani.

³ Korana ġomi ġemi ura tu boġono vaġa-moġonia veġata, Keriso tu moġoni au ġeguna eguruġani ba asiġina. Goseġaġi, Keriso ġomi ġemi ai tu asi emoirani, asiġi. Ġia kara ġomi fakami ai neveia betoni seġukana tu barego lelevaġi.

⁴ Aba, Keriso, mo tu tauġanina ġena moiramoira lorinai, satauro tuġunai ġeikoko-kauato, benamo emaseto, senaġi ġia initoma tu Barau ġena seġukai emāġuri-tanuni. Iesu Keriso nuġanai ġai maki tauġani ai tu moiramoira Iesu kavana, senaġi Barau ġena seġukai ġamaġuri-tanuni Keriso ġesi. Ema ġomi ġemi ai ġai na kara baġa veiani tu mai Barau ġena seġukai.

⁵ Ġomi tauġemi nuġami ema ġemi maġuri boġono ragaġi-ġinikauri, ġomi tu moġoni ġoveġabidadamani ba asiġina. Gomi tauġemi ġemi maġuri na ema ġemi veġa na boġono vevaġa-fofori korikori! Ba ġomi tauġemi tu asi ġoriba-maoroni, Keriso Iesu tu ġomi nuġami ai etanuni ba? Bema moġoni tauġemi ġovetovo-naġini, benamo ġoribani, Keriso tu dia ġomi nuġami ai, monai vauro ġomi tu moġoni asi ġoveġabi-dadama-korikoroni.

⁶ Au moġoni aribani, ġomi tauġemi na ġai boġo riba-maoromani, ġai tu moġoni Keriso vetuġunaġina ġaiāġo-vinini, a dia Barau na asi evaġa-moġonimato tarimama.

⁷ Ma ġai ġema ġauġau ai Barau ġanoġiani, ġakirani, ġomi bene vaġa-kavami, be veġa rakavana tu asi boġono veia. Ġai tu dia ġaġurigurini, ġakirani, tarimarima na ġai vetovo-naġi ai ġakokoreto, moġa beġene ġitaia ġatoni. Asiġina. Au ġegu ura ġomi tu vei-iobuka-iobuka tarimami ai boġono iaġo. A tarima-rima beġe kirani, ġai tu ġaketoto beġe toni, moġa ġai na tu asi ġatuġa-maġiani.

⁸ Korana tu ġai na guruġa moġonina kouġauna veġana ta tu asi ilaila baġa veiani, a ġai na tu guruġa moġonina moġo baġa vaġa-foforiani.

⁹ Ġai ġamoirani nuġanai, ġomi ġokokoreni tu, ġai ġema iaku ebaregoni. Ema ġai ġema ġauġau baregona ġaveiani tu, ġomi boġono kokore-korikori ġemi veġabidadamai.

¹⁰ Moġesina naima mai fefai maġeri guruġa atore-vinimini, au mainai roġo maġegu nuġanai. Korana au asi aurani, au banasi-raġasi nai tu, ġomi bana vaġa-guruġa gwaġiġimi. Korana Vereġauka na au mai maoro baregona eviniguto tu, ġomi ġemi veġabidadama bana vaġa-kokoreri, a dia bana vaġa-rakavari ġana.

Veġabituġu dokona

¹¹ Tarikakagu, ġegu guruġa magona tu maiġa, boġono gena. Tuġamaġi barana ġoirami ai boġono torea tu, boġono namo-vedaurea, ġegu guruġa mabarari boġono korana-iaġiri. Nuġami beġene gwaġiġi, mabarabarami tuġamaġi sebona moġo boġono ġabia, maino ai boġono tanu, ema veuravini e maino Barauna ġomi sevisevimi ai bene tanu.

¹² Karomi tata vetarikaka verauna na boḡono vaḡa-namori.

¹³ Veḡa o ekalesia tarimari mabarari na ḡeri vevaḡa-namo ḡemi ai ḡetuḡu-iaḡosiani.

¹⁴ Vereḡauka Iesu Keriso ḡena namo e varevare-bara ema Barau ḡena veuravini ema Iauka Veḡa ḡena vekako namona, ḡomi mabara-barami iatami ai bene tanu.

PAULO ĜENA TORETORE GALATIA EKALESIARI ĜERI

Galatia vaĝa-foforina guruĝari

Paulo na mai fefa tu betaĝu Antioka, Efeso o Makedonia ai etanuto-ĝoi nuĝanai etoreato. Mai tu laĝani 48 ema 58 fakari ai ta etoreato. Mo tu Iesu maki emaseto murinai vau. Ĝia ĝena guruĝa baregori mai fefa nuĝanai tu karoa 2:19-21; 3:2-3; 3:11; 5:1 ekiraĝirito.

Paulo na mai fefa etoreato korana tu Iuda tarimari tari ĝe-ekalesiato moĝeri na Galatia ekalesiari vevaĝa-riba kerereri ĝevinirito-ĝoi naima. Ĝia ĝekirato-ĝoi, tarimarima tu Mose ĝena taravatu guruĝari beĝe korana-iaĝirini vauro vevaĝa-maĝuri korikori beĝe goitaĝoani. Moĝesi naima evaĝa-guruĝa gwaĝiĝirito, ekirarito, maĝuri ema vei-iobukaiobuka tu veĝabidadama ĝereĝana ĝenana moĝo Barau ĝena namo ema varevare-bara nuĝanai bita ĝabiani, a dia ĝera ĝauvei e veĝa ĝerina. Ema ekirarito, ĝita tu Keriso ĝena mase na taravatu ĝena seĝuka na eruĝa-vaĝirato, ema ĝita tu lauka Veaĝa varau taĝabiato, be lauka na bene ĝori-kaura.

Paulo na ĝena fefa tu maĝesi eboiĝaiato:

1. Paulo tauĝena na Vari Namona guruĝana ekiraĝiato - karoa 1-2
2. Vevaĝa-maĝuri tu taravatu ĝenana ba Barau ĝena namo e varevare-bara ĝenana eiaĝomani - karoa 3-4
3. Veĝa rakavari ĝerina bitana raka-faka ba roĝo bitana veiri - karoa 5-6

¹ Au Paulo, apostolo tarimagu na mai fefa tu ĝomi Galatia nuĝanai ekalesia doĝoromi ĝemi atore-iaĝosiani. Au tu dia tarimarima ĝeri urai mai ĝauvei aveĝiani, e dia tarima ta na etuĝuguto, mai apostolo ĝauveina bana veia etato. Asiĝina. Au tu Iesu Keriso ema Tamara Barau na etuĝuguto nai, mai apostolo ĝauveina aveĝiani. Iesu Keriso tu Barau na mase na ma evaĝa-variĝisi ĝenoĝoiato.

² Ĝegu vevaĝa-namo tu tarikakara mabarari au ĝesi mainai ĝatanuni ĝesi, ĝomi Galatia nuĝanai ekalesia doĝoromi ĝemi ĝatuĝu-iaĝosiani.

³ Barau ĝita Tamara ema Vereĝauka Iesu Keriso ĝerina namo e varevare-bara ema maino ĝomi ĝemi ai bene tanu.

⁴ Iesu Keriso na ĝita ĝera Barau ema Tamara ĝena ura ekorana-iaĝirito, ĝia tauĝena ĝena maĝuri ĝita ĝera rakava dainai etore-tariato. Mo veĝa eveĝiato anina tu, ĝita toma mai tanobarai etanuni rakavana ĝenana bene vaĝa-maĝurira uranai.

⁵ Tamara Barau arana bitana vaĝa-raĝea vanaĝivanaĝi! Amen.

Vari Namona tu sebona kwarigutu moĝo

⁶ Ĝomi na mani maĝuri boĝo veia nai, au tu badaradara-rakava moĝo. Korana ĝomi tu Keriso ĝena namo e varevare-bara lorinai, Barau na ekeamito, ĝena tarimarimai boĝono iaĝo ĝana. Ma nuĝanai ĝomi tu asikauna ĝia ĝenana ma boĝo ragaraka-veĝita, benamo vari boruna ta ma boĝo ĝabi-raĝea.

⁷ Mani vau boĝo ĝabi-raĝea maniĝa tu dia Vari Namona. Asiĝina ĝinavaĝi moĝo. Ĝomi mani tu moĝoni, tarima kotari na ĝeĝofa-veĝonumini. Ĝia ĝeurani tu, Keriso Varina Namona beĝene vei-veĝonua veĝata ĝetoni.

⁸ Senaĝi ĝai na ĝomi tu Keriso Varina Namona moĝo ĝemi ĝaĝobata-iaĝiato, ma vari boruna ta tu asiĝina. Bema ĝai o guba aneruna ta vari

boruna ta ġemi ma baġa ġobata-iaġiani nai, dei moġesina beveini tarimana tu, rakava baregona ġenai betanu-vanaġi vanaġini.

⁹ Mai guruġa tu bita kiragġa, senaġi au na mai akiragġi-ġenoġoiani. Bema tarima ta na ġemi ai “Vari Namona” easi-ġobata iaġiani, senaġi ġia na eġobata-iaġiani varina tu mo ġoġabi-raġeato varina moġa ġesi asi ilaila nai tu, mo tarima ġenai rakava metona baregona bene tanu-vanaġi vanaġi.

¹⁰ Au maiġesina aguruġani tu, tarimarima na beġene ġabi-raġegu ġana, ba Barau na bene ġabi-raġegu? Ba mai tarimarima iauri navaġa-namori ġana aguruġani? Bema tarimarima iauri initoma maki roġo navaġa-namori barasi, au toma Keriso ġena vetuġunaġi ai tu asi bara iaġo.

Paulo apostolo tarimanai iaġoto varina

¹¹ Tarikakagu mabarami, au na ġomi avaġa-guruġa korikorimini. Mo Vari Namona na ġomi ġemi ai aġobata-iaġiato, moġa tu dia tarima ta ġenana erefo-taġuito moġo varina.

¹² Mai Vari Namona maigġa, au na tu dia tarima ta ġenana aġabiato, ema dia tarima ta na evaġa-ribaguto. Asigġina ġinavaġi. Mai Vari Namona maigġa tu Iesu Keriso tauġena na ġegu ai evaġa-foforiato vau aribaiato.

¹³ Au guinenai luda ġeri doġoro nuġanai atanuto-ġoi nai, kara aveirito-ġoi variri tu ġoseġaġirito, be ġomi ma ribami. Barau ġena ekalesia doġorona aiġesi avaġa-midigu midigurito-ġoi e alai-lausilausirito-ġoi bana vaga-rakavari veġata atato-ġoi variri tu ma ribami.

¹⁴ Au na Iuda seneri ġeri maġuri mabarabarari akorana-iaġi ginikaurito-ġoi. Ma au na mai maġuri aveiato-ġoi nuġanai tu, Iuda tarimari au ġuru karogu tauri mabarari au na aguine-iaġirito-ġoi.

¹⁵ Senaġi au tu roġo sinagu legana nuġanai, Barau na eġabi-virigiguto, ema ġena namo e varevare-bara lorinai ekeaguto, ġia ġena ġauvei bana veia etato. Benamo Barau na eura-viniato ġaronai,

¹⁶ Natuna au ġegu ai evaġa-foforiato. Keriso au ġegu ai, Barau na evaġa-foforiato, anina tu, ġia eurato, au na Natuna Varina Namona irau bese tarimari ġeri ai bana ġobata-iaġia ġana. Barau na Natuna ġegu ai evaġa-foforiato nai tu, tarima ta ġenai asi ma avedanagġito.

¹⁷ Ierusalemna ġana ġeapostolo-guineto tarimari ġeri ai vedanaġi maki asi avaraġeto. A au mo veigġa aġoitaġoato murinai tu, maoromaoro Arabia ġana iaġoto. Ma monana ma aġenogoi-iaġoto Damaseko ġana.

¹⁸ Monai, laġani toitoi (3) ġevanaġito murinai vau, Ierusalemna ġana avaraġeto, Petero ġesi baġana guruġa-guruġa uranai. Petero ġesi Ierusalem-ai ġaro gabanana imaima (15) ġatanuto.

¹⁹ Au mo negai apostolo boruna ta tu asi aġitaiato. Au tu Vereġauka tarina Iakobo (o Iames) moġo aġitaiato.

²⁰ Barau ġoiranai au na ġomi mai tu guruġa moġoniri atore-vinimini, asi aġofaġofani.

²¹ Ierusalemna araga-kwaneato tu, Siria ema Kilikia tanori ġana iaġoto.

²² Keriso ġena tarimarima, Iudea tanonai ġetanuni ekalesiari, au ġitaġitaġu ġia tu asi ribari.

²³ Senaġi ġia na au tu varigu korina moġo maiġesi eragato ġeseġaġiato-ġoi, ġekirato-ġoi, “Gita guinenai evaġa-midigu midigurato-ġoi e elai-lausilausirato-ġoi tarimana, toma tu nevaġa-rakavaia etato-ġoi veġabidamana ma eġobata-iaġiani.”

²⁴ Benamo Barau na kara au ġegu ai eveiato, moġa ġeseġaġiato nai tu, Barau ġevaġa-raġeato.

2

Apostolo tarimari na Paulo ġena ġauvei ġevaġa-moġoniatu

1 Laġani gabanana vasivasi (14) ġekorito murinai vau, Banabas ġesi Ierusalemata ġana ma ġaġenoġoi-iaġoto. Tito maki au na aġori-kauato, be ġia maki ġaiaġoto.

2 Au tu Barau na ġegu ai evaġa-foforiatu, naima aiaġoto Ierusalemata ġana. Ma monai Vari Namona, irau bese tarimari ġeri aġobataiatu-ġoi varina, Ierusalemata ekalesia ġeri akiraġiatu. Ma mo Vari Namona tu veġorikau tarimari baregori ġereġari ġeri ai maki akiraġiatu, ġia na ġegu ġauvei beġene vaġa-moġonia ġana; korana aġarito, akirato, asi namo au ġegu ġauvei ġuinena moġa, o mai ġauvei variguna aveirini maġa asi tauri ai beġe iaġoni gariri.

3 Tito tu Grik tarimana, ma au Ierusalemata neganai, ġia tu au ġesi, senaġi ġia tauġanina kefina beġene lama-vaġia ġigiraġena tu asi ġeveito.

4 Senaġi ekalesia o tarikaka ġofaġofari tari ġai fakamai ġerakatoġa-ġairito, ġeurato tu, Tito tauġanina kefina beġene lama-vaġia veġata ġetato. ġia ġai fakamai ġema-rakatoġa-ġairito, korana ġeurato, ġai Keriso Iesu ġesi ġasebonato nai, ġai ġema maġuri namona e fakana maġa, beġene ġitalemaia uranai. Korana ġia ġeri ura tu, Iuda ġeri sene taravaturi na ġai ma beġene barubaruma maia.

5 Senaġi hora misina nuġanai ta maki ġia garori tu asiġina ġinavaġi veġata ġaseġaġirito. ġai moġesina ġaveito tauna korikori tu, Vari Namona guruġana moġonina ġomi rekemi ai bene tanu-vesirigū uranai.

6 Veġorikau tarimari baregori tu ma arari, a asi arari au ġegu ai, ġia tu ilaila moġo. Barau na tarimarima tu dia tauġanina murikana vetoġana eġitaiani. Maniġeri veġorikau tarimari na guruġa ta auna vari iatanai tu asi ġetore-kauato.

7 Senaġi ġeġitaguto, Barau na au ġauvei eviniguto tu, mero tauġaniri kefiru asi ġelama-vaġirito tarimari ġeri, mo tu irau bese tarimari ġeri, Vari Namona bana ġobata-iaġia etato, ilailana Petero mero tauġaniri kefiru ġelama-vaġirito tarimari ġeri ai, mo tu Iuda tarimari ġeri ai, Vari Namona bene ġobata-iaġia etato kavana.

8 Korana Barau Iuda tarimari ġeri apostolo tarimana Petero ġena ġauvei nuġanai eġauveito-ġoi kavana tu, au irau bese tarimari ġeri apostolo tarimagu ġegu ġauvei nuġanai maki eġauveini.

9 Iakobo (o Iames), Petero ema Ioane tu rubu duġuna tarimari monai. ġia na au ġegu ai Barau ġena namo e varevare-bara ġeġita-leaiato, benamo ġimari aroribari na au e Banabas ġeġabi-rukumato. Moġa anina tu, ġia ma nuġari mabarari ġesi ġekirato, Banabas ema au tu irau bese tarimari ġeri ai, ma ġia tu Iuda tarimari ġeri ai beġe iaġoni.

10 Guruġa sebona moġo ġai ġevinimato tu ġekirato, asi ġeri-ġari tarimari baġana tuġamaġiri e baġana vaġa-kavari ġetato. Senaġi mai veġa tu au tauġegu na maki bana veia veġata atoni veġana.

Paulo na Petero ekira-feiato, korana veġa ġofaġofana eveiato nai

11 Petero Antioka ġana eiaġomato neganai tu, au na ġoirana ġutu-ġutunai akira-matana matanaiato, korana ġia na veġa eleaiato nai.

12 Tovotovonai Iakobo na etuġurito tarimari Petero ġenai roġosi roġo beġere laġasi neganai, Petero tu irau bese tarimari ġesi ġeġaniġani vegogoto-ġoi. Senaġi Iakobo na etuġurito Iuda tarimari ġevotuto nai, ġia tu irau bese

tarimari fakari na ma eraka-veġitato. Petero irau bese tarimari fakari na eraka-veġitato, korana mero tauġaniri ġelama-vaġirini veiġana ġekorana-iaġiani tarimari, Iuda tarimari, gariri eveito nai.

¹³ Iuda tarimari kotari maki Petero ġesi ġesebonato, be Petero ġena mo veiġa ġofaġofana ġeveiato. Ma Banabas maki ġia ġeri mai ġofaġofa maġurina na, be ġia maki ġeġofa-daretrato.

¹⁴ Senaġi au ġegu ġitaġitai ġia tu Vari Namona maġurina korikorinai tu asi ġerakato-ġoi naima ġia mabarabarari matari ġutuġuturi ai au na Petero akira-matana matanaiato, akirato, “Ġoi tu Iuda tarimamu, senaġi Iuda tarimari ġeri sene maġurinai tu asi otanuni, a ġoi tu irau bese tarimari ġeri tanu-maġurinai otanuni. Ma kara dainai tu irau bese tarimari ovaġa-naġirini, Iuda tarimari seneri ġeri taravatu lorinai beġene tanu otoni, ei?”

Iesu bevaġa-moġoniani tarimana na moġo, Barau na vei-iobukaiobuka tarimanai bekiraġiani

¹⁵ Aba, ġita Iuda tarimara tu Iuda korikoriri ġerina taġorato. Ġita tu dia irau bese tarimari ġerina taġorato. Irau bese tarimari tu vei-rakava tarimari.

¹⁶ Ma ġita Iuda tarimara tu ribara, Barau na tarimarima tu dia taravatu na ekiraġirini veiġari ġekorana-iaġi ginikaurini nai, ekirarini, asi ġeri vei-rakava etorini. Asigina. Ġia tu Keriso ġenai ġeveġabidadamani naima ekirarini, asi ġeri vei-rakava etoni. Ġita maki moġesi. Keriso Iesu tavaġa-moġoniato naima Barau ekirato, asi ġera rakava etato. Dia taravatu na ekiraġirini veiġari takorana-iaġi ginikaurini dainai. Asigina. Keriso ġenai taveġabi-dadamato nai. Korana tu taravatu ekorana-iaġi ginikauani tarimana ta Barau na tu asigina ġinavaġi beġabi-raġeani. Asigina moġo.

¹⁷ Bema ġita Iuda tarimara tavekwaraġini, taurani, Keriso ġesi bitana sebona, be Barau na bene ġabi-raġera tatoni nai tu, ġita tauġera tavevaġa-foforini, ġita tu vei-rakava tarimara. Moġa anina tu, Keriso eiaġomato vei-rakava benema vaġa-baregoa ba? Asigina ġinavaġi!

¹⁸ Bema au na mo taravatu, asi tauri ai avaġa-iaġorito dagarari, ma navaġa-ruġa ġenoġoiri atoni nai, au tu moġoni vei-rakava tarimagu, taravatu asi akorana-iaġiani.

¹⁹ Korana taravatu akorana-iaġirito-ġoi maġurinai au tu varau amaseto, be taravatu au na asi ma bakorana-iaġi ġenoġoiani. Taravatu akorana-iaġiato-ġoi maġurinai au tu amaseto anina tu, Barau ġena moġo bana tanu uranai.

²⁰ Au tu Keriso ġesi ġesatauro-sebonaguto; dagara sebona tu, roġo maġuri atanuni, senaġi mai tu dia au tauġegu ġegu maġuri. Asigina. Mai tu Keriso au nuġagu ai maġuri etanuni. Au mai tauġani nuġanai mai maġuri atanu-iaġiani maigā tu, Barau Natuna ġenai aveġabidadamani lorinai atanuni. Mai Barau Natuna na au eura-viniguto, ma au maġuri bana ġabia ġana, tauġena ġena maġuri evini-fitōġaiato.

²¹ Au na Barau ġena namo e varevare-bara tu asi atore-veġitaiani. Asigina ġinavaġi. Korana bema tarima ta na taravatu bekorana-iaġiani nai, vei-iobukaiobuka tarimanai beiāgoni neganai, Keriso tu bere mase-kava, asi ġena namo ta.

3

Taravatu tana korana-iaġia, ba veġabidadamai moġo bisini tanu

¹ Ĝomi Galatia tarimami babomi! Iesu Keriso satauro ai ĝeikoko-kauato varina tu au ĝegu ĝobatai, be matami ĝutuĝutunai akiraĝi-fofori ginikauato. Ma ĝomi mai tu kamara ĝora tarimana na ĝemi tuĝamaĝi bemeĝa-veĝonuri mala, ei?

² Au aurani, mai dagara sebona ĝomi na ĝokira-varagu: Ĝomi na Iauka Veaĝa tu taravatu ĝokorana-iaĝi ginikauato nai ĝoĝabiato, ba Keriso Varina Namona ĝoseĝaĝiatio, benamo ĝovaĝa-moĝoniatio nai ĝoĝabiato?

³ Ĝomi tu moĝoni boĝo babo-korikori, ei? Ĝomi maĝuri variĝuna dabaranai raka tu Iauka Veaĝa ĝena seĝukai ĝosinaiato, maitoma ĝomi ĝourani, magona tauĝemi ĝemi kokore ai boĝono ĝoitaĝoa ĝotoni?

⁴ Be, ĝomi mo meto ma midigumidigu tu ĝoĝoitaĝo-kavarito, asi ĝeri namo ta? Senaĝi mo meto ma midigumidigu, au ribagu tu, asi ĝoĝwa-kavarito.

⁵ Ma nadanaĝimi atoni, Barau na ĝomi Iauka Veaĝa evinimini e fakami ai nuĝa-farevaĝi veĝari boruri eveirini, korana ĝomi na taravatu ĝokorana-iaĝi ginikauani nai ba? Ba Keriso Varina Namona ĝoseĝaĝiani, benamo ĝovaĝa-moĝoniani dainai?

⁶ Ĝotuĝamaĝi-ĝenoĝoi, Aberahamo ĝotuĝamaĝia: “Ĝia tu Barau na eki-raĝi-toreato guruĝana evaĝa-moĝoniatio naima, Barau ekirato, ĝia tu vei-iobukaiobuka tarimana, etato.”

⁷ Moĝesina naima boĝono riba, Barau ĝeĝabidadama-viniani tarimari ĝereĝari moĝo Aberahamo natuna.

⁸ Buka Veaĝai etore-guineato guruĝana na ekiraĝiani, ekirani, ĝoirai Barau na irau bese tarimari tu ĝeri veĝabidadama ĝerina vau bekirarini, asi ĝeri rakava betoni. Moĝesina naima, Aberahamo ĝenai Vari Namona tu ekiraĝi-fofori guineato, ekirato, “Tanobara mabarabarari beseri tu, ĝoi ĝemuna vau vevaĝa-namo beĝe doĝariani.”

⁹ Aberahamo na Barau eĝabidadama-viniatio, benamo Barau ĝenana vevaĝa-namo eĝoitaĝoato. Moĝa ilailanai Barau ĝenai ĝeveĝabi-dadamani tarimari mabarabarari tu, Barau ĝena vevaĝa-namo beĝe ĝabiani.

¹⁰ Taravatu ĝekorana-iaĝi ginikauani vau, Barau ĝoiranai vei-iobukaiobuka tarimari ai beĝe iaĝoni ĝetoni tarimari mabarari iatari ai tu rakava metona lelevaĝina etanuni. Korana Buka Veaĝi tu maĝesina ekirani, “Taravatu bukanai ĝetorerito guruĝari asi ĝekorana-iaĝi vanaĝi-vanaĝirini tarimari iatari ai tu rakava metona lelevaĝina betanuni.”

¹¹ Buka Veaĝa na bevaĝa-fofori ginikaua, taravatu bekorana-iaĝiani tarimana Barau ĝoiranai tu dia vei-iobukaiobuka tarimana. Korana “Barau beĝabidadama-viniani tarimana tu vei-iobukaiobuka tarimanai beiaĝoni, be bemaĝurini.”

¹² Taravatu tu irau veĝata, ĝia tu dia veĝabidadama ĝenana eiagomani. Korana Buka Veaĝa ekirani, “Taravatu ekorana-iaĝi ginikauani tarimana tu taravatu ĝenana moĝo maĝuri beĝabiani.”

¹³ Senaĝi ĝita tu taravatu ĝena rakava metona lelevaĝina ĝenana Keriso na varau evoi-vaĝirato. Ĝita tu ĝia tauĝena na eruĝa-boroĝirato, benamo mo rakava meto lelevaĝina tu ĝia na eĝabiato. Korana Buka Veaĝi etoreato, ekirani, “Ĝau ai ĝetou-kaurini, ĝemaseni tarimari mabarabarari iatari ai tu Barau na rakava meto lelevaĝina etore-kauani.”

¹⁴ Keriso na ĝita taravatu ĝena rakava meto lelevaĝina ĝenana evoi-vaĝirato, tauna korikori tu, Barau na Aberahamo vevaĝa-namo eviniatio, mo vevaĝa-namo moĝa tu irau bese tarimari na maki Iesu Keriso ĝenana beĝene

ġabia uranai. Korana mo dabarai tu, Barau na ekiraġi-toreato Iaukana tu Iesu Keriso beġe vaġa-moġoniani tarimari mabarari na maki beġe ġabiani.

*Barau ġena taravatu na Barau ġena guruġatore guinena asi ilaila bekoki-
fitoġaiani*

¹⁵ Tarikakagu mabarami, tarimarima ġera tanu-maġurinai guruġa vaġa-ilailana ta nakiraġia. Vaġa-ilailana tarimarima ġera kiraġitore guruġana emoġonini, benamo tavaġa-ruġaiani nai tu, mo guruġatore moġa tarima ta na asi ma bekira-fittoġaiani o iatanai guruġa boruna ta asi ma betore-kauani.

¹⁶ Barau na mo guruġatore guruġari tu Aberahamo ema Aberahamo besena sebona moġo ġeri ai ekiraġirito. Buka Veaġai etoreato guruġana tu dia maiġesi ekirani, “Goi besemu ġutumari ġeri,” korana moġesi bere kira tu tarimarima ġutama bere kiraġiri; senaġi ġia tu ekirani, “Goi besemu sebona ġenai.” Mai tu tarima sebona kwariġutu moġo ekiraġiani, mo tu Keriso ġereġana moġo ekiraġiani.

¹⁷ Au na kara akiraġiani tu iniġa: Barau ġena guruġatore guruġana Aberahamo tu evini-guineato; ma laġani sinau vasivasi ma gabana toitoi (430) evanaġiato murinai vau, Barau na taravatu evaġa-ruġaiato. Ma vau ema ruġato taravatuna na Barau ġena guruġatore guinena moġa tu asiġina ġinavaġi bekoki-fittoġaiani, benamo Barau ġena guruġatore moġa tu asi taunai bevaġa-iaġoani. Asiġina ġinavaġi veġata.

¹⁸ Bema Barau na evinirato dagnarana tu taravatu bita korana-iaġi ginikauani vau bita ġabiani nai tu, mo bita doġariani dagnarana moġa tu, ribara, dia ekiraġi-toreato maġurinai bita doġariani. Senaġi Barau tu ġena namo e varevare-barai eguruġa-toreto, ma Aberahamo eviniato.

¹⁹ Bema moġesi nai tu, kara dainai taravatu eiagomato? Taravatu eiagomato anina tu, tarimarima na Barau ġekira-sirivaġiato-ġoi maġurina, moġa tu taravatu na bene vaġa-fofori ginikaua. Ma Barau na mai taravatu tu dia betanu-vanaġi vanaġini etato. Asiġina. Mai taravatu tu betanu-iaġoni mo, Aberahamo natuna bemaġurinai vau bea magoni. Korana Barau ġena mo guruġatore tu ġia ġenai eveiato. Mai taravatu tu Barau na aneru ta eviniato. Benamo mo aneru na tu Barau ma tarimarima vefakari ai eruġato tarimana eviniato. Ma mo vefakari ai eruġato tarimana na tu, ġita ġerai ekiraġi-foforiato, bitana korana-iaġia ġana.

²⁰ Bema tarima sebona moġo eġauveini nai tu, vefakai eruġani tarimana tu asi ġena ġauvei. Ma Barau mainai tu ġereġana moġo, e ġereġana moġo eguruġa-toreto.

Taravatu anina tu kara?

²¹ Be, moġa tauna tu, taravatu na Barau ġena guruġatore guruġana ekira-fittoġaiani? Asiġina ġinavaġi. Korana bere Barau na tarimarima taravatu ta bere viniri, benamo mo taravatu ġenana tarima maġuri beġere doġaria nai tu, moġoni, ġita tu taravatu korana-iaġi-ginikauna ġenana, vei-
iobukaibuka tarimarai bitara iaġo.

²² Senaġi Buka Veaġai etoreato guruġana na ekiraġi-foforiani, ekirani, “Mai tanobara mabarabarana tu vei-rakava ġena seġuka gaburenai etanuni.” Moġa lorinai kara Barau na ekiraġi-toreato dagnarana, moġa tu Iesu Keriso ġenai bita veġabidadamani vau bita doġariani. Moġa tauna tu, Keriso bevaġa-moġoniani tarimana tu Barau na ekiraġi-toreato varevarena beviniani.

²³ Iesu ġenai veġabidadama maġa roġosi roġo bere fofori nuġanai, tovotovonai ġita tu taravatu ġena seġuka gaburenai tatanuto-ġoi, taravatu

na ebiri-ġaurato mo, Iesu ġenai veġabidadama Barau na ma ema vaġa-foforiato.

²⁴ Be, taravatu na tu ġita eguine-iaġirato mo, Keriso eiaġomato, benamo ekorito. Moġa anina, ġita tu Iesu ġenai bita veġabidadamani vau, Barau bekirani, ġita tu asi ġera rakava betoni.

²⁵ Initoma tu veġabidadama ġena nega beraġasi, naima taravatu na ġita tu asi ma beġori-kaurani.

Veġabidadamai Barau natunai bita iaġoni

²⁶ Ġomi mabarabarami tu Barau natuna, korana tu Keriso Iesu ġenai ġoveġabidadamani bene.

²⁷ Ġomi babatiso ġoġabiato tarimami mabarami, Keriso ġesi ġosebonato, be Keriso nuġanai ġotanuni.

²⁸ Ġomi mabarami fakami ai ta tu asi ġemu irau ta. Ġoi tu Iuda tarimamu o irau bese tarimamu, tuġu-rakaorakao tarimamu o fakai otanuni tarimamu, vavine o tau, senaġi ġomi mabarami tu sebona moġo. Keriso Iesu ġesi ġosebonato nai, ġomi mabarami tu sebona kwariġutu moġo.

²⁹ Bema ġomi Keriso ġena tarimarima nai, ġomi tu Aberahamo besena, ema Barau na ekiraġi-toreato dagarana maki boġo ġabiani.

4

Vetuġunaġi tauna tu irau, ma natuna korikoriri maki irau

¹ Au tu iniġesi akirani: Mero misina ta, bema ġia roġo mero kei neganai, tamana na eviniato dagarari mabarabarari asi roġo beġaunarini. Aba, mo dagara mabarabarari tu ġia ġena farefare, senaġi ġia tu roġo mero kei, naima ġia na asi roġo beġaunarini. A ġia tu tuġu-rakaorakao tarimana kavana roġo betanuni.

² Mo mero misina benariani tarimari, ema mo ġena dagara beġe ġita-ġaurini tarimari ġeri veġitaġau gaburenai roġo betanuni, beiaġoni mo, tamana na ekiraġi-toreato ġarona bea ġabiani.

³ Ġita maki moġesina, roġo mero misira e kekenira misira negari ai tu, taravatu irauirau e tanobara barauri ġeri tuġu-rakaorakao merora e kekenirai taiaġoto.

⁴ Senaġi Barau na eviriġiato ġarona evotuto nai, Barau na Natuna etuġu-iaġomaiato, vavine ta ġenana ema maġurito. Barau Natuna etuġu-iaġomaiato maġa tu, taravatu ġena seġuka gaburenai ema maġurito.

⁵ Ġia taravatu ġena seġuka gaburenai ema maġurito korana tu, taravatu ġena seġuka gaburenai tatanuni tarimarimara benema voi-ġenoġoira, benamo Barau natunai bisini iaġo ġana.

⁶ Ġomi tu moġoni Barau natuna. Moġesi naima Barau na Natuna Iaukana etuġu-mariġoato, ġita tata lorurai o nuġarai eraka-toġato, ma etanuni. Mo Iauka moġa ġita lorura ġuturi na ekea-rosini, ekirani, "Tamagai, Tamagai!" etoni.

⁷ Moġesi naima ġomi toma tu dia taravatu ġena tuġu-rakaorakao tarimami. Asigina. Ġomi toma tu Barau natuna. Ġomi tu moġoni Barau natuna lorinai, Barau na natuna bevinirini dagarari mabarabarari tu ġomi na maki boġo ġabirini.

Paulo na Galatia tarimari etuġamaġi-baregorito

⁸ Guinenai ġomi na Barau roġosi roġo boġoro ribaia neganai, ġomi tu ġofaġofa barauri ġotoma-rakarigo vinirito-ġoi, (ġia tu ġima veiveiri dagarari moġo), ġia ġeri tuġu-rakaorakao tarimari ai ġoiġoto.

⁹ Senaġi toma tu, Barau boġoma ribaia, ba nakira, Barau na ġomi bema ribami. Ma kamasi nai tu taravatu moiramoirari, asi tauri dagarari ma ġokorana-iaġi ġenoġoiri ġotoni? Ġomi ġourani tu, maniġeri taravatu na ma beġene barubaru-tarimi ġotoni, ei?

¹⁰ Ġomi tu ġaro e ġue, vereko ġarori e laġani tari ġotuġamaġi-baregorini e ġokorana-iaġi baregorini.

¹¹ Au ġomi ġemi veiġa aġitarini tu, mai ama tuġamaġi-garini. Akirani, au ġomi ġemi ai tu, betaġu avekwaraġi-kavato banaġu atoni.

¹² Tarikakagu mabarami, anoġimini, au kavana boġono vei, korana au maki taravatu aiġuġiato nai, ġomi kavana aveito bene. Ġomi na au ġegu ai veiġa rakavana ta tu asi ġoveiato.

¹³ Ġomi maki ma ribami, au tovtovonai ġomi Vari Namona au na aġobata-vinimito tu, mo keve ta na eġabiguto, benamo maninai tatanuto-ġoi nai.

¹⁴ Aba, au ġegu ai mo keve moġa tu, ġomi ġemi ai vetovonaġi baregona ta, senaġi asi ġoġita-fitoġaguto, e asi ġoragakwane-moġovaġiguto. A ġomi na au tu Barau ġena aneru ta boġoro ġabi-raġea ilailanai ġoġabi-raġeguto. Ma au tu noġa moġo Keriso Iesu tauganina korikorina noġa ġoveiguto.

¹⁵ Ġomi ġemi iaku e verere maki barego. A toma tu kamasi, mo iaku e verere tu aiġeri, ei? Mai tu moġoni aguruġani, mo negai bema boġoro ura, matami ġoġibo-vaġiri, benamo au ġovinigu boġoro si nai tu, ġoro ġibo-vaġiri, benamo boġoro vinigu.

¹⁶ Toma tu kamasi? Guruġa moġoniri akira-varamini nuġanai tu, ġemi vetari tarimanai ma boġo vaġa-iaġogu?

¹⁷ Maniġeri ġofaġofa tarimari na ġomi ġemi ai ura tu barego lelevaġina ġetoreani, senaġi ġia ġeri tuġamaġi e ura tu asi roroġoto. Ġia ġeri ura baregona ġeveiani tu, ġomi ġai ġemana moġo boġono raka-veġita, benamo ġia ġeri ai beġene ġabi-vanaġimi ġetoni. Ma ġia na beġene ġabi-vanaġimi, be ġia boġono ura-viniri ġetoni.

¹⁸ Vanaġivanaġi tarimarima namo beġene ġabia uranai, bita uravini-baregorini tu namo vedaurea. Ma namo bene ġora ġana, tarimarima bouravini-baregorini maġurina tu, dia au ġoiragu ai moġo boġono veia. Asiġina.

¹⁹ Natugu, ġomi tu au na atuġamaġi-kaumini. Au tu ġomi urami ai, be noġa vavine ma baniri na mero ġeruġu-vaġirini ġetoni nai, midigu ġegabirini kavana, au midigu aġanini. Mai midigumidigu tu baġabi-iaġoani mo, Keriso vetoġana korikori ġomi ġemi ai bevetoreni.

²⁰ Initoma u ġegu ura barana tu, ġomi sevimi ai barasi ruġa-tari, be garogu bara kefoa, bara vaġa-kava ginikaumi. Korana au ġomi ġemi ai tu mai ama daradarani, asi aribani, kamasi bavaġa-kavamini.

Hagar ma Sara

²¹ Ġomi taravatu gaburenai tanu ura-dikana ġoveini tarimami na ġokira-varagu. Ġomi taravatu na kara ekiraġiani guruġana tu ġoseġaġi-ginikauani ba?

²² Buka Veāga tu maiġesi etoreato: Aberahamo natuna tu ruarua, ta tuġu-rakaorakao vavinena ġenana emagurito, ma ta tu vavine fakana, dia tuġu-rakaorakao vavinena, ġenana.

²³ Tuġu-rakaorakao vavinena ġenana emagurito merona tu, Aberahamo e Hagar ġegen-a-vegogoto, monana eġorato. Senaġi vavine fakana ġenana emagurito merona tu, Barau ġena guruġatore lorinai emagurito.

²⁴ Mai vetoġa maiġeri tu guruġa vaġa-ilailari veiġari moġo. Mai vavine ruarua maiġeri tu, Barau ġena kiraġitore ruarua ġevaġa-foforirini. Hagar tu Barau ġena kiraġitore ta Sinai Ġorona na eiaġomato dagarana ekiraġiani, ma ġia na eruġa-vaġirito tarimari tu tuġu-rakaorakao tarimari.

²⁵ Mai guruġa “Hagar” tu Arabia tarimari na Sinai Ġoronai ġekiraġiani. Ema Hagar maki toma etanuni Ierusalemata vetoġana kavana. Korana mai Ierusalemata sitina e Ierusalemata tarimari tu tuġu-rakaorakao tarimari.

²⁶ Senaġi gubai etanuni Ierusalemata tu faka. Ma ġia tu ġita sinara.

²⁷ Buka Veāgai tu maiġesina ekirani,

“Vavine gabanimu,

mero asi oġabini vavinemu,

e mero ġabi midiguna asi ribamu vavinemu,

noiaku e noverere!

Korana tu ġaraġona na eiaġuiato vavinena natuna tu ġutuma gorogoro, ma ġaraġona na asi eiaġuiato vavinena natuna tu asi vovoka.”

²⁸ Tarikakagu mabarami, ġomi tu Isako kavana. Barau ġena guruġatore lorinai, Barau natunai ġoiġoto.

²⁹ Mo negai Aberahamo e Hagar ġegen-a-vegogoto nai, eġorato merona na Iauka Veāga ġena seġukai emagurito merona evaġa-midigu midiguato, moġesi kavana maitoma maki mo veiġa sebona eġorani.

³⁰ Senaġi Buka Veāgai etoreato guruġana tu kara etoni? Ġia tu ekirani, “Mani tuġu-rakaorakao vavinena ma natuna ġesi tu ġomi sevimi na boġono lai-veġitari. Korana vavine fakana natuna ġena farefare mani tuġu-rakaorakao vavinena natuna ġesi tu asi veġata beġe ġauna-vegogoani.”

³¹ Ma, tarikakagu, ġita tu dia tuġu-rakaorakao vavinena natuna. Asiġina. Ġita tu vavine fakana natuna.

5

Taravatu irauirauri ġeri tuġu-rakaorakao tarimari ai asi ma boġono iaġo

¹ Ġita tu bitana faka uranai, Keriso na taravatu misimisiri ġerina eruġa-vaġirato. Be boġono ruġa-gigitari. Ma tauġemi mani Iuda tarimari ġeri taravatu misimisiri e vereko irauirauri ġeri tuġu-rakaorakao tarimami ai asi ma boġono vevaġa-iaġo.

² Ġoseġaġi! Au Paulo na akiramini, bema ġomi tauġanimi kefirri beġe lama-vaġirini nai tu, Keriso na ġita bene ruġa-vaġira ġana, kara eveiato, moġa tu asi ġena seġuka ġomi ġemi ai.

³ Ema mani deidei tauġaniri kefirri beġe lama-vaġirini tarimami tu navaġa-guruġami, ġoseġaġi. Gomi tu taravatu mabarari misikose boġono korana-iaġi ġinikauri veġata.

⁴ Bema ġomi ġokirani, taravatu boġono korana-iaġi ġinikaua, be Barau ġoiranai vei-iobukaiobuka tarimami ai boġono iaġo ġotoni tu, tauġemi moġo Keriso ġenana ġoveġabi-ġerevaġini. Ema ġomi tu Barau ġena namo e varevare-bara ġenana ġoveġitani.

⁵ Iauka Veāga ġena seġukai Barau ġenai taveġabidadamani, ema tavaġa-nogani, Barau na vei-iobukaiobuka tarimara benesi ġana.

⁶ Keriso Iesu ġesi esebonato tarimana tu tauġanina kefina ġelama-vaġiato ba asi ġelama-vaġiato tu asi ġeri irau ta; mai veġa ruarua ġerina namo ta asi beġorani. Dagara baregona korikori tu veġabidadama, mo veġabidadama na veuravini evaġa-foforiani.

⁷ Ġomi tu raga-iruiru ai ġoraga-ġinikauto-ġoi. Ma kamara deikara na ġoirami easi-kouġauato, benamo toma tu guruġa moġonina asi ma ġokorana-iaġiani?

⁸ Mani vevaġa-ura veġana maniġa tu dia ġomi ekeamito Barauna ġenana eiaġomani.

⁹ Boġono riba, farao evaġa-tuburini muramurana kotuna na farao evaġa-tubu baregoani.

¹⁰ Barau ġenai ġegu tuġamaġi tu atorekau-gwaġiġiani, korana ribagu, ġia na bevaġa-kavamini, benamo iaunega boruna ta asi ma boġo ġabi-raġeani. Mani ġomi evaġa-tuġamaġi daradaramini tarimana maniġa tu, ġena veġa voina metona bedoġariani veġata.

¹¹ Tarikakagu mabarami, bema au na mero tauġaniri kefiri lamavaġi veġana initoma roġo aġobata-iaġiani nai, au karase nai tu roġo ġevaġa-midigu midiguguni? Bema au na mero tauġaniri kefiri lamavaġi veġana roġo bara ġobata-iaġia nai tu, Keriso ġevaġa-satauroato varina aġobata-iaġiani, mainana tarimarima nuġari tu asi bere vaġa-metori.

¹² Gomi ġemi tuġamaġi ġevei-veġonu veġonurini tarimari maniġeri, nazona tu tauġeri na seuri beġene farari.

¹³ Moġoni, tarikakagu, ġomi Barau na ekeamito tu, taravatu irauirau korana-iaġiri ġerina boġono raka-faka ġana. Ma ġomi tata tu dia taravatu gaburenai ġotanuni, senaġi fakai ġotanuni. Mani fakai ġotanuni dainai tu, tauġani ġena ura rakavari boġono korana-iaġiri ba? Asiġina ġinavaġi! Ġomi tu ma veuravinimi ġesi karomi ġesi boġono vevaġa-kava, e karomi ġeri vetuġunaġi boġono iaġo-vini.

¹⁴ Taravatu mabarabarari tu taravatu guruġana sebonai moġo Barau na evaġa-iaġoato, ekirato, “Sevimu tarimana bono ura-vinia, ġoi tauġemu oveura-vinini ilailanai.”

¹⁵ Bema ġomi tauġemi karomi tata ġesi moġo boġo vekira-ġarama ġaramani e boġo vevaneni nai tu, boġono venari, korana karomi ġesi tauġemi moġo boġo vevaġa-rakavani, benamo veġabidadama na boġo ketoni garina.

Tauġani ġena veġa e Iauka ġena veġa

¹⁶ Au tu iniġesina akirani: Iauka Veāga na ġemi maġuri bene guine-iaġiri, be tauġani ġena ura rakavari asi boġono korana-iaġiri.

¹⁷ Ġita ribara, tauġani na euravini-baregorini veġari, Iauka na tu asi eura-vinirini, ema Iauka na euravini-baregorini veġari, tauġani na tu asi eura-vinirini. Ġia tauri ruarua tu ġevevaġini. Moġesina naima, ġoi na veġa namori bono veiri otoni veġari tu asi oveirini.

¹⁸ A bema ġoi Iauka na eġori-kaumuni nai, ġoi tu dia taravatu gaburenai otanuni.

¹⁹ Tauġani na euravini-iaġirini veġari tu maiġeri: Mata-boraġa veġari, veġa mirori, kima veġari,

²⁰ kwaivakuku toma-rakariġo, ġora e meġameġa, vebaruvini, vevane, mama, niaraniara, arana beġene vaġa-raġea etoni veġari, veġareveġare, vevare-kirakira veġari,

²¹ dagara mata-kifakifari o mata-ḡaniḡaniri, niuniu ema ḡoreḡore, ma veḡa irairau maiḡesi kavari. Guinenai akira-toreḡaumito kavana, toma maki akira-toreḡaumini, maiḡesi veḡari beḡe veini tarimari tu, asiḡina ḡinavaḡi Barau ḡena Basileia nuḡanai beḡea raka-toḡani.

²² Senaḡi Iauka ḡwaḡwana tu maiḡeri: Veuravini, iaku, maino, vevaḡa-gwaḡḡi, veiau-namo, nuḡa-namo, vetuḡamaḡikau,

²³ nuḡa-ḡavemuko o manau, ema nuḡa-gwaḡḡi. Maiḡeri veḡa tu taravatu na asi ekourini, asi taravaturi.

²⁴ Keriso Iesu ḡena tarimarima korikori vetoḡana tu maiḡesi: Ḡia tu tauḡani na eḡabiraḡe-baregorini dagarari e euravini-iaḡirini dagarari mabarabarari eikoko-kaurito satauro tuḡunai Keriso ḡesi.

²⁵ Bema ḡita Iauka Veaḡa na ḡera maḡuri eguine-iaḡirini nai tu, Iauka Veaḡa ḡena dabarai maki bisini raka.

²⁶ Ḡita tauḡera asi sivekirāḡi-varaḡevaraḡe, e karora nuḡari asi siveibarubaruri, ema karora tata ḡeri ai dagara tari moḡeri asi simata-ḡaniḡani-iaḡiri.

6

Ekalesia karomi ḡesi boḡono vevaḡa-kava

¹ Tarikakagu mabarami, bema fakami ai tarima ta na veḡa eleaiani goḡitaiani nai tu, Iauka Veaḡa na ḡemu maḡuri eguine-iaḡiani tarimamu na nuḡamu ma manauna ḡesi bono vaḡa-kavaia, ḡena maḡuri bono toto-iobukaia maia. Senaḡi ḡoi tauḡemu maki bono venari. Asi namo Satani na ḡoi maki beriba-ḡanimuni ḡesi.

² Karomi tata ḡesi boḡono vevaḡa-kava, ḡemi meto boḡono ḡwa-barabarari, korana moḡesi boḡo veini tu, Keriso ḡena taravatu boḡo korana-iaḡi ḡitakauani.

³ Bema tarima ta tauḡena bevetuḡa-maḡini, ḡia tu tarima korikori betoni, a nuḡanai ḡia tu asi ḡeiaviani tarimana. Ḡia tu tauḡena kekei moḡo eveḡofaḡofa-iaḡini kekei.

⁴ Tarimarima mabarari tu tata ḡeri veḡa e maḡuri beḡene vetau-ginikauro. Benamo moḡa murinai vauro tata ḡia tauḡena ḡena maḡuri namona iakuna bene vei. A dia ḡia ḡena maḡuri namona tarima ta ḡena maḡuri ḡesi bene vaḡa-vetovoa.

⁵ Korana tu tarima tata ḡereḡana na ḡena maruna metona bene ḡwaia.

⁶ Tarima ta deikara riba eḡabini Barau ḡena guruḡai tarimana tu, ḡia ḡenai kara etanuni dagarari kota ḡena vevaḡa-riba tarimana bene varevare-vinia.

⁷ Tuḡamaḡi kerereri na asi beḡene ḡabimi. Barau tu asi boḡo ḡofaiani. Tarimarima tu kara ḡuena evaroani, benamo moḡa ḡwaḡwana ḡereḡana moḡo eḡabiani.

⁸ Tauḡani ḡena ura rakavari ekorana-iaḡirini tarimana tu, tauḡani ḡena ura rakavari ḡerina maḡuri rakava kwaikwaina e mase bedoḡaririni. A Iauka Veaḡa ḡena veḡa namori ekorana-iaḡirini tarimana tu, Iauka Veaḡa ḡena veḡa namori ḡerina maḡuri vanaḡivanaḡi beḡabiani.

⁹ Moḡesina naima veḡa namori veiveiri ai asi bitana gau. Korana veḡa namori veiveiri asi bita vaḡa-ketoani nai tu, kwakwa negana korikorinai tu ḡaniḡani bita kwa-doḡarini.

¹⁰ Moḡa lorinai ḡita ḡera mai nega namonai tu tarimarima mabarabarari ḡeri ai veḡa namori bisini veiri. Ma mai veḡa namori tu Keriso ḡenai ḡeveḡabadamani besena mabarabarari ḡeri ai tu bisini veiri veḡata.

Dia kefi lamavaḡi ḡenana maḡuri boḡoitaḡoani

¹¹ Mai fefa tu au tauḡegu na batorea ḡomi ḡemi. Ćoḡitaiani, mai guruḡa-matari baregori atorerini mai fefai.

¹² Ćoseḡaḡi, ḡomi tauḡanimi kefiri beḡene lama-vaḡiri guruḡari ḡevei-gwadarini tarimari, maniḡeri tu tauḡani murika na dagarari koriri ḡevekokoroku-iaḡirini tarimari. Mani tarimarima maniḡeri tu Keriso ḡena satauro dainai beḡe vaḡa-midigu midigurini garinai maniḡesi ḡeveini.

¹³ Tauḡaniri kefiri ḡelama-vaḡirini tarimari na taravatu tu asi ḡekorana-iaḡiani. A ḡia tu ḡeura-baregoni, ḡomi tauḡanimi kefiri beḡene lama-vaḡiri ḡetoni. Ćia ḡeura-dikani tauna korikori tu, ḡomi tauḡanimi kefiri beḡe lama-vaḡirini nai, beḡene veiaḡi ḡana.

¹⁴ Au dagara ta vekokorokuna tu asiḡina ḡinavaḡi baveini, a au tu ḡita ḡera Vereḡauka Iesu Keriso ḡena satauro moḡo havekokoroku-iaḡiani. Korana mai satauro ḡenana tanobara dagarari au ḡegu ai tu ḡemaseto satauro tuḡunai, ema au maki tanobara dagarari ḡeri ai tu amaseto satauro tuḡunai.

¹⁵ Mero tauḡaniri kefiri ḡelama-vaḡirini nai, namo ta asi beḡorani, ema mero tauḡaniri kefiri asi beḡe lama-vaḡirini nai, maki namo ta asi beḡorani. Korana dagara baregona sebona Barau ḡenai tu, Barau na tarima variḡu geragerarai evaḡa-iaḡorani.

¹⁶ Mai maḡuri maḡa beḡe tuḡamaḡiani e beḡe korana-iaḡiani tarimari tu Barau ḡena tarimarima o Isaraela tarimari korikori; ḡia iatari ai maino e vevetuḡaḡwa bene tanu.

¹⁷ Maitoma beiaḡoni, tarima ta na au meto asi ma bene vinigu, korana Iesu ḡebaru-viniani tarimari na ḡekwariguto, be ḡegu giri tauḡanigu ai aḡwarakaorini, moḡeri na ḡevaḡa-foforinai, au tu Iesu Vereḡauka ḡena vetuḡunaḡi tarimana korikorina.

¹⁸ Tarikakagu mabarami, ḡita ḡera Vereḡauka Iesu Keriso ḡena namo ma varevare-bara ḡomi mabarami iaukami ḡesi bene tanu. Amen.

PAULO ĜENA TORETORE EFESO EKALESIARI ĜERI

Efeso vaĝa-foforina guruĝari

Paulo na mai fefa tu Romai dibura numanai etanuto-ĝoi nuĝanai etoreato (Apostolo 28). Mai fefa tu betaĝu laĝani 60 o 61 ai etoreato, mo tu Iesu maki emaseto murinai. Mai fefa anina baregona tu, “Ekalesia doĝorona tu Keriso Taŭganina,” ema mai fefa ĝeĝori-kauani siriri tu karao 4:1-4.

Paulo na mai fefa etoreato ĝena ura baregona tu, Efeso ema Asia Keina (o Asia Minor) mabarana nuĝanai maki Iesu Keriso ĝevaĝa-moĝoniani tarimari, 1) ĝeri veuravini ema veĝabidadama Keriso ĝenai ma beĝene toresirivaĝia ĝana; 2) bene launaĝiri, tarima guinena ma ĝena maĝuri rakavari ĝesi beĝene koki-fitoĝaia, ma tarima variĝu geragerana beĝene tore-kaua; 3) bene vaĝa-ribari, Keriso taŭganina nuĝanai Iuda tarimari ema irau bese tarimari tu sebona moĝo, asi ĝeri irau ta; 4) Keriso ema ekalesia doĝorona nuĝari ai kara vekuretoĝana etanuni bene vaĝa-foforia ĝana.

Paulo na mai fefa tu maĝesina eboioĝaiato:

1. Ĝita ĝera farefare ĝena barego Keriso ĝena maĝuri nuĝanai - karao 1-3
2. Ĝita Keriso ĝena maĝuri nuĝanai tu aiĝesina bitana tanu - karao 4-6

¹ Au Paulo, Barau ĝena ura lorinai Keriso Iesu ĝena apostolo tarimaĝu ai aiaĝoto. Mai fefa tu Efeso ai Barau ĝena veaĝa tarimami, Keriso Iesu ĝenai ma ĝemi vetuĝamaĝikau tarimami, atore-vinimini.

² Barau ĝita Tamara ema Vereĝauka Iesu Keriso ĝerina varevare-bara e maino ĝemi ai bene tanu.

Keriso ĝena maĝuri nuĝanai Barau na namo iauka rekenai evinirani dagarari

³ Barau, ĝita ĝera Vereĝauka Iesu Keriso Tamana, sivaĝa-raĝea, korana Keriso ĝesi tasebonato maĝurina nuĝanai, ĝia na iauka rekenai gubai ĝetanuni dagarari namori moĝeri mabarari ĝita evinirato.

⁴ Tanobara roĝosi roĝo bere veia ĝaronai veĝata, Keriso na vevaĝa-maĝuri ĝauveina beveiani bakunai, Barau na ĝita ĝia ĝena eĝabi-viriĝirato. Ĝita eĝabi-hidirato tu, ĝia ĝoiranai bitana veaĝa e asi ĝera vei-rakava ta bitana tanu ĝana. Barau ĝena veuravini lorinai,

⁵ ĝia na mai maĝuri eboioĝa-guineato, ekirato, ĝita tu Keriso ĝenana ĝia natunai bevaga-iaĝorani. Mai tu ĝia taŭgena ĝena nuĝa-namo ai ĝena ura eveiato veĝana.

⁶ Barau ĝena namo e varevare baregona marevana namo vedaureana sivaĝa-raĝea. Korana mai namo e varevare-bara maiĝa tu Barau na ĝita evini-kavarato moĝo, euravini-baregoani merona, Iesu Keriso, ĝena maĝuri nuĝanai.

⁷ Ĝita tu, Keriso emaseto nai, rarana na evoi-ĝenoĝoirato, e ĝera rakava maki etuĝamaĝi-fitoĝarito. Mai tu Barau ĝena namo e varevare-bara namo vedaureana veĝana,

⁸ ĝita ĝerai barego lelevaĝi evaĝa-foforiato, ema iaunega e tuĝamaĝi-faka evinirato.

⁹ Barau ĝena ura Keriso ĝenana beveiani veĝana tu vekuretoĝa, senaĝi taŭgena ĝena nuĝa-namo ai ĝita evaĝa-ribarato.

10 Mai Barau ġena ura o boioġa maiġa tu ekiraġi-toreato ġarona beġabiani vauro bevaġa-foforiani. Mo tu gubai ġetanuni dagarari e tanobarai ġetanuni dagarari mabarari Keriso kwakuna koranai beġabi-vegogorini. Benamo Keriso na moġeri dagara mabarari beguine-iaġirini.

11 Ġita tu Keriso bakunai Barau na ġena eġabi-virigirato, tauġena na tovotovonai veġata eboioġaiato ilailana. Ma dagara mabarari maki ġia tauġena na eura-iaġirni dabarari ai eġauvei-iaġirini.

12 Moġa lorinai ġai Iuda tarimama, deiri Keriso ġavaġa-moġoniato ma ġenai ġavetuġa-maġikau-guineto tarimama na Barau marevana baregona baġana vaġa-raġea.

13 Ma ġomi irau bese tarimami na maki mai guruġa moġonina tu ġovaġa-moġoniato, mo tu Barau na ġomi bevaġa-maġurimini Varina Namona guruġana. Ġomi mai guruġa ġoseġaġiato nai tu, ġovaġa-moġoniato, benamo Keriso ġenai ġovetuġamaġikauto. Moġesina naima Barau na ġomi maki ġia ġena tarimarimai evaġa-iaġomito. Barau na ġomi eġabi-raġemito vetoġana ġemi ai eveiato tu, Iauka Veaġa, ekiraġi-toreato Iaukana, evinimito.

14 Ġita na Iauka Veaġa tu varau taġabiato, moġesi naima ribara, Barau na ġena tarimarima ġeri ekiraġi-toreato dagarana tu ġita na maki bita ġabiani. Initoma tu roġo tavenarini, beiaġoni mo, Barau na ġena tarimarima beġabi-iaġorini ġia sevina ġana. Barau marevana baregona sivaġa-raġea.

Paulo ġena ġauġau

15 Moġesina naima, au tu Iesu Vereġauka ġoġabidadama-viniani e Barau ġena tarimarima veaġari ġoura-vinirini varina ama seġaġiato ġarona na veġata,

16 Barau tanikiu-vinina ġomi bakumi ai tu asi avaġa-magoani, e iatami ai aġauġauni.

17 Akirani, ġera Vereġauka Iesu Keriso ġena Barau na iaunega ema vevaġa-fofori Iaukana bene vinimi, be Barau boġono riba-ginikaua. Barau tu Tamara, ma ġia marevana ma mamana tu iaru-korokoro.

18 Ma Barau anoġiani, akirani, ġemi tuġamaġi mama bene vinimi, ġena vevaġa-namo irau vedaureana, voina baregona dagarana boġono ġabia uranai ekeamito ġotuġamaġikauani, moġa tu boġono riba-ginikaua. Be Barau ġena tarimarima veaġari na dagara namo vedaureari beġe ġabirini, moġeri tu boġono ribari.

19 Ema Barau tavaġa-moġoniani tarimara nuġarai Barau ġena seġuka iaru-korokorona eġauveini maiġa maki boġono ribaia. Barau ġena mai seġuka maiġa ġena ġauvei kokorena tu barego lelevaġi.

20 Ġia na tu mai seġuka kokorena Keriso ġenai evaġa-foforiato nai, Keriso mase na evaġa-variġisi ġenoġoiato, e gubai ġia ġimana aroribanai evaġa-tanuato.

21 Keriso tu monai tuġunai etanuni e evereni. Ġia tu iauka rakavari mabarari, ġeveġitaġauni iaukari, e ġeri maoro barego lelevaġi iaukari, e ma ġeri seġuka iaukari, ma seġuka lelevaġi aneruri, ema ara ġekiraġirini arari mabarari iata-raġeri ai evereni. Mai tu dia mai tatanuni neganai moġo, asiġina, mai tu ġoirai vau mani eiaġomani neganai maki ġia tu bevereni veġata.

22 Barau na dagara mabarari Keriso kwakuna fanafanana gaburenai etorerito, e Barau na ġia tu ekalesia mabarana bene debaia etato.

²³ Ekalesia tu Keriso tauḡanina. Ma mai tauḡanina maiḡa tu Keriso tauḡena ḡena maḡuri na evaḡa-vonu-raḡeato, ema dagara mabarari maki gabu mabarari ai evaḡa-vonurito.

2

Barau na Keriso ḡesi ma bevaḡa-maḡurirani

¹ Guinenai ḡomi iaukama tu mase ḡotanuto-ḡoi, korana ḡemi kira-sirivaḡi e veḡa rakavari ai bene.

² Mo negai ḡomi na mai tanobara ḡena veḡa rakavari ḡoveirito-ḡoi, ema iauka rakavari eḡita-ḡaurini iaukana ḡokorana-iaḡiato-ḡoi. Mai veḡitaḡau iaukana maiḡa ḡena basileia o veḡitaḡau seḡukana tu barego lelevaḡi guba e tanobara fakari ai. Ma ḡia toma tu Barau asi ḡeseḡaḡi-viniani tarimari nuḡari ai etanuni e eḡauveini.

³ Guinenai ḡita mabarara maki ḡia kavana taveito-ḡoi, tauḡani ḡena veḡa rakavari tavaḡa-moḡonirito-ḡoi. Tauḡanira e nuḡara ḡeri ura e tuḡamaḡi rakavari takorana-iaḡirito-ḡoi. Moḡa lorinai ḡita maki tarimarima kotari kavari Barau ḡena baru baregona tu ḡita iatarai etanuto-ḡoi.

⁴⁻⁵ Moḡoni, ḡita iaukara tu mase ḡera kira-sirivaḡi lorinai, senaḡi vevetuḡaḡwa-bara Barauna ḡena veuravini barego vedaurea lorinai, Keriso ḡesi ma evaḡa-maḡuri ḡenoḡoi-sebonarato. Boḡono riba, ḡita tu Barau ḡena namo e varevare-bara moḡo bakunai evaḡa-maḡurirato.

⁶ Keriso Iesu ḡena maḡuri nuḡanai, ḡita tu Barau na Keriso ḡesi mase na evaḡa-variḡisi sebonarato, ma Keriso ḡesi ḡena vere seanai evaḡa-tanu sebonarato guba vanuḡanai.

⁷ Moḡesi eveito korana tu, ḡoirai ḡia ḡena veiau-namo vetoḡana, ḡena namo e varevare-bara barego lelevaḡina ḡerana bene vaḡa-foforia uranai. Mai Barau ḡena veiau-namo vetoḡana, ḡena namo e varevare-bara na efororito maiḡa tu, Keriso Iesu ḡesi tasebonato nuḡanai, ḡita ḡerai evaḡa-foforiato.

⁸ Ḳomi tu ḡemi veḡabidadama ḡenana Barau na ḡena namo e varevare-barai evaḡa-maḡurimito. Ḳomi tu dia tauḡemi ḡemi kokore na ḡovevaḡa-maḡurito. Asiḡina, mai tu Barau ḡena varevare ḡita evinirato.

⁹ E dia ḡomi ḡemi ḡauvei dairi ai voimi ḡoḡabiato dagarana, be moḡa veivaina tarima ta asi bene vei.

¹⁰ Gita tu Barau ḡimana veiveina tarimara. Barau na Keriso Iesu ḡenana tarima variḡurai evaḡa-iaḡorato, ḡauvei e veḡa namori bisini veiri ḡana. Mai ḡauvei e veḡa namori tu Barau na varau erovina-torerito, ḡita na bisini veiri ḡana.

Keriso na bese ruarua evaḡa-sebonarito

¹¹ Ḳomi boḡono tuḡamaḡi, guinenai ḡomi irau bese tarimami Iuda tarimari na ḡekiraḡimito-ḡoi “kefimi asi lamavaḡi tarimami”. Iuda tarimari tauḡaniri kefiri tu lamavaḡi. Ḳia na mai mero tauḡaniri kefiri lamavaḡi veḡana tu tauḡeri ḡimari na ḡeveiani veḡana.

¹² Boḡono tuḡamaḡi, ḡomi mo negai Keriso ḡesi tu ma fakami, e Isaraela besena nuḡanai maki ḡomi tu vanuḡa boru tarimami nai asi ḡeḡabi-raḡemito, ema Barau ḡena kiraḡitore eveirito nuḡanai, eguruḡa-toreto dagarari maki ḡomi na tu asi boḡo doḡaririni. Ema ḡomi mai tanobara nuḡanai tu asi ḡemi Barau ema dagara namona ta ḡoirai asi ḡotuḡamaḡi-kauani.

13 Ĝomi guinenai tu manaĝa rakava, senaĝi toma Keriso Iesu ĝesi ĝosebonato nai, ĝoma kavinaĝito Barau ĝenai. Gomi Keriso rarana na ema ĝabi-kavinaĝimito.

14 Korana Keriso tauĝena tu ĝita ĝera maino evaĝa-ĝoraiani tarimana. Ĝia na ĝita bese ruarua bese sebonai moĝo evaĝa-iaĝorato. Korana ĝai Iuda besena ema ĝomi irau bese tarimami vekaravarai ĝita evare-kirarani kobena tu Keriso tauganina satauro ai emaseto nai evare-kiraiato, benamo evaĝa-rakava-ĝosiĝosiatu.

15 Ĝia na Mose ĝena taravatu nuĝanai velaunaĝi guruĝari ĝetanuni dagarari mabarari maki erovorito. Keriso na mo veiĝa eveiato anina tu, ĝia ĝena ura ĝita bese ruarua ĝerana ĝia tauĝena ĝesi bene vaĝa-sebonara, tarima variĝuna sebona moĝo bene veia ĝana; ema ĝita fakarai maki maino bene vaĝa-ĝoraia ĝana.

16 Ĝia satauro ai emaseto korana tu, mai bese ruarua tauĝani sebonai moĝo bene vaĝa-sebonari, benamo Barau ĝenai ma bene ĝabi-ĝenoĝoiri ĝana. Ema ĝia fakari ai ĝeri veiau-rakava maki, satauro ai emaseto nai, evaĝa-koririto.

17 Keriso eiaĝomato tu, maino varina ema ĝobata-iaĝiato. Mai maino varina ĝomi irau bese, Barau ĝesi fakami manaĝa tarimami ĝemi, e Iuda tauri, Barau ĝesi fakari kavinaĝi tarimari ĝeri, ema vari-fuato.

18 Ĝita mabarara, irau bese tarimami e Iuda tarimama, tu Keriso ĝenana Iauka sebona nuĝanai moĝo Tamara ĝenai bita iaĝoni.

19 Tauna moĝa, ĝomi toma tu dia tanukau e vanuĝa boru tarimami. Asiĝina, toma ĝomi tu Barau ĝena tarimari ĝesi vanuĝa sebona e Barau ĝena numa tarimami.

20 Ĝomi tu numa, fore iatanai ĝeraĝarini kavana. Barau na ĝomi tu apostolo tarimari e peroveta tarimari iatari ai eraga-kaumito, ma Keriso Iesu tu ĝemi numa daigunina o duĝuna forena baregona.

21 Keriso ĝena maĝuri nuĝanai mo numa ĝauna mabarana evaĝa-tubu-tubukau ginikauato, ma ebaregoni Rubu Veaĝai eiaĝoni Vereĝauka ĝena maĝuri nuĝanai.

22 Keriso ĝesi ĝosebonato nai, ĝomi maki Barau na tarimarima tari ĝesi eĝabi-vegogomini, benamo Barau ĝena tanu numanai ĝoiaĝoni Iauka nuĝanai.

3

Paulo ĝena ekalesia ĝauveina irau bese tarimari fakari ai

1 Tauna moĝa, au Paulo na Vari Namona ĝomi irau bese tarimami ĝemi aĝobata-iaĝiani ĝaramanai, dibura numai atanuni maĝegu. Au tu Keriso Iesu ĝena dibura tarimanai aiaĝoto, ma ĝomi iatami ai Barau ĝenai aĝurigurini.

2 Au atuĝamaĝini, ĝomi tu varau ĝoseĝaĝito, au Barau na ĝena namo lorinai mai ĝauvei eviniguto, Vari Namona, varevare-bara varina, ĝomi irau bese tarimami ĝemi bana ĝobata-iaĝia ĝana.

3 Mai vari vekuretoĝana, (mai tu ĝomi irau bese tarimami maki Barau ĝena tarimarimai ĝoiaĝoto varina), Barau na au ĝegu ai evaĝa-foforiato. Mai vari maĝea tu kotuna varau batorea ini fefa nuĝanai.

4 Mai fefa maĝa boĝo iaviani nai tu, boĝo riba-maoroni, au Keriso varina vekure-toĝana tu ma ribagu.

⁵ Barau na mai vari vekuretoġana maiġa guinenai ġetanu-iaġomato-ġoi tarimari tu asi evaġa-ribarito. Senaġi toma tu Barau na Iauka Veaġa ġenana ġena apostolo veaġari e peroveta tarimari veaġari ġeri ai ema vaġa-foforiato.

⁶ Mai vari vekuretoġana Barau na ema vaġa-foforiato varina tu maiġa: Irau bese tarimari maki Vari Namona ġenana Iuda tarimari ġesi bese sebonai e tauġani sebonai moġo beġe iaġoni. Benamo mabarabarari na Barau na ekiraġi-toreato dagarana Keriso Iesu ġenana beġe ġabiani.

⁷ Barau ġena namo e varevare-bara lorinai, mai Vari Namona maiġa bana varifju-rakao rakaoa etato. Barau ġena mai namo e varevare-bara varevarena tu ġia ġena seġuka eġauveini ġenana au eviniguto.

⁸ Aba, au tu Barau ġena tarimarima mabarari ġeri dokodokona tarimagu, senaġi Barau na ġena namo lorinai mai ġauvei eviniguto, irau bese tarimari ġoirari ai Vari Namona bana ġobata-iaġia etato. Mai Vari Namona maiġa tu Keriso ġenai maġuri e dagara namo vedaureari tarimarima tauġera na asi bita ġoitaġorini dagarari ekiraġirini.

⁹ Ema tarimarima mabarari ġeri ai bana kiragi-fofori ginikau, Barau ġena ura e boioġa tu, irau bese tarimari maki ġeri vevaġa-maġuri taunai bene iago. Mai boioġa o tuġamaġi maiġa tu tanobara evesinato monana vegata dagara mabarari eveirito Barauna ġenai vekuretoġa etanuni.

¹⁰ Barau ġena tuġamaġi tu, maitoma vauro ekalesia ġenana ġia ġena iaunega e tuġamaġi irauirauri, ġevēġitaġauni iaukari e ġeri maoro barego lelevaġi iaukari ġeri ai bene vaġa-foforiri etato. Mai iauka maiġeri tu guba fakanai ġetanuni iaukari.

¹¹ Mai tu Barau ġenai vanaġivanaġi etanuni boioġana. Barau na mai ġena boioġa maiġa tu ġita ġera Vereġauka Keriso Iesu ġenana vauro ema vaġa-foforiato.

¹² Ġita tu Keriso ġena maġuri nuġanai tatanuni, ema ġia ġenai taveġabidadamani lorinai, Barau sevina ġana tu asi garina ġesi e nuġara gwaġiġi bita raka-kavini.

¹³ Moġa lorinai au ġegu ura baregona tu asi boġono tuġamaġi-moiramoira, au amidigu-midiguni nai. Au midigu-midigu aġoitaġoni tu, ġomi namo boġono ġoitaġo ġana.

Paulo Efeso ekalesiari ġeri eġauġauto

¹⁴ Au na moġeri mabarari Tamara na eveirito dagarari atuġamaġirini nai, ġoiranai avetui-tarini ma aġuri-ġurini.

¹⁵ Ġia tu bese sebona tarimari gubai e tanobarai ġetanuni Tamari. Ma ġia na mai bese sebona arana eturalato.

¹⁶ Barau mamana marevana tu irau veġata ma barego lelevaġi naima, au na anoġiani, akirani: Ġia ġena mama marevana asikeikeina na ġia tauġena Iaukana ġenana seġuka bene vinimi, be nuġami e iaukami bene vaġa-kokoreri.

¹⁷ Korana mo dabarai tu Keriso maki ġemi veġabidadama lorinai, be ġomi nuġami ai betanuni. Ema Barau anoġiani, ġomi maki ġau ġokana e lamuna tano nuġana ġana ġevariġoni, benamo ġevelamulamu-tarini nai, ġau tano iatanai eruġa-gwaġiġini ilailanai, ġomi maki moġesina nuġami veuravini na bene vaġa-vonuri, be veuravini ai boġono ruġa-gigitari.

¹⁸ Be Barau ġena tarimarima veaġari mabarari ġesi Keriso ġena veuravini barego lelevaġina, rababana, e maukana, e varaġena, ema dodokuna boġono ribaia,

¹⁹ ema boĝono riba, mai Keriso ĝena veuravini tu riba mabarari maki evanaĝirini. Mai veuravini boĝono ribaia, be Barau tauĝena ema ĝena maĝuri mabarana na ĝomi bene vaĝa-vonuvonu-raĝemi.

²⁰ Barau ĝena seĝuka ĝita ĝerai eĝauveini tu, dagara barego lelevaĝiri eveirini; ĝita na ĝia tanoĝiani dagarari ema ĝita na tatuĝamaĝirini dagarari mabarari maki evanaĝirini.

²¹ Moĝa lorinai ĝita ekalesia nuĝanai tarimara e Keriso Iesu ĝena maĝuri nuĝanai tarimarimara guruna guruna na mabarabarara na Barau moĝo bitana vaĝa-raĝea vanaĝivanaĝi. Mai tu guruĝa moĝonina. Amen!

4

Ekalesia mabarara tu Keriso nuĝanai tauĝani sebona

¹ Au Paulo tu dibura numai atanuni, korana Vereĝauka vetuĝunaĝina aiago-viniani nai. Au na ĝomi alaunaĝimini, Barau na ekeamito maĝurina moĝo boĝono tanu, boĝono tanu-namonamo moĝo.

² Karomi vekaravari ai ĝomi tu boĝono vetore-varigo, ema manau ai boĝono tanu, boĝono vevaĝa-gwaĝigi. Ma karomi tari na veiga ĝelearini nai tu, veuravini ai nuĝami boĝono vaĝa-gwaĝiĝiri karomi ĝeri ai, be karomi tata ĝesi asi boĝono vebaru-vini, a boĝono veiau-namo moĝo.

³ Ĝita tu Iauka Veaĝa na eĝabi-vegogorato, be tasebonato, ma maino varona na ebaru-vegogorato, be maino ai tatanuni. Moĝa lorinai mai tasebonato ma maino ai tatanuni maĝurina maiĝa tu boĝono kokore, be boĝono ĝabi-gigitaria.

⁴ Ĝita mabarara tu tauĝani sebona moĝo, ema Iauka maki sebona moĝo ĝerai etanuni. Ma Barau na ĝomi ekeamito maki dagara sebona moĝo uranai ekeamito, ma ĝita toma tu mo dagara sebona moĝo tatuĝamaĝi-kauani, (mo tu maĝuri vanaĝivanaĝi).

⁵ Vereĝauka sebona etanuni, veĝabidadama sebona etanuni, babatiso veigana sebona moĝo etanuni.

⁶ Barau maki sebona etanuni, ma ĝia tu ĝita mabarabarara Tamara; e ĝia tu barego ma tarimarima mabarara iata-raĝerai etanuni, eĝita-ĝaurani, ema tarimarima mabarara fakarai eĝauveini, ma tarimarima mabarara nuĝarai etanuni.

⁷ Ma ĝita tata tu Keriso na varevare evinirato, ĝia ĝena namo e varevare-bara ilailari ai bene vinira etato kavana.

⁸ Moĝesina naima Buka Veaĝai Keriso varina maiĝesi ekirani,

“Ĝia guba ĝana ma evaraĝeto nai tu,
dibura tarimari ebarubarurito,
benamo ĝia murinai evaĝa-rakarito, ma eĝori-kaurito,
benamo tarimarima varevare evinirito.”

⁹ Mai guruĝa, “Ĝia ma evaraĝeto,” anina tu kara? Mai guruĝa, “Ĝia ma evaraĝeto,” na ĝita evaĝa-ribarani, Keriso tu dia evaraĝeto moĝo. Asiĝina. Ĝia tovtovonai tu tanobara gabigabina ĝana roĝo evariĝoto.

¹⁰ Mo evariĝoto tarimana moĝa, ĝereĝana guba mabarari tu evanaĝirito, ĝia tu tuĝuna vanigerena ĝana evaraĝeto. Ĝia moĝesi evaraĝeto anina tu, guba e tanobara mabarana ĝia na tauĝena Iaukana na bene vaĝa-vonua ĝana.

¹¹ Ma ĝia tauĝena na kotari tu apostolo ĝauveina evinirito, (mai tu ekalesia vaĝa-ruĝana ĝauveina), tari tu peroveta ĝauveina evinirito, tari tu evanelia ĝauveina evinirito, tari tu ekalesia nari ĝauveina e Barau ĝena guruĝa vaĝa-riba-iaĝina ĝauveina evinirito.

¹² Moġeri ġauvei evinirito tauna korikori tu, Barau ġena tarimarima veaġari bene rovina-toreri, ġena ġauvei beġene veiri, e Keriso tauġanina beġene vaġa-tubu ginikaua,

¹³ bene iaġo mo, ġita ġera veġabidadama ema ġera riba Barau Natuna ġenai beġea baregoni e bita sebona-korikorini, benamo bita barego-ginikauni, ema Keriso ġena veiġa e maġuri mabarana maki ġita na bita gabiani.

¹⁴ Benamo mo dabarai ġita tu dia mero raraka-rarakari kavari, be vevaġa-riba irauirauri na e tarimarima ġeri iaunega ġofaġofari na ema tuġamaġi rakavari na asi beġene ġofa-iaġora e ġofa-iaġomara; noġa moġo ġasi iavara ema ureure na ekwari-iaġoani ekwari-iaġomaiani kavana.

¹⁵ Senaġi ġita tu veuravini ai guruġa moġoniri bitana kiraġi, be Keriso ġena maġuri nuġanai dagara mabarari ai tu bitana barego. Keriso tu ġita edebarani.

¹⁶ Keriso tu tauġani debana, ma tauġani mabarana tu ġia ġena seġukai legana tata ġia na etorerito gaburi ai ġeġauveini. Ma ġia ġena seġukai komukomuri evaġa-tubukau gwaġiġirini varovarori na turiga komukomuri evaġa-tubutubu-kaurini, ema evaġa-tubutubukau gigitaririni. Benamo monana tauġani legana irauirau tauġani nuġanai tata ġena ġauvei ġeveiani, benamo tauġani ebaregoni, ema ma veuravinina ġesi tauġena etubu-baregoni.

Barau ġena doġoro tarimari ġeri tanu dabarana

¹⁷ Tauna moġa, au aurani, mai guruġa ta nakira-varami Vereġauka aranai. Au ġegu ura baregona, ġomi tu roġo mukunai ġetanuni tarimari ġeri tanu maġurinai tu asi ma boġono tanu-ġenoġoi. Korana ġia ġeri tuġamaġi tu asi aniri dagarari ġeri ai ġetorerini.

¹⁸ Ġia ġeri tuġamaġi tu mukuna furufuru, be asi ġeri tuġamaġi-faka dabarari. Barau ġena maġuri ai maki ġia tu murikanai ġetanuni, korana ġia tu asi ribari ġeri nuġa-bubu ai bene.

¹⁹ Ġia tu veiġa namori mamiraġiri ema veiġa rakavari mamiraġiri maki asiġina ġinavaġi ġemami-raġirini. Ġia tu tauġeri ġevevini-fitoġato rakava ġena, vei-taġuitaġui dabarari ai ġerakani e mata-boraġa veiaġari ġeuravini-baregorini.

²⁰ Senaġi ġomi na Keriso ġena maġuri tu dia moġesina ġoribaiao.

²¹ Ġomi na ġia varina tu moġoni ġoseġaġiato, ema Iesu ġena maġuri nuġanai guruġa moġonina Iesu ġenai etanuni tu ġevaġa-riba-iaġimito.

²² Ġevaġa-ribamito tarimari ġekirato: Gemi maġuri guineri boġono koki-fitoġari, dabuġa guineri ġokoki-fitoġarini kavana. Mo tu tarima guinena ġekiraġiato. Ġia tu dagara tari na ġeġofaiani, ma moġeri mata-ġaniġaniri ai be erakava-kwaikwaini. Ġia tu boġono koki-fitoġaia.

²³ Be ġemi tuġamaġi mabarana ma bene veiareva-ġenoġoi.

²⁴ Ema tarima variġuna ma boġono riġo-kaua, dabuġa variġuna ġoriġo-kauani kavana. Mai tarima variġuna tu Barau ilailana iobukaiobuka e veaġa eveiato.

²⁵ Moġa lorinai ġomi tata na veiġa ġofaġofari ġemina boġono tore-veġitari, benamo sevimi tarimari ġesi guruġa moġoniri moġo boġono kiraġi. Moġesi boġono vei, korana ġita mabarara tu tauġani sebona legana tata.

²⁶ Boġo baruni, senaġi vei-rakava tu asi boġono vei; e ġemi baru asi bene iaġo mo, ġaro benea keto-firiġo.

²⁷ Diabolo faka ta asi boġono vinia.

²⁸ Elemani tarimana asi ma bene lema-ġenoġoi, a bene iaġo, benea ġauvei. Ġia tauġena ġimana na ġauvei namori bene veiri, be bene ġoitaġori dagarari kotari tu asi ġeri-ġari tarimari bene vaġa-kava-iaġiri.

²⁹ Bokami na guruġa rakavari asi beġene raka-rosi. Senaġi vevaġa-kokore guruġari moġo boġono kiraġi, moira tarimari vaġa-kavari ġana, be beġe seġaġirini nai, kokore beġene ġabi.

³⁰ Ema Barau ġena Iauka Veaġa asi boġono vaġa-nuġa-metoa. Korana Iauka Veaġa tu Barau ġena vetoġa o maka ġomi ġemi ai etanuni. Moġa anina ġomi tu ġia ġena. Mani maka ġomi ġemi ai tu betanuni, beiaġoni mo, Barau na ġomi bevaġa-maġuri korikorimini ġarona.

³¹ Nuġa ġirimaġirima, baru e baru-rakavarakava, vevane ema vevaġi, e tarima vaġa-rakavari tuġamaġiri, ema guruġa rakavari mabarari boġono tore-veġitari ġemina.

³² Karomi ġesi boġono veiau-namo ema boġono veveura-vini. Tata karomi ġeri ai veiaġa rakavari ġoveirini moġeri boġono tuġamaġi-fitogari, Keriso ġena maġuri nuġanai Barau na ġemi rakava etuġamaġi-fitogarito kavana.

5

Mamai boġono tanu

¹ Ġomi tu Barau natuna, euravini-baregomini, moġa lorinai ġia boġono tovotovoa.

² Veuravini ai boġono tanu Keriso kavana. Ġita eura-vinirato lorinai, tauġena tauġanina e ġena maġuri etore-tariato ġita urarai. Ġia na tauġanina tu varevare dagarana bonana namo vedaureana dagaranai evaġa-iaġoato, ema Barau ġena ginitaġo mamoenai evaġa-iaġoato.

³ Ġomi tu Barau ġena tarima veaġami ai ġoiaġoto lorinai, kima ema mata-boraġa guruġari, veiaġa mirori guruġari, e mata-ġaniġani guruġari ġomi fakami ai asi boġono kiraġiri.

⁴ Guruġa mirori, guruġa babori, ema vaseva rakavari maki asi boġono kiraġiri, korana maġeri tu asi namo, senaġi ġomi tu Barau moġo boġono tanikiu-vinia.

⁵ Korana dagara sebona boġono riba: Ekimani tarimana, e veiaġa mirori eveini tarimana, e emata-ġaniġanini tarimana tu Keriso ema Barau ġeri Baisleiai ġia tu asi voina e asi ġena gabu. Mata-ġaniġani veiaġa tu noġa moġo kwaivakuku toma-rakarigo-vinina veiaġana kavana.

⁶ Tarimarima ġeri ġofaġofa guruġari na asi bene ġofami, korana Barau ġena baru-baregona tu manġeri veiaġa ġaramari ai ġeseġaforeni tarimari iatari ai bema vaġa-foforiani.

⁷ Moġa lorinai moġesi ġeveini tarimari ġesi asi boġono vekako.

⁸ Ġomi guinenai maki mukuna furufuru tarimari, senaġi toma ġomi Vereġauka ġena maġuri nuġanai tu mama tarimari. Ġomi tu mama natuna, be mama maġurinai boġono tanu ema boġono raka.

⁹ Mama ġwaġwana tu veiaġa e tuġamaġi namori, veiaġa iobukaiobukari, ema guruġa e maġuri moġoniri nuġari ai etanuni.

¹⁰ Vereġauka na kamara maġuri ema veiaġa euravini-baregorini boġono vetauri, be boġono ribari.

¹¹ Mukuna veiaġari ema ġauveiri tu asi ġwaġwari namori, be asi boġono veiri ema asi boġono ġauvei-iaġiri. A ġomi na moġeri veiaġa e ġauvei tu boġono vaġa-foforiri, mo tu vei-rakava veiaġari.

¹² Korana mai seġafore tarimari na kara ġevei-vekuretoġarini, moġeri tu bokiraġirini ai moġo bemaiakamuni.

¹³ Senaġi mama na tu moġeri dagara mabarari evaġa-fofori ginikaurini, be mamai tu vetoġari korikori ġefoforini,

¹⁴ korana mama na vauro dagara vetoġari korikori evaġa-foforirini. Moġesi naima ġera guruġa ta ekirani,

“Roġo ogenani tarimamu notataġa!

Mase na novariġisi!

Be Keriso na bene mama-tarimu.”

¹⁵ Moġa lorinai, ġemi veiġa loriri boġono toreri, babo tarimari kavari asi boġono vei, senaġi iaunega tarimari boġono tovotovori.

¹⁶ Ġemi taimi mabarana boġono ġauvei-iaġi ginikauri, a ta asi boġono fitoġa-kavaia, korana toma tu nega rakava-kwaikwaina.

¹⁷ Tauna moġa, asi boġono vei-babobabo, senaġi Vereġauka ġena ura tu kara, moġeri boġono tuġamaġi-fakari, be boġono ribari.

¹⁸ Wain asi boġono niu-lelevaġi, bevaġa-babomini ġesi. Mo veiġa na ġemi maġuri bevaġa-rakavaiani. A ġomi tu Iauka Veaġa na neġi bene vaġa-vonuvonu-raġemi.

¹⁹ Karomi Salamo ai e Barau vaġa-raġena mariri ai ema Iauka Veaġa na evinimini mariri ai boġono vaġa-guruġari. Boġono mari ema nuġami mabarari ma iakumi ġesi Vereġauka boġono vaġa-raġea.

²⁰ Vanaġivanagaġi ġera Vereġauka Iesu Keriso aranai Tamara Barau boġono tanikiu-vinia dagara mabarari dairi ai.

²¹ Karomi gabureri ai boġono tanu, moġesi boġo veini tu Keriso boġo gubakauani.

Veġaraġo vavineri ema tauri

²² Veġaraġo vavinemi, Vereġauka ġena veġitaġau gaburenai ġotanuni kavana, ġaraġomi ġeri veġitaġau gaburenai boġono tanu.

²³ Korana tau tu ġaraġona vavinena ġena deba tarimana, Keriso ekalesia ġena deba tarimana kavana. Keriso tu ekalesia ġena vevaġa-maġuri tarimana. Ekalesia tu Keriso tauġanina.

²⁴ Vaġa-ilailana ekalesia Keriso ġena veġitaġau gaburenai etanuni kavana, vavine maki ġaraġori tauri ġeri veġitaġau gabureri ai beġene tanu dagara mabarari ai.

²⁵ Tau, ġaraġomi vavineri boġono ura-viniri, Keriso na ekalesia eura-viniato ilailanai, benamo ġia uranai Keriso tauġena ġena maġuri etoretariato.

²⁶ Keriso moġesina eveito tu, ekalesia bene vaġa-veaġaia, ġena tarimari-mai beġene iaġo ġana. Ġia na ġena guruġa na e nanu na eġuriġiato, evaġa-veaġaiato.

²⁷ Benamo Keriso tauġena ġoirana ekalesia marevana baregona na benema vaġa-ruġa-taria ġana. Benamo ekalesia ġia ġoiranai bene ruġa tu, ġenai miro misina ta maki asiġina, kefi ġemakuku-makukuni kavari maki asiġina, ema rakava misina ta maki asiġina ġinavaġi. Senaġi ekalesia Keriso ġoiranai tu veaġa ema vaġa-daġana kererena misina ta maki asiġina ġinavaġi bene ruġa-tari.

²⁸ Mai dabara sebonai tau na ġaraġori vavineri beġene ura-viniri. Beġene ura-viniri tauġeri tauġaniri ġeura-vinirini ilailanai. Ġaraġona vavinena eura-viniani tarimana tu ġia tauġena maki eveura-vinini.

²⁹ Korana tau ta na ġia tauġena tauġanina vaġa-rakavana tu asi eurani, senaġi eġubuanu e eġitaġau-ginikauani, Keriso na ġena ekalesia eveiani kavana.

³⁰ Korana ġita tu ġia tauġanina legana.

³¹ (Tau e vavine tu tauġanina sebona, Buka Veaġai ekirani kavana, ekirani), “Moġesi naima tau na tamana e sinana beraga-kwanerini, benamo ġaraġona vavinena ġenai bema-kafakauni, benamo tauri ruarua tauġani sebonai beġe iaġoni.”

³² Mai guruġa ema maġuri maiġa tu vekure-toġa, ma anina tu barego lelevaġi. Au na Keriso ema ekalesia ġeri veġaraġo akiraġirini.

³³ Senaġi ma nakira: Ġomi tata na maki ġaraġomi vavineri boġono ura-viniri, tauġemi tauġanimi ġoura-vinirini kavana. Vavine na maki ġaraġomi tauri boġono gubakauri.

6

Natu e tama sina

¹ Natu, tamami e sinami garori boġono seġaġiri Vereġauka ġena maġuri nuġanai ġotanuni nai, korana mo tu veiġa maorona.

² “Tamamu e sinamu bono gubakauri,” korana mai tu taravatu ginigu-inena ma kiraġi-torena ġesi dagarana:

³ “Be ġemu tanu maġurina bene namo ema mai tanobarai ġemu tanu-maġuriri beġene mauka.”

⁴ Ma tama na maki, natumi asi boġono vaġa-baruri, senaġi Vereġauka ġena vevaġa-riba guruġari ema sisiba guruġari boġono viniri. Be moġeri guruġa e veiġa beġene korana-iaġiri ġeri tanu garori mabarari ai.

Tuġu-rakaorakao merori e ġeri baregori

⁵ Tuġu-rakaorakao meromi, ma vegubakaumi e ma garimi ġesi mai tanobarai ġeġita-ġaumini tarimari garori boġono seġaġiri. Ġomi ġeġita-ġaumini tarimari maniġeri tu ma nuġami mabarari ġesi boġono seġaġi-viniri, Keriso nuġami mabarari ġesi boġoro seġaġi-vinia ilailanai boġono seġaġi-viniri.

⁶ Tarima tari tu ġeġita-ġaurini tarimari iauri ġevaġa-namori ġana tu ġoirari ai ġeġauvei-ginikauni, senaġi ġeġita-ġaurini tarimari ġeraka-doġe-muriġini tu asi ġeġauvei-kokoreni. Ġia ġeri veiġa na asi boġono iaġo. Ġomi tu Keriso ġena vetuġunaġi tarimami lorinai, ma nuġami mabarari ġesi Barau ġena ura boġono veia.

⁷ Nuġami mabarari ma namori ġesi vetuġunaġi boġono iaġo-vini, Vereġauka ġenai boġoro veia kavana, a dia tarimarima ġeri.

⁸ Korana ribami, Vereġauka na ġemi ġauvei namori ġoveirini voiri tata bevinimini. Enabe ġomi tu tuġu-rakaorakao tarimami o fakai e maġuri namonai ġotanuni tarimami, voimi tata bevinimini vegata.

⁹ Ġomi veġitaġau tarimami maki, ġemi tuġu-rakaorakao merori ġeri ai veiġa namori boġono vei. Veiġa metori e vaġa-gariri veiġari ġeri ai asi boġono vei, korana ġomi ma ribami, ġia ema ġomi eġita-ġaumini Verena baregona tu gubai etanuni. Ema ma ribami maki, ġia na tarimarima ġeri vetoġai tu asi eġabi-raġerini, ġia ġenai tarimarima tu mabarari ilaila moġo.

Vetari dabuġari

¹⁰ Ġegu guruġa magona tu maiġa: Boġono kokore Vereġauka ġena maġuri nuġanai, ema Vereġauka ġena seġuka na bene vaġa-kokoremi.

11 Barau ġena vetari dabuġari mabarari boġono veiri, be Diabolo ġena iaunega boioġari ġofaġofari eveirini nai, boġono kokore, be boġono tore-
ġauri.

12 Korana ġita tu dia tarimarima ġesi taveitarini. Asiġina. Ġita tu ġeveġitaġauni iaukari baregori, e ġeri maoro barego iaukari, e mai tano-
barai mukuna ġeġita-ġaunai iaukari, ema iauka rakavari asisebo guba
gaburi ai ġetanuni iaukari ġesi tavevaġini.

13 Moġa lorinai Barau ġena vetari dabuġari mabarari na ġovedabuġa, be
ġaro rakava kwaikwaina bene iaġoma nai, ġomi tu boġono ruġa-gigitari,
ema ġauvei mabarari bogo vei-ġosirini murinai, ġomi tu roġo boġono ritoġo-
gwaġiġi.

14 Be, boġono ruġa-gigitari, ma maiġesi boġono vedabuġa: Gabakami
ai guruġa moġonina boġono toua, gabaġau gabakami ai ġotouani kavana.
Vei-iobukaiobuka tu koba kouġauna ġana, funu dabuġa kavana kobami ai
boġono kafa-kauri.

15 Ema kwakumi ai tu maino varina namona boġono fiua veiġana boġono
veia, tamaka ġoveirini kavana.

16 Moġeri muriri ai tu veġabidadama ġesina boġono ġabi-vaisia, monana
Diabolo ġena veiġa rakavari na bedibamini dibari ma karava-karavari ġesi
boġo kourini e boġo lau-busebuserini riba.

17 Ema vevaġa-maġuri boġono ġabia, ġemi kwarau ai boġono vaġa-
iaġoa. Ema Barau ġena guruġa boġono ġabi-vaisia vetari baġana kavana,
Barau ġena guruġa tu Iauka Veaġa ġena vetari baġana.

18 Iauka Veaġa ġena seġuka nuġanai boġono ġauġau-vanaġi vanaġi. Ġemi
ġauġau ai tu ġauġau dabarari irauirauri ai boġono ġuriġuri ema ġemi ura
daġarari mabarari noġinoġiri boġono vei. Tauġemi lorimi maki boġono
vetore e rakava boġono vaġa-darereri, ema Barau ġena tarima veaġari
mabarari iatari ai boġono ġauġau-vanaġivanagi.

19 Au maki iatagu ai boġono ġuriġuri. Be naguruġa ġana, bokagu
bana keoa tu, Iauka Veaġa na guruġa bene vinigu, be mai Vari Namona
vekuretoġana tu asi garigu ġesi tarimarima bana kira-varari.

20 Au tu mai Vari Namona maġa bana fiua ġana tarimagu. Ma au tu mai
Vari Namona uranai dibura numai ma seinigu atanuni. Boġono ġauġau, be
Barau na bana kiraġia etoni ilailanai, asi garigu ġesi bana kiraġi-foforia.

Guruġa magona

21 Tikiko tu ġita tarikakara namona ta ema ġia tu ma ġena vetuġamaġikau
Vereġauka ġena maġuri nuġanai. Dagara mabarari, au aiġesina atanuni e
kara aveini variri mabarari tu boġono ribari ġana, be Tikiko na vauro beasi
kira-varamini.

22 Au na ġia tu moġesina naima atuġu-iaġosiani. Bene iaġosi, be ġnai
ġema tanu maġurina mainai tu aiġesina boġonoasi ribari, ema beneasi vaġa-
gwaġiġimi.

23 Maino tarikaka mabarami ġesi bene tanu. Tamara Barau ema
Vereġauka Iesu Keriso ġerina eiaġomani veuravinina ma veġabidadamana
ġesi maki tarikaka mabarari ġesi bene tanu.

24 Barau ġena namo e varevare-bara tu, ġera Vereġauka Iesu Keriso asi
ekorini veuravinina na ġeuravini-vanaġi vanaġiani tarimari mabarari iatari
ai bene tanu.

PAULO ĜENA TORETORE FILIPI EKALESIARI ĜERI

Filipi vaĝa-foforina guruĝari

Ekalesia doĝorona Filipi ai tu Paulo ema Silas ĝerina eĝorato, mo tu Paulo ĝena evelenia varivarina vaĝa-ruaruana eveiato taiminai (Apostolo 16).

Paulo na mai fefa tu Romai ediburato-ĝoi nuganai etoreato. Mai fefa tu laĝani 60 beiaĝo 61 fakanai ta etoreato, mo tu Iesu emaseto murinai.

Mai buka anina baregona tu "Iaku ema verere", ema ĝena siri baregona tu karoa 4:4. Mai fefa nuganai "iaku" tu ĝutuma boiavi-ĝoitaĝorini: 1:4-6; 1:14-18; 1:25-26; 2:2; 2:14-16; 2:17-18; 2:25-29; 3:1-3; 4:4; 4:10-12; ema vegabidadama, veuravini, nuĝa-sebona ema vetore-variĝo o vevaĝa-manau boĝo ĝitaiani tu iaku ĝenana etubu-raĝeni.

Mai fefa etoreato tu, 1) ekalesia doĝorona bene tanikiuri, ĝevarevare-viniato lorinai, ema bene vaĝa-ribari bevarivaririni; 2) bene launaĝiri, Keriso ĝena tuĝamaĝi beĝene tovotovoa, ĝeri tuĝamaĝi sebonai moĝo beĝene torea; 3) bene launaĝiri, taimi namori ai o rakavari ai beĝene iaku moĝo ema ĝeri vetarikaka Iesu Keriso ĝesi tu bene tanu asi bene iaĝaiaĝa.

Paulo na mai fefa tu maĝesina eboioĝaiaĝo:

1. Keriso tu ĝita ĝera maĝuri - karoa 1
2. Keriso tu ĝita ĝera tuĝamaĝi ai bene tanu - karoa 2
3. Keriso ĝenai matara bene tubukau - karoa 3
4. Keriso tu ĝita ĝera kokore korana - karoa 4

¹ Au Paulo ema Timoteo, Keriso Iesu ĝena vetuĝunaĝi tauma, na ĝomi Filipi ai Barau ĝena tarimarima veaĝari ma ĝemi ekalesia guine-iaĝina tarimari ema vevaĝa-kava tarimari ĝesi atore-vinimini. Ĝomi tu Keriso Iesu ĝesi varau ĝosebonato.

² Barau ĝita Tamara ema ĝera Vereĝauka Iesu Keriso ĝerina varevare-bara ema maino ĝemi ai bene tanu.

Paulo na Barau evaĝa-namoato

³ Gomi atuĝamaĝimini negari mabarari ai, ĝegu Barau atanikiu-viniani.

⁴ Ĝegu ĝauĝau ai vanaĝivanaĝi ĝomi mabarami iatami ai aĝuriĝurini ma iakugu ĝesi,

⁵ korana ĝemi vevaĝa-kava dabarari namori na ĝovaĝa-kavaguto Vari Namona varifiunai, Vari Namona ĝoĝabi-raĝeato ĝarona na beiaĝoma mo initoma.

⁶ Ma ribagu maoro, Barau na mai ĝauveĝi namona, nuĝami ai evaĝa-foforiato ĝauveina tu, bevesiriĝuni, beiaĝoni mo, Keriso Iesu ĝena ĝenoĝoi ĝaronai vau bevaĝa-kori ginikauani.

⁷ Gomi mabarami ĝegu vemamiraĝi na evaĝa-moĝoniani, ĝomi tu au nuĝagu ai roĝo ĝotanuni. Aba, dibura numai atanuni nuĝanai, o Kota ĝeseĝaĝini tarimari ĝoirari ai Vari Namona akiraĝi-foforiani e gogobana aragani nuĝanai maki, ĝomi tu au nuĝagu ai vegata. Korana ĝomi mabarami maki Barau na ĝena varevare-bara evinimito, au eviniguto kavana.

⁸ Barau ma ribana vedaurea, au ĝomi akiramini, au ĝegu veuravini ĝomi mabarami ĝemi ai tu barego vedaurea, Keriso Iesu na euravini-baregomini kavana.

⁹ Barau anoĝiani, ĝemi ai veuravini bene tubu-barego vedaurea, ma riba ema iaunega bene vinimi, be Barau ĝena ura boĝono riba-ginikauri.

10 Monana vauro boĝo ribani, dagara namori tu aiĝeri na ĝemi tanu beĝe vaĝa-namorini rakava mabarari ĝerina, benamo Iesu Keriso ma beĝenoĝoi-iaĝomani ĝaronai, ĝomi tu asi vetoukaumi e asi ĝemi kerere ta maki.

11 Ema veĝa namori e iobukaiobukari mabarari, Iesu Keriso ĝenana ĝeiaĝomani dagarari, ĝomi ĝemi ai beĝe tanuni, Barau vevato-iaĝina e vaĝa-raĝena ĝana.

Paulo tu dibura numai etanuni, senaĝi Vari Namona ebaregoni

12 Tarikakagu, ĝegu ura boĝono riba, au beĝe diburagu o kara beĝe ĝora ĝegu ai dagarari na Vari Namona ĝena tubu tu asi beĝe vaĝa-rakavaia. Asiĝina. Moĝeri na tu Vari Namona ĝena tubu beĝe vaĝa-baregoa.

13 Mai maĝuri ĝenana Kaisara, Roma ĝeri vere, ĝena numa ĝeĝita-ĝauidi tauri ema tarimarima mabarari maki beĝe riba, au tu Iesu Keriso ĝena vetuĝunaĝi ai aĝo-vinini ĝaramanai, dibura numai atanuni.

14 Ma ĝegu tanu dibura numai ĝenana maki au tarikakagu ĝutuma ĝeri veĝabidadama Vereĝauka ĝenai beĝe gwaĝiĝi naima, Barau ĝena guruĝa ma kokoreri ĝesi ĝeĝobata-iaĝiani.

15 Moĝoni, tarima kotari na ĝegu ĝauvei namo dainai, ĝemama-viniguni. Ĝeri ura tu au ĝevaĝa-rakavagu ĝetoni, naima Keriso ĝeĝobata-iaĝiani. Senaĝi kotari na tu nuĝa-namo ai ĝeĝobata-iaĝiani.

16 Maiĝeri tu veuravini ĝenana ĝeĝobatani, korana ribari, au diburai atanuni tu, Vari Namona gogobana bana raga ĝana Kota tarimari ĝoirari ai.

17 A tarima kotari na Keriso ĝeĝobata-iaĝiani tu dia nuĝa-namo ai, senaĝi tauĝeri arari beĝene vaĝa-raĝeri ĝana. Ĝeri tuĝamaĝi tu, au dibura numanai roĝo atanuni nuĝanai, ĝegu meto ĝevaĝa-baregoa ĝetoni.

18 Bevaitovo, au ĝegu iaku tu ebaregoni. Korana nuĝa-namo ai Keriso ĝeĝobata-iaĝiani ba asiĝina, senaĝi dagara baregona tu Keriso varina bene fiu-rovorovo dabara mabarari ai. Ma ĝegu iaku maki bebarego-iaĝoni moĝo.

19 Korana ĝemi ĝauĝau ai Barau ĝonoĝiani ema Iesu Keriso Iaukana na evaĝa-kavaguni. Moĝa lorinai au ribagu, au tu maĝuri badoĝariani.

20 Ĝegu ura baregona ema dabaragu mabarana ĝesi akirani, au tu asiĝina ĝinavaĝi bana moira ĝegu ĝauvei nuĝanai. Moĝesi nai inıtoma dibura numai vanaĝivanagi akokoreni kavana bana kokore, be au taugu mabarana ĝesi Iesu Keriso arana ma bana vaĝa-raĝea ĝegu maĝuri ĝenana o ĝegu mase ĝenana.

21 Be au ĝegu ai maĝuri tu kara? Iesu Keriso moĝo! Moĝa lorinai mase au ĝegu ai tu dagara namona.

22 Betaĝu bema roĝo bamaĝuri-taĝoni nai, ribagu Keriso ĝena ĝauvei roĝo haveiani, senaĝi asi aribani, aiĝa bara ĝabia, mase ba maĝuri?

23 Au tu dagara ruarua auravini-baregorini: Ĝegu ura mai maĝuri bara raga-kwaneana, be Keriso sevinaĝi bara tanu tu dagara namo vedaureana moĝo;

24 senaĝi namona tu ĝomi bana vaĝa-kavami ĝana, be mai tauĝani nuĝanai roĝo bana tanu.

25 Au tu ribagu, au roĝo maĝuri batanuni. Ĝomi ĝesi roĝo bita tanuni, korana ĝemi veĝabidadama vaĝa-tuburi ema ĝemi iaku vaĝa-baregori ĝana.

26 Au ma baiaĝosini neganai, ĝomi tu boĝo iakuni au ĝegu ai, ema Keriso Iesu boĝo vaĝa-raĝeani.

Ĝemi tanu

²⁷ Dagara sebona tu Keriso ĝena Vari Namona na ekiraĝiani ilailanai boĝono tanu. Baiaĝosini ĝitaĝitami ba manaĝa na moĝo varimi baseĝaĝini, baribani, ĝomi tu nuĝa-namo ai ĝoritoĝo-gigitarini ema nuĝa sebonai Vari Namona ĝoveseĝaĝi-vevini-iaĝiani ma kokoremi ĝesi.

²⁸ Ĝebaru-vinimini tarimari na asigina ĝinavaĝi beĝene vaĝa-garimi. Monana ĝeri ai vetoĝa beveiani, ĝia tu Barau na bevaĝa-rakava kwaikwairini, a ĝomi tu Barau na bevaĝa-maĝurimini.

²⁹ Ĝomi tu dia Keriso ĝena varevare-bara e namo lorinai Keriso ĝovaĝa-moĝoniani tarimami ai goiaĝoto moĝo, senaĝi ĝomi tu Keriso ĝena midigu-midigu ai maki boĝono midigu ĝana ĝia aranai.

³⁰ Ĝomi maki initoma au ĝesi bisini vetari-vegogo. Mai vetari tu vetari guinena ĝoĝitaiato-ĝoi vetarina ini roĝo ma ĝoseĝaĝiani vetarina roĝo avetari-iaĝiani.

2

Keriso ĝena vevaĝa-manau ema iaru-korokoro

¹ Ĝemi maĝuri Keriso nuĝanai monana evaĝa-kokoremini ba? Ema ĝena veuravini na ĝemi tuĝamaĝi evaĝa-gwaĝiĝirini ba? Ĝomi na Iauka Vevaĝa ĝatami ai ĝovaĝa-iaĝoato ma ĝotanu-vegogoni ba? Ma ĝemi vevetuĝaĝwa ema vevaĝa-kava ĝatami tata ĝeri ai ĝoveirini ba?

² Moĝa lorinai anoĝimini, boĝono vaĝa-iaku korikorigu, ĝemi tuĝamaĝi vegogo ai, veuravini sebonai ema nuĝami e iaukami maki sebonai boĝono tanu.

³ Dagara ta asi boĝono veia vevaĝa-raĝe tuĝamaĝina maĝurina ema veia vi maĝuriri ai, senaĝi ĝomi tauĝemi boĝono vevaĝa-variĝo tata fakami ai, a karomi boĝono ĝabi-ĝesitaĝori.

⁴ Karomi ĝeri namo maki boĝono vetau, a dia ĝomi tauĝemi ĝereĝami ĝemi namo moĝo.

⁵ Ĝemi veiĝai Keriso Iesu kavana boĝono vei, ĝena tuĝamaĝi boĝono ĝabia:

⁶ Ĝia tu dagara mabarari ai

Barau ĝesi ilaila,

senaĝi asi etuĝamaĝito,

mo maĝuri moĝa bene ĝabi-taria.

⁷ Ĝia tu tauĝena evekiragi-fitoĝato,

benamo vetuĝunaĝi merona kavanai eiaĝoto.

Ĝia maki tarimarima kavana eĝorato,

benamo ĝita fakarai ema tanuto.

⁸ Ĝia tu eveĝwa-variĝoto ema Barau eseĝaĝi-viniato-ĝoi mo ĝena mase, aba, satauro ai emaseto noĝa moĝo vei-rakava tarimana ta kavana.

⁹ Moĝa lorinai Barau na eĝabi-vaiaĝo guba tuĝunai,

ma ara namo vedaureana eviniato.

Mo ara tu ara ta ĝesi asi ilaila.

¹⁰ Iesu arana bakunai guba aneruri,

e tanobarai ĝetanuni tarimari,

ema tanobara gaburenai o mase gabunai ĝetanuni tarimari mabarari beĝene vetuitui-tari ĝia ĝoiranai.

¹¹ Ema mea mabarari na Iesu Keriso beĝene kiraĝia “Vereĝauka”, Barau ĝita Tamara vevato-iaĝina ĝana.

Bitana mama-rovorovo tanobara ĝena mama

12 Au ġatagu mabarami, vanaġivanaġi au ġoseġaġi-viniguto-ġoi ġera ġauvei vegogo ai kavana murigu ai maki boġono seġaġi-vinigu veġata. Boġono ġauvei ma garimi ema ma ġoġo-ġoġomi ġesi, maġuri boġono doġaria uranai.

13 Korana Barau tu ġomi nuġami ai eġauveini, ġomi elaunaġimini e kokore evinimini, ġena ura boġono veiri ġana.

14 Ġauvei mabarari asi mugumugumi ema asi vanevanemi ġesi boġono ġauvei-iaġiri.

15 Be ġomi tu Barau natuna asi vetoukaumi ema namo vedaureami ai boġono iaġo, mai tanobara rakava kwaikwai ema ġevei-rakava-moġovaġini tarimari fakari ai; be boġono mama-rovorovo, noġa moġo visigu boġi ai ġemamani kavana.

16 Mo tu bema maġuri guruġana boġo korana-iaġiani e boġo vari-fiuani nai. Moġa bogo veiani nai, au tu ma ġegu maoro havekokorokuni ġomi ġemi ai Keriso ma beġenoġoi-iaġomani ġaronai. Korana mo ġaro ai au tu baribani, au ġegu vekwaraġi ema ġauvei ai tu asi avekwaragi-kavato.

17 Bere au bara mase, ma raragu bere vebubu-rovorovo, noġa moġo ġomi ġemi veġabidadama varevarena Barau ġoviniani kavana. Irau moġesi nai, au tu aiakuni, ema ġegu verere maki ġomi ġesi tavei-sebonaiani.

18 Mai dabara sebonai ġomi maki boġono verere, be mabarara bitana verere-vegogo.

Timoteo batuġu-iaġosiani

19 Bema Iesu Vereġauka ġena ura nai tu, atuġamaġini, Timoteo tu batuġu-iaġosiani; be ġomi varimi banama seġaġia nai, au nuġagu benema gena-tari.

20 Timoteo ġereġana na moġo au ġegu vemamiraġi eribaiani, ema ġomi ġobimi vetuġamaġina evei-baregoni.

21 Tarimarima mabarari tu tauġeri ġeri maġuri moġo loriri ġetorerini, a Iesu Keriso ġena ġauvei tu asi ġevetauani.

22 Ġomi tu ribami ginikau, ġia vetoġana ema ġena vetuġamaġikau, kamasi ġia e au, noġa tama ma natuna ġeġauvei-vegogoni kavana, Vari Namona ġaġobata-iaġiani.

23 Moġa lorinai bana tuġu-iaġosi-ġarimoġia, maġuri mainai kamasi bevetoreni ġegu ai bana riba vau.

24 A ġegu vetuġamaġikau Vereġauka ġenai atoreani, au maki vau mani ma baiaġosini ġemi ai.

Epafrodito ġena iaġosi

25 Ġegu tuġamaġi ai akirani, namona tu tarikakara Epafrodito ma bana tuġu-ġenoġoi-iaġosia. Ġia maki au ġesi ġaġauveito e Keriso ġena vetari ai ġavetari-vegogoto tauna. Ġomi maki vetuġunaġimi eveito, au ġegu ai ġotuġuato nai, ġemi varevare dagarari na bene vaġa-kavagu ġana.

26 Ġia maki eura-baregoni ġomi bene ġitami. Ema enuġa-vekwaraġini ġemi ai, korana ġena keve varina ġoseġaġiato nai.

27 Moġoni veġata, ġia tu ekeve-rakavato, dori emaseto, senaġi Barau ġena vevetuġaġwa ġia iatanai, ema dia ġia iatanai moġo, senaġi au iatagu ai maki, korana ġegu nuġa-meto bebaregoni garina.

28 Moġa lorinai ġegu ura baregona bana ragatuġu-iaġosia ġemi ai, be boġono ġitaia ma boġono iaku, benamo au ġegu nuġa-vekwaraġi bene meraġa kekei.

²⁹ Boġono ġabi-raġea ma iakumi ġesi ġera Vereġauka aranai, ema ġemi vegubakau marevana bene fofori tarima maiġesiri ġeri ai.

³⁰ Korana ġena maġuri ġaramana asi eveito, ema dori emaseto, korana Keriso Varina Namona ġaramanai. Vetoġa maiġesina ġegu vevaġa-kava ġomi na ġoro vinigu kavana tu ġia na au ema vaġa-kavaguto.

3

Keriso evaġa-moġoniani tauna tu vei-iobukaibuka tarimana

¹ Tarikakagu mabarami, ġegu guruġa magona nuġanai maiġesi nakira: Boġono iaku, korana Vereġauka ġesi ġokaro-vekafani nai. Asi bagauni, guruġa guineri batuġu-ġenoġoi ġenoġoini, korana ġomi ġobimi toretoreri ġana.

² Lorimi boġono vetore ekalesia vaġa-rakavana tauri gariri. Ġia tu kwaiva rakavari kavana, ġeri tuġamaġi tu ġita mabarara tauġanira kefiru bitana lama-vaġiri ġetoni, Isaraela besena ġeveini kavana.

³ Senaġi tauġani kefiru lamavaġi veiġana korikorina tu ġita na taġabiato, a ġia tu asiġi: Ġita tu Iauka Veaġa ġena seġukai Barau tatutuġu-tari viniani, ema Keriso Iesu ġenai tavetuġa-maġikauni, ema ġera veġabidadama tu dia tauġani ai vetoġa ġeveini moġeri ai tatoreani.

⁴ Bere tauġani ġena vetoġa ema ġera veiġa dagara baregori nai, ġegu veġabidadama tu tauġani ġena vetoġa dagarari ema ġegu veiġa ġeri ai bara torea riba. Bema ta ġena veġabidadama tauġanina ġena vetoġa dagarari ema ġena veiġa ġeri ai bene torea etoni nai, au tu ma ġegu maoro moġeri dagarai bara veġabidadama.

⁵ Amaġurito, ġaro vaġa-imaima toitoinei (8) tauġanigu kefiru ġelama-vaġiato. Au tu Isaraela tarimagu, Beniamina ġena doġoro tarimagu, Heberu rarari tarimagu korikori. Iuda tarimari ġeri taravatu akorana-iaġi ġinikauato-ġoi, korana au tu Farisea tarimagu.

⁶ Barau ġena taravatu bana korana-iaġi ġinikaua ġaramanai tu, ekalesia doġorona avaġa-midigu midigurito. Ema Iuda ġeri taravatu mabarabarari akorana-iaġi ġinikau ġinikaurito-ġoi, asi ġegu vei-rakava ta.

⁷ Moġeri dagara mabarari guinenai tu atuġamaġi-baregorito-ġoi; senaġi inıtoma Keriso ama ribaiato nai, mo dagara guineri mabarari aġitarini tu asi ġeri namo ta maki.

⁸ Moġoni veġata, dagara mabarari tu asi tauri dagarari, senaġi dagara baregona sebna moġo tu Keriso Iesu, ġegu Vereġauka, bana riba-ġinikaua. Oba, dagara mabarari momo ai ġeiaġoto au ġegu ai, Keriso moġo bana ġabigigitarıa ġana uranai.

⁹ Ġegu ura ġia ġesi bana sebna-korikori, korana ribagu, taravatu ekorana-iaġi ġini-kauani tarimana Barau ġoiranai ġia tu dia vei-iobukaibuka tarimana, senaġi Keriso evaġa-moġoniani tarimana moġo; korana Barau na vei-iobukaibuka tarimarai bekiragıirani dabarana sebna tu veġabidadama ġenana moġo.

¹⁰ Ġegu ura baregona tu Keriso bana riba-ġinikaua, ema mase na evaġa-vaısi-toveato seġukana bana ġabia; ema emidiguto midiguna maki bana mami-tovoa, ma ġia ġena mase kavanai au maki bana mase.

¹¹ Mainana vau atuġamaġini, au maki mase na bavaisıraġe-ġenoġoini.

¹² Au asi akirani, moġeri mabarari varau aġabırto, o varau anamo-vedaureato, asiġina. Senaġi au tu avekwaragıi-rakavani, auna bana ġabia ġana, korana Keriso Iesu ġena kwalimu ai au maki eġabıguto ġia ġena.

¹³ Moḡoni, tarikakagu, asi akirani varau akwalimuto atoni, asiḡina. Dagara sebona moḡo tu, maḡuri guineri atuḡarekwarito, ma ḡoiragu dagarana bana goitaḡoa kokorena moḡo avetauani.

¹⁴ Initoma tu araga-maoromaoroni, kiraḡitore makana aiaḡo-viniani, mo kwalimu voina bana ḡabia uranai, dagarana tu Barau ḡena maḡuri gubai. Korana Barau na Keriso Iesu ḡenana ekeaguto, mo maḡuri bana ḡabia ḡana.

¹⁵ Ḡita ḡera vegabidadamai taruḡa-gwaḡiḡito taura tu maḡesi bisini tuḡamaḡi-vegogo. A ḡomi betaḡu dagarara tari ai ḡemi tuḡamaḡi tu irau nai, Barau na vau tuḡamaḡi-faka bene vinimi.

¹⁶ Dagara sebona, iauka maḡuriri namori ḡita na varau taḡabirito moḡeri bitana ḡabi-gigitariri.

¹⁷ Tarikakagu mabarami, au boḡono tovtovogou. Veiḡa namo ḡeveini tarimari boḡono marereri e boḡono tovtovori maki, vevaḡa-ḡita namori avaga-ḡitamini kavana.

¹⁸ Korana varau avaga-guruḡa ḡenoḡoi-ḡenoḡoimito-ḡoi, senaḡi ini tu ma avaga-guruḡamini ma taḡigu ḡesi: Ḡutuma ḡekirani, Keriso murinai ḡerakani ḡetoni, senaḡi ḡeḡofaḡofani, Iesu Keriso ḡena satauro ḡevetari-viniani.

¹⁹ Ḡia varau rakava gabuna ḡana ḡeiaḡoni, korana ḡeri barau tu ḡia tauḡaniri na ḡeiau-iaḡirini dagarari. Ḡeri veiḡa rakavari, ḡere maiaka-iaḡiri veiḡari, ḡeveiavi-iaḡirini. Ema mai tanobara dagarari moḡo ḡetuḡamaḡi-gigitaririni.

²⁰ A ḡita tu Guba Basileia tarimara. Moḡa lorinai ḡera vevaḡa-maḡuri tauna, ḡera Vereḡauka Iesu Keriso ma iakura ḡesi tanariani, guba tuḡuna na beiaḡomani.

²¹ Ḡia na ḡita mai tauḡanira moiramoirari maiḡeri bekurevorini, benamo ḡia tauḡanira namo vedaureana kavanai beḡe iaḡoni. Korana ḡia seḡukana na dagarara mabarari ḡia ḡena veḡitaḡau gaburenai beḡe tanuni.

4

Sisiba guruḡari tari

¹ Tauna moḡa, tarikakagu, Vereḡauka ḡena maḡuri nuḡanai boḡono ruḡa-gwaḡiḡi. Au na auravini-baregomini ema bana ḡitami veḡata atoni, korana ḡomi tu au ḡegu verere korana e ḡegu kwalimu vetoḡana.

² Euodia ema Sintike, anoḡimini, nuḡami beḡene sebona, korana ḡomi tu Vereḡauka ḡena doḡoro vavinemi.

³ Ḡoi maki, Sisigo, au karogu namona, anoḡimuni, mani vavine kika bono vaḡa-kavari, ḡia maki au ḡesi ḡaḡauvei-vegogoto-ḡoi Vari Namona fiufiunai, e Klement ema ḡita karora tari maki. Ḡia arari tu Barau ḡena maḡuri vanaḡivanaḡi bukanai varau etorerito.

⁴ Vereḡauka ḡena maḡuri nuḡanai ḡaro mabarari ai boḡono iaku. Ma nakira: Boḡono iaku.

⁵ Ḡemi manau e nuḡa-marana boḡono vevaḡa-ḡita-iaḡiri tarimarima ḡeri ai. Korana Vereḡauka ḡena iaḡoma bekavinaḡi-rakava.

⁶ Dagara ta tuḡamaḡi-vekwaraḡina asi boḡono vei, senaḡi vanaḡivanaḡi ḡemi rabu dagarari ḡauḡau ai Barau boḡono noḡia ma tanikiumi ḡesi.

⁷ Benamo Barau na ḡena maino, ḡita mabarara ḡera riba e tuḡamaḡi-faka evanaḡiato mainona, bevinimini, ma mo maino na ḡomi lorumi ema ḡemi tuḡamaḡi mabarari benari-ginikaurini, Keriso Iesu ḡena maḡuri nuḡanai ḡotanuni dainai.

8 Tarikakagu mabarami, ġegu toretore magona rekenai nakira, vanaġivanaġi veiġa maiġesi kavari boġono tuġamaġi-iaġiri: Maġuri moġoniri, dagara marevana irau veġata, vei-iobukaiobuka, veiġa namo vedaureari, veuravini veigari, ema vegubakau maġuriri. Dagara namori ema tarimarima na ġevaġa-raġerini veigari mabarari boġono tuġamaġi-iaġiri.

9 Ġegu ġobata na ġoribarito guruġari ema ġegu veiġa na ġodoġaririto veigari mabarari ġemi maġuri ai boġono ġauvei-iaġiri e boġono korana-iaġiri. Benamo maino evinirani Barauna ġomi ġemi ai bene tanu.

Filipi tarimari ġeri vevaġa-kava

10 Ġegu iaku tu asikei ema Vereġauka avaġa-namoani nuġagu mabarana ġesi, korana ġemi vevaġa-kava varevarena ma boġo tuġu-iaġomaia nai. Au ribagu, asi ġotuġarekwaguni, ġemi ura vanaġivanaġi boġono vaġa-kavagu, senaġi gabu manaġai atanuni nai, asi ġemi dabara ta au vaġa-kavagu.

11 Au tu dia dagara tai akubini naima maiġesi aguruġani. Asiġina. Au tu ġegu-ġagu vovoka o asiġina, senaġi badukuani ilaila.

12 Au tu akubini vetoġana ma ribagu, ema ġegu-ġagu ġevovokani vetoġana maki ma ribagu, be taimi tai gabu tai maigari maġuri baraga-goitaġorini nai, aiġesina badukurini tu ribagu. Mai riba vekuretoġana tu varau aribaiato. Moġesina nai au tu beġe ġubu-maseguni o bevitoguni, ġegu-ġagu vovoka o bakubini au ġegu ai tu ilaila moġo.

13 Maġuri aiġesina ġegu ai evetoreni, senaġina asi ġegu daradara, korana Keriso na ġena seġuka eviniguni nai.

14 Senaġi aiakuni, korana ġemi vevaġa-kava barego mai ġegu meto nuġanai bama doġaria.

15 Ġomi Filipi tarimami tu ribami: Makedonia aiaguiato, tovotovonai Vari Namona aġobata-iaġiato-ġoi nai, ekalesia doġorona ta na asi evaġa-kavaguto-ġoi ġeri moni e fafare na, ġomi moġo ġereġami.

16 Ġomi na vevaġa-kava dagarari vovoka ġotuġu-tuġukauto-ġoi au Tesalonika vanuġanai atanuto-ġoi nuġanai.

17 Au asi atuġamaġini, au ġomi ġemina vevaġa-kava dagarari bana doġari, senaġi ġegu ura baregona tu, ġomi ġemi ai ġemi vini auna bene barego bana ġitaita.

18 Au ġegu ai ġomi ġemi varevare dagarari ġotuġu-iaġomarito tu mabarari maigari, be ġegu-ġagu tu vovoka ema ilaila. Ribagu, aura-vinirini dagarari mabarari maigari Epafrodito na eġwa-iaġomarito ġegu ai. Ġemi varevare dagarari bonari irau veġata Barau na eġabi-raġerini ginitaġo varevareri, Barau ġevaġa-iaukuani dagarari.

19 Ġegu Barau na ġena fafare namori ema vovoka tabutaburi Keriso Iesu ġenana bevarevare-vini ginikaumini ġemi rabu ġarori ai.

20 Tamara Barau bitana vaġa-raġea vanaġivanaġi, Amen.

Vevaġa-namo guruġari

21 Iesu Keriso ġena tarimarima mabarari ġeri vevaġa-namo ġeguna iaġosini. Ġita tarikakara au ġesi ġatanuni na ġemi vevaġa-namo beġe tuġu.

22 Barau ġena vevaġa tarimari mabarari ġerina vevaġa-namo beġe tuġu ġemi, ema Kaisara, Roma ġeri vere, ġena numa tarimari na maki ġemi vevaġa-namo baregona beġe tuġua.

23 Vereġauka Iesu Keriso ġena namo ema varevare-bara ġomi tata iatami ai bene tanu.

PAULO ĜENA TORETORE KOLOSE EKALESIARI ĜERI

Kolose vaĝa-foforina guruĝari

Paulo na mai fefa tu Romai ediburato-ĝoi nuĝanai etoreato. Mai fefa tu laĝani 60 beiaĝo 61 nuĝanai etoreato, mo tu Iesu emaseto murinai.

Mai fefa siri baregori tu karoa 2:9-10.

Paulo na mai fefa etoreato korana tu tarima tari na Kolose ai ekalesia doĝorori ĝeri veĝabidadama ĝevei-veĝonuato-ĝoi nai. Moĝesi naima Paulo na mai fefa etoreato tu Kolose ekalesiari evaĝa-guruĝa-toreĝaurito ema maĝeri evaĝa-ribarito, 1) tarimarima ĝeri iaunega ema vevaĝa-riba ĝofaĝofari tu aiĝeri ema Keriso ĝena maĝuri korikorina tu aiĝa; 2) Keriso tu moĝoni ekalesia doĝorona debana veĝata; 3) tarima guinena ma ĝena maĝuri rakavari ĝesi beĝene koki-fitoĝaia, ma tarima variĝuna beĝene torekaua; 4) tarimarima ĝeri taravatu veĝari ema ĝeri ura asi beĝene ĝabi-raĝeri e asi beĝene korana-iaĝiri.

Paulo na mai fefa tu maĝesina eboioĝaiato:

1. Deba, Keriso, ĝena mareva baregona - karoa 1:1-2:5

2. Tauĝani, ekalesia doĝorona, aiĝesina bene tanu ema bene ĝauvei - karoa 2:6-4:18

1 Au Paulo, Barau ĝena ura lorinai Keriso Iesu ĝena apostolo tarimagu ai evaĝa-iaĝoguto, ema ĝita tarikakara veĝabidadama nuĝanai Timoteo ĝesi, ĝemana mai fefa eiāĝosini,

2 ĝomi tarikakama Kolose nuĝanai ĝotanuni ĝemi. Keriso ĝena maĝuri nuĝanai ĝita tu tarikaka. Ĝomi tu Barau ĝena tarima veaĝami ema ma ĝemi vetuĝamaĝikau maki. Ĝita Tamara Barau ĝena varevare-bara ema maino ĝomi ĝemi ai bene tanu.

Kolose tarimari na Keriso ĝeĝabidadama-vini korikoriato

3 Ĝai vanaĝivanaĝi ĝomi iatami ai ĝaĝauĝauni nai, ĝera Vereĝauka Iesu Keriso Tamana, Barau, tu ĝatanikiu-viniani.

4-6 Korana tu, ĝai tauma ruarua na ĝomi varimi tu maĝesi ĝaseĝaĝiato: Ĝomi na tovtovonai Vari Namona ĝenana eiāĝomato guruĝana, guruĝa moĝonina, ĝoseĝaĝiato nai tu, dagara namona Barau na gubai etore-taĝoani ĝemi, moĝa varina tu ĝovaĝa-moĝoni korikoriato. Ma ĝomi na tu moĝesina naima Keriso Iesu ĝoĝabidadama-vini korikoriani, ema Barau ĝena veaĝa o ekalesia tarimari mabarari maki ĝoura-vinirini. Mani Vari Namona ĝomi ĝemi ai eraĝasito, maniĝa tu tanobara mabaranaĝi ĝevarifu-rakao rakaoani, ma ĝwana namori maki ĝeĝorani, e tarimarima maki ĝutuma lelevaĝi na maki ĝeĝabi-raĝeani. Mai Vari Namona ĝwaĝwana namona evetoreni tanobara mabaranaĝi, ilailana ĝomi na mani Vari Namona ĝoseĝaĝiato e Barau ĝena namo e varevare-bara korikorina ĝoribaiato ĝarona na veĝata ĝomi fakami ai evesinato, ma eiāĝomani, maniĝa kavana evetoreni.

7 Ĝomi tu Epafras na mai Vari Namona easi vaĝa-ribamito. Ĝia tu ĝai karoma namona, ema ĝai ĝesi Keriso ĝena vetuĝunaĝi ĝaiaĝo-vinirini tarimana ta. Epafras tu Keriso ĝena ĝauvei tarimana namona, ma ĝena vetuĝamaĝikau, ma ĝomi maki evaĝa-kava ĝinikaumini.

⁸ Ĝomi ĝemi veuravini Iauka Veaĝa na evinimini, maniĝa maki Epafraŝ na ema kira-varamato.

Paulo ĝena ĝauĝau Kolose ekalesia tarimari iatari ai

⁹ Moĝesi naima ĝai tu ĝomi varimi ĝaseĝaĝiatio ĝarona na beiaĝoma mo toma, ĝomi iatami ai ĝema ĝurigiuri asi ĝavaĝa-ketoani. Vanaĝivanaĝi Barau ĝanogiani, ĝakirani, ĝia ĝena ura mabarana bene vaĝa-riba ĝitakaumi, ema Iauka Veaĝa ĝenana eiaĝomani iaunegana e tuĝamaĝi-fakana maki mabarana boĝono ĝabia.

¹⁰ Ĝai maĝesina ĝaĝauĝauni anina tu, Vereĝauka na eura-viniani maĝurinaĭ boĝono tanu ĝana, ema ĝemi veĝa e maĝuri mabarabarari ai maki ĝia boĝono vaĝa-vererea ĝana. Aba, ĝemi veĝa namori mabarari ĝwaĝwari beĝene fofori, ema Barau maki boĝono riba-ĝinikaua.

¹¹ E ĝema ĝurigiuri tu, Barau ĝena seĝuka iaru-korokorona na seĝuka bene vinimi, be boĝono kokore-koru. Korana mo kokore na tu meto ĝoĝoitaĝorini maĝeri nuĝari ai boĝo ruĝa-gwaĝigini e boĝo vevaĝa-gwaĝigini. E ma iakumi gesi

¹² Tamara Barau boĝo tanikiu-viniani. Korana ĝomi tu varau eĝabi-raĝemito, be ĝia ĝena tarima veaĝari na ĝena Basileia ma mamana baregona nuĝanaĭ kara beĝe ĝaunarini dagarari ĝomi na maki boĝo ĝaunarini.

¹³ Ĝita mabarara Barau na tu mukuna ĝena seĝuka barana nuĝana na evaĝa-maĝurirato, ma Natuna ĝena veĝitaĝau seĝukana nuĝanaĭ etoretoĝarato. Mo Natuna tu Barau na euravini-baregoani.

¹⁴ Ĝita tu Barau Natuna na evoi-ĝenoĝoirato, ma Barau na ĝia bakunai ĝera rakava etuĝamaĝi-fitoĝarito.

Keriso ĝena ĝauvei

¹⁵ Barau tu asi taĝitaiani, senaĝi Barau vetoĝana korikorina tu Natuna ĝenana eforito. Ma mai Barau Natuna maĝa tu Barau ĝimana veiveiri dagarari mabarari fakari ai ĝia tu guine, emaĝuri-guineto merona kavana.

¹⁶ Korana Keriso ĝenana Barau na gubai ĝetanuni dagarari mabarari ema tanobarai ĝetanuni dagarari mabarari eveirito. Taĝitarini dagarari ema asi taĝitarini dagarari eveirito. Seĝuka lelevaĝi iaukari mabarari, e seĝuka lelevaĝi aneruri, e veĝorikau iaukari, ema ĝeri seĝuka e maoro barego lelevaĝi iaukari eveirito. Dagara mabarabarari tu Barau na Keriso ĝenana eveirito, ma Keriso ĝena moĝo eveirito.

¹⁷ Keriso tu maĝeri dagara mabarari roĝosi beĝere ĝora nuĝanaĭ veĝata etanuto-ĝoi. Ma dagara mabarari maki ĝia ĝena seĝuka na eĝabi-taĝorini.

¹⁸ Ekalesia doĝorona debana tu Keriso, ema ekalesia doĝorona tu ĝia tauĝanina. Ekalesia ĝena maĝuri korikori tu ĝia ĝenana eiaĝomato, ema ĝia tu mero guinena, mase tarimari mabarari fakari na Barau na mase seĝukana na evaĝa-maĝuriato. Korana dagara mabarari ĝia ĝena veĝitaĝau gaburenai beĝene tanu ĝana.

¹⁹ Korana Barau ĝena ura baregona, Keriso ĝenai ĝia ĝena maĝuri e mareva mabarana bene tanu.

²⁰ Ma Barau ĝena ura dagarari mabarari Keriso ĝenana ĝia ĝenai ma bene ĝabi-ĝenoĝoiri etato, mai tu tanobarai ĝetanuni dagarari mabarari ema gubai ĝetanuni dagarari mabarari. Moĝesina naima Keriso rarana satauro ai erigoto, benamo Barau na maino eveiato dagara mabarari ĝesi.

²¹ Ĝomi guinenai Barau ĝesi fakami tu manaĝa rakava, e ĝemi tuĝamaĝi ai maki Barau tu ĝovetari-viniato-ĝoi, korana ĝomi tu veĝa rakavari ĝoveirito-ĝoi.

²² Senaĝi toma tu Keriso tauĝanina korikori ĝevaĝi-maseato, monana ĝomi ĝia ĝenai ma eĝabi-ĝenoĝoimito. Barau na Keriso ĝena mase ĝenana vau tauĝena ĝenai eĝabi-kavamito, korana tu eurato, ĝia ĝoiranai tu veaĝa tarimari bene vaĝa-ruĝa-tarimi, e asi ĝemi kerere misina ta maki, e tarima ta na maki asi bene vaĝa-daĝami.

²³ Senaĝi ĝomi tu ĝemi veĝabidamaj boĝono kokore e boĝono ruĝa-gigitari, ema Vari Namona ĝoseĝaĝiato nai, ĝemi tuĝamaĝikau ĝovaĝa-ruĝaiato, monana ta na asi bene ĝori-ĝerevaĝimi. Ĝomi na tu mai Vari Namona maiĝa ĝoseĝaĝiato. Ma tanobarai ĝetanuni tarimarimari mabarari ĝeri maki mai Vari Namona maiĝa ĝevari-fiuato. Au Paulo maki mai Vari Namona vetuĝunaĝina ai-aĝo-viniani e aĝobata-iaĝiani.

Paulo ĝena ĝauvei ekalesia urari ai

²⁴ Maitoma au tu aiakuni, korana au tu ĝomi urami ai amidigu-midiguto. Ekalesia tu Keriso tauĝanina, ma Keriso tu mai tauĝanina maiĝa uranai emidigu-midiguto. Ma au toma mai tauĝanigu ai mai midigumidigu aĝwaiani tu, Keriso ĝena ekalesia navaĝa-kavaia uranai. Au tauĝanigu ai midigumidigu roĝo aĝwaiani, korana tu Keriso ĝena ekalesia uranai mo midigumidigu Keriso na eĝwaiato moĝa tu roĝosi roĝo bene kori nai.

²⁵ Au tu Barau na evaĝa-ruĝaguto, ekalesia ĝena vetuĝunaĝi bana iaĝo-vini etato. Barau na mai ĝauvei eviniguto tu, ĝomi ĝemi ai Barau ĝena guruĝa mabarana bana vaĝa-fofori korikoria ĝana.

²⁶ Guinena na veĝata ema guru mabarari ĝerina veĝata mai maĝuri vekuretoĝana maiĝa tu vekuretoĝa, beiaĝoma mo, Barau ĝena tarimarima veaĝari ĝeri ai vauro bema vaĝa-foforia.

²⁷ Irau bese tarimari vekaravari ai, Barau eurato, ĝena tarimarima veaĝari ĝeri ai mai maĝuri vekuretoĝana marevana barego lelevaĝina bene vaĝa-foforia etato. Mai maĝuri vekuretoĝana marevana barego lelevaĝina bene vaĝa-foforia etato maĝurina tu maiĝea: Keriso ĝomi nuĝami ai etanuni. Ĝita na mareva baregona tatuĝamaĝi-dadamaĝiani marevana tu maiĝa.

²⁸ Ĝai na tu mai Keriso maiĝa ĝaĝobata-iaĝiani. Ema iaunega irauirauri ĝerina tarimarima mabarabarari ĝakira-toreĝaurini e ĝavaĝa-ribarini, korana ĝaurani, tarimarima mabarari Keriso ĝena maĝuri nuĝanai tu beĝene nana-vedaurea vauro, Barau ĝenai baĝana ĝori-iaĝori.

²⁹ Moĝa uranai avekvaraĝi-rakavani. Keriso ĝena kokore au nuĝagu ai eĝauveini seĝukana tu barego lelevaĝi. Moĝesina naima au tu Keriso ĝena kokore ai mai ĝauvei aveiani.

2

¹ Au auranai, ĝomi tu boĝono riba, au tu avekvaraĝi-rakavani, ĝomi Kolose ekalesiami, e Laodikea ekalesiari, ema au ĝoiragu roĝosi roĝo beĝene ĝitaia ekalesiari vovoka, mabarabarami navaĝa-kavami uranai.

² Au ĝegu ura baregona sebona tu, ĝia nuĝari beĝene gwaĝigi, ema mabarari veuravini sebonai moĝo beĝene iaĝo. Korana tu moĝesi beĝe veini vauro beĝe tuĝamaĝi-faka ginikauni, benamo Barau ĝena vekuretoĝa dagarana beĝe ribaiani. Barau ĝena vei-vekuretoĝa dagarana tu Keriso.

³ Iaunega ema riba vonu-fokafokana mabarana tu Keriso ĝenai vekuretoĝa ĝetanuni.

⁴ Maĝeri guruĝa akira-varamini korana tu, irau tarima ta na nuĝa-ĝani guruĝari namori na beĝofa-veĝonumini garina.

⁵ Au tu moĝoni tauĝanigu ĝomi fakami ai tu asigina. Senaĝi iauka rekenai au tu ĝomi sevimi ai, be ĝauvei ĝovei-ginikaurini ema Keriso ĝenai ĝemi veĝabidadama tu roĝo barego aĝitaiani, moĝa lorinai averere-rakavani.

Keriso ĝesi bisini sebona, be maĝuri bisini ĝabia

⁶ Keriso Iesu tu ĝomi na ĝoĝabi-raĝeato, benamo ĝemi Vereĝaukai ĝovaĝa-iaĝoato. Moĝa lorinai ĝomi tu ĝia ĝena maĝuri nuĝanai moĝo boĝono raka e boĝono tanu.

⁷ Ĝomi ĝemi maĝuri tu ĝau ĝokana tano nuĝana ĝana evarigo-korikorini kavana, Keriso ĝenai beĝene variĝo. E numa fore iatanai ĝeragaiani kavana, Keriso iatanai ĝemi maĝuri boĝono vaĝa-ruĝakauri e boĝono ragari. Ema ĝevaĝa-ribamito ilailanai ĝemi veĝabidadama beĝene kokore-korikori, ma vanaĝivanaĝi Barau tu boĝono tanikiu-vinia.

⁸ Lorimi boĝono vetore, asi namo tarima ta na tarimarima ĝeri iaunega ĝofaĝofari koriri na ĝomi nuĝami beĝanirini, benamo beĝori-dareremini garina. Mai tarimarima ĝeri iaunega ĝofaĝofari tu tarimarima na ĝevaĝa-ruĝarini maĝuriri e veiĝari ĝeri ai; senaĝina moĝeri tuĝamaĝi veĝonuri tu tanobara barauri ĝerina ĝeiaĝomani, a dia Keriso ĝenana ĝeiaĝomani.

⁹ Korana Barau ĝena maĝuri e veiĝa mabarari tu Keriso tauĝanina nuĝanai ĝetanuni.

¹⁰ Ma Keriso nuĝanai mai maĝuri ĝomi na ĝoĝabiato. Keriso tu veĝorikau iaukari e aneruri mabarari ema ĝeri maoro barego lelevaĝi iaukari mabarari fakari ai ĝeri Vere.

¹¹ Ĝomi Keriso ĝesi ĝosebonato nai tu, tauĝanimi kefiru ĝelama-vaĝirito, senaĝi mai tu dia tarimarima ĝimari na ĝeveiani veiĝana akiraĝiani. Asigina. Mai tu Keriso ĝena kefi-lamavaĝi veiĝana. Moĝa tauna tu, tauĝani ĝena veiĝa rakavari ĝomi ĝemi na ĝokoki-fitoĝarito.

¹² Korana babatiso ĝoĝabiato neganai, ĝomi tu noĝa Keriso ĝesi ĝeguri-sebonamito; ema Barau na Keriso ĝesi evaĝa-vaisiraĝe ĝenoĝoimito, korana Barau ĝena ĝauvei seĝukana ĝovaĝa-moĝoniato nai. Mo seĝuka na Barau na Keriso mase na ma evaĝa-variĝisi ĝenoĝoiato.

¹³ Guinenai ĝomi iaukami tu mase, korana ĝemi kira-sirivaĝi e vei-rakava bene, ema tauĝani ĝena veiĝa rakavari maki ĝomi tauĝanimi ĝerina roĝosi beĝere lama-fitoĝari. Senaĝi toma ĝomi iaukami tu Keriso ĝesi Barau na evaĝa-maĝuri ĝenoĝoirito. Ĝita ĝera rakava mabarari tu Barau na etuĝamaĝi-fitoĝarito.

¹⁴ Taravatu guruĝari ema taravatu asi takorana-iaĝiato voiri metori ĝita iatarai ĝetanuni, moĝeri tu mabarari Barau na asi tauri ai evaĝa-iaĝorito, be ekoki-fitoĝarito. Barau na mo taravatu moĝeri ĝeri seĝuka tu eĝabi-vaĝiato, benamo Keriso ĝena satauro ai eikoko-kauato.

¹⁵ Ema Barau na veĝorikau iaukari rakavari e ĝeri maoro barego lelevaĝi iaukari, ĝeri kokore mabarari asi tauri ai evaĝa-iaĝorito e evaĝa-rakavarito. Keriso ĝena satauro seĝukana na iauka rakavari Barau na evaĝa-ketorito, ma tarimarima ĝoirari ĝutuĝuturi ai evaĝa-maiakarito, ma muriri ai evaĝa-rakarito.

¹⁶ Moĝesina naima ĝaniĝani e niuniu dagarari taravaturi irauirauri ĝaramari ai tarima ta na asi bene ĝau-fitoĝami. Ema tarima ta na Barau tuĝamaĝi-iaĝina verekona, o ĝue variĝuna verekona, o Sabadi ĝarona ĝaramanai maki asi bene ĝau-fitoĝami.

17 Mai dagara maiġeri tu ġoirai vau beġea ġorani dagarari laulauri moġo. A maġuri korikorina tu Keriso ġenana bita ġabiani.

18 Bema tarima ta ġoġitaiani, tauġena manau tarimanai evevaġa-iaġo ġofa-kauni e aneru etoma-rakarigo-vinirini, ema nuvi o mata-vanaġi ai asi eġitarini dagarari eguruġa-iaġirini nai tu, garona asi boġono seġaġia. Ġia mani ġena tuġamaġi maniga tu eveġonu-fatafatato. Maniġesina tarimarima na tu ġomi moġo beġe ġofa-dareremini, benamo voimi namona asi boġo ġabiani.

19 Keriso tu deba; ma mani tarima tu deba ġenana ġeraka-veġitato, be deba ġenai ġia tu asi ġetubukauni. Mai deba na tauġani mabarana ġaniġani eviniani, ema tauġani nuġanai turiga evaġa-tubukau gigitaririni, ema tauġani mabarana evaġa-tubu vegogoani, Barau ġena ura lorinai.

20 Ġomi tu Keriso ġesi ġomase-sebonato, be ġomi na taravatu irauirau e tanobara barauri tu asi ma boġo korana-iaġirini. Ma kara dainai tu mai tanobara maġurinaġi ġotanuni tarimari noġa maiġeri taravatu ma ġokorana-iaġirini, ei?

21 Ġokirani, "Asi ġoġabi-karaia; asi ġomami-tovoa; ġimami na asi ġoġabi-tovoa," ġotoni.

22 Senaġi mani dagara maniġeri tu boġono ġaniri e boġono ġauvei-iaġiri ġana. A maniġeri taravatu ema vevaġa-riba tu tarimarima ġerina moġo ġeiaġomani dagarari.

23 Moġoni, maniġeri taravatu na tu ġita ġerai Barau toma-rakarigo-na tuġamaġina bevaġa-ġoraiani, e manau veigana ġerai bevaġa-ġoraiani, tauġani vaġa-midigu-midiguna bevaġa-ġoraiani. Moġesi naima tarima kotari ġetuġamaġini, maiġeri taravatu tu iaunega tarimari ġerina ġeiaġomani. Senaġi maiġeri taravatu na tu ġita asi bevaġa-kavarani, ma tauġani ġena ura rakavari asi bevaġa-ketorini.

3

Keriso ġesi tasebonani nai tu, maġuri variġuna taġabiani

1 Ġomi tu Barau na Keriso ġesi evaġa-maġuri ġenoġoimito, naima gubai ġetanuni dagarari boġono vetau-baregori, e nuġami maki monai boġono toreri. Keriso tu monai Barau ġimana aroribana rekenai etanu-taġoni teronai.

2 Vanaġivanaġi ġemi tuġamaġi ai tu gubai ġetanuni dagarari boġono tuġamaġi-taġori, a tanobara dagarari tu asi boġono tuġamaġiri.

3 Korana ġomi tu varau ġomaseto tanobara maġurina ġenai, ma ġemi maġuri korikori tu vekuretoġai etanuni Keriso ġesi, Barau ġenai.

4 Keriso tu ġomi ġemi maġuri korikorina. Ġia ma befoforini ġaronai, ġomi maki Keriso ġesi boġo fofori-sebonani, ema ġena mareva ma mamana baregona boġo ġabiani.

5 Moġa lorinai tauġanina ġena veiga e maġuri rakavari ġemi ai roġo ġetanuni, maniġeri mabarari boġono vaġi-maseri. Tauġanina ġena veiga e maġuri rakavari tu maiġeri: Mata-boraġa veigari, veiga mirori, kima veigari, matabara e veiga rakavari uravini-baregori maġurina, ema mata-ġaniġani maġurini. Mata-ġaniġani maġurina tu babarau toma-rakarigo-ni veigana. Maiġeri mabarari ġerina boġono raka-veigita.

6 Korana mai veiga maiġeri ġaramari ai Barau ġena baru o Kota baregona seġafore tarimari ġeri ai bema vaġa-foforiani.

⁷ Guinenai ġomi maki tanobara ġena veiġa e maġuri rakavari nuġari ai ġotanuto-ġoi nai tu, moġeri veiġa rakavari ġomi na maki ġoveirito-ġoi.

⁸ Senaġi toma mai veiġa maġeri ġomi ġemina tu boġono tore-veġitari: Tuġamaġi-baru, baru rakavarakava, tarima vaġa-rakavari tuġamaġiri e veigari, guruġa rakavari kiraġikiraġiri ema sivarai mirori kiraġikiraġiri.

⁹ Tauġemi fakami ai guruġa o veiġa ġofaġofari ai ta na ta asi bene ġofaia. Korana ġomi na ġemi maġuri guinenana ma ġena veiġa rakavari ġesi tu dabuġa rakavana ġokoki-fitoġaiani kavana ġokoki-fitoġarito,

¹⁰ ma tarima variġu geragerana ġoriġo-kauato, dabuġa variġu geragerana ġoriġo-kauani ilailanai. Ma ġia maigra tu Barau na vanaġivanaġi evaġa-variġu ġenoġoiani, eveiato Barauna vetoġana korikori bene ġabia e bene riba-ġinikaua ġana.

¹¹ Mai maġuri variġuna taġabiato mainai tarima ta asi irau. Be inġesi asi bisini kira, ġai tu Iuda tarimama, a ġia tu irau bese tarimari; ġai tu mero tauġaniri kefiru ġalama-vaġini dogorona, a ġia tu mero tauġaniri kefiru asi ġelama-vaġini dogorona; asi bisini kira maki, ġia tu asi ġesikulito tarimari e maġuri mamana roġosi roġo beġene ġitaia tarimari; ġai tu asi tuġu-rakaorakao tarimama, a ġia tu tuġu-rakaorakao tarimari. Asiġina, maġesi asi bitana guruġa. Korana Keriso ġereġana moġo barego ema ġita mabarara nuġarai etanuni.

¹² Ġomi tu Barau na varau eġabi-viriġimito tarimami, e ġena veaġa tarimami, ema Barau na euravini-rakavamini tarimami. Moġa lorinai vevetuġaġwa, veiau-namo, manau, marana, ema vevaġa-gwaġiġi maġuriri na boġono vedabuġa.

¹³ Meto o maġuri gwaġiġiri tari ġoġoitaġorini karomi tari ġerina nai tu, boġono vevaġa-gwaġiġi karomi ġeri ai. Bema tarima ta ġomi fakami ai karona ta na evaġa-veġare veġareani nai tu, mo rakava moġa bene tuġamaġi-fitoġaia, Keriso na ġomi ġemi vei-rakava etuġamaġi-fitoġarito kavana.

¹⁴ Maġeri mabarari iatari ai tu veuravini na boġono vedabuġa. Korana tu mai maġuri namori mabarari tu veuravini na vauro ebaru-sebona ġinikaurini, benamo ġeġauvei-ġitakauni.

¹⁵ Keriso ġena maino na nuġami bene ġori-kauri. Korana Barau na ġomi ekea-vegogomito anina tu, tauġani sebonai boġono iaġo, benamo maino ai moġo boġono tanu. Ema Barau boġono tanikiu-vinia.

¹⁶ Keriso ġena guruġa tauri korikori e ġeri seġuka ġomi nuġami ai tu beġene vonuvonu-raġe. Monana karomi tata ġesi Keriso ġena guruġa iaunega korikorina na boġono vevaġa-riba e boġono vekira-toreġau. Ma nuġami ai Barau ġotanikiu-viniani nai tu, Salamo boġono mari, e Barau vaġa-raġena mariri boġono mariri, ema Iauka Veaġa na evinimini mariri boġono mariri.

¹⁷ Kamara ġauvei boġo veiani nai, guruġai boġo veiani o veigai boġo veiani, mabara-barari Iesu Vereġauka aranai moġo boġono veiri. Ma ġia ġenana Tamara Barau boġono tanikiu-vinia.

Ekalesia tarimana ma ġaraġona e natuna ema ġena tuġu-rakaorakao tarimari ġesi ġeri tanu maġurina korikori

¹⁸ Veġaraġo vavinemi, ġomi tu ġaraġomi ġeri veġitaġau seġukana gabure-nai boġono tanu. Korana mai maġuri maigra Vereġauka ġoiranai tu maġuri namona.

¹⁹ Veġaraġo taumi, ġaraġomi boġono uravini-baregori, e ġaraġomi ġeri ai nuġami asi boġono vei-ġirimaġirimari.

²⁰ Natu, dagara mabarari ai tamami e sinami tu garori boĝono seĝaĝi-viniri. Korana mai veiĝa tu Vereĝauka iauna evaĝa-namoani.

²¹ Tama, natumi asi boĝono vaĝa-baruri, korana beĝe tuĝamaĝi-moirani, asi beĝe kokoreni garina.

²² Tuĝu-rakaorakao tarimami, mai tanobarai ĝeri vetuĝunaĝi ĝoiaĝo-vinini tarimari garori boĝono seĝaĝiri. Ĝia tu dagara mabarari ai garori boĝono seĝaĝiri. Dia ĝia ĝoirari ai moĝo, tarima iauro beĝene vaĝa-namori ĝetoni nai ĝevei-ĝofakauni tarimari kavari. Asiĝina. Ĝomi tu Vereĝauka gubakauna maĝurinaĭ nuĝami ma raĝeri ĝesi ema nuĝami mabarari ĝesi boĝono seĝaĝi-viniri.

²³ Ma kamara ĝauvei boĝo veiani nai, boĝono veia nuĝami mabarari ĝesi. Ĝauvei tu asi tarimarima ĝeri ĝauvei ĝoveiani noĝa boĝono veia. Asiĝina. Ĝomi na tu Vereĝauka ĝena ĝauvei ĝoveiani maĝurinaĭ boĝono veia.

²⁴ Ĝomi tu ma ribami, Vereĝauka na vau voimi bevinimini, korana ĝomi na tu Keriso Vereĝauka ĝena vetuĝunaĝi ĝoiaĝo-viniani.

²⁵ A tarima ta na veiĝa beleaiani nai, mo veiĝa beleaiani voina tu beĝabiani veĝata. Korana Vereĝauka ĝoiranaĭ tarima mabarari tu ilaila moĝo, dia ta tu egubakauani, ma ta tu asi egubakauani.

4

¹ Ĝomi vetuĝunaĝi veremi, mani ĝemi tuĝu-rakaorakao tarimari maniĝeri ĝeri-ĝari tu, ĝeura-vinirini ilailari ai boĝono viniri. Ĝia ma ĝeri maoro kara ĝomi ĝemina beĝere goitaĝori dagarari tu boĝono viniri veĝata, ema veiĝa namori e moĝoniri ĝeri ai boĝono veiri. Korana ĝomi maki boĝono riba, ĝomi eĝita-ĝaumini Verena maki etanuni gubai.

Vevaĝa-riba guruĝari kotari maia

² Ĝauĝau asi boĝono vaĝa-ketoa. Vanaĝivanaĝi boĝono ĝurigiuri. Ĝemi ĝauĝau ai boĝono venari maki, e Barau boĝono tanikiu-vinia.

³ Ma ĝai ĝema maki boĝono ĝurigiuri, be Vari Namona baĝana vari-fiua ĝana, Barau na ĝatama-boka gabu tari ai bene keori. Be mo ĝana baĝana iaĝo, ma Keriso varina vekuretoĝana monai baĝana vari-fiua. Au tu mai Keriso varina vekuretoĝana maĝa ĝaramanaĭ seini na ĝebarubarugoto.

⁴ Boĝono ĝauĝau, be au na mai vari vekuretoĝana maĝa bana kiraĝi-fofori ĝitakaua, Barau ekirato bana kiraĝi-fofori ginikaua etato ilailanaĭ.

⁵ Keriso roĝosi beĝene ĝabi-dadama-vinia, roĝo murikai ĝetanuni tarimari ĝeri ai tu, veĝa iaunegari e namori boĝono veiri. Ema ĝia vefakari ai boĝo raka-ĝurani negari ai, moĝeri mabarari tu asi boĝono vaĝa-rakavari, korana ĝia boĝo vaĝa-kavarini negana tu kubi moĝo bene.

⁶ Vanaĝivanaĝi boĝo guruĝani nai, boĝono garo-namo. Ĝemi guruĝa maki ma damenari boĝono kiraĝiri e boĝono guruĝa-ĝitaĝita, be ĝemi guruĝa tarimarima na beĝene ura-viniri e ĝeseĝaĝi-namori moĝo beĝene si. Moĝesina boĝo veini nai, tarima sebori sebori aiĝesina boĝo vaĝa-veserini dabarari boĝo ribarini.

Veĝabituĝu guruĝari

⁷ Au varigu mabarana tu tarikakara namona, Tikiko, na vauro beasi kira-varamini. Ĝia Keriso ĝena maĝuri nuĝanaĭ tu ma vetuĝamaĝi-kauna ĝesi evevaĝa-kavani, ema ĝia tu au ĝesi Vereĝauka ĝena vetuĝu-naĝi ĝaiaĝo-viniani.

⁸ Au na Tikiko ġomi ġemi ai atuġu-iaġosiani tauna korikori tu, ġai mainai kamasi ġatanuni maġurina beneasi vaġa-ribami ġana. Ġia na ġai ġema tanu maġurina bene kira-varami, be ġomi nuġami bene vaġa-gwaġiġiri uranai.

⁹ Ġia tu Onesimo ġesi eiaġosini. Onesimo tu ma ġena vetuġamaġikau, ema ġia tu ġai tarikakama namona ta. Ġia maki ġomi ġemi tarima ta. Ġia tauri ruarua na mainai kara ġeġorani dagarari mabarabarari beġeasi vaġa-ribamini.

¹⁰ Aristako na ġena vevaġa-namo ġomi ġemi ai etuġu-iaġosiani. Ġia tu au ġesi ġadiburato, be dibura numai ġatanuni mainai. Banabas tarikakana Mareko na maki ġemi vevaġa-namo betuġu. Mareko ma Banabas tu tarikaka, senaġi ġia sinari e tamari tu irau, dia sebona. Mareko ġomi ġemi ai beiaġosini nai, boġono ġabi-raġea ġana guruġari tu varau asi-kira-varamito.

¹¹ Ema Iesu, arana ta ġekiraġiani Iusto, na maki ġemi vevaġa-namo betuġu. A Iuda tarimari fakari ai au ġesi Barau ġena Basileia ġauveina ġaveiani tarimari tu maġeri moġo. Ġia na au ġevaġa-kava ġinikauguni.

¹² Ġomi karomi ta, Keriso Iesu ġena vetuġunaġi eiaġo-vinini tarimana, arana Epafras, na maki ġemi vevaġa-namo betuġua. Ġia tu vanaġivanuġi ġomi urami ai evekwaraġini ġauġau ai. Ġia ġena noġinoġi bareġona Barau ġenai eveiani tu, Barau na ġomi ġia ġena urai bene vaġa-ruġatari korikorimi. Ema Barau ġena ura ġomi na nuġami mabarari ġesi boġono vaġa-moġonia, ema boġono korana-iaġi ġinikaua.

¹³ Au aguruġa-fofori korikorini, moġoni, Epafras tu ġomi maniġemi, e Laodikea tarimari, e Hierapoli tarimari mabarami urami ai moġoni evekwaruġi-rakavato.

¹⁴ Ġita ġatara namona Luka, doketa tarimana, ema Dema, tauri ruarua na ġemi vevaġa-namo beġe tuġu. Luka tu doketa tarimana.

¹⁵ Au ġegu vevaġa-namo ġita tarikakara Laodikea ai ġetanuni tarimari boġono viniri. E ġegu vevaġa-namo Nimfa boġono vinya, e Nimfa na numai ekalesia doġorona ġeraka-vegogoni maniġeri maki boġono viniri.

¹⁶ Mai fefa ġomi ġemi ai boġo iavi-ġosiani murinai tu, boġono tuġu-iaġoa, ma Laodikea ekalesiari ġeri ma beġenea iavi-foforia. Ma Laodikea ekalesiari atore-vinirito fefana maki ġomi fakami ai boġono iavi-foforia.

¹⁷ Ma Arekipo maġesi boġono kiraia, boġono kira, "Vereġauka ġena maġuri nuġanai ġauvei oġabiato maniġa tu bono ġauvei-iaġi ġinikaua."

¹⁸ Mai vevaġa-namo guruġari tu au Paulo tauġegu ġimagu na atorerini. Au boġono tuġamaġigu, au tu roġo ma seinigu diburai. Barau ġena namo e varevare-bara ġomi iatami ai bene tanu.

PAULO ĜENA TORETORE GINIGUINENA TESALONIKA EKALESIARI ĜERI

1 Tesalonika vaĝa-foforina guruĝari

Mai fefa ĝena tuĝamaĝi baregona tu Iesu ĝena ĝenoĝoi-iaĝoma vaĝa-ruaruana. Korana tu Iesu ĝena iaĝoma vaĝa-ruaruana mai fefai tu ekiraĝi-ĝutumaiato.

Paulo na mai fefa tu Korinto na etore-iaĝoato, mo tu ĝena evanelia varivarina vaĝa-ruaruana nuĝanai (Apostolo 17:1-14). Mai fefa Paulo na tu laĝani 50 ema 51 nuĝanai ta etoreato, mo tu Keriso maki emaseto murinai vau.

Mai fefai siri baregori tu karoa 4:15-18.

Paulo na mai fefa giniguinena etoreato korana eurato, Tesalonika ekalesiari 1) bene launaĝiri, Barau na ĝeri ai eveirito veĝari tarimarima ĝoirari ai beĝene vaĝa-foforiri; 2) bene vaĝa-ribari, Iesu ma beiaĝomani; 3) bene launaĝiri, Barau korana-iaĝina maĝurina korikorinai beĝene tanu.

Paulo na mai fefa tu maĝesi eboioĝaiato:

1. Ĝia aiĝesi vevaĝa-maĝuri ĝeĝoitaĝoto - karoa 1-3
2. Ĝia aiĝesina beĝene tanu mo maĝuri variĝunai - karoa 4-5

1 Ĝai tauma toitoi, Paulo, Silas, e Timoteo, na Tamara Barau ema Vereĝauka Iesu Keriso ĝena ekalesia Tesalonika nuĝanai gatore-vinimini.

Varevare-bara ema maino ĝemi ai bene tanu.

Tesalonika tarimari ĝeri maĝuri

2 Ĝai tu ĝaro mabarari ai Barau ĝavaĝa-namoani ĝomi mabarami daimi ai, ema ĝema ĝurigiuri nuĝari ai ĝakiraĝimini.

3 Korana Barau, ĝita Tamara, ĝoiranai ĝavetuĝamaĝi-taĝoni, ĝomi ĝemi veĝabidadama kamasu ĝotovo-naĝirini, e ĝemi veuravini ai kamasu ĝoĝunaĝaveni, ema ĝemi vetuĝamaĝikau ĝita ĝera Vereĝauka Iesu Keriso ĝenai kamasu ĝovaĝa-gwaĝigirini.

4 Tarikakama mabarami, ĝai ribama ĝomi tu Barau na eura-vinimini ema ĝia na eviriĝimito ĝia ĝena.

5 Korana Vari Namona ĝai na ĝavinimito tu dia guruĝai moĝo, senaĝi Iauka Veaĝa ma seĝukana e ma moĝonina ĝesi. Ĝomi maki ma ribami, ĝomi ĝemi namo uranai ĝai tu kamasu ĝatanuto ĝomi fakami ai.

6 Benamo ĝomi na maki ĝai ĝotovotovomato ema Vereĝauka ĝotovotovoato enabe ĝevaĝa-midigu midigumito, senaĝi Barau ĝena guruĝa ĝoĝabi-raĝeato ma vereremi ĝesi. Mo verere Iauka Veaĝa na evinimito.

7 Tauna moĝa ĝomi tu vevaĝa-ĝita namonai ĝoiaĝoto veĝabidadama tarimari mabarari Makedonia ema Akaia ĝeri.

8 Korana ĝomi ĝemina Vereĝauka ĝena guruĝa eraka-rosito tu dia Makedonia ema Akaia nuĝari ai moĝo, senaĝi ĝomi ĝemi veĝabidadama Barau ĝenai tu gabu mabarana beĝe ribaia. Moĝa lorinai monai ĝai na guruĝa ta tu asi ma baĝa kiraĝiani.

9 Ĝia tauĝeri maki ĝevakiraĝito ĝai na ĝavarivarimito nai, ĝomi na ĝai kamasu ĝoĝabi-raĝemato, ema kamasu babarau ĝoiaĝuirito, Barau maĝurina ema moĝonina vetuĝunaĝina boĝono iaĝo-vini ĝana,

¹⁰ ema Natuna Iesu ġonariani guba na ma beġenoġoi-iaġomani. Ġia tu Barau na mase na ma evaġa-varigisi ġenoġoiato, ema ġena baru bevaġa-foforiani o tarimarima bevaġa-kotarini ġaronai, Iesu na bevaġa-maġurirani.

2

Paulo ġena ġauvei Tesalonika ai

¹ Tarikakama mabarami, ġomi tauġemi ma ribami, ġemi ai ġaiāġosito nai, asi ġaġauvei-kavato.

² Ġomi ribami maki, ġai Tesalonika ġana roġosi roġo baġana iaġosi nai, Filipi ai ġevaġa-midigu midigumato e ġekira-fitoġamato. Moġoni, ġeiaiġomavini bareġomato, senaġina Barau na evaġa-kokoremato, ġena Vari Namona baġana kira-varami ġana.

³ Ġai ġema velaunaġi ġomi ġemi ai tu dia guruġa babobabo ai, dia tuġamaġi rakavari ai, e dia ta baġana ġofaia ġana.

⁴ Senaġi Barau na evaġa-moġonimato Vari Namona baġana fiua. Moġa lorinai ġakiraġiani, dia tarimarima baġana vaġa-iahuri ġana, senaġi Barau baġana vaġa-iaquia ġana. Ġia na ġai nuġama evetaurini.

⁵ Ġomi ribami, e Barau maki ġoiranai, ġai ġaiāġosito nai tu, dia nuġa-ġani ai ġavaġa-raġe ġofakaumito-ġoi, e mata-ġaniġani ai ġaguruġa-ġofakauto-ġoi.

⁶ Ġai tu asi ġomi na boġono vaġa-raġema, o tarima tari na beġene vaġa-raġema ġatato.

⁷ Ġai tu Keriso ġena apostolo tarimama, be ma ġema maoro, ġema-ġama ġomi ġemi ai baġara kiraġi. Senaġi ġomi ġesi tatanuto-ġoi neganai, ġai tu marana, sina ta na natuna eġita-ġaurini kavana.

⁸ Ġauravini-rakavamito lorinai ġaurato, dia Barau ġena Vari Namona moġo ġemi baġana kiraġi, senaġi ġema maġuri maki ġatore-taririto, korana ġema veuravini ġemi ai tu bareġo lelevaġi.

⁹ Tarikakama mabarami, ġai kamasi ġaġauveito-ġoi ema ġavekwarāġito-ġoi roġo ġotuġamaġi-taġorini, ene? Barau ġena Vari Namona ġaġobatavinimito-ġoi nuġanai, bogi-laġani ġaġauveito-ġoi, ġema-ġama baġana doġari uranai, baġa vaġa-doġe-ġanimini garina.

¹⁰ Ġomi na ġoġitamato ema Barau na maki eġitamato ġai kamasi ġaveaġato, ġavei-maoromaoroto ema asi ġema kerere ta ġomi vaġa-moġoni tarimami fakami ai.

¹¹ Ġomi ma ribami, ġai na ġomi tata ġaveimito-ġoi tu tama na natuna korikorina eveiani kavana.

¹² Ġai na ġavaġa-kokoremato-ġoi, ġemi tuġamaġi ġavaġa-gwaġiġirito-ġoi, ema ġalau-naġimito-ġoi Barau vaġa-iaikuna veigari boġono veiri ġana. Ġia na ekeamini, ġena Basileia ma marevana bareġona bene vinimi ġana.

¹³ Ġai na Barau ġatanikiu-viniani ġaro mabarari ai, korana ta tu, ġena guruġa ġaġabi-iaġosiato neganai, ġomi na ġoseġaġiato ema ġoġabi-raġeato tu dia tarimarima ġeri guruġa, senaġi guruġa moġonina korikori, Barau ġena guruġa. Mo guruġa tu ġovaġa-moġoniani tarimami nuġami ai eġauveini.

¹⁴ Tarikakama mabarami, ġomi tu Barau ġena ekalesia Keriso Iesu nuġanai Iudea ġesi boġo ilaila, korana Iuda tarimari na ġia ġevaġa-midigu midigurito ilailanai, ġomi maki ġemi doġoro tarimari na ġevaġa-midigu midigumini.

¹⁵ Iuda tarimari na Iesu Vereḡauka ema peroveta tarimari ḡevaḡirito, ema ḡai maki ḡelaimato. Barau tu asi ḡevaḡa-iakuani, ema tarimarima mabarari ḡekira-sirivaḡi vinirini.

¹⁶ Ḡai maki ḡekira-ḡoimani irau bese tarimari ḡeri ai Vari Namona asi baḡana kiraḡia, korana maḡuri vanaḡivanaḡi beḡe ḡabiani garina. Moḡesi ḡeri rakava vanaḡivanaḡi ḡevaḡa-baregorini. Senaḡi Barau ḡena baru maki iatari ai tu varau bevotu.

Paulo ḡena ura baregona Tesalonika tarimari ma bene ḡitari

¹⁷ Tarikakama mabarami, nega kotari roḡo ḡai ḡomi sevimi na ḡeinu-veḡitamato, dia tuḡamaḡi ai, senaḡi tauḡani ai, asi ma ḡaḡitamini. Ḡema ura baregona ḡoirami baḡana ḡitari.

¹⁸ Ḡai ḡaurato tu ma baḡana iaḡosi ḡomi ḡemi ai. Moḡoni, au Paulo, vaḡa-vira akirato, senaḡi Satani na ḡema dabara ekouato.

¹⁹ Baḡana ḡenoḡoi veḡata, korana ḡomi tu ḡai ḡema tuḡamaḡikau, ḡema verere e ḡema kokore voina ḡera Vereḡauka Iesu ḡoiranai ḡia ma beiaḡomani ḡaronai.

²⁰ Moḡoni, ḡai ḡema veiavi e verere korana tu ḡomi.

3

Paulo na Timoteo etuḡuato Tesalonika ḡana

¹ Ḡai ḡema vevaḡa-gwaḡiḡi ḡekorito, benamo ḡakirato, namona tu ḡai tauma ruarua moḡo Atena ai baḡana tanu,

² a ḡai tarikakama Timoteo tu baḡana tuḡua ḡomi ḡemi ai. Ḡia tu ḡai ḡesi Barau ḡena vetuḡunaḡi ḡaiḡo-viniani, Keriso ḡena Vari Namona ḡaḡobata-iaḡiani. Ḡia na bene vaḡa-kokoremi ema ḡemi tuḡamaḡi bene vaḡa-gwaḡiḡiri ḡemi veḡabidadama nuḡanai.

³ Be, ḡomi ta na ḡena veḡabidadama asi bene raga-kwaneana mani midigu-midigu ḡoḡoitaḡorini nuḡanai. Ḡomi ribami, maniḡeri tu bita ḡoitaḡorini veḡata.

⁴ Ḡai roḡo ḡomi ḡesi tatanuto-ḡoi nai, ḡakiramito-ḡoi, ḡita tu beḡe vaḡa-midigu midigurani, benamo moḡeri ḡefoforito, be ḡoribarito.

⁵ Moḡa lorinai, ḡegu vevaḡa-gwaḡiḡi ekorito, benamo Timoteo atuḡu-iaḡosato, ḡia ḡenana banama riba, ḡemi veḡabidadama tu kamasi ḡotoreani. Korana irau dabara tari ai veribaḡani tauna na beriba-ḡanimini, benamo ḡai ḡema vekwaraḡi asi taunai beiaḡoni garina.

Timoteo ḡena vevarifiu

⁶ Toma Timoteo tu ḡomi ḡemina beḡenoḡoi, ḡomi ḡemi veḡabidadama e veuravini variri namona bema kiraḡiri. Bekirama, ḡomi na ḡai roḡo ḡotuḡamaḡi-taḡomani, ema ḡourani boḡono ḡitama, ḡai na ḡomi baḡana ḡitami ḡatoni kavana.

⁷ Moḡa lorinai, tarikakama, ḡema midigumidigu ema dabara doko mabarari nuḡari ai ḡemi veḡabidadama na ḡevaḡa-kokoremato.

⁸ Korana ḡomi Vereḡauka ḡenai boḡo ruḡa-gigitarini neganai, ḡai ḡema maḡuri toma tu moḡoni beḡe namoni.

⁹ Barau ḡomi daimi ai kamasi baḡa tanikiu-viniani, korana ḡai ḡema verere tu asikeikeina ḡomi ḡemi ai Barau ḡoiranai.

¹⁰ Boġi-laġani ma nuġama mabarari ġesi ġaġauġauni, ġomi ġoirami ma baġana ġitari ema ġemi veġabidadamai ġorabuni dagarari na baġana vaġa-kavami ġana.

¹¹ Bere namo ġita Tamara Barau tauġena na ema ġera Vereġauka Iesu na ġema dabara beġene veia, ġomi ġemi ai baġana iaġosi.

¹² Ġera Vereġauka na maki ġomi veuravini na bene vaġa-vonuvonu-raġemi, karomi tata ema tarimarima mabarari boġono ura-viniri uranai, ġai na ġomi ġaura-vinimini kavana.

¹³ Barau na nuġami bene vaġa-kokoreri, benamo asi ġemi vei-rakava ta e ma veaġami ġesi Tamara Barau ġoiranai boġono ruġa, ġera Vereġauka Iesu ma beiaġomani ma ġena veaġa tarimarimari mabarari ġesi ġaronai. Amen.

4

Barau na eura-viniani maġurina

¹ Tarikakama mabarami, ġegu guruġa vaġa-magona tu maiġa. Barau vaġa-ia-kuna ġana aiġesi boġono tanu tu ġavaġa-ribamito. Moġoni, ġomi tu moġesi ġomaġurini. Iesu Vereġauka aranai ġanoġimini e ġalaunaġimini, ma boġono kokore-iaġiri ġana.

² Korana vevaġa-riba guruġari Iesu Vereġauka ġena maoro na ġavinimito tu ġomi ma ribami.

³ Barau ġena ura tu boġono vevaġa, mata-boraġa e veġura-vanaġi veiġari ġerina boġono raka-veġita.

⁴ Gomi tau tata maki ġaraġomi ġesi boġono tanu ma vevaġami e ma vevubakaumi ġesi.

⁵ Dia mata-boraġa na bene ġori-kaumi noġa Barau asi ribari beseri kavana.

⁶ Ema mo veġa rekenai tau ta na tarikakana asi bene ġofaġofa-iaġia ema ġena ura bene veia. Ġai na ma nuġama mabarari ġesi ġakira-guinemito: Moġesi eveini tarimana tu Vereġauka na ġena rakava voina beviniani.

⁷ Korana Barau na ekearato tu dia tana mata-boraġa e tana veġura-vanaġi, senaġi tana vevaġa ġana.

⁸ Moġa lorinai, dei na mo vevaġa-riba ġekira-fitoġaiani tu dia tarimarima ġekira-fitoġarini, senaġi Iauka Vevaġa evinimini Barauna ekira-fitoġaiani.

⁹ Au na tarikaka uraviniri guruġari tu toma asi batore-vinimini, korana Barau na evaġa-ribamito, ġomi tata boġono veura-vevini.

¹⁰ Moġoni, ġomi na tu tarikaka mabarari Makedonia nuġanai ġoura-vinirini. Senaġi tarikakama, ġai na ma ġavaġa-naġimini, mani veġa boġono vaġa-baregoa.

¹¹ Dagara baregona ġomi kamasi boġono tanu tu maiġesi: Asi boġono guru-raġe. Tauġemi ġemi ġauvei boġono vei, ema tauġemi ġimami na boġono ġauvei ġemi-ġami boġono doġari ġana, ġai na ġakiramito ilailanai.

¹² Monana vau asi ekalesia tarimari na beġe gubakaumini, ema ta ġenai asi boġo tuġamaġikauni, korana dagara tai asi boġo rabuni.

Iesu ġena ġenoġoi ġarona

¹³ Tarikakama mabarami, ġai ġaurani boġono riba, ġemaseto tarimari tu kamasi. Be, asi boġono tuġamaġi-meto, asi ġeri tuġamaġi-dadamaġi tarimari kavana.

14 Ġita na tavaġa-moġoniani tu Iesu emaseto, murinai tu ma evariġisi-ġenoġoito. Moġesi nai ma tavaġa-moġoniani deikara Iesu ġeġabidadama-viniato-ġoi nuġanai ġemaseto tarimari tu Barau na ma bevaġa-varigiġi ġeno-ġoirini, Iesu ġesi beġabi-vegogorini.

15 Ġai na kara ġavaġa-ribamini dagarari tu Vereġauka ġena guruġa: Vereġauka beġenoġoini ġaronai, ġita deidei roġo maġuri tatanuni tarimara na ġemase-guineto tarimari asi bita raga-kwanerini, asi bita guineni Vereġauka ġesi veġoitaġo.

16 Barau beguruġani ma seġukana ġesi, aneru baregona maki bekeakeani, ema Barau ġena dudu befururuani ġaronai, Vereġauka tauġena guba na bemariġoni. Benamo deikarari ġemaseto, Keriso ġevaġa-moġoniato-ġoi nuġanai ġemaseto tarimari, beġe variġisi-guineni.

17 Moġa murinai, ġita roġo tamaġurini ema roġo tatanuni tarimara Barau na ġia ġeri ai ma bevaġa-raka-kaurani magube nuġari ai Vereġauka ġesi bitana vedoġari ġana, guba e tanobara fakari ai. Benamo Vereġauka ġesi bita tanu-vanaġi vanaġini.

18 Moġa lorinai maiġeri guruġa ġerina ġomi tata boġono vevaġa-kokore-vevini.

5

Boġono rovina-tore Vereġauka ma beiaġomani

1 Tarikakama mabarami, ġai na ġomi asi ma baġa tore-vinimini, aitoma mo nega e hora beġe foforini.

2 Korana ġomi tauġemi ma ribami ġitakau, Vereġauka ġena iaġoma ġaronai tu lema tarimana, boġi eiaġomani kavana, beiaġomani.

3 Tarimarima beġe kirani, “Maino ema dagara mabarari namo moġo.” Nuġanai tu asikauna kerere baregona na beġabirini, noġa vavine ma banina diaa eguruni kavana. Tarima ta asi beraga-maġurini.

4 Senaġi tarikakama, ġomi tu dia mukuna nuġanai ġotanuni tarimami, be mo ġaro na nuġami tu asi bene vaġa-farevaġiri lema tarimana kavana.

5 Ġomi mabarami tu mama e laġani tarimami. Ġita tu dia boġi e mukuna ġeri tarimarima.

6 Moġa lorinai ġita tu asi bitana ġena, asi bitana tanu-kava, tarima tari ġeveini kavana, senaġi bitana tataġa, bitana boġeboġe, ema ġera tuġamaġi beġene maoro.

7 Ġegenani tarimari tu boġi ai ġegenani, ema ġeniuniuni tarimari maki boġi ai ġeniuniuni.

8 Senaġi ġita tu laġani ġena tarimarima dainai, ġera tuġamaġi beġene maoro. Ġita tu veġabidadama e veuravini ġesiri kobarai bitana toreri, ema vevaġa-maġuri vetuġamaġina debara kwaraġaunai tana vaġa-iaġoa.

9 Korana Barau na eġabi-viriġirato tu dia ġia ġena baru na tana midigu-midigu ġana, senaġi vevaġa-maġuri bitana ġabia ġera Vereġauka Iesu Keriso ġenana.

10 Ġia ġita urarai emaseto tu, ġia ġesi bitana tanu-vanaġi vanaġi ġana, enabe ġita roġo maġuri o mase ġia ma beiaġomani ġaronai.

11 Moġa lorinai ġomi tata boġono vevaġa-kokore-vevini e boġono vevaġa-kava-vevini, maitoma ġoveini kavana.

Vevaġa-riba guruġari tari

¹² Tarikakama mabarami, ƣanogimini, ƣomi fakami ai ƣeƣauvei-kokoreni, Vereƣauka aranai ƣenarimini e dabara korikori ai ƣevaƣa-ribamini tarimari boƣono gubakauri.

¹³ Ƣeri ƣauvei dainai boƣono gubakau-baregori ema boƣono ura-viniri. Ma mainomi ƣesi boƣono tanu.

¹⁴ Tarikakama mabarami, ƣavaƣa-naƣimini, ƣauvei asi ƣeveini tarimari boƣono sisiba-viniri, ƣegarini tarimari boƣono vaƣa-kokoreri. Moira tarimari boƣono vaƣa-kavari, tarimarima mabarari ƣeri ai boƣono vevaƣa-gwaƣiƣi.

¹⁵ Boƣono boƣebeƣe, tarima ta na rakava na rakava voina asi bene veia, senaƣi vanaƣivanaƣi ƣomi tata ƣemi ai ema tarimarima mabarari ƣeri ai maki veiƣa namori moƣo boƣono veiri.

¹⁶ Ƣaro mabarari ai boƣono verere.

¹⁷ Ƣaro vanaƣivanaƣi boƣono ƣauƣau.

¹⁸ Barau boƣono tanikiu-vinia dagara mabarari ƣeri ai. Korana mani tu Barau ƣena ura ƣomi Keriso Iesu ƣesi ƣomaƣurini nuƣanai.

¹⁹ Iauka Veaƣa karavana asi boƣono vei-busea.

²⁰ Peroveta guruƣari asi boƣono kira-fitoƣari.

²¹ Dagara mabarari boƣono riba-ginikauri; namori moƣo boƣono ƣabi-raƣeri.

²² Rakava dagarari mabarari ƣerina boƣono raka-veƣita.

Vevaƣa-namo guruƣari

²³ Maino Barauna na bene vaƣa-veaƣa ginikaumi. Iaukumi, e ƣemi maƣuri, ema tauƣaniami mabarari ƣia na bene nariri, kerere ta na maki asi bene ƣabimi, bene iaƣo mo, ƣera Vereƣauka Iesu Keriso ƣena iaƣoma ƣaronai.

²⁴ Ƣomi ekeamito Barauna ƣena guruƣa mabarari tu moƣoni, ƣia na beveirini.

²⁵ Tarikakama mabarami, ƣai maki iatamai boƣono ƣuriƣuri.

²⁶ Tarikaka mabarari vetarikaka verauna na boƣono vaƣa-namori.

²⁷ Alaunaƣimini Vereƣauka aranai mai fefa boƣono iavi-foforia tarikaka mabarari ƣoirari ai.

²⁸ Ƣera Vereƣauka Iesu Keriso ƣena varevare-bara ƣomi ƣemi ai bene tanu.

PAULO ĜENA TORETORE VAĜA-RUARUANA TESALONIKA EKALESIARI ĜERI

2 Tesalonika vaĝa-foforina gुरुĝari

Paulo na mai fefa vaĝa-ruaruana tu mo fefa giniguinena etoreato ma ĝue imaima sebona (6) evanaĝiato murinai ma etoreato. Mo tu ĝia roĝo Korinto ai etanuto-ĝoi nuĝanai etoreato.

Mai fefa nuĝanai siri baregona tu karao 2:3.

Paulo na mai ĝena fefa vaĝa-ruaruana etoreato mainai tu Tesalonika ekalesiari 1) ĝevaĝa-midigu midigurito-ĝoi nuĝanai evaĝa-gwadarito; 2) Iesu ĝena ĝenoĝoi-iaĝoma vaĝa-ruaruana gुरुĝari kotari ma ekira-vararito; 3) evaĝa-naĝirito, ĝeri veĝabidadamai beĝene ruĝa-gwaĝiĝi bene iago mo, Iesu Vereĝauka bene ĝenoĝoi, ema elaunaĝirito maki, asi beĝene ĝubulefi.

Paulo na ĝena fefa vaĝa-ruaruana tu maĝesi eboioĝaiato:

1. Nuĝari evaĝa-gwaĝiĝirito, ekirarito, Keriso tu ma beiaĝomani - karao 1
2. Loriri beĝene vetore korana Keriso ĝofaĝofana tu beiaĝoma-guineni roĝo - karao 2
3. Ekalesia aiĝesina beĝene tanu maĝurina - karao 3

1 Ĝai tauma toitoi, Paulo, Silas, e Timoteo na Tamara Barau ema Vereĝauka Iesu Keriso ĝena ekalesia Tesalonika nuĝanai ĝatore-vinimini.

2 Barau ĝita Tamara ema Vereĝauka Iesu Keriso ĝerina varevare-bara e maino ĝemi ai bene tanu.

Keriso ma beiaĝomani ĝaronai, Barau na tarimarima ĝeri rakava voiri bevinirini

3 Tarikakama mabarami, ĝai na tu Barau baĝana tanikiu-vinia ĝaro mabarari ai ĝomi daimi ai. Moĝesi baĝa veini tu maoro, korana ĝemi veĝabidadama ebarego-rakavani, ema ĝemi veuravini karomi mabarari ĝeri ai maki ebaregoni.

4 Moĝa lorinai ĝomi ĝavaĝa-raĝemini Barau ĝena ekalesia nuĝari ai. Ĝavaĝa-raĝemini korana ĝomi tu enabe ĝelaimini e ĝevaĝa-midigu midigumini, senaĝi ĝemi veĝabidadama ĝoĝabi-gigitariani.

5 Mo veĝa mabarari na Barau ĝena vevaĝa-maoro vetoĝana namona ĝevaĝa-moĝoniani, moĝa anina ĝomi tu ilaila ĝia ĝena Basileia boĝo ĝabiani, korana mo Basileia dainai ĝomidigu-midiguni.

6 Barau tu maoro veĝari mogo beveini: Ĝomi dei na ĝevaĝa-midigu midigumini tarimari ĝia na ma bevaĝa-midigu midigurini.

7 Ema ĝemi midigumidigu ĝerina bevaĝa-iaĝaraĝimini ema ĝai maki. Moĝesi beveirani Iesu Vereĝauka ma ĝena aneru ma seĝuka baregori ĝesi guba na beĝe mariĝoni ĝaronai.

8 Ma karava moremorena ĝesi beiaĝomani; Barau asi ĝekorana-iaĝiani tarimari ema ĝera Vereĝauka Iesu ĝena Vari Namona asi ĝeĝabi-raĝeani tarimari ĝeri rakava voiri bema vinirini.

9 Ĝeri rakava voiri tu maĝa: Ĝia tu Vereĝauka ĝenana e ĝena mama seĝukana ĝenana ma fakari beĝe tanuni, midigu vanaĝivanagi beĝe ĝabini.

10 Mo tu beĝorani Keriso ma beiaĝomani ĝaronai, ĝena tarimarima mabarari na beĝene vaĝa-raĝea, ema ĝevaĝa-moĝoniani tarimari na beĝene

vaġa-namoa ġana. Ġomi maki ġia ġesi, korana ġaġobata-vinimito, ġoġabi-raġeato nai.

¹¹ Moġa lorinai vanaġivanaġi ġomi iatami ai ġaġuriġurini. Ġera Barau ġanoġiani, ġemi maġuri bene vaġa-namori, korana ġia na ekeamito tu boġono maġuri ġana. Ġia seġukana na ġemi ura namori mabarari ai bene vaġa-ġaunami, ema ġemi veġabidadama dainai ġoveirini ġauveiri e veġari bene vaġa-ġuġururi.

¹² Monana, Iesu Vereġauka arana beġene vaġa-raġea ġomi daimi ai, ema ġomi beġene vaġa-raġemi ġia bakunai. Ġita ġera Barau e Vereġauka Iesu Keriso na ġeri varevare-bara ġerina moġeri dagara mabarari beġene vaġa-ġorari.

2

Taravatu ekira-fitoġaiani tarimana

¹ Tarikakama mabarami, ġai na ġanoġimini, ġera Vereġauka Iesu Keriso ġena iaġoma rekenai ema ġera vegoitago e raka-vegogo ġia ġesi:

² Nuġami asi beġene veġonu-ġarimoġi, o beġe kirani Vereġauka ġena ġenoġoi ġarona tu bevotu beġe toni neganai, nuġami asi beġene meto. Mo guruġa asi boġono vaġa-moġonia, enabe beġe kirani, mo tu peroveta guruġana, o ġobatai ġekiraġiato guruġana, o ġai na fefa nuġanai ġatoreato guruġana.

³ Tarima ta na veġa irauri ai asi bene ġofami. Korana Vereġauka ġena ġaro tu asi roġo beraġasini, beiaġoni mo, tarimarima ġutuma ġeri veġabidadama beġe raga-kwanerini, ema taravatu ekira-fitoġaiani tarimana beforini. Ġia tu Barau na karava gabunai bea toreani.

⁴ Tarimarima ġetoma-rakarigo vinirini e ġeguba-kaurini dagara veaġari mabarari mo tarima na bekira-fitoġarini, ema ġia tauġena bevetore-varaġeni. Ġia beiaġoni Barau ġena Rubu Veaġa nuġanai betanu-tarini, benamo bekirani, “Au tu Barau,” betoni.

⁵ Au ġomi ġesi roġo tatanuto-ġoi nai, moġeri mabarari akira-varamito. Ġomi na asi ġotuġamaġi-taġorini?

⁶ Taravatu ekira-fitoġaiani tarimana tu toma bere forori, senaġi dagara ta na elau-ġauani, ġomi tu ma ribami kara. Ġarona korikorinai vau mo taravatu ekira-fitoġaiani tarimana beforini.

⁷ Taravatu ekira-fitoġaiani tarimana ġena veġa vekuretoġari inította kota ġefoforini, senaġi kara beġe ġorani dagarari tu asi roġo beġe ġorani, beiaġoni mo, eruġa-ġaurini tarimana na dabara bekeoani.

⁸ Monai vau taravatu ekira-fitoġaiani tarimana beforini, senaġi Iesu Vereġauka ma beiaġomani ġaronai, muruna seġukana na bevaġiani, ema ekimore-kimoreni mamana ġesi beiaġomani, benamo bevaġa-rakavaiani.

⁹ Taravatu ekira-fitoġaiani tarimana tu Satani ġena seġukai beiaġomani, ġofaġofa veġa boruri e nuġa-farevaġi veġari mabarari beveirini.

¹⁰ Ema ġena veġa ġeġevari na mase dabaranai ġerakani tarimari beġofarini. Ġia tu beġe rekwa-rekwani, korana beġene maġuri ġana guruġa moġonina tu asi ġeġabi-raġeato e asi ġeura-viniato.

¹¹ Moġa lorinai Barau na tuġamaġi veġonuri ġia nuġari ai bevaġa-raka-toġarini, ġofaġofa beġene vaġa-moġoniri ġana.

12 Moġa tauna tu, deikara na guruġa moġonina asi ġeġabi-raġeato, senaġi rakava ġeaiaku-viniato tarimari mabarari tu, Barau na ġeri rakava voiri bevinirini.

Maġuri boġono ġabia ġana Barau na eġabi-viriġimito

13 Tarikakama mabarami, ġai na tu Barau baġana tanikiu-vinia ġaro mabarari ai, moġesi baġa veini tu maoro, korana ġia na eura-vinimini, ema tovotovonai eviriġimito bene vaġa-maġurimi ġana. Mo maġuri boġo doġariani, korana Iauka Veaġa ġena seġuka na evaġa-maġurimini, Barau ġena tarima veaġami ai evaġa-iaġomini, ema Vereġauka ġena guruġa moġonina ġovaġa-moġoniani.

14 Barau na ekeamito Vari Namona ġaġobata-vinimito ġenana. Ġomi ekeamito ġera Vereġauka Iesu Keriso ġena mareva baregona boġono ġabia ġana.

15 Moġa lorinai, tarikakama, boġono ruġa-gigitari, ġaġobata-vinimito ema fefai ġatore-vinimito vevaġa-riba guruġari mabarari boġono korana-iaġiri.

16 Gera Vereġauka Iesu Keriso tauġena ema Barau ġita Tamara na ġeura-vinirani. Ema ġena varevare-bara ġenana ġita tata nuġara evaġa-kokorerini ema evaġa-kavarani ġera vetuġamaġikau ġia ġenai tatoreani nuġanai, toma bene iaġo vanaġivanagi.

17 Ġia ġanoġiani, nuġami bene vaġa-kokoreri, ema bene vaġa-kavami guruġa e veiġa namori boġono veiri ġana.

3

Ġema boġono ġuriġuri

1 Tarikakama mabarami, ġema guruġa magonai tu, ġema boġono ġauġau, benamo Vereġauka ġena guruġa bene raga-rovorovo, ema gabu mabarari ai tarimarima na beġene ġabi-raġea ma vaġa-namona ġesi Barau ġenai, ġomi ġemi ai eġorato kavana.

2 Barau boġono noġia maki, ġia na rakava kwaikwai tarimari ġerina bene vaġa-maġurima. Korana dia tarimarima mabarari na Vereġauka ġena guruġa ġevaġa-moġoniani.

3 Senaġi Vereġauka tu ma ġena vetuġamaġikau ġomi ġemi ai. Ġia na bevaġa-kokoremimi, ema Satani ġenana bevaġa-maġurimini.

4 Ġai ġema veġabidadama ġomi ġemi ai tu Barau na evinimato, e ġaribani, ġakiramito veigari ġoveirini ema roġo boġo vei-vesiriġurini.

5 Vereġauka na ġemi tuġamaġi e ura mabarari bene ġori-kauri, be Barau ġena veuravini ema Iesu Keriso na evinimini vevaġa-gwaġiġina boġono riba-ġitakauri.

Ġauvei tu dagara baregona

6 Tarikakama mabarami, Vereġauka Iesu Keriso aranai ġakiramini, ekalesia tarimari ġubulefiri, ġavaġa-ribarito guruġari asi ġekorana-iaġirini tarimari, ġerina boġono raka-veġita.

7 Ġomi ribami ginikau, ġomi tu ġai ġaveito kavana boġono vei. Ġai tu asi ġavei-ġubulefito ġomi ġesi tatanuto-ġoi nai.

8 Tarima ta ġena-ġana asi ġaġabi-raġe kavarito-ġoi, senaġi ġavoirito-ġoi. Ġai tu boġi-laġani ġaġauveito-ġoi, ġavekwaragiġito-ġoi, korana ġomi ta baġa vaġa-doġe-ganimini ġarina.

⁹ Āi ma ġema maoro, ġomi ġemi ai ġema-ġama baġa kiraġini. Senaġi ġema ura tu vevaġa-ġita namonai baġana iaġo, ema ġai boġono tovotovoma uranai moġesi ġaveito-ġoi.

¹⁰ Āi ġomi ġesi tatanuto-ġoi nai, vevaġa-riba guruġana ta ġavinimito tu maiġesi: “Bema tarima ta ġauvei asi eurani nai, ġaniġani ta maki asi boġono vinia.”

¹¹ Moġesi ġakirani, korana ġaseġaġini tarima tari ġomi fakami ai tu ġubulefi ġetanuni, ġauvei asi ġeveini, senaġi tarima tari ġeri ġauvei ai ġevekougou-ġauni.

¹² Vereġauka Iesu Keriso aranai ġavaġa-guruġa gwaġiġirini e ġasisibavirinini, beġene tanu-ġitakau, asi beġene raka-taġuitaġui, senaġi tauġeri beġene ġauvei, ġeri-ġari beġene doġari ġana.

¹³ Senaġi ġomi, tarikakama, akiramini, asi boġono gau, veiġa namori veiveiri ai.

¹⁴ Bema tarima ta na mai fefai ġatore-iaġosirini guruġari asi eurani bene seġaġiri nai, nuġami ai bene tanu, ġia ġesi asi boġono vekako, be bene maiakaia.

¹⁵ Ġami vetari tarimanai asi boġono vaġa-iaġoa, senaġi tarikakami ġoveirini ilailanai boġono vaġa-ribaia.

Vevaġa-namo guruġari

¹⁶ Vereġauka, ġita ġera maino korana, ġia na ġaro vanaġivanaġi ġena maino bene vinimi ġemi maġuri tata nuġari ai. Vereġauka ġomi mabarami ġesi bene tanu.

¹⁷ Mai vevaġa-namo guruġana au, Paulo, tauġegu na atoreani. Ġegu fefa dokori ai vevaġa-namo guruġari maiġesi kavana ġimaġu na atorerini. Mo tu au ġegu fefa vaġa-moġoniri vetoġana.

¹⁸ Ġera Vereġauka Iesu Keriso ġena varevare-bara ġomi mabarami ġemi ai bene tanu.

PAULO ĜENA TORETORE GINIGUINENA TIMOTEO ĜENA

1 Timoteo vaĝa-foforina guruĝari

Paulo na mai fefa maĝa tu dia ekalesia doĝorona ta ĝena etoreato, mai tu tarima sebona arana Timoteo moĝo ĝena etoreato. Timoteo tu betaĝu Paulo ĝena evanelia ĝauveina nuĝanai emaĝuri-ĝenoĝoito (Apostolo 14; 1 Timoteo 1:2).

Paulo na mai fefa Timoteo ĝena tu laĝani 61 ma 65 fakari ai ta etoreato, mo tu Iesu emaseto murinai.

Mai fefa nuĝanai siri baregori tu karoa 3:15; 4:12; 6:11-12.

Paulo na mai fefa etoreato tu, 1) Timoteo evaĝa-guruĝa toreĝauato, ve-vaĝa-riba tarimari ĝofaĝofari na beĝe ĝofaiani garina; 2) ekalesia doĝorona ĝorikaŭri tarimari ema diakono tu aiĝesina tarimari bene ĝabiri; 3) vevaĝa-riba moĝoniri bene vevaĝa-riba-iaĝi; 4) Timoteo elaunagiato, Vari Namona eribaiaato moĝa ĝobina bene torea ema bene ĝobata-iaĝia.

Ĝena toretore tu maiĝesina eboioĝiaito:

1. Vevaĝa-riba guruĝari moĝoniri bene ĝabi-gigitariri - karoa 1
2. Ĝauĝau e toma-rakarigo guruĝari - karoa 2
3. Veĝitaĝau tarimari baregori ema diakono tu kamasiri beĝene ruĝa - karoa 3
4. Vevaĝa-riba tarimari ĝofaĝofari - karoa 4
5. Vetuĝunagi-iaĝovini tarimana e ekalesia doĝorona aiĝesi beĝene tanu - karoa 5-6

¹ Au Paulo, Keriso Iesu ĝena apostolo tarimagu, ĝeguna mai fefa eiaĝosini. Mai apostolo ĝauveina aveiani tu ĝita ĝera vaĝa-maĝuri Barauna ema Keriso Iesu ĝeri guruĝa lorinai. Ĝita tu Keriso Iesu ĝenai moĝo tavetuĝamaĝikauni.

² Timoteo, ĝoi atore-vinimuni, natugu korikori vegabidadama nuĝanai. Barau ĝita Tamara ema Keriso Iesu ĝita ĝera Vereĝauka ĝerina varevarebara, vevetuĝaĝwa, e maino ĝemu ai bene tanu.

Vevaĝa-riba ĝofaĝofa tarimari loriri bono toreri

³ Makedonia ĝana naiaĝo atato nai, ĝoi avaĝa-guruĝamuto, akirato, Efeso ai bono tanu. Korana tarima tari monai tu guruĝa ĝofaĝofari ĝevevaĝa-riba iaĝirini. Goi na moĝeri tarima bonoa kirari, beĝene doko.

⁴ Bono kirari, sinasina e tuburi ĝatari arari tu asi beĝene vetauri, korana moĝeri na tu veĝareveĝare moĝo beĝe vaĝa-ĝorarini. Ema moĝeri maki ĝia ĝeri vegabidadama asi beĝe vaĝa-kavarini, ema Barau na ĝita ĝerai kara neveia etoni dagarana asi beĝe ribaiiani.

⁵ Au ĝegu mai guruĝa tauna korikori tu ĝegu ura veuravini bene fofori. Mo veuravini tu nuĝa namo vedaureana, tuĝamaĝi iobukaiobukana, ema vegabidadama moĝonina ĝerina eiaĝomani.

⁶ Tarima tari tu moĝeri na ĝeraka-veĝitato, benamo guruĝa babori, asi tauri guruĝari ĝekiraĝirini.

⁷ Ĝia ĝeurani tu Barau ĝena taravatu vevaĝa-riba-iaĝiri tarimari ai beĝene iaĝo, senaĝina ĝia taŭgeri ĝeri guruĝa tu asi ĝetuĝamaĝi-fakarini, ĝeguruĝa-iaĝirini dagarari tauri korikori maki vekuretoĝa rakava, asi ribari.

⁸ Ĝita ribara, taravatu tu namo bema tarima na beĝauvei-iaĝi ginikauani nai.

⁹ Maiġa maki ma ribara: Taravatu ġevairito tu dia vei-iobukaiobuka tarimari ġeri, senaġi taravatu asi ġekorana-iaġirini tarimari ġeri, ema kira-sirivaġi tarimari ġeri, Barau garina asi ġegarini e vei-rakava tarimari ġeri, asi veaġa tarimari ema Barau asi ġegubakauani tarimari, sinari e tamari ġevairini ema vaġivagġi tarimari.

¹⁰ Mata-boraġa e veġuravanaġi tarimari, tau o vavine karori ġesi ġekimani tarimari, tarimarima ġelearini benamo ma ġevoivoi-iaġirini tarimari, ġofaġofa tarimari Kota nuġanai ġofaġofa guruġari ġekiraġini. Ema veġa rakavari ġutuma ġeveini vevaġa-riba guruġari moġoniri ġesi asi ilaila. Taravatu tu moġeri tarimarima ġeri ġevairito.

¹¹ Mo vevaġa-riba guruġari moġoniri tu Vari Namona nuġanai, Barau na au eviniguto bana kiraġi-foforiri ġana. Mo Vari Namona tu mareva namo Barauna ġena mama e seġuka varina.

Paulo na Keriso etanikiu-viniato

¹² Ġera Vereġauka Keriso Iesu na kokore eviniguto, ema etuġamaġiguto ma ġegu vetuġamaġikau ġena vetuġunaġi baiaġo-vinini. Moġesina naima etoreguto, ġena vetuġunaġi bana iaġo-vinia ġana. Moġa lorinaġi atanikiu-viniani.

¹³ Moġoni, guinenai au na Keriso tu aguruġa-rakava viniato-ġoi, alai-veġitaiato-ġoi ema avei-veġareveġare rakavaġiato-ġoi. Senaġi Barau na evetuġa-ġwaguto, korana mo negai kara aveiatio-ġoi tu au asi ribagu, ema Keriso asi avaġa-moġoniato-ġoi.

¹⁴ Ġera Vereġauka ġena varevare-bara barego lelevaġi au iatagu ai ebubu-kauato, veġabidadama e veuravini ġesi. Mo veġabidadama e veuravini tu Keriso Iesu ġesi bita sebonani vau bita ġabirini dagarari.

¹⁵ Mai guruġa tu moġoni, ema tarimarima mabarari na beġene ġabi-raġea e beġene vaġa-moġonia tu namo: Keriso Iesu tanobara ġana eiaġomato tu vei-rakava tarimari vaġa-maġuriri ġana. Vei-rakava tarimari mabarari fakari ai rakava kwaikwai tarimana tu au.

¹⁶ Senaġi Barau ġena vevetuġaġwa au, rakava kwaikwai tarimagu, ġegu ai etoreato, korana Keriso Iesu ġena vevaġa-ġwagġiġi bene vaġa-foforia ġana. Vevaġa-ġita namonai bene vaġa-iaġogou, tarimarima na beġene vaġa-moġonia vau, ġia ġenai beġene veġabidadama, maġuri vanaġivanaġi beġene ġabia ġana.

¹⁷ Barau tu tanu-vanaġivanaġi Verena, ġia mase asi ribana, asi ġitaġitana, ġia ġereġana kwariġutu moġo Barau. Ġia moġo bitana gubakaua, bitana vaġa-raġea toma bene iaġo mo vanaġivanaġi. Amen.

Timoteo na vetari namona bene vetari-iaġia

¹⁸ Timoteo, natugu o, au mai vaġa-naġi ġoi avinimuni, peroveta tarimari na ġeperoveta-iaġimuto ilailanai, moġeri bono tuġamaġi-taġori. Mo peroveta guruġari bono korana-iaġiri, be Barau ġena vetari nuġanai vevaġi namona bono veia.

¹⁹ Ġemu veġabidadama bono ġabi-giġitaria, ema nuġamu iauna namo bene tanu. Tarima tari na nuġari garori asi ġeseġaġi-vinirito, benamo ġeri veġabidadama tu noġa bouti fore ai ġevaġa-dagi-kauani, benamo eġwa-kirairaini kavana.

²⁰ Moġesi ġevaito tarimari ta tu Himenaio ma ta tu Alesanda. Ġia tauri ruarua tu Satani ġimana nuġanai atorerito. Korana ġia beġene riba, be Barau asi ma beġene vei-veġare veġarea ġana.

2

Rubu toma-rakariġo dabarana korikori

¹ Au ġegu sisiba ġiniguinena tu maġa: Tarimarima mabarari urari ai Barau boġono noġi-vinia, boġono ġauġau, tarimarima urari ai Barau e tarima vekaravari ai boġono ruġa, Barau boġono noġia ema boġono tanikiu-vinia.

² Kini e gavamani mabarari ġeri maki boġono ġuriġuri, be bitana tanu-ġinikau ma mainora ġesi, ema Barau bitana korana-iaġia ma moġonira ġesi.

³ Moġesi tu namo, ema Barau ġera vevaġa-maġuri tarimana bita vaġa-verereani.

⁴ Barau eurani tarimarima mabarari beġene maġuri ema guruġa moġonina beġene ribaia.

⁵ Korana Barau tu sebona kwariġutu moġo; ema Barau e tarimarima vefakari ai eruġani tarimana maki sebona moġo, Keriso Iesu.

⁶ Ġia tauġena ġena maġuri evinito, tarimarima mabarari bene voi-ġenoġoiri ġana. Barau ġena vevaġa-moġoni na tu mo ġaro eġabi-viriġiato, monai vau ema fororito.

⁷ Moġesina nai au etoreguto, apostolo e ġobata tarimagu. Mai tu moġoni, asi aġofamini. Au etoreguto tu, irau bese tarimari ġeri ai veġabidadama korikorina bana vevaġa-riba-iaġiri.

⁸ Au aurani ġabu mabarari ai tau tu ġimari veaġari beġene ġabi-vaisiri ġauġau nuġanai. Senaġi ġauġau ai ġimari veaġari beġe ġabi-vaisirini nai tu, nuġari tu asi baruri ema asi daradarari ġesi.

⁹ Au aurani vavine maki beġene vedabuġa-ġinikau, ma vegubakauri ġesi dabuġa beġene riġo. Ġuri asi beġene fego-iraurauri, ema golo o aġeva ma marevari iraurau na asi beġene vera, ema voiri baregori dabuġari na maki asi beġene vedabuġa.

¹⁰ Senaġi veġa namori ema roroġotori mabarari veravera noġa beġene veiri. Korana Barau ġegubakauani vavineri ġeri veġa korikori tu moġesina.

¹¹ Vavine na Barau ġena guruġa beġene seġaġi-viniri ma nuġa ġave-mukori ġesi, asi beġene guru-raġe.

¹² Au asi aurani vavine vevaġa-riba ġauveina beġene vei, ema veġorikau maġurinai ġia na tau asi beġene guine-iaġiri, ema asi beġene guru-raġe.

¹³ Korana Barau na Adamu evei-guineato, murinai vauro Eva ma eveiato.

¹⁴ Ema Satani na tu dia Adamu eġofaiato, senaġi Eva eġofaiato, benamo evei-rakavato.

¹⁵ Senaġina vavine tu mero beġene ġabi. Korana monana vavine vevaġa-maġuri beġe ġabiani. Mo tu bema ġeri veġabidadama e veuravini beġe ġabitaririni ema beġe veaġani e beġe tanu-ġinikauni.

3

Veġorikau tarimari rubu nuġanai

¹ Mai guruġa tu moġoni: Bema tarima ta eura-rakavani, ekalesia ġorikauna dagina bene ġabia etoni, ġia tu ġauvei namo vedaureana eura-viniani.

² Ekalesia ġorikauna tarimana tu maġesi bene tanu: Ġia tu vei-iobukaibuka tarimana, rakava ta ġenai asi boġoitaġoani. Ġia tu ġaraġona vavine sebona moġo, vevaġa-gwaġiġi tarimana, ġena tugamaġi e veġa maki roroġoto. Tarima boruri eġabi-raġerini ġena numai ema vevaġa-riba ġauveiri ma ribana tarimana.

³ Asi niuniu rakava-rakava tarimana ema asi eniara-niarani tarimana, senaġi manau ema maino tarimana; moni asi emata-ġaniġanini tarimana.

⁴ Ġena numa tarimari eġitaġau-ginikaurini tarimana ema natuna keikeiri na garona ġeseġaġi-viniani ma vegubakauri ġesi tarimana.

⁵ Korana bema tarima ta na ġena numa tarimari korikori asi beġitaġau-ginikaurini nai tu, kamara dabarai Barau ġena ekalesia doġorona beġitaġauani?

⁶ Ekalesia variguna na veġorikau dagina asi bene ġabia, korana beveiavini ġesi. Korana bevekokorokuni nai, Barau na vevaġa-maoro bevei-viniani Diabolo evei-viniato kavana.

⁷ Ġia tu asi ekalesia na maki ġegubakauani tarimana, ma tari na guruġa rakavari asi beġe kiraġini ġenai, ma Diabolo ġena rigrigi ai maki asi bea toġani.

Diakono tarimari

⁸ Diakono maki moġesi, tarimarima na ġeri veġa namori lorinai ġegubakaurini tarimari, ema dia dagara ta kiraġi-iaġinai tu tarima ta ġenai tu guruġa ta ġea kiraġiani, ma ta ġenai tu guruġa boruna ta ma ġea kiraġiani tarimari. Wain asi ġeniu-ġutumaiani, ema moni e farefare asi ġemata-ġaniġani-iaġirini, ema veġa ġofaġofari ġerina moni o farefare asi ġeġabini tarimari.

⁹ Ġia na guruġa moġoniri korikori vekuretoġari Barau na ġita taveġabidadamani tarimara ġerai ema vaġa-foforirito, moġeri ġeġabigitaririni nuġari ma iobukaiobukari ġesi.

¹⁰ Ġia tu boġono tovonagġi-guineri. Bema ġeri ai vetoukau ta asi boġo ġoitaġoani nai, diakono dagina beġene ġabi.

¹¹ Ġaraġori vavineri maki tarimarima na ġegubakaurini vavineri, asi ġeverori-toreni, ma vevaġa-gwaġiġi ribari e ma ġeri vetuġamaġikau dagara mabarari ġeri ai.

¹² Diakono tu ġaraġona vavine sebona moġo, natuna ema ġena numa tarimari ġitaġauri ma ribana.

¹³ Korana diakono ġauveina ġevei-ginikauani tarimari tu tarimarima na beġe gubakaurini, ema ġia tauġeri maki nuġari ma kokoreri ġesi Keriso Iesu ġenai ġeri veġabidadama beġe vaġa-ruġarini.

Guruġa vekuretoġa mabarana

¹⁴ Oba, au ġegu tuġamaġi tu bana raga-iaġosi, be banasi ġitamau, senaġina mai guruġa tu atore-vinimuni.

¹⁵ Bema bakwaiġboni nai, mai guruġa na bene vaġa-ribamu, tarimarima Barau ġena bese nuġanai tu kamasi beġene tanu. Barau ġena bese tarimari tu maġuri Barauna ġena ekalesia, ema ġia tu guruġa moġonina duġuna bareġona ema korana.

¹⁶ Moġoni, Barau korana-iaġina tu vekuretoġa ema doġu-masemase, Barau na evaġa-foforiato tu maġa:

Ġia tu efoforito tarima tauġaninai,
Iauka Veaġa na iobukaiobukana ekiraġiato,
aneru na ġeġitaiao.

Tanobara mabarari fakari ai ġeġobata-iaġiani,
tanobarai tarimarima na ġevaġa-moġoniani,
ġena mareva bareġonai Barau na eġabi-vaġeato.

4

Vevaġa-riba ġofaġofa tarimari

1 Iauka Veaġa na ekiraġi-foforiani, tarima tari ġoirara ġarori ai Keriso ġabidadama-vinina beġe raga-kwaneani, benamo ġofaġofa iaukari beġe seġaġi-vinirini, ema iauka rakavari ġeri vevaġa-riba beġe ġabi-raġerini.

2 Mo vevaġa-riba tu guruġa ġofaġofa tarimari na beġe kiraġirini. Ġia ġeri tuġamaġi iobukaiobuka dabarana tu emaseto, noġa moġo auri seġuka lelevaġi na ġegabu-maserito kavana.

3 Mo tarima na tarimarima ġekira-ġoirini asi beġene veġaraġo, ema ġaniġani tari beġe kiraġirini tu asi beġene ġani. A mo ġaniġani tu Barau na eveirito dagarari. Keriso ġevaġa-moġoniani e guruġa moġonina ġeribaiao tarimari na beġene ġaniri vaġa-namo ġauġauna murinai.

4 Korana tu dagara mabarari Barau na eveirito tu namo moġo. Ma ġaniġani ta tu asi bitana ruġaia, bema Barau tatanikiu-viniani vau taġabi-raġerini nai.

5 Korana mo tu Barau ġena guruġa na ema ġurigiuri na ġevaġa-veaġarini Barau ġoiranai.

Keriso ġena vetuġunaġi tarimana namona

6 Bema ġoi na moġeri guruġa tarikakara bovaġa-ribarini nai, ġoi tu Keriso Iesu ġena vetuġunaġi tarimamu namomu ta. Ema Iesu ġabidadama-vinina guruġari moġoniri ema vevaġa-riba guruġari namori okorana-iaġirini, maniġeri tu iauka ġaniġaniri, ġoi ġegubu-iaġimuni.

7 Sinasina babori ġerina tu bono veġita ema bono raga-kwaneri. Barau korana-iaġi-korikorinai bono kokore.

8 Tauġarina vaġa-kokorena veġari ġeri namo tu misina moġo, senaġi Barau korana-iaġina ġena namo tu barego lelevaġi dabara mabarari ai tuna. Korana monana tu namo bita doġariani mai maġuri nuġanai ema ġoira maġurinai.

9 Mo tu guruġa moġonina, be bitana ġabiraġe-ġinikaua.

10 Moġa uranai tavekwaragiini ema tamidigu-midiguni, korana tu maġuri Barauna ġenai ġera tuġamaġikau tatore-kauani. Ġia tu tarimarima mabarari ġeri vevaġa-maġuri Barauna, ma ġia tu ġevaġa-moġoniani tarimari ġeri vevaġa-maġuri Barauna korikorina.

11 Mai guruġa maġeri bono velaunaġi-iaġiri e bono vevaġa-riba-iaġiri.

12 Ta na ġoi asi bene ġita-fitoġamu, korana ġoi tu maraġa variġu moġo, senaġi vevaġa-ġita-iaġi tarimamu namomu ai bono iaġo ġemu guruġai, veġai, veuravini ai, veġabidadamai, ema maġuri namo vedaureanai.

13 Buka Veaġa bono iavi-foforia tarimarima ġeri ai, bono ġobata-iaġia, bono vevaġa-riba-iaġia, bene iaġo mo, au bana iaġosi.

14 Barau na evinimuto varevarena ġauvei-iaġinai asi bono moira. Mo varevare o seġuka tu peroveta guruġari ġerina oġabiato dagarana, ekalesia ġorikauna tarimari ġimari ġoi debamu ai ġetore-kaurito ġaronai.

15 Moġeri dagara bono ġauvei-iaġi ġitakauri. Mai ġauvei bono kokore-iaġia nuġamu e tauġanimu mabarari ġesi, be ġemu kokore tarimarima mabarari na beġene ġitaia.

16 Ġemu maġuri ġobina bono torea, ema ġemu vevaġa-riba guruġari loriri bono toreri. Mai veġa maġeri bono vei-vanaġi vanaġiri. Korana bema moġesi boveini nai, tauġemu bovevaġa-maġurini ema ġeseġaġi-vinimuni tarimari maki bovaġa-maġuririni.

5

Ġauvei veġabidadama tarimari rekeri ai

¹ Tarima baregona ta asi bono kira-feia; senaġi bono vaġa-guruġa ġaveġavea tamamu kavana. Maraġa variġu tu bono vaġa-guruġari tarikakamu kavana.

² Vavine baregori sinamu kavana bono veiri, ema vavine variġu tobamu kavana bono veiri, ma nuġa namo vedaureana ġesi.

³ Vabu ġereġari kwarigutu moġo nai tu bono gubakauri.

⁴ Senaġina vabu ta bema ġia tu ma natuna, o ma tubuna nai tu, ġia guine tu Barau korana-iaġina veiġana ġeri bese nuġanai roġo beġene riba-iaġia e beġene vaġa-foforia. Mo tu ġeri bese ġobiri beġene toreri ema vaġa-kavari. Moġesina veiġari ai tu tamari e sinari ma tuburi ġaukari ġeri vekwaraġi ġevaġa-voi ġenoġoirini. Ma maiġesi veiġari na tu Barau ġevaġa-iakuani.

⁵ A vabu, ġereġana moġo asi tau ġitaġauna, ġena tuġamaġikau tu Barau ġenai moġo betoreani. Boġi-laġani beġauġauni, Barau benoġiani bene vaġa-kavaia ġana.

⁶ Senaġi tauganina vaġa-vererena moġo veiġana eveiani vabuna tu varau emaseto, enabe roġo maġuri etanuni.

⁷ Mai guruġa tu vabu mabarari bono viniri, be ta ġenai rakava ta asi beġene doġaria.

⁸ Senaġi bema tarima ta na garagarana, o sikira ġena numa tarimari korikori, ġeri-ġari asi eġwaġwa-raġasini e eġuburini nai, ġia ġena veġabidadama Keriso ġenai tu ekure-togaiani. Ġia ġena rakava na tu asi eveġabidadamani tarimana ġena rakava maki evanaġiani.

⁹ Vabu ta arana asi bono torea roġo, vabu mabarari arari otorerini bukanai. Senaġina bema ġia ġena maġuri laġanina 60 evanaġiato, ema tau sebona moġo eġaraġoato.

¹⁰ Ema ġena veiġa namo lorinai tarimarima na ġeribaiani, e natuna ġobiri etore-ginikaurini, varivari tarimari eġabi-raġerini ġena numai, veaġa o ekalesia tarimari kwakuri eġurigiirini, (moġa anina tu tauġena evetore-rigoni), ġevaġa-midigu midigurini tarimari evaġa-kavarini, ema veiġa namori ai ekokoreni vabuna moġo arana bono torea.

¹¹ Senaġi vabu variġuri tu arari asi bono toreri, korana ġeri tuġamaġi rakavari na beġe ġori-kaurini, benamo Keriso ġenana beġe raka-veġitani, benamo ma beġe veġaraġoni.

¹² Benamo metona tauġeri na beġe ġabiani, korana ġeri guruġatore guinena Keriso ġenai ġefitoġaiani lorinai.

¹³ Ġubulefi beġe ribaiani ema numa loriri ai beġe raġekau-raġe-kauni. Dia ġubulefi moġo, senaġina beġe mugumuguni, raka-boġeraġe boġeraġe ema asi ġere kiragiiri guruġari beġe kiragiirini.

¹⁴ Moġa lorinai au aurani vabu variġuri tu beġene veġaraġo, be naturi beġene vaġa-ġorari, ema ġeri numa beġene ġita-ġauri, benamo evetari-vinirani iaukana faka ta asi beġene vinia ġita bene ġofaġofa-iaġira ġana.

¹⁵ Korana vabu tari tu varau Iesu ġena dabara na beġe raka-veġita, benamo Satani murinai ġerakani.

¹⁶ Senaġi bema Iesu evaġa-moġoniani vavinena ta ġena numai vabu tari ġetanuni, mo vavine na mo vabu bene ġitaġau-ginikauri, be ekalesia iatanai meto asi beġene tore-kaua. Moġesi tu vau ekalesia na tu ġereġari ġetanuni vaburi moġo beġita-ġaurini.

17 Ekalesia ġeġori-kauani tarimari, ekalesia ġauveina ġevei-ginikaurini tarimari, tu boġono gubakau-baregori, ema voiri iatari ai boġono torekau. Mai tu Barau ġena guruġa ġeġobata-iaġirini e ġevevaġa-riba-iaġirini tarimari akiraġirini.

18 Korana Buka Veaġa tu maiġesina ekirani, “Boromakau na widi efanafana-iaġirini nai tu, muruna asi bono barubarua.” Ma ekirani, “Ġauvei tarimana ġena ġauvei tu voina bene ġabia, moġesina tu maoro.”

19 Bema tarima ta na ekalesia eġori-kauani tarimana ekiraiani, ġia tu ekerereni nai tu, asi bono seġaġi-viniri, bene iaġo mo, tarima ruarua o toitoi na beġe vaġa-moġoniani vau.

20 Gevei-rakavani tarimari tu ekalesia tarimari ġoirari ai bono vaneri, be tarimarima maki beġene gari.

21 Barau e Keriso Iesu ema aneru veaġari ġoirari ai au ġoi аваġa-guruġamuni, mai vevaġa-naġi guruġari bono seġaġi-viniri nuġamu sebonai. Tarima baregori ema garagaramu moġo asi bono ġabi-raġeri.

22 Ġimamu tarima ta tubuanai asi bono torekau-ġarimoġia, tari ġeri veiġa rakavai asi bono vei-rakava, tauġemu lorimu bono vetore, bono namo-vedaurea.

23 Nanu korikori moġo asi bono niu, senaġi wain koturi kota maki bono niu, korana nuġamu bene iarevaia, okeve-kinikini ġutumani bene.

24 Tarimarima tari ġeri rakava tu fofori-ginikau, ma moġeri rakava na ġia tu ġeraga-kwanerini, benamo ġeiaġo-guineni Barau ġena Kota gabuna ġana. Senaġi tari ġeri rakava tu vekuretoġa, gabivau muriri na ġerakanaġi-rakanaġini.

25 Moġesina moġo veiġa namori maki maġatai foforitago. Senaġina veiġa namori tari asi ġefofori-ġariġarini dagarari tu vekuretoġa moġo asi beġe tanuni, senaġi beġea foforini.

6

1 Tuġunaġi ġeiaġo-vinini tarimari na ġeri baregona tu beġene gubakaua ema ġena veġorikau gaburenai beġene tanu. Moġesina beġe veini nai tu, ġeri baregona na Barau arana ema ġita ġera vevaġa-riba iatari ai guruġa rakavari asi bekiraġini.

2 Bema tuġunaġi ġeiaġo-vinini tarimari ġeri baregori tu Iesu ġevaġa-moġoniani tarimari nai tu, maiġesi asi beġene tuġamaġi, “Mai tu au tarikakagu, be garona asi naseġaġia e asi nagubakaua.” Asiġina! Ġia tu maiġesi neġi beġene vei, ġeri baregori ġeri vetuġunaġi misikose mabarari beġene iaġovini-ginikau. Korana ġia ġeri ġauvei ġena namo tu ġeri baregori, Iesu ġevaġa-moġoniani tarimari, na beġe ġabiani; moġeri tu ġia ġatari namori.

Vevaġa-riba ġofaġofa ema fafare moġoniri

Maġeri dagara ġia bono vaġa-ribari ema bono launaġi-iaġiri.

3 Bema tarima ta vevaġa-riba gofaġofari bevevaġa-riba iaġirini, ema ġena vevaġa-riba ġita ġera Vereġauka Iesu Keriso ġena guruġa moġonina ġesi asi besebonani, ma Barau ġena maġuri asi bevaġa-ribarani,

4 ġia tu veiavi tarimana, ema dagara ta asi etuġa-maġi-fakaiani. Ġia tu vedanaġi iraurauri beveini, ema Barau ġena guruġa bevevane-iaġirini. Moġeri na tu mama, vevane, guruġa rakavari, tarimarima ġeri ai vevaġa-daġa tuġa-maġiri rakavari beġe vaġa-ġorarani,

5 ema vanaġivanaġi veġareveġare maki asi ġedokoni. Moġesina ġeveini tarimari ġeri tuġamaġi tu rakava kwaikwai, ema guruġa moġonina na

geraka-veġitatu; ġia mataboru ġetuġamaġini, Barau korana-iaġina tu farefare ġutuma bodoġarini dabarana.

⁶ Moġoni, Barau ġekorana-iaġiani, ema farefare voġori na ma asi ġeiaġoni tarimari tu farefare ġutuma lelevaġiri beġe ġoitaġoni.

⁷ Korana dagara ta tanobara ġana asi taġabi-iaġomaiato, ema dagara ta maki tanobara na asi bita ġabi-iaġoani, asiġina!

⁸ Moġa lorinai, bema ġita ma ġara ġaniġani e ma ġera dabuġa nai tu, bitana kira, maiġeri tu ilaila ġemai.

⁹ Tarimarima deikara ġeurani farefare ġutuma lelevaġi beġene doġari ġetoni tarimari tu veribaġani na eġabirini, ġeri ura babori ema ura rakavari na evaġa-daġa-raġerini, monana einu-riġorini rakava ġana ema karava gabuna ġana.

¹⁰ Korana moni uravinina tu rakava mabarari lamuna. Tarimarima tari moni ġeuravini-baregoani tu Iesu ġabi-dadama-vinina na ġeraka-veġitatu, ema nuġa midigumidigu vovoka na nuġari egwanurini.

Paulo ġena vevaġa-riba guruġari Timoteo ġenai

¹¹ Senaġi ġoi, Barau ġena tarima, moġeri dagara mabarari bono raga-kwaneri! Benamo veiġa iobukaibukari, Barau korana-iaġina, vegabidadama, veuravini, vevaġa-gwaġiġi, nuġa manau bono vetauri ma kokoremu ġesi.

¹² Vegabidadama vetarinai bono kokore. Maġuri vanaġivanaġi bono ġabi-taria, korana mai maġuri uranai tu Barau na ġoi maki ekeamuto, tarimarima ġutuma ġoirari ai ġemu vegabidadama okiraġi-foforiato ġaronai.

¹³ Barau na dagara mabarari maġuri evinirini, ema Keriso Iesu Pontio Pilato ġoiranai evarifiuto tu guruġa namona ekiraġiato. Mai Barau e Keriso Iesu ġoirari ai ġoi avaġa-naġimuni:

¹⁴ Mai taravatu guruġari mabarari bono korana-iaġiri nuġamu asi vetoukauna ta ġesi ema kerere ta ġemu ai maki asiġina, roroġoto moġo, bene iaġo mo, ġita ġera Vereġauka Iesu Keriso ġena iaġoma ġarona.

¹⁵ Barau tauġena ġena ġaro korikori beraġasini ai vau, Iesu Keriso beforin. Barau ġereġana moġo Vere namo vedaureana, Vegitaġau Tarimana sebona kwariġutu tu, kini ġeri Kini ema vere ġeri Vere.

¹⁶ Ġia moġo ġereġana etanu-vanaġi vanaġini; ġia tu mama barego lelevaġina nuġanai etanuni, moġa lorinai ta na asi beraka-kaviani riba; ġia tu ta na asi eġitaiato ema ta na asi beġitaiani riba. Ġia ġenai vegubakau ema seġuka bene tanu mo vanaġivanaġi. Amen.

¹⁷ Farefare ġutuma tarimari mai tanobarai bono kirari, asi beġene veiavi, tanobara farefareri ġeri ai ġeri tuġamaġi-dadamaġi asi beġene torea, korana moġeri mabarari beġe korini, senaġi Barau ġenai beġene vetuġamaġikau; ġia na dagara namori ġutuma evinirani ġera verere ġari.

¹⁸ Bono kirari, veiġa namori beġene vei, veiġa namori ġeri farefare namori ai beġene vaġa-iaġori. Vegabiraġe tarimari ai beġene iaġo ema ġeri farefare tarima tari maki kota beġene viniri ma verereri ġesi.

¹⁹ Mo dabarai ġia ġeri farefare namori beġe vaġa-vegogo-torerini ġoirari ġarori ġana, ema maġuri korikori beġe ġabiani.

²⁰ Timoteo, Barau na evinimuto guruġari bono ġabi-tariri, guruġa rakavari e guruġa babori ema iaunega ġofaġofari vevaneri ai asi bono raka-toġa. Tarima tari na mo iaunega ġekiraġirini, "Riba". Mo tu ġeġofaġofani.

²¹ Tarimarima tari na mo “Riba” ġetoni moġa ġeġabi-raġerito, benamo ġeri veġabidadama Iesu ġenai ġeiaġuiato.

Barau ġena namo e varevare-bara ġomi ġemi ai bene tanu.

PAULO ĜENA TORETORE VAĜA-RUARUANA TIMOTEO ĜENA

2 Timoteo vaĝa-foforina guruĝari

Paulo na Timoteo ĝena mai fefa vaĝa-ruaruana tu Paulo Romai ediburato taiminai etoreato. Etoreato laĝanina tu 66 ma 67 fakari ai ta etoreato, mo tu Iesu emaseto murinai.

Mai fefa nuĝanai siri baregori tu karoa 1:13-14; 2:15; 4:1-5.

Paulo na mai fefa vaĝa-ruaruana etoreato, ĝena ura tu, 1) Timoteo maĝuri moĝoni ai moĝo bene tanu; 2) meto baregori beĝoitagoni nuĝanai asi bene moira, senaĝi vetuĝunaĝi ĝauveina bene kokore-iaĝia.

Paulo na mai fefa tu maĝesina eboioĝaiato:

1. Keriso varina moĝonina Timoteo na bene ĝabi-gigitaria - karoa 1
2. Keriso ĝena vetuĝunaĝi ĝauveina bene korana-iaĝia - karoa 2
3. Keriso ĝenana beĝe veĝitani tarimari guruĝari ekiraĝito - karoa 3
4. Keriso ĝena guruĝa ĝereĝana moĝo bene ĝobata-iaĝia - karoa 4:1-5
5. Paulo ĝena veĝabituĝu guruĝari etuĝuto - karoa 4:6-22

¹ Au Paulo, Keriso Iesu ĝena apostolo tarimagu, Barau ĝena ura lorinai; ĝeguna mai fefa eiaĝosini. Barau na etuĝuguto, ekiraĝi-toreato maĝurina Keriso Iesu ĝenana bita doĝariani maĝurina bana ĝobata-iaĝia ĝana.

² Timoteo, ĝoi atore-vinimuni, natugu, aura-vinimuni. Barau ĝita Tamara ema Keriso Iesu ĝita ĝera Vereĝauka ĝerina varevare-bara, vevetuĝaĝwa, e maino ĝemu ai bene tanu.

Paulo ĝena vevaĝa-namo e vevaĝa-kokore guruĝari

³ Boĝi e laĝani vanaĝivanaĝi ĝegu ĝuriĝuri nuĝari ai ĝoi atuĝamaĝimuni. Ĝegu ĝauĝau nuĝari ai tu Barau, ma nuĝagu iau-namona ĝesi vetuĝunaĝina aiaĝo-viniani Barauna, atanikiu-viniani. Barau tu au tubugu ĝatagu na maki vetuĝunaĝina ĝeiaĝo-viniato.

⁴ Otaĝito atuĝamaĝiani, ema ĝegu ura baregona ĝoi ma bana ĝitamu, ĝegu iaku bene barego ĝana.

⁵ Ĝoi ĝemu veĝabidadama moĝonina ma atuĝamaĝi-ĝenoĝoiani. Mani veĝabi-dadama maniĝa tu tovtovonai tubumu vavinena Lois e sinamu Eunike ĝeri ai maki etanuto-ĝoi. Au aribani, mo veĝabidadama sebona tu ĝoi ĝemu ai etanuni.

⁶ Moĝesina nai avaĝa-vetuĝamaĝi ĝenoĝoimuni, Barau na evinimuto varevarena, au ĝimagu iatamu ai atore-kauato nai, oĝabiato dagarana, bono ĝauvei-iaĝia.

⁷ Korana Barau na ĝita evinirato Iaukana na tu nuĝara asi bevaĝa-garirini Iaukana, senaĝi kokore, veuravini, e nuĝa-gwaĝiĝi evinirani Iaukana.

⁸ Ĝita ĝera Vereĝauka ĝena guruĝa kiragi-foforinai asi bene maiakamu, ema au Keriso ĝaramanai dibura numai atanuni nai maki, maiakagu na asi bene maiakamu. Senaĝi Barau ĝena kokore ai bono vevaĝa-gwaĝiĝi ema au ĝesi bono sebona, be Vari Namona ĝaramanai bitana midigumidigu.

⁹ Ĝia na evaĝa-maĝurirato ema ĝena keakea veaĝana na ekearato ĝena tarimarimai bitana iaĝo ĝana. Moĝesi eveito tu, dia ĝita ĝera veĝa e ĝauvei namo naima, senaĝi ĝia tauĝena ĝena ura e ĝena varevare-bara na moĝo. Mo varevare-bara tu tovtovonai veĝata, guba e tanobara roĝosi roĝo bere veia nuĝanai, Barau na Keriso Iesu ĝenana evinirato.

¹⁰ Senaġi maitoma tu ġita ġerai Vevaġa-maġuri Tarimana Keriso Iesu eiaġomato lorinai, mai varevare-bara ġita ġerai ema foforito. Keriso na mase ġena seġuka evaġa-koriato, ema Vari Namona ġenana maġuri e tanu-vaṅivanāġi evaġa-foforiato.

¹¹ Barau na au etoreguto tu mai Vari Namona bana ġobata-iaġia, bana ġwa-rosia, ema bana vevaġa-riba-iaġia ġana.

¹² Mo ġauvei ġaramanai au maiġesi amidigu-midiguni. Senaġi au tu asi emaiakaguni, korana aġabi-dadama-viniani tarimana tu ribagu ginikau. Ema au maki ribagu ġitakau, mai ġauvei ġimagu ai etoreato maiġa tu beġitaġau-ginikauani beiāġoni mo Kota baregona ġarona beraġasini.

¹³ Guruġa moġoniri au ġeguna oseġaġirito guruġari bono ġabi-gigitariri e bono korana-iaġiri vegabi-dadamai e veuravini ai. Mo vegabidadama e veuravini tu Keriso Iesu ġenana ġeiaġomani.

¹⁴ Barau na evinimuto varevarena bono ġita-ġaua. Ġita nuġarai etanuni Iauka Veaġana na mo varevare ġitaġanai bene vaġa-kavamu.

¹⁵ Ġoi ma ribamu Asia tanonai ġetanuni tarimari mabarari tu au ġeguna ġeraka-veġitato, Figelo e Hemogenes maki.

¹⁶ Onesiforo ma ġena numa tarimari ġesi tu Vereġauka na ġena vevetuġaġwa iatari ai bene torea, korana ġia na nega ġutuma au nuġagu evaġa-gwaġiġiato-ġoi. Ema au dibura numai atanuto maiakana na asi emaiakaiato.

¹⁷ Ġia Romai eraġasito ġaronai tu, au evetau-kokore kokoreguto mo edoġariguto.

¹⁸ Vereġauka na ġena vevetuġaġwa iatanai bene torea mo, Kota baregona ġaronai! Ema ġoi ma ribamu ginikau Efeso ai au vetuġunaġigu aiġesi eiaġo-viniato.

2

Keriso Iesu ġena vetari tarimana moġonina

¹ Moġa lorinai, natugu, ġoi tu Keriso Iesu ġena varevare-bara nuġanai bono kokore.

² Tarimarima vovoka ġoirari ai au ġeguna kara oseġaġirito dagarari vetuġamaġikau tarimari bono vaġa-ribari. Benamo moġeri na maki tarima tari ġeri ma beġenea kirāġi.

³ Keriso Iesu ġena vetari tarimana namonai bono iaġo, ema midigu-midigu nuġanai bono vevaġa-gwaġiġi au aveini kavana.

⁴ Vetari tarimana ġena maġuri ma ribamu. Evetarini nuġanai, ġauvei tari asi beveirini riba. Senaġina ġia ġena ura tu eġabi-toġaiato vetari verena vaġa-iakuna veiġana moġo bene veia.

⁵ Raga-iruiru baranai eragani tarimana, asi bekokoreni riba o korona asi beġabiani riba, bema raga-iruiru taravatuna asi bekorana-iaġiani nai tu.

⁶ Vamoka vei tarimana beġauvei-kokoreni tu tauġena roġo voina bene ġabi-guinea kwakwa ġaronai.

⁷ Vereġauka na vau tuġamaġi-faka bevinimuni, benamo mo guruġa mabarari bakiraġiri boriba-ginikaurini.

⁸ Maiġa tu bono tuġamaġi-taġoa. Iesu Keriso tu Davida senena, mase na evariġisi-ġenoġoito. Au na tu maiġesina akiraġiani Vari Namona aġobata-iaġiani nai.

⁹ Moġesina naima ġevaġa-midigu midiguguni, dibura numai maki seini na ġebarubaruguni noġa vevaġideba o lema tarimagu. Senaġina Barau ġena guruġa tu asi barutari.

¹⁰ Moġa lorinai midigumidigu mabarari avevaġa-gwaġiġi-iaġirini Barau na eġabi-viriġirito tarimari dairi ai, be ġia maki Keriso Iesu ġenana eiagomani vevaġa-maġurina, ema etanu-vanaġi vanaġini marevana baregona beġene ġabia uranai.

¹¹ Mai tu guruġa moġonina:

“Bema ġita Keriso ġesi tamaseto nai tu, ġia ġesi maki bita maġurini.

¹² Bema tavevaġa-gwaġiġini nai, ġia ġesi maki bita veġorikau-sebonani. Bema ġia takira-ġuniġauani nai, ġia na maki ġita bekira-ġuniġaurani.

¹³ Bema ġita asi tavetuġamaġikauni, ġia tu roġo gabunai ma ġena vetuġamaġikau beruġa-taġoni; Korana ġia tauġena tu asi bevekira-ġuniġauni, (mai tu ġena kiraġitore guruġari ġia na asiġina ġinavaġi bekeforini).”

Ġauvei tarimana namona

¹⁴ Mo guruġa ma bono vaġa-riba ġenoġoiri, ema Barau ġoiranai bono kira-toreġauri, guruġa koriri veġare-veġareri asi beġene vevaġi. Korana monana namo ta asi bevaġa-ġoraiiani, senaġi beġe seġaġini tarimari ġeri maġuri moġo bevaġa-rakavarini.

¹⁵ Bono ġauvei-ġunaġave, be Barau ġoiranai bono fofori nai, bene vaġa-moġonimu, ġauvei tarimana asi emaiakaiiani tarimana kavana. Korana ġia na tu Barau ġena guruġa moġonina evevaġa-riba ginikauani.

¹⁶ Sisiba rakavari e babori asi bono kiragi, ema ġerina bono veġita, korana mo sisiba ġekiraġirini tarimari tu Barau ġenana ġeraka-manaġani.

¹⁷ Guruġa moġesina ġekiraġirini tu noġa manuġa rakavari ġebakarini kavana. Himenaio e Fileto tu moġesina tarimari.

¹⁸ Ġia tauri ruarua na tu guruġa moġonina dabarana ġeraga-kwaneato. Ġekirani variġisi-ġenoġoi tu evetoreto, be ekorito. Moġesina ġeguruġani nai, tarima tari ġeri veġabadadama ġevaġa-rakavarini.

¹⁹ Senaġi Barau ġena guruġa korana tu eruġa-gwaġiġini fore baregona noġa, asi beġareva-ġarevani. Iatanai tu mai guruġa etoreato, “Vereġauka ma ribana deikara tu ġia ġena.” Ma ekirani, “Deikara ekirani ġia tu Vereġauka ġena etoni tarimana tu vei-rakava ġenana bene raka-veġita.”

²⁰ Numa baregona nuġanai tu mereki iraurauri moġeri, dia mabarari golo e silva na ġeveirito dagarari moġo, senaġi ġau e tano na ġeveirito dagarari maki moġeri. Tari tu ġaro baregori ai vau beġe ġauvei-iaġirini, a tari tu ġeġauvei-iaġi vanaġivanaġirini ġaniġani ġari o momo fitoġa dagarari.

²¹ Bema maiġeri veġa rakavari ġerina tauġena eveiarevani tarimana tu, ġauvei namori ġauvei-iaġiri tarimanai Vereġauka na bevaġa-iaġoani ema bevaġa-veaġaiiani. Ġia tu eġita-ġauani tarimana ġena ġauvei tarimana aroribanai beiaġoni ġauvei namori mabarari veiveiri ġana.

²² Guru variġu ġeri ura rakavari mabarari bono raga-kwaneri, ema maiġeri bono korana-iaġiri: Vei-iobukaiobuka, veġabadadama, veuravini, ema maino. Ma nuġari namo vedaureari Vereġauka ġenoġiani bene vaġa-kavari ġana tarimari ġesi bono sebona.

²³ Vedanaĝi e veĝareveĝare babori ĝerina bono raka-veĝita, korana ĝoi ribamu moĝeri na tu vevane beĝe vaĝa-ĝorani.

²⁴ Vereĝauka ĝena vetuĝunaĝi tarimana tu asi bene vevane, senaĝi tarimarima mabarari bene iaunamo-viniri, bene vevaĝa-riba ginikau, asi bene baru.

²⁵ Ĝekira-fitoĝaiani tarimari bene kira-rogori ma manauna ĝesi, betaĝu Barau na bevaĝa-vetuĝamaĝi kurerini, benamo guruĝa moĝonina beĝe ribani.

²⁶ Benamo ĝia ĝeri tuĝamaĝi beĝe roroĝoto-ĝenoĝoini ema Diabolo ĝena rigirigi na beĝe raga-veĝitani, korana ĝia na rogo eĝabi-taririni ĝena ura beĝene veiri ĝana.

3

Ĝaro magori ai

¹ Ema maiĝa maki bono ribaia: Ĝaro dokori ai tu rakava ĝutuma beĝe ĝorani.

² Tarima tu tauĝeri moĝo beĝe veura-vevinini, moni beĝe mata-ĝaniĝani iaĝirini, beĝe vekiraĝi-varaĝe varaĝeni, beĝe veiavini, ĝeri guruĝa beĝe rakavani, tamari sinari beĝe kira-sirivaĝi vinirini, tanikiu maki asi beĝe toni, ema asi beĝe veaĝani.

³ Asi beĝe veura-vini, tarima ĝeri rakava asi beĝe tuĝamaĝi-fitoĝarini, beĝe verori-toreni, asi beĝe vevaĝa-gwaĝiĝini, beĝe niara-niararini, beĝe kira-sirivaĝini.

⁴ Ĝia tu beĝe revani, ĝeri tuĝamaĝi rakavari ilailari ai beĝe vei-taĝuitaĝuini, nuĝari veiavi na beĝe vonuni, tanobara iakuri e verereri beĝe ura-vinirini, a Barau tu asi beĝe ura-viniani.

⁵ Barau korana-iaĝina tu tauna korikori iouiouna murikana rekenai moĝo ĝetovotovani, a ĝia tauna korikori seĝukana tu ĝeruĝaiani. Mo tarimarima ĝerina tu bono raka-veĝita.

⁶ Moĝesina tarimari tu tarimarima ĝeri numa nuĝari ai ĝeraka-toĝani, benamo nuĝari moira vavineri ĝeĝofarini. Mo nuĝari moira vavineri tu ĝeri veiĝa rakavari metori na ĝelaulau-taririni, ema ĝeri ura rakavari na ĝeĝori-kaurini.

⁷ Moĝeri vavineri tu vanaĝivanaĝi riba ĝevetauni, senaĝina guruĝa moĝonina tu asi ĝedoĝariani.

⁸ Iane e Iambre, Aigupito ĝeri ĝora tarimari, na Mose ĝelaulau-ĝauato kavana, mai vevaĝa-riba ĝofoaĝofo tarimari na guruĝa moĝonina ĝelau-ĝauani. Ĝia ĝeri tuĝamaĝi tu rakava kwaikwai, ema ĝia tu ĝeri veĝabidadamai asi ĝekokoreto, ĝeketoto.

⁹ Senaĝi asi beĝe raga-kwareĝani, korana tarimarima mabarari na ĝeri babo beĝe ĝita-doĝariani, Iane e Iambre ĝeri ai eĝorato kavana.

Vevaĝa-naĝi magori

¹⁰ Senaĝi ĝoi na tu au ĝegu vevaĝa-riba guruĝari mabarari okorana-iaĝirito, ĝegu veiĝa, ĝegu ura tauri, ĝegu veĝabidadama, ĝegu vevaĝa-gwaĝiĝi, ĝegu veuravini, ĝegu ruĝa-gwaĝiĝi otovotovorito.

¹¹ Ĝelai-veĝitaĝuto, ĝevaĝa-midigu midiguguto, ĝegu midigumidigu maiĝeri mabarari au ĝegu ai ĝeĝorato Antioka, e Ikonja, ema Listera ai. Ĝevaĝa-midigu midiguguto nuĝanai avevaĝa-gwaĝiĝito. Vereĝauka na moĝeri mabarari ĝerina eĝabi-maĝuriguto.

¹² Moĝoni, Keriso Iesu nuĝanai Barau korana-iaĝina beĝe urani tarimari mabarari tu moĝesina beĝe vaĝa-midigu midigurini.

¹³ Ma vei-rakava tarimari e ĝofaĝofa tarimari tu moĝesi moĝo beĝe vei-iaĝoni, rakava ĝenana rakava lelevaĝinai beĝea raĝasini, tarima tari beĝe ĝofarini, ema ĝia maki Diabolo na beĝofarini.

¹⁴ Senaĝi ĝoi tu kara oribaiato ema oĝabi-raĝeato maniĝa moĝo bono korana-iaĝia. Korana ĝevaĝa-ribamuto tarimari ĝoi tu ma ribamu,

¹⁵ ema keimu na beiaĝoma maitoma Buka Veaĝa guruĝari ma ribamu; maĝeri Buka Veaĝa guruĝari na iaunega beĝe vinimuni, benamo Keriso Iesu ĝenai boveĝabidadamani vevaĝa-maĝuri ĝabigabina ĝana.

¹⁶ Buka Veaĝa guruĝari mabarari tu Barau nuĝana na ĝeraka-rosito, benamo tarimarima nuĝari ai Iauka Veaĝa na evaĝa-raka-toĝarito. Ma ĝia tu ma ĝeri namo guruĝa moĝoniri vevaĝa-riba-iaĝiri ĝana, rakava vaĝa-foforiri, rakava vaĝa-roroĝotori ĝana, ema dabara iobukaiobukana vevaĝa-riba-iaĝina ĝana.

¹⁷ Mo guruĝa ĝerina Barau ĝena tarimarima beĝene riba-ginikau, benamo veiĝa namori mabarari beĝene veiri.

4

¹ Barau e Keriso Iesu ĝoirari ai avaĝa-guruĝa gwaĝigimuni. Iesu beĝenoĝoini ĝaronai tu, ĝena veĝitaĝau gaburenai maĝuri tarimari e mase tarimari virigiviriĝi bea vei-vinirini.

² Barau ĝena guruĝa bono ĝobata-iaĝia, ĝaro namori ai e ĝaro rakavari ai. Tarimarima ĝeri veiĝa rakavari na bono vaĝa-roroĝotori, bono kira-feiri, bono launaĝiri, bono vaĝa-ribari ma vevaĝa-gwaĝigimu ĝesi.

³ Korana ĝaro ta beiaĝomani, monai tarimarima na vevaĝa-riba moĝonina tu asi beĝe seĝaĝi-viniani, a ĝeri ura rakavari loriri ai vevaĝa-riba tarimari ĝutumari ma beĝe ĝabirini, ĝia na ĝeuravini-rakavarini guruĝari beĝene seĝaĝiri ĝana.

⁴ Guruĝa moĝonina seĝaĝi-seĝaĝina ĝenana beĝe raka-veĝitani, a ĝia tu sinasina guruĝari vau beĝe ura-baregoni.

⁵ Senaĝi ĝoi tu bono veĝitaĝau dagara mabarari ĝeri ai, midigumidigu nuĝanai bono vevaĝa-gwaĝiĝi, Vari Namona ĝobata-iaĝina ĝauveina bono veia, Barau ĝena vetuĝunaĝi ĝauveina mabarana bono ĝauvei-iaĝi ĝitakaua.

⁶ Korana au tu dori amaseni, ema au raragu tu bebebubuni noĝa vine nanuna Barau ĝevarevare-viniani nai ĝebubuani kavana. Au ĝegu rakaveĝita ĝarona tu beraĝasi.

⁷ Vetari nuĝanai avevaĝi-ĝitakauto, au ĝegu raga-iruiru tu varau bavaĝa-koria, ĝegu veĝabidadama tu roĝo aĝabi-tariani.

⁸ Toma ĝegu vei-iobukaiobuka korona evei-toreato, etanuni mo Kota baregona ĝarona beraĝasini nai, Vereĝauka, Kota Tarimana Iobukaiobukana, na beviniguni. Dia au moĝo, senaĝi mo deikara-deikara ĝia bema foforini ĝaronai ĝeura-viniani tarimari maki bevinirini.

Veĝabituĝu guruĝari

⁹ Bono kokore, be au ĝegu ai bono iaĝoma-ĝarimoĝi.

¹⁰ Korana Dema na tu mai tanobara maĝurina euravini-baregoani, benamo au eraga-kwaneguto, Tesalonika ĝana eiaĝoto. Kreske tu Galatia ĝana eiaĝoto, ema Tito tu Dalmatia ĝana.

¹¹ Luka ġereġana moġo au ġesi. Mareko bono ġoria, ġoi ġesi boġono iaġoma, korana ġia tu ġunaġave e au ġegu ġauvei nuġanai bevaġa-kavaguni riba.

¹² Tikiko tu Efeso ġana atuġuato.

¹³ Goi boiaġomani nai tu, auna koudi bono ġwa-kaua, Troas vanuġanai Karpo ġenai araga-kwaneato, ema ġegu buka maki bono ġwa-kauri, dagara baregona tu mamoe e nanigosi kefiru na ġeveirito toretore ġana dagarari, asi bono tuġa-rekwari.

¹⁴ Alesanda, auri eġauvei-iaġirini tarimana, na au evaġa-rakava baregoguto. Mo kara eveiato tu Vereġauka na vau voina beviniani.

¹⁵ Ġia ġenai tu tauġemu bono venari, korana ġia tu ġai ġema vevaġa-riba guruġari ekira-fitoġa rakavarito.

¹⁶ Tovotovonai ġota tarimari ġoirari ai aruġato nai tu, ta sevigu ai asi eruġa-tarito, asi evaġa-kavaguto, mabarari na ġeraga-kwaneguto. Aġau-ġauni, Barau na moġeri vei-rakava voiri asi bene viniri.

¹⁷ Senaġina Vereġauka tu au sevigu ai eruġa-tarito, benamo kokore eviniguto. Moġesina eveiguto korana tu, Vari Namona au na bana kiraġi-foforia, benamo irau bese tarimari mabarari na beġene seġaġia ġana. Ema au tu Barau na laion bokana na evaġa-maġuriguto.

¹⁸ Vereġauka na rakava mabarari ġerina beġabi-maġuriguni, ema ġena Guba Basileia ġana beġori-ginikauguni. Ġia arana bitana vaġa-raġea bene iaġo vanaġivanaġi, asi magona. Amen.

Vevaġa-namo dokona

¹⁹ Au ġegu vevaġa-namo atuġuani Priska (o Priskila) e Akwila ġeri ai, ema Onesiforo ma ġena numa tarimari ġeri ai.

²⁰ Erasto tu Korinto ai betanu, ema Trofimo tu Mileto ai baraga-kwaneana, korana ekeveni nai.

²¹ Bono kokore, be bono iaġoma-ġarimoġi, faraka e iavara ġueri roġosi bene ġabia nuġanai.

Eubulo, Pude, Lino, e Klaudia ġeri vevaġa-namo ġetuġuani, ema ekalesia tarikaka mabarari na maki.

²² Vereġauka tu ġoi iaukamu ġesi bene tanu. Barau ġena namo e varevarebara ġomi ġemi ai bene tanu.

PAULO ĜENA TORETORE TITO ĜENA

Tito vaĝa-foforina guruĝari

Mai fefa tu Paulo na Tito ĝereĝana ĝena etoreato. Mai fefa Paulo tu Roma dibura numana na etoreato. Mai fefa etoreato laĝanina tu 64 ma 65 fakari nuĝanai ta, mo tu Iesu maki emaseto murinai vau.

Mai fefai siri baregori tu karoa 2:11-14; 3:8.

Paulo na mai fefa etoreato korana ĝena ura, 1) Tito bene kiraia, ekalesia doĝorori ĝorikaŭri tarimari tu kamasiri bene ĝabiri; 2) Tito bene vaĝa-ribaia, Barau ĝena namo ema varevare-bara nuĝanai Barau korana-iaĝina maĝurina tu aiglesia bene tanu-iaĝia; 3) Tito bene launagia, vevaĝa-riba guruĝari moĝoniri bene vevaĝa-riba-iaĝiri.

Mai fefa Paulo na tu maiglesia eboioĝaiato:

1. Barau korana-iaĝina maĝurina ekalesia doĝorona nuĝanai - karoa 1
2. Barau korana-iaĝina maĝurina numa tatai - karoa 2
3. Barau korana-iaĝina maĝurina tanobara mabaranaĭ - karoa 3

¹ Au Paulo, Barau ĝena vetuĝu-naĝi tarimagu ema Iesu Keriso ĝena apostolo, ĝeguna mai fefa eiaĝosini. Au tu Barau na etuĝuguto, Barau na eĝabi-hidiriti tarimari ĝeri veĝabidadamai bana vaĝa-kavari, e guruĝa ema maĝuri moĝonina bana vaĝa-ribari ĝana. Mai guruĝa ema maĝuri moĝonina beĝe ribaiani tu, Barau beĝe korana-iaĝi-korikoriani.

² Korana monana vauro maĝuri vanaĝivanaĝi beĝe tuĝamaĝi-dadamaĝiani e beĝe ĝabiani. Mai maĝuri vanaĝivanaĝi maĝurina maĝa tu tanobara roĝosi bene vesina nuĝanai veĝata, Barau na ekiraĝi-toreato. Ĝia tu asi eĝofaĝofani Barauna.

³ Senaĝi maitoma vauro Barau tauĝena na eĝabi-toreato ĝaronai tauĝena na bema vaĝa-foforia. Mai Vari Namona maĝa tu ĝita ĝera Vevaĝa-maĝuri Barauna ĝena guruĝa lorinaĭ au ĝegu ĝobatai akiraĝi-foforiani.

⁴ Tito, mai fefa tu ĝoi ĝemu atore-iaĝosiani. Ĝoi tu au natugu korikori ĝita ĝera mai veĝabidadama sebona maĝa nuĝanai:

Tamara Barau ema Keriso Iesu ĝita ĝera Vevaĝa-maĝuri Verena ĝerina varevare-bara ema maino ĝemu ai bene tanu.

Tito ĝena ĝauvei Krete motumotunai

⁵ Au na ĝoi Krete ai araga-kwanemuto korana tu, kara maninai roĝosi bana veiri dagarari bono veiri ĝana. Ema vanuĝa baregori mabarari ai ekalesia ĝorikaŭri tarimari tari bono vaĝa-ruĝari mo akiramuto kavana.

⁶ Ekalesia ĝorikauna tarimana tu veĝa namori moĝo eveini, rakava ta ĝenai asi boĝoitaĝoani tarimana. Ĝaraĝona tu sebona moĝo; natuna na Iesu Keriso ĝevaĝa-moĝoniani, asi ĝeniara-kava niara-kavani, e asi ĝeseĝaforeni, ema guruĝa veroro asi ĝeseĝaĝini merori.

⁷ Korana ekalesia eĝuine-iaĝirini tarimana tu Barau ĝena ĝauvei eĝita-ĝauani tarimana. Moĝesina naĭma ĝia tu veĝa namori moĝo bene vei, a rakava ta ĝenai asi bene tanu, asi bene kira, ĝia tu tarima baregona, benamo tarimarima na tu ĝia ĝereĝana ĝena ura moĝo beĝene korana-iaĝia benesi, asiĝi. Asi bene baru-ĝarimoĝi, dia niuniu rakava-rakava tarimana, dia nuĝa-ĝirima-ĝirima tarimana, dia ĝofaĝofa veĝari ai ĝena-ĝana eĝoitaĝoni tarimana.

⁸ Ĝia tu veĝabiraĝe tarimana, veiĝa namori eura-vinirini tarimana, vevaĝa-gwaĝiĝi tarimana, vei-iobukaiobuka e veaĝa tarimana, ema nuĝa-gwaĝiĝi tarimana.

⁹ Guruĝa moĝonina ĝevaĝa-ribaiato guruĝari bene ĝabi-gigitariri, be ĝia na moĝeri vevaĝa-riba moĝonina bene ĝabi-iaĝoa, benamo tarima kotari ma benea launaĝiri, e vevaĝa-riba moĝonina ĝekira-fitogaiani tarimari maki bene vaĝa-guruĝa gwaĝiĝiri, be ĝeri kerere gaburi beĝene ĝita-doĝariri.

Krete motumotunai tu vevaĝa-riba tarimari ĝofaĝofari vovoka moĝeri

¹⁰ Guruĝa moĝonina asi ĝekorana-iaĝiani, ĝekira-sirivaĝini tarimari, e guruĝa asi tauri ĝekiraĝirini tarimari, ema vevaĝa-riba babori na tarimarima ĝeĝofarini tarimari tu asisebo maniĝeri. Iuda tarimari fakari ai ekalesia nuĝanai ĝeraka-toĝato tarimari tu maniĝesina ĝeveini.

¹¹ Maniĝeri tarima tu boĝono kira-ĝoiri. Korana ĝia na tu bese mabarari ĝeri veĝabidadama ĝevaĝa-rakavarini. Ĝia tu asi ĝere vevaĝa-riba-iaĝiri dagarari ĝevevaĝa-riba-iaĝirini. Ema ĝia mani-ĝeri tu moni e farefare beĝene viniri uranai ĝevei-ĝofakauni.

¹² Ĝia fakari ai ĝeri peroveta tarimana ta tu maiĝesi ekirato, “Krete tarimari tu vanaĝivanaĝi ĝeĝofaĝofani, boĝa bairi rakava kwaikwairi, ĝubulefi ma boĝeka tarimari.”

¹³ Ĝia ekiraĝirito guruĝana maiĝa tu moĝoni. Moĝa lorinai bono kira-matana matanari, be nuĝari mabarari ĝesi e ma moĝoniri ai beĝene veĝabidadama.

¹⁴ Ema Iuda seneri ĝeri sinasina asi beĝene seĝaĝiri, ema Barau ĝena guruĝa moĝonina ĝenana ĝeraka-veĝitani tarimari ĝeri taravatu maki asi beĝene korana-iaĝiri.

¹⁵ Nuĝa namo vedaurea tarimari ĝeri ai dagara mabarari tu namo vedaurea e veiareva. Senaĝi nuĝa asi veiareva ema Keriso asi ĝevaĝa-moĝoniani tarimari ĝeri ai dagara ta tu veiareva asi betanuni. Asigina ĝinavaĝi. Korana ĝia tu ĝeri tuĝamaĝi e nuĝari tu rakava kwaikwai bene.

¹⁶ Moĝeri tarima ĝekirani, ĝia tu Barau ma ribari ĝetoni, senaĝi ĝeri veiĝa na evaĝa-foforiani, ĝia tu Barau asiĝina ĝinavaĝi ribari. Maiĝeri tarima tu vei-rakava ma kira-sirivaĝi tarimari, ema veiĝa namori veiveiri ĝia ĝeri ai tu gwaĝiĝi foroforo.

2

Vevaĝa-riba moĝonina e iobukaiobukana

¹ Senaĝi ĝoi na tu vevaĝa-riba moĝonina bono vaĝa-ribari.

² Tarima ĝaukari bono kirari, nuĝari beĝene ĝabi-tariri, beĝene tuĝamaĝi-rorogoto e beĝene vevaĝa-gwaĝiĝi. Nuĝari mabarari e ma moĝoniri ĝesi beĝene veĝabidadama, e beĝene veura-vini, ema beĝene ruĝa-gwaĝiĝi.

³ Vavine ĝaukari maki mai vevaĝa-riba sebona moĝo bono viniri. Bono kirari, ĝia ĝeri maĝuri ema veiĝa beĝene veaĝa. Tarimarima arari asi beĝene vaĝa-rakava-kavari, e asi beĝene niu-babobabo. A ĝia tu veiĝa namori moĝo beĝene vevaĝa-riba-iaĝiri.

⁴ Benamo ĝia ĝeri mo vevaĝa-riba ĝerina vavine variĝuri na ĝaraĝori ema naturi beĝe ura-vinirini.

⁵ E beĝe vevaĝa-gwaĝiĝini, Barau ĝoiranai beĝe namo-vedaureani, ema ĝeri numa beĝe ĝita-ĝaurini, ema ĝauveiri maki beĝe vei-ginikaurini, ma

vavine namori ai beḡe iaḡoni e ḡaraḡori beḡe gubakaurini ema beḡe seḡaḡi-vinirini. Maiḡesi veiḡari beḡe veirini nai tu, Barau ḡena guruḡa tarimarima na asi beḡe kira-fitogaiani.

⁶ Tau maraḡa variguri maki mai velaunaḡi sebona moḡo bono viniri. Bono kirari, beḡene vevaḡa-gwaḡigi.

⁷ Dagara mabarari veiveiri ai tu ḡoi tauḡemu na vevaḡa-ḡita-iaḡi veiḡari namori bono veiri, be beḡene ḡitari. Bovevaḡa-ribani nuḡanai maki ḡere ai asi bono guruḡa, senaḡi guruḡa moḡoniri, guruḡa korikoriri,

⁸ ema guruḡa iobukaiobukari bono kiraḡiri, be tarima ta na ḡemu guruḡa asi bene ḡaoa. Moḡesina boveini tu, ḡoi ḡekira-fitoḡamuni tarimari beḡe maiakarini, benamo ḡita iatarai guruḡa rakavana ta asi beḡe kiraḡiani.

⁹ Tuḡu-rakaorakao tarimari bono launaḡiri, ḡeri baregori garori beḡene seḡaḡiri ema beḡene vaḡa-verereri ḡeri vetuḡunaḡi mabarari ḡeiaḡo-vinirini nuḡari ai. A asi beḡene guruḡa-vaḡa-voiri bonosi.

¹⁰ E bono kirari, ḡeri baregori ḡeri farefare asi beḡene lemalema-vaḡiri. Senaḡi ḡeri veiḡa namori moḡo beḡene vaḡa-foforiri. Ma mo veiḡa namori na ḡeri baregori beḡene vaḡa-ḡitari, ḡia ḡeri ai asi beḡene daradara, senaḡi beḡene tuḡamaḡikau. Maiḡesi beḡe veini tu, ḡita ḡera Vevaḡa-maḡuri Barauna ḡena vevaḡa-riba, tarimarima na tu beḡe vaḡa-raḡeani dabara mabarari nuḡari ai.

¹¹ Korana Barau ḡena namo e varevare-bara ḡenana vevaḡa-maḡuri eiaḡomato, mo vevaḡa-maḡuri tu tarimarima mabarari ḡeri ai ema fororito.

¹² Barau ḡena namo e varevare-bara na ḡita evaḡa-ribarani, Barau asi takorana-iaḡi korikoriani maḡurina tu bitana fitogaari. A ḡita mai tanobarai tatanuni tu, vevaḡa-gwaḡigi maḡurina bitana tanu, veiḡa iobukaiobukari bitana vei ema Barau bitana korana-iaḡi korikoria,

¹³ ḡaro baregona e namona tanari-taḡoani nuḡanai tu. Ḡita initiba tu Iesu Keriso tanari-taḡoani; ḡia tu ḡita ḡera Barau baregona e ḡera Vevaḡa-maḡuri Tarimana; ḡena iaḡoma ma marevana asikeikeina ḡesi moḡo tanari-vegoga-taḡoani.

¹⁴ Iesu Keriso ḡita urarai tauḡena evevinito, ḡita veiḡa rakava kwaikwairi nuḡari na bene voi-vaḡira ḡana uranai. Ema ḡita tu ḡia ḡereḡana ḡena moḡo bene vaḡa-namo vedaureara, benamo bene tore-ḡerevaḡira, ḡena tarimarima namori ai bisini iaḡo, ma ḡauvei namori moḡo veiveiri bisini uradika ḡana.

¹⁵ Ḡoi na tu maiḡeri maḡuri e veiḡa bono vevaḡa-riba-iaḡiri. Ḡemu maoro baregona maniḡa bono ḡauvei-iaḡia, tarimarima bono launaḡiri, ema ḡeseḡaforeni tarimari bono kira-feifeiri. Tarima ta na asi bene kira-fitoḡamu.

3

Aiḡesi ekalesia ḡere tanu

¹ Ḡemu tarimarima ma bono vaḡa-guruḡari, bono kirari, kini e gava-mani ḡeri veḡitaḡau gaburenai beḡene tanu e beḡene seḡaḡi-viniri. Ema vanagivanaga beḡene venari-taḡo, veiḡa namori beḡene veiri ḡana.

² Tarima ta ḡenai guruḡa rakavana ta asi beḡene kiraḡia, ta ḡesi asi beḡene vekira o vevane. A ḡia tu manau ai moḡo beḡene tanu ema tarimarima mabarari veiḡa namori moḡo beḡene vei-viniri.

³ Korana tu ḡita maiḡera maki guinenai tu babo, Barau asi ribara, Barau taseḡafore-viniato-ḡoi, Satani na eḡofarato-ḡoi, be Barau ḡena dabarai asi

tarakato-ḡoi. Ġita moḡeri negari ai tu veig̃a rakavari iraurauri tauravini-rito-ḡoi, e tauḡani korina vaḡa-vererena veig̃ari iraurau ḡeri tuḡu-rakarakao tarimari ai tavevaḡa-iaḡoto. Tarima vaḡa-midigumidiguri e vaḡa-vedaḡa-raḡeri tuḡamaḡiri taḡabito-ḡoi ema tarima ḡeri ai tamamoto-ḡoi, baru na tavonuvonu-raḡeto-ḡoi e karora ḡesi taveiau-rakavato-ḡoi.

⁴ Senaḡi ḡita ḡera Vevaḡa-maḡuri Barauna ḡena veiau-namo ema ḡena veuravini ḡita tarimara ḡerai ema foforito nai tu,

⁵ ḡita ema vaḡa-maḡurirato. Ġita tu dia ḡera vei-iobukaiobuka dainai ema vaḡa-maḡurirato. Asiḡina. Ġia tauḡena ḡena vevetuḡaḡwai moḡo ema vaḡa-maḡurirato. Eḡuriḡi-matamatarato tamaḡuri-ḡenoḡito ḡaronai, ema Iauka Veaḡa na ḡera maḡuri ma evaḡa-variḡu ḡenoḡirito.

⁶ Mai Iauka Veaḡa tu Iesu Keriso ḡita ḡera Vevaḡa-maḡuri Tarimana ḡenana Barau na ḡita iatarai ebubu-kauato.

⁷ Keriso na mai maḡuri eveiato, korana ḡita tu ḡia ḡena namo e varevare-bara ḡenana moḡo vei-iobukaiobuka tarimarai evaḡa-iaḡorato Barau ḡoiranai. Ema maḡuri vanaḡivanaḡi tatuḡamaḡi-dadamaḡiani maḡurina maki Barau na bevinirani, benamo bita ḡabiani.

⁸ Mai velaunaḡi guruḡari maḡeri tu moḡoni korikori. Be au aurani, ḡoi na mai veig̃a namori maḡeri tarimarima ḡeri ai bono kiraḡi-baregori, be mani Barau ḡenai ḡeveḡabidadamani tarimari maniḡeri tu ḡeri maḡuri beḡene nariri; ema ḡauvei namori ḡeveini maniḡeri tu roḡo beḡene vei-iaḡori. Korana mani veig̃a maniḡeri tu veig̃a namori ema maniḡeri na tarimarima mabarari maki beḡe vaḡa-kavarini.

⁹ A vedanaḡi babori e tubu ḡata o sene ainana ḡeiaḡomato moḡeri kiraḡi-ginikau ginikauri e veḡareveḡare, ema Mose ḡena taravatu vevaneri mabarari ḡerina tu bono veḡita. Korana maniḡeri na vevaḡa-kava namona ta tu asi bodoḡariani. Mani tu asi tauri dagarari.

¹⁰ Ekalesia doḡorona nuḡanai vetavi-kirakira veig̃ana eveiani tarimana tu bono kira-toreḡaua, bono kiraia, mo veig̃a asi bene veia. Beseḡaforeni, benamo mo veig̃a roḡo beveiani nai, vaḡa-ruaruana ma bono kira-toreḡaua. Moḡa murinai roḡo eḡiḡiraḡeni nai tu, bono ḡita-fitogaia moḡo.

¹¹ Korana maniḡesi vetavi-kirakira veig̃ari eveirini tarimana tu bono riba, ḡia ḡena maḡuri tu rakava kwaikwai ema vei-rakava nuḡanai etanuni. Ġia tu tauḡena ḡena vei-rakava na evaḡa-moḡoniani, ḡia tu moḡoni rakava tarimana.

Vevaḡa-riba guruḡari maḡori

¹² Au na Atemas o Tikiko ḡoi ḡemu ai batuḡu-iaḡosiani nai tu, dabara ta bono vetaua, benamo au ḡegu ai bono iaḡoma Nikopoli ḡana. Korana au tu akirato, faraka e iavara ḡueri nuḡari ai tu monai baḡabiani atato bene.

¹³ Taravatu tarimana Senas e Apolos ḡeri dabara bono raga-vei, be bono ragatuḡu-iaḡomari. Botuḡu-iaḡomarini nai tu, ḡeri ura dagarari mabarari maki bono vini-ginikauri.

¹⁴ Ġita ḡera tarimarima mabarari ḡauvei namori veiveiri ai asi beḡene biga dabarari bono vaḡa-ribari, be beḡene ribari. Korana moḡeri dabara beḡe ribarini nai tu, ḡaro vanaḡivanaḡi ḡeri-ḡari tu tauḡeri beḡe ḡauveini, benamo beḡe ḡoitaḡoni, ema ḡeri ḡauvei maki ḡwaḡwari beḡe vetoreni.

¹⁵ Mainai au karogu mabarari na ḡemi vevaḡa-namo beḡe tuḡu. Ġema vevaḡa-namo maki veḡabidadama nuḡanai ḡai ḡeura-vinimani tarimari bono viniri.

Barau ḡena namo e varevare-bara ḡomi mabarami ḡemi ai bene tanu.

PAULO ĜENA TORETORE FILEMONA ĜENA

Filemona vaĝa-foforina guruĝari

Paulo na mai fefa tu Filemona ĝena Roma dibura gabuna na etoreato. Mai fefa tu laĝani 60 ma 61 fakari nuĝanai ta etoreato, mo tu Iesu emaseto murinai vau.

Mai fefa anina baregona tu “Veĝabi-raĝe ĝenoĝoi”. Ma siri baregori mai fefai tu siri 15 ema 16.

Paulo na Filemona mai fefa etore-viniato korana tu ĝena ura, 1) Filemona bene kiraia, Onesimo ma bene ĝabi-raĝea tarikaka maĝurinai; 2) Filemona bene kira-varaia, ĝia tu dibura na dori eraka-rosini, ma beraka-rosini ĝaronai tu Filemona bea raka-ĝitaiani.

Paulo na Filemona ĝena mai fefa tu maiĝesina eboioĝaiato:

1. Paulo na Filemona evaĝa-veiaviato - siri 1-7
2. Paulo na Onesimo iatanai Filemona enoĝiato - siri 8-21
3. Veĝabituĝu guruĝari ekiraĝirito - siri 22-25

¹ Au Paulo, Keriso Iesu ĝaramanai diburai atanuni tarimagu, ema tarikakara Timoteo, ĝemana eiaĝosini.

Ĝauvei sebona ĝaveiani tarimana e ĝatama namona Filemona ĝemu atore-vinimuni.

² Ema tobara Afia, ema ĝatara namona, Barau ĝena vetari nuĝanai iauka rekenai, Arekipo, ema ĝoina numai ĝevegogoni ekalesiari ĝeri atore-vinirini.

³ Tamara Barau ema Vereĝauka Iesu Keriso ĝerina maino ema varevare-bara ĝemi ai bene tanu.

Filemona ĝena veuravini ema veĝabidadama

⁴ Filemona, ĝegu Barau atanikiu-viniani ema vanaĝivanaĝi ĝegu ĝauĝau ai akiraĝimuni,

⁵ korana ĝemu veĝabidadama Vereĝauka Iesu ĝenai ema ĝemu veuravini Barau ĝena veaĝa tarimari mabarari ĝeri ai aseĝaĝimuni nai.

⁶ Moĝa lorinai aĝuriguĝini ĝemu veĝabidadama bono vari-fiua tarima tari ĝeri ĝana, be dagara namori taĝaunarini Keriso ĝenai taveĝabidadamani lorinai, bono riba-ĝitakauri.

⁷ Moĝoni, tarikakagu, ĝemu veuravini na evaĝa-iaku rakavaguto ema elaunaĝi-rakavaguto, korana ĝoi na veaĝa tarimari nuĝari ovaĝa-kokorerito.

Paulo ĝena noĝinoĝi

⁸ Au tu nuĝagu gwaĝiĝi Keriso nuĝanai ĝoi bara kiramu kara boro vei,

⁹ senaĝi veuravini nuĝanai moĝo anoĝimuni ĝemu veuravini dainai. Mai tu au, Paulo, baĝauka ema Keriso Iesu ĝaramanai diburai maiĝegu.

¹⁰ Onesimo, au natugu, uranai anoĝimuni. Ĝia tu Keriso nuĝanai au natugu ai eiaĝoto, korana au roĝo dibura numana nuĝanai, iaukai ĝia tamanai aiaĝoto.

¹¹ Guinenai ĝia tu asi namo ĝoi ĝemu ai, senaĝina toma vetuĝunaĝi iaĝovininaĝi ĝia tu ilaila nai, ĝoi na oura-viniani ema au na maki aura-viniani.

¹² Ĝia tu au lorugu ĝutuna, mai atuĝu-iaĝosi ĝenoĝoiani, be bono ĝabi-raĝea.

¹³ Au ġegu ura ġia tu mainai bana ġabi-taria au sevigu ai, be ġoi gabumu bene ġabia au bere vaġa-kavagu, au Vari Namona ġaramanai roġo diburai nuġanai.

¹⁴ Senaġi ġegu ura ġoi na maoro boro vinigu vau bara ġabi-taria, moġesi naima asi aġabi-tariato. Au asi aurani maki ġoi bana kiramu kara bono veia. Au ġegu tuġamaġi, bema veiġa namori tari au durudurugu ġana bourani veiveiri nai tu, nuġamu sigai moġo bono veiri.

¹⁵ Betaġu ġoi ġemuna Onesimo eveġitato ġaro kotuna anina tu, ma boġabi-ġenoġoiani nai tu, ġoi ġesi bene tanu-vanaġi vanaġi ġana.

¹⁶ Dia ġemu tuġu-rakaorakao tarimana asi voina moġo. Asiġina. Moġoni, ġia tu ġemu vetuġunaġi tarimana, senaġi ġia toma tu ġoi tarikakamu moġoninai beiaġo, naima bono ura-vinia. Au na ġia tu anari-ġitakuani nuġaġu mabarana ġesi, ema ġoi na maki bouravini-lelevaġiani nuġamu mabarana ġesi. Ġia boura-viniani ema boġabi-raġeani tarima ta ema Vereġauka nuġanai tarikaka ta.

¹⁷ Bema au oġabi-raġeguni ġoi ġatamu, Onesimo maki bono ġabi-raġea au boġabi-raġeguni ilailanai.

¹⁸ Bema kerere ta eveiato ġoi ġemu ai o ma ġena ġabitore ġoi ġemu ai nai tu, au aragu ai bono toreri.

¹⁹ Au Paulo ġimagu na mai fefa atoreani. Mo ġabitore tu voiri mabarari bavini-ġenoġoimuni. Ġoi maki ma ġemu ġabitore au ġegu ai. Ġoi maġuri tu au ġeguna oġoitaġoato, senaġi manġeri tu asi bita kiraġirini.

²⁰ Be, tarikakagu Vereġauka nuġanai, mani ġemu veiġa ġegu noġinoġi bono ġabi-raġea. Ġita taura ruarua tu Keriso nuġanai tatanuni, be bono vaġa-iakugu.

²¹ Ġemu seġaġi ai avetuġa-maġikauni nai batore-vinimu. Au ribagu, dia anoġimuni veiġari moġo boveirini, senaġi veiġa namori boruri maki boveini.

²² Dagara ta maia. Ġegu gena daiġutuna ta bono ġabi-torea, korana atuġamaġini, Barau na ġemi ġauġau beġabi-raġeani, be beġabi-iaġosiguni ġemi ai.

Vevaġa-namo guruġari

²³ Epafras, Keriso Iesu ġaramanai au ġesi dibura numanai ġatanuni, ġia na evaġa-namomuni.

²⁴ Ema Mareko, Aristako, Dema ema Luka au ġesi ġaġauvei-sebonani tarimari, ġia na maki ġeri vevaġa-namo ġevinimuni.

²⁵ Vereġauka Iesu Keriso ġena varevare-bara mabarami ġemi ai bene tanu.

HEBERU

Heberu vaġa-foforina guruġari

Mai fefa toretorena tarimana ta tu asi ribana. Tari ġekirani tu Luka na etoreato, tari ġekirani tu Apolos, o Banabas, o Priskila, o Akwila, o Paulo na etoreato ġetoni. Gutuma ġekirani tu Paulo ġetoni korana fefa tu Paulo ġena fefa tore maġurinai ġetoreato. Mai fefa tu laġani 60 ema 70 fakari nuġanai ta ġetoreato, mo tu Iesu emaseto murinai.

Mai fefai siri baregori tu karoa 1:3; 4:14-16.

Mai fefa etoreato tarimana ġena ura baregona tu, 1) Heberu ekalesiari bene kirari, ekalesia maġurina korikorinai beġene tanu, a Iuda ġeri sene taravaturi ema maġuriri ġerina tu beġene raka-veġita ma ġeri ai asi ma beġene ġenoġoi-iaġo, maġuri vanaġivanāġi asi beġe doġariani garina (2:1; 6:4-6; 10:26); 2) Iesu Keriso bene vaġa-foforia, ġia tu moġoni Barau vetoġana korikori ema foforito tanobarai; 3) Barau ġena Ginitaġo Variġuna Iesu ġenai emoġonito moġa bene vaġa-fofori ginikaua etato.

Mai fefa tu maġesina eboioġaiato:

1. Vevaġa-riba-iaġi guruġari - karoa 1-10:18
2. Ekalesia tanutanuna maġuriri - karoa 10:19-13:25

Barau ġena guruġa Natuna ġenana

¹ Guinenai, ġaro vovoka e dabara ġutumai Barau na peroveta tarimari ġerina senera evaġa-guruġarito.

² Senaġi toma, mai ġaro dokori ai, tu Natuna ġenana ema vaġa-guruġarato. Barau na dagara mabarari tu Natuna eviniato bene ġaunari. Ema ġia ġenana maki Barau na guba e tanobara eveirito.

³ Ġia tu Barau marevana e mamana baregona evaġa-foforiani, ema ġia tu Barau tauġena kavana. Ġia ġena guruġa seġukana na dagara mabarari eġabi-taġorini. Ġia tauġena na ġera rakava ġuriġivaġiri dabarana evei-ġitakuato murinai, Barau Iaru-korokoro aroribanai ea tanu-tarito gubai.

Barau Natuna tu barego vedaurea, aneru maki evanaġirito

⁴ Barau na Natuna tu etore-varaġeato, aneru evanaġirito. Korana tu arana eviniato maki varaġe lelevaġina, aneru arari evanaġirito.

⁵ Korana Barau na aneru ta tu asi ekiraiato, ekirato, "Ġoi tu au Natugu,

toma au tu ġoi Tamamu ai baiaġo."

O maġesi maki asi ma ekiraiato, ekirato,

"Au tu ġia Tamanai baiaġoni, ema ġia maki au Natugu ai beiaġoni."

⁶ Ema Barau na Natuna guinena tanobara ġana ma beġori-iaġomaiani nai tu bekirani,

"Barau ġena aneru mabarami na boġono toma-rakarigo vinia."

⁷ Aneru ekiraġirito nai tu ekirato,

"Barau na ġena aneru eveirito iavara kavana, ġena vetuġunaġi tarimari karava emoreni noġa."

⁸ Senaġina Natuna ekiraġiani tu ekirani,

"Barau o, ġoi ġemu Vere dagina tu betanu-vanaġi vanaġini, ġemu Basileia tu ma iobukaibukamu ġesi oġori-kauani.

⁹ Vei-iobukaiobuka tu oura-vinirini,
ma veīga rakavari tu asi oura-vinirini.
Moḡa lorinai, Barau o,
ḡemu Barau na maki karomu fakari ai ḡoi eḡabi-viriḡimuto,
debamu ai diḡa esisiato,
iaku na evaḡa-vonumuto.”

¹⁰ Ema ma ekiraiato, ekirato,
“Vere o, tovtovonai tu
ḡoi na tanobara oveiato,
ema guba maki ḡoi ḡimamu veiveina.

¹¹ Ġia tu beḡe korini,
senāḡi ḡoi tu botanuni;
mabarari dabuḡa kavana beḡe rakavani.

¹² Ġoi na koudi noḡa boiokurini,
dabuḡa kavana vetoḡari beḡe irauni,
senāḡi ḡoi vetoḡamu tu asi beirauni,
ema ḡoi ḡemu maḡuri laḡaniri maki
asi beḡe magoni.”

¹³ Barau na aneru ta maki asi ekiraiato,
“Aroribagu ai noma tanu,
bene iaḡo mo, ḡoi ḡevetari-vinimuni tarimari ḡoi kwakumu fanakauna
dagaranaī batore-taririni.”

¹⁴ Aneru mabarari tu vetuḡunaḡi iaukari moḡo, Barau na etuḡurito
deikara vevaḡa-maḡuri beḡe ḡabiani tarimari vaḡa-kavari ḡana.

2

Vevaḡa-maḡuri baregona

¹ Moḡa lorinai kara taseḡaḡirito guruḡari tu tana ḡabi-gigitariri, asi namo
ḡerana beḡe rekwarekwani, benamo taiāḡo-viniani gabuna bita leaiāni.

² Korana aneru na ḡita senera ḡeri ḡevari-fiurito guruḡari tu moḡoni
veḡata, ma mo guruḡa moḡeri ḡekira-sirivaḡi-iaḡirito e asi ḡekorana-iaḡirito
tarimari tu ḡeri vei-rakava ilailari ai metona ḡeḡabiato,

³ a ḡita tu kamasi bita raga-maḡurini, bema mai vevaḡa-maḡuri baregona
bita ḡita-ḡuirāḡiani nai tu? Mai vevaḡa-maḡuri tu tovtovonai Vereḡauka
tauḡena na evari-fiuato. Moḡa murinai tu ḡeseḡaḡiato tarimari na ḡai ḡema-
kiravaramato mo tu moḡoni.

⁴ Barau na maki evaḡa-moḡoniato vetoḡa boruri ai, e nuḡa-farevaḡi
veiḡari ai, e seḡuka veiḡari boruri dabara irauirauri ai, ema Iauka Veāḡa
ḡena varevare dagarari na. Mo Iauka Veāḡa ḡena varevare dagarari tu
Barau ḡena ura lorinai veḡabidadama tarimari evinirito.

Iesu na vevaḡa-maḡuri gabuna ḡana eḡori-iaḡorani

⁵ Mo tanobara beiaḡomani ḡai na ḡakiraḡiani tu Barau na dia aneru ḡeri
veḡitaḡau gaburenai etoreato.

⁶ Senaḡina Buka Veāḡa nuḡanai gabu tai tarima ta evarifiuto, ekirato,
“Barau o, tarimarima tu dei,
be ḡoi na otuḡamaḡi-ḡwaḡiḡiani?
O Tarimarima Natuna tu dei,
be ḡoi na oraka-ḡitaiani?

⁷ Ġoi na kota otore-varīḡoato aneru gabureri ḡana;
murinai mareva baregona e vegubakau koronana ḡenai otore-kauato,

⁸ 8 ema dagara mabarari ġia kwakuna gaburenai otorerito.”

Korana Barau na dagara mabarari tu ġia ġena veġitaġau gaburenai etorerito. Moġoni, Barau na dagara ta tu asi etore-ragakwaneato, ġia ġena veġitaġau gabuna murikanai. Senaġina maitoma dagara mabarari tu dia ġia ġena veġitaġau gaburenai taġitarini.

⁹ 9 Senaġi Iesu taġitaiani, ġia tu Barau na mo faka kotunai etore-varigoato aneru gabureri ġana, korana Barau ġena varevare-bara ġenana tarimarima mabarari urari ai bene mase. Toma Iesu tu taġitaiani, iatanai Barau na mareva e vegubakau baregona etore-kauato, korana tu midigumidigu ai emaseto.

¹⁰ 10 Dagara mabarari eveirito e eġaunarito Barauna, ġena ura tu Iesu roġo midigumidigu ġenana asi vetoukaunai bene iaġo-guine. Moġa murinai vauro natuna ġutumari ma bene ġori-iaġomari, benamo ġia marevana e mamana baregona beġene ġabia. Barau ġenai dabara rorogotona sebona tu moġa moġo. Korana Iesu tu Barau natuna ġeri vevaġa-maġuri tarimana baregona.

¹¹ 11 Tarimarima evaġa-veaġarini tauna, Iesu, ema Iesu na evaġa-veaġarito tarimari Tamari tu sebona. Moġa lorinai Iesu tu asi emaiakaiani mo evaġa-veaġarito tarimari ekiraġirini ġia tarikakana.

¹² 12 Ġia na Barau ekiraiani, ekirani,
“Ġoi aramu tu au tarikakagu ġeri ai bakiraġi-foforiani;
ekalesia nuġanai ġoi mari ai bavonevone-raġemuni.”

¹³ 13 Ma ekirato,
“Barau ġenai baveġabidadamani.”
Ema ma ekirato maki,

“Au tu maiġegu Barau na eviniguto doġorona natuna ġesi.”

¹⁴ 14 Korana Barau natuna mabarari tu ma viriġori e ma rarari nai, ġia tauġena maki ġia ilailari ai eiaġoto. Moġesi eveito korana tu, ġena mase ġenana mase seġukana eġabi-taġoani tarimana, Diabolo, bene vaġa-rakavaia ġana.

¹⁵ 15 Ema tarimarima deikara ġeri maġuri nuġanai mase garina na eġuġuvirito bene vaġa-maġuriri ġana.

¹⁶ 16 Moġoni, Iesu na tu dia aneru evaġa-kavarito, senaġi Aberahamo besena.

¹⁷ 17 Moġa lorinai Barau na Iesu tu dabara mabarari ai tarina doġoro ilailari ai eveirito. Korana mo dabarai vau vevetuġaġwa e vetuġamaġikau Rubu Veaġa verena baregonai beiaġoni. Ema Barau vetuġunaġina beiaġo-vinini, tarimarima ġeri rakava na bene voi-vagiiri ġana.

¹⁸ 18 Korana Iesu tauġena na veribaġani midigumidiguna mamina eġabiato, toma kamara deikara veribaġani beġoitaġoni nai tu bevaġa-kavaiani riba.

3

Iesu ġena seġuka na Mose ġena seġuka evanaġiato

¹ 1 Moġa lorinai, tarikakagu veaġami, ġomi tu Barau na ekeamito guba na. Ġemi tuġamaġi boġono tore-gwaġiġia Iesu ġenai. Ġia tu Barau na etuġuato Rubu Veaġa verena barana. Ġita na tu ġia takiraġi-foforiani.

² 2 Iesu tu Barau na evaġa-ruġaiato Rubu Veaġa verena. Ema ġia tu ma ġena vetuġamaġikau Barau ġenai, ilailana Mose ma ġena vetuġamaġikau Barau ġena numai kavana.

³ Numa eragaiani tarimana tu ġegubakau-baregoani, a eveiani numana tu ġegubakau-keiani. Moġesi kavana Barau na Iesu tu mareva baregona eviniato, Mose na eġabiato marevana evanaġiato.

⁴ Numa mabarari tu ma ragaragari tarimari, senaġina dagara mabarari veiveiri tu Barau ġereġana.

⁵ Mose tu vetuġunaġi-iaġovini tarimana, ġia ma ġena vetuġamaġikau Barau ġena numai. Ema ġena ġauvei tu ġoirai Barau na kara bekiġaġirini guruġari ekiraġi-foforirito-ġoi.

⁶ Senaġina Keriso, Barau Natuna, tu Barau ġena numa eġita-ġauani. Ġita tu ġia ġena numa, bema ma kokorera e ma iakura ġesi taveiavi-iaġiani tuġamaġikaunai bita veġabi-gwaġiġini beiaġoni mo magona.

Barau ġena tarimarima ġeri iaġaraġi

⁷ Moġa lorinai Iauka Veaġa ekirani kavana bitana vei, maġesi ekirani, “Toma bema Barau garona boġo seġaġiani nai tu,

⁸ nuġami asi boġono vaġa-gwaġiġi foroforori, senemi tanobara fakanai veribaġani ġaronai ġeseġaforeto kavana.

⁹ Oba, tamami na laġani gabana vasivasi (40) tanobara fakanai ġegu ġauvei ġeġitaiato,

senaġina ġeribaġaniguto e ġevaġa-uraguto.

¹⁰ Moġa lorinai mo bese abaru-vinirito,

benamo akirato, ‘Ġia nuġari tu vanaġivanaġi au ġeguna ġeveġitani, ema au ġegu veġa maki asi ġeribarani.’

¹¹ Moġa lorinai ma barugu ġesi aguruġa-foforito, ‘Ġia au ġegu iaġaraġi ai tu asi beġe raka-toġani.’ ”

¹² Tarikakagu mabarami, boġono venari. Asi namo tarikaka ta ġomi fakami ai loruna ġutunai vei-rakava betanuni, ema Barau ġena guruġa asi bevaġa-moġoniani, benamo maġuri Barauna ġenana beraka-veġitani.

¹³ Toma mai ġaro maġa Barau ekirani, “Tomaġaro” etoni ġiranai, karomi tata ġesi boġono velaunaġi, be vei-rakava ġena ġofaġofa na ta nuġamu asi bene vaġa-gwaġiġia.

¹⁴ Ġita tu Keriso ġesi tasebonato, bema tovtovonai taġabi-raġeato veġabidadamana moġa bita ġabitari-gwaġiġiani beiaġoni mo magona.

¹⁵ Buka Veaġa ekirani kavana,

“Tomaġaro ai bema garona

boġo seġaġiani nai,

nuġami asi boġono vaġa-gwaġiġiri,

ġuinenai ġomi senemi seġafore ai ġeveito kavana.”

¹⁶ Dei na tu Barau garona ġeseġaġiato, senaġi ġena guruġa ġekira-fitogarito, benamo ġevaġa-baruato? Mo tu Mose na Aigupito na eġorisoririto tarimari mabarari, ene?

¹⁷ Ema deikarari tu Barau na mo laġani gabana vasivasi (40) nuġanai ebaru-vinirito? Tarimari tu moġeri, rakava ġeveito, benamo tano fakanai ġeketuto, benamo ġemaseto, ene?

¹⁸ Ema Barau na tu deikarari ekirarito, ekirato, “Au ġegu iaġaraġi gabunai tu asi beġe raka-toġani.” Ġeseġaforeto tarimari ekirarito, ene?

¹⁹ Moġa lorinai ġita taribani, ġia tu asi ġeraka-toġato, korana Barau asi ġevaġa-moġoniato-ġoi nai.

4

¹ Barau ġena iaġaraġi ai bita raka-toġani guruġatorena tu roġo eruġa-taġoni. Moġa lorinai bitana venari, ġita fakarai ta mo iaġaraġi ai asi beraka-toġani garina.

² Korana mo Vari Namona ġita ġera ġeġobata-iaġiato tu Isaraela tarimari ġeri maki ġeġobata-iaġiato. Senaġi mo guruġa ġeseġaġirito ġerina namo ta asi ġeġoitaġoato, korana tu ġeseġaġirito moġo, ma asi ġevaġa-moġonirito.

³ Senaġi ġita Barau tavaġa-moġoniani tarimara tu, mo iaġaraġi ai bita raka-toġani ġena guruġa ilailanai, ekirato,

“Au ġegu baru ai kiraġitore guruġana gwaġiġina akiraġi-foforiato, akirato,

‘Au ġegu iaġaraġi ai tu

asi beġe raka-toġani.’ ”

Moġoni, Barau tu moġesi ekirato, senaġina ġia na tanobara eveiato nai, ġena ġauvei mabarari tu varau evaġa-koririto.

⁴ Gabu tai Buka Veaġa nuġanai ġaro vaġa-imaima ruaruana (7) ekiraġiato nai tu, maġesina ekirani, “Ġaro vaġa-imaima ruaruanai (7) Barau tu ġena ġauvei mabarari ġerina eiaġaraġito.”

⁵ Ema mai vau bita kiraġia gabunai maki ekirato, “Ġia au ġegu iaġaraġi ai tu asi beġe raka-toġani.”

⁶ Senaġina tari mo iaġaraġi ai beġe raka-toġani guruġatorena tu roġo eruġani gabunai. Ma Isaraela tarimari, Vari Namona ġeseġaġi-guineato tarimari, tu mo iaġaraġi ai asi ġeraka-toġato, korana tu ġeseġaforeto nai.

⁷ Moġa lorinai Barau na ġaro ta ma eġabi-viriġiato, “Tomaġaro” eki-raġiato. Ma laġani vovoka ġekorito murinai, Barau, Davida ġenana maġesi eguruġato, ekirato,

“Toma, bema Barau garona

boġo seġaġiani nai,

nuġami asi boġono vaġa-gwaġiġiri.”

⁸ Bema Iosua na iaġaraġi bere viniri, Barau na moġa murinai iaġaraġi ġarona ta tu asi ma bere kiraġia.

⁹ Moġa lorinai Barau ġena tarimarima ġeri iaġaraġi tu roġo ġoirai eruġa-taġoni.

¹⁰ Korana Barau ġena iaġaraġi ai eraka-toġani tarimana tu ġena ġauvei na eiaġaraġini, ilailana Barau ġena ġauvei na eiaġaraġito kavana.

¹¹ Moġa lorinai sikokore, Barau ġena iaġaraġi ai tana raka-toġa uranai. Ma ġita fakarai ta asi bene keto, guinenai ġeseġaforeto tarimari kavari.

¹² Barau ġena guruġa tu maġuri e ma seġukana. Matana maki raga-rakava, vetari baġana ta matana ruarua maki evanaġiato, erakatoġa-korikorini maġuri ma iauka vekaravarina, ema turiġa komukomuri ruarua ġeraga-sebonato vekaravarina. Tarima loruna ġutuna ġena ura e tuġamaġi maki eriba-viriġiani.

¹³ Barau na eveirito dagarari mabarari tu ta asi vekuretoġa ġia matanai. Ema ġia ġoiranai ġita mabarara ġera maġuri bita vari-fiurini.

Iesu Rubu Veaġa verena barego vedaureana

¹⁴ Barau Natuna Iesu tu ġita ġera Rubu Veaġa verena barego vedaureana; ġia tu guba eraka-vanaġirito. Moġa lorinai ġera veġabidadamai tana veġabi-gwaġiġi. Mo tu ġita na takiraġi-foforiani veġabidadamana.

¹⁵ Ġita ġera Rubu Veāġa verena baregona tu ġita ġera moiramoiira ġia na maki emami-raġirini. Korana tu ġia maki ġenai veribaġani iraurau mabarari ġefoforito ġita ġerai kavana. Senaġi ġia tu asi evei-rakavato.

¹⁶ Moġa lorinai ma kokorera ġesi Barau ġena namo e varevare-bara terona ġana siraka-kavi-iaġo. Monai Barau ġena vevetuġaġwa bitana ġabia, ema ġena varevare-bara tana ġoitāġoa, be bita ura-viniani nai, bene vaġa-kavara.

5

¹ Rubu Veāġa vereri baregori mabarari tu tarimarima fakari na Barau na eġabi-viriġirito, benamo evaġa-ruġarito, tarimarima arari ai Barau ġena ġauvei beġene veia ġana. Ġia ġeri ġauvei tu tarimarima ġeri rakava voi-vaġiri ġana varevare dagarari Barau beġene vinia ema boromakau, mamoe, e manu beġene vaġiri, benamo beġene gaburi, Barau na bonari bene noġori ġana.

² Rubu Veāġa verena baregona tauġena maki ma ġena moira gaburi, naima ġia na asi ribari tarimari ema Barau ġena dabara na ġeraka-veġitani tarimari bevetuġa-ġwarini riba.

³ Ġia tauġena maki ma ġena moira lorinai, ġia na rakava voi-vaġiri varevareri tu ġia ġena evinini, ema tarimarima ġeri maki evinini.

⁴ Rubu Veāġa verena baregona dagina eġabini tarimana tu arana barego. Tarima ta na mai ginitaġo ġauveina tauġena na asi beġbi-kavaiani, senaġi ġia tu Barau na bene keaia vau, vaġa-ilailana Arona ekeaiato kavana.

⁵ Keriso maki moġesi, dia tauġena eveġabi-vaġaġeto Rubu Veāġa verena baregonai evetoreto, senaġina Barau na evaġa-ruġaiato, ekiraiato, ekirato, “Ġoi tu au Natugu, toma au tu ġoi Tamamu ai baiaġo.”

⁶ Gabu tai maki ekirani,
“Ġoi tu Rubu Veāġa verenai
botanu-vaġi vanaġini
Melkisedek kavana.”

⁷ Iesu tanobarai etanuto-ġoi ġarori ai tu ma taġi-koġokoġona ema matana ma nanuri ġesi Barau ġenai eġuriġurito-ġoi, ema enoġi-raġeto-ġoi. Korana tu Barau na ġereġana na moġo mase ġenana bevaġa-maġuriani. Barau na eseġaġiato, korana tu ma vegubakauna ġesi Barau garina eveito-ġoi nai.

⁸ Ġia tu Barau Natuna, senaġi ġena midigumidigu na vau seġaġi dabarana eribaiato.

⁹ Enamo-vedaureato murinai vau, ġia beġe seġaġi-viniani tarimari mabarari ġeri maġuri vanaġivanāġi vaġa-ġorana tarimanai eiāġoto.

¹⁰ Ema Barau na evaġa-ruġaiato Rubu Veāġa verena baregona Melkisedek kavana.

Asi boġono mero-kaukau

¹¹ Ġia varina tu vovoka bita kiraġirini, senaġina moġeri kiraġi-viriġiviriġiri tu gwaġiġi, korana ġomi tu asi ġotuġamaġi-faka ġarimoġini.

¹² Mai nega mainai ġomi tu vevaġa-riba tarimami ai ġoro iaġo, be ġoro vevaġa-riba-ġoi. Senaġina ġomi tu roġo ġourani ta na Barau ġena guruġa moġoniri korari na ma bene vaġa-ribami ġotoni. Ġomi tu roġo lata ġourani, ġaniġani gwaġiġiri tu asiġina.

¹³ Deikara lata roġo eruruni tu roġo mero keina. Ġia tu veiġa iobukaibukari ema veiġa asi roroġotori vetoġari tu roġo asi ribana.

14 A ġaniġani gwaġiġiri tu tarima baregori ġari. Ġia na tu ġeġauvei-iaġi vanagiġirini. Ġeġauvei-iaġirini ġarori ai tu tauġeri maki ġevevaġa-ribani namo e rakava vetoġari beġene ġita-leari ġana.

6

1 Moġa lorinai namona tu Keriso ġena vevaġa-riba guruġari tovotovonai riba guineri ġeġorani dagarari tu si-iaġuiri. Benamo ġia ġena vevaġa-riba baregori ġana si-iaġo. Tovotovonai riba guineri ġeġorani dagarari moġo asi bitana vevaġa-riba-iaġi ġenoġoi-ġenoġoiri. Mo tu vei-rakava ġerina tuġamaġi-kure ma raka-kure e Barau ġenai veġabidadama.

2 Babatiso vevaġa-ribari e ġima tarima iatari ai torekau, mase na variġisi-ġenoġoi e vevaġa-rorogoto vanagiġirini.

3 Moġa tu bita veiani bema Barau na bevaġa-moġoniani nai.

4 Bema tarima ta ġena veġabidadama beraga-kwaneani tu, kamara dabarai ma bevetuġamaġi-kureni? Ġia nuġana tu evaġa-mamaiato, ema guba na eiagomato varevarena emami-tovoato, ema lauka Veaġa maki eġbiato.

5 Ema Barau ġena guruġa namona edoġariato e vau ma beiaġomani tanobarana seġukari maki emamirito.

6 Bema ġia veġabidadama na ma beketo-veġitani, ġia tu Barau Natuna ma evaġa-satauro ġenoġoiani, ema ġutuma barai ma etore-rosiani e evaġa-maiakaiani. Ġia ma novaġa-vetuġamaġi-kurea ġana tu asi dabarana ta.

7 Ġaro vovoka ġura eraguni, benamo tano na mo nanu erimaiani. Benamo bema mo tano iatanai ġevaroni tarimari ġari ġaniġani namori bevaġa-ġorarinai nai tu, Barau na mo tano namo beviniani.

8 Senaġina ġau ma ġiniri ema ġauġa ma ġiniġiniri evaġa-ġararinai tanona tu asi ġena namo; Barau na mo tano bekiraġiani tu tano rakavana, ema dokonai tu beġabuani.

9 Ġataġu mabarami, moġoni, maiġesina ġavaġa-guruġa gwaġiġimini, senaġina ġatuġamaġi-gwaġiġini, ġomi tu namo baregona ema vevaġa-maġuri boġoa ġoitagoani.

10 Barau ġena veġa tu asi ġeġeva. Barau ġemi ġauvei ema ġia arana ġoura-viniani nai, ġena tarimarima ġovaġa-kavarito ema initoma roġo ġovaġa-kavarini tu asi betuġa-rekwarini.

11 Ġai ġema ura baregona tu ġomi tata maniġesi moġo boġono ġauvei-kokore-iaġo, ġemi tuġamaġikau beġenea moġoni bene iaġo mo dokonai.

12 Be asi beġene ġubulefimi, senaġina mo tarimarima ġeri veġabidadama e ġeri vevaġa-gwaġiġi ġerina mo kiraġitore ġeġabiani, boġono tovotovori.

Barau ġena kiraġitore

13 Barau ġena kiraġitore guruġana Aberahamo ġenai eveiato tu tauġena aranaġi eguruġa-toreto, korana tu tarima ta ma asi varaġe ġia iatanai, aranaġi beguruġa-toreni lorinai.

14 Ekirato, “Moġoni, ġoi tu bavaġa-namomuni ema besemu ġutuma bavini-muni.”

15 Benamo Aberahamo evevaġa-gwaġiġito, asi eġubulefito mo Barau na ekiraġi-torerito dagarari ġenai ġefoforito.

16 Tarimarima guruġatore gwaġiġiri mabarari ġeveini nai tu, tarima baregona ta ġia iataragi ai aranaġi ġeguruġa-toreni. Monana mo guruġatore guruġana gwaġiġina evaġa-moġoniani, benamo veġaveveġare guruġari mabarari elauġaurini.

17 Guinenai Barau ġena kiraġitore tu guruġatore guruġana gwaġiġinai eveiato. Korana ġia ġena ura ġia na kiraġitore beġe ġaunaiani tarimari beġene riba-ġinikau, ġia ġena kiraġitore tu asi bevekefoni.

18 Mo guruġatore ruarua tu beġe tanuni, asi beġe vekefoni. Ema mo dagara ruarua ġerina ġita taribani, Barau tu asi beġofaġofani riba. Be ġita deidei rakava ġenana taraga-veġitato, benamo Barau ġenai taiagomato tarimara tana kokore-korikori, be mo tuġamaġikau ġoirarai eruġa-taġoni tana ġabia.

19 Mo tuġamaġikau taġabiato tu ġita ġera maġuri eġabi-tariani dagarana. Mai tuġamaġikau tu moġonina e asi eirauni. Ġia tu vekouġau dabuġana na murina ġana eraka-toġani, eiaġoni mo, veaġa lelevaġi daiġutuna nuġana ġana.

20 Mo ġana tu Iesu eiaġo-quineto ġita bene vaġa-maġurira uranai. Ġia tu Melkisedek ġena dabarai Rubu Veaġa verena baregonai betanu-vanaġi vanaġini.

7

Melkisedek tu Rubu Veaġa verena baregona

1 Mai Melkisedek tu Salem vanuġa barana verena, ema ġia tu Iaru-korokoro Barauna ġena Rubu Veaġa verena. Ġia na Aberahamo eġogariato, vanuġa barari ġeri vere baregori o kini tari vetari ai evaġirito, benamo eġenoġoito-ġoi nuġanai, Aberahamo evaġa-namoato.

2 Ema Aberahamo na vetari ai eġabirito farefareri, karava gabanana (10) eveirito, benamo karava ta Melkisedek eviniato. Melkisedek arana anina ġiniguinena tu “Veġa Iobukaiobuka Verena”, ma arana ta tu “Salem Verena”, moġa anina tu “Maino Verena”.

3 Ġia asi tamana, asi sinana, asi besena ta, ema ġena maġuri evesinato ġarona e ġena maġuri emagoto ġarona maki asiġina. Ġia tu Barau Natuna kavana etanuni, Rubu Veaġa verena vanaġivanuġi.

4 Melkisedek ġoġitaia, ġia tu tarima arana barego lelevaġi, korana Aberahamo tu senera baregona na maki vetari ai eġabirito farefareri karava gabanana (10) ġerina ta ġia eviniato.

5 Taravatu ekirani, Levi besena Rubu Veaġa verena dagina beġe ġabiani tarimari tu karava gabanana ġerina ta beġene gogo Isaraela tarimari ġerina, mo tu tarikaka ġerina. Moġoni, tarikakari maki Aberahamo ġena bese tarimari, senaġina ġia ġerina beġene gogo.

6 Melkisedek senena tu dia Levi ġenana eiaġomato, senaġina Aberahamo ġenana karava ta eġabiato. Ma ġia na Barau ġena kiraġitore eġabiato tarimana evaġa-namoato.

7 Asi bita daradara-iaġiani, tarima baregona na tarima keina vevaġa-namo eviniani.

8 Levi senena, karava gabanana ġerina ta ġeġabiato doġorori, tu ma ġemaseto-ġoi. A Melkisedek na maki karava ta eġabiato, senaġi ġia tu Buka Veaġa na ekiraġiani asi emaseto.

9 Benamo maiġesi ma nakira, Levi maki karava gabanana ġerina ta ġeġabiato-ġoi tarimana. Ġia na Aberahamo ġenana Melkisedek karava ta ma evini-ġoiato.

10 Korana Melkisedek na Aberahamo eġoitaġoato ġaronai tu, Levi tu roġosi roġo bene maġuri, roġo ġatana Aberahamo tauġaninai.

Iesu tu Melkisedek kavana

11 Guinenai Barau na Isaraela tarimari taravatu evinirito. Mo taravatu ekirani, Levi besena na ginitaĝo veaĝa ĝauveina beĝene veia. Senaĝi bema Levi besena ĝeri Rubu Veaĝa verena ĝenana e ĝeri ĝauvei seĝukana na mo namo vedaurea beĝere ĝabia nai tu, kara dainai Barau tu ma ekirato, Rubu Veaĝa verena ta ma betuĝuani Melkisedek ilailanai, ma dia Arona kavana?

12 Korana bema ginitaĝo ĝauveina ĝeveiani tarimari ĝeri doĝoro ĝesenisito nai tu, taravatu maki besenisini.

13 Korana Iesu mai takiraĝiani tarimana tu irau doĝoro. Ĝia ĝena doĝoro tarimana ta fata veaĝana iatanai ginitaĝo ĝauveina asi eveito.

14 Korana ribara, ĝita ĝera Vereĝauka tu Iuda besena na emaĝurito. Ma Mose na Rubu Veaĝa vereri ekiraĝirito-ĝoi nai tu, Iuda doĝorona tu asi ekiraĝiato.

15 Ema kara bita kiraĝia toma tu bita ĝitafaka-ginikauani, korana Rubu Veaĝa verena ta ma befofori Melkisedek kavana.

16 Ĝia tu dia senena kavari, taravatu seĝukanai Rubu Veaĝa verenai eiaĝoto, senaĝina maĝuri vanaĝivanaĝi ĝenana eiaĝomani seĝukana na Rubu Veaĝa verenai eiaĝoto.

17 Korana Barau na maĝesi ekiraiato, ekirato,
 “Ĝoi tu Rubu Veaĝa verenai
 botanu-vanaĝi vanaĝini
 Melkisedek kavana.”

18 Mo taravatu guinena tu etore-veĝitaiato, korana ĝia tu asi seĝukana ema asi bevevaĝa-maĝurini riba.

19 Korana Mose ĝena taravatu na dagara ta tu asi evaĝa-namo vedaurea-iato. Moĝesina naima Barau na tuĝamaĝikau lagilagina ta ma etore-rosiato, moĝa ĝenana ĝita Barau sevina ĝana bita raka-kavini.

20 Barau na Iesu tu guruĝatore guruĝana gwaĝigina eveiato vau, Rubu Veaĝa verenai etoreato! A Rubu Veaĝa vereri mabarari ĝeri ai tu guruĝatore ta asi eveiato.

21 Senaĝi Iesu Rubu Veaĝa verenai eiaĝoto tu Barau na guruĝatore gwaĝigina eveiato vau. Barau na maĝesi ekiraiato,
 “Vereĝauka tu eguruĝa-foforito
 ma ĝena tuĝamaĝi asi ma bekefoani:

‘Ĝoi tu Rubu Veaĝa verenai botanu-vanaĝi vanaĝini.’ ”

22 Mai guruĝatore guruĝa gwaĝigina lorinai, Iesu tu ginitaĝo variĝuna ma namona korikori vaĝa-moĝoninai eiaĝoto.

23 Guinenai Rubu Veaĝa vereri tu vovoka, korana tu ĝemaseto-ĝoi, be ta Rubu Veaĝa verenai asi etanu-rovaĝito.

24 A Iesu tu etanu-vanaĝi vanaĝini lorinai, ĝia tu Rubu Veaĝa verenai betanu-rovaĝini.

25 Moĝa lorinai deikara ĝia ĝenana Barau ĝenai beĝe iaĝoni tu bevaĝa-maĝuririni riba. Korana Iesu tu ĝia urari ai Barau ĝenai bene ĝauĝau ĝana etanu-vanaĝi vanaĝini.

26 Maĝesi Rubu Veaĝa verena baregona na ĝita ĝera ura dagarari evinirani. Ĝia tu veaĝa, asi ĝena vei-rakava, vetoukau ta ĝenai asiĝina, namo vedaurea; ĝia tu vei-rakava tarimari kavana asiĝi. Ma Barau na guba tuĝuna korikorinai ea toreato.

27 Ĝia tu dia guinenai Rubu Veaĝa vereri baregori kavana, ĝaro korikoriri ai varevare dagarari bevinini. Guine tu ĝia ĝena vei-rakava Barau na bene tuĝamaĝi-fitoĝari ĝana evinito, ma moĝa murinai tu tarimarima ĝeri rakava Barau na bene tuĝamaĝi-fitoĝari ĝana. Ĝia tu vaĝa-sebona moĝo tarimarima

ġeri vei-rakava ġana ginitaġo varevarena eviniato. Moġa tu ġia tauġena ginitaġo varevarenaĭ eiaġoto, benamo Barau ġenai evevini-raġeto.

²⁸ Mose ġena taravatu na tu ma ġeri moira tarimari Rubu Veaġa verena baregonai etorerito-ġoi. Senaġina Barau ġena guruġatore guruġana wagaġina, Mose ġena taravatu murinai ema forifito dagarana, na tu Barau Natuna evaġa-ruġaiato. Ġia tu Barau na evaġa-namo vedaureaiato, ma namo vedaurea betanu-vanaġi vanaġini.

8

Iesu tu ġita ġera Rubu Veaġa verena baregona

¹ Ġai na kara ġakiraġiani tu maiġa. Gita tu ma ġera Rubu Veaġa verena baregona. Ġia tu gubai Iaru-korokoro Barauna ġena terona aroribanai etanu-tarito.

² Barau ġena veaġa gabuna nuġanai eġauveini. Mo tu farai rubuna korikori Vereġauka na eragaiato, dia tarimarima na ġeragaiato.

³ Rubu Veaġa vereri baregori mabarari tu ġevaġa-ruġarito, varevare dagarari ema boromakau, mamoe, manu beġene vini ġana. Moġa lorinai mai Rubu Veaġa verena baregona, Keriso, maki ma ġena dagara tari, bene vini ġana.

⁴ Bema ġia tanobarai bere tanu tu, Rubu Veaġa verenai asi bere iaġo, korana tu maiġa, Rubu Veaġa vereri tu varau ġetorerito maiġeri, varevare dagarari ġevin-tanuni, Iuda ġeri taravatu ekiraġiato ilailanai.

⁵ Ġia varevare dagarari mainai veaġa lelevaġi daigutunai ġevinini tu, gubai mo veaġa lelevaġi daigutuna kavana e vetoġana moġo. Moġesina nai Barau na Mose toma-rakariġo ġana farai rubuna bene ragaia ġana, naima ekira-toreġauato, ekirato, “Bono ġitaia, dagara mabarari boveirini nai tu, ġoro ai avaġa-ġitamuto ilailanai moġo bono veiri.”

⁶ Senaġina toma Iesu na ginitaġo varevareri vini-toreġau veigana guinenai Rubu Veaġa vereri ġeri ġauvei evanaġiato. Korana Barau ġena kiraġitore variġunai Iesu tu Barau e tarimarima vekaravari ai eruġani, ginitaġo variġuna bene vaġa-seġukaia ġana, ma mai ginitaġo na mo ginitaġo guinena seġukana evanaġiani. Ema Barau ġena kiraġitore variġuna na mo ginitaġo guinena kiraġitorena maki evanaġiato.

⁷ Bema mo ginitaġo guinena asi ġena rakava tu, Barau na ginitaġo variġuna ta asi ma bere kiraġia.

⁸ Senaġina Barau na tarimarima ġeri ai rakava eġoitaġoto naima ekirato, “Vereġauka eguruġa-foforini,

‘Boġono seġaġi, ġaro ta mani eiaġomani,
au na ginitaġo variġuna ta ma baveiani,
Israela besena e Iuda besena ġeri.

⁹ 1 Mai ginitaġo tu dia guinenai ġia seneri ġeri aveiato moġa kavana.

Dia mo ġaro ai ġimari ai aġabito,
benamo Aigupiġo na aġori-rosirito ginitaġona kavana.
Korana ġia tu au ġegu ginitaġo ġenai
asi ġevetuġamaġikauni naima,
au na araga-kwanerito,’

Vereġauka tu moġesina eguruġani.

¹⁰ Vereġauka ma ekirani,

‘Ġoira ġarori ai au na mai ginitaġo Israela besena ġeri ma baveiani:
Au ġegu taravatu ġia debari ai batore-toġarini ema ġia nuġari ai batorerini.

Au tu ġia ġeri Barau ai baiaġoni ema ġia maki au ġegu tarimarimai beġe iaġoni.

¹¹ Tarima ta na sevinaġi etanuni tarimana asi ma bevaġa-ribaiani, ema tarima ta tarikakana asi bekiraiani, 'Vereġauka noribaia!'

Korana mabarari na beġe ribaġuni, misina na beiaġoni mo baregona.

¹² Ġeri kira-sirivaġi batuġamaġi-fitoġarini, ema ġeri rakava mabarari asi ma batuġamaġirini.' "

¹³ Barau na mai ginitaġo maġa ekiraġiani, "ginitaġo variġuna" etoni nai tu, ġia na mo ginitaġo tovtovonai moġa tu guinena na ekiraġiani. Ma kara eġuinenani e erakavani tu asikauna berekwarekwani.

9

¹ Ginitaġo guinena tu ma ġena taravatu misimisiri toma-rakariġo ġana, ema ma ġena gabu veaġana maki. Mo gabu veaġana tu tanobarai etanuni dagarana.

² Barau toma-rakariġona ġana farai rubuna ta ġeraġaiato. Mo farai rubuna nuġanai daiġutu giniguinena tu Veaġa Gabuna ġetato. Ġia nuġanai tu lamefa toreakauna dagarana, teibolo e Barau ġeviniato berediri.

³ Kouġau dabuġana vaġa-ruaruana murinai tu daiġutu ta maia. Moġa tu Veaġa Lelevaġi Gabuna ġetato.

⁴ Ġia nuġanai tu golo fatana, goġu ma bonana iatanai beġene vei ġana, ema Kiragiġore Mauġana; ġia murikana mabarana tu golo na ġeveiato. Ma mauġa nuġanai tu golo ġurona ta, nuġana ma manana e Arona ġena toġoi, eġarakauto dagarana, ema fore ruaruana Barau na iatari ai taravatu etoreto foreri.

⁵ Mo mauġa iatanai tu kerubi ruaruana ġevaġa-ruġa veġoirarito. Mo kerubi tu ġau garagarari, vetoġari tu aneru kavari. Ta tavi ta dudu ai ġevaġa-ruġaiato, ma ta maki tavi ta dudu ai, ma faneri ġekeorito, benamo rakava voivaġiri gabuna ġegoru-tariato. Mo kerubi ruaruana na tu Barau ġena mareva baregona ġekiraġiani. Senaġi maiġeri dagara misikoseri mabarari tu toma asi baġa kiragiġirini.

⁶ Dagara mabarari moġesi ġeveirito murinai, Rubu Veaġa vereri ġaro vanaviġanaġi daiġutu giniguinena nuġanai ġeraka-toġato-ġoi, benamo ġeri ġauvei ġeveirito-ġoi.

⁷ Senaġi rubu verena baregona ġereġana moġo laġani ta nuġanai vaġa-sebona daiġutu vaġa-ruaruana nuġanai eraka-toġato-ġoi. Ġena rakatoġa ġarori mabarari ai tu rara maki eġabi-taġoato-ġoi. Mo rara ġia na tu rakava tuġamaġi-fitoġari ġana ginitaġo dagaranaġi evaġa-iaġoato-ġoi. Guine tu ġia ġena rakava ġana eviniġo-ġoi ema murinai tu tarimarima ġeri rakava ġana. Mo rakava tu asi ribari nai ġeveirito-ġoi rakavari.

⁸ Iauka Veaġa na maiġeri veġa mabarari ġerina ġita tu maiġesina evaġa-guruġarani: Bema Barau toma-rakariġona ġana farai rubuna giniguinena roġo eruġa-taġoni nai tu, Veaġa Lelevaġi Gabuna rakatoġa dabarana tu roġosi roġo bene vekeo.

⁹ Mo farai rubuna tu toma mai negai kara beġe ġorani evaġa-foforiani. Mai farai rubuna nuġanai varevare dagarari e ginitaġo dagarari vaġa-ilailana boromakau, mamoe, manu Barau ġeviniato-ġoi dagarari mabarari na ġetoma-rakariġoto-ġoi tarimari nuġari asi ilaila beġe iarevarini.

¹⁰ Korana mo Barau ġeviniato-ġoi dagarari tu ġaniġani e niuniu dagarari, ema tarima beġene iareva ġana veġuriġi maġuriri irauirau. Mai tu mabarari tauġani taravaturo moġo. Barau na tarimarima evinirito beġene korana-iaġiri, bene iaġo mo, ġaro ta, dabara variġuna bevaġa-ruġaiani.

Iesu rarana

¹¹ Senaġi Keriso tu dagara namori ġema-foforito ġeri Rubu Veaġa verena baregona. Ġia tu farai rubuna barana e namo vedaureana nuġana na eraka-toġato. Dia tarimarima na ġeragaiaato farai rubuna, korana mo farai rubuna tu dia mai tanobara dagarana.

¹² Keriso tu dia nanigosi o boromakau naturi rarari seġukari ai mo rubu ai eraka-toġato. Senaġi ġia tu ġia rarana seġukanai Veaġa Lelevaġi Gabuna nuġanai vaġa-sebona moġo eraka-toġato. Benamo ġita eġabivaġi-moġovaġirato rakava ġena seġuka na.

¹³ Nanigosi ma boromakau rarari ema boromakau natuna variġuna ġegabuato kauna, Rubu Veaġa vereri na vei-rakavai ġemiroto-ġoi tarimari iatari ai misimisiri ġefiu-kaurito-ġoi. Moġesina ġeveirito-ġoi tu tarimarima tauġaniri ġevaġa-veaġarito-ġoi Barau ġoiranai.

¹⁴ Senaġi Keriso rarana na moġeri evanaġirito. Korana ġita nuġara, mase ġevaġa-ġoraiani ġauveiri ġerina, eiarevarato, maġuri Barauna ġena vetuġunaġi bitana iaġo-vini ġana. Keriso tu asi vetoukauna ta, tauġena tanu-venaġivanāġi laukana ġenana evevinito Barau ġenai.

¹⁵ Ginitaġo variġuna nuġanai Keriso tu Barau e tarimarima fakari ai eruġani. Korana tu Barau na ekearito tarimari mabarari na ekiraġi-toreato maġuri vanaġivanāġina beġene ġabia. Moġesi nai Keriso emaseto, tovotovona ginitaġona nuġanai tarimarima ġevei-rakavato ġeri rakava na bene ruġa-vaġiri ġana.

¹⁶ Tarima ta roġosi bene mase nuġanai, beurani bene guruġa-fofori, bemaseni nai tu, natuna na ġena farefare bene ġabiri. Mo ura o guruġa-fofori tu fefai betoreani ġia ġena kiraġitore guruġana. Natuna na mo farefare asi roġo beġabirini bene iaġo mo, tamana ġena mase tarimarima ġoirari ai bevaġa-mogoniani vau.

¹⁷ Korana tu mo ura ġetoreani fefana tu eguruġa-foforini tarimana bemaseni vau ma ġena seġuka, a bema ġia roġo maġuri tu, mo ura ġetoreani fefana tu asi seġukana.

¹⁸ Moġesina nai ginitaġo ginigwinena maki rarana vau evaġa-seġukaiaato-ġoi.

¹⁹ Korana Mose na taravatu guruġari mabarari tarimarima ġeri evarifiu-ġosiato-ġoi murinai, boromakau naturi variġuri e nanigosi rarari eġabirito-ġoi, benamo nanu ġesi egiro-sebonarito-ġoi. Moga murinai isopo legana vulu kakakakana na ġebaruato dagarana mo rara ma nanunai efereiaato-ġoi. Benamo Mose na mo isopo legana ma vulunai rara tu taravatu bukana e tarimarima iatari ai efiu-kaurito-ġoi.

²⁰ Mose ekirato, "Mai rara tu ginitaġo vaġa-moġonina dagarana Barau na ekiramito boġono korana-iaġia."

²¹ Farai rubuna ema mo rubu nuġanai toma-rakarigo ai ġeġauvei-iaġirito-ġoi farefarari mabarari iatari ai veġa sebona eveiato-ġoi. Iatari ai rara misimisiri efifiukauto-ġoi.

²² Moġoni, taravatu ekirani ilailanai, dori dagara mabarari tu rara na beġe iarevani. Korana rara asi beriġoni nai tu, vei-rakava tuġamaġi-ftoġari maki asiġina.

²³ Senaġina maiġeri mai tu guba dagarari iouiouri moġo maiġesi ġeiarevarini. A gubai korikoriri ġetanuni dagarari iareva-iarevari ġana ginitaġo varevarena tu namona lelevaġi. Maiġeri ginitaġo varevareri evanaġirini.

²⁴ Korana Keriso tu dia tarimarima na ġeveiato veaġa lelevaġi daiġutuna nuġanai eraka-toġato. Iesu tu guba korikorinai eraka-toġato. Ma maitoma tu ġita urarai Barau ġoiranai efoforini. Mo tarima na ġeveiato moġa tu gubai veaġa lelevaġi daiġutuna moġo ġevaġa-ilailaiato.

²⁵ Rubu Veaġa verena baregona tu laġani tata nuġari ai Veaġa Lelevaġi Gabunai rara eġabi-toġato-ġoi. Keriso moġesina tu asi eveini. Ġia tu dia gubai eraka-toġato murinai vau vanaġivanagġi tauġena ginitaġo varevarenai eiaġoni, benamo Barau ġenai evevinini.

²⁶ Moġesina tu tanobara evesinato na veġata bene midigumidigu. Senaġi mai tanobara magona eġabi-iaġoani, mainai vau vaġa-sebona moġo ema foforito. Mo tu ginitaġo varevarenai evevaġa-iaġoto rakava bene ġabi-veġitari ġana.

²⁷ Evetoreto, tarimarima mabarari tu vaġa-sebona moġo beġe maseni, ma murinai tu Barau na bevaġa-kotarini.

²⁸ Keriso kavana vaġa-sebona moġo ginitaġo dagarani eiaġoto, tarimarima mabarari ġeri rakava bene ġabi-veġitari ġana. Senaġi ġia tu ma bema-fofori ġenoġoini. Mo tu dia rakava ma benema ġabi-vaġiri ġana, senaġina deikara ġia ġenari-taġoani tarimari vaġa-maġuriri ġana.

10

Ginitaġo guinena na rakava asi beġabi-veġitarini

¹ Mose ġena taravatu tu dagara namori vau beġe ġorani iouiouri moġo, dia dagara tauri korikori. Ġia na mo ginitaġo dagarari laġani laġani ġevinito-ġoi, senaġina mo ginitaġo dagarari na toma-rakarigġo ġeiaġoto-ġoi tarimari asi evaġa-namo vedaurearito.

² Bema mo ginitaġo dagarari na ġetoma rakariġoto-ġoi tarimari beġere vaġa-namo vedaureari nai tu, asi ma beġere ginitaġo-ġenoġoi. Korana ġia tu ġere iareva-moġovaġi, ema ma ġeri vei-rakava guineri mamiraġiri asi ma ġere ġabi-ġenoġoiri.

³ Senaġi mo ginitaġo veigari laġani tatai ġeveirito-ġoi veigari na tu mo laġani tata nuġari ai ġevei-rakavato-ġoi, moġeri ġekira-vararito-ġoi.

⁴ Korana tu boromakau e nanigosi rarari na rakava tu asi ilaila beġabi-veġitarini.

⁵ Moġa lorinai Keriso tanobara ġana eiaġomato nai tu ekirato, “Ġoi tu ginitaġo dagarari vaġa-ilailana boromakau, mamoe, nanigosi ema varevare dagarari asi ourani, senaġi tauġani ta ovei-toreato au ġegu.

⁶ Karava na boromakau, mamoe, nanigosi eġararini, ema vei-rakava bono ġabi-vaġiri ġana ginitaġo varevareri ġeveini ġeri ai maki asi oiakuni.

⁷ Moġesi naima au akirato, ‘Barau o, au tu iniġegu, Buka Veaġai tu au ġekiraġiguto, au baiaġoma tu ġoi ġemu ura bana veia ġana.’ ”

⁸ Keriso ġena guruġa giniguinena tu maiġa, “Ġoi tu ginitaġo dagarari e varevare dagarari asi ourani. Karavai ġegaburini varevareri e vei-rakava

bono ġabi-vaġiri ġana ginitaġo varevareri ġeveini maki asi oura-vinirini, ema ġeri ai asi oiakuni.” Maġeri veiġa tu taravatu na ekiraġirini ilailanai, senaġi ġoi na tu asi oiaku-iaġirini.

⁹ Moġesi nai ma ekirato, “Barau o, au tu iniġegu, au baiaġoma tu ġoi ġemu ura veiġana bana veia ġana.” Benamo ginitaġo veiġana ġiniguinena etore-veġitaġo, benamo moġa gabunai tu ta ma evaġa-rugaġato.

¹⁰ Benamo Barau ġena ura lorinai, Iesu Keriso tauġanina ginitaġo dagananai evaġa-iaġoato vaġa-sebona moġo. Benamo monana ġita evaġa-veaġarato.

¹¹ Rubu Veaġa vereri mabarari ġaro vanaġivanaġi tata ġeruġa-tarito-ġoi, benamo mo ġitaġo ġauveiri ġeveirito-ġoi. Senaġi ġeri ginitaġo daganari tu dagara sebori moġo ġevinito-ġoi vanaġivanaġi. Ema mo ginitaġo daganari na rakava tu asi ġeġabi-veġitarito-ġoi.

¹² Senaġi Keriso na rakava ġabivaġiri ġana tu ginitaġo sebona moġo eveġato ġaro mabarari ġana. Benamo moġa murinai Barau ġimana arorib-anai ea tanu-tarito.

¹³ Mo negai beiaġoma maitoma tu evenarini, beiaġoni mo, ġia ġevetari-viniani tarimari mabarari Barau na ġia kwakuna fanakauna dagananai betore-taririni.

¹⁴ Korana ginitaġo daganana sebona na moġo evaġa-veaġarito tari-mari evaġa-namo vedaurearito. Ma ġia tu namo vedaurea beġe tanuni, vanaġivanaġi.

¹⁵ Iauka Veaġa na maki evaġa-ribarani. Guine tu ekirato,

¹⁶ “Vereġauka ekirani,

‘Moġeri ġaro muriri ai,

au ġia ġeri tu mai ginitaġo haveiani.

Au ġegu taravatu ġia nuġari ai batore-toġarini,

ema ġia debari ai baberarini.’ ”

¹⁷ Ema ma ekirato,

“Ġia ġeri vei-rakava e veiġa ġeġevaġeġevari asi ma batuġamaġi-ġenoġoirini.”

¹⁸ Maġeri etuġamaġi-fitoġarito nai tu, rakava ġabi-veġitari ġana varevare daganana ta tu asiġina maia.

Barau sevina ġana siraka-kavi ma tuġamaġi kokoreru ġesi

¹⁹ Moġa lorinai, tarikakagu, ġita tu nuġara gwaġiġi Iesu rarana ġenana Veaġa Lelevaġi Gabunai bita raka-toġani.

²⁰ Mo vekouġau dabuġana o ketin evedare-kikimato, monana Keriso na ġita ġera maġuri dabaranana variġuna ekeo-fakaiato. Mo vekouġau dabuġana tu Keriso tauġanina.

²¹ Ġita tu ma ġera Rubu Veaġa verena baregona, Barau ġena numa eġita-taġoani.

²² Ġita nuġara tu eiarevarito rakava mamiraġiri ġerina, ema tauġanira maki nanu namo vedaureana na eġuriġirito. Moġesi naima Barau ġenai siraka-kavinaġi nuġara ma moġoniri ġesi e ma ġera veġabidadama korikoriri ġesi.

²³ Ġera tuġamaġikau tavaġa-moġoniani daganana ġenai tana veġabigigitari, asi tana ġareva-ġareva. Korana Barau na kara ekiraġi-toreato tu beveiani.

²⁴ Ema karora bitana tuġamaġiri kamasġi tata bita vaġa-kavarini, benamo beġe veura-vinini, ema ġauvei namori beġe veini.

²⁵ Ġita ġera raka-vegogo ai bitana fofori-ġoi, asi bitana tanu, tari ġeveini kavana. Senaġi karora ġesi velaunaġi bitana vaġa-baregoa. Korana tu

tauġemi na varau ġoġitaiani, Keriso ġena iaġoma ġaronu tu mai ekavinaġi-rakavani.

²⁶ Bema guruġa moġonina taribaiani murinai, ma taġġiraġeni, benamo tavei-rakavani nai tu, bitana riba, rakava ġabi-veġitari ġana, ginitaġo dagarana ta tu asiġina maia.

²⁷ Senaġi ma garira ġesi kara ġoirai ġerai beġorani, moġa moġo bitana nari-taġoa. Mo tu Barau ġena Kota Baregona, ema Barau ġevetari-viniani tarimari e iaukari beġararini karavana.

²⁸ Tarima ta na Mose ġena taravatu asi ekorana-iaġiato-ġoi, benamo ġeġita-kauato-ġoi tarimari ruarua o toitoi na ġekiraġi-foforiato-ġoi. Mo tarima tu ġevaġi-maseato-ġoi, asi ġevetuġa-ġwaiato-ġoi.

²⁹ Ġomi ġotuġamaġini, Barau Natuna deikara na kwakuna fanakauna dagananai evaġa-iaġoani tarimana tu kamasi? Mai tarima tu rakava voina baregona beġabiani. Ġia na tu mo ginitaġo rarana, ġia evaġa-veaġaiato dagarana, asi veaġa raranai evaġa-iaġoani. Ema varevare-bara Iaukana ġenai maki veiġa rakava kwaikwaina eveiani.

³⁰ Korana ġita ma ribara Barau ekirato, “Rakava voina tu au na bavaġa-voiani, au na bavini-ġenoġoiani.” Ema ma ekirato, “Vereġauka na ġena tarimarima beġita-viriġirini.”

³¹ Maġuri Barauna ġimanai boketo-raġeni tu garina maki asikeikeina.

³² Ġaro guineri ġotuġamaġi-ġenoġoiri. Barau ġena mama ġoġabiato murinai, midigumidigu barego ġodoġarito, senaġi ġoruġa-gigitarito.

³³ Negatari ai tu ġutuma bara ġoirari ai ġevaġa-maiakamito-ġoi, ma ġevaġa-midigu midigumito-ġoi. Ema negatari ai tu ġomi kavana veaġa-midigu midigurito-ġoi tarimari seviri ai ġoruġa-tarito-ġoi, ġoruġa-duku dukurito-ġoi.

³⁴ Ġediburarito tarimari ġesi ġomidigumidigu sebonato-ġoi, ema ġemi fafare ġeverarimito-ġoi maki ġoiaku-iaġirito-ġoi moġo. Korana ma ribami, ġomi tu ma ġemi fafare namori, beġe tanu-vanaġi vanaġini dagarari.

³⁵ Moġa lorinai ġemi tuġamaġi kokore maniġa asi boġono fitoġari. Korana maniġa voina tu barego lelevaġina boġoa ġabiani.

³⁶ Boġono vevaġa-gwaġiġi, korana Barau ġena ura veiġana boġo vaġa-koriani murinai tu, kara ekiraġi-toreato mabarana boġo ġabiani.

³⁷ Korana Buka Veaġa ekirani,

“Nega tu misina moġo,

ma beiaġomani etoni tarimana tu beiaġomani, asi bekwaiboni.

³⁸ Au ġegu vei-iobukaiobuka tarimana tu ġena veġabidadama lorinai be-maġurini.

Senaġi murina ġana ma beraka-ġenoġoini nai,

au tu asi baiakuni ġia ġenai.”

³⁹ Senaġi ġita tu murira ġana asi ma bita raka-ġenoġoini, benamo bita rekwarekwani. Asiġina, ġita tu ma ġera veġabidadama, be maġuri bita ġabiani.

11

Veġabidadama tarimari

¹ Veġabidadama anina tu mai-ġesi. Tatuġamaġi-dadamaġirini dagarari tavaġa-moġoni korikoririni. Matarai roġosi bitana ġitari, senaġina tavaġa-moġoni korikoririni, moġeri dagara tu moġoni ema bita ġabirini.

² Sene tarimari tu ġeri veġabidadama lorinai, Barau na eġabi-raġerito.

³ Taveġabidadamani lorinai taribani, Barau eguruġato, benamo guba e tanobara evetoreto. Moġa lorinai mai taġitarini dagarari tu Barau na asi taġitarini dagarari ġerina eveirito.

⁴ Abela tu ma ġena veġabidadama Barau ġenai lorinai, Barau eviniato varevare dagarana na Kaino ġena varevare dagarana evanaġiato. E ma ġena veġabidadama lorinai, Barau na ġena varevare dagarana ekiraġiato varevare namona ema Barau na evaġa-moġoniato ġia tu vei-iobukaiobuka tarimana. Ma Abela tu varau emaseto, senaġina ġena veġabidadama lorinai roġo eguruġani.

Abela, Enoka, Noa

⁵ Enoka ma ġena veġabidadama lorinai, Barau na eġabi-varaġeato moġo, asi emaseto. Ma tarimarima na maki asi ġedoġariato, korana Barau na eġabi-vaġiato. Roġosi bene ġabi-veġitaia nuġanai, Barau ġena bukai ekirani, Enoka na Barau iauna evaġa-iakuato.

⁶ Asi ġena veġabidadama tarimana na Barau tu asigina ġinavaġi bevaġa-iakuani. Korana deikara Barau ġenai eiaġomani tarimana tu bene vaġa-moġoni Barau tu maġuri etanuni. Ema Barau ġevetauani tarimari mabarari tu voiri namori Barau na bevinirini.

⁷ Noa ma ġena veġabidadama lorinai, Barau na ġoirai beġe ġorani dagarari ekira-toreġauato. Mo tu Noa na roġosi bene ġitari dagarari. Noa na Barau evaġa-moġoniato, benamo ma garina ġesi bouti ta eragaiato, ġaraġona e natuna bene vaġa-maġuriri ġana. Ġia ġena veġabidadama na tanobara tarimari ekiraġi-foforirini rakava tarimari. Ma ġia tu ġena veġabidadama lorinai Barau na ekiraiato vei-iobukaiobuka tarimana. Mai vei-iobukaiobuka tu veġabidadama ġenana eiaġomani dagarana.

Aberahamo

⁸ Aberahamo ma ġena veġabidadama lorinai, Barau na ekeaiato nai eseġaġiato. Barau na ekeaiato tu ġena vanuġa bene raga-kwanea, ma Barau na tanobara ta ma beviniani, mo ġana bene iaġo. Benamo Aberahamo eraka-rosito moġo, asi ribana aiġana eiaġoni senaġi eiaġoto moġo.

⁹ Ma ġena veġabidadama lorinai, Barau na ekiraġi-toreato tanobaranai ea vanuġato. Ma monai tu noġa moġo tanukau tarimana ta tanobara borunai etanuni kavana. Isako e Iakobo kavana farai numari ai ġetanuto-ġoi. Maġeri tarima toitoi tu Barau ġena kiragitore ġeġabiato.

¹⁰ Korana Aberahamo tu vanuġa baregona evaġa-nogaiato-ġoi. Mo vanuġa tu fore baregona iatanai beruġakauni. Mo vanuġa tu Barau tauġena na beboiġaiani e beragaiani.

¹¹ Veġabidadama lorinai Sara na kokore eġabiato bene ġabi ġana, ema eġauka-rakavato, senaġi mero keina evaġa-maġuriato. Ġia ma ribana, Barau na kara ekiraġi-toreato dagarana tu beġorani.

¹² Benamo mai tarima sebona eġauka-rakavato, senaġi ġia ġenana senena ġemaġurito tu guba visiġuri kavana vovoka tabutabu, ema kone mirina kavana asi iavi-iavina.

¹³ Maġeri tarimarima mabarari tu veġabidadamai ġetanuto-ġoi nuġanai ġemaseto. Barau na ekiraġi-torerito dagarari ġia na tu asi ġeġabito, senaġi managai moġo ġeġita-guinerito, benamo ġeġabi-raġerito. Ema ġeguruġa-foforito ġia tu tanobara boruna tarimari. Ġia mai tanobarai tu ġetanukauni moġo.

¹⁴ Moġesina ġeguruġani tarimari tu ġeri guruġa na ġevaġa-foforirini, ġia tu ġeri tanobara korikorina ġevetauani.

¹⁵ Bema ġeraga-kwaneato tanobarana ġere tuġamaġi-ġenoġoia nai tu, ma dabara ġere ġenoġoi.

¹⁶ Senaġi ġia tu tanobara namo vedaureana ġeuravini-rakavaiato-ġoi. Mo tu gubai etanuni dagarana. Moġa lorinai Barau tu asi emaiakaiani, ġia ġeri Barau ġetoni nai, korana Barau na ġeri vanuġa baregona ta eraga-toreato.

¹⁷ Aberahamo tu ma ġena veġabidadama. Moġesina nai Barau na etovonaġiato nai tu, natuna Isako ġinitaġo dagarana evaġa-iaġoato, benamo Barau ma evarevare-viniato. Aberahamo ribana, Barau na kiragitore tu ġia eviniato, senaġina ġia natuna sebona kwariġutu moġo tu ġinitaġo dagarana ġana bene vaġia etato.

¹⁸ Barau na Aberahamo maki maiġesina ekiraiato, ekirato, “Isako ġenana moġo ġoi senemu beġe maġurini.”

¹⁹ Aberahamo etuġamaġito tu Barau na Isako ma bevaġa-maġuri ġenoġoiani riba. Moġesina naima iniġesina ma sikiraġia: Aberahamo na Isako mase na eġabi-ġenoġoiato.

Isako, Iakobo, Iosefa

²⁰ Isako ma ġena veġabidadama lorinai, Iakobo e Esau evaġa-namorito, ema ġeri ai vau beġea ġorani dagarari ekiraġirito.

²¹ Iakobo ma ġena veġabidadama lorinai, dori emaseto-ġoi nuġanai tu Iosefa natuna ruarua evaġa-namorito, ema ġena toġoi ġenai eveġabiritoġoto, benamo Barau etoma-rakarigo viniato.

²² Iosefa ma ġena veġabidadama lorinai, eġauka-dorudoruto, dori emaseto-ġoi nuġanai tu, Israela tarimari Aigupito na beġe raka-vaġini ekiraġiato, ema turigana kamasi beġene veia gurugana evinirito.

Mose

²³ Mose tamana e sinana Barau ġenai tu ma ġeri veġabidadama. Moġa lorinai Mose emaġurito ġaronai ġeġitaiato merò keina namona korikori, benamo kini ġena guruġa garina tu asi ġeveito. Senaġi tamana e sinana na ġeġabiato, benamo numa nuġanai ġue toitoi ġetore-gumuato.

²⁴ Mose ma ġena veġabidadama lorinai, ebareġoto nai tu asi eurato beġene kira, ġia tu Pharao natuna ġuiatona natuna merona.

²⁵ Ġia tauġena eurato, Barau ġena tarimarima ġesi beġene vaġa-midigumidigu sebonaia. Ma asi eurato, vei-rakava nuġanai asi beġe tanu-maukani verereri ai bene tanu-namo.

²⁶ Ġia na etuġamaġiato tu, Keriso uranai beġe vaġa-maiakaiani voina tu bareġo lelevaġi, Aigupito ai farefare voiri bevanagirini. Korana ġia tu ebogeguine-iaġoto, ġoirai voina eġita-iaġoato.

²⁷ Mose na ġena veġabidadama lorinai, Aigupito na eraka-veġitato, Aigupito verena bebaruni garina asi eġarito. Ġia tu ekokoreto, korana tu asi taġitaiani Barauna ġia na tu matana na noġa moġo eġitaiato.

²⁸ Ma ġena veġabidadama lorinai, Rubu Veaġa verekona ekorana-iaġiato ema Israela tarimari ekirarito, rara ġeri ġatama-boka koberi murikari ai beġene dau. Benamo mase aneruna na naturi, ġemaġuri-guineto merori, asi bene vaġiri.

Israela tarimari na Barau ġeġabidadama-viniato

²⁹ Israela tarimari na Barau ġeġabidadama-viniato lorinai, Davara Kakakakana nuġana na tanobara kaukauna na noġa moġo ġeraka-vanaġito. Ma Aigupito tarimari maki ġevanaġi ġetato nai tu, davara na eġutu-ġaurito.

³⁰ Isaraela tarimari ma ġeri veġabidadama lorinai, Ieriko vanuġa maġuna ġaro vaġa-imaime ruarua (7) ġeraka-ġeġeraġiato murinai eketoto.

³¹ Mata-boraġa ġuiatona Rahaba Barau ġenai eveġabidadamato lorinai, Isaraela ġeri maramara tarimari eġabi-raġerito, benamo Barau ġeseġafore-viniato-ġoi tarimari ġesi asi ġevaġi-sebonaiato.

³² Ma kara ma bakiraġiani? Asi ġegu taimi Gideona, Barak, Samson, Iefeta, Davida, Samuela ema peroveta tarimari variri bakiraġirini.

³³ Ġia tu ma ġeri veġabidadama lorinai, tanobara basileiari ġevetari-vinirito nai, ġekokoreto-ġoi. Veiġa iobukaiobukari ġeveito-ġoi, ema ki-raġitore dagarari ġeġabirito laion bokari ġekou-ġaurito.

³⁴ Karava seġuka rakava ema-moreni ġevei-buserito, ema vetari baġari matari na ġeraga-maġurito. Ġeri moiramaira nuġari ai ġekokoreto; vetari ai tu guruġari maki seġuka rakava, ema ġevetari-vinirito-ġoi doġorori ġevaġa-ketorito-ġoi.

³⁵ Ġemaseto-ġoi tarimari ma ġevaġa-maġuri ġenoġoirito-ġoi, benamo sinari na ma ġeġabi-ġenoġoirito-ġoi. Ma tari tu dibura numai tauġaniri ġekwari-rakava kwaikwairito-ġoi ma dori ġemaseto-ġoi, senaġi asi ġeurato-ġoi Barau beġene kira-ġuniġaua, benamo dibura numana na beġene ruġa-vaġiri. Korana ġeri ura tu vaġa-varigiġi ġenoġoi namona beġene ġabia.

³⁶ Ma tari tu ġevaseva-vaseva iaġirito-ġoi, ġekwaririto-ġoi, ma tari tu seini na ġebarurito-ġoi, benamo dibura numana ġetorerito-ġoi.

³⁷ Fore na ġetakirito-ġoi; ma tari tu ġesoa-ġuturito-ġoi; ma tari tu vetari baġari na ġevaġirito-ġoi. Mamoe kefiru e nanigiġi kefiru ġevei-rakaoto-ġoi, asi ġeri-ġari, ġevaġa-midgu midigurito-ġoi, ema tarimarima na veiġa asi namori ġeri ai ġevei-vinirito-ġoi.

³⁸ Tanobara ġia ġeri ai tu asi namo moġo. Tanobara fakari na e ġoro tuġuri na, tano kouġari na, ema guri na ġetanu-rakaoto-ġoi.

³⁹ Maiġeri tarimarima mabarari ġeri veġabidadama loriri ai, Barau na evaġa-maġuririto. Senaġina ta na Barau na ekiraġi-toreato dagarana ta tu asi eġabiato.

⁴⁰ Korana Barau na dabara namona ta ġita ġera eboiġaiato. Ġia ġena ura ġia maki ġita ġesi vaġa-sebo vau bene vaġa-namo vedaureara.

12

¹ Mo veġabidadama tarimari, ġita ġeġita-taġorani tarimari, tu ġutuma lelevaġi, magube na noġa moġo beġe ġeġeraġira. Moġa lorinai ġita ġekoukou-ġaurani dagarari, ema vei-rakava ġita ġebarubaru-tarirani dagarari mabarari siftoġari. Benamo ma kokorera ġesi ġoirarai Barau na etoreato raga-iruirunai siraga.

² Mataru Iesu ġenai sitore-kauri. Korana Iesu na ġita ġera veġabidadama esinaiato, ema bevaġa-ġuġuruani. Ġia na ġoiranai mo iaku e verere etuġamaġiato nai, satauro maiakana asi etuġamaġiato. Benamo Barau ġena terona aroribanai etanu-tarito.

³ Iesu situġamaġia. Ġia tu vei-rakava tarimari na asi ġeġabi-raġeato, ġeseġafore-viniato, senaġina ekokoreto. Moġa lorinai asi boġono tuġamaġi-moira, e asi boġono ruġa-ġuiragi.

⁴ Ġomi tu rakava ġesi ġovevaġi-tanuni. Senaġina ġomi mani vevaġi nuġanai tu, ta raramu roġosi roġo bere riġo.

5 Ema ġomi tu Barau na ekeamito ġia natuna, senaġi mai velaunaġi guruġana tu ġotuġarekwaiato, ekirato,

“Natugu, Vereġauka na vevaġa-riba veġari gwaġġigiri evinimuni nai, asi bono ġabi-meraġari, ema bekira-feimuni nai, nuġamu asi bono vaġa-moiraira.

6 Korana Vereġauka na eura-vinirini tarimari tu vevaġa-riba gwaġġigiri evinirini, ema ġia natunai evaġa-iaġorini tarimari mabarari tu ekwaririni.”

7 Moġa lorinai matakani veġari ġemi ai beġe ġorani nai tu boġono kokore. Korana ġomi tu Barau natuna naima moġesina eveimini. Ma sigitaia, kamara mero keina tu tamana na asi evaġa-matakaniani?

8 Tama mabarari na naturi ġevaġa-matakanirini. Ma bema ġomi Barau na asi evaġa-matakanimini, moġa anina ġomi tu dia Barau natuna korikori, ġomi tu gara meromi.

9 Vaġa-ilailana tauġani rekenai ġita tamara korikoriri na ġevaġa-matakanirani, benamo moġeri korari ai tamara tagubakaurini. Moġesina kavana namona tu ġita tata iaukara Tamari Barau maki tana gubakaua, benamo bitana maġuri.

10 Ġita tamara na tu ġaro kotunai moġo ġevaġa-matakanirani. Mo tu ġia tauġeri na ġetuġamaġiani namo ġetoni ġarori ai moġo. Senaġi Barau na evaġa-matakanirani tu ġita ġera namo ġana, ema ġia ġesi bitana veaġa-vegogo ġana.

11 Maitoma matakani veġari ġeiaġomani tu ma midigumidiguri, asi iakuri. Senaġina murinai vau mo matakani veġari ġerina beribani tarimana tu vei-iobukaiobuka ema maino tarimanai beiaġoni.

Nuġara bitana vaġa-kokoreri ema bitana ruġa-gigitari

12 Moġa lorinai ġimami beġe ġeroġero-riġo, ġoġabi-vaisiri, ema tuimi beġe moira ġeġoġo-ġoġorini, ġovaġa-kokoreri.

13 Benamo kwakumi na ġoraka-iaġirini fanari ġovei-roroġotori, be kwaku rakava tarimana kwakuna asi bene rakava-lelevaġi, senaġi bene namo.

14 Boġono kokore-korikori, tarimarima mabarari ġesi maino ai boġono tanu uranai. Be ġemi maġuri beġene veaġa e asi vetoukaunai beġene iaġo bene. Korana tu ma vetoukauna e asi veaġa tarimana na Vereġauka tu asi beġitaiani.

15 Boġono venari, be tarima ta Barau ġena varevare-bara ġenana asi bene raka-veġita, ma nuġa-ġirima ġokana nuġanai asi bene tubu-raġe. Korana nuġa-ġirima ġokana betubuni, ġokana mamakina na ġomi fakami ai rakava bevaġa-ġoraiiani, benamo tarimarima vovoka bevaġa-rakavarini Barau ġoiranai.

16 Boġono ġitaia, ta ġomi fakami ai mata-boraġa veġari asi bene veiri, ema Esau na Barau asi ekorana-iaġiato kavana asi bene vei. Esau na tu ġena maġuri guine seġukana ġaniġani diġu sebona moġo uranai evare-fitoġaiato.

17 Moġa murinai ġomi ma ribami, mo maġuri guine vevaġa-namona tamana ġenana neġabia etato tu tamana na asi eġabi-raġeato. Moġoni, tamana ma tagina ġesi enoġiato, senaġi tamana asi ma etuġamaġi-ġenoġoito.

18 Ġomi tu dia ġimami na boġo ġabi-karaiiani ġorona ġana boġo iaġoma, Isaraela tarimari kavana. Ġia tu Sinai Gorona sevina korikorinai ġeruġato,

benamo karava emoreto ġeġitaiato, ema mukuna dubara kiukiuna e iavara barego lelevaġina;

¹⁹ ema kibi guruna asikeikeina eraġeto e garo baregona eguruġato ġeseġaġirito. Isaraela tarimari na mo garo ġeseġaġiato nai tu, Mose ġenogiatu mo garo na asi ma bene vaġa-guruġari.

²⁰ Korana Barau na taravatu guruġari evinirito nai tu, ġegari-rakavato, Barau tu ekirato, “Bema tarima ta na o boromakau ta o nanigosi ta na mo ġoro bea vei-karaiani nai tu, fore na boġono taki-masea.”

²¹ Moġeri vetoġa ġefoforito gariri tu asikeikeiri, benamo Mose ekirato, “Au tu eġoġo-ġoġoguni, agari-rakava rakavani.”

²² Senaġina ġomi tu Siona Gorona ġana boġo iaġoma e guba Ierusalemata maġuri Barauna ġena vanuġa baregona ġana, ema aneru ġutuma gorogoro asi iavi-iaviri ġeri ai boġo iaġoma.

²³ Gomi tu vegogo baregona ġena e Barau natuna ġemaġuri-guineto ekalesiari ġeri ai boġo iaġoma. Ġia arari tu Barau na gubai etorerito. Ema ġomi tu tarimarima mabarari Kotai beġita-virigirini Barauna ġenai e vei-iobukaibuka tarimari iaukari, Barau na evaġa-namo vedaurearito iaukari, ġeri ai boġo iaġoma.

²⁴ Ema Iesu ġenai boġo iaġoma. Iesu ġinitaġo varigunai tu Barau e tarimarima fakari ai eruġani. Ema ġia rarana ġenai boġo iaġoma. Iesu rarana tu ġomi ġemi ai eketokauto. Ma Iesu rarana na ekiraġiani guruġana seġukana na Abela rarana ġena guruġa seġukana evanaġiani.

²⁵ Boġono venari, Barau na evaġa-guruġamini nai, garona asi boġono kira-sirivaġi-vinia. Korana tanobarai Barau na ekira-toreġaurito tarimari ġekira-sirivaġito nai tu, asi ġeraga-maġurito. Ġeri kira-sirivaġi voina ġeġabiato. Ġita tu kamasi bita raga-maġurini? Barau toma tu gubai etanuni, benamo monana ġita ekira-toreġaurani. Bema ġia ġenana bita raka-veġitani nai tu, kamasi bita raga-maġurini.

²⁶ Moġeri ġaro ai Barau garona na tanobara eruku-iagaiagaiato. Senaġina toma Barau tu eguruġa-toreto, ekirani, “Au na tanobara vaġa-sebona maia barukuani. Dia tanobara ġereġana moġo barukuani, senaġina guba maki barukuani.”

²⁷ Mai guruġa “vaġa-sebona maia” anina tu, guinenai Barau na eveirito dagarari beġe iagaiagani nai tu bekoki-veġitarini. Korana tu asi beġe iagaiagani dagarari moġo beġene tanu ġana.

²⁸ Ġita na taġabiani basileiana tu asi begareva-ġarevani. Moġa lorinai Barau sitanikiu-vinia, ema Barau na eura-viniani maġurinai sitoma-rakarigo vinia ma vegubakaura e ma garira ġesi.

²⁹ Korana ġita ġera Barau tu karava ġaraġara.

13

Barau vaġa-iakuna veigari

¹ Ġomi fakami ai tarikaka veuravinina bene tanu-vanaġi vanaġi.

² Tarima boruri ġabiraġeri asi boġono tuġa-rekwaia, korana tarima tari manigesi ġeveito-ġoi nai tu, aneru ġeġabi-raġerito. Senaġi ġia tu asi ġeriba-maoroto mo tu aneru ġeġabi-raġerini.

³ Dibura numanai ġetanuni tarimari boġono tuġamaġiri. Boġono tuġamaġi, ġomi maki ġia ġesi dibura numanai ġoro tanu-vegogo. Ema ġevaġa-midigu midigurini tarimari boġono tuġamaġiri. Boġono tuġamaġi ġomi maki ġere vaġa-midigu midigumi.

4 Tarimarima mabarari na veğarağo beğene gubakaua, ema veğarağo tarimari ġeri genagena gabuna bene namo-vedaurea. Korana ma ġarağona, senağina ekima-rakaoni, o ma eveğarağo-sirivağini tarimana, ema mata-borağo veğari ġeveini tarimari mabarari tu Barau na ġeri rakava voini bevinirini.

5 Moni asi boğono uravini-lelevağiri. Kara dagara ġemi ai maniğeri boğono ġabi-rağeri ma iakumi ġesi. Boğono kira, mai dagara ġemai maiğeri tu ġemai ilaila. Korana Barau tu ekirato,

“Au na asiğina ġinavaği baraga-kwanemini, ema ġereğami asiğina ġinavaği baiağumimini.”

6 Moğa lorinai nuğara ma kokoreri ġesi bitana kira,

“Vereğauka na au bevağa-kavaguni, be au asi bagarini.

Tarimarima na tu kara beğe veiani au ġegu ai?”

7 Gotuğamaği-ğenoğoi, ġeguine-iağimito-ğoi tarimari ġotuğamağiri. Ģia na Barau ġena guruğa ġemi ġekirağito. Ģia ġeri mağuri na kara ġefoforito eiağoto mo ġea maseto boğono tuğamağiri, ema ġia ġeri vegabidadama boğono tovtovori.

8 Iesu Keriso tu ġorağani, toma, ema vanağivanaği asi beirauni.

9 Vevağa-riba irauirauri na dabara moğonina na asi beğene ġori-veğitami. Namona tu Barau ġena varevare-bara na ġita iaukara bene vağa-kokoreri. Ģaniğani taravaturi irauirauri na ġita iaukara tu asi beğe vağa-kokorerini. Moğeri taravatu ġekorana-iağirito-ğoi tarimari tu namo ta asi ġeğoitagoato.

10 Ģita tu ma ġera fata vevağana. Senağina Barau toma-rakarigağona ġana farai rubuna nuğana ginitağo ġauveiri ġeveito-ğoi tarimari tu mai fatai asi beğe ġaniğanini.

11 Rubu Vevağa verena baregona na boromakau, nanigosi, mamoe evağirito-ğoi nai, tauğaniri tu eğabi-rosirito-ğoi Isaraela tarimari ġeri totoğa gabuna na, benamo murikai vau ea gaburito-ğoi. Rarari moğo Vevağa Lelevaği Gabunai eğabi-toğarito-ğoi, rakava ġabiveğitari varevarena bene vei-iağiri ġana.

12 Mogesina naima Iesu maki rarana na tarimarima bene vağa-veağari ġana tu, Ierusalem vanağa barana mağuna murikanai emidigu-midiguto.

13 Moğa lorinai gita maki Iesu ġenai totoğa murikana ġana siraka-rosi. Be, ġia na eğabiato maiakana ġita na maki bitana ġabia.

14 Korana mainai ġita tu asi ġera tanu-vanağivanaği vanağana. A ġita tu vanağa vau ma beiağomani dagarana tavetauani.

15 Moğa lorinai vanağivanaği Barau vonevone-rağena varevareri Iesu ġenana bitana vini-rağea Barau ġenai. Barau arana vonevone-rağena tu ġita murura ġwagwana.

16 Veiğa namori veiveiri asi boğono tuğa-rekwari, ema ġemi ai guruğa moğoniri maniğeri karomi ġeri maki boğono kiraği. Korana tu maniğesina veigari tu ginitağo dagarari namori Barau na eiaku-iağirini.

17 Ģeguine-iağimini tarimari garori boğono seğağiri, ema ġeri veğorikau maorona gaburenai boğono tanu. Korana ġia na tu ġomi ġemi mağuri ġeğita-ğaurini, ema ġomi ġemi mağuri aiğesina Barau ġenai beğea kirağirini. Garori boğono seğağiri, be ma iakuri ġesi ġeri ġauvei beğene veia, a dia nuğari ma metori ġesi. Korana bema nuğari ma metori ġesi ġomi beğe narimini nai tu, ġomi na namo ta asi boğodoğariani.

18 Ģema boğono ġuriğuri. Ģai ribama ġai nuğama tu veiareva Barau goiranai, ema ġema ura barana tu vegubakau ai moğo bağana tanu.

¹⁹ Ĝegu noĝinoĝi barego lelevaĝina ĝomi ĝemi ai tu boĝono ĝauĝau, be ĝemi ai ma bana ĝenoĝoi-ĝariĝari.

²⁰ Maino Barauna na ĝera Vereĝauka Iesu tu betanu-vanaĝi vanaĝini ginitaĝo rarana ĝenana ma evaĝa-maĝuri ĝenoĝoiato. Iesu tu mamoe nari tarimana baregona.

²¹ Mai maino Barauna na dagara namori mabarari bene vinimi, ĝena ura boĝono veia ĝana. Ema kara ĝia na eiaku-iaĝirini dagarari Iesu Keriso ĝenana ĝita nuĝarai bene ĝauvei-iaĝiri. Mareva baregona tu ĝia ĝena bene iaĝo mo vanaĝivanaĝi. Amen.

²² Tarikakagu mabarami, anoĝimini, ĝegu vevaĝa-naĝi guruĝari maĝeri boĝono ĝabi-raĝeri ma nuĝami namori ĝesi; korana fefa tu kubina moĝo batorea.

²³ Au auranĝi navaĝa-ribami, ĝita tarikakara Timoteo tu dibura numana na beĝe tuĝu-vaĝia. Bema ĝia bema raĝasi-ĝarimoĝini tu, tauma ruarua baĝa iaĝosini ĝitaĝitami.

²⁴ Ĝema vevaĝa-namo ĝemi veĝorikau tarimari ema Barau ĝena tari-marima veaĝari mabarari boĝono viniri. Itali tarimari na maki ĝemi vevaĝa-namo beĝe tuĝu.

²⁵ Barau ĝena namo e varevare-bara mabarami ĝemi ai bene tanu.

IAKOBO (O IAMES) ĜENA TORETORE

Iakobo (o Iames) vaĝa-foforina guruĝari

Mai fefa tu Iakobo (o Iames), Iesu tarina, na etoreato. Ĝia tu Ierusalemaka ekalesia ĝorikauna tarimana ta. Mai fefa etoreato laĝanina tu 45 ma 49 fakari nuĝanai ta, mo tu Iesu emaseto murinai.

Mai fefa etoreato korana tu, 1) Heberu ekalesiari veribaĝani ema meto baregori ĝeĝoitaĝoto-ĝoi nai, nuĝari bene vaĝa-gwaĝigiri etato; 2) Heberu ekalesiari vefakari ai tu veiĝa ema maĝuri asi roroĝotori tari ĝeĝorato-ĝoi, naima moĝeri bene vei-roroĝotori ĝana uranai; 3) Heberu ekalesiari bene kira-varari, veĝabidadama korikorina tu veiĝa namori na bevaĝa-foforiani. Iakobo na mai fefa tu maĝesi eboioĝaiato:

1. Veĝabidadama veribaĝani na betovo-naĝiani ema bevaĝa-foforiani - karoa 1:1-18
2. Veĝabidadama ĝera ĝauvei e veiĝa na bevaĝa-foforiani - karoa 1:19-2:26
3. Veĝabidadama ĝera guruĝa na bevaĝa-foforiani - karoa 3
4. Veĝabidadama Barau korana-iaĝina maĝurina korikorina na bevaĝa-foforiani - karoa 4-5

¹ Au Iakobo (o Iames), Barau e Vereĝauka Iesu Keriso ĝeri vetuĝunaĝi tarimagu, ĝeguna mai fefa eiaĝosini, ĝomi Isaraela doĝoromi gabanana ruarua (12) tanobara boruri ai ĝotanau-laussilausini ĝemi ai. Avaĝa-namomini.

Veribaĝani ĝenana veĝabidadama bekokoreni

² Tarikakagu mabarami, veribaĝani irauirau boĝo ĝoitaĝorini nai, boĝono iaku-iaĝiri moĝo.

³ Korana ĝomi ribami, veribaĝani na ĝemi veĝabidadama etovo-naĝirini nai, kokore ema vevaĝa-gwaĝigĝi evaĝa-ĝorarinai.

⁴ Benamo kokore ema vevaĝa-gwaĝigĝi ĝemi ai bene barego-korikori, be ĝemi ai maki kerere ta asi bene tanu e vetoukau ta maki asiĝina, ema dagara tai asi boĝono rabu.

⁵ Senaĝi bema ĝomi fakami ai ta asi iaunegana nai tu, Barau bene noĝia, ĝia na beviniani, korana Barau tu nuĝana mabarana ema nuĝana ma iakuna ĝesi ĝia ĝenoĝiani tarimari mabarari evinirini.

⁶ Senaĝi enoĝini nai tu veĝabidadamai moĝo bene noĝi, nuĝana asi bene daradara. Korana eiauvo-iauvoni tarimana tu davara ureurena iavara na ekwari-iaĝo kwari-iaĝomaiani kavana.

⁷ Moĝesi tarimana tu bene riba, ĝia Vereĝauka ĝenana dagara ta tu asi bedoĝariani.

⁸ Etuĝamaĝi-ruaruani tarimana tu ĝena ĝauvei mabarari ai asi eruĝa-gigitarinai.

Asi ĝena-ĝana tarimana ema ma ĝena-ĝana tarimana

⁹ Tarikaka ta asi ĝena e asi ĝana tu bene iaku, korana Barau ĝenai ĝia tu barego.

¹⁰ Ema ma ĝena ma ĝana tarimana maki bene iaku, Barau na betore-variĝoani neganai. Korana berekwa-rekwani boĝa veraverari kavana.

¹¹ Ĝaro emaraĝeni nai, ekirini gugurana na ĝauĝa etunu-maraiani, benamo veraverana eketo-vaĝini, ĝitaĝitana marevana ekorini. Ĝena-ĝana vovoka tarimana maki moĝesina kavana berekwa-rekwani ĝena taĝa ĝauveiri iaĝoviniri nuĝanai.

Verivonaḡi ema veribaḡani ainana eiaḡomani

¹² Veribaḡani nuḡari ai evevaḡa-gwaḡiḡini tarimana tu bene iaku, korana mo vetovonaḡi bekorini nai, roḡo beruḡa-taḡoni tu maḡuri koronana beḡabiani. Mo maḡuri tu Barau na ekiraḡi-toreato ḡia ḡeura-viniani tarimari ḡeri.

¹³ Bema tarima ta veribaḡani edoḡariani nai, asi bene kira, “Mai veribaḡani tu Barau ḡenana eiaḡomani.” Korana Barau tu veḡa rakavari na asi beḡe tovo-naḡiani riba, ema ḡia na tarima ta maki asi eriba-ḡaniani.

¹⁴ Senaḡi tarimarima veribaḡani edoḡariani tu bema ḡia eveḡwa-veḡitani, benamo tuḡamaḡi rakavari na nuḡana ḡeḡaniani, ḡeḡofaiani.

¹⁵ ḡena ura rakavari na nuḡana ḡevaḡa-vonuani, benamo rakava ḡevaḡa-ḡoraiani. Ema rakava etubu-baregoni nai tu mase evaḡa-ḡoraiani.

¹⁶ Tarikakagu namomi, ta na asi bene ḡofami.

¹⁷ Vevaḡa-ḡauna dagarari namori mabarari ema varevare roroḡotori dagarari mabarari tu tuḡuna na ḡeiaḡomani, Mama Tamana, guba mamana eveiato Barauna, ḡenana ḡemariḡoni. Guba mamana eirauni, senaḡi ḡia tu asi eirauni o mukuna na maki asi eḡabiani.

¹⁸ ḡia tauḡena ḡena urai moḡo ḡena guruḡa moḡonina ḡenana evaḡa-maḡurirato, korana tarimarima ema ḡemaḡurini dagarari tari ḡimana na eveirito dagarari mabarari fakari ai bitana guine ḡana.

Seḡaḡi e veḡa

¹⁹ Tarikakagu namomi, maḡa tu boḡono ribaia: ḡomi tata guruḡa seḡaḡi-seḡaḡiri ai boḡono ḡarimoḡi, senaḡi guruḡai boḡono veḡabitari, ema asi boḡono baru-ḡariḡari.

²⁰ Korana tarimarima ḡeri baru ḡerina Barau ḡena veḡa roroḡotori asi beḡe fororini.

²¹ Moḡa lorinai maḡuri rakavari ema veḡa mirori mabarari boḡono fitoḡari. Barau na nuḡami ai evaroato guruḡana boḡono ḡabi-raḡea ma manaumi ḡesi. Korana mani guruḡa na bevaḡa-maḡurimini riba.

²² ḡena guruḡa tu asi boḡono seḡaḡiri moḡo, senaḡi ḡoseḡaḡirini guruḡari tu ḡemi veḡai boḡono vaḡa-foforia, tauḡemi boḡo veḡofani garina.

²³ Deikara Barau ḡena guruḡa eseḡaḡiani moḡo, senaḡi veḡana tu asi eveiani tu veḡia ai tauḡena ḡoirana eḡitaiani kavana.

²⁴ Tauḡena veḡiai eveḡitani, benamo eraka-veḡitani nai tu ma evetuḡa-rekwani ḡia vetoḡana tu aiḡesina.

²⁵ Senaḡi deikara taravatu namo vedaureana, tarimarima ḡeri rakava eruḡa-vaḡirini taravatuna, eḡita-ginikauani, eseḡaḡi-vanaḡi vanaḡiani ema asi eseḡaḡi-taḡuini, senaḡi ḡena veḡai evaḡa-foforiani, ḡia tu Barau na ḡena gauvei mabarari nuḡari ai bevaḡa-namoani.

²⁶ Bema tarima ta tauḡena evekiraḡini tu Barau ekorana-iaḡiani etoni, senaḡi meana tu asi enariani, mani tarima tu tauḡena moḡo eveḡofaḡofa-iaḡini ema Barau korana-iaḡina veḡana maki asi tauna.

²⁷ ḡita Tamara Barau na ekalesia tarimana namo vedaureana e moḡonina maḡesi etuḡamaḡiani: Gara e vabu ḡeri taḡitaḡi ai eḡita-ḡaurini ema tauḡena evenarinu tanobara mirona na bevemironi garina.

2

Ekalesia mabarari tu ilaila moḡo

¹ Tarikakagu mabarami, ġera Vereġauka Iesu Keriso mamana e seġukana tu barego, ġia ġovaġa-moġoniani tarimami, tarimarima mabarari boġono gabiraje-ilailari, dia ġeri vetoġai boġono ġabi-raġeri.

² Bema tarima ta, ġimana ma golo aġevana e ġena dabuġa maki irau moġo, bema raka-toġani ġemi vegogo nuġanai, ema asi ġena-ġana tarimana ta ġena dabuġa tu kitakata bema raka-ġurani.

³ Benamo ġomi na dabuġa ma marevana eveiani tarimana tu boġo gubakau-baregoani, benamo boġo vaġa-guruġaiiani, boġo kirani, “Mai tanutanu namonai noma tanu,” a asi ġena-ġana tarimana tu boġo kiraiani, “Iomonai noa ruġa,” o, “Mai kurabo ai noma tanu au kwakugu koranai.”

⁴ Moġa ġenana ġomi tu tauġemi moġo ġovevaġa-irauni ema vevaġa-maoro maki ġoveiani ġemi tuġamaġi rakavari ġerina.

⁵ Ġoseġaġi, tarikakagu namomi, Barau na mai tanobarai asi ġeri asi ġari tarimari eġabi-viriġirito, veġabidadama na beġene vonuvonu-raġe, ema ġena Basileia beġene ġabia uranai. Mo Basileia tu Barau na ekiraġi-toreato, ġia ġeura-viniani tarimari moġo beġe raka-toġani.

⁶ Senaġi ġomi na asi ġeri ema asi ġari tarimari tu ġoġita-ġuirraġirini. Dei na ġomi evaġa-rakavamini, ema einu-iaġomini Kota gabuna ġana? Ma ġeri-ġari tarimari maniġesi ġeveini, ene?

⁷ Ġia na mani ara namona, ġomi na ġovaġa-moġoniani tarimana arana Keriso, ġekiraġi-rakava rakavaiani.

⁸ Dagara namona tu maġa: Barau ġena Basileia taravatuna boġono korana-iaġia, Buka Veaġai ġetoreato maġesi ekirani, “Sevimu tarimana bono ura-vinia tauġemu oveura-vinini kavana.” Maniġa ġokorana-iaġi korikoriani nai tu maorona ġoveiani.

⁹ Senaġi bema ġomi na tarimarima ġeri vedabuġa o dagi ilailari ai moġo ġoġabi-raġerini nai, ġomi tu rakava ġoveiani, ema taravatu na maki ekiramini, ġomi tu taravatu ġokira-fitoġaiiani tarimami.

¹⁰ Korana mo deikara na taravatu mabarana ekorana-iaġiani, senaġi sebona moġo eketoni, ġia na taravatu mabarana ekira-fitoġaiiani.

¹¹ Korana mo Barau sebona ekirato, “Asi bono vevura-vanaġi,” ma ekirato, “Asi bono vaġivaġi.” Moġa lorinai bema ġoi asi boveġura-vanaġini, senaġi bovaġivaġini nai, ġoi tu taravatu okira-fitoġaiiani tarimamu.

¹² Goguruġani ema veġa ġoveirini nai, Barau ġena taravatu boġono tuġamaġia, korana mo tu ma seġukana tarimarima ġeri rakava ġerina beruġa-vaġirini. Moġa maki bea vevaġa-maoro vinimini.

¹³ Deikara tarimarima asi evetuġa-ġwarini tu, Barau na maki ġia asi bevetuġa-ġwaiiani ġena Kota baregona ġaronai. Senaġi deikara ta na tarimarima evetuġa-ġwarini, Kota garina asi bene vei, korana vevetuġaġwa na vevaġa-maoro evanaġiani.

Veġabidadama ma veġana

¹⁴ Tarikakagu mabarami, tarima ta bekirani, ġia tu ma ġena veġabidadama, senaġi bema ġena veġa na asi evaġa-moġoniani nai, kara namona bevaġa-ġoraiani? Mo veġabidadama na bevaġa-maġuriani riba ba?

¹⁵ Vaġa-ilailana, bema tarikaka tauna ta o vavinena ta asi ġena dabuġa ema asi ġana ġaniġani.

¹⁶ Benamo ġomi ta na bokiraiani, bokirani, “Ma nuġa namomu ġesi noiaġo. Bono veseġo, be asi bene naguremu e bono ġanimase-ginikau!” Senaġi tauġanina eura-vinirini dagarari tu asi oviniani, ġena namo tu kara?

17 Veġabidadama maki moġesi, bema veġabidadama ġereġana moġo ema veġana asi evaġa-foforiani nai tu mase, asi tauna.

18 Senaġi tarima ta ma bekirani, “Goi tu ma ġemu veġabidadama, senaġi veġa tu au ġegu ai.” Benamo au ġegu vevaġa-vese tu iniġesi, “Ġemu veġabidadama naġitaia. Kamara dabarai bovaġa-ġitaġuni bema veġa asi evaġa-foforiani nai? Senaġi au ġegu veġabidadama tu fofori, ġegu veġa na evaġa-ġitamuni.”

19 Goi na ovaġa-moġoniani, Barau tu sebona moġo. Namo! Senaġina iauka rakavari na maki ġevaġa-moġoniani, benamo ġeġoġo-ġoġorini korana ġegarini.

20 Ġoi babo! Ġoi ourani tauna korikori noġitaia veġabidadama veġana asi evaġa-foforiani tu asi tauna.

21 Ġita senera Aberahamo tu kamasi nai Barau na evaġa-moġoniato ġia tu veġa iobukaibuka tarimana? Ġia tu ġena veġa na natuna Isako fata veaġa iatanai Barau evarevare-viniato.

22 Be oġitaiani, ġia ġena veġabidadama ema ġena veġa tu ġeġauvei-vegogoto; ġena veġabidadama tu ġena veġa na ġevaġa-moġoniato.

23 Benamo Buka Veaġai ġetoreato guruġana emoġonito, maġesi ekirani, “Aberahamo na Barau evaġa-moġoniato, benamo Barau na eġabi-raġeato ġia tu vei-iobukaibuka tarimana.” Ema Barau na maki ekiraiato, ekirato, “Au ġatagu.”

24 Goġitaiani, tarimarima tu ġena veġa na Barau na eġabi-raġeani, dia ġena veġabidadama ġenana moġo.

25 Rahaba mata-boraġa vavinena maki moġesi. Ġia tu ġena veġa ġenana Barau na eġabi-raġeato. Israela rivirivi tarimari ġena numai eġabi-raġerito ema dabara boruna ma etuġu-rosirito.

26 Vaġa-ilailana tauġani asi iaukana tu mase, veġabidadama maki moġesi, bema asi veġana tu mase.

3

Murumi boġono nariri

1 Tarikakagu mabarami, ġomi ġutuma tu vevaġa-riba tarimami ai asi boġono iaġo. Korana ma ribami, Barau ġena Kota ġaronai ġia na ġai, vevaġa-riba tarimama, ġema veġa tu bevetau-ġitakaurini, dia ekalesia tarimari tari kavana.

2 Ġita mabarara ġaro ġutuma kerere taveini. Senaġi bema tarima ta kerere ta asi eveiani ġena guruġai nai, ġia tu asi vetoukauna ema tauġanina mabarana benariani riba.

3 Hosi bokanai taritari aurina tatore-toġaiani, korana taurani bene seġaġira; moġesi tauġanina mabarana bita tariani riba.

4 Lagatoi ġotuġamaġia: Asikeikeina, iavara baregona na vau ekwari-ragaiani, senaġi tarina tu misina korokoro. Mo tari misina korokorona na etariani tarimana ġena ura gaburi mabarari ġana etari-iaġoani.

5 Moġa ilailanai mea makina: Misina korokoro, senaġi dagara baregori beveivi-iaġirini.

Beġa maki aiġa baregona, senaġi karava misina na beġara-ġosiani.

6 Mea maki karava kavana. Tauġanira mabarari fakari ai ġia tu rakava gabuna tauġanira mabarana evaġa-miroani. Tauġanira ema iaukara evaġa-rakavarini. Ġera tanu dabarari mabarari mea na bevaġa-kerererini riba,

korana ġia tu karava kavana ġita eġararani. Mo karava tu eġara-vanaġi vanagġini gabuna na eġabini.

⁷ Tarimarima tu vevaġa-marana ma ribana, ema ġemaġurini dagarari iraurau maki mabarari evaġa-maranarini e evaġa-maranarito-ġoi ilailana manu, mota, davara dagarari, ema boġa bairi maki.

⁸ Senaġi tarima ta na mea tu roġosi roġo bene vaġa-maranaia. Ġia tu rakava ema asi vaġa-maranana, vevaġa-mase nanuna rakavana na evonuvonu-raġeto.

⁹ Ġita meara na ġera Vereġauka ema Tamara tavaġa-namoani, ema meara na maki Barau na ġia vetoġana kavana eveirito tarimarimari tavaġa-rakavarini.

¹⁰ Mo muru sebona na vevaġa-namo guruġari ema vevaġa-rakava guruġari ġeraka-vaġini. Tarikakagu mabarami, maniġesi veġa asi bene ġora.

¹¹ Nanu gurina sebona na nanu ma mamina ema nanu mamakina asi beraka-vaġini, ene?

¹² Tarikakagu, figi ġaunai olive asi beġwani ema olive ġaunai maki figi asi beġwani. Moġa ilailanai damena nanuna na ġaruka nanuna asi beraka-rosini riba.

Barau ġenana eiaġomani iaunegana

¹³ Deikara ġomi fakami ai tu ma iaunegana ema etuġamaġi-fakani? Ġena maġuri namori na bene vaġa-moġonia, ema ġena veġa namori bene veiri ma iaunegana e manauna ġesi.

¹⁴ Senaġi bema ġomi nuġami ai mama, baru, ema veiavi ġetanuni nai, asi boġono kira, “Ġai tu ma iaunegama!” Moġesina ġomi na guruġa moġonina ġokure-toġaiani.

¹⁵ Mani iaunega tu dia guba na o Barau ġenana ġemariġoni, senaġi ġia tu tanobara ġena, tarimarima nuġari na ġemaraġeni ema iauka rakavari ġerina ġeiaġomani.

¹⁶ Korana mama ema veiavi ġetanuni gaburi tu daradara etanuni, ema veġa rakavari mabarari maki ġetanuni.

¹⁷ Senaġi guba na eiaġomani iaunegana tu asi mirona e asi vetoukauna ta. Beġabi-raġeani tarimana ġena veġa tu ma iġa: Maino, garo-namo, veġata. Ġia tu ma ġena vevetuġaġwa ema ġwaġwana maki namori. Veira-veira ema vei-ġofakau asi ribana.

¹⁸ Maino ai ġetanuni tarimari tu noġa moġo varovaro ġueri ġevaroni kavana. Maino na veġa namori ġutuma evaġa-ġorarini. Moġeri veġa namori tu tarimarima ġeri maġuri ai ġefoforini noġa kwakwa ġaronai dagara namori ġedoġaririni kavana.

4

Tanobara veġatana

¹ Vevaġi e vevane ġomi fakami ai tu kara na ġevaġa-ġorarini? Mani tu ġemi ura rakavari nuġami ai tauġeri tata ġevevaġini ġerina ġeiaġomani.

² Dagara kota ġourani, senaġi asi ġoġabirini, benamo ġovaġi-vaġini. Dagara kota ġouravini-rakavarini, senaġi asi ġodoġaririni, benamo ġovevaneni e ġovevaġini. Ġoura-vinirini dagarari asi ġodoġaririni, korana Barau asi ġonoġiani nai.

³ Ema ġonoġinoġini maki asi ġoġoitaġoni, korana ġemi tuġamaġi tu rakava; ġourani kara ġonoġirini dagarari tu ġereġami na boġono ġaunari.

⁴ Ğomi veġuravanagi tarimami, (Barau ġenana ġoveġitato tarimami)! Ğomi asi ribami tanobara ġesi boġo veġatani tu Barau asi boġo ura-viniani? Deikara eurani tanobara ġesi bene veġata etoni tarimana na tu Barau evetari-viniani.

⁵ Buka Veaġai guruġa ta tu maiġesi ekirani, “Barau na ġita nuġarai etoreato Iauka Veaġana eura-rakavani, ġia na bene guine-iaġira.” Ğomi ġotuġamaġini mo guruġa ġetore-kavaiato?

⁶ Senaġi Barau ġena varevare-bara tu barego ġita ġerai. Moġa lorinai ġena Buka Veaġai maiġesi ekirani, “Eveiavini tarimana tu Barau na etore-veġitaiani, a manau tarimana tu ġena varevare-bara eviniani.”

⁷ Moġa lorinai boġono vevaġa-manau, Barau gaburenai boġono tanu. Satani boġono kira-ġoia, benamo ġomi ġemi na beraga-kwareġani.

⁸ Barau ġenai boġono raka-kavi, benamo ġia maki ġomi ġemi ai beraka-kavini. Ğimami boġono ġuriġiri, ġomi rakava tarimami! Nuġami boġono iarevari ġomi tuġamaġi ruarua tarimami!

⁹ Boġono dabara-doko, boġono nuġa-midigumidigu, ema boġono taġi. Ğemi riki tu nuġa midigumidigu ai bene iaġo, ema ġemi iaku tu nuġameto ai bene iaġo!

¹⁰ Vereġauka ġoiranai boġono tutuġu-tari, benamo ġia na bene ġabi-vaismi.

Asi boġono vekira-rakava

¹¹ Tarikakagu mabarami, ġomi tata asi boġono vekira-rakava. Deikara na tarikakana ta ekira-rakavaiani o vevaġa-maoro evei-viniani tu Barau ġena taravatu ekira-rakavaiani ema vevaġa-maoro evei-viniani. Bema ġoi na taravatu vevaġa-maoro ovei-viniani nai, ġoi na tu asi okorana-iaġiani, senaġi vevaġa-maoro tarimanai oiaġoni.

¹² Barau ġereġana moġo tu taravatu evini-riġoni e vevaġa-maoro evinini tarimana. Ğia ġereġana moġo ma seġukana bevaġa-maġurini ema bevaġa-rakavani. Ğoi tu deikara, be sevimu tarimana vevaġa-maoro ovei-viniani?

Asi boġono veiavi o vekokoroku

¹³ Ğoseġaġi, ġomi deikara maiġesi ġokirani, “Toma o boinani ġita tu bita iaġoni mai taoni o iomo taoni ġana. Monai laġani sebna bita tanuni, benamo bisinesi bita ġwa-raġaiani, moni asi gadara bita dogarini.”

¹⁴ Ğomi asi ribami ġemi maġuri boinani tu kamasi bevetoreni. Ğomi ġemi maġuri tu kara? Ğomi tu goġu kavana, ebere-rosini negakotuna, benamo ma erekwarekwani.

¹⁵ Ğomi tu maiġesi boġoro kira, “Bema Vereġauka beurani nai tu bita maġurini ema maiġesi o moġesi bita veini.”

¹⁶ Senaġi ġomi tu ġovevaġa-raġeni ema ġoveiavini; moġesi vevaġa-raġeri tu rakava.

¹⁷ Moġa lorinai, kamara tarima ma ribana, ġia na veiġa namona bere veia dagarana, senaġi asi eveiani nai, ġia tu veiġa rakava tarimana.

5

Farefare ġutuma tarimami lorimi boġono vetore

¹ Ma ġemi farefare ġutuma tarimami, ġoseġaġi! Boġono taġi, boġono taġi-koġokoġo, korana midigumidigu asikeikeina ġemi ai mani eiagomani.

² Ğemi farefare mabarari tu beġe boraġa, ema ġemi dabuġa tu faro na beġe ġaniri.

³ Ĝemi golo ema ĝemi silva tu beĝe lala-lala o rasta. Mo lala-lala na tu ĝomi bekiraĝi-rosimini, ema viriĝomi beĝanirini karava kavana. Mai ĝaro dokori ĝana ĝemi taĝa ĝosenurito.

⁴ Ĝoseĝaĝi, ĝemi vamokai ĝeĝauveito tarimari ĝomi na voiri asi ĝovinirito. Ĝeri nuĝa-vekwaragi ĝoseĝaĝi! Mo ĝemi ĝaniĝani ĝevaĝa-vegogorito tarimari ĝeri taĝi tu varau Iaru-koroko Vereĝaukana na bea seĝagia.

⁵ Ĝomi ĝemi maĝuri mai tanobarai tu taĝai e iaku verere nuĝanai, ema ĝogoreĝore-rakavani. Boĝo ĝanimase ema boĝo goba-rakava, vaĝivaĝimi ĝarona tu varau bevotu.

⁶ Ĝomi na asi ĝeri rakava tarimari ĝovaĝa-daĝa-kavarito ema ĝovaĝi-maserito, ĝia na asi ĝeĝabi-iaunaĝimito.

Vevaĝa-gwaĝiĝi ema ĝurigiuri

⁷ Tarikakagu mabarami, boĝono vevaĝa-gwaĝiĝi bene iaĝo mo, Vereĝauka bene iaĝoma. Iaraĝa tarimana ĝoĝitaia, evaĝa-nogani, ĝena vamokai varovaro dagarari tauri namori enaririni, evevaĝa-gwaĝiĝini eiaĝoni mo, ĝura guinena e ĝura ma beragu-gabini ĝurana eraguni.

⁸ Ĝomi maki boĝono vevaĝa-gwaĝiĝi. Nuĝami beĝene kokore, korana Vereĝauka ĝena iaĝoma maki varau bekavinaĝi.

⁹ Tarikakagu mabarami, tauĝemi fakami ai asi boĝono verori-tore, Barau na vevaĝa-maoro bevinimini garina. Ĝoseĝaĝi, Kota eseĝaĝini tarimana tu varau ĝatama-bokai eruĝa-taĝoni.

¹⁰ Tarikakagu mabarami, Vereĝauka aranai ĝeguruĝato-ĝoi peroveta tarimari ĝotuĝamaĝiri. Ĝeri midigumidigu nuĝari ai ĝevevaĝa-gwaĝiĝito-ĝoi. Ĝomi maki moĝesi boĝono vevaĝa-gwaĝiĝi.

¹¹ Ĝoĝitaini, ĝita na tavaĝa-raĝerini, korana ĝevevaĝa-gwaĝiĝito nai. Iobu ĝena vevaĝa-gwaĝiĝi varina tu ĝoseĝaĝiato, ema ĝomi ma ribami, Vereĝauka na kamas dokonai voina namona eviniato, korana Vereĝauka ĝena veuravini ema ĝena vetetuĝaĝwa tu barego vedaurea.

¹² Tarikakagu mabarami, dagara barego vedaureana tu maĝa: Guruĝa gwaĝiĝiri na asi boĝono kiraĝi-tore ĝemi guruĝa vaĝa-moĝoniri ĝana. Guba o tanobara o dagara boruna ta aranai asi boĝono kiraĝi-tore. Bema “Oi” ĝotoni nai tu, oi moĝo boĝono si, a “Asiĝina” ĝotoni nai maki, asiĝina moĝo boĝono si. Moĝesi tu Barau na asi bekiramini ĝomi tu kerere.

Ĝurigiuri ma seĝukana

¹³ Ĝomi fakami ai ta emidigumidiguni ba? Bene ĝurigiuri. Ta eiakuni ba? Barau vaĝa-raĝena mariri bene ĝabi.

¹⁴ Ta ekeveni ba? Ĝia tu ekalesia ĝeĝori-kauani tarimari vetuĝuri bene vei, beĝenema ĝurigiuri ĝia iatanai ema diĝa na beĝenema daua Vereĝauka aranai.

¹⁵ Benamo ĝauĝau ma veĝabidadamari ĝesi nai tu, keve tarimana benamoni. Barau na ĝena keve bevaĝa-namoani, ema bema rakava eveito nai, ĝena rakava betuĝamaĝi-fitoĝarini.

¹⁶ Moĝa lorinai, ĝemi rakava karomi tata ĝeri ai boĝono kiraĝi-foforiri, ema tata ĝeri boĝono ĝurigiuri, be ĝemi keve na boĝono namo. Barau ĝena ura eveirini tarimana ĝena ĝauĝau tu seĝuka rakava.

¹⁷ Elia tu tarimarima ĝita kavana. Ĝia eĝurigiuri-gwadagwadato ĝura asi bene ragu ĝana, benamo tanobarai ĝura laĝani toitoi (3) ma ĝue imaima sebona (6) asi eraguto.

¹⁸ Ma eḡuriḡuri-ḡenoḡoito, benamo guba evekeo-fakato, ḡura ma eraguto; benamo tano na ḡaniḡani ma evaḡa-ḡoraiato.

¹⁹ Tarikakagu mabarami, bema ḡomi ta Barau ḡena guruḡa moḡonina ḡenana beraka-veḡitani, benamo ta na ma bea ḡori-ḡenoḡoiani nai tu, veḡa namona beveiani.

²⁰ Boḡono riba, deikara na veḡa rakava tarimana ḡena dabara ḡeḡevana na eḡori-ḡenoḡoiani nai tu, ḡia na mo veḡa rakava tarimana iaukana mase ḡenana evaḡa-maḡuriani, ema rakava ḡutuma maki Barau na etuḡamaḡi-fitoḡarini.

PETERO ĜENA TORETORE GINIGUINENA

1 Petero vaĝa-foforina guruĝari

Petero tu kone ai maina tarimana, ma ĝia tu Iesu ĝena mo mero gabanana ruarua (12) nuĝanai maki. Mai fefa Petero na tu betaĝu Romai etoreato laĝani 62 na 64 fakari nuĝanai ta. Mo tu Iesu maki emaseto murinai vau.

Siri baregori mai fefai tu karoa 1:7; 4:12-13.

Mai fefa etoreato nuĝanai ĝia ĝena ura tu Iuda ekalesiari ema irau bese ekalesiari 1) bene vaĝa-kokoreri, be tarimarima na ĝevaĝa-midigu midigurito-ĝoi nuĝanai beĝene ruĝa-gwaĝiĝi; 2) ĝoirai veribaĝani baregori beĝe raga-ĝoitaĝorini moĝeri ĝana erovina-torerito; 3) ĝoirai Barau ĝena mareva baregona ĝeĝoira-taĝoani moĝa ĝeri evaĝa-foforiato; 4) bene launaĝiri, be ekalesia ĝauveiri korikori beĝene veiri.

Petero na ĝena fefa tu maĝesina eboiĝoĝaiato:

1. Barau ĝena vevaĝa-maĝuri ma ekiraĝi-varigu-ĝoiato - karoa 1:1-2:10

2. Midigumidigu nuĝanai aiĝesina beĝene tanu - karoa 2:11-4:11

3. Midigumidigu nuĝanai ĝeri veiĝa ĝobiri beĝene toreri - karoa 4:12-5:11

1 Au Petero, Iesu Keriso ĝena apostolo taugu, na mai fefa atorea-iaĝosiani. Ĝomi, Barau ĝena ĝabi-viriĝi tarimami, ĝemi gabu korikori ĝoraĝa-kwanerito, toma tu Ponto ai, Galatia ai, Kapadokia ai, Asia ai, ema Bitinia tano boruri ai ĝotanu-lausilausini tarimami ĝemi ai.

2 Ĝomi tu Barau, ĝita Tamara, na eriba-guinemito ema eĝabi-hidimito, ĝena tarimarimai boĝo iaĝoni. E ĝia laukana na evaĝa-veaĝamito korana tu, Iesu Keriso boĝono seĝaĝi-vinia ema ĝia rarana na bene ĝurigiĝi ĝana, be veiareva boĝono tanu Barau goiranai.

Barau ĝena varevare-bara ema maino na bene vaĝa-vonuvonu-raĝemi.

Maĝuri vanaĝivanaĝi

3 Barau, ĝita ĝera Vereĝauka Iesu Keriso Tamana, sivaĝa-namoa! Korana ĝena vetetuĝaĝwa barego vedaureana lorinai, maĝuri variĝuna ĝita evinirato, Iesu Keriso mase na evaĝa-variĝisi ĝenoĝoiato ĝenana. Mai veiĝa ĝenana ĝita nuĝara tu maĝuri vanaĝivanaĝi tatuĝamaĝi-kauani dagarana na evaĝa-vonurini.

4 E Barau na ĝena tarimarima ĝeri etore-rogoani vevaĝa-namo baregona, bitana ĝabia dagarana, tu ĝoirai taĝita-iaĝoani. Barau na gubai etore-rogorini ĝomi ĝemi, korana monai tu asi beĝe boragani, asi beĝe rakavani, e asi beĝe verumuni.

5 Ĝomi tu ĝemi veĝabidadama dainai Barau seĝukana na eĝita-ĝaumini, beiaĝoni mo, ĝia na varau erovina-toreato vevaĝa-maĝurina nega magonai bevaĝa-foforiani, matami na boĝo ĝitaiani e boĝo ĝabiani.

6 Ĝomi toma kotunai tu midigumidigu barego ĝoĝanini, korana veribaĝani irauirauri ĝoĝoitaĝoni bene. Senaĝi ĝemi iaku tu bene barego-lelevaĝi, korana Barau ĝena vevaĝa-maĝuri boĝo ĝabiani bene.

7 Maĝeri veribaĝani irauirauri ĝeiaĝomani tu, Barau na ĝomi ĝemi veĝabidadama etoto-iobuka iobukarini, korana Iesu Keriso befororini ĝaronai tu, Barau ĝenana vevaĝa-raĝe e mareva namona ema vegubakau boĝo doĝariani. Golo karava na evaĝa-namo vedaureaiani ma voina evarage-lelevaĝini, senaĝi ĝomi ĝemi veĝabidadama voina tu ma varaĝe lelevaĝi.

⁸ Ĝomi na roĝosi roĝo maki ĝoro ĝitaia, senaĝi ĝoura-viniani. Initoma maki asi ĝoĝitaiani, senaĝi ĝoĝabidadama-viniani ema iaku na ĝovonu-vonu-raĝeni. Gemi iaku maki asi tau kirari vaĝa-namona ta.

⁹ Korana Keriso ĝenai ĝoveĝabidadamani voina tu, ĝomi vevaĝa-maĝuri ĝoĝoitaĝoni.

¹⁰ Mai vevaĝa-maĝuri maiĝa tu peroveta tarimari na ĝevetau-ginikau ginikauato, ema ĝia na ĝekiraĝi-tore guineato, mai varevare dagarana tu Barau na ĝomi bevinimini, (Keriso beiaĝomani ĝaronai).

¹¹ Beiaĝomani ĝarona e kamasi beiaĝomani beĝene ribaia ĝana ĝetuĝamaĝi-vekwaraĝito-ĝoi. Mo negai Keriso laukana tu ĝia nuĝari ai eĝauveito-ĝoi ema ekira-vararito-ĝoi, Keriso tu ĝena midigumidigu bevevaĝa-gwaĝiĝi-iaĝiani, ma moĝa murinai vau ĝia marevana baregona beĝabiani.

¹² Barau na peroveta tarimari evaĝa-ribarito, ĝia na mo vari ĝeĝobata-iaĝiato-ĝoi tu dia ĝia tauĝeri ĝeri namo ĝana, senaĝi ĝomi ĝemi. Korana ĝia na mo dagara, ĝekiraĝirito dagarari, tu toma ĝena vetuĝunagi tarimari na Vari Namona ĝevari-fiuani guba na etuĝu-mariĝoato Iauka Veaĝana seĝukanai, be ĝoseĝaĝini. Maiĝeri dagara tu aneru maki ĝeri ura baregona beĝene ribaia.

Boĝono veaĝa

¹³ Moĝa lorinai, nuĝami beĝene veiareva, boĝono vevaĝa-gwaĝiĝi. Iesu Keriso beforinai ĝaronai Barau na bevinimini varevarena ĝenai, nuĝami mabarana ĝesi boĝono torea.

¹⁴ Barau natunai ĝoiaĝoto nai, ĝia boĝono seĝaĝi-vinia. Barau asi ribami negari ai tauĝani ĝena ura rakavari na ĝeĝori-ĝeĝevamito-ĝoi veiĝari asi ma boĝono vei-ĝenoĝoiri.

¹⁵ Senaĝi ekeamito Barauna tu veaĝa, ilailanai ĝomi maki boĝono veaĝa ĝemi veiĝa mabarari nuĝari ai.

¹⁶ Korana Buka Veaĝa nuĝanai etoreato, Barau ekirato, “Boĝono veaĝa, korana au tu veaĝa.”

¹⁷ Ĝoĝauĝauni negari ai, Barau tu Tamami ai ĝokiraĝiani, ma ĝia na tarimarima mabarari tu dabara sebonai moĝo evaĝa-maoro vinirini, tata ĝeri veiĝa ilailari ai; moĝa lorinai mai tanobarai roĝo ĝotanukauni nuĝanai tu, Barau boĝono gubakaua e boĝono seĝaĝi-vinia.

¹⁸ Korana ma ribami, senemi ĝeri maĝuri rakavari ĝomaĝuri-iaĝirito-ĝoi ĝerina Barau na evaĝa-maĝurimito ginitaĝo dagarana tu asi berakavani dagarana. Dia silva o golo kavari.

¹⁹ Senaĝi evaĝa-maĝurimito ginitaĝo dagarana tu Keriso rarana, rara namo vedaureana, Barau ĝena mamoe natuna rarana asi mirona e kererena.

²⁰ Ĝia tu Barau na tanobara roĝosi bere veia neganai veĝata, eĝabiviriĝiato. Senaĝi ĝita vaĝa-maĝurira ĝana mai nega gabiri ai ema vaĝa-foforiato.

²¹ Ĝia bakunai Barau ĝoĝabidadama-viniani. Barau na mase ĝenana evaĝa-varigiĝi-ĝenoĝoiato, e marevana baregona eviniato. Moĝa lorinai ĝomi na Barau ĝoĝabidadama-viniani, ema ĝemi tuĝamaĝikau ĝia ĝenai ĝotoreani.

²² Toma, ĝomi na guruĝa moĝonina ĝoseĝaĝi-viniato lorinai, tauĝemi ĝoveiarevato, ema karomi veĝabidadama tauri ĝesi moĝoni ai ĝoveura-vevinini. Moĝa lorinai boĝono veura-vevini ma nuĝami mabarari ĝesi.

²³ Korana ġomi tu ġomaġuri-ġenoġoito, tarima variġu geragerami ai ġoiaġoto, dia tama sina ġerina, ġia tu ġemaseni, senaġi Barau ġena maġuri guruġana, etanu-vanaġi vanaġini guruġana, ġenana evaġa-maġuri ġenoġoimito.

²⁴ Buka Veaġa ekirani kavana,
 “Tarimarima mabarari tu reġi kavana,
 ġia marevari tu reġi ġwaġwana kavana.
 Reġi tu ġemaraini,

ema veravera maki ġeketoni,
²⁵ senaġi Vereġauka ġena guruġa tu
 betanu-vanaġi vanaġini.”

Mai guruġa tu Vari Namona ġomi ġemi ai ġevari-fiuato.

2

Vereġauka tu maġuri forena, fore namo vedaureana

¹ Moġa lorinai, tuġamaġi rakavari mabarari, e ġofaġofa mabarari, e vemuriġoi mabarari, e mama, ema guruġa rakavari mabarari boġono fitoġa-kwareġari.

² Vau ġemaġurini mero keiri kavari boġono vei, vanaġivanaġi iauka ratana boka-kokena boġono boka-koke, be moġa niuniunai boġono barego e vevaġa-maġuri boġono ġabia.

³ Korana ġomi tauġemi na ġodoġariato, Vereġauka ġena namo tu aiġesina.

⁴ Vereġauka ġenai ġoiaġoma, ġia tu maġuri forena, tarimarima na ġefitoġaiato, korana asi ġena namo ta ġetato. Senaġi Barau na eġabi-viriġiato, korana fore namo vedaureana ġia ġoiranai.

⁵ Maġuri foreri kavana ġoiaġoma, be ġomi maki Barau Iaukana na Rubu Veaġai bene raga-iaġimi. Monai Rubu Veaġa vereri veaġami ai boġono iaġo, ma Barau na Iesu Keriso bakunai eġabi-raġerini iauka varevareri, ġemi maġuri, boġono vinia.

⁶ Korana Buka Veaġa ekirani,
 “Au na fore namo vedaureana ta aviriġiato,
 ġia tu Sionai (o Ierusalemaj)
 duġu forenai avaġa-iaġoato.

Dei na ġia bevaġa-moġoniani
 tarimana tu asi bemaiakaiani.”

⁷ Ġovaġa-moġoniani tarimami ġemi ai mai fore tu namo vedaurea, senaġi asi ġevaġa-moġoniani tarimari ġeri ai tu,

“Numa ragaragana tarimari na
 asi ġeura-viniato nai ġefitoġaiato,
 ġekirato fore rakavana,
 dagarana tu fore mabarari fakari ai fore namo vedaureana,
 duġu forenai eiaġoto.”

⁸ Ma toretore tai ekirani,
 “Mai fore na tarimarima bevaġa-kake-naġirini,
 e bevaġa-ketorini forena.”

Barau ġena guruġa asi ġeseġaġiato dainai, ġevakeke-naġito, mo tu Barau na ekiraġi-guineato, moġesi beġe veiani.

⁹ Senaġi ġomi tu ġabi-viriġi besena, Kini ġena Rubu Veaġa veremi, bese veaġana, Barau ġena tarimarima. Eġabi-viriġimito, mukuna na ekearosimito, benamo ġena mama namo vedaureanaġi etoremto, korana tu ġia ġena veġa namori boġono kiraġi-foforiri ġana.

¹⁰ Guinenai ġomi tu dia Barau ġena tarimarima, senaġi toma ġomi tu ġia ġena tarimarima. Guinenai Barau ġena vevetuġaġwa tu asi ribami, senaġi toma ġia ġena vevetuġaġwa ġodoġariato.

Barau ġena vetuġunaġi tarimari

¹¹ Ġatagu mabarami, anoġi-gwaġiġimini, ġomi tu tarima boru e tanukau tarimami mai tanobarai. Tauġani ġena ura rakavari asi boġono veiri, maniġeri na vanaġivanaġi ġomi ia ukami ġevetari-vinirini.

¹² Senaġi Barau asi ribari tarimari ġoirari ai ġemi veġa beġene namo. Beġe rori-toremimi, rakava-vei tarimami ai beġe kiraġimini, senaġi ġemi veġa namori beġe ġitarini neganai, ġia na Barau beġe vaġa-raġeani, ġia na tarimarima bekota-vinirini ġaronai.

¹³ Vereġauka ġovaġa-moġoniani nai, gavamani ġeri taravatu mabarari boġono korana-iaġiri: Kini boġono seġaġi-vinia, korana ġia tu varaġe vedaurea.

¹⁴ E gavana tauri boġono seġaġi-viniri. Ġia na veġa rakava tarimari beġene vaġa-rakavari, ema veġa namo tarimari beġene vaġa-namori ġana eġabi-torerito.

¹⁵ Korana Barau ġena ura tu, ġomi ġemi veġa namori na asi ribari tarimari ġeri guruġa babobabori boġono lautariri.

¹⁶ Kokore ai boġono tanu, be dagara ta na asi bene barubarumi, Keriso na eruġa-vaġirito tarimari kavana. Senaġi asi boġono kira, "Ġai tu maġuri namonai e fakanai ġatanuni, be veġa rakavari baġa veirini tu asi kara ta." Asiġina. Barau ġena vetuġunaġi tarimami ai boġono tanu.

¹⁷ Tarima mabarari boġono gubakauri. Karomi veġabidadama tarimari boġono ura-viniri. Barau boġono vaġa-raġea, e kini boġono gubakaua.

Keriso kwakuna gabunai boġono raka

¹⁸ Tuġu-rakarakao tarimami asi voimi, ġitaġaumi tauri boġono seġaġi-viniri, moġoni ai boġono gubakauri, dia veġa-namo e garo-namo tarimari moġo, senaġi niara-niara tauri maki.

¹⁹ Korana Barau na eura-viniani veġana tu maiġa: Barau ġena ura ġokorana-iaġirini dainai, enabe asi ġemi rakavai beġe vaġa-midigu midigu-mini, senaġi boġo vevaġa-gwaġiġini.

²⁰ Ġemi rakava dairi ai beġe kwarimini ma boġo vevaġa-gwaġiġini, moġa ġena namo ġomi ġemi ai tu kara? Senaġi bema veġa namori ġoveini nuġanai beġe vaġa-midigu midigumini ma boġo vevaġa-gwaġiġini moġo, Barau ġoiranai tu namo eġabi-raġeani.

²¹ Ġomi tu moġesi boġono vei ġana, Barau na ekeamito. Korana ġomi daimi ai Keriso tauġena emidigu-midiguto, e ġia na mai vevaġa-ġita ġomi ġemi ai eraga-kwaneato. Moġa lorinai ġomi tu ġia kwakuna gabunai boġono raka.

²² Ġia na rakava ta asi eveiato, e ta na ġia muruna na ġofaġofa guruġana asi eseġaġiato.

²³ Ġeġuruġa-rakava-viniato, senaġi guruġa rakavari na asi evaġa-voirito; ġevaġa-midigu midiguato neganai, vaġa-voi guruġari asi e kiragiġirito. Ġia ribana, Barau tu vevaġa-maoro tauna iobukalobukana, naima ġia ġimanai etreato.

²⁴ Keriso tauġena tauġaninai ġita ġera rakava eġwa-raġerito satauro tuġuna ġana. Moġesi eveiġto tu, vei-rakava ġenai bitana mase, asi ma bitana vei-ġenoġoia, ema vei-iobukaiobuka ġenai bitana maġuri, Barau ġena ura bitana korana-iaġiri. Boġono tuġamaġi: Ġia manuġana dainai, ġoi onamoto.

²⁵ Ġomi tu rekwarekwa mamoeeri kavari ġoraka-taġui taġuito-ġoi. Senaġi toma ġomi tu iaukami nariġauna e ġitaġauna tauna Keriso na ma beġabi-ġenoġoimi.

3

Veġaraġo vavinemi ema taumi

¹ Ġomi veġaraġo vavinemi maki moġesi, ġaraġomi gabureri ai boġono tanu. Moġesi boġo veini nai, tari ġaraġomi tu Barau ġena guruġa asi ġevaġa-moġoniani tauri, senaġi ġemi veiġa namori na moġo nuġari beġabirini, benamo beġe vetuġamaġi-kureni; a Barau ġena guruġa ta ġeri tu asi boġo kiragiani.

² Korana ġemi veiġa roroġotori ema ġemi vegubakau ġia ġeri ai beġe ġitarini tu namo.

³ Marevami ġenamo-vedaurea urari ai tauġanimi asi boġono vaġa-veraverari. Ilailana, ġuimi ġovei-iraurini, golo ġotoreni e dabuġa namori vedaureari ġoriġorini.

⁴ Asiġina, ġomi tu lorumi ġuturi neġi boġono vaġa-veraverari, asi beġe rakavani veraverari na, manau e nuġa-namo. Moġeri tu Barau ġoiranai dagara baregori.

⁵ Guinenai, ġita tubura ġatara ġeri negai maki vavine veaġari, Barau ġenai ġeveġabidadamato-ġoi vavineri, tu moġesi ġevevaġa-marevato-ġoi, e ġaraġori gabureri ai ġetanuto-ġoi.

⁶ Sara kavana, ġaraġona eseġaġi-viniato-ġoi; ġaraġona tu “Ġegu vereġauka” etato-ġoi. Ġomi toma tu ġia natuna, bema ġemi veiġa tu namo e kara ta garina asi ġoveini.

⁷ Ġomi tau maki ġaraġomi ġesi ġotanuni nai, boġono riba-ginikauri. Boġono riba, ġia tu asi fakosiri. Ġaraġomi boġono gubakauri, korana Barau na maġuri vanaġivanagħi tu ġia e ġomi bevarevare-vinimini. Moġesi boġono vei, be dagara ta na ġemi ġauġau-vegogo asi bene vaġa-rakavari.

Veiġa namori ai bitana midigu-midigu

⁸ Guruġa vaġa-magona maġa: Mabarami nuġami boġono vaġa-sebonari, boġono vevaġa-kava-vevini, e boġono veura-vevini tarikaka kavari. Boġono vevetuġaġwa-vevini e boġono marana.

⁹ Veiġa rakavari e ġaro rakavari asi boġono vevaġa-voi-vevini, senaġi ġevaġa-rakavamini tarimari boġono vaġa-namori. Korana Barau na ekeamito tu moġesi boġono vei, benamo ġomi na maki ġena vevaġa-namo boġono ġabia.

¹⁰ Korana Buka Veaġa ekirani,
 “Deikara maġuri eurani e ġaro namori bene ġitari etoni tarimana tu meana bene naria,
 guruġa rakavari asi bene kiraġi,
 e muruna na ġofaġofa guruġari asi bene kiraġiri.

¹¹ Rakava bene raga-kwaneana,
 veiġa namori bene vei.
 Maino bene vetaua nuġana mabarana ġesi.

¹² Korana Vereġauka na tu vei-iobukaiobuka tarimari eġita-ġaurini, e ġeri ġauġau eseġaġirini. Senaġi vei-rakava tarimari tu Vereġauka na asi eura-vinirini.”

¹³ Veiġa namori bouravini-baregorini nai tu, dei na ġoi bevaġa-rakavamuni?

¹⁴ Senaġi irau beġe vaġa-mididgu midigumini ġemi vei-iobukaiobuka dairi ai nai tu boġono iaku. Tarima ta garina asi boġono vei, e asi boġono daradara.

¹⁵ Senaġi nuġami ai Keriso boġono korana-iaġia, boġono vaġa-raġea, ġia tu ġomi ġemi Vereġauka. E vanaġivanaġi boġono venari-taġo, bema ta na bedanaġimini, “Kara dainai Keriso ġoġabidadama-viniani” betoni nai, ġena boġono kiraġi-ginikau.

¹⁶ Senaġi manau ai e vegubakau ai ġena boġono kiraġi-ginikau. Ġemi veiġa loriri boġono toreri, asi namo gabivau boġono riba ġomi tu asi maoro. Keriso murinai ġorakani ma veaġami ġesi dainai, ġemugumugu-iaġimini e rakavami ġekiraġini tarimari tu tauġeri roġo beġe maiakarini.

¹⁷ Barau ġena urai veiġa namori ġoveini dairi ai ġomidigu-midiguni nai tu namo. A asi namo ġemi veiġa rakavari dairi ai boġono midigu-midigu.

¹⁸ Keriso emaseto, ġera rakava bene voi-vaġiri ġana. Ġia tu nega sebona moġo emaseto, asi ma bemaseni. Ġia tu vei-iobukaiobuka tauna, ġita rakava tarimara bene kurevora, be Barau ġenai bene ġori-iaġora ġana. Tauġani maġurinai tu ġevaġi-maseato, senaġi iauka maġurinai ġia tu evariġisi-ġenoġoito.

¹⁹ E iaukai ġia eiāġoto mase gabuna o dibura ġana, monai ġetanuni tarimari iaukari ġeri ea ġobatato.

²⁰ Ġia tu guinenai ġekira-sirivaġito tarimari, Noa na ġasi baregona eveiato neganai, benamo Barau na evaġa-nogarito ma vevaġa-gwaġiġina ġesi, (ġeri rakava ġerina beġene vetuġamaġi-kure ġana). Senaġi ġasi baregona nuġanai ġeraka-toġato tarimari tu asi gutuma. Tauri mabarari tu imaima toitoi (8) moġo nanu na evaġa-maġuririto.

²¹ Mo nanu moġa tu babatise vetoġana kavana, korana babatise na toma ġomi evaġa-maġurimini, dia tauġani mirona ġurigi-vaġina, senaġi Barau ġonogiani nuġami bene iarevari ġana Barau ġoiranai. Iesu Keriso mase na evaġa-varigiġi ġenogiatu bakunai evaġa-maġurimini.

²² Ġia tu gubai eraka-toġato, Barau aroribana rekenai etanuni. Aneru, e ma ġeri maoro baregona iaukari, ema seġuka tauri mabarari tu ġia gaburenai ġetanuni.

4

Ekalesia maġurina

¹ Keriso tu tauġaninai emidigu-midiguto lorinai, ġomi maki ġemi tuġamaġi boġono vaġa-gwaġiġiri, ġia ġena tuġamaġi ġesi beġene ilaila; korana tauġaninai emidigu-midiguni tarimana na veiġa rakavari eraga-kwanerini.

² Tauna moġa, ġomi roġo mai tanobarai ġotanuni nuġanai tu, tauġanimi ġeri ura rakavari asi boġono korana-iaġiri, a Barau ġena ura negi boġono korana-iaġia.

³ Ğomi tu kai-veġata Barau asi ribari tarimari ilailari ai ġotanuto-ġoi, mata-boraġa e veġura-vanaġi veigari ġoveito-ġoi, ġoniu-lelevaġito-ġoi, ġovei-taġuitaġuito-ġoi, ġoniu-vevogoto-ġoi, e barau ġofaġofari ġotomarakarigo vinirito-ġoi.

⁴ Toma, ġia tu ġveiauni, korana ġia ġesi asi ġovekakoni, e asi ġovei-taġuitaġuini. Moġa lorinai rakavami ġekiraġini.

⁵ Senaġi ġia tu maġuri tarimari e mase tarimari vaġa-maoro-viniri Barauna ġoiranai beġe ritoġoni, ġeri veigra moġeri beġe kiraġirini.

⁶ Moġa lorinai Iesu na Vari Namona tu ġemaseto tarimari iaukari ġeri maki evari-fuato. Moġesi eveito korana tu, enabe Barau na tauġani ai evaġa-maoro vinirito tarimarima mabarari kavana, (mai tu ġemaseto), senaġi iaukai tu roġo beġe maġurini, Barau emaġurini kavana.

Barau ġena varevare dagarari ġitaġauri tarimari namori

⁷ Dagara mabarari maġori tu bekavinagi. Boġono venari-taġo e boġono vevaġa-gwaġiġi, be ġemi ġauġau asi boġono vaġa-ketoa.

⁸ Barego vedaureana tu, tata boġono veura-vevini ma nuġami mabarari ġesi, korana veura-vevini na rakava ġutuma elautaririni.

⁹ Karomi tata ġesi veigra namori boġono vei-vevini, boġono veġabiraġe-vevini, asi boġono vemugu-mugu e veroritore.

¹⁰ Ğomi tata mabarami tu, Barau na evaġa-ġaunamito varevare dagarari irauirau ġitaġauri tarimami namomi, moġa lorinai karomi dairi ai boġono ġauvei-iaġiri, kamara varevare dagarana Barau ġenana ġodoġariato ilailanai.

¹¹ Deikara eġobotani nai, ġia tu Barau ġena guruġa bene vari-fiu. Deikara evevaġa-kavani nai, ġia tu Barau ġena kokore na bene vevaġa-kava. Mo dabarai dagara mabarari nuġari ai Barau bita vaġa-raġeani, Iesu Keriso bakunai. Mareva namona e seġuka tu ġia ġena, bene iaġo mo vanaġivanaġi. Amen.

Ekalesia midigumidiguna

¹² Gatagu mabarami, midigumidigu karava mamiri noġa ġoġabini nai tu, nuġami asi beġene farevagi, asi boġono kira, dagara boruna ta ġemi ai eġorani. (Asiġina, mani tu ġomi tovenaġimi dagarana moġo).

¹³ Senaġi Keriso emidigu-midiguto kavana ġomidigu-midiguni dainai, boġono iaku, gabivau ġia marevana baregona bevaġa-foforiani neganai vau ma boġo iaku-sirivaġini.

¹⁴ Keriso murinai ġorakani nai, rakavami beġe kiraġini neganai, boġono iaku, korana monana boġo ribani, Barau Iaukana, mareva-namo Iaukana, tu ġomi iatami ai etanuni.

¹⁵ Bema ġomi ta omidigu-midiguni nai, mani midigumidigu tu dia ovevaġi-debani, o olemani, o seġafore veigana rakavana ta oveiani, o tarima ta ġena ġauvei metona oveiani nai omidigu-midiguni.

¹⁶ Senaġi bema ġoi tu Keriso murinai orakani dainai omidigu-midiguni neganai, asi bene maiakamu, senaġi Barau bono vaġa-raġea, Keriso arana oġwa-rakaoani nai.

¹⁷ Barau ġena vevaġa-maoro negana tu varau beraġasi, e vevaġa-maoro tu Barau ġena tarimarima ġeri ai bevesinani. Bema ġita ġerai bevesinani neganai, Barau ġena Vari Namona asi ġevaġa-moġoniani tarimari ġeri ai tu kamasi bea ġorani?

¹⁸ Korana Buka Veaġa ekirani,

“Mağuri ġabiġabina Barau ġeseġaġi-viniani tarimari ġeri ai tu gwaġiġi. O Barau asi ġevaġa-moġoniani e vei-rakava tarimari dabarari tu kamasi bevetoreni? (Ġia ġeri ai tu meto lelevaġi!)”

¹⁹ Tauna moġa, Barau ġena ura lorinai midigu ġeġanini tarimari tu veiġa namori moġo beġene vei, ema ġeri maġuri tu eveirito Barauna ġimana nuġanai beġene toreri, korana ġia na etuġamaġi-kaurini.

5

Ekalesia ġorikauna tarimari

¹ Au na ġomi fakami ai ekalesia ġorikauna taumi avaġa-guruġamini. Au maki ekalesia ġori-kauna taugu. Keriso emidigu-midiguto-ġoi au tu matagu na aġitaiato, e ġia marevana baregona bevaġa-foforjani neganai, au tu ma augu. Moġa lorinai au na ġomi anoġi-gwaġiġimini:

² Barau ġena mamoe serina boġono ġitaġau-ginikaua. Ġia na ġomi evinimito tu, nuġami na eura-iaġiani lorinai boġono ġita-ġaua, ġia ġena ura ilailanai. Dia mugumugu ai, senaġi nuġami na eura-iaġiani lorinai. Dia moni o farefare boġono doġari ġana, senaġi nuġami ġeri urai.

³ Barau na ġomi ġemi veġitaġau gaburenai etoreato mamoe serina (o ekalesia doġorona) asi boġono dori-naġinaġia noġa moġo vere baregori ġeveini kavana. Senaġi ġomi marevami boġono vaġa-ġitari, be beġene tovotovomi.

⁴ Moġesi boġo veini nai, mamoe Ġitaġauri Tauna Baregona, Keriso, beġoira-refoni ġaronai, korona namo vedaureana, asi berakavani dagarana, boġo ġabiani, mo tu maġuri vanaġivanaġi.

⁵ Moġa ilailanai, ġomi tarima varigumi maki veġitaġau tauri boġono seġaġi-viniri, ma ġomi mabarami na manau dabuġana boġono vedabuġa-iaġia, boġono vevaġa-kava-vevini, korana Buka Veaġa ekirani, “Veiavi tarimari tu Barau na elautaririni, senaġi manau tarimari tu ġena namo e varevare-bara evinirini.”

⁶ Moġa lorinai, tauġemi boġono vevaġa-manau, Barau ġimana seġukana gaburenai, benamo ġarona bene raġasi neganai, ġia na bene ġabi-vaismi.

⁷ Ġemi nuġa-vekwaraġi dagarari mabarari ġia ġimanai boġono toreri, korana ġia na eġita-ġaumini.

⁸ Boġono tuġamaġi-roroġoto, boġono venari! Korana vaġa-rakavami tauna, Diabolo, tu erakao-rakaoni, laion noġa emagarani, emaramarani, ta neġania uranai.

⁹ Ġemi veġabidadamai boġono ruġa-gigitari, benamo Diabolo boġono kora-ġoia. Korana boġono tuġamaġi, ġoġanini midiguri ilailari tu ġomi karomi tanobara mabarani maki ġeġanini.

¹⁰ Senaġi Barau, namo e vare-vare-bara mabarari na evonuto Barauna, na Keriso bakunai ekeamito, nega kotunai moġo boġo midigu-midiguni murinai, ġena tanu-vanaġivanaġi marevana namona boġono ġabia ġana. Ġia na vau bevaġa-namo ginikaumini, bevaġa-ruġa gigitarimini, e bevaġa-kokoremimi.

¹¹ Seġuka tu ġia ġena, bene iaġo vanaġivanaġi! Amen.

Vevaġa-namo magona

¹² Siluano, (mai tu Silas), na bevaġa-kavagu, mai fefa kubina baġa tore-iaġosia ġomi ġemi. Ġia au na aġitaiati tu, ġita tarikakara ma ġena vetuġamaġikau ekalesia nuġanai. Mai fefa batorea korana tu ġegu ura

bana vaġa-kokoremi e bana vaġa-ribami, Barau ġena namo e varevare-bara moġonina tu maiġa. Be mai namo e varevare-bara nuġanai boġono ruġa-gigitari.

¹³ Ġomi karomi ekalesia tarimari Babulona ai maiġeri, (mai tu ekalesia tarimari Romai ekiraġirini), ġia maki Barau na eġabi-viriġirito tarimari, na ġemi vevaġa-namo beġe tuġu, e natugu Mareko na maki ġemi vevaġa-namo betuġu.

¹⁴ Veuravini verauna na boġono vevaġa-namo-vevini.

Keriso nuġanai ġotanuni tarimami mabarami maino ġemi ai bene tanu.

PETERO ĜENA TORETORE VAĜA-RUARUANA

2 Petero vaĝa-foforina guruĝari

Petero na mai fefa vaĝa-ruaruana maki betaĝu Roma na etoreato. Etoreato laĝanina tu 65 ma 67 fakari nuĝanai ta, mo tu Iesu emaseto murinai. Petero tu mai fefa etoreato murinai vauro ĝebaru-seiriĝoato, benamo ĝevaĝiato.

Mai fefa nuĝanai siri baregori tu karao 3:17-18.

Petero na mai fefa etoreato tauna korikori tu, 1) Barau ĝena tarima veaĝari bene vaĝa-naĝiri, be Barau korana-iaĝina veiĝari korikori beĝene veiri gana; 2) vevaĝa-riba tarimari ĝofaĝofari na beĝe ĝofa-darererini garina ekira-toreĝaurito; 3) riba korikorina Barau ĝenana eiaĝomani tu aiĝesina ema Satani na riba ĝofaĝofana evaĝa-raka-rosiani ribana tu aiĝesina, moĝeri ekiraĝi-foforirito; 4) Vereĝauka ĝena ĝaro ai Kota baregona beveĝabini moĝa ekiraĝi-fofori ginikauato.

Petero na mai fefa tu maĝesina eboioĝaiato:

1. Barau ĝenana eiaĝomani ribana korikorina tu kamasina - karao 1
2. Riba moĝonina na boraka-veĝitani tu kara rakavana beĝorani - karao 2
3. Barau ĝena kiraĝitore moĝoniri - karao 3

1 Au, Simona Petero, Iesu Keriso ĝena vetuĝunaĝi ema ĝena apostolo taugu; ĝeguna mai fefa eiaĝosini.

Ĝomi ĝai ĝesi ĝera veĝabidadama sebona taĝabiato tarimami atorevinimini. Ĝera Barau, ĝera Vevaĝa-maĝuri Tarimana Iesu Keriso, ĝena vei-iobuka-iobuka e vetuĝamaĝikau lorinai, ĝomi maki mo veĝabidadama namo vedaureana sebona ĝoĝabiato ĝai apostolo kavana.

2 Ĝemi riba e tuĝamaĝi-faka Barau ĝenai ema ĝera Vereĝauka Iesu Keriso ĝenai beĝene barego. Monana vau varevare-bara e maino maki ĝemi ai beĝene barego.

Barau na ekeamito ĝia ĝena

3 Ĝena seĝuka na Iesu Keriso na ĝera maĝuri vaĝa-kokoreri dagarari mabarari varau evinirato, Barau ĝena ura bitana korana-iaĝi korikoriri ĝana. Korana Keriso ĝenana Barau tama ribaiato, ĝena mareva baregona e namo ĝerina ekearato tarimana.

4 Ĝena mareva baregona e namo ĝerina ĝena kiraĝitore baregori e namo vedaureari varau evinirato vaĝa-ilailana: Mai tanobara ĝena ura rakavari ema mase ĝevaĝa-ĝorarinini veĝari ĝerina bene vaĝa-maĝurira, ma Barau maĝurina korikorina bitana ĝabia.

5 Moĝa lorinai boĝono kokore, ĝemi veĝabidadama ĝenai veĝa namo boĝono torekau; veĝa namo ĝenai tuĝamaĝi-maĝata boĝono torekau;

6 tuĝamaĝi-maĝata ĝenai nuĝa-gwaĝiĝi boĝono torekau; nuĝa-gwaĝiĝi ĝenai vevaĝa-gwaĝiĝi boĝono torekau; vevaĝa-gwaĝiĝi ĝenai Barau korana-iaĝina boĝono torekau.

7 Barau korana-iaĝina ĝenai tarikakami veuraviniri boĝono torekau; ema tarikakami veuraviniri ĝenai veuravini tarimarima mabarari ĝeri ai boĝono torekau.

8 Maĝeri maĝuri tu ĝomi ĝemi ai beĝene tanu, ema beĝene barego, korana maĝeri na ĝomi beĝe launaĝi-naĝimini ema beĝe vaĝa-kokoremimi, benamo

gemi riba Iesu Veregauka ġenai tu asi beġe tanu-kavani, senaġi ġwaġwari namori vovoka beġe vetoreni.

⁹ A bema maġeri maġuri ai erabuni tarimana, ġġa tu mata-bubu tarimana kavana, korana Barau na ġena veġa rakavari guineri varau eġurigi-fitoġarito evetuġarekwani.

¹⁰ Moġa lorinai, tarikakagu, boġono kokore, Barau na ekeamito e eviriġimito maniġa boġono vaġa-moġonia. Moġesi boġo veini nai tu, asi boġo ketoni.

¹¹ Moġesi boġo veini nai, Barau na beġabiraġe-ginikaumini, benamo ġera Veregauka e Vevaġa-maġuri Tarimana Iesu Keriso ġena tanu-vanaġivanaġi Basileiana nuġanai boġo raka-toġani.

¹² Mo maġuri namona tu ġomi ġoirami ai enarimini, moġa lorinai au na ġomi vanaġivanaġi basisiba-vini ġenoġoi-ġenoġoimini. Moġoni, maġeri dagara mabarari varau ġoribarito, ema Barau ġena guruġa moġonina ġoġabiato ema ġoġabi-gigitariani maki.

¹³ Senaġi au atuġamaġini, mai dabara namori ġomi tu ġemi vetuġamaġi-taġo ai bana vaġa-foforiri, au roġo amaġuri-taġoni nuġanai.

¹⁴ Korana au ribagu, au tauġanigu korina tu dori atore-tariani, ġita ġera Veregauka Iesu Keriso na evaġa-guruġaguto ilailanai.

¹⁵ Moġesi naima ġegu ura mai dagara mabarari bana sisiba-vini ginikaumi. Benamo ġegu mase murinai, ġomi na boġono tuġamaġi-taġo vanaġi-vanaġiri ġana.

Iesu marevana baregona matama na ġaġitaiato

¹⁶ Ġai tu dia sinasina ġoġaġofari na ġita ġera Veregauka Iesu Keriso ġena seġuka ema ġena iaġoma-ġenoġoi ġomi ġavaġa-ribamito. Asiġinal! Ġai tauġema matama na ġia marevana baregona ġaġitaiato.

¹⁷ Ġai matama ġutuġutunai Barau ġita Tamara na ġia ara baregona ema mama ma seġukana eviniato. Mo mama baregona nuġanai etanuni Barauna guba na ekea-riġoto Iesu ġenai, ekirato, “Mai tu au Natugu, aura-viniani; ema ġia ġenai aiaku-rakavani maki.”

¹⁸ Ġai tauġema na ġaseġaġiato, mai garo guba na emariġoto, ġia ġesi ġoro veaġanai ġatanuto-ġoi nai.

¹⁹ Moġa lorinai ġai tu peroveta tarimari na ġekiraġi-torerito guruġari ġaġabi-gigitarinini. Gomi maki moġeri guruġa boġo korana-iaġirini tu namo, korana peroveta tarimari ġeri guruġa tu lamefa kavana, gabu mukunai emamani, beiaġoni mo nega beaġasini, Keriso, laġani visiġuna ġomi nuġami ai bemama-rovorovoni.

²⁰ Moġeri mabarari iatari ai ini guruġa asi boġono tuġarekwaia: Tarima ta ġia ġereġana ġena ribai peroveta guruġari tauri asi bekiraġirini.

²¹ Korana peroveta guruġari tu dia tarimarima ġeri ura na ġeiaġomato, senaġi Iauka Vevaġa na tarimarima evaġa-naġirito lorinai, ema guruġa evinirito ilailanai, Barau ġena guruġa ġeperoveta-iaġirito-ġoi.

2

Vevaġa-riba tarimari ġoġaġofari

¹ Guinenai peroveta tarimari ġoġaġofari tu Isaraela tarimari fakari ai ġefoforito-ġoi. Mo dabara sebonai vevaġa-riba tarimari ġoġaġofari maki ġomi fakami ai beġe foforini. Ġia na vekuretoġai vevaġa-riba ġoġaġofari beġe vaġa-ribamini, ġemi veġabidadama vaġa-rakavari uranai. Ema ġeri

Vereġauka, evoirito tarimana, maki ġia na beġe ruġaiani; moġesi beġe veini, ġia tauġeri na ġeri mase beġe vaġa-ġarimogiani.

² Gutuma na maki ġia ġeri veiġa rakavari e mata-boraġa veiġari beġe tovo-tovorini, moġeri urari ai kotari na dabara moġonina tu dabara rakavanai beġe kiraġiani.

³ Ġeri mata-ġaniġani ġerina guruġa ġofaġofari na nuġami beġe ġanirini, beiaġoni mo beġea ġabimini. Senaġi ġia tu kai-veġata na vevaġa-maoro-viniri tarimana tu enari-taġoni, ema ġia vaġa-maseri tarimana tu eġita-taġorini.

⁴ Barau na ġevei-rakavato aneruri maki asi evaġa-maġuririto, senaġi rakava gabunai efiu-riġorito. Monai seini na ebarubarurito mukuna furufuru nuġanai, vevaġa-maoro ġarona ġevaġa-nogaiani.

⁵ Ema Barau na tanobara guinena maki asi evaġa-maġuriato, senaġi ġutuġutu evaġa-foforiato tu Barau asi ġekorana-iaġiato-ġoi tarimari ġeri ai; a Noa, vei-iobukaiobuka eġobata-iaġiato-ġoi tarimana, ema tarima imaima ruarua (7) moġo ġia ġesi evaġa-maġuririto.

⁶ Barau na Sodoma e Gomora maki evaġa-maoro vinirito, karava na evaġa-ġara ġosirito, kau ai ġeiaġoto. Mo veiġa ġenana Barau asi ġekorana-iaġiani tarimari matari bene vaġa-kaniri ġana.

⁷ A Lota moġo eġabi-maġuriato, ġia tu vei-iobukaiobuka tarimana, ġia maki tarimarima ġeri veiġa rakavari e boraġari tuġamaġiri ai egauto.

⁸ Mo tarima iobukaioubukana tu rakava tarimari fakari ai etanuto-ġoi, ġaro vanaġivanaġi enuġa-midigu midiguto-ġoi, korana ġia na Barau ġena taravatu kira-fitoġari veiġari eġitarito-ġoi ema eseġaġirito-ġoi nai.

⁹ Boġono tuġamaġi, Vereġauka na tu ġia ġekorana-iaġiani tarimari veribaġani e vedaġaraġe nuġari na beġabi-maġuririni riba, a vei-rakava tarimari bebiri-ġaurini, beiaġoni mo, Barau na bevaġa-maoro vinirini ġaronai.

¹⁰ Ma tarima kotari na rakava voina barego lelevaġina beġe doġariani, mai tu tauġanina ġena ura boraġari ġeiaġo-vinirini tarimari ema Barau ġena guruġa ġekira-fitoġaiani tarimari.

Mai vevaġa-riba tarimari ġofaġofari tu veiavi e vekiraġi-rakava rakava tarimari, iauka baregori asi ġegubakaurini, ġerikiriki-iaġirini.

¹¹ Aneru tu kokore e seġuka lelevaġi, mai ġofaġofa tarimari ġeri seġuka ġevanaġirito, senaġi aneru na iauka baregori tu asi ġevaġa-daġarini e asi ġevei-veġare veġarerini Vereġauka ġoiranai.

¹² A maġeri tarimarima tu asi ġetuġamaġini, ġeri vemamiraġi na moġo ġeġori-kaurini, noġa moġo boġa bairi kavana, ġemaġurini tu beġene vaġiri moġo ġana kavari. Asi ġeribarini dagarari ġerikiriki-iaġirini. Moġa lorinai ġia tu mo boġa bairi kavari beġe vaġa-rakavarini e beġe rekwarekwani.

¹³ Ġeri veiġa rakavari voiri beġe ġabirini. Tauġaniri vaġa-iakuri veiġari laġani matabarai ġeveirini, asi ġemaikarini. Moġeri tarima ġomi ġemi ġanivegogo ġoveirini nai, ġia tu miro noġa ġomi fakami ai; korana ġeri vevaġa-riba ġofaġofari tu ġemi ġanivegogo ai maki ġekiraġirini.

¹⁴ Vavine ta ġeġitaiani nai, mata-boraġa tuġamaġiri moġo ġeveini; rakava veiveiri ai asi ġegauni. Veġabidadamai roġosi beġene gwaġiġi tarimari ġevaġa-toġarini. Ġia nuġari tu mata-ġaniġani ai ġevaġa-maranarito. Barau na ġeri rakava voiri bevinirini veġata.

¹⁵ Ġia na dabara maorona beġe raga-kwanea, ġeraka-taġuitaġuini, Balam, Beoro natuna, eveito kavana. Ġia tu moni uranai veġa rakavari eveirito-ġoi.

¹⁶ Senaġi ġena veġa rakavari lorinai, doniki na evaġa-guruġaiato. Doniki tu asi guruġa ribana, senaġi tarimarima garori ai evaġa-guruġaiato, naima mo tarima ġena veġa babori veveiri evaġa-dokoato.

¹⁷ Moġeri tarima tu nanu guriri kakorori kavana; ema magube iavara na ekwari-rakaorakaorini kavana. Barau na mukuna furufuru gabuna ġeri etoreato.

¹⁸ Ġeguruġa-kavani ema ġeveiavi-kavani, ma tarima kotari tu vau moġo dabara moġoninai asi ġerakani tarimari fakari na ġeraka-veġitani, senaġi ġia na tu tauġanina ġena ura rakavari e mata-boraġa veġari na ma ġema-gagare-ġaurini.

¹⁹ Tarima ġeġofarini, ġekirani, maġuri namona e fakana beġe doġariani ġetoni, senaġi ġia tauġeri tu ġeri ura rakavari vetuġunaġiri ġeiaġo-vinini. Korana tarimarima tu veġa rakavana ta na eboroġiani nai, ġia tu mo veġa rakavana ġena tuġu-rakaorakao tarimana.

²⁰ Moġoni, ġia na ġita ġera Vereġauka e Vevaġa-maġuri Tarimana Iesu Keriso ġema-ribaiato dainai, tanobara ġena miro e vei-rakava ġenana ġeraka-veġitato; senaġi moġa murinai bema rakavana nuġanai ma ġeraka-toġani, benamo ġena seġuka gaburenai ma ġetanuni neganai, ġia ġeri maġuri tu berakava-kwaikwaini dokonai, dia tovotovonai kavana.

²¹ Ġia tu dabara roroġotona asi ġere riba-guinea tu namo, a asi namo, ġeribaiato murinai, taravatu veaġana, ġeġabiato dagarana, ma ġeruġa-doġemuriġiani.

²² Moġesi ġeveini nai, ġia na mai veġausina o sisiba guruġari ruarua maiġeri ġevaġa-moġonirini, ekirani, “Kwaiva na emumuta-vaġiani dagarana ma ea ġani-ġenoġoiani,” ema, “Ġevaġa-fouani baina tu ma eġenoġoini, ea vedokurani.”

3

Iesu Keriso ġena ġenoġoi

¹ Gatagu mabarami, maitoma tu fefa vaġa-ruaruana mai atore-vinimini. Mai fefa ruarua ġerina, au na ġomi nuġami ai tuġamaġi roroġotori bana vaġa-variġu ġenoġoiri atoni.

² Au auranu peroveta veaġari na ġekiraġirito guruġari guineri laġaniri ai boġono tuġamaġi-taġori, ema apostolo tarimari na ġera Vereġauka e Vevaġa-maġuri Tarimana ġena vevaġa-naġi ġekira-varamito guruġari maki.

³ Guine tu, ġomi boġono riba-maoro: Ġaro dokori ai vei-ġareġare tarimari beġe foforini, ġeri ura rakavari na beġe guine-iaġirini. Ġia na beġe rikiriki-iaġimini,

⁴ beġe kirani, “Keriso eguruġa-toreto, ma beġenoġoi-iaġomani etato, nene? Be ġia tu ainai? Ġita tamara ġevaġa-noga-kavato, kai-veġata ġemaseto, senaġi dagara mabarari tu tanobara evesinato kavana roġo gaburi ai ġetanuni!”

⁵⁻⁶ Maiġeri tarima asi ġeurani mai guruġa maiġa beġene seġaġia: Barau na tanobara guinena ġutuġutu nanuna na evaġa-rakavaiato. A guba e tanobara tu tovotovonai veġata ġena guruġa ġenana eveirito, ma tanobara tu nanu nuġana na emaraġeto ema nanu na etanu-ġeġeraġiato.

⁷ Ma inītoma guba e tanobara roḡo ḡetanuni tu, Barau ḡena guruḡa sebona na eḡabi-taḡorini, karava na vau bene vaḡa-rakavaia tuḡamaḡinai. Barau asi ḡekorana-iaḡiani tarimari vaḡa-roroḡotori ema vaḡa-mouri ḡaronai vau bevaḡa-rakava sebonarini.

⁸ Ḡatagu mabarami, mai dagara sebona asi boḡono tuḡarekwaia: Vereḡauka ḡenai taimi tu irau, ḡita ḡerai tu irau, korana ḡia ḡenai ḡaro sebona tu laḡani 1,000 kavana, ema laḡani 1,000 tu ḡaro sebona kavana.

⁹ Vereḡauka na ekiraḡi-torerito dagarari veiveiri ai tu asi ekwaiboni, tarima kotari ḡetuḡamaḡini kavana. Asigina, ḡia ḡomi ḡemi ai tu evevaḡa-gwaḡigini, korana ḡia asi eurani tarima ta bene rekwarekwa, senaḡi eurani mabarara ḡera rakava ḡerina bitana vetuḡamaḡi-kure ma bitana raka-kure.

Guba tanobara beḡe rekwarekwani

¹⁰ Senaḡi Vereḡauka ḡena ḡaro beḡasini tu lema tarimana ta eraḡasini kavana. Mo ḡaro ai guba beḡe rekwa-rekwani ma gurugururi ḡesi. Gubai ḡetanuni dagarari mabarari karava na bevaḡa-ḡara ḡosirini, ema tanobara ma iatanai ḡetanuni dagarari mabarari beḡe rekwa-rekwani.

¹¹ Boḡono tuḡamaḡi, maiḡeri dagara mabarari tu maiḡesi dabaranai beḡe rakavani, be ḡomi tu kamasī boḡono tanu ḡotoni? Gomi ḡemi maḡuri tu beḡene veaḡa ema Barau ḡena ura boḡono korana-iaḡiri.

¹² Barau ḡena ḡaro boḡono naria, ema ḡena raḡasi boḡono vaḡa-ḡarimoḡia. Mo ḡaro ai guba beḡe ḡararini e beḡe rakavani, ema gubai ḡetanuni dagarari seḡukana na bevaḡa-veverini.

¹³ Senaḡi ḡita tu Barau na ekiraḡi-toreato dagarana tavaḡa-nogaiani, guba e tanobara variḡuri, monai veḡa roroḡotori beḡe tanuni gabuna.

Velaunaḡi e vevaḡa-namo gurugari

¹⁴ Moḡa lorinai, ḡatagu mabarami, alaunaḡimini, mo ḡaro ḡovaḡa-nogaiani nuḡanai, asi miromi e asi ḡemi kerere ta boḡono tanu Barau ḡoiranai, ema ḡia ḡesi maino ai boḡono tanu.

¹⁵ Ḡera Vereḡauka ḡena vevaḡa-gwaḡigi boḡono tuḡamaḡia, ḡia tu ḡomi evaḡa-nogaiani bene ḡabi-maḡurimi tuḡamaḡinai. Barau na ḡita tarikakara namona Paulo iaunega eviniato, benamo ḡia na moḡesi ilailanai etorevinimito.

¹⁶ Ḡia ḡena fefa mabarari ai maki maniḡa ekiraḡiani. Dagara kotari ḡena fefa nuḡari ai tu gwaḡigi rakava, asi ribari tarimari ema ḡeri veḡabidadama asi gwaḡigi tarimari na ḡevevaḡa-riba-iaḡi ḡofaḡofarini. Buka Vevaḡa nuḡanai maki toretore mabarari moḡesi ḡeḡofaḡofa-iaḡirini. Moḡesi ḡeveini nai, tauḡeri ḡeri maḡuri ḡevaḡa-rakavarini.

¹⁷ Senaḡi ḡomi, au ḡatagu namomi, tu varau ma ribami, maiḡeri dagarai lorimi boḡono vetore, be taravatu asi ḡekorana-iaḡiani tarimari na asi beḡene ḡofa-dareremi, ḡemi veḡabidadama namori na boḡo keto-firiḡoni garina.

¹⁸ A ḡita ḡera Vereḡauka e Vevaḡa-maḡuri Tarimana Iesu Keriso ḡena namo e veuravini ḡerai etoreani moḡa boḡono vaḡa-tubua-ḡoi, ema ḡia boḡono riba-ginikaua. Ḡia marevana bisini vaḡa-raḡea toma bene iaḡo vanaḡivanaga! Amen.

IOANE ĞENA TORETORE GINIGUINENA

1 Ioane vaġa-foforina guruġari

Ioane na mai fefa giniguinena maiġa tu dia ekalesia ta ġena o ekalesia doġorona ta ġena etoreato. Asiġi. Mai tu irau bese ekalesia doġorori tari, ema Keriso ġevaġa-moġoniato-ġoi gabu mabarari ai ġetanuni tarimari ġeri. Ioane ġena Vari Namona, e Ioane ġena fefa toitoi, ema Apokalupo tu ġia na etorerito. Ioane na mai fefa tu laġani 85 ma 100 fakari nuġanai ta etoreato, mo tu Iesu maki emaseto murinai vau.

Mai fefa nuġanai siri baregori tu karoa 4:16; 5:13.

Ioane na mai fefa etoreato korana tu eurato, 1) ekalesia bene vaġa-ribari, Barau ġenana eiāġomani ribana moġonina eġabiani tarimana tu Barau sevisevinai vanaġivanaġi etanuni; 2) tarikaka bene vaġa-naġiri, ġia tata ġeri veġata Barau ġesi, e tarikaka tari ġesi, e tanobara tarimari ema dagarari ġesi, ema vei-rakava tarimari ġesi beġene ġita-ginikauri. Asi beġene vekako mata-bubu; 3) Keriso ġevetari-viniani tarimari ġeri ġofaġofa veiġari bene kiraiġi-foforiri.

Ioane na mai fefa tu maiġesina eboioġaiato:

1. Barau tu lamefa mamana kavana emamani - karoa 1-2
2. Barau tu veuravini - karoa 3-4
3. Barau tu maġuri - karoa 5

Maġuri guruġana

¹ Tovotovona na veġata etanuto dagarana, ġaseġaġiato, matama na ġaġitaiato, ġenai ġaboġekauto, ema ġiamama na ġaġabi-karaiato: Mai tu Maġuri Guruġana ġavari-fiuani.

² Mo maġuri efororito, benamo ġai na ġaġitaiato. Moġa lorinai ġemi ġavari-fiuani ema maġuri vanaġivanaġi ġakira-varamini. Mo maġuri tu Tamara ġesi etanuto-ġoi ema ġai ġemai ema fororito.

³ Ġai na ġaġitaiato ema ġaseġaġiato maġurina ġomi ġemi ġakiraġi-foforiani, be ġomi maki ġai ġesi bitana sebona uranai, korana ġai tu Tamara ema ġia Natuna Iesu Keriso ġesi doġoro sebona.

⁴ Mai guruġa ġatore-vinimini, korana ġita nuġara iaku na beġene vonuvonu-raġe ġana.

Barau tu mama

⁵ Iesu ġenana ġaseġaġiato varina ġemi ġavari-fiuani tu maiġa: Barau tu mama, mukuna kotuna ta maki ġia ġenai asi etanuni.

⁶ Bema ġita mukuna maġurinai roġo tarakani nuġanai bita kirani, ġita tu Barau ġesi tadoġoro-sebonani, ġita tu taġofaġofani ema guruġa moġonina asi takorana-iaġiani.

⁷ Senaġi bema mama nuġanai bita rakani Barau kavana, ġita tata tu doġoro sebona tarimara, ema ġia Natuna Iesu rarana na ġita ġera rakava mabarari beġuriġi-vaġirini.

⁸ Bema ġita bita kirani, ġita tu asi ġera vei-rakava, ġita tu tauġera taveġofani, ema ġita ġerai guruġa moġonina tu asiġina.

⁹ A bema ġita ġera vei-rakava bita kiraiġi-foforirini nai, ġia tu ma ġena vetuġamaġikau, ġera veiġa rakavari mabarari betuġamaġi-fitogarinini, ema ġera veiġa ġeġevaġeġevari beġuriġi-vaġirini.

¹⁰ Bema ġita bita kirani, nega sebona maki asi tavei-rakavato, Barau tu ġoġaġoġa baraunai bita vaġa-iaġoani, ema ġia ġena guruġa tu ġita nuġarai asi etanuni.

2

Keriso ġita ġera vevaġa-kava tauna

¹ Natugu, mai guruġa atore-vinimini tu ġomi rakava asi boġono vei ġana. Senaġi bema tarima ta bevei-rakavani nai, ġita tu ma ġera vevaġa-kava tarimana Tamara ġesi etanuni, Iesu Keriso, vei-iobukaiobuka tarimana.

² Keriso na ġita ġera rakava voivaġiri ġauveina eveiato, dia ġita ġera rakava moġo, senaġi tarimarima mabarari ġeri rakava.

³ Bema ġita Barau ġena taravatu guruġari bita korana-iaġirini nai, monana bita ribani, ġita tu moġoni Barau taribaiao.

⁴ Bema ta bekirani, “Au tu Barau ribagu,” senaġi ġena taravatu guruġari asi bekorana-iaġirini, mo tarima tu ġoġaġoġa tarimana, guruġa moġonina ġia nuġanai asi etanuni.

⁵ Senaġi deikara na Barau ġena guruġa ekorana-iaġirini tu, Barau moġoni eura-viniani ma nuġana mabarana ġesi. Monana vau taribani, ġita tu ġia ġesi moġoni sebona.

⁶ Deikara ekirani, ġia tu Barau ġesi doġoro sebona etoni tarimana tu, Iesu Keriso etanuto-ġoi kavana bene tanu.

Taravatu variġuna

⁷ Ġatagu mabarami, mai taravatu atore-vinimini tu dia variġu, senaġi taravatu guinena, tovotovona na veġata ġoġabiato dagarana. Mai taravatu guinena tu ġoseġaġi-guineato taravatuna.

⁸ Senaġi mai taravatu atore-vinimini maki tu variġu; mo taravatu ġena moġoni tu Keriso ġenai ema ġomi ġemi ai maki efororini, korana mukuna tu mai ekorini ema mama moġonina tu varau emamani.

⁹ Tarima ta ekirani, ġia tu mama nuġanai etanuni, senaġi tarikakana tu ebaru-viniani, ġia tu roġo mukuna nuġanai etanuni.

¹⁰ Tarikakana eura-viniani tarimana tu mama nuġanai etanuni. Ġia bevaġa-vedaġa-raġeani dagarana ta ġenai asi etanuni.

¹¹ Senaġi tarikakana ebaru-viniani tarimana tu mukuna nuġanai etanuni e erakani. Ġia asi ribana aiġana eiaġoni, korana mukuna na matana evei-bubuani.

¹² Natugu, au na atore-vinimini korana tu, ġomi ġemi rakava tu Barau na etuġamaġi-fitoġarito Keriso aranai.

¹³ Tamagu, atore-vinimini korana tu, tovotovona na veġata etanuto tarimana tu ġoribaiao.

Maraġa variġu, atore-vinimini korana tu, Satani ġovaġa-darereato.

¹⁴ Natugu, atore-vinimini korana tu, Tamara ġoribaiao.

Tamagu, atore-vinimini korana tu, tovotovona na veġata etanuto tarimana tu ġoribaiao.

Maraġa variġu, atore-vinimini, korana ġomi tu ma gwadami; Barau ġena guruġa ġomi nuġami ai etanuni, ema ġomi na Satani ġovaġa-darereato.

¹⁵ Tanobara asi boġono ura-vinia, ema tanobara dagarari maki asi boġono ura-viniri. Bema tarima ta tanobara eura-viniani nai, Barau ġena veuravini ġia nuġanai tu asi etanuni.

¹⁶ Korana tu tanobara veiḡari mabarari, tauḡani ḡena ura rakavari, mata-ḡaniḡani, ema veiavi, tu dia Tamara Barau ḡenana ḡeiaḡomani, senaḡi tanobara ḡenana ḡeiaḡomani.

¹⁷ Mai tanobara ema tarimarima na ḡemata-ḡaniḡanirini dagarari mabarari tu beḡe korini, senaḡi Barau ḡena ura eveiani tarimana tu betanuvanaḡi vanaḡini.

Keriso evetari-viniani tarimana

¹⁸ Natugu, ḡaro dokona tu maiḡa. Goseḡaḡito ilailanai Keriso evetari-viniani tarimana tu beiaḡomani, maitoma maki Keriso ḡevetari-viniani tarimari vovoka beḡe iaḡoma. Moḡesi nai taribani, mai tu hora magona.

¹⁹ Moḡeri tarimarima tu ḡita ḡesi tavegogoto-ḡoi, senaḡi ḡia tu dia ḡita ḡera doḡoro korikori. Moḡa lorinai ḡita ḡeraga-kwanerato. Bema ḡia moḡoni ḡita ḡera doḡoro korikori nai tu, ḡita ḡesi roḡo tara tanu. Senaḡi ḡita ḡerana ḡeveḡitato. Monana evaḡa-foforiani, ḡia mabarari tu dia ḡita ḡera doḡoro.

²⁰ A ḡomi na tu Iauka Veaḡa ḡoḡabiato, Keriso na eboroḡimito, moḡa lorinai ḡomi mabarami guruḡa moḡonina tu ma ribami.

²¹ Au na atore-vinimini tu dia guruḡa moḡonina asi ribami nai, senaḡi guruḡa moḡonina tu ma ribami dainai, ema ribami maki, ḡofaḡofa tu guruḡa moḡonina ḡenana asi eiaḡomani.

²² Gofaḡofa tarimana tu dei? Iesu tu dia Keriso, (Barau na ekiraḡi-toreato vevaḡa-maḡuri tauna), etoni tarimana. Mo tarima tu Keriso evetari-viniani tauna. ḡia tu Tamara e Natuna ekira-fitoḡarini tarimana.

²³ Natuna ekira-fitoḡaiani tarimana tu Tamana maki ḡia ḡenai tu asiḡina. A deikara na Natuna eḡabi-raḡeani tarimana tu, Tamana maki eḡabi-raḡeani, ema Tamana maki ḡia ḡenai etanuni.

²⁴ Tovotovona na veḡata ḡoseḡaḡiato guruḡana nuḡami ai bene tanu. Bema nuḡami ai betanuni tu, ḡomi maki Natuna e Tamana nuḡari ai boḡo tanuni.

²⁵ Ema mai maḡuri vanaḡivanaḡi tu Keriso tauḡena na ḡita ḡera ekiraḡi-toreato dagarana.

²⁶ Maiḡeri guruḡa ḡomi atore-vinimini tu, ḡomi ḡeḡofa-veḡitami ḡetoni tarimari akiraḡi-foforirini.

²⁷ Senaḡi ḡomi na Iauka Veaḡa ḡoḡabiato Keriso ḡenana tu nuḡami ai etanuni. Moḡa lorinai initoma vevaḡa-riba tarimana ta ḡomi bene vaḡa-ribami ḡana tu asi boḡo ura-viniani. Korana mo Iauka Veaḡa na dagara mabarari evaḡa-ribamini, ema ḡena guruḡa tu moḡoni, dia ḡofaḡofa. Moḡa lorinai evaḡa-ribamito ilailanai, Keriso nuḡanai boḡono tanu.

²⁸ Natugu, Keriso nuḡanai boḡono tanu. Be ḡia beforini ḡaronai tu nuḡara ma kokoreri ema asi beḡene maiakara ḡia ḡoiranai ḡena ḡeḡoḡoi ai.

²⁹ Bema ḡomi ma ribami Keriso gena veiḡa tu iobukaiobuka nai, boḡo ribani, ḡevei-iobuka iobukani tarimari mabarari tu Barau ḡenana ḡemaḡurito.

3

Barau natuna

¹ Goḡitaia, Tamara ḡena veuravini tu asikeikeina ḡita iatarai etoreato. Moḡesi naima ḡita ekiraḡirani Barau natuna. Moḡoni, ḡita tu ḡia natuna. Moḡa lorinai tanobara na maki asi eribarani, korana Barau maki asi ḡeribaiato.

² Ḡatagu mabarami, maitoma ḡita tu Barau natuna. Ḡita kara ai bita iaḡoni tu roḡosi bene fofori. Senaḡi ḡita ribara, Keriso beforini ḡaronai,

gita tu ġia ilailanai bita iaġoni, korana ġia tu vetoġana korikorinai bita ġitaiani.

³ Tarimarima mabarari mai tuġamaġikau ġeġabiani tu, tauġeri ġevevaġa-iarevani, korana Keriso tu asi mirona e asi vetoukauna ta.

⁴ Rakava ġeveini tarimari mabarari tu Barau ġena taravatu ġekira-fitoġaiani, korana vei-rakava tu taravatu ġekira-fitoġaiani dagarana.

⁵ Senaġi ġomi tu ma ribami, Keriso eforito korana tu, ġita ġera rakava bene ġabi-veġitari ġana. Ġia ġenai rakava ta tu asiġi.

⁶ Keriso nuġanai etanuni tarimana tu asi evei-rakava rovaġi-rovaġini. Rakava eveini tarimana na Keriso tu asi eġitaiato ema asi eribaato maki.

⁷ Natugu, ta na asi bene ġofami. Veiġa iobukaiobukari eveini tarimana tu vei-iobukaiobuka tarimana, vaġa-ilailana Keriso kavana vei-iobukaiobuka tarimana.

⁸ A vei-rakava eveini tarimana tu Diabolo ġena tarima, korana Diabolo tu tovotovona na veġata roġo evei-rakava-iaġomani. Barau Natuna eforito korana tu, Diabolo ġena ġauvei benema vaġa-rakavaia ġana.

⁹ Barau ġenana emaġurito tarimana tu asi bevei-rakava rovaġi-rovaġini, korana Barau ġena maġuri tu ġia ġenai etanuni. Ġia tu vei-rakava asi ma bevei-ġenoġoini, korana Barau tu ġia Tamana.

¹⁰ Barau natuna ema Diabolo natuna vetoġari ġeri irau tu maiġesi beġe foforini: Veiġa iobukaiobukari asi eveini tarimana ema tarikakana asi eura-vinirini tarimana tu dia Barau natuna.

Boġono veura-vevini

¹¹ Tovotovona na veġata ġoseġaġiato guruġana tu maiġesi: Ġita tata bitana veura-vevini.

¹² Ġita tu Kaino eveito kavana tu asi bitana vei. Ġia tu Satani ġena tarima. Tarina korikorina Abela evaġi-maseato. Karase nai Kaino na evaġiato? Korana ġia ġena veiġa tu rakava, a tarina ġena veiġa tu iobuka.

¹³ Tarikakagu mabarami, bema tanobara maġurinai ġetanuni tarimari na beiau-rakavamini nai, nuġami asi beġene farevaġi.

¹⁴ Ġita ribara, ġita tu mase ġenana maġuri ġenai tavanaġito. Vetoġana tu tarikakara taura-vinirini. Tarikakana asi eura-viniani tarimana tu roġo mase nuġanai etanuni.

¹⁵ Deikara tarikakana eiau-rakava-viniani tarimana tu vevaġideba tarimana. Ġomi ribami, vevaġideba tarimana nuġanai tu maġuri vanaġivanaġi asi etanuni.

¹⁶ Keriso na ġena maġuri etore-tariato, ġita bitana maġuri ġana. Monai veuravini anina bita ribaiani. Moġa lorinal ġita na maki tarikakara dairi ai ġera maġuri bitana tore-tariri neġi namo.

¹⁷ Bema tarima ta ma ġena farefare vovoka, benamo tarikakana ta beġitaiani ġena rabu ai, senaġi asi ma bevetuġa-ġwaiiani e asi bevaġa-kavaiani, kamara dabarai Barau ġena veuravini ġia nuġanai betanuni?

¹⁸ Natugu, ġera veuravini tu dia guruġa koriri ai moġo bitana kiraġiri, senaġi veiġai ema moġoni ai bitana vaġa-foforia.

¹⁹ Monana vau bita ribani, ġita tu Barau ġena guruġa moġonina na beġori-kaurani, ema Barau ġoiranai nuġara beġe kokoreni.

²⁰ Bema ġita nuġara beġe kirani, ġita tu kerere, bitana riba, Barau tu barego, a ġita nuġara tu kei, ema Barau tu dagarana mabarari ma ribana.

²¹ Gatagu mabarami, bema ġita nuġara na asi beġe kiraġi-kerererani nai tu, ġita nuġara tu ma gwadara ġesi Barau ġoiranai bita ruġa-tarini.

²² Ema bita noġiani dagarari mabarari Barau na bevinirani, korana ġena taravatu guruġari takorana-iaġirini ema Barau vaġa-iakuna veġari taveirini nai.

²³ Ġia ġena taravatu guruġana tu maġa: Ġia Natuna Iesu Keriso arana bitana vaġa-moġonia, ema ġita tata bitana veura-vevini, Keriso na taravatu guruġana evinirato ilailanai.

²⁴ Barau ġena taravatu guruġari ekorana-iaġirini tarimana tu Barau nuġanai etanuni, ema Barau maki ġia nuġanai etanuni. Barau na Iauka Veaġa evinirato, monana ġita taribani, ġia tu ġita nuġarai etanuni.

4

Iauka moġonina ema ġofaġofa iaukana

¹ Ġatagu mabarami, iauka mabarari asi boġono vaġa-moġoniri, senaġi iauka boġono ribari ġana boġono tovonagi-guineri. Ġia tu Barau ġenana ġeiaġomato ba? Korana peroveta tarimari ġofaġofari ġutuma tanobarai ġesakao-rakaoni.

² Barau Iaukana tu mai vetoġai boġo ribaiani: Iauka mabarari beġe kirani, "Iesu Keriso tu tarimarimai eiaġoto," ġia tu moġoni Barau ġenana.

³ Ma iauka mabarari asi beġe kirani, Iesu Keriso tu tarimarimai eiaġoto, tu dia Barau ġenana. Ġia tu Iesu evetari-viniani iaukana. Ġoseġaġito, ġia tu beiaġomani, ema ġia tu varau maġa tanobarai.

⁴ Natugu, ġomi tu Barau ġenana, ema ġomi na peroveta tarimari ġofaġofari ġovaġa-darererito, korana ġomi nuġami ai etanuni Iaukana seġukana na tanobara iaukari ġeri seġuka evanaġirini.

⁵ Mo peroveta tarimari ġofaġofari tu tanobara ġena, moġesi naima ġeri guruġa tu tanobara ġena dabarai ġeguruġani, ema tanobara na maki ġia ġeseġaġi-vinirini.

⁶ Senaġi ġita tu Barau ġena. Be Barau ġena tarimarima na tu beġe seġaġi-vinirani, a Barau asi ġekorana-iaġiani tarimari na tu asi beġe seġaġi-vinirani. Iauka moġonina e ġofaġofa iaukana tu mo vetoġai bita ġita-learini.

Barau tu veuravini

⁷ Ġatagu mabarami, ġita tata bitana veura-vevini, korana veuravini tu Barau ġenana eiaġomani. Eveura-vinini tarimana tu Barau ġenana emaġurito, ema ġia ma ribana Barau.

⁸ Asi ġena veuravini tarimana tu Barau asi ribana, korana Barau tu veuravini.

⁹ Barau ġena veuravini ġita ġerai tu maġesi evaġa-foforiato: Barau na Natuna ġora-ġereġa tanobara ġana etuġuato, ġia bakunai ġita bitana maġuri ġana.

¹⁰ Veuravini anina tu maġa: Dia ġita na Barau taura-viniato, senaġi ġia na ġita eura-vinirato, benamo Natuna Natuna etuġuato, ġena mase ġenana ġita ġera rakava benema voi-vagiri ġana.

¹¹ Ġatagu mabarami, Barau na ġita tu moġesina eura-vinirato nai, ġita maki tata bitana veura-vevini.

¹² Tarima ta na Barau asi eġitaiao. Senaġi bema ġita tata taveura-vevinini nai tu, Barau tu ġita nuġarai etanuni ema ġena veuravini tu ebaregoni ġita nuġarai.

¹³ Ġita ma ribara ġita tu Barau nuġanai tatanuni, ema Barau maki ġita nuġarai etanuni, korana ġia Iaukana ġita evinirato.

14 Āi na gāgaitaiato, ema tari maki gākira-vararito, Tamara na tu Natuna etuġuato tanobara ġena vevaġa-maġuri tarimanai bene iaġo ġana.

15 Bema tarima ta bekirani, "Iesu tu Barau Natuna," ġia nuġanai tu Barau ema ġia maki Barau nuġanai etanuni.

16 Ema ġita maki ribara e tavaġa-moġoniani, Barau na ġita eura-vinirani. Barau tu veuravini, ema veuravini ai etanuni tarimana tu Barau nuġanai etanuni, ema Barau maki ġia nuġanai etanuni.

17 Moġesi bita tanuni vau, Barau ġena veuravini bebaregoni ġita ġerai, benamo Kota baregona ġaronai ġita tu ma kokorera ġesi bita foforini. Korana ġita ġera maġuri mai tanobarai tu Keriso ġena maġuri ġesi ilaila.

18 Veuravini ai gari tu asi etanuni. Veuravini korikorina na gari elai-fitoġaiani. Gari ai etanuni tarimana tu vei-rakava voina garina eveini. Bema tarima ta egarini, ġia tu veuravini korikori ai roġosi bene barego.

19 Ġita taveura-vinini, korana Barau na ġita euravini-guinerato.

20 Bema tarima ta ekirani, "Au na Barau aura-viniani," senaġi tarikakana tu ebaru-viniani, ġia tu ġofaġofa tarimana. Korana bema ġia tarikakana eġitaiani, senaġi asi eura-viniani, kamara dabarai asi eġitaiani Barauna beura-viniani.

21 Keriso na mai taravatu guruġana evinirato: Barau eura-viniani tarimana na tu tari-kakana maki bene ura-vinia.

5

Ġera kokore tanobara iatanai

1 Deikara na evaġa-moġoniani Iesu tu moġoni Keriso, (Barau na ekiraġi-toreato vevaġa-maġuri tauna), ġia tu Barau ġenana emaġurito. Ema Tamana eura-viniani tarimana na tu natuna maki eura-viniani.

2 Barau taura-viniani ema ġena taravatu guruġari takorana-iaġirini nai tu, moġeri na ġita bita ribani, Barau natuna taura-vinirini.

3 Barau taura-viniani nai tu ġena taravatu guruġari takorana-iaġirini. Ġia ġena taravatu guruġari korana-iaġiri tu asi gwagġiġi.

4 Korana tu Barau natuna mabarari na tanobara ġevaġa-darereani. Ġita tu ġera veġabidadama na tanobara tavaġa-darereani.

5 Deikara na tanobara evaġa-darereani? Iesu evaġa-moġoniani ġia tu Barau Natuna etoni tarimana moġo.

Barau na ġia Natuna Iesu Keriso ekiraġi-foforiani

6 Iesu Keriso tu eiaġomato nanu na ehabatisoato, ema rarana eriġoto satauro ai. Ġia tu dia nanu ġereġana na moġo eiaġomato, senaġi nanu e rara ġerina. Iauka Vevaġa na evaġa-foforiani mai tu moġoni, korana Iauka tu moġoni.

7 Dagara tu toitoi na ġevaġa-foforiani:

8 Iauka, nanu, ema rara. Ġia toitoi ġeri guruġa-fofori tu sebona.

9 Tarimarima ġeri vevaġa-moġoni guruġari tu taġabi-raġerini, senaġi Barau ġena vevarifiu tu barego lelevaġi, korana moġa tu Barau ġena vevaġa-moġoni, Natuna evaġa-moġoniani guruġana.

10 Mo vevaġa-moġoni guruġana tu Barau Natuna ġevaġa-moġoniani tari-mari nuġari ai ġetanuni. A Barau asi ġevaġa-moġoniani tarimari na Barau tu ġofaġofa baraunai ġevaġa-iaġoani, korana Barau na Natuna evari-fiuato guruġana asi ġevaġa-moġoniani.

11 Guruġa moġonina tu maiġa: Barau na maġuri vanaġivanaġi varau evinirato, ema mo maġuri vanaġivanaġi tu ġia Natuna nuġanai.

¹² Barau Natuna eḡabi-raḡeato tarimana na maḡuri eḡabiato. A Barau Natuna asi eḡabi-raḡeato tarimana na maḡuri asi eḡabiato.

Maḡuri vanaḡivanaḡi

¹³ Maḡeri guruḡa tu ḡomi, Barau Natuna arana ḡovaḡa-moḡoniani tari-mami, atore-vinimini, korana tu boḡono riba, ḡomi tu varau maḡuri vanaḡivanaḡi ḡoḡabiato.

¹⁴ Ġita nuḡara tu maḡesi vau ma kokoreri ḡesi Barau ḡoiranai bita ruḡani, mai tu bema dagara ta ḡia ḡena ura ilallanai bita nogiani nai tu besegaḡirani.

¹⁵ Ġita ribara, ḡia na ḡera noḡinoḡi mabarari eseḡaḡirini. Ema ḡita maki ribara, bita noḡini dagarari tu bita ḡabini ḡia ḡenana.

¹⁶ Bema tarima ta tarikakana eḡitaiani vei-rakava eveiani, senaḡi mo rakava na asi bevaḡa-maseani, tu bene ḡauḡau ḡia ḡena, be Barau na maḡuri bene vinia. Moḡa tu evei-rakavani, senaḡi mo vei-rakava na asi bevaḡa-maseani tarimana akiraḡiani. Vei-rakavana ta tu mase evaḡa-ḡoraiani. Moḡa tu asi bene ḡauḡau-iaḡia atoni.

¹⁷ Veḡa ḡeḡeva-ḡeḡeva mabarari tu vei-rakava, senaḡi vei-rakava tari tu mase asi ḡevaḡa-ḡorarini.

¹⁸ Ġita ribara, Barau ḡenana ḡemaḡurito tarimari tu asi ḡevei-rakava rovaḡi-rovaḡini, korana Barau Natuna na enariḡau-ḡitakaurini, ema Diabolo na asi eḡabi-kararini.

¹⁹ Ġita ribara, ḡita tu Barau natuna, ema tanobara mabarana tu Diabolo na eḡori-kauani.

²⁰ Ġita ma ribara maki, Barau Natuna tu eiagomato, ḡia na tuḡamaḡi-faka evinirato, Barau moḡoni bitana ribaia ḡana. Ġita tu Barau moḡonina nuḡanai tatanuni, korana ḡia Natuna Iesu Keriso nuḡanai tatanuni. Iesu Keriso tu Barau moḡonina ema ḡia tu maḡuri vanaḡivanaḡi.

²¹ Natugu, barau ḡofaḡofari ḡerina boḡono veḡita.

IOANE ĜENA TORETORE VAĜA-RUARUANA

2 Ioane vaĝa-foforina guruĝari

Ioane na mai fefa tu Barau na eĝabi-viriĝiato ekalesia vavinena ma natuna ĝeri etoreato, moĝa tu betaĝu rubu ta ma ekalesiari ekiraĝirini.

Mai fefa tu laĝani 85 ma 100 fakari nuĝanai ta Ioane na etoreato, mo tu Iesu maki emaseto murinai vau.

Mai fefa nuĝanai siri baregori tu siri 9 beiaĝo 11.

Ioane na mai fefa etoreato ĝena ura tu, 1) mo ekalesia Keriso ĝena vevaĝa-ribai beĝene ruĝatari-gigitari ema vanaĝivanaĝi moĝeri vevaĝa-riba guruĝari loriri ai beĝene raka; 2) ĝofaĝofa tarimari, dia Keriso Iaukana na eĝori-iaĝomarini tarimari, beĝene ĝitari, beĝe ĝofa-darererini garina; 3) mo ĝofaĝofa tarimari ĝeiaĝomani nai tu, asiĝina ĝinavaĝi beĝene ĝabi-raĝeri etorito.

Ioane na mai fefa tu maiĝesi eboioĝaiato:

1. Vevaĝa-riba moĝonina lorina na moĝo ema veuravini ai beĝene raka - siri 1-6

2. Veiaĝa kerereri asi beĝene veiri - siri 7-13

1 Au, ekalesia ĝorikauna taugu, na mai fefa Barau na eĝabi-viriĝimito vavinemu ma natumu ĝesi atore-vinimini. Ĝomi tu nuĝagu mabarana ĝesi aura-vinimini, dia au na moĝo aura-vinimini, senaĝi guruĝa moĝonina ĝeribaĝiati tarimari mabarari na maki ĝomi ĝeura-vinimini.

2 Korana guruĝa moĝonina ĝita nuĝarai etanuni ema ĝita ĝesi betanuvanaĝi vanaĝini.

3 Tamara Barau ema Iesu Keriso, Tamara Natuna, ĝerina varevare-bara, vevetuĝaĝwa, ema maino ĝemi ai bene tanu, moĝoni ai e veuravini ai.

Guruĝa moĝonina ema veuravini

4 Au tu averere-baregoni, korana ĝoi natumu tari adoĝaririto guruĝa moĝoninai ĝetanuni nai, ĝita Tamara na ekirarato ilailanai.

5 Vavine, maitoma ĝoi anoĝimuni tu, ĝita tata bisini veura-vevini. Dia taravatu variĝuna atore-vinimuni, senaĝi mo tu tovtovona na veĝata taĝabiato dagarana.

6 Veuravini tu maiĝesi: Barau ĝena taravatu guruĝari ilailari ai bitana raka. Tovotovona na veĝata ĝoseĝaĝiati kavana, ĝia ĝena taravatu guruĝana tu veuravini ai boĝono raka.

7 Ĝofaĝofa tarimari tu ĝutuma tanobarai ĝerakao-rakaoni. Iesu Keriso tu tarimarimai eiaĝoto tu asi ĝevaĝa-moĝoniani e asi ĝekiraĝiani. Moĝesi tarimari tu ĝofaĝofa tarimari, ema Keriso ĝevetari-viniani tarimari.

8 Moĝesina nai, lorimi boĝono vetore, ĝemi vekwaraĝi ai kara ĝoĝoitaĝorito dagarari ĝomi ĝemina beĝe veĝitani garina. Namona tu ĝomi voimi mabarana boĝono ĝabi-ĝosiri.

9 Deikara na Keriso ĝena vevaĝa-riba guruĝari beraga-kwanerini, vevaĝa-riba tari beĝabi-raĝerini tarimana, ĝia ĝenai Barau asi etanuni. A deikara Keriso ĝena vevaĝa-riba guruĝari bekorana-iaĝirini tarimana tu, Tamana e Natuna tauri ruarua eĝabirito.

10 Bema tarima ta beiaĝosini, vevaĝa-riba guruĝari irauri bekiraĝirini tu, asi boĝono ĝabi-raĝea ĝemi numai, ema asi boĝono vaĝa-namoa maki.

¹¹ Korana tu bevaḡa-namoani tarimana tu mo tarima ḡena vei-rakava beḡabiani, benamo ḡia maki vei-rakava tarimanai beiaḡoni.

Guruḡa magona

¹² Au aurani guruḡa ḡutuma bara tore-vinimi, senaḡi asi aurani fefai bana toreri. Ḣegu ura tu bana iaḡosi ema ḡomi ḡesi bitana guruḡa-guruḡa, be ḡera verere bene barego-lelevaḡi.

¹³ Ḣoi tarikakamu vavinena, Barau na eḡabi-toreato vavinena, ḡia natuna na ḡeri vevaḡa-namo ḡetuḡuani ḡoi ḡemu.

IOANE ĜENA TORETORE VAĜA-TOITAINA

3 Ioane vaĝa-foforina guruĝari

Ioane na mai fefa vaĝa-toitoina tu ekalesia gwaĝigina ta arana Gaius ĝena etoreato.

Mai fefa tu laĝani 85 ma 100 fakari nuĝanai ta Ioane na etoreato, mo tu Iesu maki emaseto murinai vau.

Siri baregona tu siri 5.

Ioane na mai fefa etoreato ĝena ura tu, 1) Gaius bene launaĝia, mo tarikaka tari eĝabi-raĝerito moĝeri dairi ai; 2) Gaius bene vaĝa-ribaia, mo seĝafore tarimana arana Diotrefe tu Ioane tauĝena beiaĝoni vauro bea kira-feifeiani etato; 3) Demetrio ĝena veiĝa namori bene ĝitari etato.

Ioane na mai fefa tu maĝesi eboioĝaiato:

1. Gaius evaĝa-naĝiato - siri 1-8
2. Diotrefe ekira-rakavaiato - siri 9-11
3. Demetrio evaĝa-raĝeato - siri 12-14

¹ Au, ekalesia ĝorikauna taugu, na ĝatagu namona Gaius atore-vinimuni. Ĝoi aura-vinimuni ma nuĝagu mabarana ĝesi.

² Ĝatagu namomu, Barau anoĝiani dagara mabarari oveirini tu namo beĝene vaĝa-ĝorari ĝana, ema ĝoi maki asi bono keve-misimisi, korana au ribagu ĝoi iaukamu tu namo, be namo e iaku ai moĝo bono tanu.

³ Tarikakara tari ĝeiaĝomato, benamo kamasi ĝoi guruĝa moĝonina okorana-iaĝiani e ĝemu vetuĝamaĝikau ĝema-varifuato. Moĝeri aseĝaĝirito nai, au tu aiaku-rakavato.

⁴ Aseĝaĝini, au natugu guruĝa moĝonina ĝekorana-iaĝiani nai, ĝegu iaku e verere ĝebarego-rakavani. Dagara tari iakuri oveini maki evanaĝirini.

Gaius ĝena ĝauvei ĝevaĝa-raĝeato

⁵ Ĝatagu namomu, ĝoi tu ma ĝemu vetuĝamaĝikau mani ĝauvei oveiani nai, korana tarikakara tari ĝeri iaĝoiago ai oĝabi-raĝerini, enabe asi ribamu tarimari.

⁶ Ĝia na mai ekalesia ĝoirari ai ĝoi ĝemu veuravini ĝema-kiraĝi-foforirito. Mani ĝemu veĝa ma bono vaĝa-kavari, be ĝeri iaĝoiago beĝene iaĝo-vinia Barau ĝena ura dabarana ilailanai.

⁷ Korana tu Keriso arana dainai ĝeraka-rosito, ema ĝeri iaĝoiago ai tu asi ekalesia tarimari ĝerina kara ta asi ĝeĝabi-raĝeato.

⁸ Ĝita na tu moĝesi tarimari bitana vaĝa-kavari, korana moĝesina tu guruĝa moĝonina varifiuna uranai bita ĝauvei-vegogoni.

Diotrefe ĝena veĝa tu rakava

⁹ Fefa kubina ta ekalesia doĝorona atore-viniato, senaĝi Diotrefe bene veĝorikau etoni tarimana na au na kara akiraĝirini tu asi eĝabi-raĝerini.

¹⁰ Moĝa lorinai au baiaĝosini tu, ĝia na kara eveirini veĝari mabarari basi kiraĝi-foforirini, guruĝa rakavari ĝai ĝemai ekiraĝirini guruĝari ema eĝofaĝofani guruĝari! Dia moĝeri veĝa moĝo, senaĝi tarikakara tari ĝema-varivarini maki asi eurani bene ĝabi-raĝeri. Mo varivari bene ĝabi-raĝeri etoni ekalesiari maki ekourini ema ekalesia na etore-veĝitarini.

Demetrio ĝena veĝa tu namo

¹¹ Āatagu namomu, rakava veiġari asi bono tovotovori, senaġi veiġa namori moġo. Veiġa namori eveini tarimana tu Barau ġena tarima, a veiġa rakavari eveini tarimana tu Barau asi eġitaiato.

¹² Tarimarima mabarari ġekirani, Demetrio tu tarima namona ġetoni; Barau ġena guruġa moġonina na maki evaġa-foforiani tu tarima namona. Ġai na maki ġia tu moġesi ġakiraġiani, ema ġoi tu ma ribamu, ġai ġema guruġa tu moġoni.

Dokona guruġari

¹³ Au aurani guruġa ġutuma bara tore-vinimi, senaġi asi aurani fefai bana toreri.

¹⁴ Au ġegu tuġamaġi tu bana iaġosi, be taura ruarua tana tanu-veġoira vau tana guruġa-guruġa.

¹⁵ Maino ġemu ai bene tanu. Āatara maiġeri na ġevaġa-namomuni. Āatara maninai tata ġegu vevaġa-namo bono viniri.

IUDAS (O IUD) ĜENA TORETORE

Iudas (o Iud) vaĝa-foforina guruĝari

Mai fefa tu Iudas (o Iud), Iesu tarina, na etoreato. Mai fefa tu ekalesia mabarari ĝeri.

Iudas na mai fefa tu laĝani 65 ma 70 fakari nuĝanai ta etoreato, mo tu Iesu emaseto murinai.

Siri baregona tu siri 3.

Iudas na mai fefai ekalesia mabarari ekirarito, 1) ĝeri veĝabidadamai beĝene ruĝa-gwaĝiĝi; 2) beĝene venari, apostolo ĝofaĝofari na beĝe ĝofa-veĝonurini garina; 3) Barau ĝena vevaĝa-riba guruĝari beĝene korana-iaĝiri. Iudas na mai fefa tu maĝesina eboioĝaiato:

1. Veĝabidadama na ĝeveĝitani tarimari ĝeri veĝa - siri 1-16

2. Veĝabidadama beĝene ĝabi-gwaĝiĝia - siri 17-23

¹ Au Iudas, Iesu Vereĝauka ĝena vetuĝunaĝi tarimagu, ema Iakobo (o James) tarina, ĝeguna mai fefa eiāĝosini. Ĝomi Barau na ekeamito tarimami, Tamara Barau na eura-vinimini ema Iesu Keriso na eĝita-ĝaumini tarimami, atore-vinimini.

² Vevetuĝaĝwa, maino, ema veura-vini na boĝono vonuvonu-raĝe.

Vevaĝa-riba tarimari ĝofaĝofari

³ Ĝatagu mabarami, ĝegu ura baregona ĝera vevaĝa-maĝuri dabarana guruĝana bana tore-vinimi atato, senaĝi au na aĝitaĝiato, namona tu ĝegu fefai bana launaĝimi, Barau ĝena vevaĝa tarimari evinirito veĝabi-dadamana boĝono ĝabi-gigitaria.

⁴ Korana tarima kotari, Barau asi ĝekorana-iaĝiani tarimari, tu vekure-toĝai ĝomi fakami ai ĝerakatoĝa-ĝairito. Maniĝeri tarima na tu ĝita ĝera Barau ĝena varevare-bara ĝeĝabiani, ĝia ĝeri veĝa rakavari beĝene veiri ĝana dabaranai ĝevaĝa-iaĝoani, ema Iesu Keriso ĝera Vereĝauka e Vere Baregona sebona kwariĝutu moĝo ĝekira-fitoĝaiani. Barau na kai-veĝata ĝena bukai etore-vanaĝiato, ĝeri rakava voiri beĝe doĝaririni.

⁵ Ĝomi Buka Vevaĝa variri mabarari ĝoriba-guinerito, senaĝi aurani ma navaĝa-riba ĝenogoi, Vereĝauka na Isaraela tarimari tu aĝesina evaĝa-maĝuririto Aigupito tanona na, senaĝi murinai asi ĝevaĝa-moĝoniato tarimari tu ma evaĝi-maserito.

⁶ Aneru tari maki ĝotuĝamaĝiri, ĝeri dagi korikori asi ĝeĝabi-gwaĝiĝirito, ema ĝeri tanu ĝabuna ĝeraĝa-kwaneato. Moĝa lorinai Barau na mukuna ĝabunai etorerito, tanu-vanaĝivanāĝi seiniri na ebaru-taririto, ĝena Kota baregona ĝarona ĝana.

⁷ Sodoma e Gomora, ema seviri ai taoniri asi boĝono tuĝarekwari. Moĝeri tarima ĝeri veĝa maki aneru ĝeveito veĝari kavana ĝeveirito, ĝemata-boraĝato e veĝa boraĝari ĝeveito, benamo tanu-vanaĝivanāĝi karavana na eĝararito, mo tu ĝita ĝera ĝitaĝita ĝana.

⁸ Moĝesi veĝa ilailanai, mo nuvi tarimari na maki tauĝeri tauĝaniri moĝesi ĝevaĝa-rakavarini; Barau ĝena maoro ĝekira-fitoĝaiani, ema iauka baregori ĝevei-veĝare veĝarerini.

⁹ A Maikolo, aneru mabarari ĝeri vere ta, Diabolo ĝesi ĝevevaneto, Mose tauĝanina dei na bene ĝabia ĝaramanai nai, Maikolo na Diabolo guruĝa

rakavari na asi evaneato, senaġi ekiraiato, “Vereġauka na bene kira-feimu!” etato.

¹⁰ Senaġi moġeri tarima tu asi ġetuġamaġi-maġatarini dagarari ġevei-veġare veġarerini; ema ġeri vemamiraġi ai ġeribarini dagarari bai kavari, moġeri dagara na ġia ġevaġa-rakavarini.

¹¹ Vetuġari kika! Ġia tu Kaino ġena veġa beġe ġabia. Balam ekerereto kavana farefare boruri ragari beġe vei. Kora eseġa-foreto e tauġena evevaġa-rakavato kavana ġia maki beġe seġafore e tauġeri beġe vevaġa-rakava.

¹² Moġeri tarima ġomi ġemi ġanivegogo ġoveirini nai, ġia tu miro noġa ġomi fakami ai. Ġia tauġeri moġo ġevetuġamaġikauni. Ġia tu magube asi ġurari, iavara na eġwa-rakaorakao-kavarini kavana. Ema ġau korukoru meramerai maki asi ġwaġwana kavana, ma ġokaġokari ġelau-raġerini, ġemase-vaġa-ruaruani.

¹³ Ġia tu davara ureureri na kaburo-buro ġefoforini noġa, ġeri maiaka veġari ġefoforini. Ġia tu ġeri dabara ġeraga-kwanerito visiguri kavana, Barau na mukuna furufuru gabuna ġeri etoreato etanu-vanaġi vanaġini.

¹⁴ Adamu besena vaġa-imaima ruaruana (7), Enoka, ġia na moġeri tarima eperoveta-iaġirito, ekirato, “Goboġe, Vereġauka tu mai eiaġomani ma ġena aneru veaġari asi gadaragadara ġesi,

¹⁵ tarimarima mabarari vevaġa-maoro bene viniri ġana. Barau asi ġekorana-iaġiani tarimari ġeri rakava nuġanai Barau asi ġekorana-iaġiani veġari ġeveirini, ema vei-rakava tarimari, Barau asi ġekorana-iaġiani tarimari, na Barau guruġa rakavari ġeviniato, mabarari ġeri vei-rakava voina bene kiragiri ġana.”

¹⁶ Moġeri tarima tu mugumuġu e veroritore moġo ribari. Ġia tu ġeri ura rakavari ġeiaġo-vinirini, tauġeri ġevevaġa-raġeni ema tarima tari ġevaġa-namo ġofa-kaurini ġia tauġeri namo beġene doġari uranai.

Velaunaġi guruġari

¹⁷ Senaġi ġomi, ġatagu mabarami, ġera Vereġauka Iesu Keriso ġena apostolo na ġevaġa-guruġamito guruġari boġono tuġamaġi-taġori.

¹⁸ Ġevaġa-guruġamito, ġekirato, “Ġaro dokori ai vei-veġareveġare tari-mari beġe foforini, Barau muriri ai beġe toreani, benamo ġeri ura rakavari beġe iaġo-vinirini.”

¹⁹ Moġeri tarimarima na ġomi fakami ai vetavi-kirakira ġevaġa-ġoraiani. Ġia tu ġeri ura rakavari na ġeguine-iaġirini. Iauka Veaġa ġia ġeri ai maki asiġi.

²⁰ Senaġi ġomi, ġatagu mabarami, ġemi veġabidadama veaġana boġono ġabi-gigitaria, ma iatanai ġemi maġuri boġono tore-varaġea. Iauka Veaġa seġukanai boġono ġauġau.

²¹ Barau ġena veuravini nuġanai boġono tanu ema ġera Vereġauka Iesu Keriso ġena vevetuġaġwa boġono naria, korana ġena vevetuġaġwai maġuri vanaġivanaġi bevinimini.

²² Ġetuġamaġi-iauvoiauvoni tarimari boġono vetuġaġwari.

²³ Tarima kotari karava nuġana na boġono inu-vaġiri, boġono vaġa-maġuriri. Ma kotari boġono vetuġari, senaġi ma garimi ġesi, ġeri miro na beġe vaġa-rakavamini garina.

Barau vaġa-raġena ġuriġurina

²⁴ Barau na benarimini riba, benamo asi boĝo ketoni, ema ĝia ĝena mareva baregonai bea toremini asi vetoukaumi e ma iakumi ĝesi.

²⁵ Ĝita ĝera Barau sebona, ĝera Vereĝauka Iesu Keriso bakunai evaĝamaĝurirani Barauna, bitana vaĝa-raĝea. Ĝia tu iaru-korokoro ma marevana baregona, kokore e seĝuka mabarana tu ĝia ĝena, toma bene iaĝo vanagivanaĝi! Amen.

APOKALUPO

Apokalupo vaġa-foforina guruġari

Apokalipsis (o Apokalupo) Grik garo ai anina ta tu “vevaġa-fofori”. Mai buka tu Ioane na etoreato ekalesia doġorori imaima ruarua (7) ema Iesu ġevaġa-moġoniani tarimari tanobara mabaranai ġetanuni tarimari ġeri.

Ioane na mai Apokalupo bukana tu motumotu tai arana Patmos ai ediburato-ġoi nuġanai etoreato. Mai buka tu laġani 90 ema 96 fakari nuġanai ta etoreato, mo tu Iesu maki emaseto murinai vau.

Siri baregori mai Apokalupo bukana nuġanai tu karoa 1:19; 21:5.

Iesu na Ioane ekiraiato, mai buka etoreato korana tu, Iesu ġena ura kara ġoirai dori ġeġorani dagarari tarimarima na beġene ribari. Mai buka Ioane na etoreato korana tari tu, 1) Keriso Iesu Vereġauka ġena ġauvei irauirauri tata bene vaġa-foforiri ġana uranai; 2) Asia Keina (o Minor) ai ekalesia doġorori imaima ruarua (7) moġeri bene kirari, e bene launaġiri, ema ġevei-rakavato-ġoi nai bene kira-feifeiri ġana; 3) Genese ai vevaġa-maġuri boioġana Barau na ekiraġiato moġa dokona bemoġonini e bevetore-korikorini bene vaġa-fofori ginikaua ġana.

Ioane na mai Apokalupo bukana tu maiġesi eboioġaiato:

1. Keriso Barau na mareva baregona eviniato varina - karoa 1
2. Keriso vetuġunaġi ġauveiri maitoma eveirini - karoa 2-3
3. Keriso ġena kokore varina - karoa 4-22

Ioane ġena mata-vanaġi guruġari

¹ Mai toretore maiġa tu Iesu Keriso ġenai Barau na kara evaġa-foforiato guruġana. Barau na eviniato, korana tu eurato, Iesu na ġena vetuġunaġi tarimari dori moġo ġeġorani dagarari bene vaġa-ribari ġana. Keriso na aneru etuġuato, ġena vetuġunaġi tarimana Ioane evaġa-ribaiato.

² Ioane na Barau ġena guruġa ema Iesu Keriso ġena vevarifiu eġitarito dagarari mabarari evari-fiurito.

³ Mai peroveta guruġari beiaviani tarimana tu bevererani, ema mai peroveta guruġari, Ioane na etorerito maiġeri, beġe seġaġirini ema beġe korana-iaġirini tarimari maki beġe vererani. Korana mai dagara mabarari beġe ġorani ġarona tu varau beraġasi-rakava.

Ioane ġena vevaġa-namo guruġana ekalesia doġorori imaima ruarua (7) ġeri

⁴ Au Ioane, Asia tanobaranai ekalesia doġoromi imaima ruarua (7) atorevinimini: Varevare-bara e maino tu gomi ġemi ai bene tanu. Mo varevare-bara e maino tu etanuni, etanuto, ema ma beiaġomani Barauna ġenana eiaġomani, ema iauka imaima ruarua (7) Barau ġena terona ġoiranai ġeruġani ġerina eiaġomani,

⁵ ema Iesu Keriso ġenana eiaġomani. Ġia tu Barau ġena guruġa evaġa-moġoniani ema evaġa-foforiani ma vetuġamaġikauna ġesi. Ġia tu mero guinena mase na evariġisi-ġenoġoito, ema ġia tu tanobara vereri mabarari ġeri Vere.

Ġia na eura-vinirani e ġera rakava rarana na eġuriġi-fitoġarito,

⁶ benamo Barau ġena Basileia doġorona tarimarai evaġa-iaġorato, ema Rubu Veaġa vereri ai evaġa-iaġorato, ġia Tamana e ġena Barau vetuġunaġina bitana iaġo-vini ġana. Ġia ġenai mareva baregona e seġuka bene tanu vanaġivanaġi! Amen.

⁷ Ĝoĝitaia, ĝia tu magube nuĝana na eiaĝomani, mata mabarari na beĝe ĝitaiani, ĝegwanuato tarimari na maki. Ema tanobara tarimari mabarari ĝia koranai beĝe taĝi-rakavani. Mo tu moĝoni. Amen.

⁸ Vereĝauka Barau ekirani, “Au tu Alefa ema Omega, (giniguinena ema dokona), atanuni, atanuto, e ma baiaĝomani, Iaru-korokoro Barauna.”

Keriso Ioane ĝenai eforito

⁹ Au Ioane, ĝomi tarikakami ema Vereĝauka ĝena ĝauvei tavei-vegogoani tarimagu. Au tu ĝomi ĝesi Iesu ĝena maĝuri nuĝanai tamidigu-midigu sebonani, e Barau ĝena Basileia nuĝanai tatanu-sebonani, ema meto nuĝari ai tavevaĝa-gwaĝiĝini e taruĝa-gwaĝiĝini. Au Barau ĝena guruĝa aĝobata-iaĝiani ema Iesu varina guruĝari avaĝa-moĝonirini e akiraĝi-foforirini ĝaramanai tu, Patmos motumotunai ĝea tore-raga-kwaneguto.

¹⁰ Vereĝauka ĝena ĝaro ai Barau Iaukana na eborogiguto, benamo murigu ai garo baregona ta noĝa moĝo dudu guruna kavana aseĝaĝiato.

¹¹ Mo garo tu maĝesina ekirato: “Kara boĝitarini dagarari bukai bono tore-vanaĝiri, benamo mai ekalesia doĝorori imaima ruarua (7) maĝeri ĝeri bono tuĝu-iaĝori: Efeso, Smena, Pegamo, Taiatira, Sadis, Filadelfia ema Laodikea ĝeri.”

¹² Aruĝa-kureto, deikara na au evaĝa-guruĝaguto naĝitaia ĝana, benamo au na golo na lamefa torekauri ĝeveirito dagarari imaima ruarua (7) aĝitarito.

¹³ Mo lamefa torekauri dagarari vekaravari ai tu tarima ta noĝa moĝo Tarimarima Natuna kavana, ĝena dabuĝa tu mauka kenene evarigoto mo kwakuna fanafanana, ema kobana tu golo beletana na etore-ĝeĝeraĝiato.

¹⁴ Ĝia debana ema ĝuina tu kurokuro vulu kavana, snou noĝa kuro-ĝarogaro, ema matana tu karava moreri noĝa moĝo ekimore-kimoreato-ĝoi.

¹⁵ Ĝia kwakuna fanafanana tu auri boraborari karava na ĝegaburini, benamo ĝevei-ginikaurini nai ĝeveĝia-veĝiani kavana. Ma garona tu ĝaruka vovoka ĝeĝaru-gwadani gururi kavana.

¹⁶ Ĝia ĝimana aroribanai tu visiĝu imaima ruarua (7) eĝabirito, ma bokana na tu vetari baĝana matana reketi-reketa raga-rakava-rakava eraka-rosito. Ĝia ĝoirana ĝitaĝitana tu ĝaroĝota kirikiri, ĝaro etorani mamana kavana.

¹⁷ Au na aĝitaiato nai, kwakuna koranai aketo-tarito mase tarimana ta noĝa moĝo. Benamo ĝia ĝimana aroribana au iatagu ai etore-kauato, bona ekirato, “Asi nogari! Au tu giniguinena ema dokona.

¹⁸ Au tu maĝuri atanuni. Amaseto, senaĝi toma au tu maĝuri batanu-vanaĝi vanaĝini. Ema Mase e mase tarimari iaukari ĝetanuni Gabuna (o Hades) kina tu au ĝegu ai.

¹⁹ Moĝesina naima mai oĝitarini dagarari mabarari bono tore-vanaĝiri, mai tu initoma ĝetanuni dagarari ema ĝoirai vauro beĝea ĝorani dagarari.

²⁰ Mai visiĝu imaima ruarua (7) au ĝimagu aroribanai boĝitari ema lamefa torekauri dagarari golo na ĝeveirito imaima ruarua (7) anina vekuretoĝana tu maĝa: Visiĝu 7 tu ekalesia doĝorori 7 ĝeri aneru. Ma golo na lamefa torekauri ĝeveirito dagarari 7 tu ekalesia doĝorori 7.”

2

Vevaĝa-riba guruĝana Efeso ai ekalesia doĝorona ĝena

¹ “Efeso ai ekalesia doĝorona ĝeri aneru tu maĝesi bono tore-vinia:

Gimana aroribanai visiḡu imaima ruarua (7) eḡabi-taḡorini ema golo na lamefa torekauri ḡeveirito dagarari 7 vekaravari na erakaoni tarimana ḡena guruḡa tu maḡeri.

² Gōi ḡemu veiḡa namori, ḡemu ḡauvei nuḡanai ḡemu vekwaraḡi ema ḡemu vevaḡa-gwaḡiḡi tu au ma ribagu. Ema au ribagu, tarima rakavari ḡoi na asi boḡabi-raḡerini, ema asi apostolo tarimari, senaḡi tauḡeri moḡo apostolo tarimari ai ḡevevaḡa-iaḡoni tarimari, maki ḡoi na otovo-naḡirito, benamo oribarito ḡia tu ḡofaḡofa tarimari.

³ Au aragu ḡaramanai meto oḡoitaḡoto, senaḡi ovevaḡa-gwaḡiḡito ema okokoreto, asi kota maki oruḡa-moirato.

⁴ Senaḡi mai dagara sebona moḡo ḡemu ai asi aura-viniani: Tovotovonai ḡemu veuravini baregona au ḡegu ai otoreato-ḡoi, moḡa tu oiaḡuiato.

⁵ Bono tuḡamaḡi-ḡenoḡoi, ḡoi tu kamasi oḡabi-raḡeguto, ma boketo tu ainai mani boa raḡasi! ḡemu rakava ḡenana bono vetuḡamaḡi-kure, be tovotovonai oveirito-ḡoi veiḡari ma bono veiri. Bema asi bovetuḡamaḡi-kureni ma asi boraka-kureni nai, au tu baiaḡosini, benamo ḡemu lamefa vaḡa-ruḡakauna dagarana gabuna na basi ḡabi-veḡitaiani.

⁶ Senaḡi ḡoi ḡemu namo tu Nikolaita tarimari ḡeri veiḡa rakavari asi oura-vinirini. Moḡeri veiḡa tu au na maki asi aura-vinirini.

⁷ Ma seḡana tarimana na Iauka Veaḡa na ekalesia doḡorori kara ekiravara-vinirini guruḡari tu bene seḡaḡiri. Bekokoreni tarimana tu au na maoro baviniani, ḡia maḡuri ḡauna, Barau ḡena paradaiso ai etubuni dagarana, ḡwawana beḡaniani.”

Vevaḡa-riba guruḡana Smena ai ekalesia doḡorona ḡena

⁸ Smena ai ekalesia doḡorona ḡeri aneru tu maḡesina bono tore-vinia:

“Giniguinena ema dokona, e emaseto benamo ma emaḡuri-ḡenoḡoito tarimana ḡena guruḡa tu maḡeri:

⁹ Gōi meto ema midigumidigu oḡoitaḡoni au ma ribagu, ema asi ḡemu asi ḡamu maki au ma ribagu. Senaḡi moḡoni veḡata ḡoi tu farefare vovoka tarimamu! Mani tauḡeri moḡo ḡevetiriraḡini Iuda tarimari ḡetoni tarimari na ḡoi iatamu ai guruḡa rakavari ḡekiraḡirini guruḡari tu au ma ribagu. ḡia tu dia Iuda tarimari korikori, a ḡia tu Satani ḡena doḡoro tarimari.

¹⁰ Gōirai midigumidigu tari dori oḡoitaḡorini, senaḡi mo midigumidigu gariri asi bono vei. Bono ḡitaia, ḡomi kotari tu Diabolo na betovo-naḡimini, be diburai betoremini, benamo monai ḡaro gabanana (10) boḡo midigu-midiguni. Monai maki enabe bomaseni, senaḡi ḡemu vetuḡa-maḡikau au ḡegu ai tu bene tanu. Moḡesina boveini nai tu, maḡuri koronana bavinimuni.

¹¹ Ma seḡana tarimana na Iauka Veaḡa na ekalesia doḡorori kara ekiravara-vinirini guruḡari bene seḡaḡiri. Bekokoreni tarimana tu mase vaḡa-ruaruana na asi bevaḡa-rakavaiani.”

Vevaḡa-riba guruḡana Pegamo ai ekalesia doḡorona ḡena

¹² “Pegamo ai ekalesia doḡorona ḡeri aneru tu maḡesina bono tore-vinia:

ḡena vetari baḡana matana reketa-reketa ma ragari tarimana ḡena guruḡa tu maḡeri:

¹³ Au ribagu ḡoi ainai otanuni. Gōi tu Satani ḡena vere seana evaḡa-ruḡa-tariato vanuḡanai otanuni. Senaḡina ḡoi na au aragu tu ma moḡonimu ḡesi okorana-iaḡiani, ḡemu veḡabidadama au ḡegu ai maki asi veḡata oraga-kwaneato. Antipas ḡomi ḡemi vanuḡa baregona nuḡanai ḡevaḡi-maseato

g̃aronai maki, g̃oi g̃emu veḡabidadama tu asi oraga-kwaneato. Antipas tu ma vetuḡa-maḡikauna g̃esi au varigu evaḡa-moḡoniato-g̃oi ema ekiraḡi-foforiato-g̃oi. Satani tu mani g̃omi g̃emi vanuḡa baregona nuḡanai etanuni.

14 Senaḡi dagara tari g̃oi g̃emu ai manigeri au na tu asi aura-vinirini. Tarima kotari g̃oi rekemu ai manigeri tu Balam ḡena vevaḡa-riba veḡari roḡo ḡekorana-iaḡirini. Balam na vevaḡa-riba kerereri Balak eviniato nai, Isaraela tarimari eḡorikau-darererito, bena rakava ḡeveito, kwaivakuku ḡevinirito bureḡari ḡeḡanirito ema mata-boraḡa veḡari ḡeveirito-g̃oi.

15 Moḡa kavana g̃oi rekemu ai tarima kotari manigeri maki Nikolaita doḡoro tarimari ḡeri vevaḡa-riba ḡofaḡofa veḡari ḡekorana-iaḡirini.

16 Ḡovetuḡamaḡi-kure! Bema asiḡina nai tu, au g̃oi g̃emu ai baiaḡosi-ḡarimoḡini, benamo vetari baḡana au murugu ai mainana basi vaḡa-vevaḡirini.

17 Ma seḡana tarimana na Iauka Veaḡa na ekalesia doḡorori kara ekiravara-vinirini guruḡari bene seḡaḡiri. Bekokoreni tarimana tu, au na mana baviniani. Mai mana maḡa toma tu vekuretoḡa etanuni. Ema ḡia tu au na fore kurokurona ta baviniani. Mo fore kurokurona iatanai tu ara variḡuna ta etoreato, mo tu ta asi beribani, begabiani tarimana na moḡo beribaiani.”

Vevaḡa-riba guruḡana Taiatira ai ekalesia doḡorona ḡena

18 “Taiatira ai ekalesia doḡorona ḡeri aneru tu maḡesina bono tore-vinia:

Barau Natuna, matana tu karava moreri noḡa moḡo kimorekimore, ma kwakuna fanafanari tu auri boraborari karava na ḡegaburini, benamo ḡevei-ginikaurini nai ḡeveḡia-veḡiani kavana, ḡena guruḡa tu maḡeri:

19 Gemu ḡauvei, ḡemu veuravini ema veḡabidadama, ḡemu vetuḡunaḡi iaḡovini ema vevaḡa-gwaḡiḡi, ema toma ḡauvei oveiani tu barego lelevaḡi, tovotovonai oveirito-g̃oi moḡeri tu ovanag̃irini. Moḡeri mabarari aḡita-iaḡomarini, be ribagu.

20 Senaḡi mai dagara sebona g̃oi g̃emu ai maḡa tu asi veḡata aura-viniani. G̃oi tu Iesebel, tauḡena moḡo evekiraḡini peroveta vavinena etoni maḡa, g̃oi na tu oḡabi-raḡeani. Mani vavine ḡena vevaḡa-riba na au ḡegu vetuḡunaḡi-iaḡovini tarimari ḡemata-boraḡani ema kwaivakuku ḡevinirini bureḡari ḡeḡanirini.

21 Au na ḡia tu ḡena taimi aviniato, mo mata-boraḡa veḡari na bene vetuḡamaḡi-kure ḡana. Senaḡi ḡia tu asi veḡata eurani bene vetuḡamaḡi-kure.

22 Moḡa lorinai ḡia tu genagena gabunai bafiu-kauani, monai bea midigu-midiguni. ḡia ḡesi veḡura-vanaḡi veḡari ḡeveini tarimari maki ḡia ḡesi midigumidigu baregona beḡe ḡabi-sebonaiani. Bema ḡia Iesebel ḡena veḡura-vanaḡi veḡari na asi beḡe vetuḡamaḡi-kureni nai tu, mo midigu-midigu beḡe ḡabiani.

23 ḡia natuna maki au na bavaḡi-maserini. Benamo monana ekalesia doḡorori mabarari beḡe ribani, au tu tarimarima nuḡari iaḡasiri ema ḡeri tuḡamaḡi aragaḡirini tarimagu. Ema ḡomi tata maki ḡemi veḡa ilailari ai voimi bavinimini.

24 Gomi Taiatira ai ekalesia kotari tu Iesebel ḡena vevaḡa-riba rakavari asi ḡokorana-iaḡirini ema Satani ḡena iaunega vekuretoḡari, dobudoburi ḡekiraḡirini, tu asi ḡoribarini. Ḡomi mani ḡemi tu avaga-guruḡa korikorimini, ḡemi ai meto ta tu asiḡina ḡinavaḡi batore-kauani.

²⁵ Dagara baregona tu, mani kara ġemi ai maniġa, moġa boġono ġabi-gigitarja mo, au bana ġenoġoi-iaġoma.

²⁶ Bekokoreni ema au ġegu ura bekorana-iaġiani mo magona bea ġabiani tarimana tu, au na maoro baviniani, tanobara beseri beguine-iaġirini.

²⁷ Ġia na tanobara beseri tu auri togoina na beġori-kaurini ma seġukana baregona ġesi, ma tano ġurori noġa bekwari-kira kirarini. Au na ġia seġuka baviniani, Tamagu ġenana seġuka aġabiato ilailanai.

²⁸ Ema ġia tu au na laġani visiguna baviniani, (mo seġuka vetoġana).

²⁹ Ma seġana tarimana na Iauka Veaġa na ekalesia doġorori kara ekiravara-vinirini gurugari bene seġaġiri.”

3

Veaġa-riba guruġana Sadis ai ekalesia doġorona ġena

¹ “Sadis ai ekalesia doġorona ġeri aneru tu maiġesina bono tore-vinia:

Barau Iaukana imaima ruarua (7) ġia ġenai ġetanuni ema visigū imaima ruarua (7) eġabi-taġorini tarimana ġena guruġa tu maiġeri: Ġoi na ġauvei oveirini tu au ma ribagu. Tarimarima na ġoi ġekiraġimuni, ġekirani, “Mani ekalesia tu maġuri” ġetoni, senaġi korikorina ġoi tu mase otanuni.

² Notataġa, ġemu ai veġabidadama maġurina kotuna moġo dori emasevaġini maniġea novaġa-kokorea. Korana au na ġoi ġemu ġauvei aġoitaġoato dia roroġoto au ġegu Barau ġoiranai.

³ Moġesina naima Vari Namona ġoseġaġiatio ma ġoġabi-raġeato maniġa boġono tuġamaġia ema boġono korana-iaġia, be ġemi rakava ġerina ġovetuġamaġi-kure. Bema asi botataġani nai, au ġemu ai noġa moġo lema tarimana ta kavana baiaġosini. Be kamara taimi ai basi raġasini, moġa tu asi kota maki boribaiani.

⁴ Senaġi ġoi ġemu tarima kotari Sadis ai maniġeri, ġeri dabuġa asi kota maki ġevaġa-miro-kararito. Ġia maniġeri tu au ġesi baġa rakao-rakao vegogoni, ma dabuġa kurokurori baġa rigorini, korana ġia ġeri veġa tu iobukaiobuka bene.

⁵ Bekokoreni tarimana tu ġia kavari dabuġa kurokurori na bavaġa-dabuġaiani. Au na ġia arana maġuri bukana na asi barumu-fitogaiiani, a au Tamagu ma ġena aneru ġesi ġoirari ai ġia arana bakiraġi-foforiani.

⁶ Ma seġana tarimana na Iauka Veaġa na ekalesia doġorori kara ekiravara-vinirini gurugari bene seġaġiri.”

Veaġa-riba guruġana Filadelfia ai ekalesia doġorona ġena

⁷ “Filadelfia ai ekalesia doġorona ġeri aneru tu maiġesina bono tore-vinia:

Davida ġena ki, (vevaġa-maġuri kina), eġabi-taġoani tarimana, tarima veaġana ema moġoni korikorina. Ġia na kara bekeo-fakaiani, tarima ta na asi ma bekou-ġauani riba, ema bekouani dagarana ta na asi ilaila ma bekeoani riba. Mai tarima ġena guruġa tu maiġesina:

⁸ Ġoi ġemu ġauvei oveirini au ma ribagu. Noboġe, ġoiramu noġitaia, ġoi ġoiramu ġatama bokana tu bakeo-fakaia, ma tarima ta asi ġena seġuka ma bekouani. Au ribagu ġoi ġemu kokore tu misina moġo, senaġi au ġegu guruġa tu oġabi-gigitariato, ema au aragu maki asi okira-ġuniġauato.

⁹ Bono ġitaia, mani Satani ġena rubu tarimari maniġeri tu taugeri ġevkiraġini Iuda tarimari ġetoni, senaġi ġia tu dia Iuda tarimari. Ġia maniġeri tu au na baġabi-iaġosirini, ġoi kwakumu koranai beġeasi tutuġu-tarini. Benamo beġe riba-maoroni, ġoi tu au na aura-vinimuni.

10 Ġoi tu au ġegu vevaġa-naġi guruġari okorana-iaġirito ma ovevaġa-gwaġiġito naima, tanobarai veribaġani taimina bevtotuni nai, ġoi tu baġitaġau-ginikaumuni. Mo veribaġani na tu mai tanobara iatanai ġetanuni tarimari mabarari batovo-naġirini.

11 Au tu dori iaġosini. Kara oġabiato maniġa tu bono ġabi-gigitaria, be tarima ta na ġemu korona, ġemu kokore auna, asi bene ġabia.

12 Bekokoreni tarimana tu au Tamagu ġena Rubu Veaġana duġuna tarimanai bavaġa-iaġoani. Mo ġabu asiġina ġinavaġi ma beiaġuiani. Au na ġia ġenai au ġegu Barau arana ema au ġegu Barau ġena vanuġa baregona o siti arana baberaiani. Ierusalemata variġuna tu au ġegu Barau ġena siti, ma mai siti maiġa tu guba na au Tamagu ġenana bemariġoni. Au aragu variġuna maki ġia ġenai batoreani.

13 Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġiri.”

Veavaġa-riba guruġana Laodikea ai ekalesia doġorona ġena

14 “Laodikea ai ekalesia doġorona ġeri aneru tu maiġesina bono tore-vinia: Guruġa moġoni korikorina ekiraġiani tarimana arana Amen ġenana eiaġosini. Ġia tu ma ġena vetuġamaġikau e Barau ġena guruġa evaġa-moġoni korikoriani ema ekiraġi-foforiani tarimana, ema Barau na eveirito dagarari mabarari ġenana ġeiaġomato tarimana ġena guruġa tu maiġeri:

15 Ġoi ġemu ġauvei oveirini au ma ribagu. Au ribagu, ġoi tu dia faraka ema dia seġuka. Au ġegu ura sebona ġoi tu boro faraka moġo o boro seġuka moġo!

16 Senaġi ġoi tu seġuseġu, a dia seġuka moġo o dia faraka moġo. Moġesina naima ġoi tu au bokagu na bakanunu-fitoġamuni.

17 Ġoi tu okirani, ‘Au tu ġegu farefare vovoka tabutabu, ġegu-ġagu ġutuma gorogoro bavaġa-vegogori, be au tu ilaila, kara ta asi ma atuġamaġiani.’ Senaġi ġoi tu asi oriba-maoroni ġoi tu madi kekei ma vetuġamu, asi ġemu asi ġamu, ġoi tu mata-bubu ema asi dabuġamu, korimu.

18 Au na ġoi asisiba-vinimuni, akiramuni, au ġeguna golo bono voi. Korana auna golo tu karava na evaġa-veveato, benamo momori mabarari tu ġeia-revarito. Be au ġegu ai mai golo bovoiani nai tu, botagani. Ema dabuġa kurokurori maki bono voi, be bono vedabuġa-iaġi, kefimu korina maiakana bono kou-ġaua. Ema mata muramurana maki bono voi, be matamu ai bono torea, bena bono boġeboġe.

19 Au na aura-vinirini tarimari tu akira-feirini ema atoto-maororini. Moġesina naima ġemu maġuri ema veiġa bono tuġamaġi-ginikaua, benamo bono vetuġamaġi-kure ma bono raka-kure.

20 Noseġaġi! Au ġatama-bokai aruġa-taġoni ma afidifidini. Bema tarima ta na au garogu beseġaġiani, benamo ġatama-boka bekeo-fakaiani nai, au baraka-toġani, benamo ġia ġesi baġa ġaniganini ema ġia maki au ġesi beġaniġanini.

21 Bekokoreni tarimana tu au na maoro baviniiani, au ġesi ġegu teronai baġa tanuni. Au kavana, au akokoreto nai Tamagu ġena teronai Tamagu ġesi ġatanuni.

22 Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġi.”

¹ Maiğa murinai au aboĝe-iaĝoto tu, ĝatama-boka vekeofaka-taĝo guba vanuĝanai aĝitaiato. Benamo garo ta kibi guruna noĝa, mo tovotovonai aseĝaĝiato garona moĝa ekirato, “Maiĝana noma raĝe, be maiĝa murinai kara dori ĝeĝorani dagarari nama vaĝa-ĝitamu.”

² Asikauna Iauka Veaĝa na eborogiguto, benamo ĝoiragu ai tu tarima ta guba teronai etanu-taĝoto-ĝoi aĝitaiato.

³ Mo teronai etanu-taĝoto-ĝoi tarimana vetoĝana tu fore arana iaspa ĝekimore-kimorerini marevari, ema fore kakakakari arana kanelia marevari kavana, marevana tu irau moĝo. Ma mo terona tu kevau na eĝeĝeraĝiato. Mo kevau vetoĝana tu noĝa moĝo emeral forena kavana.

⁴ Mo terona moĝa tu terona gabana ruarua ma vasivasi (24) na ĝetore-ĝeĝeraĝiato. Ma mo terona 24 ai tu veĝitaĝau tarimari baregori tata ĝetanuto. Ĝia mabarari tu dabuĝa kurokurori moĝo ĝerigoto, ema tata debari ai tu golo koronari sebori sebori ĝeveito.

⁵ Mo terona monana kiriku ekimoreato-ĝoi, garo baregori ema ĝaita eragato-ĝoi. Ma mo terona ĝoiranai tu lamefa imaima ruarua (7) ĝeĝarato-ĝoi. Mo lamefa ĝeĝarato-ĝoi moĝeri, mo tu Barau iaūkana imaima ruarua (7).

⁶ Ema mo terona ĝoiranai maki davara veĝiaveĝiana, nega-vaĝuravaĝura asia kavana.

Ma maĝuri dagarari vasivasi (4) tu nuĝana buroburonai, mo terona ĝeruĝa-ĝeĝeraĝiato. Ĝia ĝoirari ema muriri tu matari tu ĝutuma.

⁷ Mo maĝuri dagarana guinena tu noĝa moĝo laion, vaĝa-ruaruana dagarana tu noĝa moĝo boromakau tauna, vaĝa-toitoina ĝoirana tu tarimarima kavana, ema vaĝa-vasivasina tu noĝa moĝo erovoni ugavana kavana.

⁸ Mai maĝuri dagarari maiĝeri tata faneri tu imaima sebona (6), ma mai faneri maiĝeri mabarari tu mata na moĝo ĝevonuto, faneri nuĝana rekeri dagarari maki mata moĝo. Ĝia tu vanaĝivanagi boĝi-laĝani asi ĝeiaĝaragini, mai guruĝa maiĝa asi ĝevaĝa-ketoani, ĝekirani:

“Veaĝa, veaĝa, veaĝa,

Vereĝauka, Barau tuĝutuĝu, tu veaĝa,

guinenai etanuto-ĝoi,

maitoma maki etanuni,

ema ma beiĝomani!”

⁹ Mai teronai etanu-taĝoto-ĝoi tarimana tu maĝuri etanu-vanaĝi vanaĝini. Ma maiĝeri maĝuri dagarari na mo teronai etanu-taĝoto-ĝoi tarimana ĝevaĝa-raĝeato-ĝoi, e ma vegubakauri ĝesi ĝetoma-rakarigoato-ĝoi, ema ĝetanikiu-viniato-ĝoi nai,

¹⁰ mo veĝitaĝau tarimari baregori gabana ruarua ma vasivasi (24) tu mo teronai etanuni tarimana ĝoiranai ĝevetui-tarito-ĝoi. Benamo mai maĝuri etanu-vanaĝi vanaĝini tarimana ĝetoma-rakarigo viniato-ĝoi. Ĝeri korona maki ĝia ĝoiranai ĝetore-taririto-ĝoi, benamo ĝekirato-ĝoi,

¹¹ “Ĝai ĝema Vereĝauka ema Barau,

ĝoi tu iarukorokoro,

be tarimarima ema maĝuri dagarari mabarari na ĝoi tu beĝene vaĝa-raĝemu, beĝene gubakaumu,

ema seĝuka maki mabarana ĝoi ĝemu.

Korana dagara mabarari tu

ĝoi na oveirito,

ema ĝoi ĝemu urai moĝo oveirito

ema initoma ġetanuni.”

5

Mamoe natuna ema toretore fefana maukana

¹ Benamo aboġeto, mo teronai etanu-taġoto-ġoi tarimana ġimana aroribanai tu toretore fefana maukana ta aġitaiato. Mo fefa tu tavita-tavitai ma toretorena, ġeiokuato, ema vaġa-imaima ruarua (7) veġata ġekada-ġauato. Mo ġekada-ġaurito gaburi mabarari tu tabu vetoġana ġetoreato.

² Ma gwada rakavarakava aneruna ta aġitaiato, garona tu asikeikeina eġobatato, ekirato, “Deikara tu ilaila mai kumuka tabuna bekokiani riba, e mai fefa maukana ma toretorena bekeoani?”

³ Senaġi tarima ta gubai o tanobarai o tanobara gaburenai ta asi ilaila veġata mo fefa bekeo-fakaiani ema nuġanai beboġe-ġurani.

⁴ Benamo ataġi-rakava rakavato, korana tarima sebona kwarikwari ta maki asi veġata ġeġoitaġoato, mo fefa maukana ma toretorena bekeoani ma nuġanai beboġe-ġurani.

⁵ Benamo mo veġitaġau tarimari baregori ta na ekiraguto, ekirato, “Asi notaġi! Noboġe! Iuda doġorona ġeri laion, Davida Natuna noġitaia, ġia tu ekokoreto. Ġia na mani fefa maukana ma toretorena bekeoani bene, ema mani ġekumuato kumukari taburi imaima ruarua (7) maki bekokirini bene.”

⁶ Benamo aboġeto, Mamoe Natuna aġitaiato. Ġia tu terona nuġana buroburonai eruġa-taġoto-ġoi, mo maġuri dagarari vasivasi (4) ema veġitaġau tarimari baregori tu ġeruġa-ġeġeraġiato. Mamoe Natuna ġitaġitana tu tari na ġevaġi-maseato. Ġia guduna tu imaima ruarua (7) ema matana maki 7. Mo tu Barau iaukana 7 ekiraġirini. Ġia tu Barau na tanobara mabarana ġana etuġu-iaġorito.

⁷ Mamoe Natuna eiaġoto, benamo teronai etanu-taġoto-ġoi tarimana ġimana aroribanai mo fefa maukana ma toretorena moġa eġabiato.

⁸ Fefa maukana ma toretorena eġabiato nai, maġuri dagarari vasivasi ema veġitaġau tarimari baregori 24 Mamoe Natuna ġoiranai ġevetui-tarito. Ġia tata tu ma ġeri hap (gita noġa) ema golo ġurori nuġari ai tu muramura goġuna ma bonari. Mo goġu ma bonari tu Barau ġena tarima veaġari ġeri ġauġau guruġari.

⁹ Benamo ġia na mari variġuna ta maġesina ġemariato,

“Ġoi na fefa maukana ma toretorena boġabiani ilaila, ema ġia kumuna ma taburi maki bokeo-fakarini ilaila, korana ġoi tu ġevaġi-masemuto,

ma ġoi raramu na tau vavine Barau ġena ovoi-vaġirito doġoro mabarari ġerina, e garo mabarari ġerina, ema bese mabarari ema tanobara mabarari na.

¹⁰ Ġoi na ġia tu Barau ġena Basileia doġorona tarimari ai ovaġa-iaġorito, ema Barau vetuġunaġina beġene iaġo-vini ġana Rubu Veaġa vereri ai ovaġa-iaġorito.

Ġia tu tanobara mabarana iatanai beġe veġorikauni.”

¹¹ Ma aboġe-iaġoto, aneru garori asisebo-asisebo aseġaġirito. Moġeri aneru tu asi iavi-iaviri, milion ġutuma maki ġevanaġirito. Ġia na terona ema maġuri dagarari vasivasi ema veġitaġau tarimari baregori ġeruġa-ġeġeraġirito.

¹² Ma mai mari ġemari-gigitariato,

“Mamoe Natuna,
 ġevaġi-maseato dagarana,
 tu ma ġena maoro, seġuka beġabiani,
 e farefare vovoka, e iaunega,
 ema kokore beġabiani!
 Ema ġia ma ġena maoro tarimarima mabarari na beġe gubakauani,
 ma beġe vaġa-raġeani
 ema beġe vonevone-raġeani!”

¹³ Benamo Barau na eveirito dagarari mabarari guba nuġanai, tanobara iatanai, tanobara gaburenai, e davara nuġanai dagarari mabarari na mai mari ġevaisiato aseġaġirito,
 “Teronai etanu-taġoni Barauna
 ema Mamoe Natuna,
 tauri ruarua na vevaġa-raġe,
 vegubakau, mareva baregona,
 ema seġuka beġene ġabiri,
 bene iaġo mo vanaġivanaġi asi magona!”

¹⁴ Benamo maġuri dagarari vasivasi na ġevaġa-moġoniatu, ġekirato, “Amen!” Ema veġitaġau tarimari baregori 24 ġevetui-tarito, Barau ġetomarakarigo viniato.

6

Fefa maukana ma toretorena ġekumukaiato kadari o tabu vetoġari Mamoe Natuna na ekeorito

¹ Benamo au na Mamoe Natuna aġitaiato, fefa maukana ma toretorena vaġa-imaima ruarua (7) ġekada-tariato dagarana kadana giniguinena ekeo-fakaiato. Moġa ekeoato-ġoi nuġanai tu, maġuri dagarari vasivasi fakari ai ġia ta eguruġato, garona tu noġa guba eguruato, ekirato, “Noiaġoma!”

² Aboġe-iaġoto nai tu, hosi kurokurona ta aġitaiato, eraġeto tarimana ġimana tu ma fevana, ema ġia tu korona ta maki eviniato. Ġia eraka-rosito tu, vetari ai ekokoreto-ġoi ema eiaġoto tu ma bene kokore ġana.

³ Benamo Mamoe Natuna na kumuka vaġa-ruaruana kadana ekeo-fakaiato nai, maġuri dagarana vaġa-ruaruana aseġaġiato, ekirato, “Noiaġoma!”

⁴ Benamo hosi ta ma eraka-rosito. Moġa tu hosi kakakakana. Eraġeto tarimana tu seġuka eviniato, tanobara na maino bene ġabi-veġitaia, be tarimarima tauġeri beġene vevaġi-masemase ġana. Mo tarima tu vetari baġana asikeikeina ta eviniato.

⁵ Kumuka vaġa-toitoina kadana ekeo-fakaiato nai tu, maġuri dagarana vaġa-toitoina aseġaġiato, ekirato, “Noiaġoma!” Au aboġe-iaġoto nai, hosi dubadubana aġitaiato, eraġeto tarimana ġimanai tu dagara ġeri meto vaġa-foforiri o sikele dagarana ta eġabiato.

⁶ Benamo au na garo ta maġuri dagarari vasivasi (4) fakari na eiaġomato aseġaġiato, ekirato, “(Bitu doġe be), widi kilo sebna davana tu ġaro sebna ġauveina voina, ema bali (widi kavana) kilo toitoi davana tu ġaro sebna ġauveina voina. Senaġi olive diġana ema vine nanuna tu asi boġono vaġa-rakavari.”

⁷ Ma Mamoe Natuna na kumuka vaġa-vasivasina kadana ekeo-fakaiato nai tu, maġuri dagarana vaġa-vasivasina aseġaġiato, ekirato, “Noiaġoma!”

⁸ Aboĝe-iaĝoto nai tu, hosi ta aĝitaiato, tauĝanina ĝitaĝitana noĝa kurokuro. Eraĝeto tarimana arana tu Mase, ma mase tarimari iaukari ĝetanuni Gabuna (o Hades) tu ĝia murina na eraganaĝi-raganaĝito-ĝoi. Tauri ruarua seĝuka evinirito, tanobara taviri vasivasi nuĝanai tavi sebona beĝene ĝita-ĝaŭa, be vetari ai, doĝe ai, keve rakavari na, ema boĝai ĝetanuni veĝaniveĝani dagarari na tarimarima beĝene vaĝi-maseri.

⁹ Ma kumuka vaĝa-imaimana kadana ekeo-fakaiato nai tu, Barau ĝena guruĝa ĝaramanai, e mo guruĝa ĝevaĝa-moĝoniato ema ĝevari-fiuato ĝaramanai ĝevaĝi-maserito tarimari iaukari maĝuri fata veaĝana gaburenai aĝitarito.

¹⁰ Ĝia mabarari ĝekoĝo-baregote, ĝekirato, “Vere tuĝutuĝu, ĝoi tu veaĝa ema moĝoni veĝata, aitoma vau ĝoi na tanobarai ĝetanuni tarimari bovaĝa-maoro vinirini, benamo ĝai rarama ĝevaĝa-rigorito bovaĝa-voirini?”

¹¹ Benamo ĝia mabarari tata dabuĝa kurokurori evinirito, ekirarito, negakota roĝo ma beĝene naritari etato. Beĝene vaĝa-noga mo, ĝia karori toma vetuĝunaĝi ĝeiaĝo-vinini tarimari ema tarikakari kotari, ĝia ĝevaĝirito kavana, beĝe vaĝi-maserini mo, ĝeri numera korikori bene ĝabia.

¹² Au na Mamoe Natuna aĝitaiato, kumuka vaĝa-imaima sebona (6) ekeo-fakaiato nuĝanai, tano-iaga asikeikeina eragato, e ĝaro eduba-dubato, dabuĝa dubadubari noĝa, e ĝue evekurevoto, ekakarato rara kavana.

¹³ Ema guba na visiĝu ĝeketo-firigoto tanobara ĝana, noĝa figi maĝitari iavara na figi ĝauna na eruku-keto ketorini kavana.

¹⁴ Guba maki erekwa-rekwato, noĝa moĝo fefa maukana, ĝetoretore-iaĝiani dagarana, ĝeiokuani kavana. Ma ĝoro ema motumotu mabarari gaburi ekoki-veĝitarito.

¹⁵ Benamo tanobara kiniri, e vereri, e vetari ĝitaĝauna tauri baregori, e ĝeri farefare asisebo tarimari, e kokore rakavarakava tarimari, tuĝu-rakaorakao tarimari ema maĝuri namona e fakanai ĝetanuni tarimari, ĝia mabarari kouĝa nuĝari ai ema ĝoro ai fore baregori vekaravari ai ĝea gumuto.

¹⁶ Benamo ĝoro ema fore baregori ĝenoĝirito, ĝekirato, “Ĝai iatamai ĝoma ketokau, ĝoma lautarima, be teronai etanuni Barauna ĝoirana ĝenana ema Mamoe Natuna ĝena baru baregona ĝenana ĝoma kure-toĝama!”

¹⁷ Korana ĝia ĝeri baru ĝarona baregona tu varau bevotu, deikara beruĝa-tarini riba?”

7

Barau ĝena vetuĝunaĝi tarimari 144,000

¹ Moĝa murinai aneru vasivasi (4) aĝitarito, tanobara daiguniri vasivasi ai ĝeruĝato. Mo aneru na tu tanobara iavarari vasivasi ĝelautaririto, tanobarai e davarai asi beĝene raga, ema ĝau maki asi beĝene kwari-ĝearevari ĝana.

² Ma murinai tu aneru ta ma aĝitaiato, ĝaro eraĝeni rekena na emaraĝeto. Mo aneru na maĝuri Barauna ĝena vevaĝa-moĝoni vetoĝana o makana eĝabi-taĝoato-ĝoi. Ĝia na mo aneru vasivasi, Barau na seĝuka evinirito tanobara ema davara beĝene vaĝa-rakavari aneruri, efarara-vinirito, ekirato,

³ “Tanobara, davara, ema ĝau asi roĝo boĝono vaĝa-rakavari, bene iaĝo mo, Barau ĝena vetuĝunaĝi tarimari bakuri ai ĝia ĝena vetoĝa baĝana toreri murinai vau.”

4 Moġa murinai Barau ġena vetoġa bakuri ai ġetorerito tarimari mabarari tu 144,000 aseġaġiato. Ġia tu Isaraela doġorori gabanana ruarua (12) mabarari ġerina, doġorori tu maiġeri:

5 Iuda ġena doġoro tarimari - 12,000

Reubena ġena doġoro tarimari - 12,000

Gad ġena doġoro tarimari - 12,000

6 Asere ġena doġoro tarimari - 12,000

Naftali ġena doġoro tarimari - 12,000

Manase ġena doġoro tarimari - 12,000

7 Simeona ġena doġoro tarimari - 12,000

Levi ġena doġoro tarimari - 12,000

Isakara ġena doġoro tarimari - 12,000

8 Sebulun ġena doġoro tarimari - 12,000

Iosefa ġena doġoro tarimari - 12,000

Beniamina ġena doġoro tarimari - 12,000

Tarima ġutuma lelevaġi dabuġa kurokurori ġeveito

9 Moġa murinai aboġe-iaġoto, tarima ġutuma lelevaġi, asi tau iavigosina, aġitarito. Mo tu tanobara irauirau mabarana tarimana, e doġoro irauirau mabarana tarimana, e bese irauirau mabarana tarimana, e ma garo irauirau mabarana tarimana. Ġia mabarabarari tu terona ema Mamoe Natuna ġoirari ai ġeruġato. Ġia mabarari dabuġa maukari kurokurori ġeveito, ema ġimari ai tu galamo lauri noġa dagarari ġeġabito. (Mo tu ġia ġeri kokore vetoġari).

10 Ġia ġekoġo-baregato, ġekirato, “Vevaġa-maġuri tu ġita ġera Barau, teronai etanukauni Barauna, e Mamoe Natuna ġerina eiaġomani.”

11 Ma aneru mabarari na tu terona e veġitaġau tarimari baregori ema maġuri dagarari vasivasi (4) ġeruġa-ġeġeraġirito. Benamo Barau ġena terona koranai ġevetui-tarito, ġoirari tano ai, Barau ġetoma-rakarigo viniato,

12 ġekirato, “Moġoni veġata! Vevaġa-raġe, e mareva baregona, e iaunega, e vevaġa-namo, e vegubakau, e seġuka, ema kokore tu ġita ġera Barau ġena toma bene iaġo vanaġivanaġi, Amen!

13 Benamo veġitaġau tarimana baregona ta na edanaġiguto, ekirato, “Mai dabuġa kurokurori na beġe vedabuġa tarimari tu deikara, ema ġia tu ainana beġe iaġoma?”

14 Benamo avaġa-veseto, akirato, “Ġegu vere, au asi ribagu. A ġoi tu ribamu.” Benamo ġia na ekira-varaguto, ekirato, “Mai tarima maiġeri tu midigumidigu baregori nuġari na ġeiaġomato. Ġeri dabuġa tu Mamoe Natuna, ginitaġo mamoea, rarana na ġevei-kurokuro-rito.

15 Moġesina naima, ġia tu Barau ġena terona ġoiranai ġeruġani, ema ġena Rubu Vevaġa nuġanai boġi-laġani ġia vetuġunaġina ġeiaġo-vinini. Ema teronai etanuni Barauna na enari-ġaurini.

16 Ġia tu asi ma beġe vito-ġenoġoirini, e bokari asi ma beġe koke-ġenoġoini. Ġaro iatari ai asi ma bekirini ema ġaro seġukana na asi ma begugurarini.

17 Korana terona nuġanai etanuni Mamoe Natuna na beġita-ġaurini. Ġia na beġori-iaġorini maġuri nanuna eġaruani gabuna ġana. Ema Barau na matari gorari mabarari bedau-vaġirini.”

8

Kumuka vaġa-imaima ruaruana (7) kadana

1 Mamoe Natuna na kumuka vaġa-imaima ruaruana (7) kadana ekeo-fakaiato nai, guba vanuġanai aoa tavina ta veġata guru ta maki asi eraġeto.

2 Benamo Barau ġoiranai ġeruġato aneruri imaima ruaruana (7) aġitarito, dudu 7 evinirito.

3 Benamo aneru ta ma eiaġomato, fata veaġana sevinai eruġato, ġimanai tu golo ġurona ta. Ġia tu muramura ma bonana barego lelevaġi ġeviniato, Barau ġena tarima veaġari ġeri ġau-ġau ġesi terona ġoiranai golo fatana veaġanai Barau bene varevare-vinia ġana.

4 Mo muramura goġuna ma bonana goġuna ema Barau ġena tarima veaġari ġeri ġauġau ġesi, mo aneru ġimana na ġevaraġeto Barau ġoirana ġana.

5 Moġa murinai aneru na golo ġurona eġabiato, fata veaġana karavana na evaġa-vonuato, benamo tanobara iatana ġana efiu-riġoato. Monana ġaita guruna eraġeto, garo gururi tari ġeraġeto, e kiriku eragato, ema tano eiaġato.

Aneru na ġeri dudu ġefurururito

6 Benamo aneru imaima ruaruana (7) ġeri dudu ġeġabi-torerito, beġene furururi ġana.

7 Aneru ġiniguinena na ġena dudu efururuato, benamo aisi foreri misimisiri ema karava rara ġesi ġesebonato ġevetoreto. Benamo moġeri mabarari tanobara ġana ebubu-riġorito. Ma tanobara tavi toitoi nuġanai tavi sebona eġara-ġosiato, ġau toitoi nuġari ai tu sebori tu ġeġara-ġosirito, e ġauġa ema reġi mabarari ġeġara-ġosirito.

8 Aneru vaġa-ruaruana na ġena dudu efururuato nai tu, dagara ta, ġoro-dagara-bara ta noġa ma karavana, davarai evefiu-reito. Benamo daġaru-bara tavi toitoi nuġanai tavi ta tu rarai eiaġoto.

9 E daġaru-bara maġuri dagarari toiri-toiri nuġari ai sebori tu ġemaseto, e bouti toiri-toiri nuġari ai sebori tu ġeburuto.

10 Aneru vaġa-toitoina ġena dudu efururuato nai tu, visiġu-dagara-bara ta kere morena kavana guba na eketoto, benamo ġaruka toiri nuġari ai sebori ai, e ġeġaruġarurini nanuri ai eketo-reito.

11 Mo visiġu arana tu “Mamaki”. Nanu gaburi toiri nuġari ai sebori tu ġemamakito. Benamo tarimarima vovoka na mo nanu mamakiri ġeniurito nai ġemaseto.

12 Aneru vaġa-vasivasina ġena dudu efururuato nai, ġaro e ġue ema visiġu tu taviri toitoiri nuġari ai tavi sebori tu ġesemorito, naima mo tavi toitoiri nuġari ai tavi sebori tu ġemukunato. Moġa lorinai ġaro mamana tavi toitoi nuġanai tavi sebona tu asi emamato, ema boġi tavi toitoi nuġanai tavi sebona ta ġue e visiġu tu asi emamato.

13 Benamo aboġeto, ugava ta guba tuġuna vanigerenai erovoto-ġoi aġitaiato, maiġesi ekeo-fararato, ekirato, “Tanobarai ġotanuni tarimami, vetuġami kika! Vetuġami kika! Vetuġami kika! Korana tu aneru toitoi, ġeri dudu roġosi ġere furururi aneruri, na ġeri dudu beġe furururini gururi ai tu, meto ema midigumidigu barego lelevaġina beġorani.

9

Dudu vaġa-imaimana (5)

¹ Aneru vaġa-imaimana na ġena dudu efururuato, benamo visiġu ta aġitaiato, guba na eketoto tanobarai. Mo visiġu tu guri variġo kwareġana, (iauka rakavari ġeri dibura), kina eviniato.

² Mo guri ekeo-fakaiato nai tu, goġu evebubu-rosito noġa moġo karava baregona goġuna kavana. Benamo mo guri goġuna na ġaro mamana ema guba fakana emukuna-ġaurito.

³ Goġu nuġana na madudu ġeraka-rosito tanobarai, ema seġuka evinirito, seġukana tu kavikavi seġukari kavana.

⁴ Ġia ekirarito, tanobarai ġauġa ta, e tanobarai ġetubuni dagarana ta, ema ġau ta asi beġene vaġa-rakavaia, senaġi deidei bakuri ai Barau ġena vetoġa o maka asi etanuni tarimari moġo beġene vaġa-rakavari etato.

⁵ Ekirarito maki, mo tarima asi beġene vaġi-maseri, senaġi ġue imaima (5) nuġanai beġene vaġa-midigu midiguri. Mo midigumidigu ġeġanito moġeri tu kavikavi na tarima ekavirini midiguna kavana.

⁶ Mo ġue imaima nuġanai tarimarima tu ġemase ġana mase beġe vetauani, senaġi asi beġe maseni. Ġeri ura baregona ġemase beġe toni, senaġi mase ġerina beveġitani.

⁷ Mo madudu ġitaġitari tu hosi noġa, ġea vetari ġana ġeruġa-toreto. Ġia debari ai tu golo koronana noġa moġo dagarana ta, ema ġoirari ġitaġitari tu tarima ġoirari kavana.

⁸ Ġuiri tu vavine ġuiri noġa moġo, doġari tu laion doġari kavana.

⁹ Kobari kouġauri ġana dabuġana tu auri dabuġana kavana. Faneri gururi tu hosi asisebo kwakuri gururi ema kariota asisebo vetari nuġanai ġeraka-toġani gururi kavana.

¹⁰ Ġia tu ma ġiġuri, ema ġiġuri bonari tu kavikavi ġiġuri bonari kavana. Ġiguri nuġari ai tu tarimarima ġue imaima (5) beġene vaġa-midigu midiguri seġukana etanuni.

¹¹ Ġia tu ma ġeri vere baregona o kini. Ġia na eġita-ġaurini. Ġia dagarana tu mo guri variġo kwareġana aneruna. Mo aneru arana Heberu garori ai tu Abadon, ma Grik garori ai tu Apolion, (anina tu vaġa-rakava kwaikwai tarimana).

¹² Rakava baregori giniguinena tu bekoru moġa, ma ruarua tu vau beġe iaġomani.

Aneru vaġa-imaima sebona (6) na dudu efururuato

¹³ Aneru vaġa-6 na ġena dudu ma efururuato, benamo fata veaġana dai-guni vasivasi ai gudu vasivasi moġeri ġerina garo ta eiagomato aseġaġiato. Mo fata tu golo na ġeveiato, ma Barau ġena terona ġoiranai etanuni.

¹⁴ Mo garo na aneru vaġa-6 na ma ġena dudu moġa ekiraiato, ekirato, “Aneru vasivasi, ġaruka baregona arana Eufrate ai ġebaru-taririto, moġeri noruġa-vaġiri.”

¹⁵ Benamo mo aneru vasivasi eruġa-vaġirito, mai laġani, mai ġue, mai ġaro, mai aoa ġana Barau na eġabi-torerito tu, tarima toitoiri nuġanai sebona tu beġene vaġia.

¹⁶ Hosi tarimari hosi ai ġeraġeto ġena numera tu milion sinau ruarua (200). Mai numera tu aseġaġiato.

¹⁷ Mo hosi e iatari ai ġeraġeto tarimari au ġegu mata-vanaġi ai vetoġari tu maiġesina aġitarito: Ġia kobari kouġauna ġana auri dabuġana tu karava ġeġarani kakakaka karavari kavana, e blu, ema karava moreri o salfa

borabora kavana. Hosi debari tu laion debari kavana, ma bokari tu karava e goġu ema karava moreri ġeraka-rosito.

¹⁸ Mo tarimarima vaġa-midigumidiguri dagarari toitoi moġeri, karava, goġu, ema karava moreri o salfa, hosi bokari na ġeraka-rosito dagarari, na tarimarima toiri-toiri nuġanai sebori-sebori tu ġevaġi-maserito.

¹⁹ Mo hosi ġeri seguka tu bokari ai ema ġigūri ai maki. Korana ġigūri tu mota kavana, ma debari. Mo ġigūri debari na tarimarima ġevaġa-midigu midigurito-ġoi.

²⁰ Tarimarima oreri, mo vevaġa-midigumidigu dagarari toitoi na asi ġevaġi-maserito tarimari, tu roġo asi ġevetuġamaġi-kureto ġimari ġauveiri ġerina. Iauka rakavari toma-rakarigori ema asi ġeboġeboġeni e asi ġeseġaġini ema asi ġerakani kwaivakukuri, golo, silva, auri boraborari, fore e ġau na ġeveirito dagarari toma-rakarigori asi ġevaġa-dokoato.

²¹ Ema ġeri vevaġideba, ġeri meġameġa, ġeri mata-boraġa veigari, ema ġeri lema ġerina maki asi ġevetuġamaġi-kureto ma asi ġeraka-kureto.

10

Aneru ema toretore fefana maukana misina

¹ Benamo aneru ta, kokore lelevaġi aneruna, guba na ma emariġoto-ġoi aġitaiato. Ġia tu magube na ġevaġa-dabuġa maukaiato, ma debana iatanai tu kevau ta. Ġia ġoirana tu ġaro mamana noġa, ema kwakuna tu karava ġemoreni kavana.

² Ġimanai tu toretore fefana maukana misina ta vekeo eġabitaġoato-ġoi. Ġia kwakuna aroribana tu davarai etoreato, ma kwakuna kaurina tu tanobarai etoreato.

³ Benamo eġaba-baregoto, laion eniarani nai eġabani kavana. Ġia eġabato murinai, ġaita imaima ruarua (7) garori ġeguruġato, (ġia ġevaġa-veseato).

⁴ Mo ġaita 7 ġeguruġato moġeri dori atore-vanaġirito, senaġi guba na garo ta eiaġomato, ekirato, “Mani ġaita 7 kara beġe kiraġiri maniġeri tu nokuretoġari, asi bono tore-vanaġiri.”

⁵ Benamo mo aneru, davarai e tanobarai kwakuna etorerito aneruna, aġitaiato, ġimana aroribana eġabi-vaisiato, guba vanuġana eduġiato,

⁶ benamo tanu-vanaġivanāġi Barauna aranai guruġa-fofori gwaġigina eveiato. Guba ema nuġari ai ġetanuni dagarari mabarari, e tanobara ema nuġari ai ġetanuni dagarari mabarari, ema daġaru-bara ema nuġari ai ġetanuni dagarari mabarari tu ġia na eveirito. Ġia aranai mai guruġa-fofori gwaġigina eveiato, ekirato, “Taimi varau bekori, Barau asi ma bevaga-nogani.

⁷ Senaġina aneru vaġa-imaima ruaruana (7) na ġena dudu befururuani neganai, Barau ġena guruġa vekuretoġari veigari ema boioġari beġe ġorani, ġena peroveta tarimari ġeri ai ekiraġi-foforirito ilailari ai.”

⁸ Benamo guba na aseġaġiato garona na ma evaġa-guruġaguto, ekirato, “Noiaġo, mo aneru davarai e tanobarai eruġani aneruna, ġimanai toretore fefana maukana evekeo-taġoni, moġea noġabia.”

⁹ Benamo aiaġoto, mo aneru akiraiato, mani toretore fefana maukana misina nevinigu atato. Benamo ġia na ekiraguto, ekirato, “Noġabia, be noġani-ġosia! Bokamu ai mamina tu gode mamina maki bevanaġiani, senaġi nuġamu tu bevemukini.”

10 Benamo toretore fefana maukana misina mo aneru ġimana na aġbiato, benamo aġaniato. Aġaniato mamina murugu ai tu gode mamina maki evanaġiato, senaġi aġani-ġosiato nai, nuġagu tu evemukito.

11 Benamo evaġa-guruġaguto, ekirato, “Tanobara beseri ġutuma, ġaro irauirau tarimari ema ġeri vere baregori o kini ġeri ai karakara beġe ġorani dagarari ma bono peroveta-iaġiri.”

11

Vevaġa-moġoni tarimari ruarua

1 Benamo vaġa-vetovo ġauna ta, ġitaġitana togoi noġa, eviniguto, benamo ekiraġuto, ekirato, “Noiaġo, Barau ġena Rubu Vevaġa ema fata vevaġana noa makaia, ema monai toma-rakarigo tarimari vira bono iaviri.

2 Senaġi mani Rubu Vevaġa nuġanai Iuda tarimari ġeri toma-rakarigo gabuna maġuna murikana, maniga tu bono iaġuia, asi bono makaia, korana maniga tu irau bese tarimari ġeri (ġuriguri gabuna) evinirito, ġia na mai vanuġa baregona vevaġana ġue gabana vasivasi ma ruarua (42) nuġari ai beġe fanafana-tariani.

3 Au vaġa-moġonigu tarimari ruarua seġuka bavimirini, benamo ġaro mabarana 1,260 Barau na bevinirini guruġari beġe kiraġi-foforirini. Ġia tu fuse-dabuġari na beġe vedabuġani.”

4 Mai vaġa-moġonigu tauri ruarua tu mo olive ġauri ruarua ema mo lamefa torekauri dagarari ruarua, tanobara Verena ġoiranai ġeruġani moġeri.

5 Bema tarima ta na nevaġa-rakavari betoni nai tu, bokari na karava beġe raka-rosini, benamo inairi beġe vaġa-buataririni. Ġia ġevaġa-rakavari beġe toni tarimana tu moġesina bemaseni.

6 Maiġeri tarima ruarua tu ma seġukari guba beġe kou-ġauani, benamo ġia peroveta guruġari beġe kiraġirini ġarori ai tu, ġura asi beraguni. Ema ma seġukari maki, nanu beġe kurevoani, rarai beiaġoni, e beġe urani ġarori ai tarimarima vaġa-midigumidiguri dagarari irauirau tanobarai beġe vaġa-ġorarini.

7 Ġeri vevariflu beġe vaġa-maġoani ġaronai, vevaġa-rakava dagarana guri variġo kwareġana, (iauka rakavari ġeri dibura), nuġana na berakarsini, benamo ġia bevaġa-vevaġirini. Ġia ġeri seġuka bevanaġiani, benamo bevaġi-maserini.

8 Benamo ġia tauġaniri tu vanuġa baregona dabarana nuġanai gena-fitari beġe tanuni. Guruġa veabanaġinai mo vanuġa barana arana ġekiraġiani tu Sodoma ema Aigupito. Ġia tauri ruarua ġeri Vereġauka tu mo vanuġai ġevaġa-satauroato.

9 Ġaro toitoi ma kwana nuġari ai bese irauirau, doġoro irauirau, ġaro irauirau, e tanobara irauirau tarimari ġia tauġaniri beġe ġitarini, senaġi guriguriri tu asi beġe urani.

10 Ġia ġeri mase dainai tanobarai ġetanuni tarimari tu beġe iakuni, beġe ġani-vegogoni e karori tata ġeri varevare beġe tuġuni; korana tu mai peroveta tarimari ruarua na tanobarai ġetanuni tarimari ġeri ai midigumidigu baregona ġevaġa-ġoraiato.

11 Senaġi mo ġaro toitoi ma kwana ġekorito murinai, maġuri iaġana Barau ġenana ġia tauri ruarua nuġari ai eraka-toġato, benamo ġeruġa-vaisito. Ġia tauri ruarua ġeġitarito tarimari mabarari ġegari-rakavato.

12 Benamo vevaḡa-moḡoni tauri ruarua na garo baregona ta ḡeseḡaḡiatio, guba na emariḡoto, ḡia evaḡa-guruḡarito, ekirato, “Maigana ḡomaraḡe!” Benamo tauri ruarua magube ta nuḡanai guba ḡana ḡevaraḡeto, ḡari inai tarimari ḡoirari ai.

13 Mo aoa nuḡanai moḡo tano-iaga baregona eragato, benamo vanuḡa baregona taviri gabanana (10) nuḡanai tavi sebona tu evaḡa-mouato, ma tarima mabarari 7,000 ḡemaseto. Senaḡi tarimarima oreri tu ḡegari-rakavato, benamo Guba Barauna ḡevaḡa-raḡeato.

14 Rakava vaḡa-ruaruana tu bekori moḡa, senaḡi vaḡa-toitoina tu dori eiaḡomani.

Dudu vaḡa-imaima ruaruana (7)

15 Aneru vaḡa-imaima ruaruana (7) na ḡena dudu efururuato, benamo garo baregori gubai ḡeguruḡato, ḡekirato, “Tanobara basileiana o veḡitaḡau seḡukana tu ḡita ḡera Vereḡauka ema ḡena Keriso ḡeri basileiai beiaḡo. Be ḡia tu bevere-vanaḡi vanagini!”

16 Benamo veḡitaḡau tauri ḡabana ruarua ma vasivasi (24), Barau ḡoiranai ḡeri teronai ḡetanuni tarimari, ḡeветui-tarito, ḡoirari tano ai, Barau ḡetomarakaraiḡo viniato,

17 ḡekirato,

“Vereḡauka o, Iaru-korokoro Baraumu, otanuni, e otanuto-ḡoi, ḡai na ḡoi ḡatanikiu-vinimuni, korana ḡoi ḡemu seḡuka baregona oḡabiato, e ḡemu Basileia o veḡitaḡau tu varau osinaiato.

18 Tanobara irauirau beseri ḡebaruto, benamo ḡoi ḡemu baru ma beraḡasi. Mase tarimari kota-viniri taimina, ema mo peroveta tauri, ḡoi ḡemu vetuḡunaḡi tarimari, e ḡemu tarima veaḡari, ema ḡoi aramu ḡematauraiani tarimari keiri baregori voiri viniviniri ḡarona,

ema tanobara ḡevaḡa-rakavaiato tarimari vaḡa-rakavari ḡarona beiaḡoma.”

19 Benamo Barau ḡena Rubu Veaḡa guba nuḡanai evekeoto, benamo ḡena Kiraiḡitore Mauḡana Rubu Veaḡa nuḡanai eforito aḡitaiato. Benamo kiriku-ḡaita, e garo gururi tari, e guba eguruato guruna baregona, e tano-iaga, ema aisi foreri asikeikeiri ḡeiaḡomato.

12

Vavine ema ḡuḡaia kavana dagarana asikeikeina

1 Benamo nuḡa-farevaḡi vetoḡana baregona ta gubai eforito: Vavine ta, ḡaro na evedabuḡato, ma ḡue tu kwakuna gabureri ai, ema visiḡu gabanana ruarua (12) tu korona noḡa, ḡia debanai ḡevetore-ḡeḡeraḡito.

2 ḡia tu ma banina, ma dori eḡabito-ḡoi, moḡesina nai mero-gabi midiguna eḡabiato, be eḡabato-ḡoi.

3 Benamo nuḡa-farevaḡi vetoḡana ta gubai ma eforito: ḡuḡaia kavana dagarana asikeikeina ta, kakakakana, debana mabarari tu imaima ruarua (7), guduna mabarari tu gabanana (10), ema korona maki 7 debana tata iatari sebori-sebori torekau.

⁴ Ĝia ĝiguna guba visiĝuri toiri-toiri ĝerina sebori-sebori tu tanobara ĝana eiari-firiĝorito. Ĝia tu mo vavine, dori eĝabito-ĝoi, ĝoiranai eruĝato, beĝabini nai, asikauna mero misina bene ĝabia, bene ĝania uranai.

⁵ Vavine eĝabito nai tu, mero evaĝa-ĝoraiato. Mo mero na tanobara iraurau beseri mabarari auri togoina na roĝo beĝori-kaurini ma seĝukana baregona ĝesi. Benamo mero emaĝurito nai ĝeraga-ĝabi-veĝitaiato, Barau e ĝena terona ĝoirana ĝana ĝeĝwa-iaĝoato.

⁶ Mo vavine tu Barau na ĝena erovina-toreato gabuna tano fakana ĝana egari-iaĝoto. Monai beĝe nariani e beĝe ĝubuani ĝaro mabarari 1260 nuĝari ai.

⁷ Benamo gubai vetari ta eĝorato: Maikolo ma ĝena aneru ĝesi ĝuĝaia kavana dagarana asikeikeina ĝevetari-viniato, benamo ĝuĝaia ma ĝena aneru na maki ĝia ma ĝevetari-vinirito.

⁸ Senaĝi ĝuĝaia kavana dagarana tu asi ekokoreto, naima gubai asi ĝeri gabu ai ĝevaĝa-iaĝorito.

⁹ Mo ĝuĝaia kavana dagarana asikeikeina, irau laĝani veĝata motana, arana “Diabolo” o “Satani”, tanobara mabarana eĝofaiato dagarana, tu ĝedori-rosiato, e tanobarai ĝefiu-riĝoato. Ĝena aneru mabarari maki ĝia ĝesi ĝefiu-rigorito.

¹⁰ Benamo gubai garo baregona ta eguruĝato aseĝaĝiato, ekirato, “Toma ĝita ĝera Barau ĝena vevaĝa-maĝuri, e ĝena seĝuka, e ĝena veĝitaĝau baregona, ema ĝena Keriso ĝena maoro baregona varau beraĝasi. Korana Barau ĝoiranai ĝita tari-kakara boĝi-laĝani evaĝa-daĝarito-ĝoi dagarana tu varau beĝe fiu-riĝoa.

¹¹ Ĝia tu tarikakara na Mamoe Natuna, (ginitaĝo mamoen), rarana ema ĝia ĝena guruĝa moĝoniri ĝevari-fiurito-ĝoi, moĝerina ĝekokoreto, be ĝevaĝa-ketoato. Ĝeri maĝuri asi ĝetuĝamaĝi-kaurito, eiaĝoto mo, ĝea maseto.

¹² Guba o, ema gubai ĝotanuni tarimami o, boĝono iaku! Senaĝi tanobara e daĝaru-bara ĝomi tu vetuĝami kika! Korana Satani tu ĝomi ĝemi ai varau bevariĝosi, nuĝana tu baru na bevonuvonu-raĝe, korana ribana, ĝia ĝena nega tu varau bekubi-rakava.”

¹³ Mo ĝuĝaia kavana dagarana eribato, ĝia tu tanobarai ĝefiu-riĝoato neganai, mero evaĝa-ĝoraiato vavinena murina na ekureto.

¹⁴ Senaĝi mo vavine tu ugava asikeikeina fanena ruarua Barau na eviniato, mo tano fakana, erovina-toreato gabuna, ĝana bene rovo-iaĝo uranai. Ĝia monai tu laĝani toitoi ma kwana beĝene naria ema beĝene ĝubu-tanua ĝana. Korana monai tu ĝuĝaia, mo mota rakavana, na asi ilaila beĝabi-karaiani.

¹⁵ Benamo ĝuĝaia, mota rakavana, bokana na nanu evaĝa-ĝaru rosiato noĝa ĝabata kavana. Ĝia eurato mo vavine tu mo ĝabata na bene ĝaru-kwareĝaia etato.

¹⁶ Senaĝi tano na mo vavine evaĝa-kavaiaato, korana tano evekeoto, benamo ĝuĝaia bokana na eraka-rosito ĝarukana mabarana eboĝeato.

¹⁷ Benamo ĝuĝaia kavana dagarana na mo vavine ebaruvini-rakavaiaato, benamo eiaĝoto, mo vavine besena, Barau ĝena taravatu guruĝari ĝekorana-iaĝirito-ĝoi ema Iesu ĝena vevarifiu guruĝari ĝevaĝa-moĝonirito-ĝoi tarimari mabarari evetari-vinirito.

¹⁸ Benamo ĝuĝaia tu kone ai ea ruĝato.

13

Davara na vevaḡa-rakava dagarana ebere-rosito, moḡa tu Keriso ḡofaḡofana

¹ Benamo au na vevaḡa-rakava dagarana ta aḡitaiato, daḡaru-bara na eraka-raḡeto. Ġia guduna mabarari tu gabanana (10), e debana mabarari tu imaima ruarua (7). Korona mabarari tu gabanana (10). Moḡeri korona tu ġia guduna tata ḡeri ai, ma debana tata ḡeri ai tu Barau vaḡa-rakavana arana.

² Mo vevaḡa-rakava dagarana aḡitaiato, moḡa ḡitaḡitana tu lepadi noḡa, (lepadi tu taiga noḡa), a kwakuna tu bea kwakuri kavana, ema bokana tu laion bokari kavana. Benamo ḡuḡaia kavana dagarana asikeikeina tauḡena ḡena seḡuka, ḡena terona, ema ḡena maoro eḡabirito, mo vevaḡa-rakava dagarana eviniato.

³ Vevaḡa-rakava dagarana debana tai tu giri baregona ta, ḡevaḡi-maseato girina, senaḡi mo manuḡa baregona tu enamoto. Tanobara tarimari mabarana mo vevaḡa-rakava dagarana ḡenai nuḡari ḡefarevaḡi-rakavato, benamo ġia murinai ḡerakato.

⁴ Tarimarima mabarari na ḡuḡaia ḡetoma-rakarigo viniato, korana ġia ḡena seḡuka tu mo vevaḡa-rakava dagarana eviniato. Ema vevaḡa-rakava dagarana maki ḡetoma-rakarigo viniato, ḡevedanaḡito, ḡekirato, “Dei tu mai vevaḡa-rakava dagarana kavana? Dei na ġia bevetari-viniani riba?”

⁵ Mo vevaḡa-rakava dagarana tu maoro eviniato tu, veiavi guruḡari ema Barau vaḡa-rakavana guruḡari bene kiragiri ḡana, ema ḡue gabana vasivasi ma ruarua (42) nuḡari ai ḡena maoro bene ḡauvei-iaḡiri.

⁶ Benamo muruna ekeoato, ma Barau vaḡa-rakavana guruḡari ekiraḡi-matamato; Barau arana ema ḡena tanu gabuna ekira-rakavarito, ema gubai ḡetanuni tarimari mabarari evaḡa-rakavarito.

⁷ E maoro eviniato, Barau ḡena vevaḡa tarimari bene vetari-viniri nuḡanai bene kokore, be ġia bene vaḡa-darereri ḡana. Ema seḡuka eviniato, doḡoro mabarari, e bese mabarari, e garo mabarari, ema tanobara mabarari bene ḡori-kauri ḡana.

⁸ Tanobarai ḡetanuni tarimari mabarari na ġia beḡe toma-rakarigo vini-ani. Maḡeri tarima tu, Barau na tanobara roḡosi bere veia veḡata, arari mo Mamoe Natuna, ḡevaḡiatio dagarana, ḡena maḡuri bukanai arari asi etorerito tarimari.

⁹ Ma seḡana tarimana tu bene seḡaḡi.

¹⁰ Barau beurani dibura numanai beḡene baru-taria betoni tarimana tu, dibura numanai beḡe baru-tariani veḡata. Barau beurani vetari baḡana na beḡene vaḡi-masea betoni tarimana tu, vetari baḡana na beḡe vaḡi-maseani. Maḡeri guruḡa na Barau ḡena tarima veaḡari evaḡa-guruḡarini, beḡene vevaḡa-gwaḡiḡi, ema ma ḡeri vetuḡamaḡikau ḡesi beḡene tanu.

Vevaḡa-rakava dagarana vaḡa-ruaruana, moḡa tu peroveta tarimana ḡofaḡofana

¹¹ Moḡa murinai au na vevaḡa-rakava dagarana ta ma aḡitaiato, tano na everaḡa-raḡeto. Ġia guduna tu ruarua, Mamoe Natuna guduna kavana, ema ġia tu ḡuḡaia kavana eguruḡato-ḡoi.

¹² Ĝia na vevaĝa-rakava dagarana giniguinena moĝa aranai ĝena maoro e seĝuka mabarari eĝauvei-iaĝirito. Ma ĝia na tanobara tanu-iaĝina tarimari mabarari elau-naĝirito, mo vevaĝa-rakava dagarana giniguinena, debana giri baregona, ĝevaĝi-maseato girina, manuĝana enamoto dagarana, beĝene toma-rakarigo vinia etato.

¹³ Mai vevaĝa-rakava dagarana vaĝa-ruaruana mainana veĝa boruri baregori ema vetoĝa irauri tari eveirito-ĝoi. Ta tu, ĝia na tarimarima mabarari ĝoirari ĝutugutunai karava guba na evaĝa-marigoato.

¹⁴ Ĝia tu vetoĝa boruri kotari eviniato, mo vevaĝa-rakava dagarana giniguinena ĝoiranai eveirito, tanobarai ĝetanuni tarimari eĝofa-darererito. Ma ekirarito, mo vetari baĝana na ĝevaĝa-beroato, ma toma roĝo emaguritani vevaĝa-rakava dagarana, moĝa gubakauna ĝana tu vetoĝana dagarana o laulauna ta beĝene veia, benamo ĝene vaĝa-ruĝa-vaisia etato.

¹⁵ Mo vevaĝa-rakava dagarana vaĝa-ruaruana tu seĝuka eviniato, vevaĝa-rakava dagarana laulauna giniguinena moĝa iaĝa bene vinia, be bene guruĝa, ema mo vevaĝa-rakava dagarana laulauna asi ĝeurani tomararigo-vinina tarimari mabarari bene vaĝi-maseri ĝana.

¹⁶ Benamo tarimarima mabarari, misiri e baregori, ma ĝeri farefare ĝutuma tarimari e asi ĝeri farefare tarimari, tuĝu-rakaorakao tarimari e fakai ĝetanuni o dia tuĝu-rakaorakao tarimari, etuĝu-naĝinaĝirito vetoĝa o maka ta ĝimari aroribari ai o bakuri ai beĝene ĝabia etato.

¹⁷ Moĝesi beĝene vei, be tarima ta dagara ta asi bene voivoi-kava o asi bene voivoi-iaĝi-kavaia, senaĝi mo vevaĝa-rakava dagarana giniguinena ĝena vetoĝa o maka, mai tu ĝia arana o arana eruĝa-borogiato numerana, ĝenai tarimana ĝereĝana moĝo dagara bene voi e bene ĝwa-voivoi.

¹⁸ Iaunega tu maiĝa: Nuĝa-mama o tuĝamaĝi-faka tarimana na mo vevaĝa-rakava dagarana numerana bene vaĝa-gaua, korana mo numera tu tarima ta numerana. Numerana tu maiĝa: 666.

14

Ginitaĝo mamoea na evoi-vaĝirito tarimari ĝeri mari

¹ Benamo aboĝeto tu, Mamoe Natuna ĝoiragu ai aĝitaiato, Siona Ĝoronai eruĝa-taĝoto-ĝoi, ema ĝia sevina tarimarima 144,000 ĝeruĝa-taĝoto-ĝoi. Bakuri ai tu ĝia arana ema Tamana arana ĝevetoreto.

² Benamo guba na garo ta ĝaruka vovoka ĝeĝaru-gwadani gururi ema guba eguruani guruna noĝa aseĝaĝirito. Mo guru tu noĝamo hap ĝelauni tarimari na ĝeri hap ĝelaurito-ĝoi gururi kavana.

³ Ĝia tu mo terona, e maĝuri dagarari vasivasi (4), ema veĝitaĝau tarimari baregori ĝoirari ai mari variguna ta ĝemariato. Tarima ta na mo mari moĝa marimarina tu asi bedoĝariani riba, senaĝi mo tanobara na ginitaĝo mamoea na evoi-vaĝirito tarimari 144,000 ĝereĝari na moĝo.

⁴ Mai tarima maiĝeri tu vavine ĝesi asi ĝekimato o asi ĝeveĝura-vanaĝito, be asi ĝemiroto, ĝia tu tauĝeri ĝevenaumato, be ĝia tu namo vedaurea. Ĝia tu Mamoe Natuna aiĝana aiĝana eiagoni nai, murina na ĝerakani. Tarimarima vekaravari ai ĝia tu Barau na voviroto, ma Barau ema Mamoe Natuna ĝeri tarimarima giniguineri ai ĝeiaĝoto.

⁵ Mururi na ĝofaĝofa guruĝana ta asi ĝekiraĝiato, ĝia ĝeri ai rakava misina ta maki asiĝina ĝinavaĝi.

⁶ Benamo au na aneru ta maia guba e tano fakari na erovoto-ḡoi aḡitaiato. Ġia ḡenai tu Vari Namona, betanu-vanaḡi vanaḡini varina. Ġia na mai Vari Namona tu tanobara mabarari, e doḡoro mabarari, e garo mabarari, ema beše mabarari tanobarai ḡetanuni ḡeri beḡene vari-fiua ḡana.

⁷ Eguruḡa-fararato, ekirato, “Barau garina boḡono vei ema Barau boḡono vaḡa-raḡea! Korana tu Ġia ḡena vevaḡa-kota aoana tu varau beragaši. Guba, e tanobara, e daḡaru-bara, ema nanu eḡaruani gaburi eveirito Barauna boḡono toma-rakariga vinya.”

⁸ Aneru vaḡa-ruaruana murina na eiaḡomato, benamo ekirato, “Beketo, Babulona baregona varau beketo. Ġia na tanobara irauirau beseri mabarari Ġia ḡena veḡura-vanaḡi wainina gwaḡiḡina evaḡa-niurito.”

⁹ Ma aneru vaḡa-toitoina Ġia murina na eiaḡomato, benamo eguruḡa-fararato, ekirato, “Bema tarima ta na mo vevaḡa-rakava dagarana ema iouiouna dagarana betoma-rakariga viniani, ema ḡena maka bakunai o ḡimanai beḡabi-raḡeani tu,

¹⁰ Ġia maki Barau ḡena baru baregona wainina beniuani. Mo baru baregona wainina gwaḡiḡina moḡa tu mabarana Barau ḡena baru kapusina nuḡanai ebubu-ḡuraiato. Ġia tu aneru veaḡari ema Mamoe Natuna ḡoirari ai karava morena e salfa nuḡanai bemidigu-midiguni.

¹¹ Ġia mo karava moreri nuḡanai beḡe midigu-midiguni goguna tu berage-vanaḡi vanaḡini asi magona. Ma vevaḡa-rakava dagarana ema Ġia vetoḡana o laulauna dagarana beḡe toma-rakariga viniani tarimari o Ġia arana makana beḡe ḡabiani tarimari tu, boḡi-laḡani asi beḡe iaḡaraḡini.”

¹² Mainana Barau ḡena tarimarima veaḡari, Barau ḡena taravatu ḡekorana-iaḡiani ema Iesu ḡenai ḡevetuḡamaḡikauni tarimari, evaḡa-gurugaḡini, beḡene vevaḡa-gwaḡiḡi ema beḡene kokore.

¹³ Benamo guba na garo ta ma aseḡaḡiato, ekirato, “Maiḡeri guruḡa notoreri: Maitoma beiḡoni tu, Vereḡauka ḡena maḡuri nuḡanai ḡetanuni tarimari beḡe maseni tu beḡene iaku.” Iauka Veaḡa evaḡa-veseto, “Oi, Ġia tu ḡeri ḡauvei e vekwaraḡi na beḡe iaḡaraḡini, korana tu ḡeri veiḡa namori Ġia ḡesi beḡe iaḡo-sebonani.” (Moḡa anina tu, ḡeri vekwaraḡi voina namona beḡe doḡariani veḡata).

Tanobarai kwakwa ḡarona

¹⁴ Benamo aboḡe-iaḡoto, magube kurokurona ta aḡitaiato, ma mo magube kurokurona iatanai tu Tarimarima Natuna noḡa tarimana etanuto. Ġia debanai tu golo koronana ta, ma ḡimanai tu baḡa ḡeḡevana masikona ta.

¹⁵ Benamo aneru ta maia Rubu Veaḡa na ema raka-rosito, bena magube kurokurona iatanai etanuto tarimana ekea-farara viniato, ekirato, “Gemu baḡa ḡeḡevana noḡabi-vaisha, benamo ḡaniḡani dagarari nobasi-vaḡiri! Korana kwakwa o basibasi ḡarona varau beragaši, tanobarai ḡaniḡani tu beḡe maḡe-ḡosi.”

¹⁶ Benamo mo magube iatanai etanuto tarimana ḡena baḡa ḡeḡevana tanobara iatana na edave-vanaḡiato, benamo tanobara ḡaniḡanina ebasi-vaḡiato, eḡabiato.

¹⁷ Aneru ta maia guba na Rubu Veaḡa nuḡana na ema raka-rosito. Ġia maki ḡimanai tu baḡa ḡeḡevana masikona ta.

¹⁸ Aneru ta maia fata veaḡana na eiaḡomato. Ġia tu karava eḡita-ḡauato-ḡoi aneruna. Ġia eiaḡomato, benamo baḡa ḡeḡevana masikona eḡabiato aneruna ekea-farara viniato, ekirato, “Gemu baḡa ḡeḡevana masikona

noġabia, ma tanobara vinena ġwari ġureri nokari-vegogori, korana vine ġwari (o grapes) tu varau beġe maġe.

¹⁹ Benamo mo aneru na ġena baġa ġeġevana moġa vaġa-sebona edaveato, benamo tanobara iatana vine ġwari mabarari ebasi-vaġa-vegogorito. Benamo moġesi mabarabarari eġabirito, ma vine ġwari ġefanarini gabunai ea bubu-toġarito. Mo vine ġwari ġefanarini gabuna moġa, mo tu Barau ġena baru ekiraġiani gabuna.

²⁰ Mo vine ġwari mabarari vanuġa baregona murikanai vine ġwari ġefanarini gabunai ġefanafana-taririto-ġoi gorari beġene riġo ġana. Benamo vine ġwari ġefanarini gabuna na rara eġaru-rosito. Rara eġaru-rosito ġena geboka tu tano bevaraġe mo, hosi muruna dokona, ma ġena mauka tu stadia 1,600 o 300 kilomita.

15

Aneru imaima ruarua (7) ġeri ai vevaġa-midigumidigu dagarari rakavari
7

¹ Benamo gubai vetoġa baregona ta, nuġa-farevaġi dagarana aġitaiao: Aneru 7 aġitarito, ġeri ai tu dagara rakava kwaikwairi 7, tarimarima vaġa-midigumidiguri dagarari. Mo tu dagara rakavari magona. Korana moġeri na Barau ġena baru bevaġa-kori ginikauani.

² Ma davara ta veġia kavana ma karavana aġitaiao. Mo davara sevinai tu mo tarimarima, vevaġa-rakava dagarana ema ġia laulauna dagarana ema ġia arana ekiraġiani numerana ġevaġa-ketorito tarimari, ġeruġa taġoto-ġoi aġitarito. Ġia ġimari ai tu Barau na evinirito hapiri ġeġabi-taġorito-ġoi,

³ ma Barau ġena vetuġunaġi tarimana, Mose, ġena mari ema Mamoe Natuna ġena mari ġemariato-ġoi,

“Vereġauka o, ġoi tu
Iaru-korokoro Barauna,
ġemu ġauvei tu barego,
asi tau vaġa-ilailana

ema namo vedaurea. Ġuru mabarari ġeri Vere o,
ġoi ġemu dabara tu iobukaiobuka ema moġoni veġata.

⁴ Vereġauka o, deikara na ġoi asi begari-vinimuni,
ma ġoi aramu asi bevaġa-raġeani?

Korana tu ġoi moġo ġereġamu veaġa.

Tanobara mabarari tarimari beġe iaġomani,
benamo ġoi beġema toma-rakarigo vinimuni.

Korana tu ġemu veġa iobukaiobukari varau beġema fofori.”

⁵ Maiġa murinai au aboġe-iaġoto, benamo gubai Rubu Veaġa, mo tu Barau na ġena guruġa moġoniri evaġa-foforirini farai numana veaġana, evekeoto aġitaiao.

⁶ Mo aneru imaima ruarua (7), ġeri ai tu tarimarima vaġa-midigumidiguri dagarari rakavari; farai numana veaġana na ġeraka-rosito, dabuġa gwaġiġiri namori ema veġia-veġiari na ġevedabuġato, ema kobari ai tu golo beletari ġetore-ġeġeraġirito.

⁷ Benamo mo maġuri dagarari vasivasi vekaravari ai ta na mo aneru 7 golo diġuri 7 evinirito. Mo golo diġuri tu tanu-vaġivanaġi Barauna ġena baru na evaġa-vonu fokafokarito.

⁸ Benamo mo Rubu Veaġa tu Barau marevana goġuna ema seġukana goġuna na evaġa-vonuato. Tarima ta Rubu Veaġa nuġanai asi roġo

beraka-toĝani riba, beiaĝoni mo, tarimarima vaĝa-midigu-midiguri dagarari rakavari 7 beĝe korini vau.

16

Barau ĝena baru diĝu imaima ruarua (7) nuĝari ai

¹ Benamo garo baregona ta Rubu Veaĝa nuĝana na eiaĝomato aseĝaĝiato. Mo garo na tu aneru 7 evaĝa-guruĝarito, ekirato, “Ĝoiago, Barau ĝena baru na evaĝa-vonurito diĝuri 7 manĝeri tanobara iatanai ĝoa bubu-firiĝori.”

² Aneru giniguinena eiaĝoto, ĝena diĝu tanobara iatanai ea bubu-kauato. Benamo manuĝa ĝitaĝitari rakava kwaikwairi ma midiguri maki asikeikeiri vevaĝa-rakava dagarana ĝena vetoĝa o maka ĝeĝabiato ema ĝia iouiouna dagarana ĝetoma-rakariĝo viniato tarimari na ĝeĝoitaĝorito.

³ Aneru vaĝa-ruarua ĝena diĝu tu davarai ebubu-riĝoato. Benamo mo davara tu mase tarimana rarana kavana eveito, ma nuĝanai maĝuri ĝetanuni dagarari mabarari ĝemaseto.

⁴ Aneru vaĝa-toitoina ĝena diĝu tu ĝarukai ema nanu eĝaruani gaburi ai ebubuato, benamo rarai ĝeiaĝoto.

⁵ Benamo nanu eĝita-ĝauani aneruna garona aseĝaĝiato, ekirato, “Veaĝa Baraumu, ĝoi tu tovtovonai otanuto-ĝoi, ema initoma maki otanuni. Goi ĝemu kota-vini ĝauveina tanobara tarimari ĝeri ai maiĝesina oveiani tu maoro korikori moĝo.

⁶ Korana ĝia na goi ĝemu tarimarima veaĝari ema peroveta tarimari rarari ĝevaĝa-riĝorito.

Moĝesina naima ĝeri veiĝa lorinai, be rara boviniri beĝe niu.”

⁷ Benamo Barau ĝena fata veaĝana na garo ta eiaĝomato aseĝaĝiato, ekirato, “Vereĝauka o, ĝoi tu moĝoni veĝata Iaru-korokoro Barauna, ĝemu kota-vini ĝauveiri tu dabara moĝoninai ema maoronai oveiani.”

⁸ Aneru vaĝa-vasivasina ĝena diĝu tu ĝaro iatanai ebubu-kauato. Benamo garo seĝuka eviniato, tarimarima karava na bene ĝarari ĝana.

⁹ Benamo mo ĝaro seĝukana gugurana baregona na tarimarima eĝararito. Ma monana tarimarima tu asi ĝevetuĝamaĝi-kureto, benamo Barau asi ĝevaĝa-raĝeato, ne ĝia na tu Barau arana ĝevaĝa-rakavaiato. Barau tu ma ĝena maoro baregona maiĝeri midigumidigu dagarari rakavari bevaĝa-ĝorarini e asi bevaĝa-ĝorarini.

¹⁰ Aneru vaĝa-imaimana ĝena diĝu tu vevaĝa-rakava dagarana ĝena terona iatanai ebubu-kauato, benamo ĝena veĝitaĝau gabuna tu emukunafurufuruto. Benamo tarimarima midigumidigu baregona na eĝabirito, ma meari ĝekafu-taririto.

¹¹ Mo midigumidigu ema manuĝa dairi ai, ĝia na gubai etanuni Barauna ĝevaĝa-rakavaiato. A ĝia tu asi ĝeurato ĝeri veiĝa rakavari ĝerina beĝene vetuĝamaĝi-kure.

¹² Aneru vaĝa-imaima sebonana (6) ĝena diĝu tu Eufrate ĝarukana baregona nuĝanai ebubu-ĝuraiato. Benamo mo ĝaruka baregona eroroto, ĝaro eraĝeni rekana na kini (ma ĝeri vetari doĝorori ĝesi) beĝe iaĝomani, moĝeri ĝeri dabara evaĝa-fakaiato.

¹³ Moĝa murinai iauka rakavari toitoi farakeĝo noĝa moĝo aĝitarito. Ta tu dagara ta ĝuĝaia kavana, (mai tu Satani), bokana na ema raka-rosito, ta tu

vevaĝa-rakava dagarana, (mai tu Keriso ĝofaĝofana), bokana na ema raka-rosito, ma ta tu peroveta ĝofaĝofa tarimana bokana na ema raka-rosito.

¹⁴ Mo iauka moĝeri tu demoni iaukari, ĝia na vetoĝa irauirauri ĝeveirito-ĝoi, ema ĝeiaĝoto tanobara mabarana kiniri ĝeri ai, beĝenea vaĝa-vegogori, be Iaru-korokoro Barauna ĝena ĝaro baregonai tu Barau beĝene vaĝa-vevaĝia ĝana.

¹⁵ “Noseĝaĝi! Au tu lema tarimari kavana baiaĝomani! Bevaĝa-noga-taĝoni ema ĝena dabuĝa kefinai bevei-taĝorini tarimana tu bene iaku. Korana ĝia tu kefina kori asi beiaĝoni, benamo ĝutuma-bara nuĝanai asi bemaiakaiani.”

¹⁶ Benamo demoni iaukari toitoi na kini mabarari ĝeĝori-vegogorito gabu tai, Heberu garori ai mo gabu arana tu Amagedon.

¹⁷ Aneru vaĝa-imaima ruaruana (7) ĝena diĝu tu guba fakana ebubuato, benamo Rubu Veaĝa nuĝana na garo baregona ta terona na eiaĝomato, ekirato, “Varau bekori!”

¹⁸ Benamo kiriku eragato, e garo gururi tari ĝeraĝeto, e guba eguruato, ema tano-iaga baregona eragato. Tarimarima tanobarai ĝetanu-guineto, monana beiaĝoma mo initoma moĝesi tano-iaga ta tu asi eĝorato. Moĝa tu tano-iaga barego lelevaĝina veĝata.

¹⁹ Benamo vanuĝa baregona evetavito, tavi toitoi ĝevetoreto, ema tanobara mabarari vanuĝari maki ĝeĝwa-kafu kafurito. Barau na vanuĝa baregona Babulona ma etuĝamaĝi-ĝenoĝoiato, benamo Barau ĝena baru ema nuĝa-ĝirimaĝirima wainina na evaĝa-vonu fokafokaiato kapusina eviniato, bene niua ĝana.

²⁰ Benamo motumotu mabarari ĝeraga-rekwarekwato ema ĝoro maki ĝerekwarekwato, be asiĝina.

²¹ Ma guba na aisi, fore noĝa asikeikeiri, ĝeri meto tu pauna sinau sebona (100) kavana, tata tarimarima iatari ai ĝeketokauto. Benamo mo tarimarima na Barau guruĝa rakavari ĝeviniato-ĝoi, korana mo aisi, fore noĝa asikeikeiri, iatari ai ĝeketokauto-ĝoi dainai. Korana mo vevaĝa-midigumidigu dagarana rakavana moĝa tu rakava kwaikwaina.

17

Babulona - veĝura-vanaĝi vavinena baregona

¹ Benamo mo diĝu imaima ruarua (7) ĝeĝabi-taĝorito-ĝoi aneruri fakari ai ta tu au rekegu ĝana eiaĝomato, benamo au ema vaĝa-guruĝaguto, ekirato, “Noiaĝoma, be veĝura-vanaĝi vavinena baregona ĝena veĝura-vanaĝi voina metona beĝabiani metona navaĝa-ĝitamu. Ĝia tu nanu vovoka iatari ai etanuni.

² Tanobarai ĝetanuni vereri baregori o kiniri mabarari tu ĝia ĝesi ĝeveĝura-vanaĝito. Ema tanobarai ĝetanuni tarimari maki ĝia ĝena veĝura-vanaĝi wainina na ĝeniu-babobaboto.”

³ Benamo Iauka Veaĝa na eborogiguto, aneru ta na eĝwa-rakaguto, tano fakana ĝana eĝwa-iaĝoguto. Monai vavine ta aĝitaiato, vevaĝa-rakava dagarana kakakakana ta iatanai etanu-taĝoto-ĝoi. Mo vevaĝa-rakava dagarana taŝanina tu Barau vaĝa-rakavana arari ĝevaĝa-vonuato. Ĝia debana mabarana imaima ruarua (7), ema guduna tu gabanana (10).

⁴ Mo vavine tu dabuĝa kakakakari ema koturi kakakakari o pepolori namo vedaureari erigoto, ema golo e fore nauĝanauĝari ema aĝeva ma marevari na everato. Gimana tu golo kapusina ta eĝabiato. Mo golo

kapusina tu veīga rakava kwaikwairi ema ġena veġura-vanaġi mirori na evonu-fokafokato.

⁵ Ġia bakunai tu ara ta ġeberaiato, anina maki vekuretoġa, maīġesi ġetoreato, “Babulona barana, veġura-vanaġi sinari ema tanobarai veīga rakava kwaikwairi mabarari sinari.”

⁶ Benamo au na mo vavine aġitaiato, Barau ġena tarimarima veaġari, ġevaġi-maserito tarimari, rarari eniurito, be eniu-babobaboto. Mo tu lesu ġevaġa-moġoniato-ġoi nai, ġevaġi-maserito tarimari rarari. Au na ġia aġitaiato nai, aġaba-rakavato.

⁷ Benamo mo aneru na ekiraguto, ekirato, “Ġoi tu kara dainai oġaba-rakavani? Mani vavine maniġa varina vekuretoġana ema mani vevaġa-rakava dagarana iatanai berage maniġea, mani debana 7 ma ġena gudu 10, varina vekuretoġari tu nakiravara-ginikaumu.

⁸ Mo vevaġa-rakava dagarana boġitaia, moġa tu guinenai etanuto-ġoi, ma ġia toma tu asi tauna. Ġia tu tano gabigabina guri variġo kwareġana na bema raka-rosini, benamo beiaġoni gabuna rakava kwaikwaina, midigu-midigu baregona bea ġabiani. Tanobarai ġetanuni tarimari, Barau na tanobara eveiato monana veġata arari maġuri bukanai asi etorerito tarimari, na mo vevaġa-rakava dagarana ġeġitaiato nai tu, nuġari ġefarevaġi-rakavato. Korana ġia tovotovonai tu etanuto-ġoi, ma toma tu asi tauna, senaġi ġia tu ma beiaġomani.

⁹ Iaunega tarimana na maīga bene tuġamaġi-fakaia. Mo deba 7 tu mo vavine etanukauni ġorori 7.

¹⁰ Ma ġia aniri ta maki vere baregori o kini 7. Vere barari imaima tu ġeketoto, sebona tu roġo eruġa-taġoni, ma ta tu roġosi bene iaġoma. A ġia beiaġomani tu, mai tanobarai asi betanu-maukani.

¹¹ Mo vevaġa-rakava dagarana guinenai etanuto-ġoi, ma initoma ġia tu asi tauna, maniġa tu kini vaġa-imaima toitoina (8). Ġia tu mani vere baregori o kini 7 karori ta, ma ġia tu beiaġoni gabu rakava kwaikwaina midigumidigu barego bea ġaniani.

¹² Mo gudu 10 oġitarito, moġeri mo tu kini 10. Ġia tauri 10 tu kini dagina ema beġe ġita-ġaurini tano-barari roġosi beġene ġabiri. Senaġina ġia tu aoa sebona mo vevaġa-rakava dagarana ġesi kini kavana veġitaġau maorona baregona beġe ġabiani.

¹³ Ġia ġeri tuġamaġi tu sebona moġo, ema ġeri seġuka e maoro baregona tu mai vevaġa-rakava dagarana beġe viniani.

¹⁴ Ġia na Mamoe Natuna beġe vetari-viniani, senaġi Mamoe Natuna na bevaġa-ketorini, korana ġia tu vere mabarari ġeri Vere, ema kini mabarari ġeri Kini. Ema ekearito e eġabi-viriġirito ema ma vetuġa-maġikauri ġesi ġia murinai ġerakani tarimari maki ġia ġesi beġe kokoreni.”

¹⁵ Benamo mo aneru na ekiraguto, ekirato, “Mo veġura-vanaġi vavinena etanu-taġoni nanuri boġitari, moġeri tu tanobara beseri, tarima ġutuma gorogoro, tanobara iraurau tarimari, ema garo iraurau tarimari boġitari.

¹⁶ Mo vevaġa-rakava dagarana ema mo gudu 10 boġitari dagarari, mani veġura-vanaġi vavinena tu beġe iau-rakavaiani. Ġia na asi ġena farefare ai beġe vaġa-iaġoani, e dabuġana ġenana beġe fuki-vagiirini, tauganina kori beġe vaġa-rakaiani; viriġona beġe ġaniani ema karavai beġe gabu-raġeani.

¹⁷ Korana Barau na maniġeri kini nuġari ai evaġa-urato, ġia ġena ura beġene veia etato. Moġesina naima ġia maki ġeurato nai, ġeri seġuka mo

vevaĝa-rakava dagarana beĝene vinia, be bene veĝorikau, bene iaĝo mo, Barau ĝena guruĝa mabarari beĝenea ĝuguru.

¹⁸ Ema mo boĝitaia vavinena tu vanuĝa baregona. Ĝia na tanobara vereri o kiniri mabarari eĝori-kaurini.”

18

Babulona beketoni

¹ Maĝa murinai aneru ta ma ĝena seĝuka baregona ĝesi guba na emariĝoto aĝitaiato. Ĝia marevana mamana na tanobara emama-vaĝa-ĝauato.

² Benamo tuĝana maki asi ekoĝoto, ekirato, “Beketo! Vanuĝa baregona Babulona tu beketo! Ĝia tu demoni ĝeri tanu gabunai beiaĝo, e iauka rakavari ema iauka mirori, e manu rakava kwaikwairi ĝeri tanutaĝo gabunai beiaĝo.

³ Korana tu bese mabarari na ĝena wain ĝenuato nai ĝevei-babobaboto; mo wain tu ĝena veĝura-vanaĝi ĝauveiri. Tanobarai ĝetanuni kiniri mabarari tu ĝia ĝesi ĝeveĝura-vanaĝito, ema tanobarai dagara ĝeĝwa-voivoirini tarimari maki ĝia ĝena farefare namori ĝerina farefare vovoka tarimari ai ĝeiaĝoto.”

⁴ Moĝa murinai tu guba na garo ta eiaĝomato ma aseĝaĝiato, ekirato, “Ĝegu tarima mabarami, mai vanuĝa baregona ĝenana ĝoma raka-rosi. Be ĝia ĝena vei-rakava veigari asi boĝono veiri, ĝia na vevaĝa-midigumidigu dagarari rakavari beĝabirini dagarari ĝomi na asi boĝono ĝabiri.

⁵ Korana ĝia ĝena vei-rakava tu iatai-iatai bevesenu-senukau, bevaraĝe mo, guba vanuĝana maki bea doĝaria. Senaĝi Barau na ĝena veĝa, asi maorori dagarari, etuĝamaĝi-taĝorini, asi etuĝa-rekwarini.

⁶ Ĝia na ĝomi evinimito ilailana ma boĝono vini-vaĝa-voia. Ĝena veĝa voina ilailana moĝa boĝono vaĝa-ruaia, benamo boĝono vinia. Niuniu wainina kapusi sebona ĝomi evinimito nai tu, ĝena kapusi korikori ai niuniu wainina moĝa nuĝanai ta maia boĝono bubu-ĝuraia, boĝono vaĝa-ruaia, benamo voina boĝono vinia.

⁷ Tauĝena eveĝabi-varaĝeto ema eĝani-namoto-ĝoi ema etanu-namoto-ĝoi ilailanai, midigumidigu boĝono vinia ema boĝono vaĝa-taĝitaĝia.

Ĝia nuĝanai tu eveiavini, ekirani, ‘Au tu kwini o vere vavinena kavana atanuni. Au tu dia vabu ema asiĝina ĝinavaĝi bataĝi-vanoro vanoroni.’

⁸ Moĝesina naima ĝia tu garo sebona nuĝanai moĝo midigumidigu iraurau na beĝe vaĝa-ketoani, mo tu mase, taĝi-vanorovanoro, ema doĝe ĝenai beĝe raĝasini.

Ma ĝia tu karava na beĝaraiani. Korana ĝia ĝeri rakava voina beviniani Barauna tu Barau Vereĝauka, ma ĝia tu ma seĝukana.”

⁹ Tanobara kiniri, ĝia ĝesi veĝura-vanaĝi veigari ĝeveito ema ĝia ĝesi ĝeĝani-namoto-ĝoi e ĝetanu-namoto-ĝoi kiniri, na ĝia beĝaraiani goguna beĝe ĝitaiani nai tu, taĝina beĝe veini, ema beĝe taĝi-vanoroani.

¹⁰ Ĝia ĝena midigumidigu beĝe ĝitaiani, moĝa garina na manaĝi beĝe ruĝani, benamo beĝe taĝi-guruĝani, beĝe kirani,

“Vetuḡamu! Siti baregona vetuḡamu kekei!

Babulona o, seḡuka rakava sitina!

Goi tu aoa sebona nuḡanaŋi moḡo ḡemu rakava voina metona bogabia!”

11 Tanobarai dagara ḡeivoivoi-iaḡirini tarimari beḡe taḡini ema beḡe taḡi-vanoroani, korana ḡeri voivoi-iaḡi farefareri tu asi voivoiri tarimana ta.

12 Mo tu ḡeri golo, e silva, e fore namo vedaureari voiri barego foreri, ema aḡeva marevari asi-gadara dagarari; dabuḡa namori gwaḡiḡiri, e dabuḡa kota kakakakari o pepolori, e dabuḡa silikari, ema dabuḡa kakakakari; ma bonari ḡauri, e elefani doḡari na ḡeveirini dagarari irauirauri, e ḡau voiri barego ḡauri na ḡeveirito dagarari, e auri boraborari e auri namori ema mabolo na ḡeveirito dagarari;

13 ḡaniḡani mamiri vaḡa-namori muramurana arana sinamon, e ma bonari muramurari, e goḡu ma bonana eveiani muramurana, e bonana namona muramurana arana muro, e tauḡani ai ḡedauani muramurana arana frenkinsensi; vine nanuna, e olive diḡana, farao ema widi, boromakau ema mamoe, hosi ema kariota, e ma tarimarima maki.

14 Beḡe kirani, “Ḡau ḡwaḡwana bono ḡabia otato-ḡoi uradikana oveito-ḡoi dagarana tu ḡemuna beveḡita. Ḡemu farefare vovoka ema ḡemu mareva mabarari beḡe rekwa-rekwa, asi bodoḡari-ḡenoḡoirini maia!”

15 Dagara ḡeḡwa-voivoini tarimari na maḡeri dagara ḡeivoivoi-iaḡirito ema ḡia ḡenana farefare vovoka ḡeḡoitaḡoto, moḡeri tu manaḡai beḡea ruḡani, mo midigumidigu ḡia na beḡabiani moḡa garina. Ḡia tu beḡe taḡi-rakava rakavani ema beḡe taḡi-vanoroni,

16 ema beḡe taḡi-guruḡa guruḡani, beḡe kirani,

“Vetuḡamu! Vanuḡa baregona, vetuḡamu kekei!

Dabuḡa namori gwaḡiḡiri, e dabuḡa kota kakakakari o pepolori, ema kakakakari na ovedabuḡato; golo kimorekimoreri, e fore namo vedaureari, ema gudugudu marevari asi-gadarana oveiato-ḡoi.

17 Aoa sebona nuḡanaŋi moḡo ḡemu farefare vovoka tabutabu mabarari benamo beḡema kori-ketovaḡi!”

Bouti baregori ḡeḡwa-raḡarini tarimari mabarari, e bouti ai davara na ḡeragani tarimari mabarari, e bouti ai ḡeḡauveini tarimari, ema davara maḡaniri ma dagara tari ḡerina ḡeri-ḡari ḡeḡoitaḡoni tarimari mabarari manaḡai ḡea ruḡato.

18 Benamo eḡaraiato goḡuna ḡeḡitaŋi nai tu, maḡesina ḡekirato, ‘Mai vanuḡa baregona tu irau veḡata, siti ta maḡesina kavana tu asi etanuto-ḡoi.’

19 Benamo tano-kauri debari ai ḡebubukauto, ḡetaḡito e ḡetaḡi-vanoro vanoroto, ḡekirato,

“Vetuḡamu kekei! Vanuḡa baregona vetuḡamu kekei!

Ma ḡeri bouti davarai tarimari tu ḡia ḡena taḡa ḡenana farefare vovoka ḡeḡoitaḡoto, ene?

Aoa sebona nuḡanaŋi ḡia tu asi ḡena farefare tai moḡo beiaḡo.

20 Guba vanuḡana o, ḡia ḡena keto iakuna ḡovei.

Barau ḡena tarima veaḡami,

e apostolo tarimami,

ema peroveta tarimami,

ḡoiaku ḡoverere;

korana ḡomi veḡa rakavari evei-vinimito dainai, Barau na ḡena rakava voina bevinia.”

²¹ Benamo aneru kokore rakavana ta na fore ta widi ġegiro-iaġirini diġuna baregona ta kavana eġabiato. Mo fore-diġuna moġa eġabi-vaisiato, benamo davara i efu-reiato, benamo ekirato, “Vanuġa baregona Babulona tu maiġesi ma baruri ġesi beġe fiu-tariani, benamo berekwarekwa-moġovaġini, asi ġitaġitanai ma beiaġoni.

²² Hap ġelauni ma mari ġeġabini gururi, e ivirikou ġefururuni ema dudu ġefururuni gururi ġoi ġemu maninai asi ma beġe seġaġi-ġenoġoirini. Ġauvei namori ma ribari tarimari ġoi nuġamu ai asi ma beġe tanu-ġenoġoini. Widi ġegiro-iaġirini foreri gururi maki maninai asi ma beġe seġaġi-ġenoġoirini.

²³ Maninai lamefa mamari asi ma beġe ġara-ġenoġoini. Veġaraġo variġu tauna e vavinena garona ta maki maninai asi ma beġe seġaġi-ġenoġoiani.

Ġoina dagara voivoi-iaġiri tarimari mai tanobara nuġanai ġia tu tarima baregori.

Ġoi ġemu meġameġa tovoġari na tanobara irauirau mabarari oġori-darererito.

²⁴ Peroveta tarimari e Barau ġena tarimarima veaġari ġevaġirito rarari, ema tanobara iatanai tarimarima ġevaġirito rarari mabarari maki Babulona vanuġa baregona nuġanai ġea ġoitaġorito.”

19

Kokore marina gubai

¹ Moġa murinai tu noġa moġo tarimarima asisebo-asisebo garori gururi gubai ġekoġoto-ġoi aseġaġirito, ġekirato, “Haleluia!

Vevaġa-maġuri, e mareva baregona, ema seġuka tu ġita ġera Barau ġena.

² Korana ġia tu dabara roroġotonai evevaġa-kotani ema rakava voiri evinini. Ġia na veġura-vanaġi vavinena baregona vei-rakava voina meto lelevaġina bevinia.

Mai veġura-vanaġi vavinena na mai tanobara mabarana ġena veġura-vanaġi veġana na bevaġa-rakava kwaikwaia.

Barau na ġena vetuġunaġi tarimari rarari evaġa-rigorito ġaramanai, rakava voina meto lelevaġina bevinia.”

³ Ma ġekoġo-ġenoġoito, ġekirato, “Haleluia!

Vanuġa baregona ġenana eraġeni goġuna tu asi bedokoni, mo goġu tu beaġe-vanaġi vanagini.”

⁴ Benamo mo veġitaġau tarimari gabanana ruarua ma vasivasi (24) ema mo maġuri dagarari vasivasi ġevetui-tarito, benamo Barau ġena teronai tanutaġo ġetoma-rakariġo viniato-ġoi, maiġesi ġekirato, “Amen, Haleluia!”

Mamoe Natuna ġena veġaraġo verekona

⁵ Benamo mo terona na garo ta eiaġomato, ekirato,

“Barau ġena vetuġunaġi tarimami mabarami,

e Barau garina ġogarini tarimami, misina na beiaġo mo baregona, ġera Barau ġovaġa-raġea!”

6 Benamo au na guru ta noġa moġo ġutuma-bara gururi kavana aseġaġiato, noġa ġaruka ġutuma ġeġaru-gwadani gururi kavana, ema noġa guba eguru-ani guruna baregona kavana, ġekoġoto-ġoi, ġekirato,

“Haleluia!

Ġita ġera Iaru-korokoro Barauna tu roġo Vere baregona etanuni.

7 Mabarara si-iaku, siverere, ema sivaġa-raġea, korana tu Mamoe Natuna ġena veġaraġo ġarona varau bema raġasi, ema ġaraġona maki beġe ġabi-torea.

8 Dabuġa kurokurori gwaġġiri namori, namoka-namokana, miro misina ta maki asiġina ġinavaġi na ġevaġa-dabuġaiato.”

Mo dabuġa kurokurori gwaġġiri namori tu Barau ġena veaġa tarimari ġeri vei-iobukaiobuka ekiragiri.

9 Benamo mo aneru na au ekiraguto, ekirato, “Maġesi notorea: ‘Mamoe Natuna ġena veġaraġo ġani-vegogona uranai ġekea-kaurito tarimari tu beġene iaku!’ ” Ma ekiraguto, ekirato, “Mai tu Barau ġena guruġa moġoniri!”

10 Benamo au mo aneru kwakuna koranai avetui-tarito, natoma-rakarigo vinia ġana. Senaġi ġia na ekira-ġoiguto, ekirato, “Maniġesi tu asi novei! Au maki vetuġunaġi tarimagu ġoi kavana, ema ġoi tarikakamu Iesu varina guruġari ġevaġa-moġonirini tarimari kavana. Barau moġo notoma-rakarigoa! Korana Iesu ġena vevarifitu guruġari na tu tarimarima elaunaġirini, peroveta guruġari beġene kiraġi-foforiri.”

Hosi kurokuronai eraġeto tarimana

11 Ma au aboġeto, guba evekeoto, benamo ġoiragu ai hosi kurokurona ta aġitaiato. Mo hosi iatanai eraġeto tarimana arana tu “Vetuġamaġikau” ema “Moġoni” ġetato. Ġia tu veiġa iobukaiobukanai evevaġa-maoroni ema evetarini.

12 Ġia matana tu karava moreri kavana, ema debanai korona tu asisebo. Ġia ġenai ara ta evetoreto, mo ara tu ta asi ribana, ġia ġereġana moġo ribana.

13 Ġia tu rara na evonuto dabuġana na evedabuġato, ema arana tu “Barau ġena Guruġa”.

14 Guba vanuġana ġena vetari doġorona tu ġia murina na ġeraka-naġi-rakanaġito-ġoi. Ġia mabarari tu dabuġa gwaġġiri namori, kurokurori ema namoka-namokari na ġevedabuġato, ma hosi kurokurori ai ġeraġeto.

15 Ġia bokana na tu vetari baġana raga-rakavarakava ema raka-rosito. Tanobara irairau beseri tu mai vetari baġana ma ragana mainana be-basirini. Ġia na auri togoina na beġori-kaurini ma seġukana baregona ġesi. Ma vine ġwaġwari ġefanarini kavana bea fana-taririni. Moġa mo tu Iaru-korokoro Barauna ġena baru baregona bevaġa-raka-rosiani gabuna.

16 Dabuġa maukana eriġoato ġenai ema manininaġi tu mai ara maġa etoreato, “Kini mabarari ġeri Kini ema vere mabarari ġeri Vere.”

17 Benamo au na aneru ta ġaro nuġanaġi eruġa-taġoto-ġoi aġitaiato. Mo aneru na guba fakana ġerovoni manuri ekea-farara vinirito, ekirato, “Ġoiaġoma, Barau ġena ġanivegogo baregonai ġoma rovo-vegogo.

18 Be tanobara vereri barari viriġori, e vetari doġorori ġeri veġorikau tauri baregori viriġori, e kokore lelevaġi tarimari viriġori, ema hosi viriġori e hosi ai ġeraġeni tarimari viriġori, ema tarimarima mabarari, tuġu-rakaorakao tarimari e fakai ġetanuni tarimari, tarima keiri e baregori, mabarari viriġori boġonoma ġaniri!”

¹⁹ Benamo au na vevaġa-rakava dagarana ema tanobara vereri baregori ma ġeri vetari doġorori ġesi vegogotaġo aġitarito. Ġia tu hosi kurokuronai eraġeto tarimana ma ġena vetari doġorori ġesi beġene vetari-viniri ġana ġevevogoto.

²⁰ Senaġi mo vevaġa-rakava dagarana ġeġabi-tariato, ema peroveta tarimana ġofaġofana maki, mai tu nuġa-farevaġi vetoġari boruri vevaġa-rakava dagarana aranai eveirito-ġoi tarimana. Mai vetoġa boruri maiġeri na vevaġa-rakava dagarana ġena maka ġeġabiato tarimari ema ġia vetoġana o laulauna dagarana ġetoma-rakarigoani tarimari eġofa-darererini. Ġia tauri ruarua tu kou karavana morena asikeikeinai e salfa nuġanai ġefi-ġururito.

²¹ Ma kotari tu hosi ai eraġeto tarimana bokana na vetari baġana eraka-rosito monana evaġi-masemaserito, ma manu mabarari ġeiaġoto, ġia viriġori ġeġani-ġosiġosirito.

20

Laġani 1,000 nuġanai kara beġorani

¹ Benamo au na aneru ta guba na emariġoto aġitaiato. Ġimanai tu guri variġo kwareġana, (iauka rakavari ġeri dibura), kina, ema tavi ta ġimanai tu seini asikeikeina ta.

² Ġia na mo ġuġaia kavana dagarana baregona eġabi-tariato, mo tu sene bava motana, arana tu Diabolo o Satani. Mo aneru na seini na ebarubaruato, benamo ġia tu laġani 1,000 moġesi barutarinai betanuni.

³ Ma aneru na eġabiato, guri variġo kwareġanai efiu-ġuraiato, benamo guri eloka-ġauato, ema ekadakada-ġauato. Aneru na Satani moġesina eveiato anina tu, tanobara iraurau beseri asi bene ġofari, bene iaġo mo, laġani 1,000 benea kori. Moġa murinai bekeo-vaġiani, benamo murikai ġaro viravira ta moġo ma betanuni.

⁴ Ma terona kotari ma aġitarito. Mo terona iatari ai tu Barau na Kota beġene seġaġi maorona evinirito tarimari ġetanuto. Ma aboġeto tu, Iesu varina guruġari ġevaġa-moġonirito e ġekiraġi-foforirito ema Barau ġena guruġa ġaramanai debari ġebasi-ġuturito tarimari ia ukari maġuri aġitarito. Ġia tu mo vevaġa-rakava dagarana ema ġia vetoġana o laulauna ġeveiato dagarana asi ġetoma-rakarigo viniato, ema ġena maka bakuri ai o ġimari ai asi ġevaġa-kafarito. Ġia tu ġemaġuri-ġenoġoito, benamo Keriso ġesi laġani 1,000 ġevereto.

⁵ Mase na variġisi-ġenoġoi giniguinena tu moġa. Mase tarimari kotari tu asi roġo ġemaġuri-ġenoġoito mo, laġani 1,000 ea korito.

⁶ Mai mase na variġisi-ġenoġoi giniguinena beġe variġisini tarimari tu beġe iakuni ema vevaġa-namo barego beġe doġariani. Ġia tu mase vaġa-ruaruana seġukana na asi begabirini. Ġia tu Barau ema Keriso ġeri Rubu Veaġa vereri ai beġe iaġoni, ema Keriso ġesi mo laġani 1,000 nuġanai beġe vereni.

Satani ġena keto

⁷ Mo laġani 1,000 bekorini murinai, Satani tu ġena dibura gabuna na beġe keo-vaġiani,

⁸ benamo beiaġoni, tanobara iraurau beseri tanobara daiguni vasivasi nuġanai ġetanuni, mai tu Gog ema Magog, bea ġofa-taġuitaġuirini. Ġia mabarari bea ġori-vegogorini, vetari beġene veia ġana. Ġia mabarabarari beġe vegogoni tu, noġa kone mirina kavana asisebo-asisebo.

⁹ Tanobarana na beĝe raka-iaĝoni, benamo Barau ĝena tarimarima ĝetotoĝato gabuna beĝea gana-ĝeĝeraĝiani. Mo totoĝa gabuna tu Barau na eura-viniani sitina. Senaĝi guba na karava emariĝoto, benamo Satani ĝena vetari doĝorori ema ĝararito.

¹⁰ Benamo Diabolo, eĝofarito tauna, tu karava moreri e salfa kouna nuĝanai beĝe fiu-ĝuraiani. Vevaĝa-rakava dagarana ema peroveta tarimana ĝofaĝofana tu monai varau ĝefiu-ĝurarito. Tauri toitoi tu monai mo karava moreri na vanaĝivanagi asi dokona asi magona beĝara-tanurini.

Kota Baregona

¹¹ Moĝa murinai au na terona kurokurona baregona ema terona iatanai etanuto tarimana aĝitaiato. Tanobara ema guba ĝia ĝoirana na ĝeraka-veĝitato, benamo asi ma ĝeĝita-ĝenoĝoirito.

¹² Benamo mase tarimari baregori ema keiri aĝitarito mo terona kurokurona baregona ĝoiranai. Benamo buka tari ekeorito. Mo buka ekeorito murinai tu, buka ta ma ekeoato, maĝuri bukana tu moĝa. Benamo mase tarimari mo buka tari moĝeri ai ĝeri veĝa etore-vanaĝirito ilailari ai Barau na ekota-vinirito.

¹³ Davarai ĝemaseto tarimari davara na ĝevariĝisito, e Mase ema mase tarimari iaukari ĝetanuni Gabuna (o Hades) na ĝevariĝisito. Benamo mabarabarari tata karakara ĝeveirito ilailari ai ekota-vinirito.

¹⁴ Benamo Mase ema mase tarimari iaukari ĝetanuni Gabuna (o Hades) na ĝevariĝisito tarimari tu, karava kouna nuĝanai ĝefufiu-ĝurarito. Mo karava kouna moĝa, mo tu mase vaĝa-ruaruana.

¹⁵ Bema tarima ta arana maĝuri bukanai asi ĝeĝoitaĝoato tarimana tu, mo karava kounai ĝefiu-ĝuraiato.

21

Guba ema tanobara variĝuri

¹ Benamo guba variĝuna ema tanobara variĝuna aĝitarito, korana tu guba guinena ema tanobara guinena tu ĝerekwa-rekwato. Davara maki asiĝi.

² Ma vanuĝa baregona veaĝana aĝitaiato, mo tu Ierusalemata variĝuna guba vanuĝana na Barau ĝenana emariĝoto-ĝoi. Ĝia tu veĝaraĝo variĝu vavinena ĝaraĝona ĝena ĝevaĝa-dabuĝaiani ema ĝevaĝa-vera ginikauani kavana.

³ Benamo garo baregona ta aseĝaĝiato terona na eiaĝomato, maĝesi ekirato, “Toma Barau ĝena tanu gabuna tu tarimarima ĝesi, ĝia toma tu tarimarima vefakari ai betanuni. Ĝia tu Barau ĝena tarimarimai beĝe iaĝoni, ema Barau tauĝena ĝia seviseviri ai betanuni, [ema ĝia ĝeri Barau ai beiaĝoni].”

⁴ Ĝia na matari gorari mabarari bedaurini. Mase e taĝi-vanorovanoro e taĝitaĝi guruna ta ema midigumidigu tu beĝe kori-ketovaĝini, korana tu dagara guineri mabarari ĝekorito.”

⁵ Mo teronai etanuto Tarimana maĝesi ekirato, “Ĝoĝitaia, au tu dagara mabarabarari avaĝa-variĝu ĝenoĝoirini.” Ma ekirato, “Maĝeri guruĝa tu notore-vanaĝiri, korana mai tu guruĝa moĝoniri ema ĝeri ai boĝo vetuĝamaĝi-dadamaĝini maki.”

⁶ Ma ekiraguto, ekirato, “Mabarari beĝe kori. Au tu Alefa ema Omega, (giniguinena ema ginigabina), matamana ema dokona. Bokana bekokeni tarimana tu au na maĝuri nanuna, eĝaruĝaruani dagarana, asi voina, baviniyani beniuani.

7 Rakava e meto bevaĝa-darererini tarimana, ĝena kokore voina tu maĝeri mabarari beĝaunarini, ema au tu ĝia ĝena Barau ai baiaĝoni, ema ĝia maki au natugu ai baiaĝoni.

8 Senaĝi gari ai asi ĝeruĝa-gwaĝiĝini e asi ĝeveĝabi-dadamani tarimari, vei-rakava na ĝevevaĝa-mirot tarimari, vevaĝi-deba tarimari, ĝekimara-
rakaorakaoni tarimari, ĝemeĝameĝani e kwaivakuku getoma-rakarigo vini-
ani tarimari, ema ĝeĝofaĝofani tarimari, mabarabarari ĝeri gabu tu karava
moreri e salfa ĝeĝarani kouna. Mai tu mase vaĝa-ruaruana.”

Ieruselema variĝuna

9 Ma aneru ta au ĝegu ai eiaĝomato. Ĝia tu mo aneru 7 guinenai ĝimari tu diĝu 7, mo diĝu nuĝari ai tu tarimarima vaĝa-midigu-midiguri dagarari oreri na ĝevonuto aneruri ta. Ĝia eiaĝomato, benamo au ema kiraguto, ekirato, “Noiaĝoma, be veĝaraĝo variĝu vavinena nama vaĝa-ĝitamu, ĝia tu Mamoe Natuna ĝaraĝona!”

10 Benamo Barau Iaukana na eborogiguto, ma aneru na ĝoro baregona e mauka kenenena ĝana eĝwa-iaĝoguto. Benamo monana vau siti veaĝana, Ieruselema, Barau ĝenana guba vanuĝana na emariĝoto-ĝoi evaĝa-ĝitaguto.

11 Ĝia ĝenai tu Barau marevana mamana emamato-ĝoi, ema siti marevana vetoĝana tu fore namoka-namokari voiri asi keikeiri kavana, ema iaspa forena, fore veĝiaveĝiana kavana emamato-ĝoi.

12 Ĝia maĝuna tu asikeikeina ema maukana, ma ĝatama bokana tu gabanana ruarua (12). Mo ĝatama-boka 12 tu aneru 12 na ĝeĝita-ĝaurito-ĝoi. Mo ĝatama-boka tata iatari ai tu Isaraela doĝorori tata arari ĝetorerito, mo tu Isaraela doĝorori 12 moĝeri.

13 Ĝatama-boka tu toitoi ĝaro eraĝeni rekenai (o east), ma toitoi ĝaro evariĝoni rekenai (o west), ma debana rekenai (o north) toitoi, ema gabina rekenai (o south) toitoi ĝeveirito.

14 Vanuĝa baregona maĝuna tu korana o duĝu foreri 12 iatari ai ĝevaĝa-ruĝa-vaisiato. Moĝeri fore iatari ai tu Mamoe Natuna ĝena apostolo 12 arari tata ĝetorerito, fore ta ara ta, ma fore ta ara ta.

15 Au ĝesi ĝaguruĝa-guruĝato-ĝoi mo aneru moĝa ĝimanai tu makamaka rulana o vevaĝa-vetovo dagarana, golo na ĝeveiato dagarana. Mo rula monana vanuĝa baregona e ĝatama bokana ema maĝuna bemakarini.

16 Siti ĝevaĝa-ruĝaiato daĝunina tu vasivasi (4), e ĝena baĝaka ema mauka tu ilaila. Mo aneru na siti vevaĝa-vetovo dagarana na etovoato, makana eĝabiato tu stadia 12,000 o 2,400 kilomita. Ĝia ĝena mauka e baĝaka ema varage maukana tu ilaila moĝo.

17 Maĝuna ĝena barego maki etovoato, makana tu kiubit 144 o 70 mita. Tarimarima ĝeri vevaĝa-vetovo dagarana mo aneru na eĝauvei-iaĝiato tu moĝesina.

18 Vanuĝa baregona maĝuna tu iaspa, fore marevari asi ĝadara dagarari, na ĝeragaĝato, ema siti tauĝena tu golo namo vedaureari, ekimorekimorerini galasi maki ĝevanaĝirito golori na ĝeragaĝato.

19 Vanuĝa baregona maĝuna ĝevaĝa-ruĝaiato korana o duĝu foreri tu fore namoka-namokari irauirauri na ĝevaĝa-veraiato: Duĝu forena giniguinena tu iaspa forena, vaĝa-ruaruana tu safai, vaĝa-toitoina tu kalakedo, vaĝa-vasivasina tu emeral,

20 vaĝa-imaimana tu sadoniki, vaĝa-6-na tu konilian, vaĝa-7-na tu krisolait, vaĝa-8-na tu beril, vaĝa-9-na tu topas, vaĝa-10-na tu krisopres, vaĝa-11-na tu haiasin, vaĝa-12-na tu ametis.

²¹ Mo ġatama-boka gabanana ruarua (12) moġeri tu tata galasi foreri o pel voiri barego lelevaġiri e marevari irau veġata na ġeveirito. Ġatama-boka ta pel ta, ġatama-boka ta pel ta. Siti dabarana baregona tu golo namo vedaureana na, noġa galasi kavana na ġeveiato.

²² Vanuġa baregona nuġanai Rubu Veaġa ta asi aġitaiato, korana Vereġauka, Iaru-korokoro Barauna, ema Mamoe Natuna, ġia tu mo vanuġa barana ġena Rubu Veaġa.

²³ Mo vanuġa baregonai ġaro mamana ema ġue mamana tu asi bemanani, korana Barau marevana mamana monai bemanani, ema Mamoe Natuna tu mo siti ġena lamefa.

²⁴ Tanobara mabarana besena tu ġia mamanani beġe rakani, ema tanobara vereri o kiniri mabarari na dagara e farefare marevari namori monai beġea ġwa-toġarini.

²⁵ Ġaro sebona ta maki vanuġa barana ġatama bokana asi beġe biririni, korana mo siti tu boġi na asi beġabi-ġauani.

²⁶ Tanobara irauirau mabarari ġeri farefare marevari ema ġeri taġa mabarana ġia ġena beġea ġwa-toġarini.

²⁷ Dagara ma mirona ta tu asi beraka-toġani, e maiaka ema ġofaġofa veiġari beveini tarimana ta maki asiġina ġinavaġi beraka-toġani. Dei-dei Mamoe Natuna ġena maġuri bukanai arari etore-vanaġirito tarimari ġereġari moġo beġe raka-toġani.

22

Maġuri nanuna ġarukana

¹ Moġa murinai aneru na maġuri nanuna ġarukana evaġa-ġitaguto. Mo nanu tu nega-vaġura-vaġurana galasi kavana. Ma mo nanu tu Barau ema Mamoe Natuna ġeri terona na eġaru-rosito.

² Siti dabarana baregona nuġana ġana ġeġaru-iaġoto-ġoi. Mo ġaruka rikina reketa-reketai tu maġuri ġauri ġetubuto. Mo ġau tu ġue tata nuġari ai ġwaġwari ġeġorato-ġoi, mai tu laġani sebona nuġanai nega vaġa-12 ġeġwato-ġoi; ema ġau lauri na tanobara mabarari beseri evaġa-namorito-ġoi e evaġa-maġuririto-ġoi.

³ Monana bevesinani beiaġoni, tarima ta iatanai o tanobara iatanai tovoġa ta tu asi ma betanuni. Barau ema Mamoe Natuna ġeri terona tu vanuġa baregona nuġanai, ma ġena vetuġunaġi tarimari na vetuġunaġina beġe iaġo-vinini.

⁴ Ġia ġoirana beġe ġitaiani, ema ġia arana maki ġia bakuri ai betanuni.

⁵ Monai boġi tu asiġina. Lamefa ema ġaro mamari ta asi beġe ġitaiani e asi beġe urani, korana Barau, Vereġauka na mama bevinirini. Ema ġia tu vere beġe tanu-vanaġi vanaġini.

Iesu Vereġauka ma beġenoġoi-iaġomani

⁶ Benamo mo aneru na au evaġa-guruġaguto, ekirato, “Mai guruġa tu moġoniri ema ġeri ai maki bovetuġamaġi-dadamaġini. Vereġauka, ġia laukana tu peroveta tarimari mururi na eguruġani Barauna, ġena aneru etuġuato, ġia ġena vetuġunaġi tarimari kara dori ġeġorani dagarari bene vaġa-ġitari ġana.

⁷ Ġoseġaġi, au tu dori ai aiaġosini. Mai buka nuġanai peroveta guruġari bekorana-iaġirini tarimana tu bene iaku.”

⁸ Maiġeri dagara aseġaġirito ema aġitarito tarimana tu au, Ioane maiġegu. Maiġeri dagara aseġaġirito ema aġitarito nai tu, ekira-varaguto ema evaġa-ġitaguto aneruna kwakuna koranai avetui-tarito, natoma-rakarigo vinia atato.

⁹ Senaġi ġia na ekiraguto, ekirato, “Maniġesi asi novei. Au tu ġoi, e ġoi tarikakamu peroveta tarimari, ema mai buka guruġana ġekorana-iaġirini tarimari ġesi ilaila, Barau vetuġunaġina aiago-vinini. Barau notomarakarigo vinia!”

¹⁰ Moġa murinai ekiraguto, ekirato, “Mai bukai peroveta guruġari asi bono kada-ġauri, asi bono kure-toġari, korana nega tu varau bekavinagi.

¹¹ Vei-rakava tarimana bene vei-rakava-iaġo roġo, veġa mirori eveini tarimana veġa mirori bene vei-iaġo roġo, veġa iobukaiobukari eveini tarimana veġa iobukaiobukari bene vei-iaġo roġo, ema veaġai etanuni tarimana veaġai bene tanu-iaġo.”

¹² Iesu maiġesi ekirato, “Goseġaġi! Au tu dori aiagosini! Tarimarima ġeri ġauvei voiri tu au ġegu ai, be aġwa-iaġosirini. Tarimarima mabarari ġeri veġa e ġauvei ilailari ai voiri bavinirini.

¹³ Au tu Alefa ema Omega, (giniginena ema dokona), au tu tovtovona veġata ema magona.”

¹⁴ Ġeri dabuġa ġeġuriġirini tarimari tu beġe iakuni. Ġia tu Barau na maoro bevinirini, maġuri ġauna ġwana beġe ġaniani, ema vanuġa baregona ġatama bokana na beġe raka-toġani.

¹⁵ A kwaiva (o vei-rakava tarimari), ġemeġameġani tarimari, ġekimani e ġeveġura-vanaġini tarimari, vevaġi-deba tarimari, kwaivakuku ġetomarakarigi viniani tarimari, ema ġofaġofa ġeuradikani tarimari, mabarabarari tu siti murikanai beġe tanuni.

¹⁶ “Au, Iesu, na ġegu aneru batuġu-iaġosia, ekalesia doġorori ġeri mai vari moġonina ġomi neasi vaġa-ribami ġana. Au tu Davida garakana ema ġia ġenana aiagomato Tarimagu. Au tu laġani visiguna, ma mamana baregona.”

¹⁷ Iauka Veaġa ema veġaraġo variġu vavinena ġekirani, “Noiaġoma!” Ema beseġaġini tarimana maki nekira, “Noiaġoma!” Bokana bekokeni tarimana bene iaġoma; ema beurani tarimana, mai maġuri nanuna, asi voina nanuna, bene niua.

Guruġa dokona

¹⁸ Mai bukai peroveta guruġari beġe seġaġirini tarimari mabarari akira-toreġaurini: Bema deikara na mai guruġa iatari ai guruġa tari betore-kaurini tarimana tu, mai bukai tarima vaġa-midiguri dagarari, ekiraġirini dagarari, Barau na ġia iatanai betore-kaurini.

¹⁹ Ma bema tarima ta na mai peroveta bukana na guruġa tari bekoki-vaġirini nai, ġia tu Barau na voina maġuri ġauna ġenai ema siti veaġana nunganai monai tanu-vanaġivanagi moġa, mai bukai ekiraġirini maiġeri, ġia ġenana beġabi-vaġirini.

²⁰ Maiġeri dagara bekiraġi-foforirini tarimana ekirani, “Oi, au tu dori aiagosini!”

Amen. Iesu Vereġauka o, noiaġoma!

²¹ Iesu Vereġauka ġena namo ema varevare-bara ġomi mabarami iatami ai bene tanu. Amen.